



Weneya Totonu Keraisu Yesunomo

Witu New Testament



Contents

MATIU	1
MAKE	66
LUKE	106
YONE	174
APOSELO	220
LOMANE	280
1 KORINE	309
2 KORINE	337
GALESIA	356
EPESASE	367
PILIPAI	376
KOLOSI	383
1 TESALONAIKA	389
2 TESALONAIKA	395
1 TIMOSI	398
2 TIMOSI	406
TAITASI	412
PAILIMONE	416
IBERU	418
YAME	441
I PITA	449
2 PITA	457
1 YONE	462
2 YONE	469
3 YONE	470
YUDE	471
YAMEPIANELE	473



Weneya Totono Keraisu Yesunomo

The New Testament in the Witu Language (also known as the Wiru Language) of Papua New Guinea

Nupela Testamen long tokples Witu long Niugini

Language: Witu (Wiru)

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1990, 1992 Wycliffe Bible Translators, Inc.

Copyright © 1990, 1992 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

2b1fdfd2-ac60-5c8b-9fcf-437ddd51e315

ISBN: 978-1-5313-0695-3

MATIU

Yesunomo Matiuyo Wia Mekaneya

Yesuno Kaua-mikiti Opia Tagama Nekenemo

(Luke 3:23-38)

1 Ipa Yesu Keraisu one kaua-mikiti opia tagama nekenemo. Yesu onepa Depidi-loeke tagene ago. Depidi onepa Eberame-loeke tagene ago.

²Eberame onepa Aisakene etene. Aisake onepa Yekobene etene. Yekobe onepa Yudaneka Yudane wamene-mikitaneke etene. ³Yuda onepa eya agota Peresi Siratane etene. Einagotapa nine Temayo opianeya. Peresi onepa Eserono etene. Eserono onepa Ramene etene. ⁴Rame onepa Aminadapene etene. Aminadape onepa Nasonono etene. Nasono onepa Salomonono etene. ⁵Salomono onepa Boasine etene. Boasi onepa nine Reapeyo opianeya. Boasi onepa Obedene etene. Obede onepa nine Ruseyo opianeya. Obede onepa Yesine etene. ⁶Yesi onepa ali atoa lukoa meane tobou ago Depidine etene. Depidi onepa Solomonono etene. Solomonono onepa Riaboamene etene. Riaboame onepa Abaisane etene. Abaisa onepa Esane etene. ⁸Esa onepa Yosopasene etene. Yosopase onepa Yoramene etene. Yorame onepa Usaiane etene. ⁹Usaia onepa Yosamene etene. Yosame onepa Easine etene. Easi onepa Esekaiane etene. ¹⁰Esekaia onepa Manasane etene. Manasa onepa Emosine etene. Emosi onepa Yosaiiane etene. ¹¹Yosaia onepa Yekonaiane etene ni Yekonaiane wamene-mikitane etene. Einapetepa

Iserere yene mone Babilone take aua nidikoa pekeneya.

¹²Nititikaneyake Yekonaiayo Sialeiele opianeya. Sialeiele onepa Serababelene etene. ¹³Serababele onepa Abiudene etene. Abiude onepa Elaiakemene etene. Elaiakeme onepa Esone etene. ¹⁴Eso onepa Sedokene etene. Sedoke onepa Ekimene etene. Ekime onepa Eliudene etene. ¹⁵Eliude onepa Eleasane etene. Eleasa onepa Masanene etene. Masane onepa Yekobene etene. ¹⁶Yekobe onepa Yosepene etene. Yosepe onepa Mariane ana. Mariayo Yesu opianeya. Yesu einagopa Keraisu wa ibini akene ago.

¹⁷Nipa Eberameke titimoa Depidike tugoapa opia tagama nekene ali-kitipa ali leme kakoa (14) ibini akene ali-kama wia mekaneya. Ni Depidike titimoa Yu yene Babilone take aua nidikoa pekene-pete tugoapa opia tagama nekene ali-kitipa nika ali leme kakoa (14) ibini akene ali-kama wia mekaneya. Wa Yu yene Babilone take aua nidikoa pekene-pete titimoa Keraisuke tugoapa opia tagama nekene ali-kitika ali leme kakoa (14) ibini akene ali-kama wia mekaneya.

Yesu Opianemo

(Luke 2:1-7)

¹⁸Yesu Keraisu opikilepa eya taneya. One nine Maria Yosepene tu pia kakene atoa Yosepeke wete poameneyake one mati kakedeka. Enipa Epetane Yominiyo taneya. ¹⁹Mati kakeneya mekale enekome one poatekago Yosepe wene kiyo akene ago tokome i atoa ya takamouno, ne wakuno, pa wane wetekakeneke ali atoane lene yoto wetekamou wa wene pia meaneya. ²⁰Nitoo mekaka Ali Munono edelo ago Yosepe pule pitikata nokome okome Depidike tagene ago Yosepe Maria neke natono moa latikade piti moamea. Mati kakeneya Epetane Yominiyo taneya

tokolo ni uku. ²¹Mariayo ali mati opikale one ibini Yesu wa oade toko. One yatenepa kini tokoi poaneleme kiwi moa labaneya kakoita toa moo tokolo tekene ni uku wa edelo agome oa pekeneya. ²²Enipa Ali Muno agono agale toawe akane agome papete wia mekapiane toa taatekamotoa enika enile tootapeneya. ²³Ali poamene tuatoa mati kakeneya mea ali mati opikale Imanuele wa ibini oi wa wia mekapianeya. Imanuele wapa Akolali toto-pala opia meko wa ekete oko.

²⁴Yosepe pule pitikata kamo a pokome Ali Munono edelo agome tamene wa okana toa tokome natono Maria en-emotaneya. ²⁵Nitoapa mati wete opiameneyakepa koua piameneya. Nitoa mekale ali mati opikale Yesu wa ibini akeneya.

Lou Witia Noko Lono Mea Ugu Ali-mene

2 Yesu opikilepa tobou ago Erodeyo Yudea ta talo toa meka-pete eni ta keneke piko Beseleme take opianeya. Nititikaneyake a tibuke tagoi yakome tokale enoai tane ago-mene lou witia noko lono ta tetemada kawa Yerusaleme take nekete ekete ²Yu yenane tobou meateko ago eni mati opikilepa maida taneya-pe. Eni mati opianeya tadeko wa wene tomotoa tokome weneya tagoi pade witia nome kakale enekoya tekete one pikota wadini tukuadete noko wa akeneya. ³Nimo okoli yatekete Yerusaleme take ako tobou ago Erodeyoka ete ali atoa peyameka ekete ekee enidopa edemo iki patu wa wene keda taneya kak- eneya. ⁴Nitoapa one mekuta Akolalike lodo yoai tane ali-kitika kini totono pine toa olaukane ali-kitika kiwi peya noe wa Erodeyo kayo oa motokome okome Keraisu wa papete ibini oa plane ago mani take opianeya pioo-pe-kale ekete

⁵one opiateko tapa Yudea ta keneke piko Beseleme ta. Enikepa Akolaline agale toawe akane ago padame eya wa wia mekapianeya.

⁶*Yudea ta keneke piko Beseleme ta nepa de ta deyake Yudea ta keneke eni pitikalimepa nepa paya tetepo takameamele toamoo. Wida neeke tawateko ago pade ako odene meko tobou agomepa sipi sipi kai talo tou toa anu Iserere yene peya talo takoa kawoo wa einagome wia mekapianeya wa e ali-kitame Erode-pala akeneya.*

⁷Nimo okoli yakatekoapa wene muno kakeneya meane ali-mene one kidene mekuta noe wa agale poti lukatekoa oa wetekakale nokoli okome wini tagoipa manipete titia witia noka-pe wa yakatekoa okome ⁸wini matipa tuku-kama tokoa kawatino, poe. Noanuka eni mati pikota neuwe tukupiane kei piouno, enamutuketepa wete no oto onoatino, poe wa Beseleme take wetekaneya. ⁹⁻¹⁰Nitikale yakamotekete pokoli lou witia noka lono titia kakale enekoina tagoi namolo kawa pekeneya. Namolo kawa pome eni mati meka yapu pitia tibuke yateta pome kapaneya. ¹¹Yateta pome kakale einali-mene mati meka yapu pote enekoli eni mati nine Maria-pala mekale enekete wadini tukupia kei pia kakeneya. Nitoapa kini kamo taneya kake ua nootokaneya yawa moa mati metekilepa golo kue yomo page kalono taneyata mekala taneya. ¹²Nitimotekete kini take wakapea peketepa Erode mekata koekoa padeka lono katekoa pekeneya. Nipa kini pitikoita Akolaliyo pule metekanakale toa nitaneya.

Idipi Take Pitoa Pekenemo

¹³Nititikaneyake Ali Munoyo moa wetekane edelo agome Yosepe pitikata pule menokome okome tobou ago Erodeyo wini mati wiademe tuku

toa kakono, wete kamoia wini mati nina-pala aua Idipi take toa poe. Oto wakapea ipete noe wane okou-peteka eida nepia meatino poe wa pekeneya. ¹⁴Nitikale Yosepeyo eni mati nina-pala aua likonu kamomotokome pitoa pome Idipi take pome mepaneya. ¹⁵Mekomepa Erode tukaleka pa eida meaneya. Enipa Ali Munagome one agale toaweia akane ago imo akamene wa akene toa taatekaneya. Eya wa akeneya. Anu mana Idipi take meaneya kayo oane mou.

Dedeya Ali Mati-kiti Wia Tukanemo

¹⁶Eni wene muno meane ali-menama Erode yotokatekoa kini take wakapea pekedekoli yatekome Erode kotimi yotaneia kaka matiyame eya taneya. One poyo ali-kiti Beseleme take moa wetekakome okome Beseleme takeka eni ta unukoa piko takeka meki mati-kiti mali takuta ponamene mati peya wia tukakapoe wa wetekaneya. Nipa eni wene muno meane ali-menamepa tagoi ipete witaka wa okoina wene tokome taneya. ¹⁷Nipa Akolaline agale akane ago Yeremaiayo papete oa plane toa taatekaneya. Eya wa oa pianeya.

¹⁸Rama take padame komo okomokale yakaneya. Nipa tumai mekome komo ka oa kakeneia. One mati-kitike Resele komo ka oa kakeneia tokome padameka one eni ela oyake teigakamele toameneya. Nipa one mati peya tuutapeneya tokome taneya wa Yeremaiayo oa plane toa taatekaneya.

Nasarese Take Wakapea Pekenemo

¹⁹Erode tuutukaneyake Ali Munono edelo ago pade Yosepe pitikata Idipi take nome pule menokome okome ²⁰wini mati wiadete tuku tokoa kakoina alikitipa tuutapeneyano, wini mati nina kini Iserele take wa aua poano, wete

kamoia pono wa pule mea pekeneya. ²¹Nitikale kamomotokome eni mati nina kini Iserele take koua wakapea pekeneya. ²²Koua poademe pokome yatekale tobou ago Erode luku man-ago Akeleasi mekome Yudea ta yopia meko wa okoimo kugu yakatekoa eni take wakapea pome mepaneya. Nipa edelo ago padame Yosepe pitikata pule metekome okana toa ²³Galili ta keneke piko Nasarese take pome mepaneya. Nipa Akolaline agale akane ali-kitamepa i toaweane uku matipa *Nasarese take ago wa ibini oi wa oa plane toa taatekaneya.*

Ue Motokama Yakene Yoneyo Oma Yakenemo

(Make 1:1-8, Luke 3:1-18, Yone 1:19-28)

3 Enipetepa ue motokama yakene Yone Yudea ta pikoka ali piamene lono taatekoa nokome eya wa mo wima yakeneya. ²Akolali a tibu meko agome ali atoa keleyo talo toateko tigotokono, kini tokoi poanele tewitikoia wawe wa mo wima yakeneya. ³Nipa Akolaline agale akane ago Aisaiayo papete eya wa wia mekapiane toa Yone taatekaneya.

Ali piamene ta ludu panagome eya wa mo wima yawoo. Ali Muno noateko ka nodokakapia one yawateko ka-kitika kiyotokakapia toatino toe wa taatekoa nokome oo wa Aisaiayo Yoneke oa pianeya.

⁴Yone einago taatekoa nokome kamelo kai pineme latiane mamina kawa one matiuka pitimekawe kai kepeneme latiane matiu kawa taneya. One nakene neepa apio-pala koeyapo ego ueta-kama nokala taneya. ⁵Nitane ago yakadete eya yene Yerusaleme takeka Yudea ta keneke piko ta-kitikeka Yodane ue liti piko ta-kitikeka mekoi-kiti one mekata nokala taneya. ⁶Nitoapa kini tokoi poanele i i wa toaweia ootapekoli nipa ue moe wa

Yodane uele kakome ue motokakala taneya.

⁷⁻⁸Einata einapete Parisi ali-kitameka Sadusi ali-kitameka ue moadete nokoli enekome okome beita, kipa kayane yagono-mikiti. Akolaliyo kibu moateko tigotoma nokono petoatino oto ita poe wapa teyo pubu okolo niki-pe. Kini namolonakaledo tewitiko a wakedekolipa nipa ali atoame enemotono, epetanele toma pamene. ⁹Eya wa wameamene. Kipa Eberamene kaua-mikiti mekono, Akolaliyo edoa kibu momotoa-pe wa wameamene. Akolaliyo i piko kue wane-kiti moa Eberamene mana-mikiti oyake latikakamele toko. Nitamele tokono, kipa Eberamene kaua-mikiti meko wa edoa mate agale oadete-pe. ¹⁰Yomo-kiti ku tuameadekale pinagome tue moa kawa toele pitikoo. Kipa tueme kawa pitikateko tigotokolo tekene ni uku. ¹¹Noanumepa kini namolonakale tewitiko a wamotoane tekene pa ue motokaku. No litimotokakome ele kule telekole toa no moa patukako ago noademe toko. Nopa pa ago tekene one kawa yeneka oyake piko a katekamele toamoko. Einago nokome ali atoa pa ue motokameneya Epetane Yomini-pala toeta motokademe toko. ¹²Witi ku takoa motokagome-kiti one tapepora moa nokome witi ku witikatekoapa yaku pupulegeme popokoa aua pomotoa tokome pokotoa ate pitikakala too. Nitoapa ku pitoa auma kakale witi ku lobutua piko yapu keneke moa pitikoai too. Ni yaku koukoa moapa nokoa-kama kako toe mine pitikoai too wa Yoneyo akeneya.

Yesuyo Ue Motanemo

(Make 1:9-11, Luke 3:21-22)

¹³⁻¹⁴Yesu Galili ta tewitiko a Yodane ue yotoko lono Yone mekata nekeneya. Yoneyo ue motokamotoa tokome ni

nekeneya. Nitikale ue motokamademe wakome okome uepa neme no motokamedekono, anume ne edoane ue motokamotoa-pe wa okale okome ¹⁵mena, opipa ue motokoa wane i nukuna. Akolaliyo ta wa okale-kama tamedekolo tekene ni uku-kale okome nipa nitouno ta wa ue motokaneya. ¹⁶Nitikale Yodane ue matanu pogatekoa pokome enekale eina eina tibu patetepikale Epetane Yomini ini weuwe keneya a tibu mea nome oneke pitanokale enaneya. ¹⁷Nitikale a tibuke agale ludu nokome okome wini agopa anu kolotini ago, anu managono, one tokoleke kolotine meku wa akeneya.

Setanuyo Yesu Likoa Enanemo

(Make 1:12-13, Luke 4:1-13)

4 Nititikaneyake Epetane Yominiyo Yesu ali piamene take koua pokomepa Setanuyo likoa enemotoa tokome aua pome mekapaneya. ²Nitaneyake ta pataka padeka noi kakoa (40) ponoka toa nee nakileka toameneya kobu tokale meaneya. ³Kobu tokale meaneya Yesu likoa enatekago nokome okome ne Akolaline mana tadekalepa nipa ika i piko kue-kitipa neke noateko palawe wane-kiti latiano ta wa likoa enekome okale okome ⁴eya wa wia mekaneya pikono, yaka. *Mea kawadetepa pa nee-kama moa noameneya Akolaliyo oka toa-kama yakoa moamene wa wia mekaneya piko wa Yesuyo okale* ⁵Akolaline Yerusaleme take aua pome tobou losu yapu muno waneke moa kakakome okome ⁶ne Akolaline mana tadekalepa ita kawa keika tiga-na. Neekepa Akolaline bokuke eya wa wia mekaneya pikolo tekene ni uku. *Akolaliyo ne i agopa wedoa yopia kamene wa one edelo yatene yameoo. Nitikale ne tugoa ogo eya nakaya tokale kini yoname lekamonoi.*

Enimopa Akolaline bokuke wia mekaneya pikono, nepala padeleka toamoono, tigaketika wa Setanuyo likoa enekome okale okome ⁷ Akolaline bokuke eya waka wia mekaneya piko. *Neke Ali Muno Akolali likoa enameamene* wa wia mekaneyano, wini okole toamou wa wakeneya. ⁸ Nitaneyake Setanuyo Yesu aka mati kakene tono tobouke moa aua pome kakapaneya. Nitoapa ako tobou ali-kitame yopiane ta piko peya ni eni ta-kitike koniyoya peya yametekome okome ⁹ anu kawane pitalogake no kowitikalepa nipa eni ta piko peya ne ako odene tobou ago meke talo toa wane yametapeouno ta-kale okome ¹⁰ Setanu ne ete pa. Akolaline bokuke eya waka wia mekaneya pikono, yaka. *Neke Ali Muno Akolali einagoke odene nate wene pianeya mea kowitamene. Losule tikilepa onekele odene takoa tamene* wa Yesuyo okale ¹¹ Setanuyo Yesu tewitiko pokale edelo ali-kiti one mekata note auapenanya.

**Yesu Galili Take Mea
Titikome Tanemo**

(Make 1:14-15, Luke 4:14-15)

¹²⁻¹³ Wa naniko Yone po yapu pitikaneya wa okoimo kugu yakamotokome Yesu Galili take wakapea pome mepaneya. Nitoapa eida me me toomotokome Kapaneame take pome mepaneya. Eni taapa Galili ue matanuke latiane ta. Sebulane Napesalai tata keneke piko Kapaneame eni take pome mepaneya. ¹⁴ Nipa Akolaline agale akane ago Aisaiayo papete eya wa oa plane toa taatekoa taneya.

¹⁵⁻¹⁶ *Sebulane ti-pala Napesalai tita kipala eya wane ukuno yakamene. Kini wini Galili mine lonoka Yodane ue lonoka mone yatene awia note mekala tokoiyake eya wane uku-ye. Wini take yomiyomu keneke mekete enekoli pa*

tokaya tubeya wane witakale enoi. Yomiyomu katoganeya tuadete meou toa pa meki-kiti wida mekika pa pi-tatapeademe toko wa Aisaiayo Akolaline bokuke papete wia mekaneya.

¹⁷ Eni agale taatekoapa enipete titimoa Yesuyo mo wima yakome okome Akolaliyo kiwi talo tokole keleyo witateko tigotoma nokono, kini namolo wene wia wamene wa oma yakeneya.

**Mou Tagi Tane Ali-mene
Takoa Motanemo**

(Make 1:16-20, Luke 5:1-11)

¹⁸ Yesu Galili ue mine matanu ludu kokotoma ponokome enekale ali takuta odene wamename mou tagi toa kakoli enaneya. Panago Saimone one pade ibini Pita wa akene ago wamene Aderutame kini tanele tekete mou tagi toa kakoli ¹⁹ enekome okome mou tagi toa kawou toa ali atoa motokakete toatikile olaukouno, no litima noe wa okale ²⁰ eina eina kini tagi ka eida tewitikalogo litima pekeneya. ²¹ Nitaneyake Yesu kutu pokome enekale odene wamena Yame Yoneta etene Sebedi toa ue dipike mekoli enaneya. Einagota kiniketai-pala ue dipike mekete tagi ka pilianeka lipua mekoli enekome okome yukuyagota wete noe-ye wa kayo oma ponokale ²² eina eina einata kiniketai ue dipike memotoa Yesu litima pekeneya.

**Yesuyo Ali Atoa Olaukoa
Latekoa Tanemo**

(Luke 6:17-19)

²³ Yesu Galili ta ludu pima yakomepa losu yapu kaka toa pome olaukoa ni Akolaliyo ali atoa talo tokole i i wa kini wene epetekanemo oma pome ni eya kuya kini tane yene peya latekatapea taneya. ²⁴ One eni toma yakenemo Siria ta ludu oa puputikatapeneya tokale dikane notokane yene taneya meane ali atoa one mekata note koukoai

taneya. Nipa yeneme tukete tete mokoa kakene-kiti ni ipono awitaneya meane-kiti ni leau akeneya meane-kiti ni kawa yonota wia mekaneya meane-kiti enika eni ali atoa kini oya-laweme Yesu kakata aua nokala tokoli latekoa wetekakala taneya. ²⁵ Nitaneyake ta piko peya Galili ta Dekapolise ta Yerusaleme ta Yudea ta Yodane ue lou witia noko lono piko ta enika eni ta ludu pitane ali atoame one litima penaneya.

**Yesu Tono Tobouke Pome
Mekome Olaukanemo**

5 ¹⁻² Eida oboa kakoi-kiti enomotokome Yesu tonu pade lewia aya waneke pome mepoka. Nitikata one oyali-lawe note mekoli one tepene meaneya yawa eya wa olaukoa meka.

³ Kini weneme Akolalinele nateleka takamele toamoko wa oneke-kama wene tuganeya meki-kiti kolotine meati wane uku.

Akolaliyo one pawe toa talo toko taapa kinino, noe wa kiwi yameoo tokolo tekene ni uku.

⁴ Komo oa tumai keneya meki-kiti kolotine meati wane uku.

Akolaliyo kini eni ela teigoo tokolo tekene ni uku.

⁵ Ni poti wene pianeya mea utanele-kama toa meki-kiti kolotine meati wane uku.

Ta piko peyapa kini wa Akolaliyo kiwi yameoo tokolo tekene ni uku.

⁶ Ue nodome-kiti tuaneya meou toa Akolaline kiyo akene peku-kama noadiya wa wene pia meki-kiti kolotine meati wane uku.

Akolaliyo one eni peku lawetekale noa tagatapeoi tokolo tekene ni uku.

⁷ Ete ali atoa kibu moameneya yono lukoa meki-kiti kolotine meati wane uku.

Akolaliyo kiwika kibu moameneya yono lukoa meoo tokolo tekene ni uku.

⁸ Kini tepene poane wene takoa koikatapeneya meki-kiti kolotine meati wane uku.

Eni ali atoame Akolaline lene timini enoi tokolo tekene ni uku.

⁹ Poi ete oto wa teitakutukoa meki-kiti wini poi wia pitikoe wa moa kawikama piki-kiti kolotine meati wane uku.

Akolaliyo kipa one mana kono-mikiti wa oo tokolo tekene ni uku.

¹⁰ Akolalinele takama yawou wa kiyo akenele toma pikileke tete moma piki-kiti kipa kolotine meati wane uku.

Akolaliyo one pawe toa talo toko taapa kinino, noe wa kiwi yameoo tokolo tekene ni uku.

¹¹⁻¹² Anukule takama yakike ete alikitame tea agale oa tete mea i yene kime poanele tiki wa kapene agale oa tikilika kolotine meati wane uku. Nitikikepa a tibu pine epetaneya-kama enatikiyano, nitoa kamotono, ke wa kolotine meati wane uku. E yename kiwi tete eni metekipa nipa kini kaua-mikitame papete Akolaline agale toawe akane alikiti tete mema nekete tane toa totoka opi nitikino, ke wa kolotine meati wane ni uku wa Yesuyo oka.

Kusa-pala Patake Pedia Akenemo

(Make 9:50, Luke 14:34-35)

¹³ Kipa ali atoane nee eyake takoa nakina to wane adeka plane uku. Too pade me pokome meke toamokolopa edoa wa meke takamotoa-pe. One me pekeneya tokome toatekale piamokale pinagome akolono paka kaua mitapeoo. Nitaney pikale tokome ali atoame kau-toa witia wawei.

¹⁴ Anu oya-lawe kimepa ta piko peya meki-kiti pa takatikiya wane adeka plane uku. Ali atoame tonu toboukedo ta latikolipa nipa keleyo eni latianeya kawoo. ¹⁵ Panagome-kiti one labo

tole udukakomepa okolo petene moa kautalogakoya mena. Nitameneya ali atoa yapu mekita pa keleyo toa kamotoa tokome labo piatikita moa piko. ¹⁶Eina toa yete pade ali atoa pa takama pamene. Kini Akolalinele epetekoa takama pikile enekete a tibuke meko Atai Akolali-pala ke wa oa one kei pia tomotono, nitamene wa Yesuyo oka.

Yesuyo Mosesene Totonoke Olaukanemo

¹⁷Mosesene totonoka Akolaline agale toaweaa akane ali-kitane agaleka no i agome katekoa wawademe noko wa wene piameamene. Enile toadene nokouya mena. Kini oa pianele taatekoane toadene ni nuku. ¹⁸Nipa eya wa wene taneya meamene. Tibu itonota wete takoa poameneyake eni totono wia mekane toa etene nateya bi mekamu tane-kitika pake katekapitikoa wawameneya pa pia kawoo. Nipa Akolaliyo papete wene toopianele peya wete taatekameneyake pa pia kawoo. ¹⁹Eni totono piko toa natele deyaka katekapitikakome litia toameamene wa olaukako agopa nipa Akolaliyo ali atoa talo tokome dikako ago etene keku ago tetepo takoo-mo. Wa eni totono piko toa natele deyaka katekameneya peya litia tootapekome ete ali atoa kimeka litia tootapeamene wa olaukako agopa nipa Akolaliyo ali atoa talo tokome dikako ago etene ako ago tetepo takoo-mo. ²⁰Akolalinele takaku wa wene piketeke kini totono pine toa olaukaki ali-kitameka Parisi ali-kitameka onekele takakete tiki toado moa patukameketepa Akolaliyo talo toko take edoa pote mepadete-pe.

Timini Nakeneleke Olaukanemo

²¹Yete pade ali atoa wia tukameamene, ni panagome panagodo wia tukakalepa kini take koiso yatekaka ago mekata

lia aua pamene wa papete olaukama nekeneya-mo. ²²Noanume eya wane wini ukuna-ye. Panagome one oya ago-pala kotimi yotokalepa nipa koiso yatekakago mekata lia aua pamene. Wa panagome pade ago-pala nepa lu oko ago wa-kitido tedu metekalepa nipa tube koisoke Kanosolo ali-kiti mekoita lia aua pamene. Wa panagome panago-pala nepa nego noma yako ago wa poanemo okomepa nipa tukome poane take toe mine mekota poo. ²³Nekeya pade Akolalike lodo yoai tiki walaike eida aua poke meade kakedo panagome nepala pademo oatekamo nami kakono wene tekepa eya topamene. ²⁴Nekeya eida tewitikalogoa einakago mekata peke odene weneta piata wa amene. Odene weneta piitakutukoapa wakapea noke nekeya Akolalike lodo yonamene. ²⁵Panagome-kiti i ago neme poanele tokanano, neke eina tokanakale koiso pitia yatekagome pitia yatekamotono, nee noo wa enemotokale opiado pekepa eya wa oa tamene. I ago ame koiso wam-atonu, odene weneta piata wa oa enamene. Nitameneya eniledo toamokalepa nipa einagome koiso yatekakago mekata lia aua poo. Nitikale koiso yakatekoapa ne i ago po yapu pitikapoano pa wa poyo ago moa metekale moa pitikapoo. ²⁶Nitikale neke take oto noateka kuedo odene tuane kue waneka katepitoa toamokalepa eida pa pia kawoo.

Atoa Lia Motikike Akenemo

²⁷*Mone padane atoa koua piameamene* wa papete olaukama nekeneya-mo. ²⁸Opi noanume eya wane wini ukuna-ye. Panagome pade atoa pa one leneme enetekoa ei einatoa kouane piadiya wa wene pikopa nipa wete eni koua pitane tetepo takakome toko. ²⁹Neke nimini yono lono kako leneme pinali ne toa potokakolopa wete toa wamene. Neke leneta takuta kakeneya

poane take moa pitikaneya mekaya tokale neke eni poane lene wete toa wamene. ³⁰Neke nimini yoname pinali ne toa potokakolopa nipa eni yono teja wamene. Neke yonota takuta kakeneya poane take moa pitikaneya mekayano, neke eni poane yono wete teja wamene.

Atoa Wakete Pa Wa Wetekakike Olaukanemo

(Matiu 19:9, Make 10:11-12, Luke 16:18)

³¹Neke atoa wawadepa nipa namolo takoa ne wakene wakuna wa pipia wia meetekoapa pa wa wetekamene wa papete olaukama nekeneya-mo. ³²Opa noanume eya wane wini ukuna-ye. Atoame eko ali kode noameneyake aname pa wado wakomewa poanele eni toko. One atoa pade alike edoa pomotoa-pe. Atoa pade alikedo pokomewa poanele onemeka toko. Nipa one aname tokoleke atoameka poanele eni toko. Eko agome wakene atoado panagome motokomewa nipa mone moamateko atoa eni motoko.

Iya Tija Eya Tija Wa Wameamene

³³Eya wa papete olaukama nekeneya-mo. *Padele-kiti toade iya tija eya tija wa neke oka toapa kotu kakoa tamene. Padeleka wene kayapea katekameamene. Ali Muno tija waka neke oka toa-kama tamene* wa papete olaukama nekeneya-mo. ³⁴Opipa noanume eya waneka ukuna-ye. Padele toadepa iya tija eya tija wa ikile toameamene. Padele toadepa tibu tija wa wameamene. Tibupa Akolaliyo ali atoa talo toa one mekoya tokolo tekene ni uku. ³⁵Padele-kiti toadepa itono tija wa wameamene. Itonopa Akolali one kawa pogakoa mekoya tokolo ni uku. Yerusaleme ta tija waka wameamene. Eni taapa ako odene meko tobou agono ta tokolo tekene ni uku. ³⁶Wa padele-kiti toadepa neke tobou tija wa wameamene. Neke toboukewa

yo e pineka liane pine odeneka witakoa tamele toamoko. ³⁷Nipa padele tou wa ekepa ee tou wa oa, toamadepa e'e toamou wa oa tamene. Pademo kibutukakutukoa eya tija kuya tija wa okapa nipa Setanuyo wene meteka toa eke too.

Toto-pala Poanele Taneleke

Nami Witikete Toatekomo

(Luke 6:29-30)

³⁸Panagome eko aline lene kiime eya wia togakalepa one lene kiime eya topo takoa wia togamene wa papete edikoa olaukama nekeneya-mo. ³⁹Opipa noanume eya wane wini ukuna-ye. Nepala padele toa potokakago-pala ete poaneleme topo takameamene. Nitameneya panagome neke nimini yono lono waneke witikalepa ewa yono lono wanekeka wia wa yameamene. ⁴⁰Ni panagome-kiti neke tigini mamina mou wado ne koisoke lia aua pokalepa nipa tokoo kako maminaka moa wa meamene. ⁴¹Panagome one kopapu neme aukoa noo wa dekoa moa aukoa kilomita odeneke lia aua pome kakome ne wakapea pa wa wetekakaleka one kopapu-pala kilomita takutake aua pome pikapamene. ⁴²Panagome nekeya pade mano wa oikiledo tokalepa nipa eni oikaya meamene. Wa panagome nekeke padeya-kitido nami kakoa moademe okalepa e'e, meamouno pa wa pade wameamene.

Poi Teiane Yene-pala

Topo Takakete Toatekomo

(Luke 6:27-28, 32-36)

⁴³Papetepa eya wa olaukama nekeneya-mo. *Neke oya ali atoake wene mekoa meamene. Ni nepala poi teiane yene-pala kotimi luaneya meamene* wa olaukama nekeneya-mo. ⁴⁴Opipa noanume eya wane wini ukuna-ye.

Kipala poi teiane ali atoake wedoa wene mekoa meamene-ye. Ni kipala toa potokoa tete mea tiki-kitipa Akolali neme auapea ta wa kini kowitikamene. ⁴⁵Nipa a tibuke meko Atai Akolaliyo kipa one mana kono-mikiti tetepo takoa yopimotono, nitamene. Akolali einagome ta piko peyake pitiki peya pewe witikome eya toma poko. Epetanele toma piki-kitika poanele toma piki-kitika kini kini mekika ta epetekoa patamotoa toko. Ni kiyo akenele toma yaki yeneka kiyo wamenele toma yaki yeneka kini kini mekika ta nomotoa toko. Nitikono, eko pade ali atoa mama moa auapeamene. ⁴⁶Kiwike wene mekoa meki-kiti takoa wene mekoa mekilipa nipa Akolaliyo kiwi edoa kei pimotoa-pe. Beita, takesi kue motokama yaki ali-kitika edikoa ete oto wene mekanali yoma yaki. Poane ali-kitameke nitiki. ⁴⁷Ete yene enoa wawake kini oya-lawe odene ke wa yono mokala teketepa nipa ete yename tiki toa moa patukakete epetekoa tiki-pe. E'e mena. Akolaline peku noamiki yenameka edikakala tiki. ⁴⁸Kiniketai a tibuke meko agome ele kule tikilepa epetekoa toateko kotuke-kama toko toa toma pamene. Nipa kipala poanele tiki ali atoakeka wene mekoa meamene wa Yesuyo oka.

Ponopene Yene Mama Motekete Toatekomo

6 Yete pade ali atoa auapekilepa ali atoane lene yoto kakete toameamene. Ete-kitame kiwi kei pimotoa tekete Akolalinele edikoa takakilipa nipa kiniketai a tibuke mekome ke wa epetanele edoa topo takamotoa-pe.

²Ponopeneya meki-kitido nekeya pade tatia metekepa bera eya wiameamene. Nipa i agome ilepa i tokono enatoe wa yete pade ali atoame

ne kei pia ka omotoa toameamene. Wene takuta pianeya meki-kitame kini losu yapu-kitikeka ka katempa luduka ali atoane lene yoto pote kakete nile-kala tiki. Nitikala tikino, a tibuke enileke kini pine edoa enemotoa-pe. Itonokepa ali atoame kiwi kei wete pikoiya tokome wa a tibuke pade pine enamoi. Enipa etene nimini uku. ³Nekeya pade ponopeneya meki-kitido tatia metekepa pa neke lukoa meamene. Ile tokou wa toaweaa wameamene. ⁴Nitikale neketai Akolali padele padele paigakoa tikile eneko ago tokome neke eni tokanakale keleyo topo takoa ke wa ne kei pioo wa Yesuyo oka.

Akolali Kowitikete Oatekomo

(Luke 11:2-4)

⁵Akolali kowitiko a kakepa eya ali-kitame kowitikete tiki toa toameamene. Wene takuta pianeya meki ali-kitame kini losu yapu-kitikeka ka katempa luduka pote kakete keleyo kowitikala tiki. Enipa yete pade ali atoame enoa kiwi kei pimotoa tiki. Enilekepa a tibuke pine edoa enemotoa-pe. Itonokepa ali atoame kiwi kei wete pikoiya tokome wa a tibuke pade pine enamoi. Enipa etene nimini uku. ⁶Akolali kowitikepa akolono ali atoane lene yoto kake kowitameamene. Nitameneya neke yapu luku kago ketemoa meke paigakoa poti kowitoa meamene. Nitikale neketai Akolaliyo neke tokanakale keleyo topo takoa ke wa ne kei pioo. Ali atoame padele padele peya paigakoa tikile eneko ago tokome nitoo.

⁷Nitoo kowitoo mekepa Akolaline peku noamiki yename tiki toa kowitameamene. Dikane yename Akolali kowitiketepa agale kutu pa wapi kakakutukoa likoa pia kowitikala tiki. Nipa Akolaliyo yatekome kolotini nakale kini kowitikoimo etene yakoa too wa wene pikete tiki. ⁸Kime pade nitameamene.

Kime wete kowitameneyake kinekitai Akolaliyo kini kowitikete oatikimo i i wa wene toopia mekome tokome kini eni wene moademe toko. ⁹One nitane agono, eya wa kowitikala tamene.

Toneketai a tibuke mea kakago neke ibinipa ali atoame paya tetepo takameneya kei pimoto no ta.

¹⁰Neke ali atoa pawe toa talo toano ta. Neme ta wa okole-kama a tibuke meki-kitame litia tiki toa itonoke meki ali atoameka edikoa litia to-motono ta.

¹¹Tone opi noateko neepa neme moa lawetamene.

¹²Tone tokoo poaneleke po letu mekakana keetapeamene. Nipa toto-pala poaneleke tokoi yene kini eni tokoi poaneleke totome po letu mekakooona keetapekete toko toa nitamene.

¹³Padele padeleme toto etepea liamo-motono, yopikoa kamene. Poanele-kama tokagoke toto toa moamene wa Akolali kowitikala tamene.

¹⁴Ete-kitame kipala poanele tokoike po letu mekakoina keetapea ete wa nami wia kibu moamokolipa kiniketai a tibuke mekome kini poanele toma yakoinake po letu mekakana keeta-peapa nami wia kibu moamoo. ¹⁵Ete-kitame kipala poanele tokoike po letu mekakoina keamo a ete wa nami wia kibu motokolipa kiniketai Akolaliyo kini poanele tokoinake po letu mekakana keamo a nami wia kibu moo.

Nee Ue Eya Tekei Wawa Noamekete

Kowitikete Toatekomo

¹⁶Akolali kowitoane meou wa nee wawa pa meketepa eya ali-kitame tiki toa toameamene. Wene takuta pianeya meki ali-kitame ne wawa pa mekilepa kobu lene kakene tetepo

takoa tiki. Enipa ete-kitame ataiya i agome Akolalinea wedoa takama pokona wa kei pia ka omotoa tiki. Nitikino, Akolaliyo kiwi kei edoa pimotoo-pe. Ete-kitame kiwi kei wete pikoiya tokome oneme pade kiwi kei piamoo. Enipa etene nimini uku.

¹⁷Kime Akolali kowitadete nee wawa pa meketepa kini pine tapalome liitapea petome lomukaketikamene.

¹⁸Ete-kitamepa kini nee wawa pa meadekoile enamomotono, nitamene. Nitokolipa kiniketaiyo ke wa oa kini tokoinakale topo takoa kiwi kei pioo. Onepa ali atoame padele padele paigakoa tikile eneko ago tokome nitoo.

A Tibuke Kamoya Pala Pitikou Toa

Epetanele Toma Poatekomo

(Luke 12:33-34)

¹⁹Itonokepa eya kuya kamoya tuku toa oboa piameamene. Enika eniyapa itonoke pikota tiyome teia noa lameka yotokatapea kode agome yapu bulukoa nome kode moa aua pome toko. ²⁰Kime pade nitameneya, kini kamoya a tibuke pala pitikou toa epetanele toma pamene. Kini eni kamoya a tibukepa tiyome teia noamo a lameka yotokatapeamo a kode agome yapu bulukoa nome kode moa pikile-kitika toamoo tokolo uku. ²¹Kini kamoya piko takepa kini wene pitikaneya yakili tekene ni uku.

²²Labo tole yapu pa takalogou toa kini lenetame tepe kolotini eya pa takalogako. Lenetado epetaneya kakepa nipa tepe kolotinika pa tootapeneya kawoo. ²³Nitameneya leneta poaney-atado kakepa tepe kolotinika yomiyomu tootapeneya kawoo. Neke tepe kolotini pa takatekoyatapa pa toameneya kakepa nipa dika dika toamene yomiyomume agopa takatapeneya kawoo.

Kini Kepene Mama Moameamene

(Luke 16:13, 12:22-31)

²⁴ Panagomedo alita takutanele takakome takakomewa panago-pala kotimi yoa pupu takoa wa padena agoke wene mekoa pupu takoa too. Nipa panagoke wene tugakoa mea pupu takoa wa padena ago paya tetepo takoa pupu takoa too. Nipa Akolalinele takaketepa kamole toamadete wawa onekele odene takama pamene.

²⁵ Wa kini kepene mama moameneya meamene. Nipa noateku neepa edoane moane naku patu, noateku uepa edoane nomoane naku patu, kawateku maminapa edoane topo toane motuku patu wa edikoa wene keda taneya meameamene. Akolaliyo kini yomini tiginita tobou kakoa mama moapa kini noatiki nee mamina eya kekuya tetepo takoa yopiko. Enipa nimini ukutu-pe. ²⁶ Ini a tibuke pukaneya yakete tikile enekaketepa eya wa wene taneya meamene. Nipa edikakiya. Nee lene matamoa ipe kakoya nee wakoa moamoa kini noatiki nee moa piatiki yapu eya wiamoa tikiyake kiniketaiyo a tibuke mekome talo toa egeteko. Akolaliyo ini eya kekuya tetepo takoa mama moapa anu oya-lawe kiwi akoya tetepo takoa wedoa mama motoko. ²⁷ Anu oya-lawe kiwi panago tuatekou-pete tuamekene lou pini odeneka pa meou wa tepe ate keti enoai tekeka nitamele toamokale tuateka-petepa wete eni tuono, ²⁸ kawateku mamina edoane topo toane motuku patu wa wene keda taneya meameamene. Taage kaluga eya li ludu witakole enekaketepa eya wa wene taneya meamene. Nipa edikakoya. Po itia mamina latiamokoyake wedoa kalaneya witako. ²⁹ Ako odene tobou meane ago Solomonone einagome mamina epetaneya-kama moa kakome

wedoa kalakitikoa kakala taneyake taage kaluga eya kalaneya moa patukamele toameneya. ³⁰ Kaluga taage eya ei li ludu pa tekei witako. Nipa opi tou toa witakoyake podolikama alime wakoa moa toele pitikaki. Edikoa pa tekei witakoloka Akolaliyo talo toa kalotokako. One dikane ago tokome anu oya-lawe kini kawatiki mamina moa meoone, edekolo wene keda taneya meki-pe. Ae, Akolalike inapa wedoa wene tugameneya mekiya tadeko.

³¹ Nee edoane moane naku patu, ue edoane nomoane naku patu, kawateku mamina edoane moane kaku patu wa enika eniya mama moameamene.

³² Enika eniyapa Akolalinele peku noamiki-kitame mama moma yaki. Kime pade nitameamene. Anu oya-lawe kini wenepa a tibuke meko kiniketai Akolaliyo moademe tokoto-mo.

³³ Nitademeke one talo toko take wene kiyo akeneya mekete toatiki peku tobou kakoa lawetoono, one talo toko take edikoa meadiya wa wene piitikaneya meamene. ³⁴ Nipa podolio edeku patu wa kini kepene mama moameamene. Podolio opita Akolaliyo kiwi talo too tokolo ni uku. Ta pataka abuna keda enamuma pikino, podolio enamuatiki keda pade opi wene toopiameamene wa Yesuyo oka.

Yete Pade Ali Atoa Kikoa Akameamene

(Luke 6:37-38, 41-42)

7 Yete pade ali atoa kini tanele poanele tadeko wa kikoa akameamene. Akolaliyo kiwika kikoa akayano, toameamene. ² Yete pade ali atoa edikoa kikoa akakete tiki toa ete wa kikoa akakala toi. ³⁻⁴ Ae, anu oyago neke leneke yomo pudunukau pomotoake wene toameneya mekeke neke oyagono lenekedo kugu deya pekeneya eneke eke neke leneke kugu

deya pekeneyano, toane motokada wa-kiti oko. Neke leneke poka yomo pudunukau pinali neke wapa toa moamatekoyake oko. Edekolo oko-pe. ⁵Wene takuta pianeya meko ago neke leneke pudunukau poka yomo pinali neke wa namolo takoa toa moamene. Mootokoapa neke leneme wedoa enamele tokale meke neke oyagono leneke pekene kugu deya toa motokamele too.

⁶Akolaline takoa pikaneya tue-kiti kakoita moa pitikameamene. Eniledo tokolipa nootokoa kiwika kimeme t̄iaweā tadetapeoi. Yobo mayoka kai-kiti kakoita moa piameamene. Eniledo tokolipa paya tetepo takakete kawame kautoa witiapēoi.

Akolali Kowitikete Toatekomo

(Luke 11:9-13)

⁷Akolali kowitikolipa yakoa too. Padeya-kiti tuku tokoa kaketepa enamuoi. Kago wi wi tokolipa pinago nome pekapi kale tuapea poi. ⁸Edikoa kowitoa kakagomepa nipa one eni kowitikaya moo. Padeya tuku toa kakagomepa nipa one eni tuku tokaya enamoo. Kago wi wi toa kakagopa nipa pinagome pekapi noo. ⁹Neke managome palawe wane pade nouno mano wa-kiti okalepa kue wane pade neme yotokoa moa meo-pe. ¹⁰Ni mou pade nouno mano wa-kiti okalepa lene meaneya ali tania tukako kaya yotokoa moa meo-pe. Nitamoo-li. ¹¹Kipa poanele toma yaki-kitameke kini mati-kiti epetaneya-kama wene toa mekala tiki. Epetaneya moa mekala tiki toapa a tibuke meko kiniketaiyo etene moa patukakome anu oya-lawe kiwi epetaneya mati takoa moa mekala too. One mano wa kowitiki ali atoapa nipa mekala too.

¹²Eko pade ali atoame neke wene mokala tomotoapa nipa kini weneka

neme mokala tamene. Eni ukupa Moseseyo yametane totono pine toane ekene uku. Akolaline agale toaweā akane ali-kitame wia mekane agaleka pine toane ekene uku.

Nateya Kago Keneke Patukoa Pamene

(Luke 13:24)

¹³Akolali mekota poatiki ka keteponopa nateya dekatekaneya kakono, eni kago patukoa pamene. Ali atoa pote atupoatiki ka kago keteponopa etene yuane mati piko. Nitaneya tokome ali atoa kainya mati pote weamutuketepa poane take pokala tiki. ¹⁴Mea kama poatiki kaapa nateya deya pia kago-kitika etene dekatekaneya kako. Eni kaapa ali atoa natetekoame tuku toa enamutukala tiki.

Yomo Kū Tukole Takoa Enatekomo

(Luke 6:43-44)

¹⁵Pade ali-kitame Akolaline agale akaku wa kiwi pakeke sipi sipi kai tetepo takoa neketeke lene plane yokome keneya kimeme t̄iaweā tadekatapekome toko toa kiwi toa potokoa oa yotokoino, lene kia wedoa nepikoa kamene. ¹⁶Nekete tokoile eneketepa nipa kū poaneya eni tukono, Yesuyo oa pikanakago eni nekedeko wa wene toi. Noyokepa gerepi po kū tuamoa ni aulalukepa yomo piki kū tuamoa too. ¹⁷Yomo epetaneyakepa kū epetekoā tuoo. Yomo poaneyakepa kū potokoa tuoo. ¹⁸Yomo epetaneyake kū poaneya tuamoo. Yomo poaneyakepa kū epetaneya tuamoo. ¹⁹Kū epetekoado tuameadekalepa pinagome tue moa k̄awa poia toe mine pitikoo. ²⁰Nipa Akolaline agale akaku wa oake kapene wakoa iki-kiti nekete tokoile eneketepa kū poaneya eni tuko wa wene toi.

**Yesuyo Pade Ali Atoa
Kiwi Wene Toamuku**

Wa Akoa Wawatekomo

(Luke 13:25-27)

²¹ Ali Muno Ali Muno wa no kei pia iki peyapa Akolaliyo talo toko take poi wa wene piameamene. Agetai a tibuke mekome ta wa okole-kama yakoa tiki-kiti odene one eni take poi. ²² Wipitia ta pataka-pete ali atoa kainya matiyame no-pala eya wa oi. Ae, Ali Muno neke ibini wedekoanepa neke agale toaweane akoane ali atoake awitane ipono-kitika takoane wetekoane ele kule telekole toane tokouna wa nopala oi. ²³ Nimo okoli ekene kiwi nateyaka wene toamuku. Poanele toma yakoinakeya-kiti wete poe wane wiane lititapeou wa Yesuyo oka.

Yapu Epetekoa Wikete

Potokoa Wikete Tanemo

(Luke 6:47-49)

²⁴ Kipala i uku agale yakoa tiki-kiti kiwike dikoane adeka plane uku. Wene muno meane agomepa yapu wikome kue yaupea waneke motene pogoa wianeya. ²⁵ Wia peya takaneyake ta lobomoa pitikoa ueka leau akoya yoa pupulege awitikaka matiyameka yapu auameneya pa kawa kakeneya. ²⁶ Kipala uku agale yateketeke yakoa moamiki-kitike dikoane adeka plane uku. Wene meamene agomepa yapu wikome ue kibike motene pogoa wianeya. ²⁷ Nitaneyake ta lobomoa pitikoa ueka leau akoya yoa pupulege-kitika popokaka matiyame yapu kawa katekoa aua pitikaneya. Bu wa aua pitikaneya wa Yesuyo oka. ²⁸ Nimo ootokaneyake eida oboa kakoi-kitame ekete ²⁹ i olaukakome okopa Mosesene totono pine toa

olaukaki yename ikina toa wamokono, agale pinagomepa i okono, yakatoo wa ka oa kakoi.

**Yesuyo Kedime Nakene
Ago Latekanemo**

(Make 1:40-45, Luke 5:12-16)

8 Yesu tonoo aya wane mea keti toa pokale enekete ali atoa lewi lewita pia litima nokoi. ² Nitikoika kedi pitane agome Yesu kotukome wadini tukua kowitikome okome Ali Muno ago nemedo no i ago epetekouno wene pikepa nipa oyake epetekoano ta-kale ³ yoname one mitikatekakome okome nitouno ta. Kedime nakeneya neke eni yene takoa pomotoane uku wa mitikakome okaka eina eina takoa pootapeneya. ⁴ Nitaneyake Yesuyo okome okome ete ali atoa enekeka ne latekakumo toawe ikileka toamea. Nitameneya eya topoano pa. Ne i agopa kedi pitaneya mekanake opi i latoa kakona wa yete pade ali atoame wene tomotoapa nipa Moseseyo tamene wa papete oa planele topamene. Nipa Akolalike lodo yotokoai toko ago mekota peke padeya lodo yotokatekoya aua pake mepoano pa wa wetekaka.

**Tobou Poyo Agono
Pupu Ago Latekanemo**

(Luke 7:1-10)

⁵ Yesu Kapaneame take pome kakale Lomane yatene tobou poyo ago pade nokome okome ⁶ Ali Muno anu pupu ago pade one yapu walaike pa pia kakome muku tamele toamokome tete-pala moa mekono, einago auapea epetekakoano ta wa kowitikale okome ⁷ nipa winagopa latekapouno, pata-kale okome ⁸ e'e mena. Ipa pa ago kakene ukuno, anu yapu ne pata wane edoane kouane pomotoa-pe. Pa ne ita kake einago latoa kamene wa okalepa latoa poono, oano ta. ⁹ Nopa tobou poyo

ago padeke lokoane mekene ta wa okole-kama tuku. Nitiku toa nooke lukoa meki poyo ali-kitika anume toe wane ukule-kama yakoa tiki. Panago ne pa wane-kiti ukulupa yakoa poko. Wa panago no mekuta oto noo wane-kiti ukulupa yakoa noko. Anu pupu ago-palaka ile ta wane-kiti ukulupa nipa yakoa ukule takako. Edikoapa anu pupu ago latoa pa wa neme okalepa latoa poo wa tobou poyo agome oka. ¹⁰ Nimo okale yatekome Yesu wene kainya pianeya kakome one-pala obomoa nokoina yene-pala okome imopa i okono, yakoe. Mone yatene agomeke ipa oko. Iserele ago odeneka nooke edikoa wene tugo meadekole enamuku. ¹¹ Kipala i ukuno, yakoe. Mone pade take ali atoa kainya mati lou witia noko lonoka lou pipoko lonoka yeteka yukuka kawa Akolaliyo talo toko take note menokala toi. Nipa eya ali-mene Eberame Aisaketa Yekobe toa toge kikoa mekoita toge nee nopato wa note menokala toi. ¹² Kipa Eberame-loeke tagene yeneka Akolaliyo eida pawe toa talo too tokake opi poe wa yomiyomume dika dika toamene take moa pitikakale komo kãta nina toa pitikoa kawamoi wa Yesuyo oka. ¹³ Yesuyo nimo ootokoa tobou poyo ago-pala okome noanume neke pupu ago oyake latekamele toko wa wene teke winipa okono, neke wene moadene tukuno, poano pa wa oka. Poano pa wa okanaka eina eina one pupu ago latoa kakedeka.

**Yesuyo Ali Atoa Peya
Mati Latekanemo**

(Make 1:29-34, Luke 4:38-41)

¹⁴ Yesu Pitane yapu tuapea pome enekale Pitane natonane nine potu yene-tuaneya pikale enetekoa ¹⁵ one yono mitikatekakale eina eina one potu

yene takoa pokale kamokakome one nee takoa laweteka.

¹⁶ Lou pipokaka ipono awitane ali atoa peya mati Yesu mekota kiwi aua poono patoe wa kini oya-mikitame koua nokoli poane ipono-kiti wete takoa poe wa okale takoa pokala tokoi. Eya kuya yene tane-kitika aua nokoli latekakala toka. ¹⁷ Enipa Akolaline agale toaweake ane ago Aisaiayo oa pianeya toa taatekoa toka. Eya wa oa pianeya. *I toaweane uku ago taatekoa nokome toto peya eya kuya tane yene takoa wetekakomepa kabe koukoua pinali oneke wa weamutukou toa takoa wetekoo* wa Aisaiayo oa pianeya.

**Yesu Ne Litima Nou
Wa Akene Agota-pala**

Akenemo

(Luke 9:57-62)

¹⁸ Wa pade-pete ali atoa peya mati Yesu kakata unukapia kakoli enekome Yesuyo one oyali-lawe-pala okome eka ue matanuke witatono, patoe wa okaka ¹⁹ Yu yenane totono pine toa olaukaka-ago pade one kakata nokome okome ne pokaka opi litima pou-kale okome ²⁰ yanai ini eya kini piatiki yene kakoyake no Ali Yatenane Oyago naliyomo mokoane piatekuyaka toamokono, no oyake litia noo-pe wa oka.

²¹ Nitikale Yesu-pala opia yaka ago padame okome okome ne opii litima noatekuyake agetai tuaneya pikono, oloyo toomotekene ne litima nou-kale okome ²² Akolalinele takamekete tuaneya piou toa pa meki-kitame tuane ali atoa oloyo tomotono, tokamota. Opa nepa no litima noano no wa Yesuyo oka.

Pupulege Tadalita Teitanemo

(Make 4:35-41, Luke 8:22-25)

²³ Yesu ue dipike pome mekaka one oyali-kitame opia pato wa opia pekete pokoi. ²⁴ Mea poadete pokoika

pupulege tadalita kotikatapea uu wa noka matiyame ue pewikanokome ekolo lobututapeneyake Yesu pa atu pia kudaka. ²⁵One eni pitikaya liti one oya-lawe tegeteka tegeteka toa mekete kamotokakete ekete Ali Muno toto ueme atukamedekono, toa moano, kamao wa kamotokakoli ²⁶kamokakome okome dekolo piti motiki-pe. Inapa nooke wene wedoa tugamekete tadiki wa kamokoa kakome pupulege-pala pewikanoka ue-ta kikoa okale tokoo lapa eyaka waametekoa kilikoa meelogaka. ²⁷Nitikale enekete wene kainya pianeya mekete ekete pupulege ue minetameka ta wa okole yakoa eni tokono, i ago Yesupa edane ali patu wa ka oa kakeneya.

Yesuyo Ipono Awitane Agota Epetekanemo

(Make 5:1-20, Luke 8: 26-39)

²⁸Yesu eka ue matanuke katepitoa pome Gadara ta ludu yakaka iponokiti awitane alita takutame one kotua nokoi. Nipa tuane yene oloyo toai taneka mea nokoi. Lene pianeyata kakoi matiyamepa eni take yene peya eida poamadete tima tima toa yakeneya. ²⁹Nitane agotame Yesu kotukete ka telo ootapekete ekete Yesu nepa Akolaline manano, tota-pala edele toade noka-pe. Tota tete meateko oi wete noameneyake papete tete meade noka-pe wa telo tayo ootapea kakoi.

³⁰Nipetepa eka mati ege egeta kadukoa kakene kai kimi kee noa kakoli ³¹enekete einagotake awitane ipono-kitame Yesu kowitikete ekete toto takoa wetekakalepa kunuka ku kai-kitike awipoono ta wa kowitikoli okome ³²nipa poe wa okale takoa pootapekete e kai-kitike awipokoi. Nitikoli einaka eina kai-kiti payaneke kawa palake ketipea kiliti pote ue nakoa atutapeneya.

³³Nitikoile enekete einaka eina kai egetekoina yename ekete ekee wa kini ta latia pitikoika pitoa pootapekete ipono awitaneya yakoina agota-pala eniledopa eni toka wa kini leneme enekoinakamo opaneya. ³⁴Nitikoli yatekete Yesu kotupato wa udamao pote kotukete ekete tone i ta tewitikoano pa wa kowitoo kakoi.

Muku Toameneya Pa Pia Kakene Ago

Epetekanemo

(Make 2:1-12, Luke 5:17-26)

9 Yesu ue dipike peapetekoa pome mea one Kapaneame take eka matanuke wakapea pome mepoka. ²One eida pome mekata pade ali-kitame muku toameneya pa pia kakene ago leyo leyo toa aua note pinokoi. Yesu i agome kini oyago oyake latekamele toko wa wene tadekoile enekome Yesuyo okome anu mana neke toma nokana poaneleke Akolaliyo po letu mekakanapa keetapekuno, wene weye akeneya meamene wa Yesuyo oka. ³Nimo okale yatekete Mosesene totono pine toa olaukane ali padeka-kitame ekete beita, i agome Akolali tekome oko wa wene kikutua kakoli ⁴Yesuyo tetoa enekome okome wene wini poaneya mekino, dekolo tiki-pe. ⁵I ago-pala ukule tamele tadeko wa kime wene tomotoanepa edemo wane omotoa iki-pe. I ago neke toma nokana poaneleke Akolaliyo po letu mekakana keetapeku wane omotoa iki-pe. Wete kamokoa pa wane omotoa iki-pe. ⁶No Ali Yatenane Oyagome itonoke mekene ali atoame toma yakoi poaneleke Akolaliyo po letu mekakana noanume keetapeamele toko wa kime wene tomotoanepa i ago-pala eya wane ukuno, ne aua nokoina leyo-pala aua peke neke yapu poano, kamokoa pa wa Yesuyo einago-pala

okale ⁷ kamomotokome one yapu pome mepaneya. ⁸ Nitikale enekete eida oboa kakoi-kiti piti tokale kakete ekete ekee, Akolaliyopa eni telekole toateka peku tone yagono ago i ago lawetaneya tadeko wa Akolali kei pia kakoi.

**Yesuyo Matiu Einago
Kayo Oa Motanemo**

(Make 2:13-17, Luke 5:27-32)

⁹ Yesu eni ta tewitiko pokome enekale eya ago Matiu yo takesi kue motokoai tane yapu keneke mekale enekome okome no pukuka tone patono noo wa oma ponokale Yesu litima poka.

¹⁰ One yapu nee nopatono, pata wa Matiu yo koua pokale Yesu pome mekome nee noa meka. Nitikale takesi kue motokama yakene ali-kitika Mosesene totono litia toamene ali-kitika eida nekete Yesu-palaka one oya ali-kiti-palaka opia mekete nee nakoi.

¹¹ Nitikoli enekete Parisi ali-kiti Yesuno oya-lawe mekoita nekete ekete kini tikisagomepa takesi kue motokama yaki ali-kiti-palaka Mosesene totono litia toamiki yene-palaka opia mekome nee nakono, edekolo tokoto-pe wa onokoi. ¹² Nimo akedekoli yatekome Yesuyo okome dokosa agomepa yene toameneya meku wa iki-kiti edoa nome latekanomotoa-pe. Yene taneya meku wa iki-kitipa nipa nome latekanoo.

¹³ Akolaliyo akenemo one bokuke wia mekanemo ukuno, yakoe. *Eya kuya nooke mea lodo yokala tikiyake kote tokolo waku. Anu wenedo kekadetepa ete ali atoa ela moa mama moa tamene wa oka.* One eni okamo pine edoa piko patu wa wene kikutukoa meamene. Nipa poanele toamuku wa iki-kiti kini namolo poane wene wia wawe wane oadene nokouya mena. Nitamekene poanele tuku wa iki-kiti odene kini namolo wene wia wawe wane oadene nokou wa Yesuyo oka.

Nee Tekei Wawa Noamenemo

(Make 2:18-22, Luke 5:33-39)

¹⁴ Wa naniko ali atoa ue motokama yakene Yonene agale yakane ali-kiti Yesu mekata nekete ekete totomeka Parisi yenameka Akolali wedoa kowitadetepa padepete-kiti nee eya tekei wawa noameneya pa yako. Neke oya ali-kitame enile toamikino, dekolo toamikiti-pe wa okoli okome ¹⁵ panagono atoa motokakita atoa motoko agono oya-lawe one-pala wedikete wediapa nee eya edoa wawa tumai memotoa-pe. Wa naniko ete yename atoa motoko ago padeka aua poatiki wini tigtoma nokona. Enipetepa wene keda taneya mekete nee noameneya wawa pa meoi.

¹⁶ Panagome-kiti one mamina namoloya pilikalepa weneya pue moa pilikata lapukoa lipuko patu. *E'e mena.* Eniledo tootokoa uele abe kogalepa weneya pueme ete ete toa edema pokome pilikutu too. ¹⁷ Ni gerepi po ku ue weneyapa pinagome meme kai kepeneme latiane mete namoloyake peia moamoo. Eniledo tokalepa gerepi po ku ue weneya tokome lako yati kawa mono mono oo. Nitikale mete namoloya tokome pukoa mono mono amele toamokome kaugale gerepi po ku ue pata paka ponoo. Gerepi po ku ue weneyapa nipa kepeneme latiane mete weneyake-kama peia mokala too. Nitikale uepala meteta atuameneya pia kawoo wa Yesuyo oka. (Enipa Akolalilinele-pala kini namolole-ta odeneka dekoa toameamene wa okome oka.)

**Tukome Tuane Akoma
Kamotokanemo**

(Make 5:21-43, Luke 8:40-56)

¹⁸ Yesuyo enimo oa kakaka tobou ago pade one kakata nome wadini tukupia

kowitikome okome anu kono akoma opi tukano, ne nooke yono pikanokalepa latoa kawoono, kamatokakoano patono ta wa kowitinokale ¹⁹nipa pata wa litima pokale one oya-laweka koua pokoi.

²⁰Yesu eni pokaka yene tane atoa pade one mukiti lono lekama nome one tokoo kakene mamina nami mitikatekaneya. Einatoapa kamate yokoa kakame yeneme tukome mea potokane atoa. Mali tuku (12) kakoa ponoka toa edikoa meaneya. ²¹Nitane atoa tokome Yesuno kakene mamina namido mitikakene pa latoane pou wa wene pia mitikanokale ²²peketapea enekome okome anu kono nipa tepe kolotini kilikoa pimotono meamene. Nooke wini wene tugake tokoleme ne latekaneya tokolo uku wa okale einatoa eina eina latoa kaka.

²³Nititikaneyake Yesu tobou agono yapu pome tuapea kakome enekale pade ali-kiti tumai mekete tulutu oa wa pade ali atoame agale kamotokoa oa tokoli yatekome okome ²⁴i akoma deya tukome tuaneya menano, pa atu pia mekono, poe wa okale one yau takakoi. ²⁵Nitikoli poe wa litimotokome eina akoma tuaneya pikata pome kakome yono motokale kamokoa latoa kaka. ²⁶Nititikaneyake one eni tokamo ta piko peyake oa pupitikatapeneya.

Leneta Liane Agota Lene Kikakanemo

²⁷Yesu eida tewitikoia yakaka alita takuta leneta lianeya meane agotame Yesu kayo oata litima nekete ekete Depidi-loeke tagene ago tota ela moa epetekoano ta wa kayo oa litima nokoi. ²⁸Litima nekete one pome meka yapu keneke tuapea note kakoli enekome okome i agota kita anume oyake latekamele toko wa nooke wene tugakete niki-pe-kale ekete Ali Muno neme oyake latekamele tokono wene tekete ni nokoo-koli ²⁹kini lene mitikakome okome nooke

wene tugakete iki toane nitimotoane uku wa oka. ³⁰Nimo okaka kini leneta eina eina kikatapeneya kakoli okome kita epetekakumo pade-kiti kotuketeka etene kotukoa wameamene wa agale telekoya oa tagaka. ³¹Nitikale yakameneya eni ta piko peyake yakete Yesu einagome tota-pala ilepa i toka wa oa kotukoa yakeneya.

Agale Amele Toamene Ago Latekanemo

³²Eina leneta liitapeneya mekoinakagota yapu tewitikoia pene ani pokoika pade ali-kitame ipono awitaneya mea agale amele toamene ago-pala Yesu mekata aua nokoi. ³³Nitikoli Yesuyo eni ipono takoa pa wa wetekakale agale amele toamene agome agale witoa oa kaka. Nitikale eida oboa kakoi-kitame ekete tone Iserere take namolo toamokoinakale i agome ile i tokona wa ka oa kakoli ³⁴Parisi ali-kitame ekete beita, ipa ako odene meko tobou iponane tele patu kautakoa kakome iponokiti takoa wetekakala toko wa tea kakete okoi.

Yesuyo Ali Atoa Ela Motokome Akenemo

³⁵Yesu ali atoa ta latia pitikoika nateya takeka tubeya takeka yakome kini losu yapu pome olaukakala taneya. Nipa Akolaliyo ali atoa pawe toa talo tokomo kini wene epetekanemo i i wa mo wima pokomepa eya kuya yene tane-kitika kini yene peya latekawineya poka. ³⁶Nitoapa ali atoa eida kakoi mati egetamene sipi sipi kai keneya wene keda toologaneya pa yawa mekoile enekome ela matiyame tuaneya kaka. ³⁷Nitoapa agale pedoa okome okome ae ipe nee kakoya wakoa momotoa nodokoa kibutukakoa kakoyake eni ipe ludu wakoa moatiki yene natetekoa kakino, ³⁸eya wa kowitamene. Ipe nee

kakoya wakoa mou toa neke ali atoa toa motokamoto, pinago neke pupu yene wete takoa moa wetekoano ta wa Akolali kowitamene wa Yesuyo oka.

Aposelo Ali-kiti Moa Wetekanemo

(Make 3:13-19, Luke 6:12-16)

10 Wa naniko tuku kakoa (12) one oya-lawe one kakuta noe wa Yesuyo kayo oa motokome okome noanu tele patu kautakoa kakete ali atoake awitane ipono takoa wetekoa kini tane yene peya latekoa toma poatino poe wa wetekaka. ²One eni oya-lawene ibinipa dikoa. Namolo agopa Saimone one pade ibini Pita wa okala tiki. Ni one wamenago Aderu. Ni Sebedine manata Yame wamenago Yoneta. ³Ni Pilipi-pala Batolomiuta. Ni Tomasi-pala Matiuta. Matiu einagopa takesi kue motokama yakanakago. Ni Alepiasine mana Yame. Ni Tadiasi. ⁴Ni Keinane take ago Saimone. Ni Yudase Isekariose einagopa Yesu wimotua moa meateka ago.

⁵One eni tuku kakoa (12) oyali-kiti eni moa wetekakome okome mone pade yatenane ta ludu yawamoa Sameria yatene kini ta latia pitikoikaka poamoa tamene. ⁶Iserele yenepa sipi sipi kai-kiti paka pote kapou toa etepea mekino, kini mekika poatino poe. ⁷Nipa Akolaliyo ali atoa keleyo talo toateko tigotoma noko wa mo wima poatino poe. ⁸Nitima pekete yene tane ali atoaka latekoa ni tuane yeneka kamotokoa ni kedime nakene yene kedi takoa wetekoa ni ali atoake awitane poane ipono-kitika takoa wetekoa tamene. Kini eni toatiki peku lawetekenepa nami kakamoane pa lawetekuno, ete yene auapekilepa kinike kue eya oia moameneya pa auapekala tamene. ⁹Nitiketepa kue utiki kakepa golo kue waneka silepa kue waneka pa tuane kue waneka ua poamoa ¹⁰ni oia moa nee eya uatiki

kaka aua poamoa ni tigini maminaka kawa yeneka itika wa padeya lokea moa aua poameamene wane uku. Pupu agome-kiti panagono pupu takakalepa pupu pine agome nami wia one noateka nee lawetoo tokolo ni uku. ¹¹Tubeya takeka dee takeka peketepa eya wa yakatekamene. I take Akolaline agale yakoa motane ago mani yapu pitikoto-pe wa yakatekoapa nipa eni yapu mepamene. Nipa yapu yapu yawameneya odene yapu-kama mea kawa pokala tamene. ¹²Nipa yapu tuapea peketepa tepe kolotini kilikoa pimotono mea wa okala tamene. ¹³Nimo okoli yapu pitikoi yename kiwi makutukoa moteketepa nipa kina eina epetekoa okoina toa epetekoa meoi. Nitameneya makutukoa moamokolipa nipa tokamoto, kina eina oa metekoina agale pedekomepa kiwike oto weamumotamene. ¹⁴Wa pade yapu pitikoi yename kiwi makutukoa moamoa kini agaleka yakoa moamokolipa nipa pubu ou toa kini kawake kakene kege kōketikoa tewitikoa pokala tamene. ¹⁵Ae, dikakoi yename tete moatikimo ukuno, yakoe. Akolaliyo ali atoa takoa eneka-petepa Sodome Gomora tatake meane yene kibu motokome dika dika toamene tete meoo. Kiwi makutukoa moamokoi yene kibu motikilepa eni meteka tete moa patukoa tete ako mati meoo wa Yesuyo oka.

Akolalinele Takoa Togamene

(Make 13:9-13, Luke 21:12-17)

¹⁶Opi anu oya-lawe kiwi poe wane wetekakilepa lene pianeya yo tane tuekiti yakika sipi sipi kai keneya moane wetekou toane tuku. Poanele witakale eneketepa edeku patu wa wedetekoa yako kayame-kiti toko toa wene we-doa tetoa pia tamene. Nitiketeka taba ago ini weuweme-kiti toko toa utanele

poti toma pamene. Nipa poane yename kipala eya toa potokakala toi. ¹⁷Pade-kitame kiwi koiso akou wa Kanosolo ali-kiti mekoika lia aua pokala toi. Wa pade-kitame kiwi wiou wa kini losu yapu-kitikeka layo toua wikala toi. ¹⁸Ni anukule takama yakoikepa ako odene tobou mekoi ali-kiti mekoikaka kiwike lokoa ta yopia mekoi yene mekoikaka lia aua pote koiso akakala toi. Nitikolipa enika eni tobou mekoi-kitane lenekaka e ku mone pa yatenane lenekaka kakete anukumo i i wa toawe akakala toi. ¹⁹Kini eni koisoke lia aua pokoika peketeka edemo uku patu, agale edoane topo takoane uku patu wa wene keda taneya poameamene wane uku. Epetane Yominiyo kini oatikimo i i wa wene taka taka too tokolo ni uku. ²⁰Nitikala tokale tekete pademo-kiti ikilepa kini weneme titia pade wamoi. Kiniketai Akolaline Yomini kiwike awinokome a wa oka toa okala toi.

²¹Enipetepa wamenagome-kiti wamene wia tukamotoa moa meoo. Etename-kiti mana matika wimotoa moa meoo. Mana kono-mikitameka kini etene nine wia tukamotoa moa mekala toi. ²²Anu oya-lawe kipa nopala odene ibini pedane ali atoa tokale tekete ete yene peya kipala kotimi yotanya meoi. Nitikolika anukule pa takama pote kutu togakolipa Akolaliyo kipa one wa toa moo. ²³Kiwi tete metekolipa kini pitikoina ta wawa toa pote padeka pade take mepokala tamene. Nitiketepa kini Iserere ta keneke ali atoa pitikoi toa pade take toa pokala toa ete ete toa pote mea togameaneyake no Ali Yatenane Oyago wakapeane nou.

²⁴Nipa eya wa wene taneya yamene. Sukili matiyame one tikisago moa patukamele toamoa ni pupu takakagome one pupu pinago moa patukamele toamoa toko. ²⁵Tikisago meko toko toa one sukili matika edikoa

meamedeko. Pupu pinago meko toa one pupu takako agoka edikoa meamedeko. Enipa ete-kitame yapu pinago nopa tobou ipono ago Belesebule wa ibini ikino, eni iki toa moa patukoa anu yapulu yene kipa etene tea agale okala toi wane ekene uku wa Yesuyo oka.

Akolali Piti Tokale Meamene

(Luke 12:2-7)

²⁶Eni yename kipala padele toatikilekeka piti moameamene. Ali atoame kaukoa toma yakile peyapa naniko keleyo witatapeoo. Padele padele paigakoa tikiyapa naniko peyame keleyo enetapeoi. ²⁷Kipala likonu kakene okouna agalepa lou pake kakete toawe ootapeamene. Wa kipala oi oi wa okoi agalepa yapu yalinike lewia kakete i i wa telo toawe ootapeamene. ²⁸Yete pade ali-kitame kiwi wiou wa lama moa lagotoa tukamele tokoyake kini yomini pade oyake wia atukamele toamoko. Nitamele toamokono, ali-kitipa piti moameamene. Akolaliyopa poane take poe wa okomepa nipa kini yomini-pala wia atukakome atukamele toko. Nitikono, Akolali einago odene piti moma pamene. ²⁹Dee ini deyata takuta tape kogopene topo toa kue motikilepa dedeya tuane kue wane odene mokala tiki. Enipa nimini ukutu pe. Dikane ini odene deyaka tukome itonoke pitakolopa kiniketai Akolaliyo ae, i ini deya eni tukona wa wene taneya meko. ³⁰Ni ago Akolaliyopa anu oya-lawe kini wagoke witako pine kako toa oi moa talo toa kako. ³¹Ni agome ini deya mamapa moake paya tetepo takakome kipa one kolotini yene wa wedoa mama moa talo toa kakono, ete-kitame kipala padele toatikilekeka piti moameamene wa Yesuyo oka.

³²Panago ali atoane leneke kakome no i agono peku noane tuku wa toawe

okalepa noanuka a tibuke meko agetaine leneke kakene i agopa anu peku noa tok-ago wane toaweane ou. ³³Wa panago ali atoane leneke kakome no i ago kote tokolo waku wa okalepa eina toane noanuka a tibuke meko agetaine leneke kakene einagopa kote tokolo waku wane wauu wa Yesuyo oka.

Yesuyo Ali Atoa Ete Oto Wa

Puutakutukamotoa Nekenemo

(Luke 12:51-53, 14:26-27)

³⁴Noanumepa ali atoa poi teigoa wawa poti kilikoa memotoane tekene nekedeku wa wene piameamene. No i nukupa kako poi takoukene ni nokou.

³⁵Nipa panagome one etene-pala pada-toame one nine-pala wa padatoame one aline nine one kaue-pala kako poi takoukene keku. ³⁶Kipala poi teia meki-kitipa kini yapulu yene eni wane ekene uku.

³⁷Panago one etene ninetake wene wedoa mekoa mekomeke nooke nateya wene mekoa mekomepa nipa nopala oyake oya kakoa litiamele toamoko. Wa panago one mana kono-mikitike wene wedoa mekoa mekomeke nooke nateya wene mekoa mekomepa nipa nopala oyake oya kakoa litiamele toamoko. ³⁸Wa panagomepa one wiatiki lekane yomo lia aua poamademe wawou toa tokome anukule takama pokome tete-pala moamademe wakomepa nipa no yatene ago wa amele toamoo. ³⁹Nipa onekele-kama tokome tukaya wa kepene mama motoko agopa one yomini-pala etepea tua poo. Wa padekagome one kepene mama moamoa no i agoke tuou wa wene pikagopa tukomeka wa kamomotokome Akolaline take pome mea kama poo wa Yesuyo oka.

Akolaliyo Tone Epetekoa Tokole

Topo Takatekomo

(Make 9:41)

⁴⁰Panagome-kiti one yapu kiwi noe wa makutukoa motokomepa nipa nopala dekoa makutukoa motoko. Panagome no makutukoa motokomepa nipa no moa wetekaka ago-pala dekoa makutukoa motoko. ⁴¹Panagome Akolaline agale akaka ago kotukome okome nepa Akolaline agale akako agono, one yapu ne noo wa makutukoa motokalepa nipa one eni tokake Akolaliyo einagoka one agale akako ago tetepo takoa pewe wioo. Wa panagomepa wene kiyo akeneya meka ago ponokale enekome okome nepa wene kiyo akeneya meko agono, one yapu ne noo wa makutukoa motokalepa nipa one eni tokake Akolaliyo einagoka wene kiyo akeneya meka ago tetepo takoa pewe wioo. ⁴²Wa panagomepa anu oyago pa ponopene ago ponokale enekome okome i ago nepa Yesuno oyagono, ue nomotokapouno, nepia wa mama moa auapekalepa nipa one eni tokake Akolaliyo etene kei pia pewe wia too wa Yesuyo oka.

Yoneyo Yesu Pitia Yakanemo

(Luke 7:18-35)

11 Yesuyo one tuku kakoa (12) oyali-kiti einaka einamo oa meemotokome Galili take ali atoa pitikoika mo wima pokome Akolalinemo i i wa olaukakala toka.

²Ali atoa ue motokama yakene Yone po yapu pa pia mekomepa Keraisyuo eina toma yakenemo kugu yatekome eya taneya. One oyali padeka-kiti Yesuke moa wetekakome okome Yesu eya wa yakapoatino poe. ³Nepa i wa ibini oa plane ago taatekoa noko-pe. Panago taatekoa noo tokolo totome nepia kamotoa oko-pe. Oano ta wa

yakapoatino poe wa Yesuke moa wetekaneya. ⁴Wetekakale yakanokoli okome padele padele tukule kini leneme enoa ni pademo pademo ukumoka kini kaleme yakoa tikino, Yone mekota eya wa wakapea pote akapoatino poe. ⁵Leneta lianeya mekoina yene opi leneta kikakaneya yawa ni kawa okeaneya yakoina yene opi wedoa pogoa kautoa pote ni kedime nakeneya mekoina yene kini kedi yene opi takoa pokolo latoa kawa ni kale keneta keteaneya mekoina yene opi kale pekaneya yawa ni tuane yeneka opi kamotokaneya kawa ni ponopene ali atoame Akolalinemo yakakoa meki wa Yone akapamene. ⁶Eya waka akapamene. Nooke wene tugoa mea wawamoko agopa kolotine meoo wa akapoatino poe wa Yesuyo eina ali-kiti Yone mekata kutu wa wetekaka.

⁷Wetekakale tewitikoia pokoika Yesuyo eida oboa kakoi yene-pala Yoneke okome okome ali atoa piamene take Yone enepeketepa edanele enadete pokoiya-pe. Tauwe wata pupulegeme muku muku toa kakale enepokoiya-pe. E'e mena. ⁸Nipa edane ago enadete pokoiya-pe. Panago mamina epetaneya kakeneya kakale enepokoiya-pe. E'e mena. Mamina epetaneya kaki-kitipa nipa ako tobou ali-kitane yapu-kala meki. ⁹Nipa edaneya enadete pokoiya-pe. Akolaline agale akama yakago enadete ni pokoiya-pe. Ee nimini, Yonepa nitane ago. Akolaline agale papete toawe akane ali peya keku kamotoa einago ako kako. ¹⁰Yone einagokepa Akolaliyo mana-pala papete akenemo wene takakale panagome eya wia mekapianeya.

Ne naniko pomotoane anu agale oa aua yawateko agopa namolo takoane moane wetekou. Nitikolu einago pokome ne poateko ka nodokakapima poo wa wia mekapianeya.

Einagale taatekoapa Yone einago eni nekedekona. ¹¹Kipala i ukumo yakoe. Papete atoa-kitame opiane ali peya keku kamotoa ali atoa ue motokama yakanakago Yone ako kako. Onepa nitane agoke eya waneka uku. Anu uku agale yakoa mootokoa Akolalike lukoa meki-kitipa etene keku ali atoa-kitameka Yone moa patukaki. ¹²Ali atoa ue motokama yakona Yoneyo Akolalinemo titikome okaka anume opi i olaukakuka ali atoa Akolaliyo talo toko take poadete togo togo oomoata piki. ¹³Eya wane ekene uku. Akolaline agale toawe akane ali peyamepa Akolaliyo ali atoa pawe toa talo toatekale i i wa wia mekoa tuma-kala nekeneya. Nipa papete Moseseyo one totono i i wa titikome toawe akapiane toa lokoa nitaneya. Wipitikome Yoneyoka einakamo toawe oma nokona. ¹⁴Nipa Akolaliyo ali atoa pawe toa talo toateka tigotokalepa Ilaida namolo takoa noo wa oa plane toa taatekakome Yonepa eni nokona. Ee nimini wa wene piketepa yakoa moamene. ¹⁵Nipa yakou wa kale piyakoa kaki-kiti kime yakoa moamene. ¹⁶No kaku-pete meki-kiti kini tikile adekapa edoane plane uku patu. Eya adeka plane ukuno, yakoe. Mati-kitame makesike pa ulu toa kakete ¹⁷eka e mati-kiti-pala eya wa kayo oa kaki.

Tiabu toa kawati wa totome tulutu eya pukapekolo yateketeki toamokoi. Nitamokoile enekete toto tumai meou toa komo lo oa kakoloka enika enileka kote tokale tumai meamoukete wakoi wa eka e mati-kiti-pala ulu tootapekete iki wa Yesuyo oka.

¹⁸Nitoapa einagale pine toawe okome okome Yone nokome padeya neeka gerepi po ku ueka noameneyake ipono oneke awitaneya tokome ni toko wa pade-kitame tea agale oa kaki. ¹⁹Ali Yatenane Oyago noanume pade nita-mekene eya kuya neeka gerepi po

ku ueka nakule enekete ekete no i agopa nee kitipu kakoa noa gerepi po ku noa kawa toko. Takesi kue motokama yaki ali-kiti-palaka Akolaline agale tagoa toamiki yene-palaka oya patu pia tokono, enoe wa akoa agale iki. Nimo wapa ikiyake pade-kitame ekete mone inapa Akolaline peku noa tadiki wa iki wa Yesuyo oka.

**Latiane Ta Tebolo-pala
Pubu Akenemo**

(Luke 10:13-15)

²⁰Einata einapete Yesuyo Korasine Besaida tatake pitikoi yene kikoa akoa kaka. Nipa ele kule telekole kini leneke lugutukoa toma yakanakale eneketeke kini tokoi poanele tewitikoa wawameneyake ni toka. ²¹Nitikome okome ae dika dika toamene tete moino, nepio. Kiwi pakeke ele kule tubele mati toma yakounakale mone Taia Saidone tata ludu toma yaou tokapa nipa kini namolole tewitikoa wakete palu watea kuku yotokatapea toi toka. Etene dikoa toi tokake kime pade nitamokoina. ²²Akolaliyo ali atoa takoa enoa kibu moateka-pete mone Taia Saidone tata pitane ali atoa tete meoo. Ae, eni tete meteka toa moa patukoapa Korasine ta Besaide tata pitiki-kiti kiwi dika dika toamene tete meoono, nepio. ²³Ae, wini Kapaneame take pitiki-kiti Akolaliyo kiwi a tibuke moa kamotokoono wene pia meki-pe. Nitameneya kiwi keti toe take poe wa moa pitikoo. Kiwi pakeke ele kule telekole mati toma yakounakale Sodome take tou tokapa kini tane poanele tewitikoa etene waoi toka. Nitoi tokapa Akolaliyo kini Sodome taapa moa agopa takamokale pa pioo toka. ²⁴Akolaliyopa ali atoa takoa enoa kibu moateka-pete Sodome take meane yene tete meteka toa moa patukakome

Kapaneame take pitiki-kiti kiwi dika dika toamene tete meoono, nepio wa Yesuyo oka.

**Koome Tuaneya Meki-kiti
Yesuke Namene**

(Luke 10:21-22)

²⁵Einata einapete Yesuyo okome okome Atai Ali Muno tibu itonota yopikoa kako ago nepala ke wane uku-ye. I uku agalepa pa nana mati keneya meki-kiti i i wa neme wene taka taka tokoyake Akolalinemo kini weneme wene taneya meku wa iki-kiti wene takameke neke luaneya mekono, ke wane ni uku. ²⁶Atai neke widikakepa neke epene wene-kama piko toa litiapa dikou wa wene toopikanakale taatekoa toko wa Yesuyo Akolali-pala oka.

²⁷Nimo ootokoa okome Agetaiyo one tele patu kautakoa kama pamene wa one peku no lawetetapeka. Nopa dikane ago wa padameka wene toamikiyake Atai Akolaliyo wenepa toko. Padameka Atai Akolali onepa dikane ago wa wene toamikiyake one mana noanume wenepa tuku. I alimeka i atoameka Akolali wene tomotou wane takoane moane kakaku-kitameka Atai Akolali wene tiki.

²⁸Ae, koome tuaneya mea wene kedame tuaneya mea tiki peya ko memotouno, noanuke-kama noatini noe. ²⁹Kini keda taneya-kiti aulogoa poatikiya wanepa anume latikaku. Kini kotomaneke kini moa lekoa pikete toatikile olaukouno, moa lekoa piamene. No poti ko akene wene-kama pianeya meku agome eni toatiki peku lawetekolu noa teketepa tepe kolotini kilikoa pimotoa aua pamele too. ³⁰Kini keda taneya-kiti aulogoa poatikiya epetaneya-kama latikoane anu kopapu-kitika yaapeaneyakama takoane meane tuku wa Yesuyo oka.

**Yu Yene Kini Ko Mea
Pupu Toamene-pete**

Kekoa Wawa Toameneleke Akenemo

(Make 2:23-28, Luke 6:1-5)

12 Einapete Yu yene ko mea pupu toamene-pete pade Yesu panagono witi ipe kouwoto ludu potokakoa one oya-laweme witi ku deya tukaka kotia noma pokoi. Kobu tokale tokome ni tokoi. ²Nitikoli enekete Parisi yename ekete Yu yene tone ko mea pupu toamateko-pete kekoa wawa toamokole wini tiki wa kiko okoli okome ³tobou ago Depidi einagomeka one-pala toa yakene ali-kitameka kobu tokale tanemo oi moamokoiya-pe. Eya taneya. ⁴Tobou ago Soloyo Depidi-loe litia aua pokale einago one oya-lawe-pala toa yakome kobume tuaneya tokome Akolaline wikakane losu yapu tuapea pokome Akolaline takoa pikane palawe wane-kiti moa nakeneya. Mosesene totono plane toa Akolalike lodo yotokoai tane ali-kitame odene dikane palawe wane-kiti namele taneyake taneya. ⁵Akolalike lodo yotokoai tiki ali-kitame ko mea pupu toamatiki-peteka sipi sipi kai tine wia eni pupu tokala tiki. Kini kekanele eni teketeka Akolaline agale tetekamiki. Mosesene bokuke enileke wia mekanemo oi moamokoiya-pe. ⁶Tobou losu yapupa ibini akene yapu kakoyake kiwi pakeke kaku ago etene ibini akene agome ukuno, yakoe. ⁷Akolaline bokuke agale dikoa wia mekaneyano, yakoe. *Akolali noanuke lodo yomotoane wane wamuku. Yete pade ali atoa mama momotoane uku wa Akolaliyo akeneya. Eina agale pine tetoa enoi tokapa anu i oya ali-kitame poanele wini tiki wa kime kiko wamoi toka. Witi ku deya kotia naketepa Akolaline agale tetekamiki wane uku.*

⁸Nopa Ali Yatenane Oyagome ali atoa ko mea pupu toamiki-pete mekete toatikile i i wane oyameane talo toane tekene ni uku wa Yesuyo oka.

**Yesuyo Yono Lokane
Ago Epetekanemo**

(Make 3:1-6, Luke 6:6-11)

⁹Yesuyo nimo oomotokome losu yapu pome kapoka. ¹⁰Nitikata yono lokane ago pade eida mekale Parisi yename Yesu pitia yatekete ekete tone ko mea pupu toamateko-pete panagome dikane ago epetekakomepa tone kekanele eni toko-pe wa pitia yatekoi. Nipa Yesu koiso akatekoimo omotadiya wa kakete akeneya. Nitikoli okome ¹¹kiwi panago neke sipi sipi kai odene egetekoa mekake koa pokale enekapa edeko patu. Pupu toamateko-peteka patu pitikoa aka moa kakako patu. Eeno, eina-pete pupu toamateka-peteka aka moa kakoo-li. ¹²Akolaliyo sipi sipi kai eya mama moapa kekuya tetepo takoa yopikoyake ali atoa akoya tetepo takoa wedoa mama moa yopiko. Nitikono, ko mea pupu toamateko-petedo i ago epetekak-enepa tone kekanele toamuku. Mosesene totono plane toane oyake epetekamele toko wa Yesuyo oka. ¹³Nimo ootokoa kakome yono lokane ago-pala okome neke yono kutu lido akoano ta wa okale lido akoa enekale one padeka eina epetane yono-pala odele tootapekale eneka. ¹⁴Nitikale enekete Parisi yename i ago wiato wa akolono toa pote one wia tukatekoi oi pedoa pia kakoi.

Akolalinele Takamotoa

Yesu Moa Kakapianemo

¹⁵Nitadekoimo yatekome Yesu eni ta tewitikoa pokale ali atoa lewi le-wita pia litima nokoi. Eni yene padekakiti yene taneya nokoli enekome peya latekoa wetekakala toka. ¹⁶Nipa onepa

dikane agome ile toma noko wa pade ali atoa kotuketeka kotukoa wameamene wa wetekakala toka. ¹⁷Nipa Akolaline agale papete toawe akane ago Aisaiayo papete oa plane toa taatekoa toka. Akolaliyo manake oka toa Aisaiayo eya wa wia mekaneya.

¹⁸*I agopa anu pupu takamotoane takoane moane kakakuna. Anu i kolotini ago one tokoleke wediane meku. Anu Epetane Yomini oneke awinomotu. Nitikolu tokome einagome i i wa ali atoa kiyoke takoane enatekoumo e ku yatene peya-pala akama poo.*

¹⁹Nitima yakomepa ete-kiti-pala mokota wamoa ka wamoa too. Ka batete ludu pokomeka agale wametekoa poti yawoo. ²⁰Tauwe wata tukukaneya kakale enekome oneme pade pilia moamoo. Labo tole wedoa pa toa kamele toameneya kakale enekome ni pade tugamoo. Ponopene ali atoa edikoa mama moma pome wipitikomewa poi moa patukou toa tokome padele padele tane poanele wia atukatapea e ku yatene peya epetekoa talo toa kawoo. ²¹E ku yatene one ibini patu kautakoa kaketepa one nani toatekale nepia mea wedianeya mema poi wa Aisaiayo wia mekapaneya.

Yesu Setanuno Tele Patu

Kautakoa Kako Wa Oa Potokanemo

(*Make 3:20-30, Luke 11:14-23*)

²²Einapete pade-kitame ipono awitane ago Yesu kakata moa aua nokoi. Ipono awitaneya tokome leneme enekileka toamoa kabunume agale ikileka toamoa taneyake Yesuyo epetekakale leneta kikoa enoa kabunu pea agale oa toka. ²³Nitikale enekete peyame ekete i agopa Depidi-loeke tawatekago taatekoa noko patu wa ka oa kakoi. ²⁴Nimo

okoimo yatekete Parisi yename ekete beita, i agopa tobou ipono Belesebule one tele patu kautakoa kakome tokome ipono-kiti takoa wetekakala toko wa okoi. ²⁵Kini tepene pikoi wene tetoa enekome Yesuyo okome ako odene meko tobou agoke lukoa meki yenedo kako poi toa meketepa nipa wete atutapeoi. Wa pitikalika odene yapu pia meki-kitika kako poi toa meketepa tadoa pootapeoi. ²⁶Setanuyo edikoa one yagono-mikitido takoa wetekakalepa one yatene edoa mea kamotoa-pe. ²⁷Noanu Belesebule tele patu kautakoane kakene ipono-kiti poe wane wetekaku wa ikipa nipa kini totono litia tiki ali-kitame ipono-kiti edoa takoa wetekaki-pe. Te patu kautakoa kakete tiki-pe. Anume takoane wetekakene tukuna toa tikino, kime no ina akoa kakinapa kapene wakoa akedikiki. ²⁸Akolaline Epetane Yomini patu kautakoane kakene ipono-kiti takoane wetekakala tukuno, Akolaliyo one ali atoa pawe toa talo tokotapa kiwi pake wini witadeko.

²⁹Telekagome one yapu pikoya pa yopia mekolopa kode agome yapu bulukoa nome onekeya peya oyake moa pamele toamoko. Nitamele toamokoyake kode ago kotikatapeado nokomewa telekago poome lutua piilogo onekeya peya oyake kode moa poko.

³⁰No-pala lipua meamoko agomewa nipa nopala poi eni teigome toko. No auapeamoa no mekuta ali atoa koukoa mekamoko agomewa nipa ali atoa tadekoa litikome toko. ³¹Dikaki-kitikepa eya wane uku. Panagome padele padele poanele toa Akolali tea kawaka wa nanikodo ae inapa poanele tekene tadeku wa wakalepa nipa Akolaliyo eni poanele tokake po letu mekakanapa oyake kekile too. Nitikoyake panagome Epetane Yomininelepa Setanunole tetepo takakalepa one eni poanele tokake

po letu mekakanapa Akolaliyo etene kekileka toamoo. ³²Panagome-kiti no Ali Yatenane Oyago tea agale akakalepa Akolaliyo eni poanele tokake po letu mekakana oyake kekile too. Wa panagome Epetane Yomini tea agale akakalepa Akolaliyo one eni poanele tokake po letu mekakana etene kekileka toamoo. Einago pa mekaleka tua pokaleka kekile toamoa kibu moo wa Yesuyo oka.

**Yomo Kū Tukole
Takoa Enekike Akenemo**

(Luke 6:43-45)

³³Yomo epetaneyapa kū tua epetekoo. Yomo poaneyapa kū tua potokoo. Yomo-kiti kū tukole eneketepa ipa epetadeko ipa poadeko wa takoa enamele toko. ³⁴Parisi yene kipa kaya keneya mea poanele toma yakino, pademo epetanemopa edoa oadete-pe. Kini tepene meane toa-kama yawa witakoa okala tiki. ³⁵Epetane wene piko agomewa one tepene meane toa yawapa epetanemo witakoa okala toko. Poane wene piko agomewa one tepene meane toa yawapa poanemo witakoa okala toko. ³⁶Nimini ukuno, yakamene. Akolaliyo ali atoa takoa eneka-petepa itonoke mekete paya wene pia pamo okoinakamo peya wedoa pitia yakatekoa kibu mokala too. ³⁷Nipa itonoke mekete okoinakamo toopitikoapa oa epetekakoi-kiti kibu moamoa ni oa potokakoi-kiti kibu moa toono, pademo pademo ikilepa wedetekoala okala tamene wa Yesuyo oka.

Yesuyo Padele Telekole Tomotoa

Lede Akenemo

(Make 8:11-12, Luke 11:29-32)

³⁸Yu yenane totono pine toa olaukane ali-kitameka Parisi ali-kitameka Yesu

yatekete ekete Tikisa ago neke tokolepa Akolali patu kautakoa kake tadekalepa padele telekole toano ta-koli okome ³⁹Akolalinele takamoa poanele toma yakina. Nitikete ekete Akolali patudo kakedekalepa padele telekole toano ta wa no likoa iki. Nitikiyake eya odene tokale enoi. Akolaline agale toawe akane ago Yona-pala tubele mati tane toa tokale enoi. ⁴⁰Yona einagopa ta tebolo-peta patoa lika toa tube mou kimane keneke pa meane toanepa no Ali Yatenane Oyago ta tebolo pata-motoane itono keneke plane meou. ⁴¹Yonayo Akolalinemo Ninepa ta ludu mo wima pokale yatekete eni yene Akolalike tepe kolotini pekoo piitapeaney. Mone pa yenameke nitaneya. Yona keku kamotoane no ako ago nukuyake Yu yene kime pade anu agale yakoa moamiki. Ae, Akolaliyo ali atoa takoa eneka-pete Ninepa yene kamokoa kakete kiwi akoa agale oino, nepiamene. ⁴²Akolaliyo ali atoa takoa eneka-pete mone Siba take ako meane tobou atoa kamokoa kakome okome Yesu kaka-pete mekoi Yu yene kime toa potokaney wa kiwi akoa agale oo. Eni atoa mone atoameke Solomonono peku noademe ta padeka mati mea nekeneya. Tobou ago Solomonono keku kamotoane no ako ago nukuyake Yu yene kime anu peku noamadete waki wa Yesuyo oka.

**Panago Takoa Pokana
Ipono Einakagoke**

Wa Wakapea Awinokome Tokomo

(Luke 11:24-26)

⁴³⁻⁴⁴Iponodo panago takoa pokomewa eya toko. One ko meatekotapa ta pitamene ta ludu tuku toa kawa teko tokolo wako. Nitoa wakomewa one takoane wawane nokounata wa wakapeane pone mepou wa wene piitakoa wakapea pome enepokolo einata do pokoa pia kalo-

tokaneya kakedeko. ⁴⁵Nitaneya kakolo enemotokome tuku topokome ipono-kiti tatono kakoa (7) one poanele natele tomotoa poanele pine wia tagoa tiki ipono-kiti enamua einata aua noko. Aua nokolo einakagoke awitikete awitikili tokome one namolo poanele nateleka toa meake wipitikomepa poanele tubelekama toma yako. No kaku-pete poanele toa meki-kiti kimepa edikama poadete tiki wa Yesuyo oka.

Yesuyo Nine

Wamene-mikitike Akenemo

(*Make 3:31-35, Luke 8:19-21*)

⁴⁶Yesuyo e yene-pala nimo oa kakaka one nine wamene-mikiti one agale akadete koli a note kanokoli ⁴⁷panagome Yesu-pala okome okome nekauyoka neke wamene-mikitameka ne agale akadete koli a note kakina-kale okome ⁴⁸agauapa te-pe, anu wamene-mikiti te-lawe-pe wa ootokoa okome ⁴⁹agaua-loe anu wamene-mikitipa ika i mekina wa one oya-mikiti yamemu toka. ⁵⁰Nititikoa kakome okome Agetai a tibuke mekome ta wa okole-kama litia tiki-kitipa agaua anu wamene laine-mikiti eni wa Yesuyo oka.

Ipe Ludu Nee Lene Pitikama Pekene Ago

(*Make 4:1-9, Luke 8:4-8*)

13 Einapetepa Yesu eina yapu akolono wititapea ue mine matanuke pome mepoka. ²Nitikata ali atoa lewi lewita pia note-kala kakoli tokome ue dipike pogatekoa pome mepoka. Nitoapa e yene ue matanuke ete keneya kamotoa onepa ue dipike mekome ³pademo pademo pedoa okomepa eya wa oka.

Ipe pinagome-kiti ipe ludu nee lene pitikama pekeneya. ⁴Nitima pokale nee lene padekapa ka ludu paka tadoa

pitaneya. Nitaneta ini-kiti pitoai toa napekala taneya. ⁵Ni nee lene padekapa kue pake pake tadoa pitaneya. Tokoo itono nateya deya pianeya tokome wete tumikala taneya. ⁶Wa naniko lou tigini kakale wete eni tototokoa tuaneya. Teke itono kekulu wetekameneya tokome loume ni yoa tukatapeneya. ⁷Ni nee lene padekapa tonipo pake tadoa pitaneya. Nitaneta tonipo eni nee lenepala odeneka dekoa witakome tukatapeneya. ⁸Ni nee lene padekapa itono epetaneyake pitakome leau akatapea witakome ku tukala taneya. Ku tukilepa padekapa ku ege takupeta kadukoa (100) tua ni padekapa ege odepeta kadukoa (60) tua ni padekapa timini mukitini togoikoa padeka kapidi kakoa (30) ku tua taneya. ⁹Kipala i ukumo yakou wa kale piiyakoa kaki-kiti kime yakoati wane uku wa Yesuyo oka.

¹⁰Nimo ootokoa kakaka one oya-lawe Yesu kakata nekete ekete ali atoa-pala ko ekepa pedoa-kama okono, dekololo widikoa oko-pe-koli okome ¹¹Akolaliyo one ali atoa pawe toa talo tokolepa papete kaukoa mema nekeneyake opi kiwi keleyo oyameteku. Nitikuyake ete ali atoa-palapa nipa kaukoane meku. ¹²Akolaline peku wedoa nako agopa nipa Akolaliyo one pekupa wedoa lawetema pokale noa tagatapeoo. Akolaline peku pa alekoa noma poko agopa nipa one eni lawetane peku nateya deyaka takoa pootapeoo. ¹³Dikane yene-pala ko ikilepa pedoane-kama oane meteku. Kini leneme enekile enoa moamoa kini kaleme yatekimo yakoa moamoa anu ukumoka wene toamoa tikili tekene ni tuku. ¹⁴Nipa Aisaiayo eya wa wia mekapiane toa taatekoa tiki.

Padele padele kini leneme eneketeke enoa moamoa pademo pademo kini kaleme yateketeke yakoa moamoa toi. ¹⁵I yene kolotini lupi

tootokaneya mea kaleme wedoa yakamele toamokolo mea kini leneta-pala lakaputukoa-kama mea tiki. Enipa leneme enoa moa kaleme yakoa moa tekete inapa Akolaline pekuno, noada wa wene tekete nooke tepe kolotini pekoa piadekolipa anume toane mou tokake kote tokale wakala toi wa Aisaiayo Akolaline agale eni toaweaa oa pianeya.

¹⁶Anu oya-lawe kime pade nitameneya kini leneme enoa moa kini kaleme yakoa moa teketepa kolotine meki. ¹⁷Ipa nimini ukuno, yakoe. Padele padele tukulepa kini leneme enoa pademo pademo ukumopa kini kaleme yakoa tikino, kini eni enoa yakoa tikiya-kitipa Akolaline agale toaweaa akane ali-kitameka wene kiyo akeneya meane ali-kitameka enoane yakadiya wa nepia meake enoa yakoa toameneya pa mea tuma-kala nekeneya.

Pedoa Akene Agale Pine Toaweaa Akenemo

(Make 4:13-20, Luke 8:11-15)

¹⁸Ina pedoane okouna agale pine toaweane ukuno, yakamene. ¹⁹Nee lene padeka ka ludu tadoa pitane adeka pikounapa eya tiki yeneke okouna. Akolaliyo one ali atoa talo tokome tokomo pade-kitame yakoake wene toamikilipa poane ago Setanu nome eni agale kini tepene pitikaneya pikota katekamoa poko. ²⁰Padeka nee lene kue pake pake pitane adeka pikounapa eya tiki yeneke okouna. Pade ali atoame eni agale yakoapa ke wa wete lukoa wedia meki. ²¹Nitiketeteke eni agale kini tepene teke wetekameneya tokome Akolalinele pa tekei takaki. Nipa Akolaline agale yakoa tikike ele kuleme ke enekakolo mea ni ete-kitame kipala poi teia mekoli tekete Akolalinele takoake wete tewitikoa waki. ²²Padeka nee lene

tonipo pake tadoa pitane adeka pikounapa eya tiki yeneke okouna. Pade ali atoame einagale yakoa moake kini kepene mama moa kini kamoya-kitike wene piitikoa mea tikili enika enileme Akolaline agale moa kautako. Nipa ipe nee kakoya ku tuamou toa pa meki. ²³Padeka nee lene itono epetaneyake pitane adeka pikounapa eya tiki yeneke okouna. Pade-kitame eni agale yakoapa inapa Akolaline peku wa noa tiki. Nitikipa ipe nee kakoya ku tuma pou toa padekapa ku ege takupeta (100) kadukoa tua padekapa ege odepeta kadukoa (50) tua ni padekapa padeka kapidi kakoa (30) tua toko wa Yesuyo oka.

Ipe Nee Lene Epetaneyake Pedoa Akenemo

²⁴Yesuyo agale pade pedoa okome okome Akolaliyo ali atoa pawe toa talo tokole ooyametekene ukuno, yakamene. Ipe pinagome-kiti one ipe ludu nee lene epetaneya-kama tadekama yakeneya. ²⁵Nitaneyake ali atoa pitikakoa one-pala poi teiane ago ponome ipe ludu ke paya lene tadekamotokome pekeneya. ²⁶Nitaneyake nee lene tadekaneya kawa tumia witakale ke leneka odeneka tumia witakome witoa ku-kitika tukome tukala taneya. ²⁷Nitikale enekete pinagono pupu yene one mekata nekete ekete kamo koniyali neke ipe ludu nee lene epetaneya-kama tadekama yakanake ke witakala tokono, edoa tokoto patu-koli okome ²⁸nopala poi teiane agome tokome toka-kale ekete eni keepa totome toa pala kakapomotoa oko-pe-koli okome ²⁹e'e mena. Nitoati wane wamuku. Eni keedo opi toa pala kakapeketepa ipe nee kakoya-kitika odeneka toa motekete motokayano, ³⁰pa odenekata witoa kamotono, wawe. Naniko wakoa momotoa nodokoa kibutukoa kaka-pete

eniya wakoa motokatiki ali atoa-pala eya wane ou. Keepa namolo takoa toa moa toe mine pitikoai tamene. Nititikoa witi kũ wakoa moapa kũ pitikoai tikita aua note pitikakoai tamene wane ou wa ipe pinagome akeneya wa Yesuyo oka.

Kalipe Lene Deyake Pedoa Akenemo

(Make 4:30-32, Luke 13:18-21)

³¹ Yesuyo agale pade pedoa okome okome Akolaliyo one ali atoa pawe toa talo tokole ooyametekuno, yakoe. Panagome-kiti kalipe lene deya takoa moa ipeke pitikapaneya. ³² Eni lenepa etene pa nateya wane deyameke eteya yomo moa patukatapea tube mati kako. Nitoa wetini toa kakolo ini-kiti pukaneya note yeneneke pitoai tiki.

³³ Yesuyo nimo ootokoa agale pade pedoa okome okome Akolaliyo ali atoa pawe toa talo tokole ooyametekuno, yakoe. Pade atoame-kiti palawe wane mono mono akateka yisi kugu moa palawe kugu odene bekoke eletekaneya. Nitikalepa palawe kugu keneke alama pokome palawe mono mono akatapeneya wa Yesuyo oka.

Yesuyo Pedoa Agale-kama Oa Metanemo

(Make 4:33-34)

³⁴ Eida oboa kakoi yene-pala einaka einamo ikilepa agale pedoa-kama oka. Nipa pademoka keleyo toawe wamoka. ³⁵ Nipa Akolaline agale toawe akane ago padame papete eya wa wia mekakapiane toa taatekoa toka. *Kipala ko ekenepa agale pedoane-kama oane mekala tou. Kipala eni pedoane oatekumopa Atai Akolaliyo tibu itonota latitikoa mekome kaukoa mema nokamo oane meou wa einagome papete wia mekaneya.*

Nee Lene Pakeke Ke Witaneke

Pine Toa Akenemo

³⁶ Nimo oomotokome Yesuyo eida oboa kanokoina yene tewitikoa yapu wa pome mepoka. Nitoa mekale one oya ali-kiti one mekata note yakanekete ekete ipeke ke lene pitikane neme adeka pikanapa pine edoa pikoto patu-koli okome ³⁷ nee lene epetaneya pitikama pekene agopa no Ali Yatenane Oy-agoke ekene okouna. ³⁸ Ipe wane oanepa ali atoa meki take ekene okouna. Nee lene epetaneyapa Akolaliyo talo toko ali atoake ekene okouna. Ke lene wane oanepa poane peku laweteko ago Setanuno ali atoake ekene okouna. ³⁹ Poi teja mekome ke lene tadekama yakene agopa Setanuke ekene okouna. Ipe nee kakoya wakoa motokatiki-pete wane ikilepa wipitia ta pataka-peteke ekene okouna. Ipe nee kakoya wakoa motokatiki ali atoa wane oanepa Akolaline edelo ali-kitike ekene okouna. ⁴⁰ Kee witakoya toe mine pitikoai taneleke ikilepa wipitia ta pataka-pete toatekaleke ekene okouna. ⁴¹⁻⁴² Enipetepa anu edelo yene moane oto wetekakolu nekete eya toi. Ali atoane wene moa koiganele peya ni ele kule poanele toma yakoi peya moapa toe noa kakatake pitikoai toi. Nitikoli toe mine mekete kime kolukoa komo ue uu keneya kaua oa kawei. ⁴³ Nipetepa epetanele toa meane yenepa kiniketai Akolalike lukoa mekoi take lou tigini pa tootapeneya kako toa kawei. Kipala i ukumo yakou wa kale piyakoa kaki-kiti kime yakoati wane uku wa Yesuyo oka.

Potipiane Kamoya Enamutanemo

⁴⁴ Akolaliyo ali atoa pawe toa talo tokole ooyametekuno, yakamene. Kue kake kue peya mati ua kapetekatapeneya potipianeya pikata panago nome enamutukome eya taneya.

One kamo toatekuya i piko wa eni kue ka wa potipimotokome yapu wakapea pokome onekeya peya topo toa kue mootapeneya. Nitoapa ta pinago mekata pokome wini itono i kueme topo toane mou wa topo toa motaneya. Nipa kolotine mekome taneya.

Yobo M̄ayoke Pedoa Akenemo

⁴⁵⁻⁴⁶ Akolaliyo ali atoa pawe toa talo tokole ooyametekuno, yakamene. Panagome-kiti yobo m̄ayo tuku toma pokome eteya-kiti takoa waatekoa etene koniyo taneya pade enemotokome yapu wakapea pome eya taneya. Onekeya peya topo toa kue moomotokome eina yobo m̄ayo topo toa mopaneya wa Yesuyo oka.

Mou Tagi Tikileke Pedoa Akenemo

⁴⁷⁻⁴⁸ Akolaliyo ali atoa pawe toa talo tokole ooyametekuno, yakamene. Pade-kitame kini mou tagi ka yuane mati moa kusa ue muke pitikoa wa ate moa enekoli eya kuya mou kapea pitakale enekete ue matanuke eka lia aua pote takoa eneki. Takoa enekete ipa epetadekono uada wa moa ipa poadekono wawada wa mitikakala tiki. ⁴⁹⁻⁵⁰ Edikaki toa wipitia ta patakapepetepa edelo yene nekete eya toi. Epetanele toma yakoi peya kiwi meati wa takoa moa wa poanele toma yakoi peya toe mine moa pitikoi toi. Nitikoli kime kolukoa komo ue uu keneya kaua oa kawei.

⁵¹ Kipala eni ukumo yakoa wene tootapiki-pe wa okale ekete eeno, wene tootapeko-koli okome ⁵² Mosesene totono pine t̄a olaukaki ali-kitamepa Akolaliyo ali atoa pawe toa talo tokomo kipala i t̄aweane uku toa yakoa moa olaukakilepa nipa eya tou toa tiki. Yapu pinagome-kiti one kamoya eya kuya yapu ua pikanakeya namoloyaka

weneyaka moa moke toa meou toa tiki wa Yesuyo oka.

Nasarese Yename Yesu Wakete Wakenemo

(Make 6:1-6, Luke 4:16-30)

⁵³ Yesuyo one eni pedoa oka agale oa peya takamotokome ⁵⁴ eni ta tewitikoa one pine take wakapea poka. Nitoapa losu yapu pome olaukoa kakale yatekete e yename ekete ipa tene peku nootokoa okoto patu. One telekole toma pokolepa tene tele patu kautakoa kakome tokoto patu wa k̄a oa kakoi. ⁵⁵ Nitikete ekete beita, i agopa Yosepe kodou agono mana. One nine Maria i mea one wamene-mikiti Yame Yose Saimone Yudase einago-mene i mea tiki. ⁵⁶ One laine-mikitika tone i take mekino, imopa dikane agomeke okono, tene peku nootokoa tokoto patuno, ⁵⁷ yakamatoo wa wene poaneya kakete akoa wakoi. Nitikoli okome Akolaline agale t̄aweane akako agopa ete yename kei pimotoake one ta pine yenameka one yapu pitiki yenameka one kei piamoa paya tetepo takoa wakala tiki wa Yesuyo oka. ⁵⁸ Eni oka toapa one eni take yene oneke wene tugameneya. Nitaneyake eida mekome padele telekole kainya toamoka.

Yone Kabe Teiganemo

(Make 6:14-29, Luke 9:7-9)

14 Yesuyo toma yakenemo kugu yatekome Erodeyo Galili ta yopikoa mekome okome ² ali atoa ue motokama yakanakago Yonepa eina wia tukamotoane tokounake wa kamomotokome nomepa nipa one tubele mati toateko tele eni luaneya yakome toko wa one pupu yene-pala akeneya.

³ Namolo Erodeyopa one poyo alikitame Yone dekoa moa kapa po kakoa po yapu pitikamotoa tikilepa eya atoa

Erodiasine wene epetekademe taneya. Erode einagome one kale atoa wamene Pilipi natono one kode motaneyake ⁴Yone Erode mekata nokome okome neke kale atoa kode motekepa toto Yu yenane kekanele wini toka wa kiko akeneya. ⁵Kikoa okale Erodeyo Yone einago wia tukamotou wa wene pianeya meake wakeneya. Nipa pa ali atoame i ago Yonepa Akolaline agale toawe akako ago tadeko wa one kei piai tokoli tokome kine wene witikaya wa piti motokome wakeneya.

⁶Wa naniko Erodeyopa one opiane oi ponokale eya taneya. Oneke lokoa ta yopia meane yeneka one pupu takane yeneka kine toge kikakakuno, toge nee natono noe wa kayo oa motaneya. Nitikale nee mekete nakoika Erodiasine kono kine lene yoto nome kakome tiabu toa kakale enekome Erode wene epetaneya mekome okome ⁷agetai t̄ia, anukuya-kiti pade mano wa oika toane etene meadene tukuno, awa oano ta wa akeneya. ⁸Nitikale nine kakata pokome edeya mano wane ou-pe wa opokale niname akoano pa wa okana toa one koname eya wa onaneya. Ali atoa ue motokama yakanakago Yone kabe teigoa one wago wane okolo kagonoke pia oto memotoa toano ta wa onaneya. ⁹Tuatoame nimo okale yatekome Erode wene kedapa taneya mekomeke nitaneya. Nipa one-pala opia mekete toge nee naki ali atoane lene yoto kakene ekene agetai t̄ia wane okouna toane tamedeku wa wene pikome ¹⁰Yone po yapu pitikata kabe teigamotaneya. ¹¹Nititikoa one wago wane okolo kagonoke pianeya ina wa eina tuatoa metekale moa ninane aua potokaneya. ¹²Nitaneyake Yonene oya-mikitame Yonene tigrini monote aua pote kota keneke pi-

paneya. Nitimotekete Yesu opatono, patoe wa Yesu mekata pote opaneya.

Yesuyo 5,000 Ali-kiti Nee Lawetanemo

*(Make 6:30-44, Luke
9:10-17, Yone 6:1-14)*

¹³Yone tuka wa onokoli yatekome Yesu ue dipike pogatekoa pome mea ali piamene take kidene eka witimoa poka. Pekedekale yatekete ali atoa kine tube take pitikoika kamomotekete one pome witatekata ka ludu pote teigoa kapokoi. ¹⁴Eida note kakakoa Yesu ue dipike mea nome katepitoa kakome enekome okome ae, elame tuku wa kine yene tane-kiti peya latekakala toka.

¹⁵Ta likaka one oyali-kiti Yesu kakata nekete ekete ipa ali piamene taano, ta-pala lima nokono, ali atoa ta latia pitikika i yene kine noatiki nee topo topoatino, poe wa wetekoano ta-koli okome ¹⁶i yename i ta tewitikoa poatiki toa mena. Anu oya-lawe kine neepa kime motokoa lawetamene-kale ekete ¹⁷tone palawe wane ko kakoa-pala mou yomo takuta toa odene piko-koli okome ¹⁸nipa oto nooke aua noo wa oka. ¹⁹Nitoapa i ali atoa poma ludu kilikoa meetapeo wa ootokoa eina ko kakoa (5) palawe wane-pala mou yomo takuta toa moa piko kakome tibuke ate nepikakome Akolali-pala ke wa ootokoa popimotoka. Popimotokome one oyali-lawe tattia mekala tokale moomoteketepa e yene tatika tatika topokoli ²⁰peyame moa noa tagatapea kitipu mekoi. Nootokaneyake kugu paka pitaneya wekotoa moa ua ka katika tuku kakoa (12) mako puputua moa pikoi. ²¹Eni nee nakoina-kiti oi motikilepa mati atoa katekoa oi moamoa ali-kama takoa oi motokolipa ege egeta kadukoa (5,000) nakedekoi.

**Yesu Galili Ue Tali
Ludu Kautoa Nekenemo**

(*Make 6:45-52, Yone 6:15-21*)

²² Nitaneyake Yesuyo one oyali-kiti-pala okome okome ue dipike peapetekoa pote eka matanuke mepoatino, poe. I ali atoa kini kini pitikika wetekamotekene nouno, patepoe wa one oyali-kiti wetekaka. ²³ Nitoapa eida oboa kakoi-kiti pipoatino, poe wa wetekamotokome Akolali kowitademe kidene witimoa tononobou ate lewia pome mepaneya. Talikaka one eida pa kidene meaneya.

²⁴⁻²⁵ Yesuyo kowitotoa mekakoa one oyalawe ue dipike mea puku pekete toa ue muke ue ate ketita pewikoa pupulegemeka kiwi nokoina lono kutu wa popokoa aua poademe tokoa kaka. Nitikoa kakale ta patademe tūei teigaka Yesu ue tali ludu kautoa noka. ²⁶ Kautoa nokale enekete ae, yukupa ipono noko patu wa nenei motekete k̄a oa kakoli okome ²⁷ no i nukuno, tepe kolotini kilikoa pimotono, piti moameo wa okale ²⁸ Pitayo okome Ali Muno nipa ne nekedekalepa no ne kakota ue tali ludu wete noo wa oano ta-kale okome ²⁹ nipa namene wa okale ue dipi tewitikoa k̄oiketikoa Yesu kakata ue tali ludu kautoa noka. ³⁰ Nokome enekale pupulege popokoa kakale enekome piti tokale tokome ue mine kekulu atukapademe kakome k̄a okome okome Ali Muno no tuamedekuno, wete toa monoo wa k̄a oa kaka. ³¹ K̄a oa kakaka eina eina Yesuyo yono lido akoa dekoa motokome okome ae, nooke nateya wene tugo meko ago dekolopomeme tuaneya noka-pe wa ootokoa ³² opia pome ue dipike mepoka. Opiapome mekaka eina eina pupulege t̄eitatapeka. ³³ Nitikale ue dipike mekoikitame one kei pikete ekete nepa nimini Akolaline mana tadeko wa wadinitukukoi.

**Yesu Genesarese Ali
Atoa Kini Tane Yene**

Latekakala Tanemo

(*Make 6:53-56*)

³⁴ Ue mine eka matanuke ue dipike mea witapote Genesarese take k̄oiketikakoi. ³⁵ Nitikoli enekete enitake yenamepa Yesu i nokono, noatino noe wa agale yekeika yukukata oa wetekakoli yatekete kini yene tane ali atoa Yesu mekata aua nokala tokoi. ³⁶ Aua note kowitikete ekete i yene tane-kitame neke mamina nami mitikatekamotono ta wa kowitikakoi. Nitikoli one mitikatekakoi peya latoa pokala tokoi.

**Yu Yenane Kauga-mikitame
Olaukanemo**

(*Make 7:1-13*)

15 Einata einapete Parisi ali padekakiti ni Yu yenane totono pine t̄oa olaukane ali-kiti Yerusaleme kawa Yesu kakata note kakete ekete ² neke oyali-kitamepa tone kauga-mikitame tamene wa olaukama nekenele toamiki. Nipakini wene moa koigakoyapa i koguna wa adeka piapa kini nee noadete mekete yono abe kogala tane toa toamikino, dekolotoamikiti patu-koli ³ Yesuyo okome kini kauga-mikitame titia olaukanele litia toadetepa Akolaliyo tamene wa okale wakete onekele pa lede takama yakino, dekolotiki pe. ⁴ Akolaliyopa *neketai-pala nekauata kei pia mape moamene* wa oaya tamene waka oa taneya. *Panagome oneketaika onekauaka tea agale okalepa wia tukamene* wa akeneya. ⁵ Akolaliyo enimo wa akeneyake panagome-kiti eyawa oko. Ae, agetai agauata kita aua-peane padeya meatekuyapa meamuku. Nitikupa enika eniya Akolaline pikakene tekene ni meamuku wa oko. ⁶ One

etene nineta edikoa paya tetepo takoa auapeamoko agopa kime kei pikete ekete neketai nekauata pa memotono, tokamota wa iki. Nipa kini kauamikitame toma nekenele litia toadetepa Akolaliyo tamene wa akene agale ete pimotowa waki. ⁷Ae, wene takuta pianeya meki-kiti kini eni toatekoilekepa Aisaiayo eya wa papete wia mekapianeya.

⁸*I toaweane uku ali-kiti kini kabunume no kei pikilepa kini tepene paya wene pianeya meketeke tiki.* ⁹*Nitikino, kini kowitikimopa edoane yakamotoa-pe. Kini kaua-mikitame titia olaukanele ile tamene, ile tamene wa olaukama pikino, yakamou wa Akolaliyo oka toa Aisaiayo papete wia mekapianeya.*

Enipa nimini eni akedeko wa Yesuyo oka.

¹⁰Yesuyo e yene one kakuta noatino noe wa kayo oa motokome okome kipala i ukumo wedoa yakoa moamene.

¹¹Panago one kimane keneke aka ketipea noa nokotikako neemepa pinali one wene oyake moa koigamele toamoko. Nitamele toamokoyake one tepene meaneya poane wene atepea kabunuke witako agalemepa pinali one wa moa koigamele toko wa Yesuyo oka.

¹²Nimo ootokaneyake one oyali-lawe Yesu kakata nekete ekete neke winimo yatekete Parisi ali-kiti nepala wene poaneya mekino, enipa wene toamoko-pe-koli okome ¹³Agetai a tibuke meko agopa oneme matameneya peyapa ipa oneme matamokounakeya wa toa mitikakala too. ¹⁴Nitoono, wini Parisi ali-kiti nopala wene poaneya mekete ikimopa oa memotono, tokamota. Wini ali-kitipa leneta lianeya yaki. Dikane agome leneta liane yagono ali lia aua puku pokome toapa nipa takuta kobu kagonoke pitaketeta pitoi wa Yesuyo oka.

¹⁵Nimo okale Pitayo okome ina pe-doa okana agalepa pine edoa pikoto patu-kale okome ¹⁶ete yename anu okounakamo wene toamikino, kimeka wene toamiki-pe. ¹⁷Panago nee eya moa nakolopa kimane keneke ponome tepene ponome me me toa wa te pu latia patukatapekala toko. ¹⁸Nitikoyake poane agale kabunu witakilepa e ku poane wene tepene meaneya yawa witako. Pinali one wene moa koigakilepa eni agaleme tokoya. ¹⁹Nipa tepene meaneya yawa witako toa tokome ali wiane tukou ni mone padane atoa liou ni abeya toane potokou ni mone padane pikoya-kiti kode mou ni kapene agale ou ni panago pa puputuane akou wa wene pia ²⁰enika eni poanele aline tepenekama aloa witakome pinali one wa moa koigako. Anu i oya-laweme yono abe koameneya witi ku kotia nakipa pinali-kiti kini wa toa potokakiya mena wa Yesuyo oka.

Kenane Take Atoa Yesuke Wene Tuganemo

(Make 7:24-30)

²¹Yesuyo nimo oomotokome eya tata Taia Saidone tata liti plane take wete eni poka. ²²Nitaneyake Kenane take meane atoa pade Yesu kotua kayo oma nokome okome Ali Muno Depidi-loeke tagene ago no ela moa auapeano ta. Anu kono akomake poane ipono awinokome tete motokakoa kakono, yapu noo wa kayo oa litima nokaleka ²³Yesuyo agale wametekoa ka ludu pa pome-kama kaka. Nitikale enekete one oya-lawe Yesuke nekete ekete i atoamepa toto litia kayo oma nokono, pa wa wetekoa ta-koli okome ²⁴Akolaliyo one pawe toane talo tukuta tewitiko atua pokoina sipi sipi kaipa oto motokoano, pa wa no wetekaka tokolo tekene Iserere ali atoa odene makutukoane moadene ni nokou wa okale ²⁵yatekome o atoame

Yesuno kawane mulinita tukupia kowitikome okome Ali Muno no auapeano ta-kale ²⁶ Yesuyo agale pedoa okome okome tone matiyane nee takoa pikoake wa tone mati wanoa tue-kiti kakoita eni nee moa pitikaketepa poanele eni toko wa oka. ²⁷ Yesuyo nimo okaleka o atoame okome Ali Muno winimopa nimini eke okoyake eya wanedo uku. Yapu pinagono nee walai takaneya pikota kugu deya pedemotokome pitakale tuekitika oyake namele toko wa o atoame oka. ²⁸ Nitikale okome ae, anu oyatoa nooke winipa wedoa wene tugoa kake okono, no-pala wini kowitike oko toa nitimotoane uku wa okaka eina eina one konopa ipono takoa pokale latoa kakeneya.

Yesuyo Yene Tane-kiti Latekakala Tanemo

²⁹ Yesu eni ta tewitikoa Galili ue matanu liti kokotoma pome tono pade ate lewia mepoka. ³⁰ One eni pome mepokata ali atoa lewi lewita pia litima nekete kini yene tane ali atoa-pala aua nokala tokoi. Nipa kawa okeaneyaya ni leneta lianeyaya ni agale amele toameneya ni yono totaneyaya enika eni ali atoa-pala aua note Yesuno kawane pia tokoli latekoa wetekakala toka. ³¹ Nitikale agale amele toameneya mekoina-kiti agale witoa oa ni kawa yoname wia mekaneya mekoina-kiti epetekaneya mea ni kawa okeaneyaya mekoina-kiti kawa pogakoa kautoa ni leneta lianeyaya mekoina-kiti leneta kikakatapeneya yawa tokoli peyame kee wa Iselele yene talo toko ago Akolali kei pia kakoi.

Yesuyo 4,000 Ali-kiti Nee Lawetanemo

(Make 8:1-10)

³² One kakuta noe wa Yesuyo one oyali-kiti kayo oa motokome okome

i oboa kaki yene mama moane ela motekene uku. Ta tebolo pataka toa no-pala opia yakete kini noatiki nee peya takatekoa pa kaki. Nee noameneya kini kini yapu tadoa poatino poe wanedo wetekakolupa yapu poadete pekete pake kobume tukete witipitoino, wetekamele toamoko-kale ³³ one oya-laweme ekete i ali atoa kainya mati toko-la. Ipa ali piamele taano, ali atoa peya mati i kakino, kini noatiki nee edoa motokoa lawetemotoa-pe-koli okome ³⁴ ni kini palawe wane-kiti edela piko-pelake ekete tatono kakoa (7) odene piko. Ni de mou deya-meneka piko wa okoli ³⁵ nipa poma ludu meetapeo wa e ali atoa mekatapeka. ³⁶ Nititikoa eina tatono kakoa (7) palawe waneka moumeneka moa pikoa kakome Akolali-palake wa ootokoa popimotokome one oyali-kiti tatia mekala tokale mootokoa e ali atoa mekoi toa nee pikama yakoi. ³⁷ Nitikoli peyame moa noa tagatapea kitipu mekoi. Nootokaneyake nee kugu pika wekotoa moa ka katika tatono kakoa (7) mako puputumoa pikoi. ³⁸ Nipa mati atoa katekoa oi moamoa ali-kama takoa oi motokolipa 4,000 ali-kiti nakedekoi.

³⁹ Nitaneyake Yesuyo eida oboa kakoina-kiti kini kini yapu tadoa poatino poe wa wetekatekoa ue dipike peapetekoa pome mea Magadane take mepoka.

A Tibuke Padele Telekole Witakamotono Ta

Wa Yesu Likoa Enanemo

(Make 8:11-13, Luke 12:54-56)

16 Parisi totonoka Sadusi totonoka litia tane ali padeka-kiti Yesu mekata nekete ekete neke toma yakole Akolaline tele patu kautakoa kake tadekalepa nipa a tibuke padele telekole witakamotono ta wa likoa enenokoli okome ² ta lima lima tokaka tibu yali

yapu kiitapeneya kakale enekete ekete podoliopa tape too tadeko wa ikina. ³Likonu witia kolopa pilikakome liane wedodo wa kiane wedo latitapekolopa opi pupulege tadalita-pala igi noo tadeko wa ikina. Ae, wene takuta pianeya meki-kiti kipala ukumo yakoe. A tibuke witakolepa ile toatekolo toko wa kime tetoa enekiyake no kaku-pete witakolepa ile toatekolo toko wa tetoa enamiki. ⁴Akolalinele takamoa poanele toawineya yakina. Nitikete ekete Akolali patu kakedekalepa padele telekole toano ta wa no likoa eneki. Nitikiyake eya odene tokale enoi. Akolaline agale akane ago Yona-pala padele tubele tane toa tokale enoino, padele pade enamoi wa Yesuyo oa poka.

Parisi Yene Sadusi Yene

Kini Tanele Toameamene

(Make 8:14-21)

⁵Yesuno oya-lawe ue dipike eka matanuke mea peketepa palawe-kiti wene kayapea ua poameneya. ⁶Nitaneyake Yesuyo okome okome Parisi ali-kitika Sadusi ali-kitika kini yisi kugu kiwike weamutukayano, wedeteko ya mene-kale ⁷kini kini yakaate tekete ekete tone noateko palawe wane wene kayapea ua noamokoonake ni oko-koli ⁸kini tepene plane wene tetoa enekome okome palawe ua noamokoinakepa edekolo iki-pe. Nooke wedoa wene tugoa meamekete tekete ni iki. ⁹Nipa palawe wane ko kakoane (5) moane ege egeta kadukoane (5,000) ali-kiti lawetekolu nootokaneyake kugu pika wekotoa moapa ka katika kainya mati mako puputumoa pikoina wene kayapetapea mekete iki-pe. ¹⁰Ni pade-petenaka palawe wane tatono kakoane (7) moane ege egeta kadukoane (4,000) ali-kiti

lawetekolu nootokaneyake kugu pika wekotoa moapa ka katika kainya mati mako puputumoa pikoina wene kayapetapea meki-pe. ¹¹Parisi yene Sadusi yene kini yisi kuguke kipala eina okounapa edoa wene toamokoi-pe. Eina okounapa palawe waneke ekene wamokouna. Dikane aline yisi kugu titi toma pamene wane ekene okou-kale ekete ¹²ae, Parisi totonoka Sadusi totonoka litia toameteko titi toma poati wa inapa okome akedeko. Kini yisi kuguke okome wameadeko wa okoi.

Yesu Nepa Keraisu Tadeko

Wa Pitayo Toawe Akenemo

(Make 8:27-30, Luke 9:18-21)

¹³Yesu Sisaria Pilipai take nome mekome one oya-lawe pitia yatekome okome ali atoame no Ali Yatenane Oy-agoke ikilepa no te kaku wa ikiti-pe wa okale ekete ¹⁴padeka-kitame i ago nepa ali atoa ue motokama yakanak-ago Yone wa oa ni padeka-kitame Yere-maia wa oa ni padeka-kitame Akolaline agale toawe akako ago pade wa oa tiki-koli okome ¹⁵nimo wapa akedikiyake anu oya-lawe kime no te kaku wa iki-pe-kale ¹⁶Pitayo okome nepa pa mea kama noko ago Akolaline mana one wa papete takoa kakapiane ago Keraisu wa oka. ¹⁷Pitayo nimo okale Yesuyo okome Yonene mana Pita nepa kolotine meko ago. Neme wini okopa pa aline wene takaka toa wamokona. Age-tai a tibuke meko agome wene takaka tokale ni wene toa oka. ¹⁸Eya waneka uku. Pita nepa kue yaupea wa ibini akene ago. Eni kue yaupea waneke yapu wiou toane anu peku nakoi-kiti moane obokoane talo tou. Nitikolu tuane yene yopia mekoi-kitame anu peku nakoi-kiti moa atukadete wili tokoa kawa teko tokale wawei. ¹⁹Ni Akolaliyo talo toko

ta kago ketepono peateko kiipa ina wane ne moane meou. Nipa itonokepa ile tamene, ile toameamene wa wene kibututukoa okapa a tibuke meko Akolaline wene pika toa-kama eke too wa Yesuyo oka. ²⁰Nimo ootokoa okome no Yesupa Akolaliyo takoa moa kakapika ago Keraisu taatekoane nekedeku wa ali atoa enekete toawe ikileka toameamene wa Yesuyo oka.

Yesu Tuake Wa Kamoa Poatekamo

(Make 8:31-9:1, Luke 9:22-27)

²¹Einapete titimoa Yesuyo one tuatekamo toawe okome okome Yerusaleme take pone mekolu eya ali-kitame no tete-kala meoi. Kanosolo ali-kitika Akolalike lodo yoai tiki tobou ali-kitika Mosesene totono pine toa olaukaki ali-kitika enika eni ali-kitame no wia tukoi. Nitikolika ta tebola takoa pataka-pete Akolaliyo moa kamotokoo-kale ²²Pitayo pata wa Yesu eko keneya aua pome kakome kiko okome okome Ali Muno nepa Akolaliyo mama moamedekono, eni yename nitamoi-li wa okale ²³Yesuyo peketapekome Pita-pala okome i ago Setanu anu mukiti lono kuka poneke kaponu, Akolaline wene piko toane litiane takaya tokolo ka ketekake oko. Winipa Akolaline wene piko toa wamoa pa aline wene piko toa okono, wa wa ootokoa ²⁴one oya-lawe peya-pala okome no i ago litima nou wa wene piko agopa nekele tewitikoa wamene. Nipa ne wia dekatiki yomo lia aua nou toa tete mokoa kakeka no litima namene. ²⁵One kepene mama motokome tukaya wa piti motaneya mekagopa etepea tua poo. One kepene mama moamokome no einagoke oyake tuou wa wene piko agopa toa motaneya mea kama poo. ²⁶Panagomepa one yomini atukome atumotoake itonoke pia kawa toko peya mootapeadekalepa

eniya peya edeya weike moamoo. One yominido atukome atukalepa edeyame oto wa topo toa momotoa-pe. ²⁷No Ali Yatenane Oyagopa anu edelo ali-kiti-pala opiane nekenepa Agetai pa teleta tootapeneya meko toane meane nou. Nitikenepa ali atoa peyame epetaneleka poaneleka toma yakoinake nami wiane topo takakala tou. ²⁸Nimini ukuno yakoe. Ita kaki yene padeka-kiti wete tuameneya mekete enekoli no Ali Yatenane Oyago etene ako odene tobou meatekou ago nokolu enoi wa Yesuyo oka.

Yesuno Lene Timini Mamina Eya

Yati Yati Tootapeanemo

(Make 9:2-13, Luke 9:28-36)

17 Ko melepu kakoa (6) ta patatekaneyake Yesuyo Pita Yameta Yamene wamene ago Yone toa kidene-mene ete witimoa aua pome tono kakene matike lewia pome kapaneya. ²O ali-mene aida kakakoa one-pala padele tokome one lene timini lou pa keneya yati yati tootapea one maminaka lou pa keneya ake tootapea taneya. ³Nitaneya kakata Mosese Ilaidata kotikatapea nekete Yesu-pala ko oa kakeneya. ⁴Nitikoli enekome Pitayo okome Ali Muno kimene ko oa kakita toto-meneka odeneya kakono, epetekono, neme nitika wa okalepa nipa aga yapu tebola Mosese Ilaidata kini wikakakala too wa okaka ⁵pa tootapeane wedome agopa takoa kauma nekeneya. Nitikaka eni wedo keneke agale ludu nokome okome anu kolotini ago anu manago wini kako. One tokoleke wediane kakuno, one oka toa yakoa tamene wa okale ⁶yatekete one oyali-mene piti mati tokale itonoke ketipea lene timini lono aua pitaloganeya. ⁷Aua pitakoita Yesu nokome yoname mitikatekakome

okome piti moameneya wete kamokoa kawe wa okale ⁸ate enetekakoli Yesu odene kakedeka.

⁹Tono aya wane mea keti toa pekete pake Yesu kakome okome Ali Yatenane Oyago no tukolu wete kamotokameneyakepa kimename opi enekoinakamo pa kini luaneya mema yamene wa okale ekete ¹⁰Yu yene tone totono pine toa olaukaki ali-kitame eya wa olaukaki. Keraisu naniko taatekoa nomotoa Ilaida namolo takoa noo wa olaukakiya. Enipa edekolo ikiti-pe wa okoli okome ¹¹Ilaida einago namolo takoa nokome padeya padeya peya nodoka nodoka toono, enipa nimini ikiya wane uku. ¹²Nimo wanepa ekeneke eya waneka uku. Ilaida wete wina wakapea noka. Nitikanake ali atoame ina okoinakago i nekedeko wa wene toamekete tokome e ku wene ponoka toa litia tekete one tete mekala tokoi. Edikakoi toa no Ali Yatenane Oyagoka tete motokakala toi wa okale ekete ¹³Ilaida wa ina okanapa, ali atoa ue motokama yakana Yoneke okome akedeko wa wene tokoi.

**Ipono Awitaneya
Meane Mati Latekanemo**

(Make 9:14-29, Luke 9:37-42)

¹⁴Tonoke ketipea kōa ali atoa oboa kakoi pakeke pote kakoli ali pade Yesu kakata nome wadini tukupia mekome okome ¹⁵Ali Muno ne kowitikumo yakoano ta. Anu mana mati leau okome tete mati mokoa kakomepa padepete-kiti toe mine aua pitakome uele aua pitakome-kala toko. ¹⁶Nitikalala tokale tekene neke oyali-kiti mekoita latekakoatino toe wane auane nokounake latekakamele toamoka. Anu mana neme elado motekepa latekakoano ta wa kowitikale okome ¹⁷ae, ipete meki ali atoa kime Akolalinemo yakamo wene moa

koiganeya mea tikino, kini eni poane wene tewitikoa wamotoane edoane nepiane meamou wa ootokoa matiyane etene-pala okome neke mana mati no kakuta aua noo wa okale ¹⁸aua nokale ipono kikoa okome okome i mati takoa pa wa okale takoa poka. Takoa pokaka eina eni mati latoa wene epetekaneya kaka.

¹⁹Nititikaneyake Yesuno oya-lawe one kakata kidene-mene nekete ekete ina ipono totomepa oyake takoa wetekamele toamokano, edekome tokato patu-koli okome ²⁰⁻²¹nooke pa nateya wene tugoā mekete tokome takoa wetekamele toamoka. Kalipe lene dedeyameke witakome leau akatapea witako. Akolalinedo edikoa takama peketepa nipa i kako tonoka toa yeta kapono wa okoli yeta ponome kapono. Nipa padele padele peya kime oyake tamele tokale nitoo wa Yesuyo oka.

**Yesuyo One Tuatekamo
Wa Tōaweā Akeneya**

(Make 9:30-32, Luke 9:43-45)

²²Yesu one oya-laweka Galili take koukoa mekoi-pete pade one eni oya-lawe-pala okome no Ali Yatenane Oyagopa pade-kitame wimotoa panagome ete moa meoo. ²³Moa metekale wia tukakolika ta tebolo takoa pataka-pete kamoane pou wa Yesuyo okale yatekete wene keda mati toologakale mekoi.

**Tobou Losu Yapu Takesi
Kueke Akenemo**

²⁴Yesu one oya-lawe-pala Kapaneame take note mekoika tobou losu yapu takesi kue motokama yakene ali-kiti Pita kakata nekete ekete neke tikisa agome tobou losu yapu takesi kue pitikakoya-pe wa okoli okome ²⁵eeno, Yesuyo nitikoya wa one yapu wakapea pome mekome Yesu-pala agale oademe tokale Yesuyo okome itonoke tobou meki ali-kitame

takesi kue moteketepa kini yenaneke motiki-pe. Mone pa yenaneke motiki-pe-kale okome ²⁶mone yenaneke odene takesi kue motiki-kale okome winipa nimini oko. Tobou ali-kitane manamikitame takesi kue pitikakiya mena. ²⁷Nipa agetai Akolaline tobou losu yapu takesi kue pitikateku toa menake takesi kue motokama yaki-kitane wene pokaya tokale eya topoano ta. Galili ue mine poke mou tikoa motokoano pa. Tikakale mou eina wete tanikale aka moa pitikoa pakunu lakapea enekale kue lene pade abutaneya enoo. Tone takesi pitikateko kue wini pioono, moa aua poke pitikapamene wa Yesuyo okale Pitayo nitikapoka.

Akolaline Take Ako Meateko Ago

Te-Pe Wa Pitia Yakanemo

(Make 9:33-37, Luke 9:46-48)

18 Einata einapete Yesuno oya-lawe one kakata nekete ekete Akolaliyo talo toko take ako tobou meateko agopa te-pe wa yakanokoli ²⁻³Yesuyo yatekome de mati deya pade ne noo wa mootokoa kiwi kakoi pakeke kakakome okome kipala i nimini ukumo yakoa moamene. Kini wini wene wia wawa i mati deya keneya meameadekolipa nipa Akolaliyo talo toko take etene poamoi. ⁴I de mati deya nate wene pi-aneyaya meko toa meko agopa nipa Akolaliyo talo toko take ako ago meademe toko. ⁵Panagome-kiti dikane mati deya nooke toado makutukoa motokomepa nipa nopala eni dekoa makutukoa motokome toko wa Yesuyo oka.

Poanele Tikileke Pubu Akenemo

(Make 9:42-48, Luke 17:1-2)

⁶Dikane mati nooke wene tunganeya meko mati odeneke padele poanele to-motoa likoa enoa labakagopa Akolaliyo kibu motokome dika dika toamene tete

meoo. Ae, eni tete mea kibu moamo-motoapa papete mati wete likoa enam-eneyake panagomede laukakoa tube kue matiyame einagono kabe kautoa kusa ue muke pitikakale ue nakoa tukalepa nipa epetoo. ⁷Ele kule poanele witakoleme ali atoa likoa enekala toko. Ae, itonoke enika eni poanele witakile tamele toapa tokoyake padele poanele tomotoa likoa eneko agomema dika dika toamene tete moo. Nitikaya-nalino, wedoa meamene.

⁸Neke yonameka neke kawameka pinali ne toa potokadekalepa teigoa mitikamene. Pinali neke kawaka neke yonoka teigoa mitikoa duku yawa kakeka mea kawateko takedo poke mea kakalepa nipa epetoo. Nitameneya yonotaka kawataka kakeneya toe noa-kala kako takedo moa pitikaneya mekalepa nipa poo. ⁹Neke lenemeka ne toa potokadekalepa nipa lene toa wamene. Neke lene pade tootapeneya yawa kakeka mea kawateko takedo poke mea kakalepa nipa epetoo. Nitameneya leneta takuta kakeneya toe noa-kala kako takedo moa pitikaneya mekalepa nipa poo wa Yesuyo oka.

Katepitoa Pekene Sipi Sipi Kaike

Pedoa Akenemo

(Luke 15:3-7)

¹⁰I de mati deya odeneke paya tetepo takameamene. Kini edelo alikitame dikane mati yopikilepa Akolaline leneke-kama kakete tikili ni uku.

¹¹⁻¹²Panagome one sipi sipi kai ege takupeta kadukoa (100) egetekale-kiti odene katepitoa atupokalepa pinagome edoo-pe. Nipa eya too. Ete sipi sipi kai-kiti tono payaneke eida koukoa kakoika kamotoa eina katepitoa atupokana kai pitia tuku tokoa kawa ¹³enamua motokomepa kolotine oto noo. Nipa atupameneya ege takupeta kadukoa (99) kakene sipi sipi kai-kitike wedikilepa

tokomeke one eina tuku toa enamutukana kaike etene wedoa wedikome kolotine meoo. Enipa nimini uku-pe. ¹⁴Eina toa kiniketai Akolali a tibuke mekome one i de mati deya odeneka paka atupokaya tokolo wedoa talo toa kako.

Neke Oyagome Padele Poanele Tokolo

Mane Oa Moteke Toatekomo

¹⁵Neke oyago padame nepala padele poaneledo tokalepa nipa poti one mekata kidene poke eke ame i poanele neme i tokona wa opamene. Nitikale okome ae, ame nimini oko wa ela motokalepa nipa one-pala wa oya patu pike Akolaline kaake oto moa kakake too. ¹⁶Nitameneya einagome yakamokalepa neke oyali-mene takutaka teboloka yatekanoatino noe wa einago mekata moa aua pamene. ¹⁷Nitikale e ali-mename okoimoka yakamademe wakalepa losu yapu opatono noo wa nepala tokanakamo i i wa toawe opamene. Nitikale ali atoame kokotukoa okoi agaleka yakamademe wakalepa nipa Akolalinele takamene agoka takesi kue motokama yako agoka tetepo takoa wamene.

¹⁸Etene nimini ukuno, yakamene. Itonokepa ile tamene, ile toameamene wa kini wene kibututukoa okoi toapa a tibuke meko Akolaline wene pika toa-kama ekete toi. ¹⁹Eya waneka ukuno yakamene. Itonoke meki-kiti takutameka tebolomeka odene wene piitikoa kowitikete okulipa Agetai a tibuke mekome kini kowitikete okoi toa-kama yakoa too. ²⁰Takutameka tebolomeka anu ibini wedekoa koukoa mekoi toane kiwi pakeke none menokala touno, Agetaiyo kini kowitikoimo etene yakoa too wa Yesuyo oka.

Pupu Agome One Odene Pupu Ago

Ela Moamokome Tanemo

²¹Pita Yesu kakata nokome okome anu oyagomede no-pala padele poanele tokala tokalepa edela-peta po letu mekamoane nami wiamoane tomotoa oko-pe. Tatono (7) kakoa-peta patu-kale okome ²²tatono kakoa-peta wane pade wamuku. Ege kadukaka tatono kakoa-peta (70 x 7) nepala poanele tokala toka toa po letu mekamoala nami wiamoala tamene. ²³Nipa Akolaliyo ali atoa pawe toa talo tokoleke eya wane pedoane uku. Tobou agome-kiti one pupu ali-mene kime wina anuke padeya-kiti nami kakoa motokoinakeya-kiti wa oto anu mouno, noe wa agale oa wetekaneya. ²⁴⁻²⁵Nitikale titikilepa eya taneya. One pupu yene yopiane agome pupu ago pade takoa aua nokale tobou agome okome neme aunake kina kue ege egeta kadukoa (7,000,000 kina) motokana toa oto wa mano-kale okome ae nekena nami wiane meateku kue toamokono, edeku patu-kale okome i agoka one mati atoaka one yapu pikoya-kiti topo takoa auna kuke kue motokoano ta wa one pupu yene yopikane ali-pala akeneya. ²⁶Nimo okale one eina pupu takakanakago one kawane witipitoa aua pitalogoa kowitikome okome nekena kukepa kue kotuke oboane meouno wa-ye wa kowitoa kakale ²⁷tobou agome ela motokome okome nipa aunake nami kakoa motokana kuke kue moamadene eni wakuno, opa atiki tootapea pa wa one yapu wetekaneya.

²⁸Nimo wapa akeneyake one eni pupu takakanakagome akolono wititapea ponokome enekale one odene pupu ago pade ponokale enekome einago tomo po dekamotokome okome aunake ege odepeta kadukoa (50) kina

kue nami kakoa motokana wetu oto nami wia mano wa okale ²⁹⁻³⁰one eina odene pupu ago one kawane witipitoa pitalogoa kowitikome okome nekena kuelepa kue kotuke oboane meouno, wa-ye wa okaleka e agome okome auna kuele kue wetu nami wia oto meamokoyake ne po yapu pa pioo wa po yapu moa pitikapaneya. ³¹Nitikale enemotekete ete pade pupu alikiti wene keda mati tokale mea tobou ago mekata nekete einagome tokamo dika dika wa tawea onaneya. ³²Nitikoli yatekome tobou agome one mekuta ne noo wa einago kayo oa motokome okome nepa lene plane ago tadeko. Anake kue nami kakoa motokana peya oto wa moameamene wa neme no kowitikale oto moamokouna. ³³Eina anume ne ela motekene tokouna toa nemeka neke odene pupu ago ela motikinakeya, dekale ela moamoka-pe wa kikoa ootokoa kakome ³⁴po yapu yopiane ago-pala okome i agome anu kuele kue wetu nami wia oto meamokoyake po yapu pa pia kamotono, po yapu pitikakapa. Eida layo toua wikala tamene wa moa metaneya. ³⁵Ae, Age-tai a tibuke mekome kupalaka enakale too. Nipa kini oyago padame kipala padele padele poanele tokake po letu mekakoina keetapeamadete wakolipa Akolaliyo nitoo wa Yesuyo oka.

**Alime One Atoa
Wakeneleke Akenemo**

(Make 10:1-12, Luke 16:18)

19¹⁻²Yesuyo enimo oomotokome Galili ta tewitikoia Yodane ue ketoa eka Yudea take pome mepoka. Poademe pokaka ali atoa lewi lewita pia litima nokoli kini tane yene eida latekamau toka.

³Parisi ali-kitika nekete ekete padele tubelekeka natelekeka panagome one atoa pa wa wakopa nipa tone totono

litiapa tamele toa toko-pe wa natemo omotadiya wa kakete okoli okome ⁴*namolo namolo Akolaliyo kamate meaneya-kiti titikome latikilepa ali atoata takuta wa-kama latikala taneya.* Eni tanemo one bokuke wia mekaneya kime oi moamokoiya-pe. ⁵Nitanelekepa *alime atoa motokomapa etene nineta tewitikoia one atoa-pala lipua meoo. Nipa namolo letetakutukoata meaneyake naniko odene tigni tetepo taneya mekete liputakutukoata meoi.* ⁶Nitoo mekoli ipa i ago ipa i atoa wa tutu tutu wa ibini amele toameneya tokome i adona wa odene tetepo takoa oi. Nipa Akolaliyo moa lipukane ali atoata wa padameka moa letekatakutukamele toamoko wa Yesuyo okale ⁷Parisi ali-kitame pitia yatekete ekete panagomede one natono wawademepa namolo takoa opi ne eni wakene wakuna wa edikoa pipia wia meetekoapa opa pa wa wetekamele toko wa Moseseyo akeneya-mo. Enipa edekale akeneya-pe wa okoli okome ⁸Moseseyo eni akenepa kini kaua-mikiti kolotini lupi tootapeneya mekoli tokome ni akeneya. Moseseyo nimo ikilepa taneyake Akolaliyo padeya padeya peya titia latikome oa plane toa akeneya mena. ⁹Opi noanume eya wane uku. Pade atoa eko ali kode noameneya meaneyake anamedo ne pa wa wetekatekoa pade atoa motokomepa mone koua piamateko atoa eni motokome toko wa Yesuyo okale ¹⁰one oya ali-laweme ekete ali atoa edikoa meamediki wa neme okopa nipa alime atoa edoa moamoono, atoa moameneya tiobo ago-kama kaketepa nipa epetoo-koli okome ¹¹eni ukupa ali peyame oyake litia tamele toamoko. Kipala ukulepa i agome-kiti litia tomotou wa Akolaliyo wene pikalepa nipa oyake litia too. ¹²Pade ali-kitipa ninane tepene taneya nekene toa atoake wene kamoamokolo tiobo

ali-kiti meki. Wa pade ali-kitipa alime mu motokatapeneya tokome tiobali-kiti meki. Wa ali padeka-kitipa eya kuya peya talo toko ago Akolalinearle takama pukuno, atoa mena, moamou wa tiobali-kiti pa meki. Anu i ukule litiane tou wa wene piko agomepa nipa edikoa mema pamene wane uku wa Yesuyo oka.

Yesuyo Mati-kitane Kowitikanemo

(Make 10:13-16, Luke 18:15-17)

¹³Wa pade-pete pade-kitame kini mati-kitipa Yesuyo yono pia kowitikamotoa aua nokoli one oyali-kitame poe wa kikoa okoli ¹⁴Yesuyo okome wini mati-kiti oto nomotono, etoe. Akolaliyo one talo tuku taapa kinino, noe wa yametekilepa dikane mati-kiti yametekono, oto nomotono toe wa okale ¹⁵nokoli yono pia kowitikamotokome padeka poka.

Uu Kamo Tane Tualike Akenemo

(Make 10:17-31, Luke 18:18-30)

¹⁶Wa padepete panago Yesu kakata nokome okome Tikisa ago Akolaliyo talo toko take meane kama pouno, padele epetanelepa edele tekene meane kama pomotoa oko-pe wa okale okome ¹⁷epetanelekepa dekolo no pitia yateko-pe. Epetanele-kama toomoa poko agopa Akolali odene. Meane kama pouno wene pikepa nipa Moseseyo tamene wa oa pianele-kama toma pamene-kale okome ¹⁸mani agale-kala litiane tomotoa oko-pe-kale okome ali pade wia tukamo mone padane atoa liamo monekeya kode moamo panago-pala pa puputua akoo agale wamo tamene. ¹⁹Ni neketai nekauata kei pia mama moa ni pinali neeke wa wene mekoa mama motoko toa yete pade ali atoake wene mekoa mama moamene wa Yesuyo okale ²⁰tualime okome neme wini

okole-kamapa litiane toma nukuno, edele katekoane toamukutu-pe wa okale okome ²¹Akolaliyo wene piko toane kotuke kakoane litiane tou wa neme wene pikepa nipa nekeya peya topo toa kue moamene. Mootokoapa ponopene ali atoa enoa tatia meetapeamene. Nitikepa neke kamoyapa a tibuke auma kakeneya enoo. Nitatekoyano, no litima namene wa okale ²²yatekome wene keda taneya wawa poka. Nipa uu kamo tane ago tokome taneya. ²³Nitoo pokale Yesuyo one oya-lawe-pala okome ae kamo tane ago Akolaliyo talo toko take pikilepa etene wili tokoa kawapa poka. ²⁴Kamelo kaido noi keneke-kiti patukoa ponokomepa nipa wedoa wili toa kawamoapa patukoa ponoo. Kamo tane ago Akolaliyo talo toko take ponokomepa nipa wili tokoa mati kawapa ponoo. Nipa one eni take pamene poto tube mati toko wa okale ²⁵one oya-lawe wene peya mati pianeya kakete ekete ekee, kamo yeneke winimodo nimini akedekalepa nipa Akolaliyopa mainali atoa toa moo tokolo-pe wa okoli ²⁶Yesuyo nepikakome okome ali atoame toamatikilepa Akolaliyopa oyake tamele toko. Padele padele peya tamele toko ago tokome kamo agoka one take nomotoa ka patekamele toko-kale ²⁷Pitayo okome ne litima noadetepa tonekeya peya tewitiko wawa nokoono, neme edeya nami wia meoo-pe-kale okome ²⁸itono tibuta takoo pokale eni luku weneya pikalepa pa tootapeane walaike no Ali Yatenane Oyago pone mepou. Nitateku toa anu oya kiwika nooke lokoo tobou ali-kiti meatikiya walai tuku kakoake (12) mekete Iserele yatene tuku kakoa (12) tatite toa takoo enekala toi. ²⁹Wa panagomede ipa no Yesuke tuku wa one yapu one etene nineta one laine wamene-mikiti one mati-kiti one ipe

one ta eya tewitikoā wakomepa nipa enika eniya lukukepa ege takupeta kadukoa (100) mokala too. Nitoa mea tukale Akolaliyo one talo tuku take mea kama pamene wa moa kakoo.³⁰ Akolaliyopa ako yene kainya mati keku kakoa wa keku yene kainya mati ako kakoa too wa Yesuyo oka.

**Pine Agome One Ipe
Pupu Takane Ali-kiti**

Kue Metekome Tanemo

20 Yesuyo okome okome Akolaliyo ali atoa pawe toa talo tokole ooyametekuno yakoe. Gerepi po ku ipe pinagome-kiti likonu witiane ipe takatiki ali-kiti enemopou wa mekoika pekeneya.² Pokome enekome okome tebolo-wa-kama kue kina mekala touno, anu ipe takapoi-pe wa okale ekete takapouno ta-koli okome nipa takapoatino, poe wa moa wetekaneya.³ Nititikoā lou pini pogi (9) kakoakeka makesike wa wakapea pome enekale pade ali-kiti loyo mekoli enekome okome⁴ kini moatiki toane kue mekala touno, anu ipe takapoatino, poe wa moa wetekakale takapaneya.⁵ Bera-peteka (12 kilokoka) lou aukapokaka (3 kilokokeka) einakale toa pade ali-kiti enekome takoa moa wetekakala taneya.⁶ Wa naniko ogopono (5 kiloko) wa wakapea pokome enekale pade ali-kitika loyo mekoli enekome okome i makesike likonu witia pa loyo meemoa note ta likakino, edekolo pupu toamiki-pe wa okale ekete⁷ pupu yametekago ago nikileka toamoka-koli okome nipa anu gerepi po ku ipe takatiki pupu pikono, takapoatino, poe wa wetekaneya.

⁸ Ta likaka gerepi po ku ipe pinagome eni yene yopikago-pala okome okome anu wini pupu takaki ali-kitipa kue meteke ile tamene. Wipitikene takoane motokouna ali-kiti kue

namolo takoa meawineya pamene. Ketekepa namolo takoane motokouna yene mea wipitiamene. Wete kayo oa moa kue metekakala toano ta wa okale⁹ pokome ipe pinagono pupu ogopono titikete takane ali-kiti nokoli kina tebolo-wa-kama metekaneya.¹⁰ Nitima pome wipitikale namolo takoa motokana ali-kitame kue ako mouno wene pia nokoli ipe pupu yopikagome kina tebolo-wa-kama metekaneya.¹¹⁻¹² Nitikale motekete ipe pinago-pala ko oa kakete ekete likonu wititapea tape louke pupu takamao note ta likakouna. Nitikoonake lou pini odeneke pupu nateya takakoina yene-pala totoka odele toa pupu takane tetepo takoa kina tebolo-wa-kama neme meteko-koli¹³ pupu pinagome pupu takane ago pade-pala okome anu oya ne toane potokamukutu-mo. Kina tebolo meouno, anu pupu takapoo-pe-kolu eke eno, nitikouno ta wa neme okana. Enimopa wamokanakamo okotu-pe.¹⁴ Kue ne i metekene tuku toanepa keteane moane wetekakounakagoka kina tebolo meadene uku. Neke i kuepa moano ta.¹⁵ Anukuyapa anu wene litiane oyake tatiane meamele toko. Naniko ina nokanakago edikoane pewe witikouna tokolo ni nopalapa wene poaneya kake oko-pe wa ipe pinagome akeneya wa Yesuyo oka.¹⁶ Nimo ootokoa okome wina pedoane okouna toa Akolaliyo naniko nokoi yene namolo kakoa wa namolo nokoi yene naniko kakoa too wa Yesuyo oa poka.

**Yesuyo One Tuatēka
Tebolo Takoa Akenemo**

(Make 10:32-34, Luke 18:31-34)

¹⁷ Yesu ate Yerusaleme take poademe pokome one tuku kakoa (12) oyali-kiti eko keneya witimoa aua pokome okome kipala i ukumo yakoe.¹⁸ Opa ate Yerusaleme take poadete poko.

Pote kakolo no Ali Yatenane Oyago panagome moa eya yenane yonoke Akolalike lodo yoai tiki tobou ali-kitika Mosesene totono pine toa olaukaki alikitika kini yonoke pioo. ¹⁹ Nitikale no wiatekoi oi pedoa piitikoapa mone pa yene kime wia tukakoe wa metekoli motekete tegene matao po wapime wia yomo lekaneyake wia dekoa toi. Nitikolika ta tebolo takoa pataka-petepa Akolaliyo moa kamotokoo wa Yesuyo oa pika.

**Yame Yonetane Niname
Yesu Kowitikanemo**

(Make 10:35-45)

²⁰ Yesu Yerusaleme take kutu poademe pokaka Sebedi natono one manata-pala Yesuke nome wadini tukupia kowitikakome okome agale deya ou-kale okome ²¹ anume edele takamotoa oko-pe-kale okome ne tobou ago meke talo tokaka i manatame ne auapekete panago neke nimini yono lono mea padena ago neke ewa yono lono mea yopimotoane uku-kale ²² Yesu eni wamena kakoi lono peketapekome okome wene toameketeke ikino, no noateku tetepa kitameka noukete iki-pe-kale ekete eno, nitato ta-koli okome ²³ no noateku tetepa kitameka eni noateku toa noi. Nitadete tikiyake ali atoa talo toane mekouta eka oka yono lonota kita tatikatakutukoane mekamele toamoko. Eka okata meatiki agotapa Akolaliyo i i wa wete wene toopianeyano, anume oyake oyameamele toamoko wa Yesuyo oka.

²⁴ Nimo wapa akedekoli yatekete o yename eni wamena-pala wene poaneyaka kakete ko oa kakoli ²⁵ Yesuyo one kakuta noe wa kayo oa motokome okome mone pa yatenane tobou ali-kitame kini yene wete toe toe wa tika tika-kama tiki.

Kini ibini akene ali-kitameka ali atoa yopia mekilepa kinikile-kama takamotoa tiki. ²⁶ Nitikala tikino, anu oyalawe kime pade edikameamene. Tobou ago meou wa wene piketepa nipa kinikile toamekete kini oya-mikitanele takama pamene. ²⁷ Nipa ako odene mekene talo tou wa wene piketepa nipa pinagono pupu-kama takamotoa kueme topo toa moa egetane ago keneya meamene. ²⁸ Noanupa Ali Yatenane Oyago taatekoane nekenepa ete yename anukule takamotoane nokouya mena. Nitameneya ete-kitanele takoane ni ali atoa peya mati anu kamateme oto toane moukene ni nokou wa Yesuyo oka.

**Leneta Lianeya Meane
Agota Epetekanemo**

(Make 10:46-52, Luke 18:35-43)

²⁹ Yesu one oya-lawe-pala opia pome Yeriko ta tewitikoa pokaka ali atoa lewi lewita pia litima pokoi. ³⁰ Kini ponokoya liti leneta lianeya meane agota batete matanuke eida mekete yatekoli Yesu wini patukakona wa oma ponokoimokamo yatekete kayo oa ekete Depidi-loeke tagene ago Ali Muno neme tota ela moamene-ye wa kayo okolipa ³¹ Yesu lewi lewita pia litima ponokoi-kitame kikoia ekete ekete agale oyakeno, wawe. Kilikoa meo wa kikoia oma ponokoi. Nitikolika einagotame kayo telo kamotokoa ekete Depidi-loeke tagene ago Ali Muno neme tota ela moamene-ye wa kaata wikoia kakoli ³² Yesu witimoa kakome okome nipa noe wa okale nokoli okome anume edele takamotoa iki-pe-kale ekete ³³ Ali Muno tone leneta kikoono, epetekoano ta wa okoli ³⁴ ela motokome kini leneta mitikatekakale eina eina kikatapeneyata Yesu litimata pokoi.

**Yesu Yerusaleme Ta
Ate Poademe Pokaka**

**Ali Atoame One Kei
Piawineya Nekenemo**

*(Make 11:1-11, Luke
19:28-40, Yone 12:12-19)*

21 Yesu one oya-laweka Yerusaleme ta tigotokoa witapadete peketepa Oliwe-pini tonoke latiane Betepase take witakete Yesuyo eya toka. One oya ali-kiti takuta moa wetekakome okome ²kuka ku take poatino poe. Pote witoa kaalaukete enekoli dogi kai tine-pala eida po kakoa kebetaneya kakoli enoi. Eni dogi kai nina po kotokoa oto aua notokamene. ³Kotokoa moadete kakoli panagome dekolo motiki-pe wa okalepa eya wa akamene. Ali Munoyo padele toatekole pikolo ni motokoa poko. Opi oto wa wetekademe toko wa akamene wa Yesuyo oka. ⁴Enipa Akolaline agale toaweake akane ago padame eya wa papete oa plane toa taatekamotoa tokoi.

⁵*I Saione take meki kono-mikiti kiwi yopia tobou meatekago wini noko. Nokomepa dogi kai tali waneke mekome ua mootokoa patutu ootokaneya mea noko. Nipa dogi kai tine patu mea noko wa padame oa pianeya.*

⁶⁻⁷Eni oa plane toa taatekakete Yesuno oya alita takutame Yesuyo okalee pote topokoi. Nipa eni dogi kai nina aua neketepa kini kakene mamina petene kotokamo dogi kai patu tatikakoli Yesu mea poka. ⁸Nitikaka ali atoa peya matiyame kini tokoo kakene mamina kotokamo one mea poatekaka bateteke pia tatikama pokoi. Wa padeka-kitame yomo yenene deya tewia moa batete ludu tatikama pokoi. ⁹Nitoka lewi lewita pia peketepa namolo kawa pokoi-kitameka ketea kawa nokoi-kitameka agale kamotoka

kamotoka toa ke ke wa oawineya peketepa ekete

Depidi-loeke tagenago i ago kei piatote.

I agopa Ali Muno Akolali patu kautakoa kama nokono, Akolali neme pewe wia yopia kamene. A tibuke meki peya one kei piamene-ye wa kolotone togete oawineya pokoi.

¹⁰Oawineya nomotoa Yesu Yerusaleme ta ata witakalepa ali atoa ete pato oto pato toa kakete ekete i ago te-pe wa ka wikoa kakoli ¹¹lewi lewita pia nokoina-kitame ekete i agopa Nasarese Yesu Galili ta keneke piko Nasarese take ago Akolaline agale toaweake akako ago wa topo takoa okala tokoi.

**Yesu Tobou Losu Yapu
Pokome Tanemo**

*(Make 11:15-19, Luke
19:45-48, Yone 2:13-22)*

¹²Yesu one pa kutu pokome tobou losu yapu pome kapoka. Pome kakome eya kuya eida-kama topo toa tane alikiti wia tikatapeka. Nitoka e ku take latiane kue topo toa Yudea kue lene ete mea tokoi alikiti kini walai-kiti moa pekatapea ni ini puluma yoa tane yenane walai-kitika moa pekatapea toka. ¹³Nitikome okome anu i yapupa no Akolali ali atoame kowitoai toatiki yapu wa one bokuke wia mekaneyake kimepa kode yename kodeya paigakoa moa potipiai tane kota tetepo takakino, poe wa wia tikatapeka.

¹⁴Yesu losu yapu pa eida kakale leneta liane yeneka kawa okeane yeneka one kakata nokoli epetekatapeka. ¹⁵Yesuyo ele kule telekole tokaka eida tobou losu yapu kakoi mati-kitame ka oa kakete ekete Depidi-loeke tagenago kei piatote wa ka oa kakoi. Nimo okoli yatekete tekete Akolalike lodo yotokoai tane tobou ali-kitika Yu yenane totono pine toa olaukane ali-kitika Yesu-pala wene

poaneya kakete ekete ¹⁶i mati-kitame ka okoa kakimopa yateko-pe wa okoli okome eno yateku. Enikepa Akolaline bokuke eya wa wia mekaneya pikono, yakoe. *Akolali ne kei piatiki toa dee mati-kitameka nana mati-kitameka kei pia kamotoa neme toko wa Depidiyo Akolalipala akeneya.* Eni agale tiginipa kime oi moamokoiya-pe wa Yesuyo oomotokome ¹⁷e yene tewitiko Besani take pome pipoka.

**Yesuyo Yomo Piki Kikoa
Okome Akenemo**

(Make 11:12-14, 20-24)

¹⁸⁻¹⁹Podolikama likonu witia Yesu Yerusaleme ta wa wakapea poademe pokome pake kobume tukome ete enapekome enekale yomo piki pade batete kebonoke kakale eneka. Nitoa pinele pome enekale tata pitikoa kakomeke ku tumeadeka. Nitadekale eni yomo kikoa okome okome ku pade wa tukilepa toamea wa okale eina eina totoa ala tootapeka. ²⁰Nitikale enekete one oya-lawe wene kainya pianeya kakete ekete ina yomopa odepeta totoa ala tootapekono, edoa tokoto-pe wa okoli okome ²¹kipala i nimini ukumo yakoe. Poome toameneya mea Akolalike wene tugoa meketepa nipa anume ina yomo-pala tokounakale kimeka oyake tekete eya-kitika tamele too. I kako tonono mati-pala ekete ne wete toa kusa ue muke kuta poke kapa wa okolika oyake pome kapoo. ²²Eya waneka ukuno yakoe. Akolali kowitiketeka oneme yakoa too wa oneke wene tugoa mea kowitikolipa yakoa too wa Yesuyo oka.

Te Patu Kautakoa Kako-pe

Wa Yesu Pitia Yakanemo

(Make 11:27-33, Luke 20:1-8)

²³Yesu Yerusaleme tobou losu yapu pome olaukoa kakaka Akolalike lodo yotokoai tane tobou ali-kitika Kanosolo ali-kitika Yesu kakata nekete ekete neke tokolepa te patu kautakoa kake toko-pe. Teyo tamene wa okole tokope wa yakanokoli okome ²⁴kipalaka yakatekumo pikono, yakoe. Oto wa topo takoa okoli yatekenepa nipa noanume toma yakule i ago patu kautakoane kakene tuku wane ouno, yakoe. ²⁵Yoneyo ali atoa ue motokakilepa tene peku noa toka-pe. Akolaline peku patu. Kini kaua-mikitane peku patu. Yakouno, oena-kale kini kini yakaate tekete ekete edemo wa ato-pe. Akolaline peku noa toka wado okolopa nipa Yone einagome okagale edeyake yakoa moamokoi-pe wa i agome oono, nimo wamato, ²⁶Nimo wameneya one kaua-mikitane peku noa toka wado okolopa i ali atoame toto wia tukatikiyano. Yone einagopa Akolaline agale toawe akane ago tadeko wa ikiya tokome nitoino, enimoka wamato wa ete Yesu-pala ekete ²⁷wene toamokono, Yone einago tene peku noa toka patukoli okome nipa noanu toma yakulepa i ago patu kautakoane kakene tuku wane wamou wa Yesuyo oka.

**Etename Okale Manatame
Yatekete Tanemo**

²⁸Kipala eya waneka yatekene ukuno yakamene. Panagono manata takuta kakeneya. Wa padepete namolo ago kakata einago pokome okome opi anu ipe takoano pa-kale okome ²⁹no pade poamou wa ootokoake one eni wene wia wawa etenane ipe takapaneya. ³⁰Nitaneyake etene putunago kakata pokome namolo ago-pala okana

toa okale okome eeno, nitou ta wa ootokoake etenane ipe takapameneya. ³¹Nitikala taneyano, etename okale mainagome yakoa taneya-pe wa Yesuyo okale e yename ekete eina namolo ago wa okoli okome nimini ukuno yakamene. Takesi kue motokama yaki ali-kitika pamoko atoa-kitika Akolaline take pikilepa kiwi naniko nomotoa pokala tiki. ³²Nipa ali atoa ue motokama yakana Yoneyo kiwi wene kiyo akeneya mekete toatekoile i i wa yametekanake ee nimini wa litiamokoi. Litiamokolika eni pa ali atoamepa one okamopa nimini oko wa yakoa tokoi. Nitikoli eneketeke kini poane wene wia wawamoa Yone einagoke wene tugamoa tokoi wa Yesuyo oka.

**Pinagono Gerepi Po Ipe
Yopia Potokanemo**

(Make 12:1-12, Luke 20:9-19)

³³Agale pade pedoane ukuno, yakoe. Panagome-kiti one ipe tootokoa gerepi po matatapeneya. Nitoa pawe toa unukatekoapa one pupu yename po ku kotia pitikoa kawame kautoa tia lobutatekoi kagono wetia latipianeya. Nitoapa payaponalime ta enapea yopia meateka yapu atepea wipianeya. Nitoapa ali pade-mene one ipe kime yopikakamene wa yamemotokome ta padeka pome mepaneya. ³⁴Nitaneyake ku putua kikutukakoa kawateka tigotoma nokale one pupu ali pade-mene moa wetekakome okome anu ipe yopikaki-kitame no moateku toapa meadete tikino, motokapoatino poe wa moa wetekaneya. ³⁵Wetekakale nokoli enekete dekoa motekete panago layo toua wia panago wia tukoa panago kueme kaua tukoa taneya. ³⁶Nitaneyake pinagome pupu ali kainya mati moa wetekakale nokoli namolo tokoinakale taneya. ³⁷Nitaneyake wipitikompepa eni ali-kitame one mana

kei pia makutukoa moi wa wene pikome mana ago ne pa wa wetekakale nokale enekete oote tekete ekete ³⁸pinagono mana ku nokona. Etename one pikoa pokaya-kiti kadimo okome kunagono pikademe tokono, one eni moatekoya-kiti toto moatono, kunu ago wia tukatoe wa ³⁹dekoa moa tayo lono aua pote wia tukapaneya.

⁴⁰Nitikala taneyake ipe pinagome one ipe yopikaki yene-pala edele tonoo-pe wa Yesuyo okale ⁴¹one agale yakakoa kakoi-kitame ekete ipe yopia potokane ali-mene dika dika toamene tete mea wia atukoo. Nititikoapa one gerepi po ku moateko toa kiyotokoa moke toa meatiki ali pade-mene kime yopikamene wa yameoo-koli okome ⁴²Akolaline bokuke agale dikoa wia mekaneya pikono, yakoe.

Yapu wiane ali-kitame i yomopa poadeko wa paya tetepo takoa wakeneyake padekagome i yomopa yapu pigi wa moa wianeya. Enilepa Ali Muno Akolaliyo taneya tokome ke wa kolotine mekete one kei piato wa panagome wia mekapaneya.

Eni wia mekanemopa kime oi moamokoiya-pe. ⁴³Kipala i ukumo yakoe. Akolaliyo kiwi talo toake wakome kiwi luku one pupu wedoa takatiki yatene moa kakoono, nepio. ⁴⁴Eni yomo pigike pitakoi ali atoa kaua kugu wititapeoi. Wa eni yomo pigi panagoke pitakome katua tawele takatapeneya pioo wa Yesuyo okale ⁴⁵yatekete Akolalike lodo yotokoai tane tobou ali-kitameka Parisi ali-kitameka ekete ina okana agale-menepa totoke akedekono, ⁴⁶i ago dekatapea moatiyake toko wa kakete eida oboa kakoi-kiti piti motekete tekete wakoi. E kakoi ali atoame i ago Yesupa Akolaline agale toaweakako ago tadeko wa wene tokoli ni piti tokale one dekoa moamokoi.

**Etename Manane Atoa
Motokakome Togemo**

**Oa Wetekakale Pade
Ali-kitame Wakenemo**

(Luke 14:15-24)

22¹⁻³ Wa naniko Yesuyo pedoa agale pade-meneka e yene-pala okome okome Akolaliyo ali atoa pawe toa talo tokole ooyametekuno yakoe. Tobou agome-kiti one manane atoa motokakene toge ipete kiuno, namene wa oa metane oi nokale one pupu ali-kiti moa wetekakome okome namene wane okouna ali-kiti enemotokapoe wa wetekaneya. Nitikale pote opokoli peyame ekete kote tokono, noamouno, poe wa waamu taneya.⁴ Waamu taneyake pade pupu ali-kiti moa wetekakome okome anu toge tuane pikuno, manane atoa motokadene egetekoane mekou pitimekawe kai eya wete wiane kikakakouno, wete noe wa akapoe wa wetekakale enemotokadete pekeneya.⁵⁻⁶ Wete noe wa opokoli yakamene lau lau toa kinikileke etepea pekete eya tokala taneya. Panagome one ipe topome panagome one sisoa yopipome wa pade-kitame tobou agono pupu ali-kiti dekoa moa ya motokoa wia tukoa taneya.⁷ Nitaneyake tobou ago timini nakale one poyo ali-kiti moa wetekakome one pupu ali-kiti wia tukane yene wia atukoa kini yapuka yotokapoatino poe wa wetekaneya.⁸ Nititikoa one pupu yene-pala okome okome manane atoa motokakene toge wete kiane pikene namene wane agale oane wetekakouna-kiti wawa noamikino, toge nee etene nomotoane wamukuno, kiwi lukupa eya yene enemotokapoe.⁹ Batete ludu pote ali atoa kotukete ekete tobou agome manane atoa motokakome toge kikakakono, noe wa akapoe wa

wetekaneya.¹⁰ Nitikale batete ludu pote kotukoi peya epetanele tane yeneka poanele tane yeneka noe wa enemoma nokoli notepa tobou agono yapu edeya takatapeneya.

¹¹ Nitoa toge noa mekoli tobou ago nokome enekale panago paya mamina kakeneya meadeka.¹² Nitadekale okome anu oya ali nepala ukumo yaka. Manane atoa motokakene kiku toge noadepa weneya mamina kakeneya namene wane okounake kawameadekono, dekale waka-pe-kale agale wametekoa mekale¹³ tobou agome one pupu yene-pala okome okome i ago kawa yonota lutua yomiyomu wa dika dika toamene take moa pitikakapoe wa akeneya wa Yesuyo oka. Nimo ootokoa okome eidapa ali atoa komo kata nina toa pitikoa kawamoi.¹⁴ Nipa Akolaliyo ali atoa kainya mati oneke noe wa kayo okomeka pa natetekoa takoa mokala toko wa Yesuyo oa tukaka.

Lomane Tobou Ago Sisane Takesi Kue

(Make 12:13-17, Luke 20:20-26)

¹⁵ Yesuyo nimo okale yatekete Parisi yenamepa Yesuyo natemoka omotoa likoa enatekoi oi pedepiadete wa eko keneya witimoa mepaneya.¹⁶ Nitoapa kini totono yakoa tane ali-kitika Erodeke timini kakoa yakene yeneka Yesu kakata poe wa moa wetekakoli pote lede pitia yatekete ekete Tikisa ago nepa niminimo-kama oko. Nitoa ibini akene yeneka ponopene yeneka takoa enamoapa eni yene peya Akolalilinele takama pekete toatikile kiyooke-kama olaukama poko.¹⁷ Nepa nitane agono wene tekete imodo pitia yatekono, yakamene. Yu yene tone totono litiapa Lomane ako tobou meko ago Sisane takesi kue pitikamoto-pe, Pitikato-pe. Yakoono, oa ta wa okoli¹⁸ kini poane wene pianeya kakoile tetoa enekome

okome wene takuta pianeya kakete iki-kitame nopa edeyake likoa eneki-pe. ¹⁹Takesi pitikatiki kue lene enouno, yameo wa okale panagome moa aua nome yametekale okome ²⁰i kue lene tiginikepa padane lene timini-pala ibinita wia mekaneyano, eniyatapa teneta patuno, yakouno, oe-na-kale ²¹peyame ekete tobou ago Sisa one wa okoli okome nipa Sisa meatikiya-kiti ni Sisa takoa mea Akolali meatikiya-kiti ni Akolali takoa mea tamene wa okale yatekete ²²ekee wa wene kainya pianeya tewitiko pokoi.

Tuane Ali Atoa Kamoatekoile

Lede Pitia Yakanemo

(Make 12:18-27, Luke 20:27-40)

²³Einata einapetepa tuane ali atoa wa kamoamoi wa iki yatene Sadusi yatene Yesu kakata nekete likoa enekete ekete ²⁴Tikisa ago, Moseseyo eya wa akeneya. Panagono atoame one mati opikameneyakedo einago tukalepa one wamene ago neme moa neke natono latikamene. Nipa tukanakago lukuke kawatiki mati opikamotono, nitamene wa Moseseyo akeneya. ²⁵Nipa odene agono mana-mikiti tatono kakoa (7) kakeneya. Namolo agome atoa moapa mati opiameneya mea tuaneya. Tuademe pikome one liti opiane ago-pala kadimo okome okome mati opikamotono, anu atoapa ne moamene wa ootokoa tuaneya. ²⁶Nitikale moapa mati opiameneya oneka mea tuaneya. Tebolo takane agomeka einatoa moa mati opiameneya tuka. Eni wamene-mikiti peyame einatoa kibutua moma-kala nekeneyake panagonoka eina atoame mati opikameneya. Peyapa tiobo ali mea tukala taneya. ²⁷Nitikala taneyake wipitikomepa einakatoaka tuaneya. ²⁸Eni wamene-mikitame einatoa edikoa kibutua moma-kala

nekeneya. Nitaneyano, tua pokoi ali atoa Akolaliyo kamotokaka-pete einakatoapa mainagono natono wa tugoa meoo-pe wa Yesu likoa enekoli okome ²⁹kini wini ikimopa Akolaline bokuke piko agale-pala one telekole tokoleta wene toamekete iki. Nipa pamo ekete tiki. ³⁰Tua pokoi ali atoa kamoapa pote a tibuke mea kaketepa alime atoa moamoapa atoa ali poamoapa toi. Nipa a tibuke Akolaline edelo-kiti keneya meoi. ³¹Ali atoa tuapa wa kamoapa pote kakimopa Akolaliyo kipala akedekonake one boku moa oi moamokoiya-pe. ³²Eya wa akeneya. *Noanupa Eberame Aisaketa Yekobe toa einago-menane Akolaliyo uku wa akeneyano, onepa tuane ali atoane Akolali mena. Mea kama piki ali atoane Akolaliyo uku wa okome akedeko wa Yesuyo oka.* ³³Enimo okale yatekete eida oboa kakoi peyame ekete imopa i olaukoa kakono, yakatoe wa ka oa kakoi.

Tobou Kakoa Akene Agalepa Mani-Pe

(Make 12:28-34, Luke 10:25-28)

³⁴Yesuyo one oka agaleme Sadusi ali-kiti moa kautakale agale ete wa topo takamele toamoko wa akedekoli yakamotekete Parisi ali-kiti Yesu kakata obomoa nokoi. ³⁵Eni nokoi yene padame Yesu likoa enekome okome ³⁶awa, Tikisa ago, yonota tua agalepa e tobou kakoa akene agalepa mani-pe wa oka. Ni agopa Yu yenane totono pine toa olaukakago. ³⁷Nimo okale Yesuyo okome *neke Ali Muno Akolalike wedoa wene mekoa mea tikilepa neke tepe kolotinime toa neke yominime toa neke weneme toa tamene.* ³⁸Tobou kakoa akene agalepa enina. ³⁹Nike lokoapa edikane agale eya wa wia mekaneya piko. *Pinali neeke wa wene mekoa mea mama motoko toa yete pade ali atoakeka wene mekoa mea*

mama moamene wa wia mekaneya piko. ⁴⁰Moseseyoka Akolaline agale toawe a akane ali-kitameka Akolaline agale akoa mema neketepa eni agaleta patu-kama kelekoa oma-kala nekeneya.

Keraisu Te-laweke Tawatekago

Wa Yakanemo

(Make 12:35-37, Luke 20:41-44)

⁴¹⁻⁴²Parisi ali-kiti eida oboa kakakoa Yesuyo yatekome okome Keraisu wa papete ibini oa plane agopa edane ago wa wene piki-pe. Te-laweke tawatekago wa iki-pe wa okale ekete Depidi-loeke tawatekago wa okoli okome ⁴³Depidiyo papete Keraisupa one Ali Muno wa ikilepa Epetane Yominiyo wene takakale eya wa akeneya.

⁴⁴*Ali Muno Akolaliyopa anu Ali Muno-pala eya wa oka. Nepala poi teia meki ali-kiti moane kawikoane neke kawane komo pikouno, one nimini yono lono noke nepia menamene wa Akolaliyo oka wa Depidiyo wia mekaneya.*

⁴⁵Depidiyopa Keraisu einagopa one lukoane meku Ali Muno wa akeneyake Parisi yene kimepa Keraisu einagopa Depidi-loeke tawatekago wa ikino, dekolo iki-pe-kale ⁴⁶odenagomeka agale topo takoa wamokoi. Nitoapa einapete titimoa padameka agale pade wa pitia yakoaka enameneya.

Mosesene Totonu Pine Toa Olaukane Yene

Parisi Ali-kiti Kini Tanele Toameamene

(Make 12:38-39, Luke 11:43,46, Luke 20:45-46)

23 Nitaneyake Yesuyo e oboa kakoi yene-palaka one oya-lawe-palaka eya wa oka. ²Mosesene totonu pine

toa olaukaki ali-kitika Parisi ali-kitika Mosesene agale patu kautakoa kama piki. ³Nitiki yename ile tamene ile tamene wa okoile-kama litia tamene. Nimo ukuyake eya waneka uku. Eni yename ile tamene ile tamene wa olaukaketeki pinali-kiti kini eni ikina toa toamiki. Nitikino, kini tikile litia toameamene. ⁴Eni yename padeya padeya keda tokoya ali atoane kotomaneki moa aukou toa kini wene keda takakala tiki. Nitikiyake eni keda nateya deyaka yapetekoa ate motokamiki. ⁵Eni yename ele kule tikilepa eko ali atoame kiwi kei pia kamotoa tekete keleyo-kama tiki. Nipa Akolaline agale tigini deya pipiake wia mekatekoa mete kabeke lobutukoa pono yonoke pome dekoa togotoa ni kini tokoo kakene mamina nami-menekeka padeya padeya koniyoya ua tukaketepa ludu takoa-kama ua tukoa tiki. ⁶Toge kikoikaka ibini akene yene meatikita meada wa pote mepokala tiki. Losu yapu peketeka tobou ali-kiti meatikita meada wa pote mepokala tiki. ⁷Makesikeka ali atoame Tikisago Tikisago ke wa kiwi kei pimotada wa yakala tiki. ⁸Nitikino, anu oyalaawe kime pade edikameamene. Kiwi peya wamene-mikiti-kama meki. Kiwi talo tukulu Tikisa ago wa kei pia oatiki agopa odene agodo no i kaku. ⁹Kiniketaitai wa oatiki agopa a tibuke meko Akolalino, itonoke meko ago edikoa atai wa wameamene. ¹⁰Ete ali atoame kiwi Ali Muno wa kei piamomotamene. Kini Ali Muno wa oatiki agopa no Keraisu odene. ¹¹Kiwi panagome one ako ago kawou wado okagopa one oya-mikitanele takama pamene wane uku. ¹²Onepa ako ago kaku wa wene pikagopa Akolaliyo keku moa kakoo. Onepa keku ago kaku wa wene pikagopa Akolaliyo ako moa kakoo.

**Wene Takuta Pianeya
Mekoi-kitike Akenemo**

*(Make 12:40, Luke
11:39-42,44,52, Luke 20:47)*

¹³ Ae, kini totono pine toa olaukaki alikitika Parisi alikitika wene takuta pianeya wene takuta pianeya mekino, Akolaliyo kibu moonoo, nepio. Kini eya toma yakike ni uku. Akolaliyo talo toko take ali atoa poadete tikili ka wia ketekatapekala tiki. Nipa one take poamouketeke tiki. ¹⁴ Ae, kini totono pine toa olaukaki alikitika Parisi alikitika wene takuta pianeya meki. Nipa nepo atoa-kiti oa yotokoa kini yapu eya kode keneya motikiyake eka ali atoame kiwi kei pimotoa lede kowitikeke kutupea pa agale likoa pikala tiki. Ae, Akolaliyo kiwi kibu motokomepa dika dika toamene tete meoono, nepio. ¹⁵ Ae, kini totono pine toa olaukaki alikitika Parisi-alikitika wene takuta pianeya mekino, Akolaliyo kibu moonoo, nepio. Kini peku lawetatiki agopa tuku toma pato wa ka ludu pote ue dipikeka mea pote tuku toma yaki. Tuku toa enamutuketepa kini peku noa tamene wa lawetekili kini tiki poanele moa patukoa poane take poko.

¹⁶ Ae, leneta lianeya mekete ete ali atoa etepea lia aua yaki-kiti Akolaliyo kiwi kibu moonoo, nepio. Ali atoa olaukaketepa eya wa ikili tekene ni uku. Panagome-kiti okome tobou losu yapu tia ile tou wa ootokoake toamokomepa kini totono tetekakoya mena wa iki. Nipa tobou losu yapu paya tetepo takoa iki. Nitikiyake panagomepa eni tobou losu yapu keneke golo kueme latia pianeya-kiti tia ile tou wa ootokoake toamokomepa kini totono tetekako wa iki. Nipa eniya-kiti tobouya tetepo takoa iki. ¹⁷ Ae, leneta lianeya mekete tiki. Eniyatapa Akolaliyo maniya tobouya tetepo takako-pe. Tobou losu yapu patu. Tobou losu yapu keneke pianeya tokome

one wa takoa motane golo kueme latianeya-kiti patu. ¹⁸ Ni panagome-kiti Akolalike lodo yoai tiki walai tia ile tou wa ootokoake toamokomepa kini totono tetekakoya mena wa iki. Nitikiyake panagome-kiti eni walaike lodo yotiki melepu tia ile tou wa ootokoake toamokomepa kini totono tetekako wa iki. ¹⁹ Ae, leneta lianeya mekete iki. Eniyatapa Akolaliyo maniya akoya tetepo takako-pe. Walai patu. Walaike pianeya tokome one wa takoa motane melepu patu. ²⁰ Panagome-kiti Akolalike lodo yoai tiki walai tia ile tou wa okomepa nipa mone eni walaike lodo yotikiya-kitika kikilikoa tia pikome toko. ²¹ Ni tobou losu yapu tia ile tou wa okomepa nipa mone eni yapu keneke meko ago Akolali one-kitika dekoa kikilikoa okome toko. ²² Ni tibu tia ile tou wa okomepa nipa Akolaliyo ali atoa talo toa meko walai-pala Akolalita dekoa kikilikoa okome toko.

²³ Ae, kini totono pine toa olaukaki alikitika Parisi alikitika wene takuta pianeya mekino, Akolaliyo kiwi kibu moonoo, nepio. Eya toma yakike ni uku. Kini yamanu ludu witakoya nee deya-kiti pilia moa oi moteketepa yonota tua pikolopa odene katekamo ipa Akolalinea wa takoa pikakala tiki. Nipa Akolaliyo tobou kakoa yametanele wawa toameketeke tiki. Akolaliyopa eya tamene wa tobou kakoa yametanele. Ali atoa takoa enekilepa kiyoke-kama tamene. Ete ali atoa mama moa auapeamene. Onekele wedoa takama pamene wa tobou kakoa yametanele, enika enile tamene. ²⁴ Ae, leneta lianeya mekete ali atoa etepea lia aua yaki-kiti eya tou toa pale-kama tiki. Neneku uele tuaneya pikolo enekete moa mitikatekoa nomoa naki. Nitiketeke kamelo kai ue nakakome tuaneya pikolo enekete moa mitikameneya ue nomoa naki.

²⁵ Ae, kini totono pine toa olaukaki alikitika Parisi ali-kitika wene takuta pianeya mekino, Akolaliyo kibu moonoo, nepio. Eya toma yakike ni uku. Mete okolo eya lede abe kooteapeou toa tekete ekolo pa abe kamotoa tokoo abe kooteapekala tiki. Nipa kepeneme epeteku wa oake kini tepenepa lene pia mone panagoneya-kiti moadiya wa enika eni poanele toma yaki. ²⁶ Ae, leneta pianeya meki Parisi ali-kiti kini mete abe kogilepa namolo takoa ekolo kooteapeamene. Nitikolipa tokoo-kitika abe kawamoo.

²⁷ Ae, kini totono pine toa olaukaki alikitika Parisi ali-kitika wene takuta pianeya mekino, Akolaliyo kibu moonoo, nepio. Akolaliyo kipa tuane ali atoa oloyo tane ta tetepo takoa wako. Tokoo kalotokoa pianeyake ekolopa tonoo koloa kawa kepeneme meleputa lomukome kego witianeyata koloko. ²⁸ Kini kepeneme kiyo akene wene pianeya meane tetepo tokoyake tepene wene takuta pianeya mea e ku poane weneka pianeya mea tiki.

**Edikakoi Ali-kiti
Akolaliyo Kibu Moo Wa**

Yesuyo Pubu Akenemo

(Luke 11:47-51)

²⁹ Ae, kini totono pine toa olaukaki alikitika Parisi ali-kitika wene takuta pianeya mekino, Akolaliyo kibu moonoo, nepio. Eya tikike ni uku. Akolaline agale papete toaweaa akane ali-kiti oloyo taneka nateya yapu deya wikakoa ni wene kiyo akeneya meane yene oloyo taneka kalotokoa tiki. ³⁰ Nitikete ekete Akolaline agale toaweaa akane ali-kiti meane-pete toto meoo tokapa nipa tone kaua-mikiti-pala kibutua eni ali-kiti wia tukamoo toka wa ikilika ³¹ kipala eya wane uku. Akolaline agale papete toaweaa akane ali-kiti wia tukane yene pa

kini kaua-mikiti wa wini ikipa nitane yeneke tagooya wa ekete iki. ³² Pegetoa kini kaua-mikitame toa potokoa nami kakalogane yano opi kime wipitiamene. ³³ Kipa kayane yagono-mikiti. Akolaliyo poane take moa pitikademe tokono, manika edoa petoa poadetepe. ³⁴ Dikane yene kipala eya wane ukuno yakoe. Akolaline agale toaweaa akane ali-kitika wene muno meane alikitika one agale pine toa olaukakoi ali-kitika wini moane wetekakolu eni yene-pala eya tokala toi. Padeka-kiti yomo lekaneyake wia tukoa ni padeka-kiti kini losu yapu keneke layo toua wia ni kini pitikoika ete takoa litikala toi. ³⁵ Enipa kini kaua-mikitame papete toma nekenele opi wa kimeka tokala toi. Kini kaua-mikitame padele toamene alikitika pa puputua wia tukama nekeneya. Titikilepa Keineyo wamene Ebele wia tukaneya. Wipitikilepa pade ali-kitame Berekaiane mana Sekaraia tobou losu yapu keneke wia tukaneya. Nipa eyata pakeke tobou losu yapu olege takoa tipi tane yapu luku-pala lodo yoai tane walaita eniyata pakeke Berekaia wia tukaneya. ³⁶ Kini kaua-mikitame tomakala nekenele nami wiapa Akolaliyo kabe koukoa kiwi kibu moonoo, nepio wa Yesuyo oka.

**Yesuyo Yerusaleme Mama
Motokome Akenemo**

(Luke 13:34-35)

³⁷ Ae, Yerusaleme ta neke wida pitikoi yename Akolaline agale toaweaa akane ali-kiti wia tukama-kala nekeneya. Ni neeke wida Akolaliyo moa wetekane ali-kitika kueme kaua tukakala tane toa opii pa tiki. Nitaneyake ogadamekiki idini-kiti pawena keneke luumoo pitikou toane tekene neke wida pitikoi yene pawe toane moadene tokounake koite katite toa wakala tokoina. ³⁸ Ae, Yerusaleme ta nepa tumu tokamotoa

neke wida pitiki yene toa pootapeoi. ³⁹Ae, neme no papete wa enekileka toamoo. Nipa no i agopa Ali Muno patu kautakoa kama nokono, Akolali neme wedoa mekamene-ye wa no wetewe wa makutukoa moameneyakepa anu lene timini wa pade enamoo wa Yesuyo Yerusaleme ta-pala oka.

**Tobou Losu Yapu Tumu
Tokaneya Piatekamo**

(Make 13:1-2, Luke 21:5-6)

24 Yesu tobou losu yapu tewitikoa pokaka one oya-lawe nekete ekete i tobou losu yapu kue pawe keneke ekolo wianeya kako yapu-kiti ena wa okoli okome ²wini wianeya kakoya-kiti enekamene. Enika eniya latiane kue odeneka kibutukoa piameneya peya wia tadekatapeneya tumu tokaneya pioo wa Yesuyo oka.

Yesuno Agale Yakoa Motane Yename

Tete Moatekoimo

(Make 13:3-13, Luke 21:7-19)

³Yesu Oliwe-pini tonono waneke pome mepoka. One kidene eida paka witimoa mekale one oya ali-kiti nekete ekete neme ina okanakalepa manipete taatekoa toko patu. Wipitia ta patakale ne wakapea noateka tigotokalepa edeya wa adeka pipioo-pe wa okoli okome ⁴⁻⁵eni okounakale wete taatekameneyake pade ali-kitame anu ibini lede wedekoa nekete ekete Keraisu taatekoane nukuno, noe wa ali atoa peya mati oa yotokoino, wedoa lene kia nepikoa meamene. ⁶Enipetepa uu wa poi toa kakoimo yakoa ni pade take poi tago wa okoimo kugu yakoa toino, piti moameamene wane uku. Enilepa taatekoa namolo takoa toatekoyake wipitia ta pade tigotokoa wete patamoo tokolo ni uku. ⁷Nipa e ku yatename poi tato wa kamoia poi teitakutukakala toi.

Ni e ku tobou ali-kitike lukoa mekoi yatene ete oto wa poi toa winali yoi. Eka kuka takeka kobu igi nome momani toa tokala too. ⁸Enika enilepa atoame mati opiademe namolo takoa mukiti nako toa keneya too.

⁹Enipetepa pade ali-kiti kipala kotimi yotaneya meketepa tete takoa wia tukakoatino toe wa dekoa moa eko yeneke lia aua poi. Nipa nopala odene ibini pedane yene tokale tekete padeka padekata mekoi peya kipala kotimi yoa meoi. ¹⁰Enipetepa ali atoa kainya matiyame Akolalinele takoake wakete panagome panago moa poi teiane yenane yonoke pia eka okata kotimi luutakutukoa mema poi. ¹¹Ni ali kainya matiyamepa Akolaline agale akakuno, yakoe wa ali atoa peya mati oa yotokama poi. ¹²Ele kule poanelepa ate toma ponokale tokome ali atoa kainya mati wene mekanali yoma pokoinakale tewitikoa wakala toi. ¹³Nitoo kakolika nooke wene tugoia mea togakoi-kitipa toa motaneya mea kama poi. ¹⁴Pa-petepa Akolaliyo ali atoa pawe toa talo tokome tokomo ta piko peyake mekoi-kitame yakamotoa oa pupitikatapeoi. Nititikaneyakepa wipitia ta patoo wa Yesuyo oka.

**Yerusaleme Yename
Tete Moatekoimo**

(Make 13:14-23, Luke 21:20-24)

¹⁵Tobou losu yapu olege takoa tipi tane yapu luku kenekepa kitau oko wa okoiya witakale enoi. Nipa Akolaline agale akane ago Danieleyo papete oa plane toa taatekoa tokale enoi wa Yesuyo oka. (I boku wiane mekaku agome eya wane uku. Ina wiane mekakumopa wene taneya meamene.) ¹⁶Yesuyo nimo ootokoa eya wa oka. Enile taatekoa tokale eneketepa eya tamene. Yudea take meki-kitipa nipa tonokiti pake pake

toa pitoa pote paigakoa mepamene. ¹⁷Yapu liti ko meapa kini yapu keneke pikoina mopameneya pa pitoa pamene. ¹⁸Ipe toa kawapa tigrini mamina kotokoa pikana mopameneya pa pitoa pamene. ¹⁹Ae, mati kakene atoa-kitika mati adu tanikakoa mekoi atoa-kitika eni tete witaka-pete manika edoa petoa pomotoa-pe. ²⁰Eni moatekoi tetedo kalepetaka pupu toameneya ko meatekoi-peteka witakalepa manika edoa petoa pomotoa-pe. Dikane-pete witamomotoa ta wa Akolali kowitua kamene. ²¹Dika dika toamene tete eni witakilepa itono tibuta latitikaneyakeka toamokale-kiti too. Eni tete witatekaneyake naniko pade edikanele wa witamoo. ²²Akolaliyo eni tete witama pomotoa yopikoa kaka pakedo teigamoo tokapa ali atoa peya atutapeoi toka. Nitoi tokake one wa takoa motane ali atoa ela motokome tokome pegene kakoa teigoo.

²³Enipetepa pade ali-kiti nekete ekete Keraisu ku nokono enoe, i nokono enoe wado okolipa kapene agale eni ekete toino, yakameamene. ²⁴Kapene yename eya wa wini onoi. Keraisu nuku wa oa Akolaline agale akama nuku wa kiwi oa yotokadete padele padele telekole tokala toi. Nitikete Akolaliyo takoa motane ali atoaka tolopi toadete wili toa kakete oyake nitamele toamokale wakala toi. ²⁵Enika enile wete taatekameneyake papete i agale eni wene takapikuna.

²⁶Pade-kitamepa Keraisu enakagopa ali piamele ta ludu yako wa oino, yakoa ponameamene. Ni Keraisu enakagopa yapu luku keika paigakoa meko wado okolipa eni pade yakameamene. ²⁷No Ali Yatenane Oyago wakapeane nekenepa katiapale keleyo piatapeko toane keleyo nokolu peyame enekete enetapeoi.

²⁸Ali tuaneyu lomua kakata kego naki ini kiti odepeta koukua note puka puka toa yaita kawei wa Yesu oka.

Ali Yatenane Oyago Wakapea Noatekamo

(Make 13:24-27, Luke 21:25-28)

²⁹Enika eni tete witoa kawa peya tokale eni eni lou yomiyomu takoa tokene-kitika pa toamoa too. A tibuke tagoi-kiti kotia pitoa too. Ni tibuke tele taneya mekiya moa peteka peteka takoa too. ³⁰Nitua kawa wipitikale eni eni Ali Yatenane Oyago noanu adekapa a tibuke witoo. Nitikale ta piko peyake mekoi yatene ali atoa tumai keneya mekete komo kata pitikoa kawa enekoli no Ali Yatenane Oyago wedo patu meane pa teleta toawineya nokolu enoi. ³¹Nika yeteka yukukataka anu papete takoane moopikou-kiti peya odeneka moa obokamotoane tekene edelo ali-kiti moane wetekou. Nitikolupa a tibuke pu wa beta pikoa kakomokale yatekete moa obotapeoi wa Yesuoka.

Yomo Pikike Pedoa Akenemo

(Make 13:28-31, Luke 21:29-33)

³²Yomo piki witakole wene taneya meamene. Papete yeneneke page kaua luno pitikakolo eneketepa poto toko tokene-mene tigotatekolo toko wa wene tiki. ³³Eina toa anume okounakale-kiti witatepekale eneketepa inakago wakapea noateko eni tigotokona wa wene toi. ³⁴Etene nimini toatekomo ukuno, yakoe. Ipete meki peya wete tuuta-peameneyake kipala ina okounakalekama taatekua too. ³⁵Itono tibuta takoa pootapekolika anu agalepa pa pia-kama kawoono, yakoa moamene wa Yesuoka.

Yesu Wakapea Noateko Oi

Padameka Wene Toamiki

(Make 13:32-37, Luke 17:26-30, 34-36)

³⁶Enika enile wipitia toatekolepa padameka ipeteka i lou pinika taatekoa too wa wene toamiki. A tibuke meki edelo ali-kitameka wene toamiki. Akolaline mana noanumeka wene toamuku. Atai Akolaliyo odene wene toko. ³⁷No Ali Yatenane Oyago wakapeane nokou-petepa Noa einago meane-pete tanele too. ³⁸Noa meane-petepa ete yene paya nou toa mekete nee ue eyake wene piitikaneya mea alime atoa moa atoa alike pote tokala taneya. Nipa Noa tube ue dipi keneke pome mepokaleka ³⁹edikoa paya nou toa meaneya. Nitoa mekoika kotikatapea ue atepea kangu pokome toa atukatapeneya. Eina toa ali atoa paya nou toa mekakoane no Ali Yatenane Oyago wakapeane nekene kotikatapeane nou. ⁴⁰Nipetepa ali takuta ipe toata kakoita panago eida kamotoa Akolaliyo padena ago takoa moa poo. ⁴¹Ni atoa takuta odenekata kawa kini witi k_u kugutukoa kakoita pade atoa eida pa kamotoa padena atoa takoa moa poo. ⁴²Nopa kini Ali Muno kotikatapeane wakapeane nouno, wedoa lene kia nepikoa meamene. ⁴³Eya waneka ukuno, yakamene. Yapu pinagome-kiti onekeya kode monatekago likonu ipete noo wa wene too tokapa yapu bulukoa kode agome onekeya monamomotoa tokome atu piameneya wedoa yopia kawoo toka. ⁴⁴Eina toane no Ali Yatenane Oyago kotikatapeane nouno, wedoa lene kia nepikoa meamene wa Yesuyo oka.

Pupu Ali Takutame Pupu Takakete Tanemo

(Luke 12:41-48)

⁴⁵Tobou agonole-kama wedoa wene toa takako agoke ukuno yakamene. Tobou agome dikane ago-pala eya wa oa too. One ali atoapa neme yopikamene wa oapa kini nee eya noatekoi toa oneme-kama tatia lawetekamotoa moa kakoo. ⁴⁶Nitimotokome ta padeka pome mea wakapea nokome enekale oneme tamene wa oa pokanakaleda pa takama pekedekale enekomewa ke wa one kolotini natekoa too. ⁴⁷Nipa onekeya peya neme-kama yopikamene wa moa kakoo. Enipa niminimo uku. ⁴⁸⁻⁴⁹Tobou agonole takoa potokako agomewa nipa eya oa too. Tobou ago wete wakapea noamoo wa oapa one odene pupu yene layo toua wia ni bia ue nokoa pia leau akeneya mekoi ali-kiti-pala opia mekome bia ue eya nokoa pia too. ⁵⁰Paya nou toa nitoa mekaka tobou ago kotikatapea nokome ⁵¹einago dika dika toamene tete meoo. Nitoapa wene takuta pianeya meki yene-pala opia mea kawati wa kiwi pakeke moa mekoo. Eidapa ali atoa komo k_ata nina toa pitikoa kawamoi wa Yesuyo oka.

Tuatoa Noi Kakoake (10) Pedoa Akenemo

25 No Ali Muno wakapeane nokou-pete Akolaliyo ali atoa pawe toa talo tokome tokale ooyametekuno, yakamene. Noi kakoa (10) tuatoa-kitame eya taneya. Panagome one tu pia kakene atoa moademe nokale ekete einago kotua patoe wa kini laboke olipe k_u page peia kapetekoa aua pokala taneya. ²⁻⁴Ko kakoa (5) tuatoa yatenamewa aua kelea paya nou toa pa pekete naniko peiatekoi pagepa mete padeke aua poameneyake

e pade ko kakoa (5) tuatoa yatenamepa paya nou toameneya naniko peiatekoi pagepa mete pade-mene kapetekoa aua pokala taneya. ⁵Einago noateka teigoa pekete kago keteponoke nepia kakoiyake wete noamokale atu togoikoa mea einaka piimu taneya. ⁶Pitikakoa likonu panagome kayo oa kakome okome atoa moatekago i nekedekono, kotua wete poe-ye wa kayo oa kakomo yatekete ⁷kamoa kini labo moa nodoka nodoka tokala taneya. ⁸Nititikoa ona ko kakoa (5) paya nou toa nokoina tuatoa yatename ekete oya, tone labo pene tuademe tokono, kini olipe ku page pade manoe oikoli ekete mena. ⁹Toto peyane labo udukateko toa kotuke aua noamokoo patuno, kini winika tuku toa sisoake olipe ku page topo topoe wa okoi. ¹⁰Poe wa okoli poadete pokoika atoa moatekago nekeneya. Nokale paya nou toameneya nepikoa kakene tuatoa-kiti einagono atoa motokadete toge kikakane yapu one-pala opia pote mepaneya. Nitikoli panago nome kago ketekitikaneya. ¹¹⁻¹²Nitaneyake ona tuatoa yatene wakapea nekeneya. Nekete ekete kamo koniyali toto i note kakono, kago pekanamene wa kayo okoa kakoli okome kiwi wene toamuku wa pekanameneya wa Yesuyo oka. ¹³Nimo ootokoa okome atoa moatekago nokome tane toane noka edikoane kotikatapeane wakapeane nouno, wedoa lene kia nepikoa-kama kamene wa Yesuyo oka.

Pupu Ali Tebolome Tobou Agono Kue

Pikoa Metekakete Taneleke Pedoa Akenemo

(Luke 19:11-27)

¹⁴Akolaliyo ali atoa pawe toa talo tokole ooyametekuno, yakamene. Panago ta tetemada poademe kakome one pupu takane ali-mene one kakuta

noe wa kayo oa moapa one iya-kiti kime pikoa metekamene wa onekeya tatikamu taneya. ¹⁵Nitikomepa panago ko kakoa tawisini (5,000) kina mea ni panago tatigi kakoa tawisini (2,000) kina mea ni panago odene tawisini (1,000) kina mea taneya. Enipa kini pupu takoukete tele tane kotuke tatikamotokome pekeneya. ¹⁶Pokale ko kakoa tawisini (5,000) kina motokanakagome eni kueme tine pikoapa wa ko kakoa tawisini (5,000) kina tokoo motokaneya. ¹⁷Eina toa tatigi kakoa tawisini (2,000) kina motokanakagome eni kueme tine pikoapa wa tatigi kakoa tawisini (2,000) kina tokoo motokaneya. ¹⁸Odene tawisini (1,000) kina motokanakagomepa nitameneya one eina metekana kue moa pome itono wetia potipipaneya.

¹⁹Kue pinago ta tetemada pome mea kawa oto wa wakapea nokome okome auna kue-kiti pikoa metekakete edele-kala takakoi-pe wa pitia yatekale ²⁰ko kakoa tawisini (5,000) kina motokanakagome one namolo motokana toa peya ete meetekoa eina nine kueme tine pikoa motokane ko kakoa tawisini (5,000) kinaka metaneya. Metekome okome Ali Muno nemenapa no ko kakoa tawisini (5,000) kina mea pokana. Wa ko kakoane tawisini (5,000) kina tokoo motokakouno, ina wa metaneya. ²¹Nitikale one Ali Munagome motokome okome ouo, anukulepa neme wedoa takadeko. Enilepa nateleke neme wedoa takadekono, opa padele-kiti tubele mati takatekole ne yameou. Opa neke Ali Muno nopala kolotine meatoane uku wa one kei pia kakeneya. ²²Nitaneyake tatigi kakoa tawisini (2,000) kina motokanakago nokome okome Ali Muno nemenapa no tatigi kakoa

tawisini (2,000) kina mea pokana. Tatigi kakoane tawisini (2,000) kina tokoo motokakouno, ina wa metaneya. ²³Nitikale okome ouo, anukulepa neme wedoa takadeko. Enilepa nateleke neme wedoa takadekono, opa padele-kiti tubele mati takatekole ne yameou. Opa neke Ali Muno nopala kolotine meatoane uku wa tobou agome one kei pia kakeneya. ²⁴Nitaneyake odene tawisini (1,000) kina motokanakago nokome okome Ali Muno nekeya kamu tokolo meke eya toko. Panagono ipe neme padeyaka matamokoyake one eni ipe kakoya nee neme wakoa mokala toko. Wa panagome matane yomopa eni yomo k̄ neme kotia moa nako. ²⁵Nepa dikane agono wene tekene piti tokale mekene nekena kue itono wetiane kaukalogakou. Nekena kue ina wa ete metekale ²⁶Ali Munagome kikoā okome okome nepa kote au keneya moa loyo-kala kako agomeke nooke eya wa k̄ okana. Panagono ipe padeya matamekeneke one eni ipe kakoya nee wakoane moane wa panagome matane yomopa k̄ kotiane moane noane tuku wa neme nooke k̄ okana. ²⁷No nitane agono kuepa bage pikapikinakeya, dekale waka-pe. Bage pikapoo tokapa anu kueme tine pikane kue-pala oto mou toka wa kikoā ootokoa kakome ²⁸one ete pupu ali-kiti-pala okome one kue moe. Mootokoapa noi kakoa (10,000) kina pikoa kako ago metekapoe wa akeneya. ²⁹Nitaneyano, Akolaline peku wedoa nakagopa nipa Akolaliyo one peku wedoa lawetema pokale kamo toma pou toa etene wedoa toma poo. Akolaline peku alekoa noma pokagopa nipa onekeya nateyaka eniya peya Akolaliyo takoa wa mootapeoo. ³⁰Pupu takoa potokako agopa yomiyomu dika dika toamene take moa pitikamotoane uku. Eidapa kime kolukoa ali atoa komo k̄ata

nina toa pitikoa kawamoi wa Yesuyo oka.

Wipitia Ta Patakale Ali Yatenane Oyagome

Ali Atoa Takoa Enekome Oatekamo

³¹No Ali Yatenane Oyago a tibuke pone meane wakapeane nekenepa nipa anu edelo ali peya-pala opiane p̄a teleta tootapeneya nou. Nitikene ali atoa talo tekene meatekou walaikē yati yati toolo-gane walaikē pone mepou. ³²Nitikolu anu leneke ta padeka padekata mekoi yatene peya koukoa note-kama kanoi. Note kanokolipa talo tokagome-kiti sipi sipi kaika meme kaika eka okata takoa moa kakako toane tou. ³³Nipa sipi sipi kai tetepo takakou ali atoa anu nimini yono lono moane kakoane meme kai tetepo takakou ali atoa ewa yono lono moane kakoane tou. ³⁴Nititikoanepa no Ali Muno nimini yono lono kakoi yene-pala ekene Agetaiyo pewe wia kako-kiti kipa one talo toko take menoatino noe. Eni taapa Akolaliyo itono tibuta latikapeteka kini wa nodokakapianeyano, noatino noe wane ou. ³⁵Nipa kime eya toma nokoinake ni uku. Kobu tokale mekolu enekete nee moa lawetekoina. Ue nodo tokale mekolu enekete ue nomoa lawetekoina. Mone pade take ago nokounake kini yapu nee noano, noo wa no makutukoa motokoina. ³⁶Mamina kawameneya mekolu enekete i mamina kawano, ina wa kini mamina metekoina. Yene tokale pikolu mama moa auapenokoina. Po yapu pitikolu weye akadete ugu nokoina wane eni yene-pala ou. ³⁷No Ali Muno agome nimo okolu yatekete eni wene kiyo akeneya mekoi yename eya wa oi. Ali Muno neme eni oka toapa manipete kobu tokale mekale enekete nee moa lawetekoto-pe. Manipete ue nodo tokale mekale enekete ue nomoa

lawetekoto-pe. ³⁸Manipete mone pade take ago nokale enekete moa makutukoa motokoto-pe. Manipete mamina kawameneya mekale enekete kawateko mamina ina wa metekoto-pe. ³⁹⁻⁴⁰Yene taneya pikataka po yapu pitikataka manipete ugu nokoto-pe wa yatekoli no Ali Munoyo ekene widikoa anu ponopeneya meane ali atoa auapekoipa nopala eina dekoa auapekoina wane ou.

⁴¹Nititikoane kakene anu ewa yono lono moane kakakouna ali atoa-pala eya wane ou. Akolaliyo wakome wakene yene no tewitikoa poe. Setanuka one edelo ali yateneka pote mepomotoa nodokakapiane toe mine mepoatino poe. Kime eya tokoinake ni uku. ⁴²No kobu tokale mekolu eneketeke nee moa lawetamokoina. Ue nodo tokale mekolu eneketeke ue nomoa lawetamokoina. ⁴³Mone pade take ago patukakolu eneketeke no makutukoa moamokoina. Mamina kawameneya mekolu eneketeke kawatekou mamina moa meamokoina. Yene tokale pikoutaka po yapu pitikoutaka ugu note auapenamokoina wane ou. ⁴⁴Nimo okolu ekete ae, Ali Muno manipete ne kobu tokale mekale eneketeke nee wanakoto-pe. Manipete ue nodo tokale mekale eneketeke ue nomoa lawetamokoto-pe. Manipete ne mamina kawameneya mekale eneketeke kawateka mamina ina wa meamokoto-pe. Manipete ne mone pade take ago patukakale eneketeke makutukoa moamokoto-pe. Manipete ne yene taneya pikataka po yapu pitikataka ugu note auapenamokoto-pe wa okoli ekene ⁴⁵anu ponopeneya meane ali atoa auapeamokoipa nipa nopala dekoa eina auapeamokoina wane ou. ⁴⁶Nitikoina wane wakou-kiti poane take pote mekete dika dika toamene tete moi. Nitikoiyake wene

kiyo akeneya mekoi-kiti pa mea kama poi wa Yesuyo oka.

Yesu Wia Tukatekoi Oi Pedia Pianemo

(Make 14:1-2, Luke 22:1-2, Yone 11:45-53)

26¹⁻² Yesuyo einaka einamo oa peya takatekoapa one oya-lawe-pala okome okome edelo ago patukane wa ibini iki toge kikilepa patepeyo toi. Enipa nimini uku-pe. Enipetepa mone pa yename no yomo lekaneyake wia dekoa tukamotoa panagome Ali Yatenane Oy-ago no moa meoo wa Yesuyo oka. ³Einapetepa eya yene Akolalike lodo yotokoai tane tobou ali-kitika Yu yenane totono pine toa olaukane ali-kitika ete Kanosolo ali-kitika koukoapa ako odene mekome lodo yotokane tobou ago Kaya-pasene yapu ponete meponaneya. ⁴Eida ponete koukoa meketepa Yesu paigakoa moa wiatekoi oi pedia pikete ekete ⁵pa ali atoa toto-pala wene poa wili walai wa kakayano, tone toge kiko-petepa dekoa moamato wa oa tukaneya.

Yesuno Wagoke Padeya Kalono Taneya

Pekoa Yotokanemo
(Make 14:3-9; Yone 12:1-8)

⁶⁻⁷Yesu Besani take kedime nakeneya mekanakago Saimone einagono yapu meka. One eni yapu mekome nee nakaka pade atoame padeya kalono taneyapa epetane kueme latiane mete keneke mekoa aua nome Yesuno wagoke pekoa yotokatapeka. One eni kalono taneya topo toa moapa kue ako mati wetekoa motokaneya. ⁸⁻⁹Einatoame tokale enekete Yesuno oya ali-kiti einatoa-pala wene pokete ekete ina pekoa yotokakilepa pale tokanano, edeya weike toka-pe. Inakeyapa totome moa topo too tokapa

kue tubeya moa ponopene ali atoa tatikoo toka wa kō oa kakoi. ¹⁰Nimo okoli yatekome Yesuyo okome i atoane wene dekolo potokaki-pe. Einapa anu koniyole mati takakana. ¹¹Ponopene ali atoa enabuna kiwi pakeke mekala tikino, no pade kiwi pakeke pa tekei meku. ¹²Ina kalono taneya anu tiginike pekoa yotokakanapa no tuaneya plateku tigotokolo tokome nina nodokoa takapikana. ¹³Nitikana tokolo eya wane uku. Anukumo ta piko peyake oa pupitikama peketepa i atoame i takakanakamoka oa pupitikama poi. Nipa ta piko peyake mekoi yename one wene taneya memotoa nitoi wa Yesuyo oka.

Yesu Moa Meateka Oi Pedia Pianemo

(Make 14:10-11, Luke 22:3-6)

¹⁴⁻¹⁵Yesuyo nimo okale one tuku kakoa (12) oyali-kiti pade Yudase Isekariose einagopa Akolalike lodo yotokoai tane tobou ali-kiti mekoita pokome okome Yesu einago kini yonoke moane piouno, kue edela meoi-pe-kale ekete nipa silepa kue lene padeka kabe kakoa (30) meoona ta wa okoli ¹⁶einapete laigoa Yesu moa metekome toatekale wene kibutuma yakeneya.

Yesu One Oya-lawe-pala Opia Mekome

Toge Nee Nakenemo

*(Make 14:12-21, Luke 22:7-14,
21-23, Yone 13:21-30)*

¹⁷Yu yename mono mono wamene palawe wane-kiti yoatekoi oi nokale Yesuno oya-lawe one mekata nekete ekete edelo ago patukane wa ibini oko toge nee maida nodokoa piaoa-pe wa okoli okome ¹⁸⁻¹⁹Yerusalem ta panago wini meoona, eya wa yatekapoatino, poe. No Yesu wipitikene toateku tigotokolo tekene anu oya-lawe-pala opi-

ane mekene toge nee nouno, oyake wida nonou-pe wa yatekapoe wa wetekaka. One eni okana toa pote yatekatekoa kini toge nee eya eida einagono yapu nodokapianeya.

²⁰⁻²¹Ta likaka Yesu one oya-lawe-pala eida opia mekene toge nee nakome okome etene nimini ukuno yakamene. Kiwi padame no-pala poi teiane yenane yonoke moa pioo wa okale ²²odene odene wa mekoi peyame ete yatekete ekete wini okolepa noanume toatekumo eke oko-pe wa wene keda toologaneya mekete yakakala tokoli okome ²³nopala odene okolo kagonoke nee moa tadoata nako agopa no moa meateko ago too. ²⁴Nipa Akolaline bokuke Ali Yatenane Oyago nopala eni toatekamo papete wia mekapiane toane taatekoane tuou. Ae, no witikamotoa moa meatekagome dika dika toamene tete moo. Eni tete moa-madame tokome einago opiameneya too tokapa nipa epetoo tokake opa ae wa okale ²⁵one moa meatekago Yudaseyo Yesu-pala okome neme wini okagopa no patu-kale okome eeno, nimini oko wa Yesuyo oka.

Yesuyo One Oya-lawe Palawe-pala

Gerepi Po Ku Ueta Lawetekome Akenemo

*(Make 14:22-26, Luke
22:15-20, 1 Korine 11:23-25)*

²⁶Eni nee noa mekete Yesuyo palawe wane moa Akolali-pala ke wa popimotokome one oya-lawe tatikamu tokome okome ipa anu tiginino, moa noe wa moa laweteka. ²⁷⁻²⁸Nititikoapa gerepi po ku ueka meteke mekaneya katekamoa Akolali-pala ke wa ootokoa okome Akolaliyo oi pedia pikana toane kadimo uku. Ipa anu kamateni, ali atoa peya mati kini toma pokoi poaneleke Akolaliyo po letu mekakana keetapeane agopa takoukenepa anu kamate

ponamotouno, kiwi peyame iya moa noe. ²⁹Nimini ukuno, yakamene. Atai Akolaliyo talo toko take kipala opiane mekene gerepi po ku ue weneya wa moane nouno, papete pade wa nakileka toamou wa Yesuyo oka. ³⁰Nitoapa lo pade oomoteketepa Oliwe-pini tonoke pote witapokoi.

Pitayo Yesu Wawa Akatekamo

(Make 14:27-31, Luke 22:31-34, Yone 13:36-38)

³¹Oliwe-pini tonoke pome mekome Yesuyo okome opi likonu kiwi peyame no wawa tia tadatapeoi. Nipa Akolaline bokuke nopala eni toatekoileke panagome papete eya wa wia mekapiane toa taatekoa toi.

No Akolaliyo sipi sipi kai-kiti talo tokago witikolu one sipi sipi kai-kiti tia tadoa pootapeoi wa Akolaliyo oa plane toa panagome wia mekaneya.

³²Eina wia mekapiane toane taatekoane tukolu Akolaliyo moa kamotokakalepa kiwi naniko nomotoane no namolo takoane Galili take pone mepou wa okale ³³Pitayo okome i ali peyame ne wawa tia tadatapekolika noanume ne wawane poamou-kale okome ³⁴nepala i ukumodo yakamene. Opi likonu ali ogadame ka wete wameneyake neme no i ago wene toamuku wa tebolo-peta oade toko-kale okome ³⁵ne witikete nopala dekoa witikolika ne einago wene toamuku wane wawamou wa okale ete peyameka aina okana toa ootapekoi.

Yesuyo Gesemani Take Kowitikome Akenemo

(Make 14:32-42, Luke 22:39-46)

³⁶Yesu one oya-lawe-pala Gesemani wa ibini akene take opia pome kakome okome no yeka tutu pone kakene kowitipukuno, ita nepia meamene wa

ootokoapa ³⁷Pita Sebedine manata-pala aua pokome ela matiyame tuaney a tepene-pala mama mati motaney a poka. ³⁸Pokome okome no wene kedame tukakolo tuadene meku. Mugili-pala topelekono, tone ita opia mekete nepikoa meatoane uku wa oomotokomepa ³⁹nami-takakoa eko keneya kidene pome itonoke aua pitalogoa kowitikome okome atai meteke noateku ue enekupa no tete moatekulu tokono, neme ete moa pedekamedekalepa nitikamene. Nipa anu wene pikule toa wane ekene wamukuno, neke wene pikole tou wa kowitimotokome ⁴⁰one oyali-mene mekoita wakapea pokome enekale atu pia meadekoi. Nitadekoli kamotokakome Pita-pala okome lou pini odeneka nopala lene kia nepikamele toamoko-pe. ⁴¹Setanuyo kiwi likoa enekayano, lene kia mekete kowitamene. Lene kiane nepiane meou wa wene pikiyake tigini popeyo noamokolo atu wini pia meadiki wa Yesuyo oomotokome ⁴²kutu keneya taku takoapeta pome kowitipokome okome Atai neme no moateku tete ete moa pedekamele toamokalepa nipa eni tete mootapeou wa kowitimotokome ⁴³wa wakapea nokome enekale pa atu pia meadekoi. Atume moa maleou takakale pitakoi. ⁴⁴Nitadekoli eko keneya wa pokome one namolo kowitikanakamo tebolo takoa kowitimotokome ⁴⁵one oyali-mene mekoita wa wakapea nokome okome pa koome tuaney a mekete atu-kala pia meki-pe. No Ali Yatenane Oyagopa Akolaline agale tagoa toamiki yename wimotoa moa meateko ago ku nokono, ⁴⁶wete kamokoa kawewe. Kotua pekete pato wa oka.

Yesu Dekoa Motanemo

(*Make 14:43-50, Luke 22:47-53, Yone 18:3-12*)

⁴⁷ Yesuyo nimo oa kakaka one tuku kakoa (12) oyali-kiti pade Yudase wete eina noka. Nokale ali peya mati koukoa kepete tue layo katekamo katekamo toa obomoa nokoi. Nipa Akolalike lodo yotokoai tane tobou ali-kitameka Kanosolo ali-kitameka Yesu einago dekoa motokapoatino poe wa wetekakoli nokoi. ⁴⁸⁻⁴⁹ Wetekakoli nekete Yudase Yesu kakata wete nome awa Tikisago wa ootokoa Yesu nunu oka. Enipa papete Yesu dekoa monatekoi yene-pala oi pedoa pikana toa toka. Nipa one pone nunu opokou agopa Yesu eni toono, dekatapea moamene wa okana toa toka. ⁵⁰ Nitikale anu oya edade noko-pe wa Yesuyo okaka Yudase-pala opia nokoi ali-kiti one kakata note dekoa monokoi. ⁵¹ Nitikoli Yesuno oyali pade eniya liti kakome panago wiou wa one kepete tue witimoapa panagono kapidi pine takoa pitikaka. Einakagopa ako odene mekome Akolalike lodo yotokane tobou agono pupu ago. ⁵² Nitikale Yesuyo one oyago kikoa okome okome panagome kepete tue eya moa panago kawa tukakalepa oneka kepete tueme kawa tukoino, neke wini kepete tue wete lua. ⁵³ Opi agetai kowitikene ekene edelo ali ege egeta wakala kadukoa no mekuta moa weteka-ye wanedo kowitikolupa eni eni yakoa wetekoo. Enipa wene toameke ni toka-pe. ⁵⁴ Nimo wane kowitamele tokoyake Akolaline bokuke papete wia mekapiane toa taatekamedekolo tekene enimu wamadene waku wa Yesuyo oka.

⁵⁵ Einata einapete Yesuyo e oboa kakoi yene-pala okome kini kepete tue layo tigini-pala nidikoa aua nikino, nopa kode ago tetepo takakete dekoa moad-

ete niki-pe. Ta pataka abuna kiwi kakakoane tobou losu yapu keneke keleyo olaukoane mekounake no eida dekoa monamokoina. Dekale wakotipe. ⁵⁶ Akolaline agale toaweana akane ali-kitame papete wia mekapiane toa taatekamedekolo ni tiki wa okale one oya-lawe peyame one tia wawa pitoa pootapekoi.

Kanosolo Ali-kitame Yesuno Koiso Akanemo

(*Make 14:53-65, Luke 22:54-55, 63-71, Yone 18:13-14, 19-24*)

⁵⁷ E yename Yesu dekoa moomoteketepa eya agono yapu ako odene mekome Akolalike lodo yotokoai tane tobou ago Kayapase einagono yapu aua pekeneya. Einago Kayapasene yapu eya ali-kiti Yu yenane totono pine toa olaukane ali-kitika Kanosolo ali-kitika wete ponete koukoa meponaneya. ⁵⁸ Kini koukoa meponaneta Yesu aua pokoli Pita kutu mati kawatati toma nome tobou agono kela pawe patukoa einagono pupu takane ali atoa pakeke nome menaneya. Yesu-pala tokale enoa togademe ni noka.

⁵⁹ Eida Akolalike lodo yotokoai tane tobou ali-kitameka ete Kanosolo ali peyameka Yesu wia tukatekoi oi pedoa pikete ekete eya tato. Yesu i agome padele poanele tokale enekoo wa kapene wakatiki ali-kiti tuku toa moato wa tuku tokoa kawa ⁶⁰ moa kakakoli dika dika wa kapene wakaneyake one wia tukatekoile pade piameneya. Nitaneyake alita takuta nekete ekete ⁶¹ Akolaline wikakane tobou losu yapu oneme keaweane tadekatekoane wa ta tebolo-peta lia patakale eni-mene moane awitikakoane wa wiou wa okale yatekoo wa okoli ⁶² ako odene tobou meane ago kamokakome okome neme okale yatekoinakamo eni akoa ikino, neme pademo topo takoa enike

oo-pe wa okale ⁶³agale wameteko pa kakeneya. Nitikale ako tobou agome okome okome pa mea kama pokago Akolaliyo yakakamoto, nepa one mana Keraisu tadekalepa wete a-na wa okale okome ⁶⁴nimini wini oko. Kiwi peya-pala ukuno yakoe. Naniko no Ali Yatenane Oyagopa telekole-kama toko ago Akolaline nimini yono lono kawane tibu wedo patu meane wakapeane nokolu enoi wa okale ⁶⁵ako tobou ago pinali one kakene mamina tiawe a iyatapokome okome oyakeno, i agome Akolali-pala taumada toa okolo tone kaleme yatekono, i agome toka poanele dika dika wa akoa omotoa pade ali-kiti totome wa tuku toateko toa mena. Akolali-pala taumada toa okale kime yatekoinano, ⁶⁶opa i ago-pala edele tato-pe-kale ekete i ago wia tukamedekona wa topo takoa akeneya.

⁶⁷⁻⁶⁸Nititiko a one lene timinike tekelipu toa yotokoa yumili mutoa pia wia taneya. Wa pade ali-kitame kala witikete ekete Keraisu nepa teyo witikato-pe. Yakoono, toawe a-wete a-na wa tea agale oa kakeneya.

Pitayo Yesu Akoa Wakenemo

(Make 14:66-72, Luke 22:56-62, Yone 18:15-18, 25-27)

⁶⁹Nitoo kakoika Pita akolono po-male meaneya pupu atoa pade Pita mekata nokome okome neka Galili Yesu-pala opia yake toka wa onokale ⁷⁰e yene peya kakakoa okome mena, neke wini oko agale yakamuku wa oomoto-kome ⁷¹kago keteponoke pome kakale pupu atoa padame eneteko a eniya liti kakoi yene-pala okome okome i agopa Nasarese Yesu-pala opia yakago-kale ⁷²Pitayo okome agetai ti a neme eni okagopa enamuku ago wa akeneya. ⁷³Wa nani keneya eniya liti kakoi-kiti one kakata nekete ekete nepa Galili yename iki toa okono, Yesuno oya-lawe-

pala opia yakago tadeko-koli okome ⁷⁴kapenedo wakadekolupa Akolaliyo no kibu momotouno, Akolaliyo yakakamotoane nimini ukuno, kini wini iki agopa wene toamuku wa oa kakaka eina eina ali ogada ka oa kaka. ⁷⁵Nitikalepa Yesuyo eya wa okana ali ogada ka wameneka neme no einago wene toamuku wa tebolo-peta akoa wawade toko wa okana wene ponokale Pita akolono pome komo kata pitikoa kapaneya.

Yesu Pailaseke Aua Pekenemo

(Make 15:1, Luke 23:1-2, Yone 18:28-32)

27 Podolikama ta patakale Akolalike lodo yotokoai tane tobou ali peyameka ete Kanosolo ali-kitameka Yesu wia tukatekoi oi pedoa piitiko a ²one yonoke kapa po kakamotekete ta yopikago Pailase mekata aua pote kakapaneya.

Yudase Tukome Tuanemo

(Aposelo 1:18-19)

³⁻⁴Yesu wia tukatekoi oi pedoa piadekole yatekome one wimotoa moa metekanakago Yudase yaame tukome eya topaneya. Akolalike lodo yotokoai tane tobou ali-kitika ete Kanosolo alikitika koukoa mekoita pokome okome padele toamene ago wimotoane pa puputuane moane metekouna. Poanele eni tekene tadekuno, kinike silepa kue lene padeka kapidi kakoane (30) motokouna wa kini einoe wa ete metekale ekete enipa tone pupu menano, neke pupu toko-la wa paya nou toa kakoli ⁵eina kue tobou losu yapu keneke pitikamotokome pome po napaneya. ⁶⁻⁷Nitaneyake Akolalike lodo yotokoai tane tobou ali-kitame eina kue lene wekotoa motekete ekete ipa ali wia tukateko kueno, tone losu pupu toadete oyake moamato wa wene kibututukoa mekete eya taneya. Mete latia tane agome kamo tua moai toake wak-

enetapa eina kueme topo toa motekete ekete mone pade ta kawa note mea tukoi yene i itonoke oloyo toai tato wa topo toa motaneya. ⁸Nitaneya tokome opika eni itonopa lokeyo itono wa ibini ikiya. ⁹Enile teketepa Akolaline agale toaweana akane ago pade Yere-maiayo eya wa papete oa plane toa taatekaneya. *I toaweane uku agopa Is-erele yename silepa kue lene padeka kapidi kakoa (30) wetekoa moato wa oi pe-doa pianeya.* ¹⁰Eni kuemepa mete latia tane agome kamo tūa moai taneta topo toa motaneya. Nipa Ali Muno Akolaliyo nopala oka toa taatekaneya wa Yeremaiayo oa pianeya.

Pailaseyo Yesu Pitia Yakanemo

(Make 15:2-5, Luke 23:3-5, Yone 18:33-38)

¹¹Yesupa ta yopikago Pailase einagono leneke kakale Pailaseyo pitia yatekome okome nepa Yu yene peya lukoa meki tobou ago-pe-kale okome nopa einago wa wini okana wa akeneya. ¹²Nitaneyake Akolalike lodo yotokoai tane tobou ali-kitameka ete Kanosolo ali-kitameka i agome dika dika wa akooa okolika Yesuyo pade agaleka wametekoa pa kakeneya. ¹³⁻¹⁴Nitikale enekome Pailaseyo okome opa nipa padele padelepa neme tanemo-kala akooa ikino, neke yakooa edemo oo-pe-kale Yesuyo pademoka topo takameneya agale wametekoa pa kakale ta yopikago wene kainya mati pia kakeneya.

¹⁵Edelo ago patukane wa ibini akene toge oi ponokale-kama ta yopikago Pailaseyo eya tokala taneya. Yu yenamepa po yapu pitane ago pade po kotokooa one yapu wetekaka wa takooa okoi agopa Pailaseyo po kotokooa wetekakala taneya. ¹⁶Einapete eya ago Barabasi po yapu pitaneya. One poanele tanemo ta piko peyake oa

pupitikatapeneya. ¹⁷Ali atoa Pailase mekata koukooa note kakoli Pailaseyo one tanele tokome okome mani ago po kotokooane wetekakamotoa iki-pe. Barabasi-pe, Keraisu wa ibini iki agopa Yesu-pe wa akeneya. ¹⁸Nipa e yename Yesu-pala aua nikilepa pa puputua wene pokete ni tokoi wa wene tokome akeneya. ¹⁹Nika one koiso yakooa meateka walai witipitooa mekakooa one natoname agale wetekakome okome wini nami kawamene ago-pala padele tikileka toamooa wane uku. Ete pia pulete enekounakaleke nopa lata potokakome wene keda mati tokolo mekene ni uku wa pubu oa wetekaneya. ²⁰Nitaneyake Akolalike lodo yotokoai tane tobou ali-kitameka ete Kanosolo ali-kitameka e oboa kakoi yene oa kamotokakete ekete Pailase-pala eya atoe. Barabasi po kotokooa wetekakoano, winago Yesu wia tukakamotoa ta wa atoe wa oa kamotokaneya. ²¹Nitikoli Pailaseyo e yene pitia yatekome okome mainago po kotokooane wetekakamotoa iki-pe-kale ekete Barabasi wa okoli okome ²²Keraisu wa ibini iki ago Yesupa edekamene wa iki-pe-kale ekete winago yomo lekaneyake wia dekekamotoa ta-koli okome ²³one poanele edele taneyake iki-pe-kale agale telo oa kamotokooa kakete ekete winago yomo lekaneyake wia dekekamotoa ta wa awitikooa tika tika taneya. ²⁴Nitikoli kini eni wene pilikooa kawikamotoa wili toake poi edikooa kamotokakaya wa wakome eya taneya. Kini lene yoto kakome ue nomooa okolo kagonoke pekooa pia yono tadakome okome i nami kawamene ago wia tukatiki pedooa pikile kote tokolo wakene tukuno, enoe. Kini wia tukapoe-kale ekete ²⁵totome poanele tadekolopa nipa Akolaliyopa winago kamate yotokake nami wia kibu motikilepa totoka tone mati-kitika oyake kibu moma pomotooa oko wa

okoli ²⁶ Pailaseyo Barabasi neke yapu pa wa po kotokoa wetekaneya. Nitoapa Yesu po wapime wiamene wa one poyo yene metekale witikoli yomo lekaneyake wia dekapoatino, poe wa nitatekoi poyo ali-kitike metaneya.

**Poyo Yename Yesu
Paya Tetepo Takanemo**

(Make 15:16-20, Yone 19:2-3)

²⁷ Poyo ali-kitame Yesu moomotekete Pailaseyo ta talo toa meka yapu aua pote kakapaneya. Nitoapa ete poyo ali-kiti peya one eni kakata koukoa mootokoa eya taneya. ²⁸ One kakene mamina kotokoa piapa kikome kiane mamina petene pade moa kakaneya. ²⁹ Nititikoa kagani kakene po ludu moa makatikoa one wagoke lobutukakoa ni tauwe wata wakoa moa one nimini yonoke laukakoa neuwe tukupia mekete ekete Yu yene lukoa meki Ali Munu ne mea kamene wa paya tobou ago tetepo takoa kakeneya. ³⁰ Nitoapa oneke tekeli pu toa yotokoa one yonoke laukakoina tauwe wata odomoa one tobou wia taneya. ³¹ Nititikoa one tokoo kakakoina mamina petene kotokoapa one namolo kakene mamina wa moa kakamotekete yomo lekaneyake wia dekadete aua pekeneya.

**Yesu Yomo Lekaneyake
Wia Dekoa Tukanemo**

*(Make 15:21-32, Luke
23:26-43, Yone 19:17-27)*

³² Poyo yename Yesu-pala eni aua poadete pekete Sairini take ago Saimone kotukete ekete i ago wia dekateko yomopa neme aukoano, noo wa dekoa moa aukaneyake. ³³ Nitoa pote Gologosa wa ibini akene take witapeneya. (Gologosa tone agaleke eketepa ali wago wa ekete oko.) ³⁴ Gologosa take eni aua pote witaketete gerepi po ku ue-pala kou tane

yobotonota eletekoa lawetekoli mitua enetekoa noamademe wakeneya. ³⁵ Nitikale yomo lekaneyake wia dekatekoa kakete one kakene mamina-mene tatiato wa tadu tootokoa tatite taneya. ³⁶ Nititikoa witipitoo mekete nepikoa meaneya. ³⁷ Nitaneyake one wago pitia lekane yomo munoke pipiake eya wa wia mekatekoa dekaloganeya. I ago Yesupa Yu yene lukoa meki tobou ago. Enipa Yu yename one koiso akoo akenemo eni wia mekaneya. ³⁸ Yesu wia deketepa kode agota takuta eka okata yomo padetake wia dekaneya. Nipa panago Yesuno nimini yono lono wia dekoa padena ago one ewa yono lono wia dekoa taneya. ³⁹ Nitaneyake eida ponokoi-kitame tedu metekete ekete ⁴⁰ beita, nepa tone tobou losu yapu odepeta keatapeanepa wa ta tebolo lia patakale eni luku wa wiou wa okanakago pinali neke toa moa-na. Nepa Akolaline mana tadekalepa yomo lekaneya ludu ketipea koo noo-na wa tema ponokala taneya. ⁴¹ Eina toa Akolalike lodo yotokoai tane tobou ali-kitameka Mosesene totono pine toa olaukane ali-kitameka ete Kanosolo ali-kitameka tea tedu metekete ekete ⁴² i agome ete pade ali atoa toa motokoyake pinali one pade wa toa moamele toamoko. Beita, i agopa Iserele yene lukoa meki tobou ago patu. One wia dekane yomo ludu koo nokale eneketepa i agopa Keraisu tadeko wa oneke wene tugo. ⁴³ I agomepa Akolalike wene tugoane meku wa okano, Akolaliyo one toane mou wa wene piadekalepa nitoo. Onepa Akolaline mana kaku wa okagopa Akolaliyo toa motokale enato wa tea agale okala taneya. ⁴⁴ Nimo okoi toa Yesu-pala odeneka wia dekaokoina kode agotameka tea agale okala taneya.

Yesu Tukome Tuanemo

(Make 15:33-41, Luke 23:44-49, Yone 19:28-30)

⁴⁵Lou mataike ponome kakaka (lou pini 12 kiloko) ta peya likatapeneya. Lou pene webokaka (lou pini 3 kiloko) ta pa likoa kakeneya. ⁴⁶Lou pene webokaka (lou pini 3 kiloko) tadiya Yesuyo kayo telo ootapekome okome Eli Eli lama sabakani wa kayo akeneya. Enipa anu Akolali anu Akolali neme no dekolote witikoa wako-pe wa okome akeneya. ⁴⁷Nimo okale yatekete eniya liti kakoi-kitame ekete enipa Ilaida kayo okome toko-koli ⁴⁸panagome teyapea pome ue takamoateka obi wane mopaneya. Mootokoapa kou tane gerepi po ku uele tadamo tauwe wata munoke togotokoa aua nokome mitumoa na wa kabunuke pia lete lete taneya. ⁴⁹Nitikale ete-kitame ekete winile toameneya wa. Ilaidayo toa monoko patu. Tokale enato wa pa eida nepikoa kakoli ⁵⁰Yesuyo agale wa telo ootapekome one Yomini takoa pomotoa tukome tuaney.

⁵¹One eni tukakapa eina eina kuna tobou losu yapu keneke eya mamina Akolali meko lono wa akene yapu luku olege toa ketekalogane mamina petenepa ete oto wa iyawea tukaketikaneya. Itono-pala momani toa kakene kue-kitika kautakutukaneya. ⁵²Tuane ali atoa oloyo taneka peetapeneya. Peetapekalepa Akolalilinele wedoa takama pote tuane yene padeka-kiti kamotokaneya. ⁵³Wa naniko Yesu kamo pokale kiwi oloyo taneka tewitikoa Akolaline Yerusaleme take pekete ali atoa kainya mati mekoika pono yamepokala taneya. ⁵⁴Tobou poyo agomeka ete poyo ali-menamaka pa eida nepikoa kakoli momani toa ele kule toa kakale enekete

ekee wa nenei motekete ekete etene i agopa Akolaline mana tadeko wa akeneya. ⁵⁵Pade atoa-kitika kainya mati eka mati kakete enekoa kakeneya. Eni atoa-kitipa Galili ta kawa Yesu auapema nekene atoa. ⁵⁶Eni kakoi atoa pakeke eya atoa-mene lukoa kakoi. Padatoa one ibini Magadala Maria. Pade atoa Maria. Eni Mariapa Yame Yosepetane nine. Ni pade atoa Sebedi manatane nine.

Yesuno Tigini Kota Keneke Moa Pipanemo

(Make 15:42-47, Luke 23:50-56, Yone 19:38-42)

⁵⁷Ta likaka kamo ago pade Arimasia take ago Yosepe Pailase mekata pekeneya. Einagoka Yesuno oyago. ⁵⁸Einago Pailase mekata pome kowitipokome okome Yesuno tigini moane pipouno, mea ta wa yakapokale Pailaseyo one poyo yene yopikago-pala okome Yesuno tigini i agono motokapoano pa wa okale nitaneya. ⁵⁹Nitaneyake Yosepeyo mootokoapa weneya ake tane mamina petene moa tatilogo Yesuno tigini pia ewetapeneya. ⁶⁰Nititikoapa pala padaneta kokapiane kota keneke moa pipaneya. Pinali one tigini naniko platekata pene kokoa wetipikanata eni piitikoa kue makai mati uoya koketekoa moa kabunu ketekalogoapa pekeneya. ⁶¹Yesuno tigini eni moa pikalepa Magadala Maria-pala padena Mariata eina kota eko keneya pimotoa meaneya.

Poyo Ali-kitame Kota Yopikoa Kakenemo

⁶²Toge kiatekoiya nodokane oi nokale podolikama eya ali-kiti Akolalike lodo yotokoai tane tobou ali-kitika Parisi ali-kitika Pailase mekata koukoa pote kakete ekete ⁶³eina kapene yotokakanakago wete

tuameneya mekome okome one tuaneyā pianeke ta tebolo takoa pataka-petepa kamoane pou wa oka. ⁶⁴Nimo oka toa lede taatekamotoa tekete one oyali-kitame one tigrini kode moa aua pote padeka potipitikoā ekete Yesu einakagopa kamoā pekedeko wa oadete tiki. Nitiketepa einagome ali atoa namolona oa yotokaka toa moa patukoā oa yotokaku pekete toadete tiki. Nitikaya tokolo one tigrini pipaneta neke poyo yename ta pataka tebolo-petapa wedoa yopia kamotamene wa Pailase-pala akeneya. ⁶⁵Nimo okoli okome one oyali-kiti kota keneke poamomotoa toatiki toa topoatino poe. Poyo ali-kiti-pala aua poe wa okale pote nitipaneya. ⁶⁶Nipa kota kabunu ketekalogane kue eka oka kebonoke kalapage kiitikoā kini adeka mekaneya. Nititikoā poyo ali-kiti kime yopikoā kawē wa kakamotekete pekeneya.

**Yesu One Tuaneya Pikata
Kamoā Pekenemo**

*(Make 16:1-10, Luke
24:1-12, Yone 20:1-10)*

28 Yu yene kini ko mea pupu toamatekoi-pete ponokale podolikama ta tūei teigaka Magadala Maria-pala padena Mariatamepa Yesuno tigrini pipane kota enepato wa enepaneya. ²Poadete pokoika momani mati taneya. Nipa Ali Muno Akolaliyo moa wetekane edelo ago a tibu kawa nokome kota kabunu ketekalogane kue moa ete koketekoa kakoā einakeya waneke meaneya. ³Edelo agono lene timinipa katiapale keneya lou yati yati tootapea, one kakene maminaka kilue kale keneya ake tootapea taneya. ⁴Nitane ago enekete kota yopikoā kakene poyo ali-kiti piti mati tokale tekete kolu kolu wa tuatekalime temotele keneya toa pitaloganeya.

⁵Wa naniko einatoata nokoli edelo agome okome okome piti moameo wane uku. Yomo lekaneyake wia dekakoina Yesu tuku tonikino wene tekene ni uku. ⁶Inakago ita piamokono, onena papete okana toa taatekoapa kamokoā poka. One pianeta luku ino, enoe. ⁷Enemoteketepa Yesuno oyali-kiti eya wa wete akapamene. Inakago Yesu wete kamoā pokano, kiwi Galili take naniko ate nomotoa one namolo takoa pokano, aida penekete enoino, enepanamene wa akapamene. Kita-pala oatekumopa ina ukuno, wete akapoe wa okale ⁸akolono wete wititapeketeta piti tokaleka kolotini nakale Yesuno oyali-kiti oadete teyapea pekeneya. Nipa wedia kawa pekeneya. ⁹Nitoata pokoli Yesu kotua nokome okome wete kamene-ye wa okale one kakata note pitalogoā one kawata tebea motekete kei pikoli okome ¹⁰piti moameo. Anu ame-mikiti eya wa akapoe. Ate Galili take note no enenamene wa akapoe wa wetekaneya.

Poyo Ali-kiti Yerusalemē Take

Pekete Akenemo

¹¹Einatoata poadeteta pokoika eina kota yopikoā kakene poyo ali padeka-kiti Yerusalemē ta Akolalike lodo yotokoai tane tobou ali-kiti mekoita pekete kini enekoinakamo peya dika dika wa toaweā akeneya. ¹²Nitikoli eni yene ete Kanosolo ali peya-pala koukoā mekete edato patu wa kini toatekoi oi pedoa piitikoapa poyo ali-kiti kue tubeya moa metekete ekete ¹³ali atoa kotukete-kama eya wa okala tamene. Likonu kiwi atu pitikakoā Yesuno oya-lawe note tigrini kode moa pekete tokoi wa akamene wa akeneya. Eya waka akeneya. ¹⁴Toto-pala i toaweā ikimopa ta talo toko ago Pailaseyodo yatekome kiwi wia tukademe tokalepa one wene

kekoono, piti moameo wa oa tukaneya. ¹⁵Nitikoli kue moomotekete pote kipala eina okoinakale taneya. Opika einaka einamopa Yu yene mekika oa pupitikaneya.

Yesuyo One Oya-lawe Mekoita

Galili Take Nokome Oa Pianemo

*(Make 16:14-18, Luke 24:36-49,
Yone 20:19-23, Aposelo 1:6-8)*

¹⁶Yesuno tuku melepu kakoa (11) oya ali-kiti one Galili take i tonoke ate kotua namene wa papete oa pikana toa kotua ponete ¹⁷Yesu enekete neuwe tukupia kei pia kakoi. Nitiketete

padeka-kiti poome taneya kakoi. ¹⁸Nitikoli one oya-lawe kakoiya liti nome kakome okome tibu-pala itonota neme-kama yopia kamene wa Akolaliyo no moa kakakano, eya tamene wane uku. ¹⁹E ku yatene peyame anukumo yakoa momotono, Agetaine ibinika one mana anu ibinika one Epetane Yominine ibinika wedekoa ali atoa ue motokama yamene. ²⁰Nipa kipala tamene wane olaukakouna toa litia tamene wa olaukama yamene. Itono takoa poateka ta pataka-peteka kiwi yopikoane-kala kama pouno, nitamene. Ee nimini wa Yesuyo oka.

MAKE

Yesunomo Makeyo Wia Mekaneya

Ali Atoa Ue Motokama Yakene Yoneyo

Mo Wima Yakenemo

(Matiu 3:1-12, Luke
3:1-18, Yone 1:19-28)

1 Ipa Yesu Keraisuke epetekoa akene agale titiane akakuna. ²Namolo namolo papete Akolaline agale akane ago pade Aisaiayo eya wa wia mekaneya. Nipa Akolaliyo mana-pala papete oa plane toa wia mekakome okome

Ne naniko pomotoane anu agale oa aua yawatekago namolo takoane moane wetekou. Nitikolu pokome ne poateka ka nodokakama poo. ³Nipa ali pi-amene ta ludu panagome eya wa mo wima yawoo. Ali Muno noateko ka nodokakapia, one yawateko ka-kitika kiyotokakapia toatino toe wa einago taatekoa nokome mo wima yawoo wa Aisaiayo papete wia mekapianey.

⁴Eina wia mekapiane toapa Yone ali piamene ta ludu taatekoa nokome eya wa mo wima nekeneya. Kini tokoi poaneleke Akolaliyo kiwi wiuu wa po letu mekakana keetapemotono eni poanele tewitiko wawa ue moamene wa ali atoa ue motokaneya. ⁵Nipa Yudea ta piko peyake Yerusaleme takeka ali atoa peya one mekata note kini tokoi poanele i i wa toawe ootapekoli nipa ue moe wa Yodane uele kakome ue motokakala taneya.

⁶Yone einago taatekoa nokomepa kamelo kai pineme latiane mamina kawa ni pitimekawe kai kepeneme latiane matiu kawa taneya. One nakene

neepa apio-pala koyapo ego ueta nakeneya. ⁷Nitane agome mo wia kakome okome no litimotokakome ele kule telekole toa no moa patukako ago noademe toko. Nokolopa auapeane one kawa yene kekatukuyake pa ago tekene meamukakene kekamele toamoko. ⁸Opii kiwi pa ue motokakene tuku. Einago nokomepa Epetane Yomini motokademe toko wa oma yakeneya.

Yesuyo Ue Mootokaneyake

Setanuyo Likoa Enoai Tanemo

(Matiu 3:13-4:11, Luke 3:21-22, 4:1-13)

⁹Eina-petepa Yesu Galili ta keneke piko Nasarese ta kawa Yone kakata nokale Yodane uele ue motokaneya. ¹⁰Nitikale Yesu uele kawa aka matanuke pogatekoa pokome enekale eina eina tibu patetepikale Epetane Yomini weuwe keneya tibu mea ketipea nome pinali oneke pitanokale enaneya. ¹¹Nitikale a tibuke agale ludu nokome okome anu manago nepa anu kolotini ago. Neke tokoleke no kolotine meku wa akeneya. ¹²Nitikale eina eina Epetane Yominiyo Yesu ali piamene take poano pa wa aua pekeneya. ¹³Aua pekeneyake lene timini togoikoa padeka noi kakoa (40) ta lia pataka toa Setanu nome likoa enoai taneya. Eidapa yo tane kai eya pakeke pome mekake edelo ali-kiti note auape auape toa kananeya.

Yesuyo Mou Tagi Tane Ali Tuyono

One Litima Noe Wa Kayo Oa Motanemo

(Matiu 4:12-22, Luke 4:14-15, 5:1-11)

¹⁴Yone po yapu moa pitikatekaneyake Yesu Galili take pokome eni ta ludu Akolalinemo ali atoane wene epetekakome tanemo i i wa mo wima yakeneya. ¹⁵Nitikome okome eina oa plane agale taatekoa toateko-petepa opi. Akolaliyo

kiwi talo tokole keleyo witateko tigo-toma nokono, kini namolo poane wene wia wawa kini wene epetekoane uku agaleke wene matoa meamene wa oma yakeneya.

¹⁶Nitoo Galili ue matanu ludu kokotoma ponokome enekale odene wamena Saimone Aderutame kini tanele tekete mou tagi toa kakoli enaneya.

¹⁷Enekome okome mou tagi toa mou toa ali atoa motokakete toatikile olaukouno, no litima noe wa okale ¹⁸eina eina kini tagi ka tewitikalogoia Yesu litima pekeneya. ¹⁹Yesu eniya liti kutu pokome enekale odene wamena Yame Yoneta Sebedine manata ue dipike mekete tagi ka pilianeka lipua mekoli enaneya.

²⁰Enekome okome yukuyagota wete noe wa kayo oma ponokale eina eina pupu yeneka etene-pala ue dipike memotoa Yesu litima pekeneya.

Ipono Awitaneya Meane Ago Latekanemo

(Luke 4:31-37)

²¹Yesuyo Kapaneame take pato wa einali-mene-pala opia pome mepaneya. Pome mekomepa ko mea pupu toamene-pete losu yapu pome olaukapaneya.

²²One eni olaukakale yatekete peyame ekete Mosesene totono pine toa olaukaki yename ikina toa i agomepa wamokono, one weneme-kama pademo pademo tititikoia okono, opa agale pinagomepa i okono, yakatoe wa ka oa kakeneya.

²³Einata einapete poane ipono awitaneya meane ago losu yapu mekome telo okome okome ²⁴Nasarese Yesu nepa toto mekota edade noka-pe. Toto wiade noka-pe. Nepa Akolaliyo takoa moa kakapiane ago toko-la wa tayo ootapekale kikoia okome okome ²⁵agale wia teiano, winago tewitikoia wete takoa pa wa okale ²⁶einago itonoke aua pitikoia petekakoa kawa tayo telo ootapekome takoa

pekeneya. ²⁷Nitikale enekete e yene ete oto wa yakaate tekete ekete one eni oka agalepa edane agale patuno, one weneme-kama pademo pademo tititikoia okoya tokome ipono-kitameka oneme okole-kama yakoa tiki wa ka oa kakeneya. ²⁸Nitaneyake one tanemo Galili ta piko peyake wete oa pupitikatapeneya.

Eya Kuya Yene Tane Ali Atoa Latekanemo

(Matiu 8:14-17, Luke 4:38-41)

²⁹Enile toomotokome Yesu losu yapu tewitikoia pome Saimone Aderutane yapu pato wa Yame Yoneta-pala opia pekeneya. ³⁰Eni yapu pene nome mekaka Saimone natonane nine one kaue poto yene taneya piko wa okoli ³¹einakatue pikata pome yono moa kamotokaneya. Nitikale eina eina poto yene teitakale latoa kakome kini nee takoa lawetaneya.

³²Einata einapete lou pene pipaneyake eya kuya yene taneya mea ipono awitaneya mea tane yene peya aua pato wa kini oya-mikitame Yesu mekata aua nekeneya. ³³Eni take pitane ali atoa peya note kago liti kolike apua takoa kakeneya. ³⁴Nitikoli enekome eya kuya yene taneya nekene-kiti latekoa ipono-kitika takoa poe wa wetekoa taneya. Nipa ipono-kitame i agopa Yesu toko-la wa wene tokoli tokome agale witoa wameo wa takoa wetekatapeneya.

Yesuyo Galili Ta Ludu Mo Wima Yakenemo

(Luke 4:42-44)

³⁵Podolikama ta wete patameneyake Yesu kamomotokome ali piamene take kidene pome kowitipaneya. ³⁶Nitadekale Saimoneyo tuku topato wa one oyali-kiti-pala opia pome tuku toawineya pekeneya. ³⁷Nitoo

tuku toawineya pote enamutukete ekete nepa kuka ku ali atoa peyame tuku toa kaki-koli okome ³⁸ete yeka ta ludu pitiki ali atoaka anu akama yakuna agale oane mema pamedeku. Taatekoane eina agale akadene ni nokouno, tone opia pekete patono noe wa pekeneya. ³⁹Patono noe wa pokomepa Galili ta ludu losu yapu kaka toa Akolaline agale mo wia akama pome ipono-kitika takoa wetekoa taneya.

Yesuyo Kedime Nakene Ago Latekanemo

(Matiu 8:1-4, Luke 5:12-16)

⁴⁰Kedime nakene ago pade Yesu kakata nome wadini tukupia kowitikome okome nemedo no epetekouno wene pikepa nipa oyake epetekoano ta wa kowitikale ⁴¹ela motokome yoname mitikatekakome okome nitouno ta. Neke eni yene takoa pomotoane uku wa okaka ⁴²eina eina takoa pokale latoa kakeneya. ⁴³Yesuyo nititiko kakome pubu okome okome etene pade ali atoa enekeka anume ne latekakumo kotukoa ikileka toamoa. ⁴⁴Nitameneya eyaka topamene. Ne i agopa kedi pitaneya mekanake opi i latoa kakona wa yete pade ali atoame wene tomotoapa Moseseyo tamene wa papete oa planele topamene. Nipa Akolalike lodo yotokoai toko ago mekota peke oneke padeya lodo yotokatekoya aua poke mepoano pa wa wetekaneya. ⁴⁵Yesuyo nimo okale yakoake tagatapea ta piko peyake one eni latekakanakamo oa pupitikatapeneya. Nitikale tokome ali atoa pitikoika Yesu keleyo poukome toake ali atoa apua takakaya tokale padeka lono katekoa pome ali piamene ta ludu pima yakeneya. Nitoa pokake ali atoa koukoa one kakata note-kala kakeneya.

Yesuyo Muku Muku Toameneya

Pa Pia Meane Ago Latekanemo

(Matiu 9:1-8, Luke 5:17-26)

2 Yesu eina-meneke yawa mea wa wakapea Kapaneame take nome menaneya. Nitikale Yesu wa wakapea nome one yapu meko wa okoimo kugu ²yakatekoa ali atoa koukanokolipa keika yapu luku kawatekoi pakeka piameneya. Akolono kago ludu-kitika nateya pakeka piameneya edeya takatapeneya. Nitaneyake yapu keneke kakome Akolalinemo i i wa oa kakaka ³ali tuyonome eya ago muku muku toameneya pa pia kakene ago leyo leyo toa aua nekeneya. ⁴Nipa yapu edea takatapeneya tokome Yesu kakata pinele aua namele toamokale aka yalini ludu aua penaneya. Nitoa ponete yalini kea po kakoa leyo-pala keti Yesu kaka pitia tewitikaketikaneya. ⁵Yesu i agome kini oyago oyake latekamele toko wa wene tekete tadekoile enekome Yesuyo yene tane ago-pala okome anu mana neke toma noka poaneleke Akolaliyo po letu mekakana keetapekene neke poanele kogakuna wa okale ⁶Mosesene totono pine toa olaukane ali-kiti eniya liti mekete kini tepene eya wa wene pia meaneya. ⁷Imopa i okono, edekolo oko-pe. Ali atoame toma nokoi poaneleke mekane po letu kea wakilepa Akolaliyo odene tokono, i agome Akolali tekome oko wa wene poaneya meaneya. ⁸Kini eni wene pikoile tetoa enekome Yesuyo okome wini tepene wene kibutukoa mekipa dekolo tiki-pe. ⁹I ago-pala ukule tamele tadeko wa kime wene tomotoanepa yene tane ago-pala edemo wane omotoa iki-pe. I ago neke toma noka poaneleke Akolaliyo po letu mekakana keetapeku wane omotoa iki-pe. Wete kamo ne aua nokoina leyo-pala aua

pa wane omotoa iki-pe. ¹⁰⁻¹¹No Ali Yatenane Oyago itonoke mekenepa ali atoame tokoi poaneleke Akolaliyo po letu mekakana keetapeamele tadeko wa kime wene tomotoanepa yene tane ago-pala eya wane uku. Ne aua nokoina leyo-pala moa aua neke yapu poano, kamokoa pa wa akeneya. ¹²Nimo oka oka e yename nepikoa memotoa einago kamokakome one aukoina leyo-pala moa aua pekeneya. Nitoa pokale enekete ali atoa kakoi peyame ka oa kakete ekete namoloka toamokoinakalepa i tokono enatoe wa Akolali kei pia kakeneya.

Yesuyo One Pukuka Matiu

Ne Litima Namene Wa Kayo Oa Motanemo

(Matiu 9:9-13, Luke 5:27-32)

¹³Nitaneyake Yesu Galili ue mine matanu wa pome kapaneya. One eni kakata ali atoa peya note oboa kakoli Akolaline agale olaukoa kakeneya. ¹⁴Nititikoa pokome enekale eya ago Lipai Alepiasine mana takesi kue motokoai tane yapu keneke mekale enekome okome no pukuka tone patono noo wa oma ponokale kamomotokome Yesu pokaka litima pekeneya. ¹⁵One yapu nee natono noo, pata wa Matiuyo koua pokale Yesu pome mekome nee noa meaneya. Nitikale takesi kue motokama yakene ali-kitika Yu yenane totono litia toamene ali-kitika Yesu-palaka one oyali-kiti-palaka eida opia mekete nee noa meaneya. Dikane ali kainya mati one pokaka litima pekeneya. ¹⁶Yesu dikane yene-pala opia mekome nee nakale enekete Parisi ali-kitameka Mosesene totono pine tqa olaukane ali-kitameka Yesuno oya-mikiti pitia yatekete ekete Yesupa dikane yene-pala opia mekome nee noa mekono, edekolo tokoto-pe

wa yakananeya. ¹⁷Nimo akedekoli yatekome Yesuyo okome dokosa agomepa yene toameneya meku wa iki-kiti edoa nome latekamotoa-pe. Yene taneya meku wa iki-kitipa nipa nome latekanoo. Nipa poanele toamuku wa iki yene kini namolo poane wene wia wawe wane oadene nokouya mena. Poanele tuku wa iki-kiti odene auapeadene nekene uku wa Yesuyo akeneya.

Akolali Wedoa Kowitadetepa Nee Eya Tekei

Wawa Noameneyake Pitia Yakanemo

(Matiu 9:14-17, Luke 5:33-39)

¹⁸Wa padepete ali atoa ue motokama yakene ago Yonene agale litia tane yenameka Parisi ali-kitameka Akolali wedoa kowitadetepa nee eya tekei wawa noamoa pa meaneya. Nitaneyake pade ali-kiti Yesu kakata note yatekete ekete neke agale yakoa nepala opia yaki yenamepa enile toamiki. Edekolo toamikiti-pe wa yakaneya. ¹⁹Nitikoli okome panagono atoa motokakita atoa motokagono oya-mikiti onepala wedikete wediapa nee eya edoa wawa noameneya pa memotoa-pe. ²⁰Wa naniko ete yename atoa motokago padeka aua poatiki wini tigtoma nokona. Eni toateko oi noka-petepa nee noameneya wawa pa meoi wa Yesuyo akeneya.

²¹Nimo ootokoa kakome pedoa agale pade okome okome panago one mamina namoloya pilikalepa weneya pue moa namoloya eni pilikata lapukoa lipuko patu. Nitamoo-li. Enile tootokoado uele abe kogalepa weneya pueme ete ete toa edema pokome pilikutu too wa Yesuyo akeneya. ²²Wa agale pade pedoa okome okome gerepi po ku ue weneya mekalepa meme kai tabeme latiane mete namoloyake oyake peia moamoo.

Eniyakedo peikalepa gerepi po ku ue weneya tokome lako yati kawa mono mono okome k̄aua paka yoa pootapeoo. Nipa eni kai tabeme latiane meteka k̄aua t̄i t̄ae witapeoo. Pene po ku kotiketepa meteka peneyake t̄ia lobutua piamedeko wa Yesuyo akeneya.

Ko Mea Pupu Toamatekoileke

Pitia Yakanemo

(Matiu 12:1-8, Luke 6:1-5)

²³ Yu yene kini ko mea pupu toamene-pete pade Yesu panagono witi ipe ludu pokaka one oyali-kiti one-pala opia pekete witi ku deya tukaka pekete kotima pekeneya. ²⁴ Nitikoli enekete Parisi yename Yesu-pala ekete tone ko mea pupu toamateko-pete kekoa wawa toamatekole eni tikino, ku kotia eni pupupa dekolo tikiti-pe-koli okome ²⁵⁻²⁶ Depidi one-pala toa yakene ali-kitika kobu tokale tanemo oi moamokoiya-pe. Eya taneya. Tobou ago Soloyo Depidi litia aua pokale toa yakomema kobume tuaneya tokome Akolaline wikakane yapuke lobutukoa kapaneya. Nitoapa Akolaline pikane palawe wane moa nootokoa one oyali-kiti i nee noatino noe wa moke toa tatika tatika taneya. Akolalike lodo yotokoai tane ali-kitame odene dikane palawe wane namele taneyake nitaneya. Enipa ako odene mekome Akolalike lodo yotokoai tane tobou ago Abiasa meane-pete kini kekaneleke Depidiyo taneya. ²⁷ Yesuyo nimo ootokoa kakome okome Akolaliyo ali atoa auapekomema ko mea pupu toamatiki-pete pa ko meamene wa oa pianeya. Ko mea pupu toamene-pete padeya padeya kekaneya latikamotoa akeneya mena. ²⁸ No Ali Yatenane Oyagomema ali atoa ko mea pupu toamiki-pete mekete toatikileka i i wane oyameane talo toane meku wa Yesuyo akeneya.

Yono Lokane Ago Latekanemo

(Matiu 12:9-14, Luke 6:6-11)

3 Wa pade-pete Yesu losu yapu wa pokome enekale yono lokane ago pade eida mekale enaneya. ² Nitaneyake pade-kitamema Yesuyo i ago epetekako patu wa lene wikaneya. Nipa ko mea pupu toamene-pete kini kekanele tomotadiya wa kakete taneya. ³ Nitikoli Yesuyo yono lokane ago-pala okome okome oto noke kanoo wa ootokoa kakome ⁴ e yene yatekome okome tone ko mea pupu toamoko-petepa edele tokala tato-pe. Ali atoa-palapa padele padele epetanele tato-pe. Poanele tato-pe. Tuamele toko agopa toa moato-pe. Wia tukato-pe wa okale agale waametekoa pa kakeneya. ⁵ Tepe kolotini lupi tootapeneya kakoile enekome kotimi lunaneya kawa tepe-pala we tokale kaka. Nitoapa o yene leneme enoa unukamu tootokoa kakome yono lokane ago-pala okome neke yono kutu lido akoano ta wa okale lido akoa enekale one yono epetekakadeka. ⁶ Nitikale enekete Parisi ali-kiti Erodeke timini kawa yakene yene-pala akolono koukapeketepa Yesu wiato wa one wia tukatekoi oi pedoa pianeya.

Ali Atoa Yesu Litima Nekenemo

⁷ Nitaneyake one oyali-kiti-pala Galili ue mine pato wa tewitikoa pekeneya. Eni pokaka Galili yene peya mati lewi lewita pia obomoa nekeneya. ⁸ Nipa Yudea ta piko peyakeka Yerusalem takeka Idumea ta piko peyakeka Yodane ue eka-lono piko takeka Taia Saidone tata liti enika eni pitane ali atoa Yesu kakata note-kala kakeneya. One toma yakenemo kugu yatekoiya tekete nitaneya. ⁹ Nitaneyake ali atoata i kakoyame one dekoino, ue dipike pone mepouno, ue dipi nodokakoa oto aua noatino poe wa one oyali-kiti-pala akeneya.

¹⁰Nipa yene tane ali atoa peya mati latekakale enekete ete yename kini tane yene latekamotoa Yesu mitikada wa lekoa apua takatapeneyake ni akeneya.

¹¹Ipono awitaneya meane yeneka nokoli kini eina awitane iponame Yesuno lene timini enekete one kawane aua pitakete ekete nepa Akolaline mana wa okala taneya. ¹²Nimo okoli ipono-kiti kikoa okome okome no i agopa dikane ago wa widikoa toawe wameo wa kikoa akeneya.

Yesuyo One Oyali-kiti Tuku Kakoa (12)

Takoa Motanemo

(Matiu 10:1-4, Luke 6:12-16)

¹³Nititikoa tono pade lewia pome kakome one takoa moateka ali-kiti noe wa kayo okale nekeneya. ¹⁴⁻¹⁵One-pala opia yawatekoi ali-kiti tuku kakoa (12) one Aposelo ali wa moa kakakilepa Akolalinemo mo wia oawineya pote ali atoake awitane ipono takoa wetekoa tomotoa taneya. Nipa one tele patu kautakoa kakete nitimotoane wetekou wa moa kakaneya. ¹⁶Eya ali-kiti takoa motaneya. Pade Saimone one pade ibini Pita wa oa metaneya. ¹⁷Ni Yame Yoneta Sebedine manata. Yesuyo einagotane ibini pade Boanesisi wa ibini oa metaneya. Boanesisi wapa tono witikagota wa okome akeneya. ¹⁸Ni Aderu ni Pilipi ni Batolomiu ni Mati u ni Tomasi ni Alepiasine mana Yame ni Tadiasi ni Kenane take Saimone ¹⁹ni Yudase Isekariose. Yudase einagopa Yesu poi teiane yename wimotoa moa meateka ago.

Yesu Tobou Ipono Belesebulene Tele Patu

Kautakoa Kako Wa Tea Akenemo

(Matiu 12:22-32, Luke 11:14-23, 12:10)

²⁰One oya-lawe eni takoa moomotokome Yesu wakapea yapu nome mekale ali atoa wa obomoa note edea takatapeneya. Edeya takatapekoli Yesuka one oya ali-kitika nee noatekoi pake toameneya. ²¹Eni tanemo kugu yatekete onekameyo ekete ekee, leau akeneya yakome tokono, enemopato wa Yesu moa pikoa kawadete nekeneya.

²²Mosesene totono pine toa olaukane ali-kiti Yerusaleme ta kawa keti note kakete ekete Yesu i agokepa Belesebulene awinome mekome toko. Ako odene meko tobou ipono Belesebulene tele patu kautakoa kakome tokome ipono-kiti takoa wetekakala toko wa tea agale akeneya. ²³Nitaneyake Yesuyo ali atoa one kakuta noe wa mootokoapa pedoa agale-mene okome okome Setanu pinali one tiko wa edoa takoa wetekamotoape. ²⁴Pitikali puutakutukoa meketepa nipa wili walai wa tadatapeoi. ²⁵Wa odene yapu pitiki-kiti ete oto wa poita toa winali yotoketepa kini eni yapu pa tumu tokaneya pimotoa wawa poi. ²⁶Edikoapa Setanu one yagono-mikiti-pala poi toa mekomepa nipa one tele tetoa tiji taje oa witikatapeneya tokome one yeneka ete toa atuma poi wa Yesuyo akeneya.

²⁷Nimo ootokoa kakome pedoa agale pade okome okome telekagome-kiti one yapu pikoya-kiti pa yopia mekalepa kode agome yapu bulukoa nome onekeya oyake moa pamele toamoko. Nitamele toamokoyake kode ago kotikatapeado nokomepa telekago poome lutua piilogo onekeya peya oyake kode moa poa.

²⁸Ali atoame padele padele poanele toa Akolali tea kawaka wa nanikodo ae, inapa poanele tekene tadeku wa wakolipa nipa Akolaliyo kini eni poanele tokoike po letu mekakanapa keetapea wawa kibu moamoo. ²⁹Wa panagome Epetane Yominilepa Setanule tetepo takakalepa Akolaliyo one eni poanele tokake po letu mekakanapa keamokome etene kibu moo. Dikane agome toka poanelepa pa pia kakale Akolaliyo kogakileka toamoo wa Yesuyo akeneya. ³⁰Enipa Parisi ali-kitame Yesu i agoke poane ipono awinome mekome toko wa okoli tokome ni akeneya.

Yesuno Nine Wamene-mikiti Oneke Nekenemo

(Matiu 12:46-50, Luke 8:19-21)

³¹Nimo oa kakaka Yesuno nine wamene-mikitika koli note kakete ekete Yesu oto noo wa akoe wa panago moa wetekaneya. ³²Nitikoli Yesu kakaya liti oboa meane ali atoame ekete nekāua neke wamene-mikitika koli a note kakete ne noo wa iki-koli okome ³³agauapa te-pe, anu wamene-mikitipa te-lawe-pe wa ootokoa kakome ³⁴one unukoa mekoina ali atoa enoa unukakome okome agaua-loe anu wamene-mikitipa ika i mekina. ³⁵Akolaliyo ta wa okole-kama litia tiki-kitipa agaua anu wamene laine-mikiti enina wa Yesuyo akeneya.

Nee Lene Pitikama Poko Agoke

Pedoa Akenemo

(Matiu 13:1-9, Luke 8:4-8)

4 Wa padepete Yesu Galili ue mine matanu pome olaukoa meaneya. Nitaneyake ali atoa lewi lewita pia obo-moa note-kala kakoli tokome ue dipike pogatekoa pome mepaneya. Nitoapa e yene ue matanuke ete keneya kamotoa onepa ue dipike mekome ²pademo

pademo oa metekilepa pedoa agale oa meaneya.

³Nitoa olaukoa mekome okome kipala i ukumo yakoe. Ipe pinagome-kiti ipe ludu nee lene pitikama pekeneya. ⁴Nitima pokale nee lene padekapa ka ludu paka tadoa pitaneya. Nitaneta ini-kiti pukaneya note pitoai toa napekala taneya. ⁵Ni nee lene padekapa kue pake pake tadoa pitaneya. Tokoo itono nateya deya pianeya tokome wete tumikala taneya. ⁶Wa naniko lou tigini kakale wete eni tototokoa tuaneya. Teke itono kekulu wetekameneya tokome loume ni yoa tukatapeneya. ⁷Ni nee lene padekapa tonipo pake tadoa pitaneya. Nitaneta tonipo eya nee lene-pala odeneka dekoa witakome tukatapeneya. ⁸Ni nee lene padekapa itono epetaneyake pitakome leau akatapea witakome kū tukala taneya. Kū tukilepa padekapa kū kapidi kakoa kakoa (30) tua ni padekapa kū ege odepeta kadukoa wa tuku melepu kakoa (60) tua ni padekapa kū ege takupeta kadukoa (100) tua tokala taneya. ⁹Kipala i ukumo yakou wa kale piyakoa kaki-kiti kime yakoati wane uku wa Yesuyo akeneya.

¹⁰Naniko Yesu one kidene mekata one mekoya liti oboa mekete yatekoina yene padeka-kitame one tuku kakoa (12) oyali-kiti-pala note eni pedoa okana agale pine pitia yakananeya. ¹¹Nitikoli yatekome okome Akolaliyo one ali atoa talo tokolepa papete kaukoa mema nekeneyake opi kiwi keleyo ooyamete-ku. Nitikuyake ete ali atoa-palapa nipa pedoane agale-kama oane meteku. ¹²Nipa Aisaiayo papete wia mekapi-ane toane taatekoane tuku. Eya wa wia mekapianeya.

I toaweane uku yenamepa kini leneme enekoile enoa moamoa kini kaleme yatekoimo yakoa moamoa toi. Akolalikedo tepe kolotini pekoo pioi

tokapa kini poanele tokoike po letu mekakanapa kea kibu moamoo tokake pa etepea pomotoa wawoo wa Aisaiayo wia mekapianeywa wa Yesuyo akeneya.

**Yesuyo Nee Leneke
Pedoa Akene Agale**

Pine Toawe Akenemo

(Matiu 13:18-23, Luke 8:11-15)

¹³ Yesuyo nimo ootokoa kakome okome ina pedoane okouna pine wene toamikino, ete idikoane pedoane oma pokou-kitipa edoa yakoa moadete-pe. ¹⁴ Ne lene pitikama yako ago adeka pikounapa Akolaline agale oa aua yako agoke okouna. ¹⁵ Nee lene padekapa ka ludu tadoa pitane adeka pikounapa eya tiki yeneke okouna. Pade-kitame Akolalinemo yakoa lukakili eina eina Setanu nome katekamao poko. ¹⁶ Nee lene padekapa kue pake pake tadoa pitane adeka pikounapa eya tiki-kitike okouna. Pade-kitame einagale yakoapa eina eina ke wa lukoa wedia meki. ¹⁷ Nitiketeke einagale kini tepene teke wetekameneya tokome Akolalinele pa tekei takaki. Wa naniko ele kuleme ke enekakale mea ni ete-kitame kipala poi teigoli mea tekete Akolalinele takoake wete tewitikoia wawei. ¹⁸ Padeka nee lene tonipo pake tadoa pitane adeka pikounapa eya tiki-kitike okouna. ¹⁹ Pade-kitame einagale yakoa moake kini kepene mama moa kini kamoya-kitike wene pitikakoa mea eya kuya moadiya wa tepi tokale mea tikili enika enileme Akolaline agale moa kautako. Nipa nee lene ku tuamou toa keneya pa meki. ²⁰ Padeka nee lene itono epetaneyake pitane adeka pikounapa eya tiki-kitike okouna. Pade-kitame einagale yakoapa inapa Akolaline peku wa noa tiki. Nitikipa ipe nee kakoya ku tuma pou toa padekapa

ku padeka kapidi kakoa (30) tua ni padekapa ku ege odepeta kadukoa (50) tua ni padekapa ku ege takupeta kadukoa (100) tua toko wa Yesuyo akeneya.

**Tole Uducatekoapa
Okolo Moa Kauamoi**

Wa Pedoa Akenemo

(Luke 8:16-18)

²¹ Panagome-kiti labo udukoapa okolo moane kaulogou wa yapu aua noko patu. Walai kene kekulu moane piou wa aua noko patu. E'e, edikakoya mena. Labo platekota-kama moa pikala toko. ²² Padele padele kaukoa toma yakolepa naniko keleyo witatekole toko. Padeya padeya paigakoa pikoya-kiti naniko keleyo pikale peyame enetapeoi. ²³ Kipala i ukumo yakou wa kale piyakoa kaki-kiti kime yakoati wane uku wa Yesuyo akeneya. ²⁴ Nimo ootokoa kakome okome kipala i oane metekulu yatekimopa wedoa yakoa moamene. Kime ete metekoi toa eni luku kotuke otoka mokala toi. Nipa ako pade-meneka oto mokala toi. ²⁵ Akolali one i peku wedoa nako agopa nipa Akolaliyo one peku-kama lawetema poo. Akolaline peku alekoa noa toko agopa nipa one eni lawetane peku nateya deyaka takoa pootapeoo wa Yesuyo akeneya.

**Ipe Nee Kakoya Witakoleke
Pedoa Akenemo**

²⁶ Yesuyo nimo ootokoa kakome pedoa agale pade okome okome ²⁷ Akolaliyo one ali atoa talo tokolepa i wane adeka plane uku. Panago ipe ludu one nee lene pitikama yakanata eni nee lene tumia witoa kako. Nipa ta lia patako toa-kama pinago pitikome kamotokome tomotoa toko. Tumia witakole pinago agopa tokolo mekoyake toko.

²⁸Pinagome nee lene matalogoa paya nou toa mekoyake kadene tumia atepa witama nome tidiyo wia k_u tua toko. Enilepa itonome-kama toko. ²⁹K_u tua nodokoa kibutua kakale eina eina pinagome wakoa mootapeoo. Nipa one wakoane momotoa toko wa epei moa nome wakoa mootapeoo wa Yesuyo akeneya.

**Kalipe Lene Deya
Witakoleke Akenemo**

(Matiu 13:31-32,34, Luke 13:18-19)

³⁰Yesuyo nimo ootokoa kakome okome Akolaliyo one ali atoa talo tokolepa edeya wane adeka piku patu. Edemo wane pedoane agale uku patu. ³¹Akolaliyo one ali atoa talo tikilepa kalipe lene deya itonoke witako toa toko. Eni lenepa etene nateya wane deya tokome eteya yomo leneme moa patukako. ³²Eni lene deya panagome moa itonoke pitikakolo tumikomema ate toa eteya yomo moa patukatapeko. Nipa yaita mati eni kakome yenene yeteka yukukata tubeya wetekako. Yenene etene tubeya wetekakolo tokome ini pukaneya note eni yomo todoke yene wiamele toko wa Yesuyo akeneya.

³³Yesuyo Akolaline agale i i wa e yene oa metekomema enika eni pedoa agale okala taneya. Nipa kini yakoa moatekoi kotuke oa mekala taneya. ³⁴Akolalinemo eni oa metekilepa agale pedoakama oa mekala taneya. Nitaneyake one oyali-kiti-palapa kini-mene mekete einaka eina pedoa agale peya pine ina ina wa toaweaka okala taneya.

**Yesuyo Pupulege
Tadalita Teitakanemo**

(Matiu 8:23-27, Luke 8:22-25)

³⁵Einapete lou wete pipaneka Yesuyo one oyali-kiti-pala okome okome eka ue mine matanuke witatono patono noe wa eina ue dipike lewia pome mekale

³⁶ali atoa matanuke eida koukoa memotoa wawa one oyali-kitika eina ue dipike peapetekoa pote mea Yesu-pala opia mea pekeneya. Mea pokoika ali atoa ue dipi pade-kitike mea opia pekeneya. ³⁷Mea poadete pokoika pupulege tadalita kotikatapea uu wa noka matiyame ue pewikanokome ue dipike patua pitoa atukademe taneya. ³⁸Atukademe tokaka Yesu ue dipi kuka lono nali yomo mokoa atu pia meaneya. Nitikale one oyali-kitame one kamotokakete ekete Ae, Tikisa ago toto ue nakoono, mama moameke atu pia meko-pe-koli ³⁹Yesu kamokakome pupulege kiko okome okome kapakoa kawia wa wa okale pupulege teigaloganeya. Ue mineka tooko lapa eyaka waametekoa kilikoa meeloganeya. ⁴⁰Nitikale one oyali-kiti-pala okome okome edekolo piti motiki-pe. Kipa nooke wene tugamekete pitipa motiki-pe wa okale ⁴¹piti tube mati motaneya tokome kini kini oote tekete ekete pupulege ue minetameka oneme okole-kamadopa i tokono, Yesupa edoa ali kakome tokoto patu wa ka oa kakeneya.

Yesuyo Ipono Ti Awikolokaneya

Meane Ago Epetekanemo

(Matiu 8:28-34, Luke 8:26-39)

5 Yesu one oya-lawe-pala ue dipike eni mea pote Galili ue mine eka matanuke Gerasa yatenane take witapaneya. ²Witapekome ue dipike mea matanuke katepitoa pome ka ludu yakaka poane ipono awitane ago pade one kotua nekeneya. Einagopa tuane ali atoa oloyo toai taneka kawa nekeneya. ³Einago tuane yene oloyo toai taneka yakene agopa padameka dekoa moa kawikamele toameneya. Kapa poomeka lutua kawikamele toameneya. ⁴Kawikoa enekolika

kapa tepo mekakakoi kugutukoa tadekatapea pitoa pome ni kapa poo kakakoi kekolokoa pitoa pokala taneya.⁵ Likonu loyoka eni ta luduka tononono wanekeka yakome k̄a oa tiginipala aloame koboa taneya.

⁶Nitima yawa kawapa padepete padeka mati kakome enekale Yesu nome kakale enekome one kakata teyapea nome wadini tukupia mekome⁷ k̄a telo okome okome ako odene meko Akolaline mana Yesu nepa edade noka-pe. Akolaliyo yakakoane ukuno, no tete meamoano wa-ye wa kowitaneya.⁸ Nimo wa kowitikomepa Yesuyo poane ipono ne winago takoa pa wa okale tokome ni akeneya.⁹ Nimo okale yatekome okome neke ibini te-pe wa okale okome i agoke toto peya mati awinote mekoya tokome ibinipa ipono ti wa ootokoa¹⁰ kowitikome okome toto i ta wawa padeka poe wa moa wetekamea wa kowitoa kakeneya.¹¹ Nipete einakeya liti tononono kebonoke kai peya mati kimi ke noa kakeneya.¹² Nitikoli tokome ipono-kitame Yesu kowitikete ekete toto kunuka kunu kai-kitike awiponono, moa wetekoa ta wa kowitaneya.¹³ Nipa poe wa Yesuyo okale takoa pootapekete e kai-kitike awipaneya. Nitikoli einaka eina kai tononono payaneke kawa palake ketipea kikilikoa pote atukolokapaneya. Nipa ege egeta kadukoa (2,000) tadiya kai ue nakoa tukolokapaneya.

¹⁴Nitikoile enekete kai egetane yene toomoa pote ali atoa ta latia pitikoikaka tayo yapu luduka eni tanemo oa pupitikama pekeneya. Nitikoli yatekete edele taneyake ikiti patu wa enadete nekeneya.¹⁵ Yesu kakata eni note enekoli ipono ti awitaneya yakanakago wene kiyo akaneya mea pue wa moa kakeneya meadeka. Nitaneya mekale enekete ekee wa piti tokale kakoli¹⁶ eida kakete enile tokale

enekoi yename ete dika dika wa ipono awitaneya meane ago-pala tanemo oa ni kai-kiti-pala tanemoka i i wa toawe akeneya.¹⁷ Nitaneyake e yename i take meameneya, wete pade take poano pa wa Yesu kowitaneya.¹⁸ Nitikoli eni ta tewitukoa ue dipike peapetekoa poademe kakaka ipono awitaneya yakanakagome okome nepala odenekata yatono pato wa Yesu kowitikale okome¹⁹ nitamatono, neke take ali atoa mekika poke mepamene. Nipa no Ali Munoyo ne ela motekene epetekakoumo neke ali atoa toawe oma poano pa wa akeneya.²⁰ Nitaneyake Dekapolise ta ludu yakome Yesuyo one epetekakanakamo i i wa toawe oma yakale yatekete peyame ekee wa wene kainya pianeya kakete k̄a oa kakeneya.

Yesuyo Dairasine Konakoma Kamotokoa

Mamina Nami Mitikane Atoa Epetekanemo

(Matiu 9:18-26, Luke 8:40-56)

²¹ Yesu ue dipike wa peapetekoa pome mea eka matanuke wakapea pekeneya. Wakapea pome katepitoa kakale ali atoa peya mati one mekata koukoa note kakeneya.²² Nitoo kakoika losu yapu talo tane ago pade Dairasi wa ibini akene ago nome Yesu enekome one kawane witiipitoa kowitikome okome²³ anu konakoma pene tuademe toko. One latoa yamotono, tuoukome pikota ne noke yono pia epetekakoano ta-kale okome²⁴ nitouno patoe wa einago-pala opia pekeneya. Opia poademe pokaka ali atoa lewi lewita pia note apua takama nekeneya.

²⁵⁻²⁶ Eni ali atoa pakeke eya atoa mali tuku kakoa (12) ponoka toa kamate yokoa kakome yeneme tuaneya meane atoa litima nekeneya. Einatoa papete

dokosa ali-kiti mekoika epetekamotoa pokala taneyake kee-kama enekakale meaneya. Latekamotoa pokala taneyake epetekamele toamokale one kue peya takoa wetekaneyake pa ete toa yene tube toma pekeneya. ²⁷Nitane atoame Yesu toma yakenemo kugu yakaneya tokome einali atoa pake pake Yesuno mukiti lono lekama nome one tokoo kakene mamina nami mitikananeya. ²⁸Nipa i agono kakene mamina namido mitikak- enepa latoane pou wa wene pikome taneya. ²⁹Nitoo nome mitikakale eina eina one kamate pegetoa yotokana toa yoameneya kakome eina teigome tadeko wa wene taneya. ³⁰Nitikale Yesuyo one tele padeke weamutukome tadekono wene tokome eina eina kutu peke- tapekome ali atoane kabeta pake pitikoa okome okome noanu teyo mitikakato- pe-kale ³¹one oya-laweme ekete ali atoa apua takoa ne unukamoa mi- tikakoa tikino, edekolo oko-pe wa okoli ³²one mitikanane tuku toa enademe enapemu taneya. ³³Nitikale einaka- toa one epetekakana wene tokome pitime kolu kolu nokale Yesu kakata nokome kawane witipitakome one-pala tokanakamo toaweaa akeneya. ³⁴En- imo okale Yesuyo okome anu kono nooke wini wene tugake tokoleme ne latekakolo uku. Neke tepe kolotini ki- likoa pimotono pa. Neke tane yene teiganeya poano pa wa Yesuyo akeneya. ³⁵Nimo oa kakaka tobou agono yapu pitikoi yene pade-mene nekete ekete neke konopa tukome tukano, mone i Tikisa ago polipo takakoa kawamea wa onaneya. ³⁶Nimo omotoake Yesuyo losu yapu talo tane ago-pala okome okome no i agome neke kono oyake latekamele toko wa piti toameneya meamene wa oomotokome ³⁷Pita Yameta Yamene wamene ago Yone toa koua pomepa ete yene noameo wa kini-mene pekeneya. ³⁸Losu yapu talo tane agono yapu eni

koua pokome enekale ali atoa ete palo oto palo toa kakete komo kata pitikoa kakoli enoa yakaneya. ³⁹Nititikoa yapu tuapea pokome okome dekolo kale kene natekoa komo ka pitikoa kaki-pe. I akoma tukome tuaneyaa menano, pa atu pia meko wa akeneya. ⁴⁰Nimo okale yatekete e ali atoame one yau takakoli kiwi peya akolono poe wa wia liti- tapeneya. Nititikoa etene ninetaka one koua nokana ali-meneka patono noe wa einakoma yene taneya plane yapu luku pekeneya. ⁴¹Nitoo pokome akoma-pala okome okome Talisa kumi. Enipa tone agalekepa i akoma deya yakoa wete kamoaa wane uku wa okome akeneya. ⁴²Nimo oka oka kamokoa yakeneya. Mali tuku kakoa (12) penane akomapa Yesuyo eni kamotokaneya. Yesuyo enile tokale enekete one-pala kakene yename ekee wa ka oa kakeneya. ⁴³Nitikoli okome anume tukumo ali atoa enekete natemoka toaweaa wameamene. I akoma nee moa lawetoe wa Yesuyo akeneya.

Nasarese Yename Yesu Akoa Wakenemo

(*Matiu 13:53-58, Luke 4:16-30*)

6 Yesuyo einakoma latekamotokome one pine take wakapea pome mepaneya. Koua pato wa one oyali-kitika pote mepaneya. ²Eidapa ko mea pupu toamene-pete Yesu losu yapu pome Akolalinemo olaukoa kakeneya. One eni olaukoa kakome okamo yatekoi-kiti peya matiyame ka oa kakete ekete i agopa teyo olaukaneya-pe. Edane peku nootokoa okoto patu. Namolo enamokoonakale padele padele telekole i agome i toko. ³Beita, i agopa pa kodou ago. One nine Maria i mea one wamene-mikiti Yame Yosi Yudase Saimone einago-mene i mea tiki. One laine-mikitika tone i take meki wa one-pala wene pokete paya tetepo takoa wakeneya. ⁴Nitikoli okome Akolaline

agale toaweaa akakagopa ete yename kei pimotoake one ta pine yenameka one kako yenameka one yapu pitiki yenameka paya tetepo takoa wakala tiki wa Yesuyo akeneya. ⁵Nitaneyake eni take mekome padele tubele tamele toameneya. Nilepa tamele toameneyake yene tane ali atoa yono pia latekakilepa pa natetekoa latekaneya. ⁶One take yene oneke wene tugameneya mekoileke Yesu wene kainya pianeya meaneya.

Yesuyo One Oyali-kiti Ta Padeka Padeka

Moa Wetekanemo

(Matiu 10:5-15, Luke 9:1-6)

Yesuyo one eni ta tewitikoaa pome ali atoa pitikoika yakome Akolalinemo olaukama yakeneya. ⁷Nitoapa one oyali-kiti tuku kakoa (12) one kakuta koukoa noe wa kayo oa mootokoapa einapete titimoa takuta takuta wa moa padeka padeka wetekakome eya wa akeneya. Noanu tele patu kautakoa kama yakete ali atoake awitane poane ipono takoa wetekakala tamene. ⁸Nitima yaketepa palawe wane aua poamoa ka ua poamoa kue lene ua poamoa pa poatino poe. ⁹Enika eniya aua poameketeke iti toua moa kawa yene mekoa tamene. Tigini kawatiki mamina takuta aua poamoa odene kawatoa pamene. ¹⁰Nitoo pima yawa pade take pote meketepa yapu yapu yawameneya odene yapu-kama mea kawa pokala tamene. ¹¹Wa pade yapu pitikoi ali atoame kini yapu noatino noe wa makutukoa moamoa kini agaleka yakoa moamoa tokolipa kini eni yapu tewitikoaa pekete kini kawake kakene kege kōketikoa pamene. Akolaliyo kiwi kibu moateko adeka pia nitamene wa Yesuyo akeneya. ¹²Nimo okale e ali-kiti pote ali atoa kini namolole tewitikoaa wawe wa mo wima pakeneya.

¹³Nitima pekete ali atoake awitane ipono takoa wetekoa eya kuya yene tane ali atoa kainya matike peto pekoo latekoa taneya.

Ali Atoa Ue Motokama Yakene Yone

Kabe Teiganemo

(Matiu 14:1-12, Luke 9:7-9)

¹⁴Yesuyo toma yakenemo ali atoame otoa otoa tokoimo kugu Erodeyoka yakaneya. Pade-kitame ekete ali atoa ue motokama yakanakago Yone tuaneyake wa kamaa nomepa nipa tubele mati toateko tele eni luaneya yakome toko wa oa ¹⁵wa pade-kitame ekete e'e, mena. I agopa Ilaida wa oa wa pade-kitame ekete i agopa Akolaline agale papete toaweaa akane ago tetepo takoa meko wa oa taneya.

¹⁶Yesuyo toma yakenemo kugu eni yatekome Erodeyo okome ekee, ali atoa ue motokama yakanakago Yonepa kabe teigoa tukamotoane tokounake wa kamaa nokome toko wa akeneya. ¹⁷Namoloo Erodeyopa one poyo ali-kitame Yone dekoa moa kapa po kakoa po yapu pitikamotoa tikilepa eya atoa Erodiasine wene epetekademe taneya. Nipa Yoneyo eya tokale tokome taneya. Erodeyo one kale atoa wamenago Pilipi natono Erodiasi one motaneyake ¹⁸Yoneyo Erode mekata nokala tokome okome neke kale atoa kode motekepa toto Yu yenane kekanele wini toka wa lugutukoa kikoaa okala taneya. ¹⁹Nitikaloo Erodiasi einatoa Yone-pala timini nakale mekome wia tukamotadiya wa wene pikake enapete pade nitamele toameneya. ²⁰Nipa Erodeyo Yone wia tukamene piti tokale mekome mama moa yopikaloo tokome nitamele toameneya. Erodeyopa Yone einago epetanele-kama toa wene kiyo akeneya mea toko ago wa wene taneya. Eni wene tokome mama moa yopikome

one agalepa yakada wa one mekuta ne noo wa motokome yakoai taneya. Nitoa yatekome wene kainya mati pianeya meake wedia yakakoa meaneya.

²¹Nitaneyake Erodiasiyō Yone wia tukatekale pa nepikoa meaneya. Nittoa mekakoa Erodeyopa one opiane oi ponokale eya taneya. Oneke timini kakoa yakene yeneka one tobou poyo ali-kitika Galili take ibini akene alikitika kini toge kikakakuno toge nee natono noe wa agale oa wetekakale nekeneya. ²²Kini note koukoa mekoita Erodiasine kono nome tiabu toa kakale Erodeyoka one togeke nekene yanameka ke wa wedia meaneya. ²³Erodeyo ke wa wedikome okome agetai tja, anukuyakiti pade memotono wenedo pikepa nipa iya mano wa oano ta. Anume yopiku ta kounale oto pia yamea wa okaleka oto plane yameou wa Erodeyo okale ²⁴akolono nine kakata pokome okome aua edeya mano wane ou-pe wa yatekale niname okome poke imo akapa. Ali atoa ue motokama yakanakago Yone kabe teigoa one wago wane okolo kagonoke pia oto memotoa toano ta wa akoano pa wa niname oa wetekaneya. ²⁵Nimo okale teyapea Erode mekata pokome okome ali atoa ue motokama yakanakago Yone kabe teigoa wago wane moa okolo kagonoke pia oto memotoa toano ta wa akaneya. ²⁶Nimo okale yatekome Erode elapa tube mati toa kakeneya. Nitikomeke one namolona etene tja wa okana agale tetekakomepa one-pala opia mekete toge nee nakoi yanane wene potokamedekale eya taneya. ²⁷One poyo ago pade moa wetekakome okome Yone kabe teigoa wago wane aua notokoano pa wa moa wetekaneya. ²⁸Nitikale pome Yone po yapu pitikata kabe teigoa one wago wane okolo kagonoke pia aua nome eina tuatoa metekaneya. Nitikale moa ninane aua potokaneya. ²⁹Nitaneyake Yonene totono yakoa one opia

yakene yename Yone kabe teiganeya wa okoimo yatekete Yonene tigni monote aua pote kota keneke pipaneya.

Ege Egeta Kadukoa (5,000) Ali Atoa

Nee Lawetanemo

(*Matiu 14:13-21, Luke 9:10-17, Yone 6:1-14*)

³⁰Yesuno oyali-kiti Yesu kakata oto wa wakapea note kini padele padele toma pokoinakamoka agale olaukama pokoinakamoka i i wa oa mekala taneya. ³¹Nitikoli okome opi kini pupu ko meatino, ali piamene take patono noe wa akeneya. Nipa kini mekoita ali atoa nekete pekete toa kakoli kini nee toa noatekoile toamokale tokome ni akeneya. ³²Nitoapa ue dipike peapetekoa pote ali piamene take mea pote witapeneya.

³³Nittoa pokoli ali atoa kainya matiyame enekete ekete kunu pikipa Yesu one oya-mikiti-pala poko-la wa kini kini tubeya take pitikoika kawa one pome witatekata ka ludu pote teigoa kapaneya. ³⁴Teigoa kakakoa Yesu ue dipi mea nome katepittoa kakome enekale einali atoa eida oboa kakedekoi. Einali atoa enekome okome i ali atoa talo tokago kawamokono, egetamene sipi sipi kai keneya meki wa ela motokome pademo pademo oa olaukoa kakeneya. ³⁵Ta pene lima lima tokaka one kakata one oya-mikiti nekete ekete ipa ali piamene taano, ³⁶ta-pala lima nokono, ali atoa ta latia pitikika tayo yapu luduka i yene kini noatiki nee topo toa mopamene wa oa wetekoa ta-koli okome ³⁷kini noatiki neepa kime motokoa lawetamene-kale ekete neme edemo wa oko-pe. Ege kadukaka kapidi kakoa-peta kadukoa (1,000) kina kueme kini nee motokapote oto wa lawetemotoa oko-pe wa akeneya. ³⁸Nimo okoli okome kini

palawe wane edela piko patuno, enepoe wa okale pote enoa wakapea nekete ekete palawe ko kakoa-pala (5) de mou yomo deya takuta toa piko-koli okome³⁹⁻⁴⁰ i ali atoa kiwi peya poma ludu tutu tutu wa payapono pia kilikoa meetapeo wa okale padeka-kiti ege odepeta kadukoa (50) padeya payapono pia mekala toa wa padeka-kiti ege takupeta kadukoa (100) padeya payapono pia mekala taneya.⁴¹ Nitikoli Yesuyo palawe wane ko kakoa (5)-pala de mou yomo takuta toa moa pikoa kakome ate tibuke nepikakome ke wa Akolali-pala ootokoa popimotokome one oya-mikiti metekome okome tatikapoatino poe wa mekala taneya. Wa eina toa de mou yomo takuta popimotokome mekala tokale moomotekete tatika tatika topokoli⁴² peyame moa noa tagatapea kitipu meaneya.⁴³ Nootokaneyake palawe mou kugu paka pitaneya wekotoa moa ua ka katika tuku kakoa (12) mako puputua moa pianeya.⁴⁴ Eni palawe nakoina-kiti ali-kama takoa oi motikilepa ege egeta kadukoa (5,000) nakedekoi.

Yesu Ue Tali Ludu Yakenemo

(Matiu 14:22-33, Yone 6:15-21)

⁴⁵ Yesuyo e yene lawetetekoa kakome one oya-mikiti-pala okome okome ue dipike peapetekoa pote eka matanuke Besaida take kiwi namolo takoa mepoatino poe. I ali atoa kini kini pitikika pipoatino poe wane wetekamotekene nouno, patepoe wa one oyali-kiti wetekaneya.⁴⁶ E oboa kakoi yene pipoatino poe wa wetekatekoapa Akolali kowitademe tonu tobouke lewia pome mepaneya.⁴⁷ Ta likaka Yesuno oyali-kiti ue dipike mea muke pekete kakoli Yesu

matanuke kidene kakeneya.⁴⁸ Nitoa kakome enekale pupulegeme ue dipi kiwi nokoina lono kutu wa popokoa aua poademe tokoa kakale enaneya. Pa nitikoa kakale ta patademe t̄uei teigaka Yesu ue tali ludu kautoa nekeneya.⁴⁹ Nitoa nome patukademe ponokale eneketepa ipono nokono wene pikete ka oa kakeneya.⁵⁰ Nipa peyame one nokale enekete tekete piti mati motekete akeneya. Nitoa ka oa kakoika okome no i nukuno, tepe kolotini kilikoa pimotono piti moameo wa ootokoa⁵¹ ue dipike pome kipala opia meaneya. Pome mekale pupulege t̄eitatapeka. Nitikale enekete one oya-mikitame ekee wa wene kainya pianeya meaneya.⁵² Nipa Yesuyo palawe wane moa tokanakale enoake ile tokanakago wa wene toamekete taneya.

Genesarese Take Yene Pitikoi-kiti

Yesuyo Epetekanemo

(Matiu 14:34-36)

⁵³ Ue mine eka matanuke witapote Genesarese take katepitua kakete ue dipike po kakoa yomoke kebeteloganeya.⁵⁴⁻⁵⁵ Nitaneyake eni take yename enakago eni noko wa eni ta ludu yekeika yukukata teyapea oawineya pekete kini yene taneya pikoi-kiti leyo leyo toa one meko wa okoita-kama aua nokala taneya.⁵⁶ Nipa Yesu ali atoa pitikoika de takeka tube takeka tayo yapu luduka yakaka kini yene tane ali atoa makesike-kama piponokala taneya. Nitikete ekete i yene tane-kitame neke mamina nami mitikatekamotono ta wa kowitakala taneya. Nitikoli one mitikatekakoi peya latoa pokala taneya.

Yu Yenane Kauga-mikitame Kekaneya

Latikama Nekenemo

(Matu 15:1-9)

7 Padepete Parisi ali-kitika Mosesene totono pine toa olaukane ali-kitika Yerusaleme ta kawa note Yesu kakata oboa kananeya. ²Oboa kakete enekoli Yesuno oya-lawe padeka-kiti kini yono abe koameneya mekete nee nakedekoi. Nipa kini kekanele eni tadekoi. ³Parisi yenameka ete Yu yene peyameka kini kauga-mikitame toma nekenele tekete kini yono abe koatokoa nee moa naki. Pa moa nakiya mena. ⁴Nipa makesi kawa yapu note nee moa noadetepa ki-wike kewenoko poanele eni koguna wa yono abe namolo takoa kogala tiki. Kini kapoka nee yoatiki meteka kapame latiane okoloka abe koa enile tokala tiki. Kini kekanele takaya kekatekoa nitikala tiki.

⁵Nitikiya tokome Parisi ali-kitameka Mosesene totono pine toa olaukane ali-kitameka Yesu yatekete ekete neke oyali-kiti kini yono abe koameneya nee pa moa nakipa tone kauga-mikitame kekanele latikanele tekete tikino, edekolo tikiti-pe-koli okome ⁶wene takuta pianeya meki yene kini eni toatekoilekapa Aisaiayo papete eya wa wia mekapianeya.

I toaweane uku ali-kiti kini kabunume no kei pikilepa kini tepene paya wene pianeya meketeke tiki. ⁷Nitikino, kini kowitikoimopa edoane yakamotoa-pe. Kini kauga-mikitame titia olaukanele ile tamene ile tamene wa olaukama pikino, yakamou-li wa Akolaliyo wene takane toa Aisaiayo papete wia mekapianeya.

⁸Ae, Akolaliyo tamene wa akenemo ete pimotoa wakete kini kauga-mikitame titia olaukanele litia tiki. ⁹Nipa kini kauga-mikitame titia tanele litia

toadetepa Akolaliyo tamene wa akenele wakete onekele pa lede takama yaki. ¹⁰Moseseyo papete eya wa akeneya. *Neketai nekquata kei pia mape moamene. Panagome nitameneya etene nineta akoga tekalepa einago moa wia tukamene wa Moseseyo akeneya.* Nimo wapa akeneyake kime eya wa iki. ¹¹Panagome-kiti one etene nineta-pala okome okome ae, agetai agauata kita ada atue deyata mekiyake kita auapeane padeya meatekuyapa kobane latikakouya tekene meamele toamoko. (Kobane latikaku wa tone agaleke eketepa nipa Akolaline pikaku wa ekete oko.) ¹²Einagome nimo ootokoake naniko einakeya etene nineta meou wa meademe tokale kime ekete kobane latikakanano, meamea wa iki. ¹³Nipa Akolaline agale ete pimotoa wawa kini kauga-mikitame toma nekenele litikete ile tamene ile tamene wa olaukoa enile pale tokala tiki wa Yesuyo akeneya.

Ali Atoa Wene Moa Koiganeleke Akenemo

(Matu 15:10-20)

¹⁴Yesuyo eida oboa kakoi yene one kakuta noe wa kayo oa motokome okome kipala i ukumo wedoa yakoa moamene. ¹⁵Kimane keneke aka ketipea moa nokotikako neemepa pinali one wene oyake moa koigamele toamoko. Nitamele toamokoyake pinali one tepene meaneya poane wene atepea kabunuke witako agalemepa pinali one wa moa koigamele toko. ¹⁶(Yakou wa kale piyakoa meki-kiti kime yakoati wane uku wa Yesuyo akeneya.)

¹⁷Nimo oomotokome yapu pome mepokale one oyali-kiti nekete ekete neke ina pedoa okana agalepa pine edoa pikoto-pe wa yakanokoli okome ¹⁸ae, ete ali atoame wene toamikino, opika kime wene toamekete iki-pe. Panago one kimane keneke aka ketipea noa

nokotikako neemepa pinali one wene oyake moa koigamele toamoko. ¹⁹Nee eya moa nakolopa einagono kimane keneke pome tepene ponome me me toa wa te pu latia patukatapekala toko. Nitikome tokono, one weneke patukoa koigamele toamoko wa Yesuyo akeneya. (Nipa eya kuya nee peya Akolaliyo ali atoame nomotoa-kama latia pikaneyano, odeneyaka kekaneya latikakile toameamene wa okome akeneya.) ²⁰Nimo ootokoa kakome okome e ku poane wene tepene meaneya yawa kabunu witakolemepa pinali one wene moa koigakoya. ²¹Nipa tepene meaneya yawa witako toa tokome pamoko mea ni panagoneya kode moa ni ali wia tukoa ni mone padane atoa lia ²²ni eya kuya tepi moa ni ele kule koianele toa ni ali atoa oa yotokoa ni abeyale toa ni mone panagoneya poi moa ni ete ali atoa-pala akoa agale oa ni ete yene paya tetepo takoa ni ele kule pale toa ²³enika enilepa aline tepene meaneya yawa witako toa pine yene kiwi moa koigamele toko wa Yesuyo akeneya.

**Yesuke Wene Tugoa
Meane Atoame Tanemo**

(Matiu 15:21-28)

²⁴Yesuyo enimo oomotokome Taia ta liti plane take pekeneya. Nitoapa panagono yapu eida pone paigakoane meouno wene pianeyake oyake nitamele toameneya. ²⁵Yapu pome mekaka eina eina atoa padame Yesu nome meko wa okoimo yakoa nome one kawane witipitaneya. One konakoma deyake ipono awitaneya tokale ni nekeneya. ²⁶Einatoapa Geriki yatene atoa Sairopnisia take opianeya. Nitane atoame Yesu kowitikome okome anu konoke awitaneya ipono neme takoa wetekakoa takale ²⁷Yesuyo pedoa agale ete okome okome nee eya nako-pete-kama mati-kiti

namolo takoa nee lawetamedeko. Matikitane nee tatia wa padeya tue tine-kiti kakoita pitikakopa nipa poko wa Yesuyo akeneya. ²⁸Nimo okaleka wa ete eina-toame agale topo takakome okome winimopa nimini okoyake mati-kitame moa noa kugu pikapa nee naki walai keneke tue tine-kiti kakoita pitakale tue tine namele toko wa okale okome ²⁹neke wini okomoke eya wane uku. Neke konakomake awitaneya ipono wete takoa pokome tokano, pa wa wetekaneya. ³⁰Nitikale one wakapea pokome enekale one akoma walai waneke kilikoa kawia pikale enaneya. Oneke awitaneya ipono takoa pekedeka.

Yesuyo Kale Kene Keteaneya Agale

**Amele Toameneya Meane
Ago Epetekanemo**

³¹Yesu Taia ta tewitikoa Galili ue mine wakapea poademe pokomepa Saidone Dekapolisi tata patukoa pekeneya. ³²Nitaneyake pade ali-kitame kale kene ketea agale liyo liyo pitane ago Yesu kakata aua nekete ekete i ago yono pia epetekakoano ta wa kowitinokoli ³³einago moa ali atoa kakoita wawa one kidene eko aua pekeneya. Nitikome einagono kale kene yono pitikoa tekeliyu tootokoa einagono keke mitikakatekaneya. ³⁴Nitoapa tibu ate enekakome kenemada ootapekome okome Epasa wa akeneya. Epasa wapa wete peetapea wa okome akeneya. ³⁵Yesuyo Epasa wa okale eina eina einagono kale kene peetapea keke epeteko tokome one agale yapeteko witoa akeneya. ³⁶Nitikale Yesuyo e yene-pala okome ete ali atoa kotukete anume i tukumo toawe ikileka toameamene wa akeneya. Toawe ikileka toameamene wa okala taneyake one eni tanemo oa pupitikama yakeneya. ³⁷Nipa wene

kainya mati pianeya kakete ekete i agome ele kule tikilepa epetanele-kama toko. Kale kene keteaneya meane-kiti epetekakolo agale yakoa ni agale amele toameneya meane-kiti epetekakolo agale oa tiki wa ka oa kakeneya.

Ege Egeta Kadukoa (4,000) Ali Atoa

Nee Lawetanemo

(*Matiu 15:32-39*)

8 Enipete-mene ali atoa peya mati Yesu kakata wa obomoa note kananeya. Kini nee noatekoiya toamokale enekome Yesuyo one oyali-kiti one kakuta noe wa kayo oa motokome okome ²i oboa kaki ali atoa mama moane ela motekene uku. Ta tebolo pataka toa no-pala opia yakete kini noatiki nee peya takatekoa pa kaki. ³Padeka-kiti ta tetemada pia note kaki. Nee noameneya kini kini yapu tadoa poatino poe wanedo wetekakolupa yapu poadete pokoika pake kobume tukete witipitoino wetekamele toamoko-kale ⁴one oyali-kitame ete Yesu-pala agale topo takoa yatekete ekete ipa ali piamene taano, kini noatiki nee edoa motokoa lawetemotoa-pe wa okoli okome ⁵ni kini palawe wane-kiti edela piko-pe-kale ekete tatono kakoa (7) odene piko wa okoli ⁶i poma ludu meetapeo wa e ali atoa mekatapeneya. Nititikoapa tatono kakoa (7) palawe wane moa pikoa kakome Akolali-pala ke wa ootokoa popimotokome one oyali-kiti metekome okome i ali atoa tatikapoe wa mekala taneya. Nitikale mootokoa e ali atoa mekoi toa nee pikama yakeneya. ⁷De mou-meneka moa eina toa Akolali ke wa ootokoa popimotokome metekome okome i mouka tatikapoe wa okale ⁸pikama yakoli noa tagatapea kitipu meaneya. Nitaneyake nee kugu pika wekotoa moa ka katika tatono kakoa (7)

mako puputumoa pianeya. ⁹Eni nee nakene-kiti oi motokolipa ege egeta kadukoa (4,000) tadiya nakedekoi.

¹⁰Eni ali atoa kini kini yapu yapu tadoa poatino poe wa wetekatekoa one oyali-kiti-pala ue dipike wete eni peapetekoa pome mea Dalamanusu take witoa pekeneya.

Tibuke Padele Tubele

Witakamotono Ta Wa

Parisi Yename Yesu Likoa Enanemo

(*Matiu 16:1-4*)

¹¹Einapete Parisi yene padeka-kiti Yesu kakata note one-pala agale ete oto topo takoa oa kakete ekete neke toma yakole Akolaline tele patu kautakoa kake tadekalepa nipa a tibuke padele telekole witakamotono ta wa likoa enaneya. ¹²Nitikoli tepe we tokale kakome okome ae, ipete meki yene kimepa no neke tokolepa Akolaline tele patu kautakoa kake tadekalepa nipa padele tubele yamea ta wa ikipa edekolo likoa eneki-pe. Enile pade yameamou wa oomotokome ¹³e yene tewitikoia pome ue dipike wa peapetekoa pome mea eka matanuke witoa pekeneya.

Parisi Yene Erode Kini

Yisi Kugu Kiwike

Weamutukaya Kekatekoa

Yamene Wa Akenemo

(*Matiu 16:5-12*)

¹⁴Yesu eni mea pokaka one oyali-kitame palawe wane-kitipa wene kayapea ua noameneya tuku toa kakoli odene wane piadeka. ¹⁵Nitadekale Yesuyo one oya-lawe pubu okome okome Parisi ali-kitika Erode einagoka kini yisi kugu kiwike weamuono, wedoa yamene wa okale ¹⁶kini kini yakate tekete ekete tone noateko palawe wane-kiti wene kayapea ua

noamokoonake ni okome oko wa akeneya. ¹⁷Nitikoli kini tepene plane wene tetoa enekome okome kini palawe wane ua noamokoinakepa edekolo oa kaki-pe. Anume tokoule enetekoake wene toamekete iki-pe. Kini kolotini lupi tootokaneya meki-pe. ¹⁸Kini lene kamotoake anu tokoule enoa moamokoi-pe. Kini kale kene kamotoake anu okoumo yakoa moamokoi-pe. Nipa anume tokolu kime enekoinakale wene kayapetapea mekete iki-pe. Nipa eya tokouna. ¹⁹Palawe wane ko (5) kakoane moane ali atoa ege egeta kadukoane (5,000) lawetekolu nootokaneyake kugu pika wekotoa moapa ka katika edela mako puputumoa pikoi-pe-kale ekete ka katika tuku (12) kakoa mako puputua pikoo-koli okome ²⁰ni pade-petenaka palawe wane tatono (7) kakoane moane lawetekolu ege egeta kadukoa (4,000) ali atoame nootokaneyake kugu pika wekotoa moapa ka katika edela mako puputumoa pikoi-pe-kale ekete ka katika tatono (7) kakoa mako puputua pikoo-koli okome ²¹eina tokoule enetekoake wene toamekete iki-pe. Eina tokouna toane wa tamele tokolo mekene tukutummo wa Yesuyo akeneya.

Besaida Take Leneta Lianeya

Meane Ago Epetekanemo

²²Yesuyo Besaida take pato wa one oyali-kiti-pala pome mepaneya. Nitikale pade yename leneta lianeya meane ago oneke aua note kowitikakete ekete i agopa yoname mitikatekoano ta-koli ²³Yesuyo pata wa einago yono moomotokome eni ta kago ketepono patukoa akolono pekeneya. Nitoapa one leneta tekeliyu takatekoa yono pikome okome padeya eneko-pe-kale ²⁴ate enekakome okome ali-kiti enekilepa tukuyake yomo-kiti yakene

tetepo toko wa akeneya. ²⁵Nimo okale einagono lene yono wa pikale wedoa nepikoa pikale one leneta epetekatapekale padeya padeya peya keleyo pikolokakale enaneya. ²⁶Nitikale Yesuyo okome winika wini ali atoa pitikika poameneya neke yapu patukake poano pa wa oa wetekaneya.

Yesu Nepa Keraisu Wa Pitayo Akenemo

(Matiu 16:13-20, Luke 9:18-21)

²⁷Sisaria Pilipai take pato wa Yesu one oya-lawe-pala eni take ali atoa pitikoika poademe pokome okome ali atoame no te kakulu okala tikiti-pe wa yatekale ekete ²⁸ali atoa padeka-kitame ne i agopa ue motokama yakanakago Yone wa oa ni pade-kitame ekete ne i agopa Ilaida wa oa ni pade-kitame ekete ne i agopa Akolaline agale toaweaa akako ago pade wa oa tiki-koli okome ²⁹nimo wapa akedikiyake anu oya-lawe kime no te kaku wa iki-pe-kale Pitayo ete topo takakome okome nepa Keraisu wa papete takoa kakapiane ago wa okale okome ³⁰no Yesupa Keraisu taatekoane nekedeku wa ali atoa kotukete etene toaweaa ikileka toameamene wa oa tukaneya.

Yesuyo One Tete Moa Tuatekamoke Akenemo

(Matiu 16:21-28, Luke 9:22-27)

³¹Nitoapa Yesuyo one tuatekamo i i wa enipete titimoa toaweaa okome okome no Ali Yatenane Oyagome tete-kala moane kawou. Nipa Kanosolo alikiti ni Akolalike lodo yotokoai tiki to-bou ali-kiti ni Mosesene totono pine to-olaukaki ali-kiti enika eni ali-kitame no kote tokale wawa wia tukoi. Nitikolika ta tebolo takoa pataka-pete kamoane pou wa Yesuyo akeneya. Nipa keleyo toaweaa akeneya. ³²Nimo okale Pitayo pata wa Yesu-pala eko keneya aua pome

kakome kiko a okale ³³Yesu kutu peketapekome o yene enekome okome i ago Setanu ne anu mukiti lono kuka ponoke kaponu, winipa Akolaline wene piko toa wamoa, pa aline wene piko toa okono, wa wa kiko akeneya. ³⁴Nimo ootokoa kakome one oya-lawe e oboa kakene yene peya one kakuta noe wa kayo oa motokome okome no i ago litima nou wa wene pikagopa nekele tewitikoa wamene. Nipa ne wia dekatiki yomopala aua nou toa keneya tete mokoa kakeka no litima namene. ³⁵Kepene mama motokome tukaya wa piti motoko agopa etepea tua atua poo. One kepepe mama moamokome Akolaline epetane agale-pala no i agotake oyake tuou wa wene pikagopa toa motaneya mea kama poo. ³⁶Panagome-kiti one yomini atukome atumotoake itonoke pia kawa tokoya peya mootapeadekalepa edeya weike moamoo. ³⁷One yominido atukome atukalepa edeyame oto wa topo toa momotoa-pe. ³⁸No kaku-pete meki yene Akolalinele takamoa poanele toa meki, kiwi panagome no-pala anu agaleta ya motokome wakalepa no Ali Yatenane Oyagome einagoka ya motekene wawou. Nipa Agetai pa teleta tootapeneya meko toane meane one wene kiyo akeneya meki edelo ali-kiti-pala odeneka wakapeane nekene nitou wa Yesuyo akeneya.

9 Yesuyo nimo ootokoa kakome okome etene nimini ukuno yakoe. Ita kaki yene kiwi padeka-kiti wete tuameneyake Akolaliyo ali atoa pawe toa talo tokome padele telekole tokale enoi wa Yesuyo akeneya.

Tono Tobou Waneke Yesu Pa Tootapeneya

Kakenemo

(Matiu 17:1-13, Luke 9:28-36)

²Ko melepu kakoa (6) ta patatekaneyake Yesuyo Pita Yameta Yone toa kidene-mene ete witimoo aua pome tonu kakene matike lewia pome kapaneya. Nitoapa o ali-mene kakakoa one lene timini yono eya yati yati tootapeneya kakeneya. One kakene mamina-pala yati yati toa ake tootapeneya. ³One eni mamina ake tootapene toapa padameka mamina abe koaka edikoa ake takamele toameneya. ⁴Nitaneya kakata Ilaida Moseseta aida kotikatapea nekete Yesu-pala ko oa kakeneya. ⁵Nitikoli enekome Pitayo okome Tikisa ago kimene ko oa kakita toto-meneka odeneya kakono, ke wa oko. Neme nitika wa okalepa aga yapu tebolo Mosese Ilaidata kini tutu tutu wa wikakoo wa akeneya. ⁶Nipa one oateka agopa tokale tokome pamo eni akeneya. Nipa Yesuno oyali-mene piti tubeya tokale tokome akeneya. ⁷Nimo oa kakaka wedome agopa takoa kauma nekene. Nitikaka eni wedo keneke agale ludu nokome okome anu mana anu kolotini ago wini kakono, one oka toa yakoa tamene wa akeneya. ⁸Nimo okaka wete enetapekoli eina kakoinakagota kawameadekoi. Kimene-pala Yesu odene einata kakedeka.

⁹Wa naniko eni tonoke keti koma nekete pake Yesu kakome okome Ali Yatenane Oyago no tuane kamoameneyakepa kimename opi enekoinakamo pa kini luaneya mema yamene wa Yesuyo oa tukaneya. ¹⁰Nitaneyake eni oa tukakana luaneya yawa meake Yesu one tuaneke wa kamoane pou wa okanapa edeleke

okato patu wa ete oto wa pitia yakakala taneya. ¹¹Nitoapa Yesu yatekete ekete Mosesene totono pine toa olaukaki ali-kitame eya wa olaukakala tiki. Keraisu naniko taatekoa nomotoa Ilaida one namolo takoa noo wa ikino, enipa edekolo ikiti-pe-koli okome ¹²Ilaida einagome padeya padeya peya nodokapiademe namolo takoa noo wa papete wia mekapiane toa eni iki. Nimini ikiyake eya wane ukuno yakamene. Ali Yatenane Oyago einagopa ete yename tete mea paya tetepo takoa wawei wa papete wia mekapianemopa edeyake wia mekaneya-pe wa yakatekoa kakome okome ¹³Ilaida einago wete wakapea nekeneyake pade ali-kiti kini wene ponoka toa litia tekete one tete mekala taneya. Nipa Akolaline bokuke einagoke papete wia mekapiane toa taatekoa taneya wa Yesuyo akeneya.

**Ipono Awitaneya Meane
Mati Epetekanemo**

(Matiu 17:14-21, Luke 9:37-43)

¹⁴Yesu one oyali-meneka one ete oyalawe kakoita keti wakapea pote enekoli ali atoame o yene unukamo kakoli enaneya. Eni pake Mosesene totono pine toa olaukane ali-kitika eida kakete o yene-pala neno oa kakoli enaneya. ¹⁵Yesu eni nokale enekete eina eina e ali atoa peyame ekee wa ka oa teyapea pote makutukoa motaneya. ¹⁶Nitikoli Yesuyo e yene yatekome okome kinipa o yene edeyake agale topo takoa oa kaki-pe-kale ¹⁷eni pake lukoa kakene ago padame topo takakome okome anu managoke agale wamoko ipono awitaneya tokale neeke auane nou wane ni nokou. ¹⁸Anu manake ipono awinokome-kama itonoke moa aua pitikakala toa kako. Nitikale timini kabunuke lako k̄aua yotokoa one kime noto noto toa mekome one pakunu

tau tokome temotele toa kako. Nitikala tokolo tekene neke i oyali-kitame eni ipono takoa wetekakoe wane auane nokounake takoa wetekaku pekete wili toa wakoi wa okale okome ¹⁹ae, no kaku-pete meki ali atoa kime Akolalinemo yakoa moamikino, kini eni poane wene tewitiko wa wamotoane edoane nepiane meamou. Neke mana mati no kakuta aua noo wa okale ²⁰e yename Yesuke aua nokale iponame Yesuno lene timini enekome eina eina mati peteka peteka toa kakale itonoke aua pitalogakome welea mekale timini kabunuke lako k̄aua yokoa kakeneya. ²¹Nitikale Yesuyo matiyane etene yatekome okome eni ipono manipete titia awinaneya-pe wa okale okome wete dee matike lukakoa taneya. ²²Nipa lugutukoa wia tukademe iponame toe mine aua pitikakome uele pitikakome toa kakoyano, neme oyake tamedekalepa toto ela moa aua-peamene wa matiyane etename kowitaneya. ²³Nitikale Yesuyo einagome oka agale toopitikakome okome tamedekale wa neme wini okopa nooke wene tugoa mekagomepa padele padeleta tamele tokale too-kale ²⁴eina eina matiyane etename telo okome okome neeke wene tugakilepa tekeneke wedoane toamuku. Neeke wedoane wene tugoane memotono auapea ta wa kowitaneya. ²⁵Nitikale kinita kakoita ali atoa teyapea koukanokoli enekome Yesuyo poane ipono kiko okome okome kale kene ketekoa agale wamoa toko ipono ne wini mati takoa poke wa pade awinamea wa oa tukale ²⁶iponame ka telo ootapekome eni mati itonoke aua pitikoa weletekoa kawa takoa pekeneya. Nitikale eni mati tukome tuane tetepo taneya pa pikale enekete e yene kainya matiyame tuadeko wa okoli ²⁷Yesuyo mati yono moa kamotokakale kamokoa kakeneya. ²⁸Yesuyo eni mati latekatekoa yapu nome mekale one oyali kidene-mene ete

witimoa kakete ekete totome eni ipono oyake takoa wetekamele toamokano, edekome tokato patu-koli okome ²⁹kini weneme dikane ipono takoa wetekamele toamokoyake Akolali kowitua kaketepa oyake toi wa akeneya.

Yesuyo One Tuatekamo Wa Tōaweā Akeneya

(Matiu 17:22-23, Luke 9:43-45)

³⁰Yesu one oya-laweka eni ta tewitikoā pote Galili ta ludu yakeneya. Nipa Yesuyo one oyali-kiti olaukama pokome tokome take yename polipo takakaya tokale yotokamotokome pekeneya. ³¹Nitua olaukama pokome okome no Ali Yatenane Oyagopa pade ali-kitame wimotua panagome ete moa meademe toko. Moa metekale wia tukakolika ta tebolo takoa pataka-pete Akolaliyo moa kamotokoo wa okale ³²yatekete one oyali-kitame wene toameketeke neme wini okopa edemo wa okato-pe wa yakapamene piti tokale pa meaneya.

Ako Meateko Agopa Mainago Wa

Agale Tōnali Yoa Kakenemo

(Matiu 18:1-5, Luke 9:46-48)

³³Yesu one oyali-kiti-pala Kapaname take nome menaneya. Nitua yapu tuapea nome mekome one oya-lawe yatekome okome kiwi ka ludu yakete edemo oa agale tōnali yoma yakoi-pe-kale agale waametekoā pa meaneya. ³⁴Nipa ako tobou meateko agopa mani ago patu wa oa takoa pili pili toma nekeneya tokome agale waametekoā meaneya. ³⁵Nitikoli Yesu one witipitua mekome one mekuta noe wa one oyali-kiti motokome okome etene ako ago kawouno wene piko agopa nipa nepa pa keku ago tetepo takoa ete-kitanele takama pamene wa ootokoa mekome ³⁶pade mati deya one oyali-lawe kakoi

pake moa kakaneya. ³⁷Nitua mati tebe-motokome okome panagome-kiti noke toa dikane mati deya makutukoa motokomepa nipa nopala eni dekoa makutukoa motokome too. Panagome-kiti no makutukoa motokomepa nipa no moa wetekakago-pala dekoa makutukoa motokome too wa Yesuyo akeneya.

Toto-pala Poi Teiamokagomepa

Nipa Toto Mape Wikome Too Wa Akenemo

(Luke 9:49-50)

³⁸Yoneyo Yesu-pala okome okome Tikisa ago anu ukumo ne yaka. Panagome neke ibini wedekoa oapa alikitike awitane ipono takoa wetekakala tokale totome enekoo. Einagopa toto-pala opia yakago toamokolo tokome wa pade dikameamene wa kikoā okoo-kale ³⁹Yesuyo okome one tokalepa toma pomotono wa pade edikoa wameamene. Panagome-kiti anu ibini wedekoa eni telekole tootokoapa no akoa agale wamoo. ⁴⁰Toto-pala poi teiamoko agomepa nipa toto mape wikome too. ⁴¹Kipala nimini ukuno yakoe. Panagome-kiti kiwi Keraisuno ibini pedane yene kakino, ue noomotokapouno nepio wa mama moa nomotokoa lawetekalepa one eni tokake nami noanume wiane pewe wiuu wa Yesuyo akeneya.

Yono Kawa Lene Eyame Pinali Ne Toa

Potokakalepa Teia Wamene Wa Olaukanemo

(Matiu 18:6-9, Luke 17:1-2)

⁴²Dikane mati nooke wene tugoa meko mati etepea pomotua likoa enoa labakagopa Akolaliyo kibu motokome dika dika toamene tete meoo. Ae, eni tete mea kibu moamomotoapa papete mati wete likoa enameneyake

laukako tube kue matiyame one kabe kautoa kusa ue muke keti pitikaneya too tokapa epetoo toka. ⁴³Nipa neke yoname-kiti pinali ne toa potokadekalepa yono teitapeamene. Yono duku taneyake mea kawateko take poke mea kakedekalepa nipa epetoo. Nitameneya yonota takuta kakeneya kawa poane take pekedekalepa ae nipa poo. ⁴⁴Eidapa toe nokoa-kama kakolo tugo moamele toamoko. ⁴⁵⁻⁴⁶Neke kawameka pinali ne toa potokadekalepa teitapea wamene. Neke kawa teitapea duku yawa kakeka mea kawateko take poke mea kakedekalepa nipa epetoo. Nitameneya neke kawata takuta kakeneya poane take moa pitikaneya mea kakedekalepa ae, nipa poo. ⁴⁷Neke lenemeka pinali ne toa potokadekalepa lene toa wamene. Neke lene tootapeneya yakeka Akolaliyo talo toko take poke mea kakedekalepa nipa epetoo. Nitameneya neke leneta takuta kakeneya poane take moa pitikaneya mea kakedekalepa ae nipa poo. ⁴⁸Ae, eni poane takepa toe nokoa-kama kakolo oyake tugo moamele toamoko. ⁴⁹Too eni nakiyapa epetaneya tokolo uku. Too kabuka naki nee-kitike noa puki toa ali-kitikepa dikoa toele tadekoo. ⁵⁰Toopa epetaneyake me pokome meke toamokolopa edoa wa meke takamotoa-pe. Kiwi too kalono tou toa keneya ete oto wa odene wene piitiko meamene wa Yesuyo akeneya.

Alime One Atoa Wawa

Atoame One Ali Wawa Tokoleke Olaukanemo

(Matiu 19:1-12, Luke 16:18)

10 Yesuyo nimo oomotokome Galili ta tewitiko Yudea ta ludu yawa Yodane ue ketoa eka lono plane take pome mepaneya. Eidaka ali atoa one

mekata koukoa nokala tokoli Yesuyo one tanele tokome Akolalinemo i i wa olaukoa kakeneya.

²Parisi ali-kitika one mekata eida note likoa enekete ekete panagome-kiti one atoa pa wa wakomepa nipa Yu yene tone totono litiapa tamele toa toko-pe wa natemo omotadiya wa kakete okoli okome ³nikepa Mosesey-opa edele tamene wa akeneya-pe-kale ekete ⁴Moseseyo papete one totono yametekome okome padagome one atoa pa wa wawademepa nipa namolo takoa ne wakene wakuna wa edikoa pipia wia meetekoapa pa wa wetekamele toko wa Moseseyo akeneya-koli okome ⁵Moseseyo eni akenepa Yu yene kini kaua-mikiti kolotini lupi tootapeneya mekoli tokome ni akeneya. ⁶Nimo ikilepa taneyake *namolo namolo Akolaliyo kamate meaneya-kiti titikome latikilepa ali atoata takuta wa-kama latikala taneya.* ⁷Nitanelekepa *alime atoa motokomepa nipa etene nineta tewitiko wawa one atoa-pala lipukoa meoo.* ⁸Nipa namolo *takuta letetakutukoata meaneyake naniko odene tugini tetepo tokale mekete liputakutukoata meoi.* Nitoa mekoli ipa i ago ipa i atoa wa tutu tutu wa ibini amele toameneya tokome i adona wa odene tetepo takoa oi. ⁹Nipa Akolaliyo moa lipukane ali atoata padameka moa letekatakutukamele toamoko wa Yesuyo oa pekeneya.

¹⁰Nitoa yapu pome mekale one oyali-lawe note yatekete ekete eina agale pinepa edoa pikoto-pe-koli okome ¹¹panagome one atoa ne pa wa wetekatekoa pade atoa motokomepa nipa mone koua piamateko atoa motokome toko. Nipa namolo atoa eni toa potokakome toko. ¹²Atoameka onekane wawa pome eko alike pokomepa nipa koua piamateko alike eni pokome toko wa Yesuyo akeneya.

**Yesuyo Mati-kiti
Epetekamotoa Kowitanemo**

(Matiu 19:13-15, Luke 18:15-17)

¹³ Wa padepete pade-kitame kini mati-kiti one yoname mitikakamotoa Yesu kakata aua nokoika one oya-laweme noameo wa kiko akeneya. ¹⁴ Nitikoli enekome Yesu wene pokale okome wini mati-kiti oto nomotono, etoe. Akolaliyo one talo tokotapa kinino, noe wa yame-tekilepa dikane mati-kiti yametekono, oto nomotono toe. ¹⁵ Nimini ukuno yakoe. Panagopa mati-kiti Akolalike lukoa mekete tiki toa lukoa meamademe wakomepa nipa Akolaliyo talo toko take oyake pamele toamoo wa ootokoa kakome ¹⁶ eni mati-kiti tebemoa pikoa kakome Akolaliyo pewe wia yopimotua tokome yono pia kowitikaneya.

Kamo Tane Agoke Akenemo

(Matiu 19:16-30, Luke 18:18-30)

¹⁷ Yesu poademe tokaka panago teya-pea nome wadini tukupia mekome okome epetanele toko Tikisago nepa eya wane yatekene uku. Edele tekene pa meane kama pou-pe-kale okome ¹⁸ nopa epetanele toko ago wapa wini okono, dekolo oko-pe. Epetanele-kama toko agopa Akolali odene kako. Wa pade lokoaka kawamoko. ¹⁹ Moseseyo tamene wa papete wia mekanemo neme wene toko. *Ali pade wia tukamoa ni mone padane atoa liamoa ni monekeya kode moamoa ni padago-pala pa puputua akoo agale wamoa ni panagoneya oa yotokoa moamoa ni neketai nekquata kei pia tamene* wa Moseseyo akeneyano, enipa neme wene toko-kale okome ²⁰ Tikisa ago eni akenele-kama tua-like laigoane yakoane toma nuku wa akeneya. ²¹ Nimo oa kakaka Yesuyo einago nepikakomepa wene einagoke mekakome okome wenepa tadekoyake odenele odene katekoa wene toamead-

ekono, neke pikoya peya topo toa kue mootokoa ponopene ali atoa enoa tatia meetapeamene. Nitikepa neke kamoya a tibuke auma kakeneya enoo. Nitatekoyano, no litima namene wa okale ²² yatekome wene keda taneya wawa pekeneya. Nipa uu kamo tane ago tokome taneya.

²³ Nitikale Yesuyo one oyali-kiti enoa unukakome okome ae, kamo tane yene Akolaliyo talo toko take pikilepa etene wili tokoa kawapa piki wa akeneya. ²⁴ One eni oka agalemepa one oyali-kitane wene kainya pikaneya tokome okome ae, anu mati-kiti kipala i ukumo yakoe. Akolaliyo talo toko take pikilepa etene wili wedoa tokoa kawapa poi. ²⁵ Kamelo kaido noi keneke-kiti patukoa ponokomepa nipa wedoa wili toa kawamoapa patukoa ponoo. Kamo tane ago Akolaliyo talo take ponokomepa nipa wili tokoa mati kawapa ponoo wa Yesuyo akeneya. ²⁶ Nimo okale yatekete wene kainya pianeya kakete pitia yatekete ekete kamo yeneke winimodo nimini akedekalepa Akolaliyo mani ali atoa toa moamoo wa okoli ²⁷ one oya-lawe nepikakome okome ali atoame toamatikilepa Akolaliyo oyake tamele toko. Padele padele peya tamele toko ago tokome kamo tane ali-kitika one take nomotoa ka patekamele toko wa okale ²⁸ Pitayo okome ne litima noadetepa tonekeya peya tewitikoa wawa noko-kale okome ²⁹ nimini ukuno yakoe. Panagome Akolaline epetane agalekeka noanukeka tokome one yapu one etene nineta one laine wamene-mikiti one mati-kiti one toka ipe eya tewitikoa wakomepa ³⁰ nipa itonoke pa mekome enika eniya lukukepa ege takupeta kadukoa (100) oto mokala too. Nipa yapu nine wamene laine-mikiti mati-kiti ipe eya moapa tete-pala mokoa kawoo. Nitao

mea tukale Akolaliyo one talo tuku take mea-kama kamene wa moa kakoo. ³¹Akolaliyopa ako yene kainya mati keku kakoa wa keku yene kainya mati ako kakoa too wa Yesuyo akeneya.

**Yesuyo One Tuateka
Tebolo Takoa Akenemo**

(Matiu 20:17-19, Luke 18:31-34)

³²Yerusalem take poadete ka ludu pekete one oya-lawe naniko nomotoa Yesu one namolo kawa pekeneya. Ni-toa pokale one oya-lawe wene kainya pi-aneya litia note ete ali atoa kutu keneya piti taneya litia note taneya. Nitikoli Yesuyo one oyali tuku kakoa (12) eko keneya witimoa aua pome kakome i i wa ete yename one-pala toatekoimo toawe akeneya. ³³Nitikome okome kipala i ukumo yakoe. Opa ate Yerusalem take poadete poko. Pote kakolo no Ali Yatenane Oyago panagome moa eya yenane yonoke Akolalike lodo yotokoai tiki tobou ali-kiti ni Mosesene totono pine toa olaukaki ali-kiti kini yonoke pioo. Nitikale no wiatiki oi pedoa pi-itikoapa mone pa yeneke aua pote mepoi. ³⁴Nitikoli motekete tegene ma-toa tekelpu toa yotokoa po wapime wia toi. Nititikoa wia tukakolika ta tebolo takoa patatekaneyake kamoane pou wa Yesuyo oa pianeya.

**Yame Yoneta Yesuke
Lokoa Tobou Agota**

Meoukete Akenemo

(Matiu 20:20-28)

³⁵Yesu Yerusalem take kutu poademe pokaka Sebedine manata Yame Yoneta Yesu kakata note kakete ekete Tikisago totame takamene wa okole neme takoano ta-koli okome ³⁶anume edele takamotoa iki-pe-kale ekete ³⁷ne pa teleta tootapeneya meke

ali atoa pawe toa talo tokaka neeke lokoa totaka panago neke nimini yono lono mea padena ago neke ewa yono lono mea yopioukete oko-koli okome ³⁸wene toameketeke iki. Akolaliyo no ne naa wa yametekana ue metepa no tete tubeya moatekou adeka pikano, noanu noateku tetepa kitameka eni noateku toa noukete iki-pe. Noanume ue mou toa tete moateku toa kitameka moukete iki-pe-kale ekete ³⁹nitato ta-koli okome noanume noateku uepa kitameka noadete tiki. Noanume ue mou toa tete moateku toa kitameka moadete tiki. ⁴⁰Nitadete tikiyake ali atoa talo toane mekouta eka oka yono lonota kita tatikatakutukoane mekamele toamoko. Eka okata meatiki agotapa Akolaliyo i i wa wete wene toopianeyano, anume oyake yameamele toamoko.

⁴¹E agotame nimo akedekoli yatekete o yene Yame Yoneta-pala wene poaneya kakete ko oa kakeneya. ⁴²Nitikoli Yesuyo one kakuta noe wa kayo oa motokome okome mone pa yatenane tobou meki ali-kitame kini ali atoa wete toe toe wa tika tika-kama tiki. Kini ibini akene ali-kitameka ali atoame kinikile-kama takamotoa yopikala tiki. Enipa nimini ukutu-pe. ⁴³Nitikala tikino, anu oya-lawe kime pade edikameamene. Nitameneya tobou ago meou wado wene piketepa kinikile toamekete kini oya-mikitane pupu takama pamene. ⁴⁴Nipa ako odene mekene talo tou wado wene piketepa nipa kueme topo toa moa egetane ago keneya kini oya peyanele takama pamene. ⁴⁵No Ali Yatenane Oyago taatekoane nikilepa ete yename anukule takamotoane nokouya mena. Nitameneya ete-kitanele takoane ni ali atoa peya mati anu kamateme oto toane moadene ni nokou wa Yesuyo akeneya.

Yesuyo Leneta Lianeya Meane Ago

Batimiasi Epetekanemo

(*Matiu 20:29-34, Luke 18:35-43*)

⁴⁶ Yesuyo nimo oomotokome one oyali-kiti-pala Yeriko take pome mepaneya. Wa naniko pato wa eni ta tewitiko a pokale ali atoa iti itita kawa obomoa pekeneya. Kini ponatekoia liti leneta lianeya meane ago pade meaneya. Einagopa Timiasine mana Batimiasi wa ibini akeneya. Nitane agome ali atoa padeya-kiti manoe-kala oia meaneya. ⁴⁷ Nitoa batete matanuke eida mekome yatekale Nasarese Yesu wini ponokona wa oma ponokoinakamo yatekome telo ootapekome okome Depidi-loeke tagene ago Yesu neme no ela moamene-ye wa kayo oa meaneya. ⁴⁸ Nimo wa kayo okale e yene kainya matiyame einago kiko a ekete ekete oyakeno, wa wa okoli kayo telo kamotokoa okome okome Depidi-loeke tagene ago no ela moamene-ye wa ka oa kakeneya. ⁴⁹ Nitikale Yesuyo yatekome witimoa kakome okome winago oto nomotono, akoe wa okale leneta liane ago kayo oa ekete Yesuyo ne kayo okono, wene weye ootokoa wete kamokoa noo wa kayo okoli ⁵⁰ one tokoo kakene pue takatapea ate tigatekoa Yesu kakata nokale ⁵¹ Yesuyo yatekome okome anume edele takamotoa oko-pe-kale okome Ali Muno anu leneta kikakoa wane uku-kale okome ⁵² nopa i agome ne oyake latekamele toko wa nooke wene tugo a mekolemepa neke leneta epetekakono, opi poano pa wa okale eina eina lene kikatapeneya Yesu pokaka litima pekeneya.

Yesu Yerusaleme Take Nekenemo

(*Matiu 21:1-11, Luke 19:28-40, Yone 12:12-19*)

11 Yesu one oya-laweka Yerusaleme take tigtokoa witapadete peketepa Olike-pini tonoke latiane Besepase Besani tatake witakete Yesuyo eya taneya. ² One oyali-kiti takuta moa wetekakome okome kuka ku take poatino poe. Eni take witoa kaalaukete enekoli dogi kai tine eida po kakoa kebetaneya kakale enoi. Eni dogi kai tine patu panagoka wete mea yawameneyano, po kotokoa oto aua notokamene. ³ Kotokoa moadete kakoli panagome dekolo moadete tiki-pe wa okalepa eya wa akamene. Ali Munoyo padele toatekole pikolo ni motokoa poko. Opi oto wa i wetekademe toko wa akamene wa oa wetekaneya. ⁴ Nitikale pote enekoli dogi kai tine yapu kago tiginike kebeteloganeya batete muke kakedekale kotokoa motaneya. ⁵ Nitikoli eniya liti kakene yename enekete ekete mone dekolo kotokoa motiki-pe wa okoli ⁶ Yesuyo oa wetekakanakamo i i wa okoli nipa nitoe wa wetekaneya. ⁷ Nitikoli dogi kai aua Yesuke nekete kini tokoo kakene mamina petene kotokamo a dogi kai patu tatikakoli Yesu mea pekeneya. ⁸ Nitoa mea pokaka ali atoa peya matiyame kini tokoo kakene mamina kotokamo a one mea poatekaka bateteke pia tatikawineya pekeneya. Wa padeka-kitame li ludu pote yomo yenene deya tewia moa batete ludu tatikama pekeneya. ⁹ Nitikete namolo kawa pokoi-kitameka naniko ketea kawa nokoi-kitameka agale kamotoka kamotoka toa ke ke wa oawineya pekete ekete i agopa Ali Muno patu kautakoa kama nokono, Akolali neme pewe wia yopia kamene. ¹⁰ Tone kaua ago

Depidiyo papete ali atoa talo tokome tane toa opi enakale wa witademe tokono, Akolali neme yopia kamene. A tibuke meki peya one kei piamene-ye wa kolotine togete oawineya pekeneya.

¹¹ Nitawineya pokoli Yesu Yerusaleme take witakome tobou losu yapu keneke pome kakome eida pia kawa tokoya peya enetapeneya. Nitoapa ta lima nokale tokome one oyali-kiti tuku kakoa-pala (12) pato wa Besani take pome pipaneya.

**Yesu Yomo Pikipa
Ku Wa Tuamoa Wa**

Kikoa Wakenemo
(*Matiu 21:18-19*)

¹² Besani ta piimotekete podolikama pekete Yesu kobu tokale ¹³ete enapekome enekale padeka mati yomo piki pade tata pitikaneya kakale enaneya. Nitoapa ku tuaneya patu wa pinele pome enepokale tata pitikoa kakomeke ku tuameadeka. Ku tuamateko-pete tokome taneya. ¹⁴Ku tuameneya kakale enekome kikoa okome okome ku wa tukile toamea. Padameka neke ku wa kotia noamoi wa kikoa akeneya. Eni kikoa okaka one oyali-kitame yakakoa kakeneya.

**Yesu Tobou Losu Yapu
Pokome Tanemo**

(*Matiu 21:12-17, Luke
19:45-48, Yone 2:13-22*)

¹⁵ Yesu yomo piki kikoa oomo-tokome one oya-lawe-pala Yerusaleme take pome kapaneya. Nitoa tobo losu yapu pome kakomewa eida-kama eya kuya topo toa kue moa tane yene poe wa wia tikatapea ni e ku take latiane kue topo toa Yudea kue lene ete mea tokoi yene kini walai-kiti moa pekatapea ni ini puluma yoa tane yenane walai-

kitika moa pekatapea taneya. ¹⁶Nititikoa kakome okome i tobou losu yapu ludu kini topo toatikiya wa pade aua noameo wa agaleme oa ketekaneya. ¹⁷Nititikoa kakome okome *anu i yapupa e ku yatename no Akolali kowitoai toatiki yapu wa oi* wa papete wia mekapianeyake kimepa kode yename kodeya paigakoa moa piai tane kota tetepo takakino, poe wa wia tikatapeneya.

¹⁸ Yesu eni tanemo kugu yatekete eya ali-kitame Akolalike lodo yotokoai tane tobou ali-kitameka Mosesene totono pine toa olaukane ali-kitameka one katekoa wia tukatekoi oi pedoa wili tokoa kakeneya. Nipa ali atoa peyame Yesu i agome imopa i okono yakato wa ka okala tokoli tokome one piti motekete taneya. ¹⁹Nitaneyake ta likaka Yesu one oyali-kiti-pala Yerusaleme ta tewitikoa pekeneya.

**Totoa Ala Tootapeneya
Kakene Yomo Piki**

(*Matiu 21:20-22*)

²⁰ Podolikama likonu witia kamomotekete penekete enekoli eina yomo piki totoa ala tootapeneya kakale enaneya. ²¹Nitaneya kakale enekome Pitayopa Yesu okana wene patukakale okome Tikisa ago neme abelana kikoa okana yomo piki totoa ala tootapeneya kakono, ena wa okale okome ²²Akolalike-kama wene tugoa meamene. ²³Ipa nimini ukuno yakoe. Panagome-kiti poome toameneya kakome one kowitikumo taatekoa too wa wene tugoa mekalepa eya too. I kako tonono mati ne wete toa poke kusa ue mu kuta poke kapa wado okalepa Akolaliyo yakoa too. ²⁴Nitoa kowitikete-kama Akolaliyo wete yakoa tane tetepo takoa kowitikala tamene. Nitikolipa oneme etene yakoa too. ²⁵⁻²⁶One kowitoa kaketepa kini a tibuke meko ataiyo kini poanele-kala

toma pokoike po letu mekakana kea wakome kibu moamomoto no eya tamene. Panagome-kiti nepala padele poanele tokake po letu mekakanapa keane wakene kibu moamou wa nami ete wiameamene wa Yesuyo akeneya.

Yesu Neke Tokole Te Patu Kautakoa Kake

Toko-pe Wa Pitia Yakanemo

(Matiu 21:23-27, Luke 20:1-8)

²⁷ Yesuyo nimo oomotokome one oyali-kiti-pala Yerusalememe take wakapea nome kananeya. Enipete Yesu losu yapu ludu yawa mekaka Akolalike lodo yotokoai tane tobou ali-kitika Mosesene totono pine toa olaukane ali-kitika Kanosolo ali-kitika ²⁸ Yesu eni yakata nekete ekete neke tokolepa te patu kautakoa kake toko-pe. Teyo tamene wa okole toko-pe wa yakanokoli okome ²⁹ kikalaka yakatekumo pikono, yakoe. Oto wa topo takoa okoli yatekenepa nipa anume toma yakulepa i ago patu kautakoane kakene tuku wane toaweane ou. ³⁰ Yoneyo ali atoa ue motokama yakilepa tene peku noa toka-pe. Akolaline peku patu. One kaua-mikitane peku patu. Yakouno, oe-na-kale ³¹ kini kini yakate tekete ekete edemo wa ato-pe. Enipa Akolaline peku wa totome okolopa nipa Yone einagome oka agale edeyake yakoa moamokoi-pe wa oono, nimo wamato. ³² Nitameneya one kaua-mikitane peku noa toka wado okolopa ete ali atoame toto wia tukatikiyano. Yone einagopa Akolaline agale toaweane akane ago tadeko wa ikiya tokome nitoino, enimo waka wamato wa ete Yesu-pala ekete ³³ totome wene toamokono, tene peku noa toka patu-koli okome nipa anu toma yakulepa i ago patu kautakoane kakene tuku wane wamou wa Yesuyo akeneya.

Panagono Gerepi Po Ipe Yopikane-kitame

Tanele Adeka Pikome Akenemo

(Matiu 21:33-46, Luke 20:9-19)

12 Yesuyo agale pade pedoa okome okome panagome-kiti one ipe tootokoa gerepi po matatapeneya. Nitoa pawe toa unukatekoapa one pupu yename po ku kotia pitikoa kawame kautoa tia lobutatekoi kagono wetia latipianeya. Payaponalime ta enapea yopia meateka ludu yapuka atepea wipianeya. Nitoapa ali pade-mene one ipe yopikamene wa yamemotokome ta tetemada pome mepaneya. ² Nitaneyake ku putua kikutukakoa kaka-pete pinagome eya taneya. One pupu ago pade moa wetekakome okome anu ipe yopikaki ali-meneme no moateku toapa meadete tikino, motokapoano pa wa moa wetekaneya. ³ Nitikale nokale enekete one ipe yopikane ali-meneme einago layo tiginime moomoa pitikoa pupuli wia padeyaka meameneya pa pomotoa wetekaneya. ⁴ Nitaneyake pinagome pade pupu ago moa wetekakale nokale enekete wia wago bulukoa ya motokoa wetekaneya. ⁵ Nitaneyake pinagome wa pade ago moa wetekakale nokale wia tukaneya. Nitaneyake pinagome one pupu ali-kiti wa moa wetekakala tokale einakale toa padeka-kiti layo toua wia padeka-kiti wia tukakala taneya. ⁶ Pinagome nitima pome wipitikomepa odene ago katekapitikaneya. Einagopa one kolotini ago. One eni mana agopa kei pia makutukoa moi wa wene pikome einago ne pa wa moa wetekaneya. ⁷ Wetekakale nokale enekete ipe yopikane yename oote tekete ekete pinagono mana ku nokona. Etename one pikoa pokaya-kiti kadimo okome kunu agono pikademe toko.

One moatekoya-kiti toto moatono, wia tukatoe wa ⁸dekoa moa wia tukamotekete gerepi po ipe tayo lono lia aua pitikapaneya. ⁹Nitikala taneyake ipe pinagome edoo-pe. Nipa eya too. Wakapea nokome one ipe yopikoa potokane ali-mene wia atukatapea kiwi lukuke pade-mene kime yopikamene wa yameademe toko. ¹⁰Akolaline bokuke agale dikoa wia mekaneya pikono, yakoe.

Yapu wiane ali-kitame i yomopa pad-eko wa paya tetepo takoa wakeneyake padekagome i yomopa yapu pigi wa moa wianeya. ¹¹Enilepa Ali Muno Akolaliyo taneya tokome ke wa kolotina mea kei piato wa wia mekapi-aneya.

Eni wia mekanemopa kime oi moamokoiya-pe wa Yesuyo akeneya. ¹²Yesuyo eni pedoa okamo yatekete ekete pedoa i agome ina okana agalepa totoke akedekono, i ago dekatapea moatikiyake toko wa kakete eida oboa kakoi ali atoa piti motekete tekete wakeneya.

Takesi Kue Pitikaneleke Pitia Yakanemo

(Matiu 22:15-22, Luke 20:20-26)

¹³Wa naniko Yesu-pala poi teiane yename eya taneya. Parisi ali padeka-kiti ni Erodeke timini kakoa yakene ali padeka-kiti moa wetekakete ekete Yesuyo natemoka omotono, likoa enepoatino poe wa moa wetekaneya. ¹⁴Nitikoli pote lede pitia yatekete ekete Tikisa ago nepa niminimo-kama oko. Nitoapa ibini akene yeneka ponopene yeneka takoa enameke Akolalilinele takama pekete toatikile kiyoke-kama olaukako. Nepa nitane agono wene tekete imodo pitia yatekono, yakamene. Yu yene tone totono litiapa Lomane yatenane ako tobou ago Sisa one takesi kue pitikamoto-pe, pitikato-pe wa

akeneya. ¹⁵Niticolipa wene takuta pianeya kakete akediki wa wene tokome okome kime nopa edeyake likoa eneki-pe. Kue lene pade enouno, aua noe wa okale ¹⁶aua note metekoli moa enekome okome i kue lene tiginikepa padane lene timini-pala ibinita wia mekaneyano, eniyatapa teneta patuno, yakouno oe-na-kale ekete tobou ago Sisa one wa okoli okome ¹⁷ni tadekopa Sisa meatikiya-kiti ni Sisa takoa mea, Akolali meatikiya-kiti ni Akolali takoa mea tamene wa Yesuyo okale yatekete ekee wa one eni okamoke wene kainya pianeya kakeneya.

Tuane Ali Atoa Moa Kamotokatekamo

(Matiu 22:23-33, Luke 20:27-40)

¹⁸Sadusi totono litiane ali padeka-kiti Yesu kakata nikilepa agale palene yakadete nekeneya. Eni yene kini totono plane toa litiapa tuane ali atoa kamoamoi wa iki. ¹⁹Nitane ali-kiti Yesu kakata nekete likoa enekete ekete Tikisago nepala i okomo yakamene. Moseseyo one totono wia mekakome okome panagono atoame mati opikameneyakedo einago tukalepa one wamene ago neme moa neke natono latikamene. Nipa tukanakago lukuke kawatiki mati-kiti opikamotono, nitamene wa Moseseyo akeneya. ²⁰Odene aline mana-mikiti tatono kakoa (7) kakeneya. Namolo agome atoa moapa mati opiameneya mea tuaneyaya. ²¹Nitaneyake one liti taku takoa opiane agome einatoa moapa mati opiameneya mea tuaneyaya. Nitaneyake tebolo takoa opiane agomeka einatoa moa mati opiameneya mea tuaneyaya. ²²Eni wamene ali tatono kakoame (7) einatoa kibunua moma-kala nekeneyake panagonoka einatoame mati opikameneya. Nipa tiobali mea tukala taneya. Nitikala taneyake wipitikome einatoaka tuaneyaya. ²³Eni

wamene-mikitame einatoa edikoa kikutua moma-kala nekeneyano, tua pokoi ali atoa Akolaliyo moa kamotokaka-pete einakatoapa mani agono natono wa tugoa meoo-pe wa likoa enaneya. ²⁴Nimo oa likoa enekoli okome kini wini ikimopa Akolaline bokuke piko agale-pala one telekoleta wene toamekete ni iki. Enipa nimini ukutu-pe. ²⁵Tuane ali atoa kamoapa pote a tibuke mea kaketepa alime atoa moamoapa atoa alike poamoapa toi. Nipa a tibuke Akolaline edelo-kiti keneya meoi. ²⁶Ali atoa tuapa kamoapa pote mea kakimopa Moseseyo one bokuke wia mekaneya. Nipa itipono oa kakene yomo deyake Akolaline agale ludu nokome akenemo eya wa wia mekaneya. Noanupa Eberame Aisaketa Yekobe toa einago-menane Akolaliyo uku wa Akolaliyo oka toa wia mekaneya. Eni wia mekanemopa kime oi moamokoiya-pe. ²⁷Moseseyo enimoya wia mekaneyano, onepa tuane ali atoane Akolali mena. Mea kama piki ali atoane Akolaliyo uku wa okome akedeko. Sadusi ali-kiti kime ali atoa tuapa wa kamoapa pote mea kawamiki wa ikipa nipa ae Akolalinemo etene agopa motekete iki wa Yesuyo akeneya.

**Tobou Kakoa Akene
Agale Pitia Yakenemo**

(Matiu 22:34-40, Luke 10:25-28)

²⁸Nitoa agale topo takoa kakoika Mosesene totono pine toa olaukane ago pade nome yakakoa kakeneya. Nitoa yatekale Yesuyo eni Sadusi ali-kiti-pala agale muno kakoa oa metekale yatekome okome yonota tua agalepa e tobou kakoa akene agalepa mani-pe wa wa okale okome ²⁹tobou kakoa akene agalepa dikoa piko. Iserele yatene anu ukumo yakoe. Tone Ali Muno Akolali wa oateko agopa Ali Muno odene meko. Oneke loko dikane ago pade

kawamoko. ³⁰Nitane ago kini Ali Muno Akolalike wedoa wene mekoa tikilepa neke tepe kolotinime toa neke yominime toa neke weneme toa neke teleme toa tamene. ³¹Nike lokoa tobou kakoa akenepa dikoa piko. Pinali neeke wa wene mekoa mea mama motoko toapa yete pade ali atoakeka wene mekoa mea mama moamene. Eni agaletamepa keku agale peya moa patukaneya wa Yesuyo akeneya. ³²Nimo okale einagome okome neme wini okopa nimini eke okono, Akolali wa oateko agopa one odene meko. Ni oneke loko dikane ago pade meamoko. ³³Tone Akolalike wene mekoa tikilepa nipa tone tepe kolotinime toa tone weneme toa tone teleme toa tagatapeamedeko. Ni pinali tone wa wene mekoa mea mama motoko toapa yete pade ali atoakeka wedoa wene mekoa mea mama moamedeko. Eni totonota litia teketepa nipa sipi sipi kai eya Akolalike mea lodo yotikina toa moa patukoa epetanelekama eni tiki wa einagome akeneya. ³⁴Nitoa wene muno meaneya kakome okale yatekome Yesuyo okome nepa Akolaliyo ali atoa pawe toa talo tokota dekama nekedeko wa Yesuyo akeneya.

Yesuyo nimo ootokaneyaake padameka agale pade wa pitia yakoaka enameneya.

Keraisu Wa Papete Ibini Akene Agoke

Pitia Yakanemo

(Matiu 22:41-46, Luke 20:41-44)

³⁵Yesu tobou losu yapu kakome olaukakome okome Mosesene totono pine toa olaukaki ali-kitame Keraisu wa papete ibini oa plane agoke eketepa onepa Depidi-loeke tawateko ago wapa olaukakala tikino, edekolo iki-pe. ³⁶Depidiyo papete Keraisuke okomepa einagopa one Ali Muno wa akeneya. Eni akenepa Epetane Yominiyo

wene takakale Depidiyo eya wa wia mekeneya.

Ali Muno Akolaliyo anu Ali Muno ago-pala eya wa akeneya. Nepala poi teia meki-kiti moane kawikoane neke kawane komo pikouno, anu nimini yono lono noke nepia menamene wa Akolaliyo Keraisu-pala akeneya.

³⁷Depidiyo enimo wia mekakome Keraisu einagopa one lukoane meku Ali Muno wa akeneyake kimepa Keraisu-pala Depidike tawateko ago wa ikino, edekolo iki-pe wa Yesuyo akeneya.

Mosesene Totonu Pine Toa Olaukane Yene

Titi Toma Pamene Wa Pubu Akenemo

(Matiu 23:1-36, Luke 11:37-54, Luke 20:45-47)

Yesuyo nimo oa kakalepa one kakata iti itita oboa kakoi peyame ke wa yakakoa kakeneya. ³⁸Nitimotoa olaukakome okome Mosesene totonu pine toa olaukaki ali-kitame toma yakile titi toma pamene. Kini ludu mamina epetaneya witi tapea kakeneya yawa ni makesike ali atoame ke wa walikitikakete yono momotada wa yawa tiki. ³⁹Losu yapukeka tobou ali-kiti meatikita meada wa pote mepokala tiki. Toge kikakaka ibini akene yene meatikita meada wa pote mepokala tiki. ⁴⁰Ni nepo atoa-kiti oa yotokoa kini yapu eya kode moa ni eka ali atoame kiwi kei pimotoa lede kowitikete kutupea pa agale likoa pikala tiki. Ae, dikaki yene Akolaliyo kibu motokomewa dika dika toamene tete meoo wa Yesuyo akeneya.

Nepo Atoame Akolaline Kue Pitikananemo

(Luke 21:1-4)

⁴¹Wa padepete Yesu tobou losu yapu keneke kue pitikoai tokoi mete liti

pome witipitoa mekome enekale ali atoame kue pitikakala tokoli enekoa meaneya. Nitoa enekoa mekaka kamo tane yene peya mati note kue ako mati pitikanokala taneyake ⁴²ponopeneya meane nepo atoa pade nome dee kue waneta pitikananeya. Eni dee kue waneta koukoapa tuane kue odene latiko. ⁴³⁻⁴⁴Nitikale enekome Yesuyo one oyali-kiti noe wa kayo oa motokome okome nimini ukuno yakoe. I kamo ali atoa peyamewa kinikiya tubeya pa pimotoa keku-mene odene moa pitikakala tokoi. Nitikoiyake i atoamewa onekeya nateya deyake one piko toa eni moa pitikatapeka. One nee eya topo toa moateka kue peya eni pitikakome tokome e yene peya moa patukaka wa Yesuyo akeneya.

Tobou Losu Yapu Tumu Tokaneya Piatekamo

(Matiu 24:1-2, Luke 21:5-6)

13 Yesu tobou losu yapu kawa akolono wita kaka one oyali padame okome okome i tobou losu yapu-kitipa koniyoya kue epetaneyame koniyo takoa wianeya kakono ena wa wedia kakome okale okome ²i tube yapu-kiti wedoa enekamene. Eniya-kiti latiane kue wili walai akatapeneya pioo. Nipa odeneka kibusukoa piameneya peya wia tadekaneya pa tumu tokaneya pioo wa Yesuyo akeneya.

Ke Enekakale Mekete Tete Moatekoimo

(Matiu 24:3-14, Luke 21:7-19)

³Yesu tobou losu yapu eka waneke kamotoa Olipe-pini tono waneke pome mepaneya. One kidene eida paka witimoa mekale Pita Yameta Yone Aderuta einago-mene note kakete ekete ⁴neme okanakalepa manipete taatekoa toko patu. Enika enile toateka tigotokalepa edeya wa adeka

pipioo-pe-koli okome⁵⁻⁶ ina okounakale wete taatekameneyake pade ali-kitame anu ibini lede wedekoa nekete ekete Keraisu taatekoane nukuno, noe wa ali atoa peya mati oa yotokoino, wedoa lene kia nepikoa meamene.⁷ Nitoa nepikoa mekoi-petepa kini ta ludu uu wa poi toa kakoimo yakoa ni pade take poi tago wa okoimo kugu yakoa toino, piti moameamene wane uku. Enilepa taatekoyake wipitia ta pade tigotokoa wete patamoo tokolo ni uku.⁸ Ni e ku yatename poi tato wa kamoia poi teitakutukakala toi. Ni e ku tobou ali-kitike lukoa mekoi yatene ete oto wa poi toa winali yoi. Eka kuka takeka momani mati toa kobu igi-pala nokala too. Enika enilepa atoame mati opiademe namolo takoa mukiti nako toa keneya too.

⁹Pade ali-kitame kiwi koiso akou wa Kanosolo ali-kiti koukoa mekoika lia aua pokala toi. Wa pade ali-kitame kiwi wiou wa kini losu yapukeka layo toua wieino, lene kia nepikoa meamene. Ni ako odene tobou mekoi ali-kiti mekoika ni kiwike lokoia ta yopia mekoi-kiti mekoika lia aua pote koiso akakala toi. Nitikolipa kini lene yoto kakete anukumo toaweia akakala toi.¹⁰ Nipa wipitia ta wete patameneyake namolo takoa e ku yatene pitikoi toa anukumo oa pupitikapeoi.¹¹ Kini eni koisoke lia aua pokoiika edemo uku patu wa tepene li li wa kamotoa meameamene. Enipetepa Akolaliyo wene takaka toa okala toi. Nipa pademo pademo ikilepa kini weneme titia pade wamoi. Epetane Yomini kiwike awinokome a wa oka toa okala toi.¹² Enipetepa wamenagome-kiti wamene wia tukamotoa moa meoo. Etename-kiti one matika wimotoa moa meoo. Wa mana konomikitame kini etene nineka wia tukamotoa moa mekala toi.¹³ Anu oya-lawe kiwi no-pala odene ibini pedane yene

tokale tekete ete yene peya kipala kotimi yoa meoi. Enika eni ke enekakale meake nooke wene tugoia mea togakoi-kitipa Akolaliyo toa moo wa Yesuyo akeneya.

Yerusaleme Yename Ke Enekakale Mekete

Tete Mati Moatekoileke Oa Pianemo

(Matiu 24:15-28, Luke 21:20-24)

¹⁴Kitau oko wa okoiya one kawamatekata moa kakaneya enoino nepio wa Yesuyo pubu oa pianeya. (I boku wiane mekaku agome eya wane uku. Ina wiane mekakumopa oi moteketepa pine toa wene taneya meati wane uku.) Yesuyo eni oa planele taatekoka tokale eneketepa eya tamene. Yudea take mekoi-kiti tono pake pake toa pitoa pote paigakoa mepamene.¹⁵ Yapu liti koo meapa kini yapu pikoina mopameneya pa pitoa pamene.¹⁶ Ipe-kiti toa kawapa tigrini mamina kotokoa pikoina mopameneya pa pitoa pamene.¹⁷ Ae, mati kakene atoa-kitika mati adu tanikakoa mekoi atoa-kitika tete eni witakale manika edoa petoa pomotoa-pe.¹⁸ Eni tetepa kalapetaka witamomotoa ta wa Akolali kowitima pamene.¹⁹ Eni tete mati witakilepa itono tibuta latitikaneyakeka toamokale-kiti too. Eni tete witatekaneyake naniko pade edikanele wa witamoo.²⁰ Akolaliyo eni tete witama pomotoa yopikoa kaka pakedo teigamoo tokapa ali atoa peya atuoia toka. Nitoi tokake one wa takoa motoka ali atoa ela motokome tokome pegene kakoa teigoo.²¹ Enipetepa pade ali-kiti nekete ekete Keraisu ku nokono enoe, i nokono enoe wado okolipa yakameamene.²² Kapene yename eya wa wini oi. Keraisu nuku wa oa Akolaline agale akama nuku wa oa toi. Nitoa kiwi oa yotokadetepa padele padele telekole tokala toi. Nipa

Akolaliyo takoa motane ali atoaka tolopi toa paka aua poadete wili toa kakete oyake nitamele toamokale wakala toi. ²³Nitoino, enika enile wete taatekameneyake papete i agale eni wene takapikuna. Lene kia wedoa nepikoa meamene.

**Ali Yatenane Oyali
Wakapea Noatekamo**

(Matiu 24:29-31, Luke 21: 25-28)

²⁴Enika eni tete witoa kawa peya tokale taatekoa eya too. Lou yomiyomu takoa tokene-kitika pa toamo too. ²⁵A tibukeka tagoi-kiti kotia pitoa too. Ni tele taneya tibuke mekoia peya moa peteka peteka taneya tokome ete oto wa yawa kawai, ²⁶Nitoa kawa wipitikalē enekoli nopa Ali Yatenane Oyago wedo patu meane pa teleta toawineya noadene nokolu enoi. ²⁷Nitaneya wakapeane nekenepa lou witia noko lonoka lou pipoko lonoka yeteka yukukataka anu papete takoane moopikou-kiti peya odeneya moa obokamotoane tekene edelo ali-kiti moane wetekou.

Yomo Piki Tokoleke Pedoa Akenemo

(Matiu 24:32-35, Luke 21:29-33)

²⁸Yomo piki witakole wene taneya meamene. Papete yeneneke page k̄aua luno pitikakolo eneketepa poto toko tokene-mene tigotatokolo toko wa wene toi. ²⁹Eina toa anume okounakale-kiti witatapekale eneketepa inakago wakapea noateko eni tigotokona wa wene toi. ³⁰Etene nimini toatekomo ukuno yakoe. Ipete meki-kiti peya wete tuutapeameneyake kipala ina okounakalekama taatekoa too. ³¹Itono tibuta takoa pootapekolika anu agalepa pa pia-kama kawoo wa Yesuyo akeneya.

**Yesu Wakapea Nikilepa
Ipete Taatekoa**

Noo Wa Padameka Wene Toamiki

(Matiu 24:36-44)

³²Enika enile toatekolepa ipete taatekoa too wa padameka wene toamiki. A tibuke meki edelo ali-kitameka wene toamiki. Akolaline mana noanumeka wene toamuku. Atai Akolaliyo odene wene toko. ³³Enika enile toateko-pete agopa tokolo mekino, wedoa lene kia nepikoa-kama meamene. ³⁴Kipala ina okouna toane opika pedoane agale ukuno, yakoe. Panago ta tetemada poademe one yapu kakome eya toko. One pupu takaki ali-mene pupu tutu tutu wa takamotoa tatikamu toko. Nitoapa kagoke payaponali kako agoka wedoa nepikamene wa kakamotokome poko. ³⁵Yapu pinago kotikatapea wakapea noademe tokono, payaponali kako ago toko toa wedoa lene kia nepikamene. Piadete mekika noko patu. Tube likonu noko patu. Titia ogada k̄a oko-pete noko patu. Likonu kama witia noko patu. ³⁶Atu pia mekako kotikatapea nokayano, wedoa nepikoa kamene. ³⁷Kipala i ukumopa ali atoa peya-pala kililikoane ukuno, wedoa lene kia nepikamene wa Yesuyo akeneya.

Yesu-pala Kotina Tanemo

*(Matiu 26:1-5, Luke
22:1-2, Yone 11:45-53)*

14 Yu yenamēpa kini kaua-mikiti Idipi take mekako edelo ago patukoa wia tukamenele oi pikoa meketepa malike-kama toge kima nekeneya. Eni toge kia mono mono akamene palawe wane-kiti yoa noatekoi oi tigotokoa nekeneya. Eni toatekoi ta takupeta pa ete pikale Akolalike lodo yotokoai tane tobou ali-kitameka

Mosesene totono pine toa olaukane ali-kitameka Yesu wiadete edoa yotokoa dekoa moato patu wa wili tokoa kakeneya. ²Nitikete ekete toge kikoo-petepa dekoa moamato. Pa ali atoame toto-pala wene poa wili walai wa kawaino, enipete dekoa moamato wa oa tukaneya.

**Yesuno Tobouke
Padeya Kalono Taneya**

Pekoa Yotokanemo

(Matiu 26:6-13, Yone 12:1-8)

³Wa pade-pete Yesu Besani take kedime nakeneya mekanakago Saimone einagono yapu meaneya. Eida mekome nee nakaka atoa padame padeya kalono taneya alabase kueme latiane mete keneke mekoa aua nekeneya. Eniyapa nado wa ibini akeneya. Kue ako mati wetekoa mootokoa aua nome mete kautukoa kalono taneya Yesuno wagoke pekoe yotokatapeneya. ⁴Nitikale enekete pade kakoi-kiti wene poaneya kakete oote tekete ekete ina pekoe yotokakilepa pale tokano, edeya weike toka-pe. ⁵Inakeyapa totome topo toa kue moo tokapa nipa kina kue ege kadukaka ko melepume kakoa (300) moa ponopene ali atoa tatikoo toka wa einatoa-pala poanemo oa kakoli ⁶yatekome Yesuyo okome i atoane wene dekolo potokaki-pe. Oyakeno, wawe. Einapa anu koniyole takakana. ⁷Ponopene ali atoa enabuna kiwi pakeke mekala tikino, kini wene witikolo-kama oyake auapeamele toko. Noanupa kiwi pakeke pa tekei meku. ⁸I atoame nopala padele epetekoa toatekale eni tokona. Ina kalono taneya anu tiginike pekoe yotokakanapa no tuaneya pi-ateku tigotokolo tokome nina nodokoa takapikana. ⁹Nitikakona tokolo eya wane uku. Anukumo ta piko peyake oa aua yakoi-kitame oa pupitikama

peketepa i atoame ina takakamo-kitika oa pupitikoi. Nipa ta piko peyake mekoi-kitame one wene taneya memotoa nitoi wa Yesuyo akeneya.

**Yudaseyo Yesu Moa
Meateka Oi Pedapianemo**

(Matiu 26:14-16, Luke 22:3-6)

¹⁰Nititikaneyake Yesuno tuku kakoa (12) oyali-kiti panago Yudase Isekariose einagome eya taneya. Akolalike lodo yotokoai tane tobou ali-kiti mekoita pokome okome Yesu einago kini yonoke moane piou wa opaneya. ¹¹Nimo okale yatekete wedia mekete ekete nipa ne kue meoono, nitoa ta wa okoli einapete laigoa Yesu moa metekome toatekale wene kibutuma yakeneya.

**Edelo Ago Idipi Ta
Patukoa Iserere Yene**

**Toa Motane Oi Nokale
Toge Nee Nakenemo**

*(Matiu 26:17-25, Luke 22:7-14,
21-23, Yone 13:21-30)*

¹²Yu yename mono mono akamene pa palawe wane-kiti yoa toge kikilepa namolo ta pataka-pete eina togeke wia kiatekoi sipi sipi kai tine-pala moa wia kikala taneya. Enile toatekoi-petepa Yesuno oyali-kiti Yesuke nekete ekete edelo ago patukane wa ibini oko toge nee maida nodokoa piatoa-pe wa okoli okome ¹³Yerusalemekete nekete enekoli ali pade one wagoke ue mete kakalogo aua nome kotukale enoino, einago litima pamene. ¹⁴Litia peketepa one tuapea poka yapu pinago-pala eya wa akamene. Tikisa agome i toge kia noatekoyapa one oya-lawe-pala opiane mekene nouno, neke ugu yene note meatiki lono yamea ta wa akamene. ¹⁵Nimo okoli yatekome pinagome ako yuane yapu yametekome toto meateko walai-kiti-pala nodokapianeya yameoono, eida

pote kakete tone toge kia noatekoya nodokamene. Nodokapoatino poe wa Yesuyo one oyali takuta takoa moa wetekaneya.¹⁶ Nitikale Yerusaleme take pekete enekoli Yesuyo eina okanakale nimini tadeka. Nitadekale einata kini toge kia noatekoiya nodokaneya.

¹⁷ Nititikaneyake ta likaka Yesu one ete oya-kiti-pala eida nome menaneya.¹⁸ Nitoapa eina nee noa mekete Yesuyo okome etene nimini ukuno yakamene. Anu oya-lawe nopala opia mekete nee naki-kiti kiwi padame no-pala poi teiane yenane yonoke moa pioo wa okale¹⁹ odene odene wa mekoi peyame Yesu ete yatekete ekete Ali Muno wini okolepa noanume toatekumo eke oko-pe wa wene keda toologaneya mekete yakakala tokoli okome²⁰ anu tuku kakoa (12) oya-lawe kiwi panago no-pala opia mekome odene okolo kagonoke nee moa tadoata nako agopa no moa meatekago too.²¹ Nipa Akolaline bokuke Ali Yatenane Oyago nopala eni toatekamo papete wia mekapiane toane taatekoane tuou. Ae, no witikamotoa moa meateko agomepa dika dika toamene tete moonu, eni tete moamademe tokome einago opiameneya too tokapa nipa epetoo tokake opa ae wa Yesuyo akeneya.

Yesuyo One Oyali-kiti Palawe Wane-pala

Gerepi Po Kū Ueta Moa Lawetekome Akenemo

*(Matiu 26:26-30, Luke
22:14-20, 1 Korine 11:23-25)*

²² Eni nee noa mekete Yesuyo palawe wane moa Akolali-pala ke wa popimotokome tatikamu tokome okome ipa anu tiginino, moa namene wa moa lawetaneya.²³ Nititikoia gerepi po kū ueka meteke mekaneya katekamoa Akolali-pala ke wa oa one

oyali-kiti metekale peyame moa yumoa nakeneya.²⁴ Nitikoli okome Akolaliyo ali atoame wenele toatekoi totono oi pedoa pikana toane kadimo oane piku. Ipa anu kamate. Ali atoa peya matike tukene anu kamate ponomotou.²⁵ Kipala imopa etene nimini ukuno yakoe. Akolaliyo talo toko take kipala opiane mekene gerepi po kū ue weneya wa moane nou. Nitatekuyake papete pade wa nakileka toamou wa oa²⁶ peya takakome eni ketea lo pade oomoteketepa Oliwe-pini tonu waneke pote witapaneya.

Yesuyo Pita Neme No I Ago Wene Toamuku

Wa Akoa Wao Wa Oa Pianemo

*(Matiu 26:31-35, Luke
22:31-34, Yone 13:36-38)*

²⁷ Yesuyo Oliwe-pini tonoke pome mekome okome kiwi peyame no wawa tia tadatapeoi. Nipa Akolaline bokuke nopala toatekoileke panagome papete eya wa wia mekapiane toa taatekoa nitoi. *Akolali noanume sipi sipi kai-kiti talo toko ago witikolu one sipi sipi kai tadoa pootapeoi* wa wia mekaneya.²⁸ Eina wia mekapiane toane taatekoane tukoluka Akolaliyo moa kamotokoo. Nitikale kamoane kiwi naniko nomotoane no namolo takoane Galili take pone mepou wa okale²⁹ Pitayo okome i ali peyame ne tia tadatapekolika noanume ne tiane padeka poamou-kale okome³⁰ nepala i ukumodo yakamene. Opi likonu ali ogadame kā takupeta wete wameneyake neme no i ago wene toamuku wa tebolo-peta akoa wawade toko-kale okome³¹ ne witikete nopala dekoa witikolika ne einago wene toamuku wane wawamou wa Pitayo okale ete peyameka oneme eina okana toa okala taneya.

**Yesu Gesemani Take
Pome Kowitipanemo**

(Matiu 26:36-46, Luke 22:39-46)

³²Nimo okoli Yesuyo patoe wa Gesemani take pome mepaneya. Nitoa mekome Yesuyo one oyali-kiti-pala okome no yeka tutu pone kakene kowitipukuno, ita meamene wa ootokoapa ³³Yame Yoneta Pita toa aua pokome ela matiyame tuaneyya tepene-pala mama mati motaneyya pekeneya. ³⁴Nitaneya kakome okome no wene keda mati tokolo tuadene meku. Mugili-pala topelekono, ita nepikoa meamene wa oomotokome ³⁵nami-takakoa eko keneya kidene pome itonoke aua pitalogoa kowitaneya. Nipa onepala toatekale katekakamotoa kowitaneya. ³⁶Nitua kowitikome okome Atai padele padele peya neme tamele toko. Meteke no noateku ue enekupa no tete moatekulu enipa tokono, ete pedekakamene. Nimo wane kowitikuyake anu wene pikule toa wane ekene wamuku. Neke wene pikole tou wa kowitimotokome ³⁷one oyali-mene mekoita wakapea nokome enekale atu pia meadekoi. Nitadekoli Pita yatekome okome atu pia meko-pe. Pa nateya opia me me teke nepikamele toamoko-pe. ³⁸Setanuyo kiwi likoa enekoyano, wedoa lene kia mekete kowitamene. Lene kiane nepiane meou wa wene pikiyake tiginipa popeyo noamokolo atu wini pia meadiki wa Yesuyo oomotokome ³⁹kutu keneya wa pome kowitikome one namolona okana toa lokoa kowitaneya. ⁴⁰Nitua kowitimotokome wa wakapea nokome enekale pa atu pia meadekoi. Atume moa maleou takakale pitaneyya. Nitua atu kiyo kiyo kamokakete one-pala oatekoi agopa tokale meaneya. ⁴¹Nitaneyake eina toa pome mea tebolo takoa wakapea nokome enekome

okome kiwi pa koome tuaneyya mekete atu-kala pia meki-pe. Opi oyakeno. No Ali Yatenane Oyagopa Akolaline agale tagoa toamiki yename witikamotoa moa meateko ago ku nokono, ⁴²wete kamokoa kawe. Kotua pekete pato wa akeneya.

Yesu Dekoa Motanemo

(Matiu 26:47-56, Luke 22:47-53, Yone 18: 3-12)

⁴³Yesuyo enimo oa kakaka one tuku kakoa (12) oya ali-kiti pade Yudase wete eni nekeneya. Nokale ali peya mati koukoa kepete tue layo katekamo katekamo toa obomoa nekeneya. Nipa eya ali-kiti Akolalike lodo yotokoai tane tobou ali-kiti ni Mosesene totono pine toa olaukane ali-kiti ni ete tobou ali-kiti enika eni ali peyame Yesu dekoa motokapoatino poe wa wetekakoli nekeneya. ⁴⁴⁻⁴⁵Wetekakoli neketepa Yudase Yesu kakata wete nome awa, Tikisago wa ootokoa Yesu nunu akeneya. Enipa papete Yesu dekoa monatekoi yene-pala oi pedoa pikana toa nitaneya. Nipa one pone nunu opokou agopa Yesu eni toono, dekatapea moa tapu toa aua pamene wa oi pedoa pikana toa taneya. ⁴⁶Nitikale Yudase-pala opia nekene ali-kitame Yesu dekoa monaneyya. ⁴⁷Nitikoli one kakaya liti kakene oyago padame panago wiou wa one kepete tue witimoapa panagono kapidi pine takoa pitikaneya. Einakagopa ako odene mekome Akolalike lodo yotokoai tane tobou agono pupu ago. ⁴⁸Nitaneyake Yesuyo e yene-pala okome kini kepete tue lua note layo tigini-pala nidikoa aua nikino, kode ago tetepo takakete no dekoa moadete niki-pe. ⁴⁹Ta pataka abuna tobou losu yapuke kiwi kakakoane keleyo pone olaukoane kakounake no eida dekoa moamokoina. Dekale wakoti-pe.

Akolaline bokuke nooke papete wia mekapianele taatekoa toono, toe wa okale ⁵⁰one oya-lawe peyame one tia wawa pitoa pootapeneya. ⁵¹Nitikoli tuali pade odene pue petene ewetetapea kakeneya Yesu aua pokoika litima pekeneya. Nitikale pade-kitame dekatapekoli ⁵²one pue laukalogakome pa pitoa pekeneya.

**Yesu Kanosolo Yenane
Leneke Moa Kakanemo**

*(Matiu 26:57-68, Luke 22:54-55,
63-71, Yone 18:13-14, 19-24)*

⁵³E yename Yesu dekoa moomoteketepa ako odene mekome Akolalike lodo yotokoai tane tobou agono yapu aua pekeneya. Einagono yapupa eya ali-kiti Akolalike lodo yotokoai tane tobou ali-kiti ni Kanosolo ali-kiti ni Mosesene totono pine toa olaukane ali-kiti eida wete ponete koukoa meponaneya. ⁵⁴Yesu einagono yapuke aua pokoli Pita kutu mati kawatati toma nome tobou agono kela pawe patukoa one pupu takane yene pakeke nome menaneya. Nome mekome yono toe yame yame toa meaneya.

⁵⁵Nitikakoa Akolalike lodo yotokoai tane tobou ali-kitameka ete Kanosolo ali peyameka Yesu wia tukatekoile wili toa kawa tuku taneyake one koiso akoa wia tukatekoile pade toameneya. ⁵⁶Nipa ali kainya matiyame dika dika wa kapene wakakete eketeke odenemo wameneya. ⁵⁷Nitaneyake pade ali-kiti kamokoa kakete kapene wakakete ekete ⁵⁸i agome eya wa okale yatekoo. I kako tobou losu yapu alime wianeya keaweane tadekatapeou. Wa ta tebolo-peta lia patakale eni pana-mene moomoane alime yono petekoa wiamene yapu awitikakoane wa wiou wa oka wa akeneya. ⁵⁹Nimo waka eketeke padame pade oa padame pade oa odene kotu kakameneya.

⁶⁰Nitikoli ako tobou meane ago kamokoa e yenane lene yoto kakome Yesu pitia yatekome okome neme okale yatekoinakamo eni akoa ikino, neme pademo topo takoa enike oo-pe wa okale ⁶¹Yesuyo agale wametekoa pa kakeneya. Nitikale ako tobou meane agome wa pitia yatekome okome nepa Keraisu toto Yu yatename kei-kama plateko ago Akolaline mana-pe-kale okome ⁶²eno, nopa einago. Ni naniko Ali Yatenane Oyago nopa telekole-kama toko ago Akolaline nimini yono lono kawane tibu wedo patu meane wakapeane nokolu enoi wa okale ⁶³ako tobou ago pinali one kakene mamina tiaweia iyatapekome okome okome oyakeno, i agome tane poanele i i wa toaweia omotoa wa pade ali-kiti totome wa tuku toa moa kakateko toa mena. ⁶⁴I agome Akolali taumada toa okale kime yatekoinano, edele tato-pe-kale peyame ekete i ago wia tukamedekona wa ootapeneya. ⁶⁵Nititikoa pade-kitame Yesuke tekeliu toa yotokoa one leneta yoname ketekakoa kawa yumili mutua pia witikete ekete nepa teyo witikato-pe wa tea agale akeneya. Nitoapa i ago moe wa tobou agono poyo ali-kiti metekoli motekete kala wikala taneya.

Pitayo Yesu Akoa Wakenemo

*(Matiu 26:69-75, Luke 22:56-62,
Yone 18:15-18, 25-27)*

⁶⁶E yename ako yapu nitoa kamo-toa Pita akolono tobou agono yapu po-male pa eida meaneya. Eidapa tobou agono pupu takane atoa pade nokome enekale ⁶⁷Pitayo one yono toe yame yame toa mekale enekome okome neka i Nasarese Yesu-pala opia yake tokakale okome ⁶⁸mena, neke wini oko agale yakamekene wene toamuku wa oomotokome kago keteponoke pome kapaneyaya. ⁶⁹Pome kapokale eina pupu takane atoa wa nokome Pita enekome

eniya liti kakoi yene-pala okome i agoka Yesuno oyali tadeko wa okale ⁷⁰eina toa Pitayo okome no pade one oyago mena wa akeneya. Wa naniko keneya eniya liti kakoi-kitame Pita-pala ekete nepa Galili take agono, Yesuno oya-lawe-pala opia yakago tadeko wa okoli okome ⁷¹kapene wakadokolupa Akolaliyo no kibu momotouno, Akolaliyo yakakoane etene nimini ukuno, kini wini iki agopa wene toamuku wa oa kakaka ⁷²eina eina taku takoa ali ogadame ka oa kakeneya. Nitikalepa Yesuyo eya wa okana ali ogadame taku takoa ka wete wamokaka no i ago wene toamuku wa neme no tebolo-peta akoa wawade toko wa Yesuyo okana one wene ponokale akolono pome komo kata pitikoa kapaneya.

Pailaseyo Yesu Pitia Yakanemo

(Matiu 27:1-2, 11-14, Luke 23:1-5, Yone 18:28-38)

15 Podolikama ta pene patakaka Akolalike lodo yotokoai tane tobou ali-kitika Kanosolo ali-kitika Mosesene totono pine toa olaukane ali-kitika eni yene peyame Yesu wia tukatekoi oi pedoa pia meaneya. Nititikoa one yonoke po kakamotekete Pailase mekata koiso akakamotoa aua pote kakapaneya.

²Nitikoli Pailaseyo Yesu yatekome okome nepa Yu yene peya lukoa meki ako tobou ago-pe-kale okome nopa einago wa wini okana wa akeneya. ³Nitaneyake Akolalike lodo yotokoai tane tobou ali-kitame Yesu i agome dika dika wa akoa okala tokoli ⁴Pailaseyo Yesu wa yatekome okome opa nipa padele padelepa neme tanemo-kala akoa ikino, neke yakoa edemo oo-pe-kale ⁵Yesuyo agale wametekoa pa kakale Pailase wene kainya pia kakeneya.

Yesu Wia Tukamotoa Oa Tukanemo

(Matiu 27:15-26, Luke 23:13-25, Yone 18:39-19:16)

⁶Edelo ago patukane wa ibini akene toge oi ponokale-kama Pailaseyo eya tokala taneya. Yu yenamepa po yapu pitane ago pade po kotokoa one yapu wetekaka wa takoa okoi agopa moa wetekakala taneya. ⁷Eina toge kiane-pete Yu ali-kiti po yapu moa pitikaneya meanepa Lomane yene-pala poi kamotokoa pade ali atoa witaneyake ni moa pitikaneya meaneya. Nitane ago pade Barabasi po yapu eida moa pitikaneya. ⁸Yu yene Pailase mekata obomoa note kakete ekete eina tokala tokana toa opika nitoo ta wa koukoa note onaneya. ⁹Nitikoli okome Yu yene kiwi peya lukoa meki ago po kotokoane wetekakamotoa iki-pe wa yakaneya. ¹⁰Nipa e yename Yesu aua nikilepa pa puputua wene pokete ni tokoi wa wene tokome akeneya. ¹¹Nitaneyake Akolalike lodo yotokoai tane tobou ali-kitamepa eida oboa kakene ali atoa oa kamotokakete ekete Pailase-pala eya wa atoe. Barabasi einago po kotokoa wetekaka wa atoe wa oa kamotokaneya. ¹²Nimo wa kayo okala tokoli Pailaseyo okome kiwi Yu yene peya lukoa meki agopa edekamene wa ikipe wa okale ¹³winago yomo lekaneyake wia dekakamotono ta wa kayo oa kakoli okome ¹⁴one poanele edele taneyake iki-pe-kale agale telo oa kamotokoa kakete ekete winago yomo lekaneyake wia dekakamotono ta wa awitiko tika tika taneya. ¹⁵Nitikoli Pailaseyo e yenane wene epetekademe tokome Barabasi moa po kotokoa wetekakaneya. Nititikoapa Yesu po wapime wiamene wa one poyo yene moa metekale witikoli yomo lekaneyake wia dekakaoatino toe wa nitatekoi poyo yene moa metaneya.

**Poyo Yename Yesu
Taumada Toa Kakenemo**

(Matiu 27:27-31, Yone 19:2-3)

¹⁶Nitikale poyo yename Yesu moomotekete tobou ago Pailaseyo ta talo tokome meka yapuke aua pote kakapaneya. Nitoapa ete poyo ali peya koukoa mootokoa eya taneya. ¹⁷Kikome kiane mamina petene pade moa kakaneya. Nititikoia kagani kakene po ludu moa makatikoa one wagoke lobutukaneya. ¹⁸Nitoa lobutukakoa yono wia pitikakete ekete Yu yene lukoa meki Ali Muno ne mea kamene-ye wa taumada toa kakeneya. ¹⁹Nitoapa tauwe wata wakoa moa one tobou wane wia oneke tekeliu toa yotokakala taneya. ²⁰Edikoa paya tobou ago tetepo takatekoapa one tokoo kakakoina mamina petene kotokoa one namolo kakene mamina petene wa moa kakamotekete yomo lekaneyake wia dekadete aua pekeneya.

**Yesu Yomo Lekaneyake
Wia Dekanemo**

*(Matiu 27:32-44, Luke
23:26-43, Yone 19:17-27)*

²¹Yesu-pala eni aua pokoika Sairini take ago Saimone tayo lono kawa nokome kotukale enekete ekete i ago wia dekateko yomopa neme aukoano noo wa dekoa moa aukaneya. Saimone einagopa wamenata Alekesada Rupusitane etene. ²²Nitoa aua pekete Gologosa wa ibini akene take witapaneya. Gologosa tone agaleke eketepa ali wago wa ekete oo. ²³Nitaneta Yesu-pala aua pote witakete gerepi po ku ue-pala mire yobotonota eletekoa lawetekoli noamademe wakeneya. ²⁴Nitikale yomo lekaneyake wia dekatekoa kakete ekete one kakene mamina-mene tatiato wa poyo ali-meneme tadu tootokoa tatite taneya.

²⁵Einata einapete lou pini pogi kakoake (9 kilokoke) Yesu wia dekaloganeya. ²⁶One eni wia dekalogane yomo munokepa pipia eya wa wia mekatekoa dekaloganeya. I agopa Yu yene lukoa meki tobou ago. Nipa one koiso akoa akenemo eni wia mekatekoa dekaloganeya. ²⁷Yesu eni wia deketepa kode agota takuta eka okata yomo padetake wia dekaloga taneya. Nipa panago Yesuno nimini yono lono wia dekoa padena ago one ewa yono lono wia dekoa taneya.

²⁸⁻²⁹Nititikaneyake eida ponokoi-kitame tedu metekete ekete beita, nepa tone tobou losu yapu odepeta keatapeanepa wa ta tebolo lia patakale eni luku wa wiou wa okanakagono, ³⁰pinali neke toa moano, yomo lekaneya ludu ketipea kōa noo-na wa tema ponokala taneya. ³¹Eina toa Akolalike lodo yotokoai tane tobou ali-kitameka Mosesene totono pine tōa olaukane ali-kitameka dikoa tedu mea oote tekete ekete i agome ete pade ali atoa toa motokoyake pinali one pade wa toa moamele toamoko. ³²Beita, Keraisu Iserele yene lukoa meki tobou ago one wia dekane yomo ludu kōa nokale eneketepa i agopa Keraisu tadeko wa totome wene too wa tea agale okala taneya. Yesu-pala odeneka wia dekane kode agotameka edikoa tea agale okala taneya.

Yesu Tukome Tuanemo

*(Matiu 27:45-56, Luke
23:44-49, Yone 19:28-30)*

³³Lou mataike ponome kakaka (lou pini 12 kilokoke) ta peya likatapaneya. Lou pene webokaka (lou pini 3 kilokoke) pa ta likoa kakeneya. ³⁴Einapete lou pene webokaka (lou pini 3 kilokoke) Yesuyo telo kayo okome okome Eloī Eloī lama sabakani wa kayo akeneya. Enipa anu Akolali anu Ako-

lali neme no dekolo tewitikoia wako-
pe wa tone agaleke ekete oko. ³⁵Nimo
okale yatekete eniya liti kakoi-kitame
ekete enipa Ilaida kayo okome toko wa
akeneya. ³⁶Nittoa yakatekoa panagome
okome ue nodome tukome ni oko wa
teyapea pome ue takamoateka obi wane
pade mopaneya. Mootokoapa kou tane
gerepi po kũ uele tadamoia tauwe wata
munoke togototokoia aua nome kakome
mitumoa na wa kabunuke pia lete
lete tokome okome Ilaidayo i ago ki-
itapea monoko patuno, tokale enato
wa nepikoa kakeneya. ³⁷Nittoa nepikoa
kakoli Yesu telo ootapekomepa tukome
tuaneya. ³⁸One tukakapa eina eina kuna
tobou losu yapu keneke eya mam-
ina petene Akolali meko lono wa ak-
ene yapu luku olege toa ketekalogane
mamina petenepa ete oto wa iyawea
tukaketikaneya. ³⁹Nika Yesu lene timini
takoa plane lono kakene tobou poyo
agome Yesu tukome tokale enekome
okome ae i agopa nimini Akolaline mana
tadeko wa enekoa kakeneya. ⁴⁰Pade
atoa-kitika eka mati kakete enekoa kak-
eneya. Eni kakoi atoa-kiti pakeke eya
atoa-mene kakeneya. Pade Magadala
Maria. Ni padena Maria onepa Yame
Yosepetane nine. Pade atoa one ibinipa
Salomi. ⁴¹Einatoa-menepa Yesu Galili ta
ludu pima yakaka one auapema yak-
eneya. Yerusalem take Yesu-pala opia
note kanane atoa-kitika eida nepikoa
kakeneya.

**Yesuno Tigini Kota
Keneke Moa Pipanemo**

*(Matiu 27:57-61, Luke
23:50-56, Yone 19:38-42)*

⁴²⁻⁴³Ta likaka ibini akene Kanosolo
ago Arimasias take ago Yosepe Pailase
mekata pekeneya. Einagomepa Ako-
laliyo ali atoa keleyo talo toatekale
nepia meaneya. Ni agopa podolikama
ko mea pupu toamateka-pete tokale

tokome Pailase mekata atiki toa pokome
Yesuno tugini moane pipouno, mea ta
wa opaneya. ⁴⁴Nimo Yesu wetu tu-
ameneyake oko wa Pailaseyo wene
pikome one tobou poyo ago ne noo wa
kayo oa motokome okome Yesu winak-
ago tukome tuka-pe-kale okome ⁴⁵wetu
tukome tuka wa okale okome nipa
mopoano pa wa Yosepe yametaneya.
⁴⁶Nitikale pome mootokoapa ake tane
mamina petene moa tatilogoia Yesuno
tugini pia ewetetapeneya. Nitimotokome
aua pomepa pala padaneta kokapiane
kota keneke pipaneya. Nitaneta Yesuno
tugini piitikoia kue makai uoya koketekoa
moa kabunu ketekalogoa pekeneya.
⁴⁷Yesu eni moa pipokata eya atoatame
Magadala Maria Yosesene nine Mari-
atame enaneya.

Yesu Kamoia Pekenemo

*(Matiu 28:1-8, Luke
24:1-12, Yone 20:1-10)*

16 Yu yene kini eina ko mea pupu
toamatekoi-pete ponotekeneyake
lou pipokaka eya atoa-mene Maga-
dala Maria Yamene nine Mariata Sa-
lomi toa Yesuno tiginike pekoa yotokoa
kalono takatekoiya topo toa motokapi-
aneya. ²Nitaneyake podolikama egeme
ta tũei teigaka kamomoteketepa Yesuno
tugini moa pipane kotake pekeneya.
³Poadete pekete kini-mene oote tekete
ekete eina ketekalogane kue teyo ete
koketekoa moa pikako patu wa oma
pekeneya. ⁴Nittoa pekete enekoli paka
koketekaneya kakale enaneya. Eina kota
kabunu ketekalogane kuepa yau pe-
tene makai wane uoya. ⁵Yesuno tig-
ini pipane kota keneke eida tuapea
pekete enekoli tuali pade ake tane
mamina kakeneya nimini yono lono
mekale enekete ekee wa piti tokale kak-
eneya. ⁶Nitikoli einagome okome piti
moameo. Eina wia dekaakoina Nasarese
Yesu kime tuku tonadikiyake inakago ita

piamokono, wete kamokoa poka. One pianeta luku ino enoe wa yametaneya. ⁷Nitikome okome Yesuno oyali-kitika Pitaka yakamoto no imo wa akapamene. Inakago wete kamo poka. Kiwi Galili take naniko nomotoa one namolo takoa pokono, eni take penekete enoi. Yesuyo kipala namolo okana toa Galili take pekete pa enoino, poatino poe wa akapamene wa edelo agome einatoa-mene-pala akeneya. ⁸Nimo okale eina kota keneke kawa akolono pitoa pekeneya. Kolu kolume tua wene-pala kainya pi-aneya tokome taneya. Nitoa piti tokale tekete pade ali atoa eneketeka toawe wametekaneya.

Yesuyo One Lene Timini

Magadala Maria Yametanemo

(Matiu 28:9-10, Yone 20:11-18)

⁹Egeme ta pataka-pete lou witia nokaka Yesu kamo pakeneya. Kamo pokome one lene timini Magadala Maria namolo takoa yametaneya. Namolopa einatoake tatono kakoa (7) ipono awitaneyake Yesuyo takoa wetekakaneya. ¹⁰Einatoame Yesu enemotokomepa one-pala opia yakene ali-kiti komo oa tumai mekoita pome opaneya. ¹¹Yesu kamokoa yakole enoane nuku wa eni opokaleka nimini okono wene piamekete pa tumai meaneya.

¹²Wa padepete ali takuta padeka lono kebono takoa plane take poadete pokoli Yesu padele tootapeane tigini kakeneya nokome one lene timini yametaneya. ¹³Nitikale enemotekete wa wakapea ete yene mekoita pote ile enekoo wa opokoli enika yakoa moameneya.

¹⁴Wa naniko one oyali-kiti tuku melepu kakoa (11) yene oboa

mekete ne nakoita nokome one lene timini yamenaneya. Nitinokomepa one wete tuameneyake mekome okanakamo yakoa moamokoli tokome kiko akeneya. One tuake kamo nokale enemotekete toawe onokala tane-kitame okoimoka kolotini lupi tootokaneya mea yakamokoli tokome nika kiko akeneya. ¹⁵Nititiko kakome okome ali atoa ta piko peyake pitiki toa anukumo oa pupitikakapoatino poe. ¹⁶Anukumo yakoa mootokoa ue motokoi yenepa Akolaliyo toa mokala too. Nitameneya anukumo yakoa moamokoi yenepa nipa Akolaliyo kibu mootokoa wawoo. ¹⁷Anukumo yakoa motokoi yenamepa Akolaline tele patu kautakoa kakete tadiki wa ete-kitame wene tomotoa eya telekole toma poi. No ibini wedekoa ipono-kiti takoa wetekoa ni weneya agaleke pademo pademo oa ¹⁸ni ali tania tukakoya kaya katekamoake tuamo ni ali tukakoya ue moa noake tuamo toi. Ni eya kuya yene taneya mekoi-kitika yono pikoli latoa pokala toi wa Yesuyo oa kakeneya.

Yesu A Tibuke Atepea Aua Pekenemo

(Luke 24:50-53, Aposelo 1:9-11)

¹⁹Ali Muno Yesuyo one oyali-kiti-pala eni ko ootokoa kakale Akolaliyo one tibuke atepea aua pokale pome Akolaline nimini yono lono mepaneya. ²⁰Nitaneyake one oya-laweme Yesunomo ta piko peyake oa pupitikama pekeneya. Nipa Ali Muno agome auapea yopia kakale ele kule telekole-pala toma yakeneya. Nitikoli enekete ali atoame inapa nimini akedikwa Yesunomo yakoa mokala taneya.

LUKE

Yesunomo Lukeyo Wia Mekaneya

Lukeyo Yesunomo Tiopilasine

Wia Mekakaneya

1 Kamo koni ali Tiopilasi neke i boku wiane mekakakuno, yakamene. Padele padele toto pakeke Akolaliyo taatekoa tanemo pade ali-kitame dika dika wa wete wia mekoa enekala taneya. ²Nipa Yesuyo tititikakome toma yakale enema yakene-kitame Yesunomo toto olaukama yakete okoi toa wia mekakala taneya. ³Noanumeka enika enile-kama titianeta laigoane wedetekoane pitiane yakama nokouya tekene neke takoane i i wane wiane mekakene uku. ⁴Pade-kitame ne wete olaukakoimo-kiti etene inapa nimini akedeki wa neme wene toa wane ni tuku.

Yone Opiatekamo Edelo Agome

Sekaraia-pala Toawe Akeneya

⁵Erodeyo Yudea ta yopia meane-pete Akolalike lodo yotokoai tane ago pade Sekaraia Abaia ti yatene ago eida eni take meaneya. One natonopa Eronoke tagene atoa Elisabesi wa ibini akeneya. ⁶Sekaraia adona Akolaline leneke wene kiyo akeneya meapa Yu yenane totonoka Ali Munoyo ile tamene ile tamene wa yametane agaleka tagameneya mea epetekaneya. ⁷Tiobali atoata tokome Elisabesiyo mati opiamele toamokale ada atueta pa meaneya.

⁸⁻⁹Wa padepete Akolalike lodo yotokoai tane yatene-kiti tutu tutu wa yotokama nekene toa Abaia time lodo yoa meatekoi oi nokale one time

tadu toa enetekoia ekete opi i ago neke-peteno, lodo yotokapa wa takakoli Sekaraia tobou losu yapuke pome lodo yotokapaneya. ¹⁰Einata einapete palima keneya padeya Akolalike kalono takoa lodo yotane-pete ali atoa akolono oboa nekete Akolali kowitua kakeneya. ¹¹⁻¹²Nitikakoa Akolaliyo moa wetekane edelo agopa Akolalike palima keneya padeya lodo yotokoai taneta nimini yono lono eida nome kakale Sekaraiyo enekome wene kainya pianeya tokome pitime tuaneya kakeneya. ¹³Nitaneyake edelo agome okome okome piti moamea. Neme kowitike okamo Akolaliyo yateka tokolo neke atue deya Elisabesiyo neke mati opikademe tokono, eni mati opikalepa Yone wa ibini amene. ¹⁴Eni mati opikete wene yapekale kolotine meoi. Ete ali atoa peya matiyameka ke wa wedikoa meoi. ¹⁵Eni mati tubetua kakomepa Akolaline leneke ibini akene ago kawademe toko. Nitikagome gerepi po ku ueka leau akateko ueka nakile toamoo. One ninane tepene meaneya Epetane Yomini oneke awinokome tepene lobutua tagatapeoo. ¹⁶Iserere yatene ali atoa peya mati kini Ali Muno Akolali tewitikoa wawa pekene-kiti einagome oto toa moo. ¹⁷Nipa telekago Akolaline agale papete toawe akane ago Ilaidayo tele tane toa too. Nitoa etene mana-mikitipa odene wene pikoa ni Akolaline agale tagoa toamiki yenepa wene kiyo akeneya meki-kiti mea tiki toa nimini peku noa tomotoa too. Enipa Ali Muno ago noatekoya tokolo ali atoame nepia memotoa tokome edikoa nodokakama yawoo wa edelo agome akeneya

¹⁸⁻¹⁹Nimo okale Sekaraiyo okome nopa ada toane koto kakou ago, anu natonoka atue deya mekono, neme wini okopa nimini toatekomo okono edoane wene tuku patu-kale okome

nopa Geberiele Akolali-pala opiane-kama kaku agome uku. Akolaliyo i epetane agale no neme toaweana akapa wa neeke wetekakolo nekene uku. ²⁰Eni toaweane ukule taatekateko oi ponoka-pete nimini taatekoa toatekoyake neme yakoa moamoko. Nitikoya teke enile wete taatekoa toameneyakepa neke kekeme agale amele toamokale agale wametekoa pa meoo wa edelo ago Geberieleyo akeneya.

²¹Nitikakoa ali atoame Sekaraiya akolono witoa nomotoa nepia kakeneya. Nipa einago edekolo wete noamoko patu wa nepia kakeneya. ²²Wa naniko einago akolono witoa nokome ali atoa-pala agale amele toamokale pa kakeneya. Nitoa yoname agale adeka pia oa kakale enekete tobou losu yapu kakome pulete keneya padele enadeko wa enoa wene taneya.

²³Sekaraiyo tobou losu yapu Akolaline pupu takoa mea peya takateka oi ponokale one yapu wakapea pome mepaneya. ²⁴Wakapea pome mea natono koua pitikale mati kakeneya. Elisabesi mati kakeneya meapa tokene ko kakoa (5) ponomotoa witimoa one yapu eida pa meaneya. ²⁵Nitua mekome okome namolopa no tiobo atoa meane tekene yame tuaneya mekouyano, opipa Akolaliyo no auapekolo tekene eni ya teigoane waku wa Elisabesioyo akeneya.

Mariayo Yesu Opiatekamo

Edelo Agome Oa Pianeya

²⁶Elisabesi one mati kakeneya meaneyake ko melepu (6) tokene nome kakaka Akolaliyo edelo ago Geberiele Galili ta keneke plane Nasarese take poano pa wa moa wetekaneya. ²⁷Nipa ali poameneya tuatoa mekata eni wetekaneya. Eina atoapa Depidike tagene ago Yosepeyo moademe tu

pia kakene atoa one ibinipa Maria. ²⁸Einatoa mekata edelo ago nokome okome kamo koni atoa Akolaliyo pewe wia kakene atoa Ali Muno agome ne auapea yopiko wa okale ²⁹yatekome one eni oka agaleke wene kainya pianeya kakome no-pala ina okana agalepa edemo wa okato patu wa wene kibutua kakeneya. ³⁰Nitua kakaka edelo agome okome okome anu oyatoa Maria piti moamea. Akolaliyo ne pewe wia kakono, piti moamea. ³¹Ne mati kakeneya meade toko. Neke eni opika matipa Yesu wa ibini oa piamene. ³²Eni matipa ibini akene ago kawoo. Ako odene meko Akolaline mana wa peyame ibini oi. Ali Muno Akolaliyo neke kua ago Depidiyo talo tane taapa ne tobou ago meke yopia-kala mea wa eni mati yameoo. ³³Nitua yametekale Yekobeke tama nokoi-kiti yopia-kala kama pokomepa wipitiameneya pa talo toa-kala kama poo wa edelo agome akeneya.

³⁴⁻³⁵Nitikale okome nopa ali poameneya mekuno, mati edoane opimotopa-pe wa okale okome Epetane Yomini neeke awinademe toko. Nipa ako odene meko Akolali one telekoleme ne kaunoademe toko. Nitikale tokome neme opikateka matipa Akolaline mana wa peyame ibini oi. ³⁶Neke wamene atoa Elisabesika mati kakeneya meko. One atue deyameke mati kakeneya meko. Namolo tiobo atoa-kala akeneyake opipa mati kakeneya meko. Nipa tokene ko melepu kakoa ponomotoa mati kakeneya meko. ³⁷Enilepa Akolaliyo padele padeleta peya tamele toko agome ni toko-kale okome ³⁸nopa Akolaline pupu takaku atoano, neme wini okolepa nimini taatekoa toamotoane uku wa okale edelago tewitikoa pekeneya.

Maria Elisabesi Mekata Ugu Pekenemo

³⁹⁻⁴⁰ Einapetepa Mariayo Sekaraiane yapu pou wa one yapu Yudea take tono tonota kakeneke wetepa pekeneya. Nitoa one yapu tuapea pokome Elisabesi-pala ke wa oa tebea motaneya. ⁴¹ Nimo okale Elisabesiyo yatekaka eina eina Elisabesine tepene kakene mati tepene peloa toa kakale Epetane Yomini Elisabesike awia tagatapeneya. ⁴²⁻⁴³ Nitikale Elisabesiyo telo okome okome ete atoa peya pa memotoa Akolaliyo ne takoa pewe wia kako. Neke opiateko matika pewe wia kawademe toko. Ae, anu Ali Muno agono nine nepa anu yapu opi noke kako. Ne dikane atoa no pa atoa mekuta edekolo noko-pe. ⁴⁴ Neme no tebemoa kake okamo yakakakounaka eina eina anu tepene kakene mati wedikome tokome peloa toa kaka. ⁴⁵ Ali Muno agome oa wetekapiane agale yakoa motoko atoa nepa kolotine meoo. Nepala eina oa planele nimini taatekoa too wa yakoa moteke tokale tekene ni uku wa Elisabesiyo akeneya.

Mariayo Lo Akene Agale

⁴⁶ Nimo okale Mariayo eya wa lo oa kakeneya.

Anu tepene meaneya yawane Ali Muno kei pikene uku.

⁴⁷⁻⁴⁸ Anu yomini-pala kolotine mekene no toa motokago Akolali-pala ke wane oane meku. Ni edoa-mo.

One pupu takaku atoa pa ponopeneya mekuyake takoa moa pewe wia kako. Nitikono, opi titimoo ali atoa opia tagama pokoi peyame i atoa nopa Akolaliyo pewe wia kakene atoa wa no kei pia oi.

⁴⁹ Telekago Akolaliyo padele padele tubele mati toa no auapekala toka. Onepa kiyo akenele-kama toko

agono, one ibinipa paya tetepo takamikiya.

⁵⁰ Ali atoa oneke nate wene pianeya mea opia tagama piki toa oneme ela moa yopia meko.

⁵¹ Akolaliyo ele kule telekole-kama toma nekeneya. Nipa pine yene kini wa kei pia mate agale okoi-kitipa wia tadekatapeneya.

⁵² Ni eka kuka take mea telekole toa yopiane tobou ali-kitipa keku mekoa ponopene ali atoa ako moa kakoa taneya.

⁵³ Ni kobume tuaneya meane-kiti nee epetaneya lawetaneyake kamo tane ali atoa wanakome poe wa wetekaneya.

⁵⁴ Kiwi yatene ela moane auapeou wa oa pikana toa wene taneya mekome onekele takama nekene Iserere yatene auapea yopia kakeneya.

⁵⁵ Nipa tone kua-mikiti-pala oa pikana toa eni taatekoa taneya. Enipa Eberameka oneke tama pokoi yeneka kiwi peya ela moane auapeane-kala kama pou wa oa pikana toa taatekoa taneya wa Mariayo lo oa kakeneya.

⁵⁶ Tokene tebolo tadiya ponomotoa Maria Elisabesine yapu pa eida meaneya. Nitoa meemotokome one yapu wakapea pome mepaneya.

Elisabesiyo Yone Opianemo

⁵⁷ Elisabesi one mati opiateka oi nokale ali mati opianeya. ⁵⁸ Nitaneyake Ali Muno agome Elisabesi ela mati motokome mati opimototoa tanemo yatekete one oya yene one yatene ali atoa peya wedia meaneya.

⁵⁹⁻⁶³ Wa ta pataka ketepo (8) kakoake eina matiyane kepene teigakoli enadete nekene yename one etenane ibini Sekarai wa ibini ato wa okoli niname okome e'e mena. Yone wa ibini ato-kale ekete kita yatene ago Yone wa ibini akene ago odeneke kawamokono, Yone

wa ibini okopa edekolo oko-pe wa akeneya. Nitoapa matiyane etene-pala yoname adeka pia pitia yatekete ekete i matipa te wa ibini oo-pe-koli agale wiane mekatekuya manoe wa yoname adeka pia moa witikome i mati one ibinipa Yone toko-la wa wia mekakale enekete wene kainya pianeya kakeneya. ⁶⁴One ibinipa Yone toko-la wa wia mekakaka eina eina one kabunu yapekome kekeme agale amele tokale Akolali kei pia kakeneya. ⁶⁵Nitikalepa eni take meane yene peya piti tokale meaneya. Nitaneyake eni tanemo Yudea tonu pake pake plane ta ludu oa pupitikatapeneya. ⁶⁶Einaka einamo yakane-kitame wene kikutua mekete ekete i matipa tubetoa kakomepa edoa kako patu wa wene kikutua meaneya. Ali Munono yono tatono piadeko wa wene tekete ni akeneya.

Sekaraiyo Lo Akene Agale

⁶⁷Nitaneyake Sekaraia Epetane Yomini oneke awia tagatapeneya kakome Akolaliyo taatekoa toatekamo eya wa oa kakeneya.

⁶⁸Toto Iserlele yatene yopiko ago Ali Muno Akolali kei piato. Kiwi auapeou wa one ali atoa toto oto toa motaneyano, nitato.

⁶⁹Nipa kei yene toto toa mopamene wa telekole-kama tokago moa kakakomepa onekele papete takane ago Depidi-loeke tagene ago eni moa kakaneya.

⁷⁰Nipa namolo namolo papete one agale toaweaa akane ali-kiti-pala dikou dikou wa oa pikana toa toaweaa akanele eni taatekoa taneya.

⁷¹Nipa kiwi yatene-pala poi teia mekoi-kitika kipala kotimi wene lua mekoi-kitika ete pedeka pedeka toane kiwi toane mou wa oa pikana toa taatekakome einago moa kakaneya.

⁷²Nile tikilepa tone kaua-mikiti ela moane yopiou wa oa pikana toa taatekoa taneya. Ni neeke tama pokoi yene auapekene dikou dikou wa Eberame-pala papete oa pikana toa wene kayapeameneya mea taatekoa taneya.

⁷³⁻⁷⁴Toto eni auapeatekamopa tone kaua ago Eberame-pala oa togotopianeya. Nipa kipala poi teia mekoi-kitike kiwi toane motokolu onekelepa atiki toa takama pomotou wa oa togotaneya.

⁷⁵Nipa oneke tama pokoi yene toto mea epetekateko toa mea ni wene kiyo akaneya mea tomotoa tokome nitaneya. Enipa one leneke-kama mea kama pekete tomotou wa Akolaliyo toto auapeatekamo Eberame-pala papete oa togotopianeya.

⁷⁶Nitaneyano, anu i mati deya nepa ako odene meko Akolaline agale akako ago wa peyame oi. Ali Muno noateka ka nodokakapikilepa one naniko nomotoa ne namolo takoa peke nodokakapima poo.

⁷⁷Nipa ali atoa Akolaliyo kiwi toa motikilepa kini poanele toma yakoinake po letu mekakana keetapea too wa neme wene takama-kala poo.

⁷⁸Tone Akolaliyo one ali atoa ela moa poti ko akene wene-kama pianeya mea tokome toto toa moateko ago a tibu mea noateko ta patakademe toko.

⁷⁹Yomiyomu keneke meemotekete tua poateko-kiti totoke pa eni takaloga-kilepa tepe kolotini kilikoa pimotoa meateko ka yamea too wa Sekaraiyo lo oa kakeneya.

⁸⁰Eni mati tubetema pokome tugini kawa yomini-pala tele taneya meaneya. Nipa Iserlele yenane leneke kakome Akolaline agale akateka oi wete noameneyake ali piamene ta ludu pima yakeneya.

Mariayo Yesu Opikome Tanemo

(Matiu 1:18-25)

2 Einaka einapete ako odene meane tobou ago Sisa Ogasasiyo eya taneya. Ta piko peyake pitiki ali atoane ibini bokuke wia mekoatino toe wa oneke lokoa ta talo tane yeneke agale oa wetekamu taneya. ²Ali atoa mekoi toa oi eni motikilepa eya ago Kuwiriniusiyo Siria ta talo toa meane-pete titia taneya. ³Nitane-pete ali atoa kini kini opiane take-kama ibini oa pipokala taneya. ⁴Yosepe einagoka nitaneya. Nipa Galili ta keneke plane Nasarese ta kawa Yudea ta keneke Beseleme wa ibini akene take pekeneya. Depidi-loeke tama nekene ago tokome Depidi opiane Beseleme take ibini eni oa pipaneya. ⁵One moademe tu pia kakene atoa Maria-pala opia pome nitaneya. One eni atoapa mati kakeneya mepaneya. ⁶Eni takepa one mati opiateka oi nokale ali mati opia pianeya. ⁷One namolo mati eni opikome mamina ludume togototapea pitimekawe kai eya nee pikoai taneya waneke moa pianeya. Nipa ali atoa dekoa piai tane yapu edea takatapeneya tokome eida paka lono mea mati opia pianeya.

Edelo Agome Sipi Sipi Kai Talo Tane

Ali-kiti-pala Toawe Akenemo

⁸Einaka einata ta likale sipi sipi kai talo tane ali pade-kitame kini sipi sipi kai li ludu talo toa kakeneya. ⁹Nitikakoa Ali Munoyo moa wetekane edelago kiwi kakoiya liti kotikatapea nome kakale Ali Muno agono pa toologaneya. Nitaneyake pitime tuaneyaka kakoli okome ¹⁰ali atoa peya wedikateko agale oane metekuno, piti moameo. ¹¹Opi Depidi opiane takepa kiwi toa moateko ago opianeya piko. Ali Muno Keraisu wa oat-

iki agoke uku. ¹²Ena mati ino enoe wa wene tomotoane tekene one adeka i oane meteku. Mamina ludume togotane matipa pitimekawe kai eya nee pikoai taneya waneke wini piono, enoatino poe wa edelo agome akeneya. ¹³Nitikaka eina eina edelo ago kakata one a tibuke meane yagono-mikiti kotikatapea obomoa note kaatapea Akolali kei pikete ekete

¹⁴ako tibuke pa tootapeneya meko Akolali-pala ke wa one kei piato. Itonokepa one wa takoa motokome pewe wia yopikolo meki-kiti poi wia pitikaneya mekino, ke wa oa kakeneya.

Sipi Sipi Kai Talo Tane Ali-Kitame

Yesu Tuku Toa Enanemo

¹⁵Nimo oomotekete edelo yatene a tibuke wakapea pekeneya. Nitaneyake sipi sipi kai talo tane ali-kitame oote tekete ekete Ali Munoyo ina wetekakale nome okanakale Beseleme take enepatoe wa ¹⁶teyapea pote enekoli Maria Yosepeta eida kakoli enaneya. Eina matika pitimekawe kai nee pikoai taneya waneke pikale enaneya. ¹⁷Nitoo enemoteketepa edelo agome kiwi-pala eina matike toawe onokanakamo i i wa oa pupitikama pekeneya. ¹⁸Kini eni oa pupitikanemo yatekoi peyame i ikino yakatoe wa wene kainya pianeya yakakoa meaneya. ¹⁹Nitaneyake Mariayo einaka einamo one lukoa mekome enilepa edele toatekolo toko wa wene kibutukoa meaneya. ²⁰Sipi sipi kai talo tane ali-kiti kini kawa nokoina lono wakapea pikilepa Akolali-pala ke wa oa one kei piawineya pekeneya. Nipa edelo agome kiwi-pala eina toawe onokanakale peya taatekatapeadekale ni taneya.

Matipa Yesu Wa Ibini Akenemo

²¹Ta pataka ketepo (8) kakoakepa matiyane kepene teigamotoa aua poatekoi oi nokale Yesu wa ibini akeneya. Nipa Maria mati wetekawameneyake edelo ago nokome ibini toawe aua pikana toa taatekoa nitaneya.

Simione-pala Anatame Tobou Losu Yapu

Kakete Yesu Enekala Tanemo

²²Moseseyo one totono yametekome tamene wa akene toa eya taneya. Mariayo mati pene opimoa tokome enipete-mene mati pikoa pia pa witimoa meaneya. Nitoa mea teigakomepa Maria Yosepetame eni mati Akolaline takoa meadete Yerusaleme take aua pekeneya. ²³Nipa *namolo takoa opiane ali mati Akolaline takoa meamene* wa Ali Muno agono totono wia mekaneya plane toa litia taneya. ²⁴Nitoa aua pote metekete Akolalike padeya mea lodo yotaneya. Nipa *ini takuta mayapu takutaka puluma inideya takutaka mea lodo yamene* wa Ali Muno agono totono wia mekaneya plane toa nitaneya.

²⁵Yerusaleme take eya ago Simione meaneya. Einagopa wene kiy akatapeneya mekome Akolalinele-kama takoa meaneya. Nitoa mekompepa Isererele yene ela moa auapeatekago taatekoa nomotoa nepia meaneya. Nitane agoke Epetane Yomini awinaneya. ²⁶Awinome mekome okome Ali Muno agome moa kakapiane ago Keraisu taatekoa nokale ne tuameneya mea enoano, poti nepia meamene wa papete wene takapianeya. ²⁷One eni papete okana toa taatekakome Epetane Yominiyo tobou losu yapu poano pa wa Simione wetekakale pokome enekale Maria ana Yosepetame Mosesene totono

plane toa tekete mati Yesu Akolaline takoa meadete ²⁸aua nokoli enaneya. Enetekoa moa tebemoa kakome Akolali kei pia kakome okome

²⁹Ali Muno ago neme no-pala papete oa pikanakale opi taatekoa tokono, nekele takama nuku ago nopa tepe mataketikaneya tuane pou-ta-la.

³⁰⁻³¹E ku yatene kakakoa ali atoa toa moade nodokakole anu leneme i enekene tekene ni uku.

³²Ali Muno neke toma pokolepa i matiyame e ku mone yatene i i wa pa takalogou toa wene takakala too. Nitikale eni yename ke ke wa Isererele yene kei pia kakala toi wa Simioneyo Akolali kei pia kakeneya.

³³Nimo okale yatekete etene nineta wene kainya pianeya kakeneya. ³⁴Nitaneya kakoli Simioneyo kini kowititikome okome i ali atoata i mati toa pewe-kama wia kamene wa Akolali kowititiko Maria-pala eya wa akeneya. I matiyamepa Isererele yene padeka-kiti kaja logamotoa toa ni padeka-kiti ate kamotokoa too. Akolaliyo one yatene nani toa moateka adeka pikome i mati moa kakapianeyake padeka-kitame one akoa wawei. ³⁵Nitaneyake ali atoa peya mati kini tepene pikoi wene keleyo witoo. Neepa kepete tueme lagotaneya meou toa wene kedame tuaneya meou wa Simioneyo Maria-pala akeneya.

³⁶Akolaline agale pine wene toa toawe akane atoa pade Aana wa ibini akene atoa Yerusaleme take eida meaneya. Einatoapa Aasa ti ago Panuelene kono. ³⁷Einatoa mali tatono (7) kakoa ponomotoa ana-pala meaneya. Wa naniko ana tukale nepo atoa mekome tobou losu yapuke-kama pome mekala taneya. Nipa ta ete likoa oto likoa Akolalinele takoa mekome nee tekei wawa Akolali kowitikala taneya. Eina atoapa mali ege odepeta kadukoa wa pagini kakoa (84) ponomotoa

mea kakene atoa. ³⁸Einata einapete einatoa nokome Akolali-pala ke wa oa kakeneya. Nitoapa Akolaliyo Yerusaleme yene oto toa moatekale nepia meane ali atoa-pala eni mati koo oa kakeneya.

Nasarese Take Wakapea Pote Mepanemo

³⁹Ali Muno agono totono planele toa peya takamotekete Maria ana Yosepetame mati-pala aua kini Galili ta keneke plane Nasarese take wakapea pote mepaneya. ⁴⁰Eidapa eni mati tubetoa kakeneya. Nipa tigini kawa wene muno mea tagatapeneya mea tokale Akolaliyo pewe wima pekeneya.

Yesu Tuali Mekome

Tobou Losu Yapu Pekenemo

⁴¹Edelo ago patukane wa ibini akene toge oi penane toa-kama Yesuno etene nineta Yerusaleme take eni toge lobu-tupokala taneya. ⁴²Yesu opitikaneyake mali tuku kakoa (12) ponokale eni malikeka einakale toa one-pala Yerusaleme take aua pote toge lobutupaneya. ⁴³Nittoa mea togamotekete kini take wakapea poadete pekeneya. Wakapea pomotoa mana Yesuyo kita wameneya Yerusaleme take pa eida meaneya. ⁴⁴Etene ninetamepa Yesu kita-pala opia yakoina-kiti pake lukoa nokono wene pia pote ta likakete kini oya-mikiti kini yatene ali atoa pake tuku tokoa kaketeke enameneya. ⁴⁵Nitimotekete Yerusaleme take wakapea pote tuku topokete ⁴⁶ta pataka teboloke tuku tokoa kakeneya. Nitoo tobou losu yapu pote enekoli Akolaline agale olaukane ali-kiti pakeke lukoa mekale enaneya. Nipa eni alikitame okoimo yakakoa mea pademo pademo pitia yakoa mea tokale enaneya. ⁴⁷One eni oka agale yakane yene peyame ekete pademo pademota i wene

toa togatapekono, one topo takoa oko agale yakatoe wa ka oa kakeneya. ⁴⁸Eida nitoa meadekale enekete etene nineta wene kainya mati pianeya kakete niname okome anu mati neketai totame ne mama motekete tuku tokoa kakono, dekolo tota wameneya widikoa pa ita meke toka-pe-kale okome ⁴⁹dekale tuku toa kakoiya-pe. Agetainele one yapu kene mekene takamedekuno, ⁵⁰enipa wene toamekete iki-pe-kale one eni oka agale edoa okoto patu wa wene toameneya.

⁵¹Yesu etene nineta-pala wakapea Nasarese take nome mekome kitame okoile-kama litia taneya. Nitima nekenemo-kama Maria pa one luaneya mekome wene kikutukoa meaneya. ⁵²Yesu eida tubetema pikilepa tigini kawa wene muno meaneya mea taneya. Nitawineya pokale enekete Akolalika ali atoaka oneke wene mekoa meaneya.

Yone Taatekoa Nekenemo

*(Matiu 3:1-12, Make
1:1-8, Yone 1:19-28)*

3¹⁻²Sekaraiane mana Yone ali pi-amene take meaneya Akolaliyo i ago neke toatekole toano ta wa oi metane-petepa eya tobou ali-kitame Yu yene talo toa meaneya. Ako odene tobou meane ago Taibiriase Sisayo e ku yatene peya talo toa mekale mali wagene melepu (15) kakoakepa oneke lokoa eya ali-mene ta tutu tutu wa yopia mekala taneya. Podiase Pailaseyo Yudea ta yopia ni Erodeyo Galili ta yopia ni one wamene ago Pilipiyo Ituria Terakonaise tata yopia ni Laiseniiasiyo Abilini ta yopia mea taneya. Nitikala tokoika Anasi-pala Kayapasitapa ako odene mekete Akolalike lodo yotokoai taneya. ³Eni malikepa Yone one mekata tewitikoia pokome Yodane ue liti pianane ta ludu eya wa mo wima yakeneya. Kini tokoi paneleke Akolaliyo

kiwi wiou wa po letu mekakana keetape-motono kini poanele tewitikoa wawa ue moamene wa oma yakeneya. ⁴Nipa Akolaline agale toawe a Kane ago pade Aisaiayo papete wia mekapiane toa taatekoa nokome akeneya. Aisaiayo eya wa wia mekapianeya.

Ali piamene ta ludu panagome eya wa mo wima yawoo. Ali Muno ago wini noono, one noateko ka nodokakamene. One yawateko ka-kitika kiyotokapiamene wa taatekoa nokome oo. ⁵Tubeya kako tonokitika dee tonokitika kilikoa odene kotu kakatapeneya kawoo. Eni pake kagono pikokaka ogotapeneya pioo. Ka koianeya pikokaka kiyo akatapeneya pia ka poaneya pikokaka epetapeneya pia too. ⁶Nipa Akolaliyo ali atoa toa motokome tokale peyame enoi wa Aisaiayo papete wia mekapianeya.

⁷Ali atoame ue moadete one mekata-kama obomoa nokoli Yoneyo enekome okome beita, kayane yagono-mikiti kipa Akolaliyo kibu moateko tigotoma nokono petoatino, oto ita poe wapa teyo pubu okolo niki-pe. ⁸Kini namolonakale tewitikoa wakedekolipa ete-kitame enemotono, epetanele toma pamene. Nipa eya wa wameamene. Kipa Eberamene kaua-mikiti mekono, Akolaliyo kiwi edoa kibu momotoa-pe wa wameamene. Akolaliyo i piko kue wane-kiti moa Eberamene kaua-mikiti oyake latikakamele toko. Nitamele tokono, kipa Eberamene kaua-mikiti kako wa edoa mate agale oadete-pe. ⁹Yomo-kiti ku tuameadekale enekomepa pinagome tue moa kawa toele pitikoo. Kipa tueme kawa pitikateko tigotokolo tekene ni uku wa akeneya.

¹⁰Yesuyo nimo okale ekete ae, totome edeko patu-koli okome ¹¹panago neke tugini mamina takuta-kiti pikalepa

nipa ponopenago pade pa kakale enekapa pade tatia einago meamene. Ni panago neke noateko nee pikalepa nipa panago nee toameneya pa mekale enekapa neke nee tatia meamene wa Yoneyo akeneya. ¹²Nitikale takesi kue motokama yakene ali padeka-kitika Yone mekata ue moadete nekete ekete Tikisago totomepa edeko patu-koli okome ¹³ali atoa-kitaneke takesi kue moteketepa takesi kue moatiki kotuke-kama moamene. Ako pade oa yotokoa moameamene wa akeneya. ¹⁴Poyo ali-kitameka Yone pitia yatekete ekete totome edoo-pe-koli okome ali atoa-kitaneke kue odoa moamoa yete pade ali atoa-pala pa akoo agale wamoa tamene. Ni kini poyo pupu tokoike kue moteketepa ko wameneya moateku toane i oyake motukuno, ke wa moamene wa akeneya.

¹⁵Nitaneyake peyame one wipitikome toatekale nepia kakeneya. Nipa wene kainya pianeya kakete ekete i ago Akolalinele takamotoa moa kakapiane ago Keraisu taatekoa noko patu wa wene kibutua meaneya. ¹⁶Nitikoli okome noanumepa kiwi pa ue motokakala tukuyake no keku kamotoa panagomepa ele kule telekole toa noademe toko. Nokolopa auapeane one kawa yene kekatukuyake no pa ago tekene oyake kekamele toamoko. Einago nokome ali atoa pa ue motokamokome Epetane Yomini-pala toeta motokademe toko. ¹⁷Einago nokome eya tou toa ali atoa takoo moo. Witi ku takoo motokagome-kiti one tapepora katekamo moa nokome witi ku kugu witikatekoapa yaku pupulegeme popokoa aua pomotoa ate tibu pokotoa pitikakala too. Nitoapa ku one kakata wa pitoa auma kakale witi ku lobutua piko yapu keneke moa pitikoai too. Nititikoa yakupa koukoa moa pa

nokoa-kama kako toe mine aua pitikoai too wa Yoneyo akeneya.

¹⁸Nitikomepa emo kumota oa metekome ali atoane wene epetekateko toa Akolalinemo edikoa oa mekala taneya.

**Erodeyo Yone Po Yapu
Moa Pitikanemo**

(Matiu 14:3-5, Make 6:17-20)

¹⁹Wa naniko Galili ta yopiane ago Erodeyo wamene Pilipi natono Erodiasi kode moa one natono latikaneya. Nitaneyake Yoneyo Erode kikoa okalepa ²⁰poanele ate toawineya pome wipitikome Yone po yapu moa pitikaneya.

Yesuyo Ue Motanemo

(Matiu 3:13-17, Make 1:9-11)

²¹Yoneyo ali atoa peya ue motokatekaneyake Yesuka nokome ue motaneya. Ue mootokoa Akolali kowitoka kakaka tibu peaneya pikale eya taneya. ²²Epetane Yomini ini weuwe tetepo takatapea nome oneke pitoa awinokale a tibuke agale ludu nokome okome i ago neepa anu mana anu kolotini ali. Neke tokoleke kolotine meku wa akeneya.

**Yesuno Kaua-mikiti
Adameke Titimoa Opia**

Tagama Nekenemo

(Matiu 1:1-17)

²³Yesuyo Akolalinemo olaukama yakilepa mali padeka kapidi tadiya kakoa (30) penaneyake titikome taneya. Yesu einagopa Yosepene mana wa ali atoame wene pianeya. Yosepa onepa Ilaine mana. ²⁴Ilai onepa Masatene mana. Masate onepa Lipaine mana. Lipai onepa Melekaine mana. Melekai onepa Yanaine mana. Yanai onepa Yosepene mana. ²⁵Yosepe

onepa Matataiasine mana. Matataiasi onepa Emosine mana. Emosi onepa Neamene mana. Neame onepa Eselaine mana. Eselai onepa Nakaine mana. ²⁶Nakai onepa Measine mana. Measi onepa Matataiasine mana. Matataiasi onepa Semene mana. Semene onepa Yosekene mana. Yoseke onepa Yodane mana. ²⁷Yoda onepa Yoanane mana. Yoana onepa Resane mana. Resa onepa Serabapelene mana. Serabapele onepa Sialetielene mana. Sialetiele onepa Neraine mana. ²⁸Nerai onepa Melekaine mana. Melekai onepa Edaine mana. Edai onepa Kosamene mana. Kosame onepa Elemadamene mana. Elemadame onepa Erene mana. ²⁹Ere onepa Yoswane mana. Yosua onepa Eliesane mana. Eliesa onepa Yorimene mana. Yorime onepa Masatene mana. Masate onepa Lipaine mana. ³⁰Lipai onepa Simionene mana. Simione onepa Yudane mana. Yuda onepa Yosepene mana. Yosepe onepa Yonamene mana. Yoname onepa Elaiakimene mana. ³¹Elaiakime onepa Meliane mana. Melia onepa Menane mana. Mena onepa Matasane mana. Matasa onepa Nesanene mana. Nesane onepa Depidine mana. ³²Depidi onepa Yesine mana. Yesi onepa Obedene mana. Obede onepa Boasine mana. Boasi onepa Salemonene mana. Salemonene onepa Nasonene mana. ³³Nasone onepa Aminadapene mana. Aminadape onepa Ademinene mana. Ademinene onepa Anaine mana. Anai onepa Eseronene mana. Eserone onepa Peresine mana. Peresi onepa Yudane mana. ³⁴Yuda onepa Yekobene mana. Yekobe onepa Aisakene mana. Aisake onepa Eberamene mana. Eberame onepa Tirane mana. Tira onepa Neono mana. ³⁵Neo onepa Serakene mana. Serake onepa Reuno mana. Reu onepa Pelekene mana. Peleke onepa Ebene

mana. Ebe onepa Selane mana. ³⁶Sela onepa Kenanene mana. Kenane onepa Apakesadene mana. Apakesade onepa Siemene mana. Sieme onepa Noane mana. Noa onepa Lameka mana. ³⁷Lameke onepa Metusalane mana. Metusala onepa Inokene mana. Inoke onepa Yaredene mana. Yarede onepa Malalene mana. Malale onepa Kenanene mana. ³⁸Kenane onepa Inosono mana. Inoso onepa Setene mana. Sete onepa Adamene mana. Adame onepa Akolaline mana.

Setanuyo Yesu Likoa Enanemo

(Matiu 4:1-11, Make 1:12-13)

4 Yesupa Epetane Yomini oneke awia tagatapeneya mea Yodane ue tewitikoa pekeneya. Nipa Epetane Yominiyo Yesu ali piamene ta ludu aua yakaka ta pataka padeka noi kakoa (40) ponaka toa eida pima yakeneya. ²Eida pima yakaka Setanu nokome likoa enekala taneya. Enipete-menepa nee nakileka toameteko enika pima yawa wipitikomepa one kobume tuaneya meaneya. ³Kobu tokale meaneya Setanuyo nokome likoa enekome okome ne Akolaline mana tadekalepa nipa i piko kue wanepa neke noateko palawe wane latiano ta-kale okome ⁴Akolaline bokuke eya wa wia mekaneya pikono yaka. *Mea kawadetepa pa nee-kama moa noameamene* wa wia mekaneyano, wini okole toamou wa Yesuyo akeneya.

⁵⁻⁶Nitaneyake Setanuyo Yesu tube tonu tobouke moa aua pokome kakapaneya. Nitoapa ako tobou ali-kitame yopiane ta piko peya odepeta yametapekome okome eni ta piko peya ni eni ta-kitike koniyoya peya ne ako odene tobou ago meke talo toa wane ne yametapeou. Enika eniya peyapa noanume yopiane memotoa yametaneyano, anu wene litikene

takoane moane yameateku ago oyake yameou. ⁷Anu kawane witipitake kowitikalepa enika eniya peya ne yameouno ta wa likoa enekale okome ⁸Akolaline bokuke eya waka wia mekaneya pikono, yaka. *Neke Ali Muno Akolalike odene nate wene piitiko kowitamene. Losule tikilepa onekele odene takoa tamene* wa wia mekaneya pikono, wini okole toamou wa Yesuyo akeneya.

⁹Nitikale Yesu Yerusaleme take aua pome tobou losu yapu munoke moa kakakome okome ne Akolaline mana tadekalepa nipa ita kawa keti tiga-na. ¹⁰Neekepa Akolaline bokuke eya wa wia mekaneya pikolo tekene ni uku.

Akolaliyo ne i agopa wedoa yopia kamene wa one edelo yatene yameoo. ¹¹*Ni-tikale ne tugoa ogo eya nakaya tokale kini yoname lekanamoi.*

Enimopa Akolaline bokuke wia mekaneya pikono, nepala padeleka toamoono, tigaketika. ¹²Setanuyo nimo okale Yesuyo okome *neke Ali Muno Akolali likoa enameamene* wa wia mekaneya pikono, wini okole toamou wa wakeneya. ¹³Nitaneyake Setanuyo padele padele ta-la wa likoa enoai toa teko tokale naniko wa likoane enou wa tewitikoa pekeneya.

Nasarese Yename Yesu Akoa Wakenemo

(Matiu 13:53, Make 6:1-6)

¹⁴Yesu Galili take wakapeane pou wa Epetane Yominine tele patu kautakoa kakome pekeneya. Nitaneyake one toma pekenemo eni ta piko peyake oa pupitikaneya. ¹⁵Nipa losu yapu kaka toa Akolalinemo olaukama pokaka peyame imopa i okono yakatote wa one kei pia kakeneya.

¹⁶Yesu one tubetekane take Nasarese take pome mepaneya. Eida koo mea pupu toamene-pete one tanele tokome losu yapu pome Akolaline agale oi

moademe kamokakale ¹⁷ panagome Aisaiyo wia mekane boku ina wa moa metaneya. Nitikale moa eya agale wia mekaneta tuku toa lewea enekome oi motokome okome

¹⁸ *Ali Muno Agono Yomini nooke awinoka. Nipa eya toma pomotoa no moa kakakome toka. One epetane agale ponopeneya-kiti oane meane ni poo yapu pitiki-kiti kini yapu pamele tokono poe wane oane ni leneta lianeya meki-kiti kini lenetame enamele tokono enoe wane oane ni wene moa kautakaneya meki-kiti wene yapetekakuno poe wane oane* ¹⁹ *ni Ali Muno agome one ali atoa toa moateka oi meane tomotoa no moa kakapika wa papete wia mekanemo Yesuyo oi moa kakeneya.*

²⁰ Eni oi mootokoa kakome Yesuyo boku ewetetekoa losu yapu yopiane ago ete wa metekome witipitoa meaneya. Nitikaka losu yapu mekoi peyame one nepikoa pianeya. ²¹ Nitikoli okome wini oi moane metekounakale opi taatekako. Kime yakakoa mekika taatekako wa okale ²² peyame koniyo agalepa ina toawe a oko wa one kei pia kakeneya. Nittoa wene kainya pianeya kakete ekete i agopa Yosepene mana agomeke imopa i oko-la wa oa kakeneya.

²³ Nitikoli okome kini pedoa ikina agale no-pala toopitakakete eya wa oi. Dokosago pinali neke wa latekamene wa oa ni eya waka oa toi. Kapaneame take neme toma pekenemo totome yakakole-kiti neke pine take ikaka toa ta wa no-pala oi. ²⁴ Nitoino, kipala i ukumo yakoe. Akolaline agale toawe akakagopa one take yename one makutukoa motikileka toamiki. ²⁵ Nimini ukuno yakoe. Akolaline agale akane ago Ilaida Iserere take mekakoa mali teboloke ta pitamoa wa mali tuyono takaka tiginalo ta wete pitameneyake kobu igi mati

nokoa kakeneya. Nitane-pete Iserere take nepo atoa peya mati meaneya. ²⁶ Einapete Akolaliyo Iserere nepo meane atoa-kiti pa memotoa Ilaida pa wa wetekakomepa mone Saidone ta liti plane Sarepase take meane nepo atoa odene auapeano pa wa wetekaneya. ²⁷ One agale akane ago Ilaida Iserere take mekakoa one eni take kedime nakene ali atoa kainya mati meaneya. Nitaneyake Ilaidayo one ta pine yene odeneka latekameneyake mone Siria take ago Nemane latekaneya wa Yesuyo akeneya.

²⁸⁻³⁰ Nitikale losu yapu mekoi peyame kiwi yatene Iserere yatene paya tetepo takakome oko wa Yesu-pala kotimi luaneya mea kamomotekete tayo lono wia lititapeneya. Kini ta liti tonu tobouke pala padaneta pedekoa keti pitikatoo wa lia aua pekeneyake kiwi pake pa patukoa pekeneya.

Yesuyo Panagoke Awitane Ipono

Takoa Wetekanemo

(Make 1:21-28)

³¹ Nitimotokome Galili ta pikoka Kapaneame take keti kōa pome mepaneya. Eida mekompepa ko mea pupu toamene-pete Akolalinemo i i wa eni yene olaukoa kakeneya. ³² Nitikale ekete agale pinagome i okono yakatoo wa ka oa kakeneya.

³³ Einata einapete poane ipono awitaneya meane ago losu yapu mekome agale telo okome okome ³⁴ Nasarese Yesu nepa toto mekota edade noka-pe. Toto wiade noka-pe. Nepa Akolaliyo one wa takoa moa kakapiane ago tokola wa tayo ootapekale Yesuyo ipono kikoa okome okome agale wia teiano, ³⁵ wini ago tewitikoa wete takoa pa-kale einago ali atoa pake moa pitikatekoo wa padele toameneya takoa pekeneya. ³⁶ Nitikale enekete peyame oote tekete

ekete one oko agalepa edane agale patu. Agale pinagome i okono, Akolaline tele patu kautakoa kakomepa takoa poe wa okolo ipono-kitameka yakoa takoa pokala tiki wa ka oa kakeneya. ³⁷Nitaneyake one tanemo ta piko peyake oa pupitikatapeneya.

Yesuyo Pitane Natonane Nine Latekanemo

(Matiu 8:14-17, Make 1:29-34)

³⁸⁻³⁹Yesu eina losu yapu tewitikoa pome Saimonane yapu tuapea pome mepaneya. Eidapa Saimonane kau e one natonane nine poto yene tane matiyame tuaneya pianeya. Nitaneyake Yesu i atoa neme latekamene wa kowitikakoli one pianeta pome poto tane yene kikoa okome okome takoa pa-kale takoa pokale eina eina kamokakome kini nee takoa lawetaneya.

Yesuyo Ali Atoa Peya Mati Latekanemo

⁴⁰Lou pipokaka eya kuya yene tane ali atoa kini oya-laweme Yesu mekata aua nidikoa pokala tokoli yono pia latekamutaneya. ⁴¹Ipono-kitika ali atoa peya mati takoa pote kayo oa ekete nepa Keraisu Akolaline mana toko-la wa takoa pokoli agale wameneya poe wa Yesuyo kikoa akeneya. Nipa i agopa Keraisu tadeko wa wene tekete okoli ni akeneya.

Yesu Losu Yapu Kaka Toa Pokome

Akolalinemo Oa Mekala Tanemo

⁴²⁻⁴³Ta patakale Yesu ali piamene take kidenali witimoa pakeneya. Nitaneyake ali atoame tuku tokoa kawa one mekata note kakete ekete tone pitiko ta tewitikoa poamea wa kowitoa wili toa kakoli okome Akolaliyo ali atoa talo tokome tokomo eni epetane ko ete yeka ye ta ludu pitiki ali atoaka oane mema pamedeku. Taatekoane einagale akamo-

toa ni moa wetekaneya tokolo tuku wa Yesuyo akeneya. ⁴⁴Nitoapa Yudea ta ludu kutu pima yakome losu yapu kaka toa Akolalinemo oa mema pakeneya.

Yesuyo One Oyali Tuyono-mene

Kayo Oa Motanemo

(Matiu 4:18-22, Make 1:16-20)

5 Wa padepete Yesu Genesarete ue mine matanu pome kakata ali atoamepa Akolalinemo olaukakomo yakatoo wa apua takatapeneya. ²⁻³Nitikoli enekale ue dipi takuta ue mine matanu liti pianeya enaneya. Nipa pine yename eina ue dipita pa pimotoa mou tagi ka abe kōa kakoli enetekoa ue dipi padeke pogatekoa pome mepaneya. Nitoapa i ue dipi ue talike ete keneya modono takoa piano ta wa okale pinago Pita nokome modono takoa pikale mekome olaukoa meaneya.

⁴Nitoa olaukatekoa mekome Saimone-pala okome mou tagi tatono, ue muke pote tagi ka pitikapoe-kale okome ⁵mou tagi toa ta patakakoonake mou odeneka motikile toamokoo. Moamokoyake ta wa okalepa nitou wa ⁶one oya-lawe-pala mea pome tagi ka wa pitikapeneya. Nititikoa mou kobeyo kobeyota tagi kake moa ua ue dipike oto lia kakoika mou kedame ka piliamele tokale enekete ⁷padena ue dipike mea nekene oya-lawe auapenoe wa lene lagatikamotaneya. Nitikoli nekete tagi ka poti limo limo toa motokoli kini ue dipita moume edea takatapeneya.

⁸Edea takatapea ue kekulu atukademe tokale enekome Saimone Pita Yesuno kawane witipitakome okome Ali Muno nopa poanele tuku agono, no tewitikoa poano pa wa akeneya. ⁹Nipa mou kobeyo kobeyota tagi kake moa utukete tekete Pita one-pala opia mea nekene ali-kitika wene kainya pianeya meaneyake ni

akeneya. ¹⁰Sebedine manata Yame Yoneta Saimone-pala kibutua mou tagi tokala tane agotaka wene kainya pia kakeneya. Nitikoli enekome Yesuyo Saimone-pala okome piti moamea. Opi titimoa mou tagi tou toa ali atoa moma poade toko wa akeneya. ¹¹Nitikale ue dipita mou-pala ue mine matanuke lia aua nekete kinikiya peya tewitikalogoa Yesu-pala opia pekeneya.

Yesuyo Kedi Pitane Ago Latekanemo

(Matiu 8:1-4, Make 1:40-45)

¹²Ali atoa pitikoi ta pade pome mekaka kedi pitane ago pade Yesu kotuaneya. Kotua enekome aua pitalogoa kowitikome okome Ali Muno neme no epetekouno wene pikepa nipa oyake epetekoano ta-kale ¹³yoname one mitikatekakome okome nitouno ta. Kedime nakeneya neke yene takoa pomotoane uku wa okaka eina eina one kedime nakene yene takoa pootapeneya. ¹⁴Nitaneyake Yesuyo okome okome pade ali atoa enekeka anume ne latekakumo toawe wamea. Nitameneya eyaka tamene. Ne i agopa kedi pitane mekanake opi i latoa kakona wa yete pade ali atoame wene tomotoapa Moseseyo tamene wa papete oa planele topamene. Nipa Akolalike lodo yotokako ago mekota peke padeya Akolalike lodo yotokatekoya mepamene wa wetekaneya.

¹⁵Nimo wa oa wetekakaleka one tanemo ta piko peyake oa pupitikatapeneyake one agale yakapato wa ali atoa kini tane yene-pala latekamotoa one pome meane toa obonokala taneya. ¹⁶Nitaneyake Yesu ali piamene ta-kitike lugutukoa pokome Akolali kowitikala taneya.

Muku Toameneya Pia Kakene Ago Latekanemo

(Matiu 9:1-8, Make 2:1-12)

¹⁷Wa padepete Yesuyo olaukoa kakaka Parisi ali-kitika Mosesene totono pine toa olaukane ali-kitika eida meaneya. Nipa Galili Yudea tata piko peya kawa Yerusalemeka kawa note menaneya. E yene mekako Yesu Ali Munono tele patu kautakoa kakome yene tane ali atoa latekakala taneya. ¹⁸Nitikaka muku muku toameneya pa pia kakene ago pade one oya-laweme leyo leyo toa aua nekete yapu keneke Yesuno kawane moa piadete tuku toa wili toa kakeneya. ¹⁹Nitaneyake ali atoa edea takatapeneya tokome pake piameadekale yapu yalinike leyo leyo toa lewia aua pote kakeneya. Nitoapa yalini keatapea kene pikatekoa einakago leyoke pikoa leyo nami-meneke poo kakoa ali atoa pake Yesu kaka pitia tukaketikaneya. ²⁰Yesu i agome kini oyago oyake latekamele toko wa wene tekete tadekoile enekome yene tane ago-pala okome okome anu oya neke padele padele poanele toma nokake mekane po letu keetapeku wa akeneya. ²¹Nitikale yatekete Mosesene totono pine toa olaukane ali-kitameka Parisi ali-kitameka eya wa wene pia kakeneya. Ali atoa kini padele padele poanele toma nokoike mekane po letu keetapekilepa Akolaliyo-kama tokono, beita i agome Akolali latitapea one paya tetepo takakome oko wa wene kibutua kakeneya. ²²Kini eni wene pikoile tetao enekome Yesuyo okome wini tepene wene kibutukoa mekipa dekolo tiki-pe. ²³I ago-pala edemo wane omotoa iki-pe. Neke padele padele poanele toma nokake mekane po letu keetapeku wane omotoa iki-pe. Wete kamokoa pa wane omotoa iki-pe. ²⁴No Ali Yatenane oyago itonoke mekenepa ali atoame

poanele toma pokoike mekane po letu keetapeane wamele tadeko wa kime wene tomoanepa i ago-pala eya wane uku. Ne aua nokoina leyo-pala moa aua neke yapu poano, kamokoa pa wa eni pa pia kakene ago-pala okale ²⁵eina eina e yenane leneke kamokakome one eina aua nokoina leyo katekamao Akolali kei pima pome one yapu mepanya. ²⁶Nitikale enekete peyame ekeke ekee, namolona enamokoonakale ilepa i tokono, enatoe wa Akolalike nate wene pia kei pia kakeneya.

Yesuyo One Pukuka Patono Noo Wa

Lipai Takoa Motanemo

(*Matiu 9:9-13, Make 2:13-17*)

²⁷Nitaneyake Yesu eida tewitikoa pokome enekale eya ago Lipai wa ibini akene agopa takesi kue motokoai tane yapu mekale enaneya. Enekome okome no pukuka tone patono noo wa oma ponokale ²⁸onekeya peya tewitikalogoa wawa Yesu pokaka litima pekeneya.

²⁹Lipaiyo one yapu Yesuno toge mati kikakakale ali peya mati nekete kita-pala opia mekete nee nakeneya. Takesi kue motokama yakene ali-kitika ete ali-kitika note mekete nakoli enekete ³⁰Parisi yenameka Mosesene totono pine toa olaukane ali-kitameka Yesuno oya ali-kiti-pala eya wa ko oa kakeneya. Takesi kue motokama yaki yene tone totono litia toamiki yeneka toge nee wini opia mekete nakino, dekolo tikiti-pe wa koa oa kakeneya. ³¹Nitikoli yatekome Yesuyo e yene-pala okome okome dokosa agomepa yene toameneya meku wa iki-kiti edoa nome latekanomotoa-pe. Yene taneya piku wa iki-kitipa nipa nome latekanoo. ³²Nipa poanele toamuku wa iki-kiti kini namolo wene wia wawe wane oane auapeadene nokouya mena. Poanele tuku wa iki-kiti odene kini namolo wene wia

wawe wane oane auapeadene nokou wa Yesuyo akeneya.

Akolali Wedoa Kowitadetepa Nee Eya

Tekei Wawa Noamikileke

Pitia Yakanemo

(*Matiu 9:14-17, Make 2:18-22*)

³³Yesuyo nimo okale e yename ekete Yonene agale litia tiki-kitame padepete-kiti Akolali wedoa kowitadetepa nee eya tekei wawa noameneya pa mekala tiki. Parisi ali-kitameka dikakiyake neke oya-mikitame toamikino, dekolo toamikitipe wa okoli okome ³⁴panagono atoa motokakili atoa motoko agono oyalawe one-pala wedikete wediapa nee eya edoa wawa noameneya pa memotoa-pe. ³⁵Wa naniko ete yename atoa motokago padeka aua poatiki wini tigotoma nokona. Nipetepa wene keda taneya mekete nee wawa noameneya pa meoi wa Yesuyo akeneya.

³⁶Nimo ootokoa agale pade pedoa okome okome namolo pue pilikalepa panagome wene pue petene moa pade wane pilimoa namolo pue pilikata lapukoa lipuko patu. E'e mena. Eniledo tokalepa wene pue pilianeya piake eni wene pueke pilimotane wanepa namolo pue-pala odele taneya piamoo wa Yesuyo akeneya. ³⁷Gerepi po ku ue weneya mekalepa pinagome meme kai kepeneme latiane mete namoloyake oyake peia moamoo. Eniyakedo peikalepa gerepi po ku ue weneya tokome lako yati kawa mono mono okome kaua paka yoa pootapeoo. Nipa meme kai kepeneme latiane mete namoloya tokome oyake pukoa mono mono amele toamokale kaugale gerepi po ku ue pata paka ponoo. ³⁸Nitameneya gerepi po ku ue weneya mekalepa nipa meme kai kepeneme latiane mete weneyake-kama peia mokala too. ³⁹Panagome-kiti gerepi po ku uepa mete keneke mea kakene mati

moa nakomepa iyapa mea kakeneya tokome etene meke toko wa nako. Nootokoapa gerepi po k_u ue weneya noamademe wakala too wa Yesuyo akeneya.

**Yu Yename Kini Koo Mea
Pupu Toamene-pete**

**Ele Kule Tane Pupu Kekoa
Wawa Toamenemo**

(Matiu 12:1-8, Make 2:23-28)

6 Ko mea pupu toamene-pete pade Yesu witi k_u ipe ludu pokaka one oya-laweme witi k_u deya kotia moa yoname puputua yaku takoa pukapea noma pekeneya. ²Nitikoli enekete Parisi ali-kitame ekete Yu yene tone ko mea pupu toamateko-pete kekoa wawa toamatekole wini tikino, k_u kotia eni pupupa dekolo tikiti-pe-koli okome ³tobou ago Depidiyoka one-pala t_oa yakene ali-kitameka kobu tokale tanemo oi moamokoiya-pe. ⁴Eya taneya. Depidi kobume tuaneya meaneya tokome Akolaline wikakane losu yapu tuapea pokome Akolaline pikane palawe wane-kiti moa nakeneya. Nootokoa one-pala t_oa yakene-kiti-pala i nee noatino noe wa tatikoa metaneya. Nipa Akolalike lodo yotokoai tane ali-kitame odene dikane palawe wane namele taneyake taneya. ⁵No Ali Yatenane Oyagomepa ali atoa ko mea pupu toamiki-pete mekete toatikile i i wane oyameane talo toane tuku wa Yesuyo akeneya.

**Ko Mea Pupu Toamene-pete
Yono Lokane Ago**

Epetekanemo

(Matiu 12:9-14, Make 3:1-6)

⁶Ko mea pupu toamene-pete pade Yesu losu yapuke pokome Akolalinemo olaukoa kakeneya. Eidapa nimini yono lokane ago pade meaneya. ⁷Nitane

ago mekale enekete Mosesene totono pine t_oa olaukane ali-kitameka Parisi ali-kitameka Yesuyo i ago epetekako patu wa lene wikaneya. Nipa kini pupu toameneya koo meko-pete kekanele tomotadiya wa kakete lene wikaneya. ⁸Nitikoli kini tepene pikoi wene tetao enekome yono lokane ago-pala okome tone lene yoto noke kanoo wa okale kamokakome kini leneke nome kakeneya. ⁹⁻¹⁰Nome kakale okome kipala i ukumo yakoe. Tone ko mea pupu toamoko-petepa edele tokala tato-pe. Ali atoa-palapa padele padele epetanele tato-pe, poanele tato-pe. Tuamele toko agopa toa moato-pe, wia tukato-pe wa e yene leneme enoa unukamu tootokoa kakome okome neke yono kutu lido akoano ta wa okale lido akoka enekale one yono epetekatapeneya. ¹¹Nitaneyake e yename Yesu-pala kotimi wene mati luaneya kakete one-pala toatekoi oi pedoa pia kakeneya.

Yesuyo One-pala Opia Yawatekoi Ali

Tuku Kakoa (12) Takoa Motanemo

(Matiu 10:1-4, Make 3:13-19)

¹²Enipete-mene Yesu tono tobouke Akolali kowitipou wa pome mekome kowitao ta patakaneya. ¹³Ta patakale one agale yakoa motane yene one mekuta ate kanoatino noe wa kayo oa mootokoa mekome ali tuku kakoa (12) one wa takoa moa one Aposelo ali wa ibini oa metaneya. ¹⁴Eya ali-kiti takoa motaneya. Saimone einago motokome one pade ibini Pita wa oa metaneya. One wamene ago Aderu moa ni Yame Yoneta ni Pilipi Batolomiuta ¹⁵ni Matiutomasita Alepiasine mana Yame toa moa ni Saimone one pade ibini Selote ago moa ¹⁶ni Yamene wamene ago Yudase moa ni Yudase Isekariose one wia tukamotoa moa meateka ago moa

taneya. Mootokoapa one Aposelo ali-kiti wa ibini oa metaneya.

Yesuyo Ali Atoa Olaukoa Kini Tane Yene

Latekoa Tanemo

(Matiu 4:23-25)

¹⁷ Yesu one eni Aposelo ali-kiti-pala keti kōa pokome kotu kakoa plane take kakeneya. Eidapa one agale yakoa motane yene peya mati ete ali atoa peya mati-pala oboa kakeneya. Nipa Yudea ta piko peya Yerusalem taka kusa ue matanuke piko Taia Saidone tataka kawa one agale yakadete note oboa kakeneya. ¹⁸ Kini tane yene-pala latekamotoa note kakeneya. Poane ipono awitaneya mekete tete mokoa kakene-kitika nokoli kini ipono takoa poe wa latekakala taneya. ¹⁹ One telepa ali atoake weamutukakala tokome latekamu tokale tekete peyame one mitikada wa wili toa kakeneya.

Keraisuno Ali Atoa Mekete Toatikimo

(Matiu 5:1-12)

²⁰ Einata einapete Yesuyo one oyali-kiti nepikakome okome

kiwi ponopeneya pa meki-kiti kolotine meati wane uku. Akolaliyo one pawe toa talo toko eni taapa kinino noe wa kiwi yameoo tokolo tekene ni uku.

²¹ Opi kobume tuaneya meki-kitika kolotine meati wane uku. Wipitikete ulu yau toa meoi tokolo tekene ni uku.

²² Ete yename kipala kotimi wene luaneya mea ete pilia kawa tea agale oa tikilika kolotine meati wane uku.

Nipa no Ali Yatenane Oyagono agale kime litia tikile enekete i ali atoa kime poanele-kama tiki wa kiwi paya tetepo takoa wakilika kolotine meati wane uku.

²³ Eni yename nitikolika a tibuke pine epetaneya-kama enatikiyano, nitoa kamotono ke wa kolotine mea tigawineya yamene. E yename kipala enika enile teketepa nipa kini kaua-mikitame papete Akolaline agale toawe akane ali-kiti-pala toma nekenele tekete toi.

²⁴ Ae, kamo tiki-kiti Akolaliyo kiwi kibu moono, nepiamene. Itonoke kini moatekoiya wete mootapeneya tokome a tibuke wedianeya mea kawamoi.

²⁵ Ae, opi nee noa tagatapeneya meki-kiti wipitiketepa kobume tuaneya meoi.

Ae, opi paya nou toa ulu yau toa yaki-kiti wipitiketepa tumai mea komo k̄ata pitikoa kawei.

²⁶ Ae, ali atoa peyame kiwi kei pikili yakakoa kakete eya wa wene tamene. Papete Akolaline agale akama nuku wa oake agale oa yotokane ali-kitipa kini kaua-mikitame ke wa kei pikala taneya.

Poi Teiane Yename Tokoile

Topo Takakete Toatekomo

(Matiu 5:38-48, 7:12)

²⁷ Anu agale yakoa tiki-kiti kini mekete toatikimo ukuno yakoe. Kipala poi teiane yeneke wene mekoa meamene. Kipala kotimi wene luaneya meki-kiti auapekala tamene. ²⁸ Kiwi tea agale iki yene-pala agale epeteko topo takoa oa ni kiwi tete mekala tiki-kitane kowitikakala tamene. ²⁹ Panagome-kiti neke nimini yono-lono wane witikalepa ewa yono lono waneka wia wa yameamene. Ni panagome-kiti neke tokoo mamina petene odomoa pokalepa tiginini maminaka moa wa meamene.

³⁰ Panagome-kiti nekeya pade mano wa oikiledo tokalepa nipa one eni oikoya meamene. Ni panagome-kiti nekeya

pade mano wa wameneya pa moa pokaleka oto wa moameamene. ³¹Eko pade ali atoame neke wene momotoapa nipa kini weneka moamene.

³²Kiwiki wene mekoa meki yene takoa kini kolotine yene wa ete oto wa wene mekanali yotikilipa Akolaliyo kiwi edoa kei pimotoa-pe. Akolaline agale tagoa toamiki yeneka ete oto wa wene mekanali yokala tiki. ³³Ni kipala epetanele tiki yene takoa ete wa epetanele topo takakilipa Akolaliyo kiwi edoa kei pimotoa-pe. Akolaline agale tagoa toamiki yenameka edikakala tiki. ³⁴I agome onekeya nani oto memotoane tuku wa nekeya pade nami kakoa metekolopa Akolaliyo ne edoa kei pimotoa-pe. Akolaline agale tagoa toamiki yenameka edikoa padeya padeya ete oto wa mea nami kakanali yokala tiki. ³⁵Kime pade nitameamene. Kipala poi teiane yeneke wene mekoa auapekala tamene. Kinikiya pade tatia meteketepa nani oto memotoane tuku wa nami kakakileka toameamene. Pa metekete meamene. Nitikolipa ako odene meko Akolaliyopa kipa one mana kono-mikiti mekete ni tikino, ke wa kiwi pewe-kama wioo. Nipa panagoneya moapa ke wa wameneya pa motiki yeneka poanele tiki yeneka ela moa auapeko ago tokome nitoo. ³⁶Kiniketai Akolaliyo ali atoa edikoa ela moa auapeko toa yete pade ali atoa ela moa auapekala tamene.

**Yete Pade Ali Atoa
Kikoa Akameamene**

(Matiu 7:1-5)

³⁷Yete pade ali atoa kini tanele poanele tadeko wa kikoa akameamene. Nitikalepa Akolaliyo neeka edikoa kikoa akamoo. Yete pade ali atoa akoo agale wamokalepa Akolaliyo neka akoo agale wamoo. Yete pade ali atoame nepala poanele tokoike mekakana

po letu neme keetapekalepa nipa Akolaliyo neke poanele tokake po letu mekakana keetapekala too. ³⁸Nekeya nami kakameneya pa metekalepa nipa Akolaliyo topo takoa yano kakoo meoo. Nipa neke meteka toa yete pade ali-kitame ako-kama tetekoa keda takoa ete mekala toi. Neme meteka toa Akolaliyo ete wa topo takoa mekala too. Nitoono, nekeya keda takoa-kama mekala tamene wa Yesuyo akeneya.

³⁹Nimo ootokoa agale pade pedoa okome okome leneta lianeya meane ago padame leneta lianeya meane ago pade moa aua yamele toko-pe. E'e mena. Tugama yakeneya tokome einagota odeneka kobuke pitaketeta pitoi. ⁴⁰Sukili matiyame-kiti one tikisago moa patukamele toamoko. Nitamele toamokoyake tikisagome padele padeleta olaukatapekalepa oyagome adekake kakoo tamele too.

⁴¹⁻⁴²Anu oyago neke leneke yomo pudunukau pomotoake neme wene toamokoyake neke oyagono lenekedo kugu deya pekeneya eneke eya wa-kiti oko. Neke leneke kugu deya pekeneyano toane motokada wa-kiti oko. Dekolo oko-pe. Wene takuta pianeya meko ago neke leneke pudunukau pekene yomo pinali neke wa namolo takoa toa moamene. Mootokoapa neke leneme wedoa enamele tokolo meke neke oyagono lene pekene kugu deya oyake toa motokamele toko.

Yomo Ku Tukoke Pedoa Akenemo

(Matiu 7:16-20, 12:33-35)

⁴³Yomo epetaneyapa nipa one ku poaneya tuamoo. Wa yomo poaneyapa nipa one ku epetaneya tuamoo. ⁴⁴Yomokiti ku tukole eneketepa ipa epetadeko ipa poadeka wa takoo enamele toko. Noyokepa yomo piki ku kotia moamele toamoa ni tonipo pookepa gerepi po ku kotia moamele toamoa toko. ⁴⁵Epetane

agomepa one tepene epetane wene pi-
ane toa yawapa epetanemo witakoa oko.
Poane agomepa one tepene poane wene
piane toa yawapa poanemo witakoa
oko. Enipa tepene piko toa kabunumepa
witakoa okala toko.

**Yapu Epetaneyaka Poaneyaka
Wikete Tanemo**

(Matiu 7:24-27)

⁴⁶Nopa Ali Muno Ali Muno wa
okala tikino. Kipala tamene wane
ukule litia toameketeke ikino, Ali
Muno wapa dekololo iki-pe. ⁴⁷Nooke
tegetekoa mea anu agale yakoa toko
agomepa nipa eya tane agome tane toa
toko. ⁴⁸Panagome-kiti yapu epetekoa
wikilepa itono wetiketikoa kue yaupea
mati piadekata kue petene wane-kiti
moa kibutukoa pia eni waneke yapu
wianeya. Nitaneyake ta loba pitikoa ue
leau akoya yoa yapuke pewikapokomeke
muku muku takoa kilikoa aua pamele
toameneya. Kue yaupea matike wianeya
tokome pa kakeneya. ⁴⁹Anu agale
yatekomeke litia toamoko agomepa
nipa eya tane agome tane toa toko.
Panagome-kiti yapu wikilepa ue kibi
wetiketikoa kue yaupea enamoa pa
kibike tokoo yapu wianeya. Nitaneyake
ta loba pitikoa ue leau akoya yoa
pewikapokome yapu odepeta kilikoa
aua pekeneya. Bu wa wia tadekoa
kikilikoa aua pootapeneya wa Yesuyo
akeneya.

**Tobou Poyo Agono
Pupu Ago Latekanemo**

(Matiu 8:5-13)

7 Ali atoame yakakoa Yesuyo enika
enimo oa peya takamotokome
Kapaneame take pome mepaneya.
²Eidapa tobou poyo ago pade meaneya.
Einagono pupu ago pade one kolotini
ali tuademe yene taneya pianeya. ³Yesu

nome meko wa okoimo yakatekoapa
poyo agome eya taneya. Yu yatene
tobou ali pade-mene moa wetekakome
okome anu pupu ago latekakoano
noo wa kowitikapoe wa Yesuke moa
wetekaneya. ⁴⁻⁵Nitikale nekete ekete
tobou poyo agome toto yateneke wene
mekoa mekome tone losu yapu pade
wikakakano, one auapekilepa tamele
tokono, one pupu ago latekakoano noo
wa kowitikakoli okome ⁶nitouno patoe
wa opia pekeneya. Nitoa tigotokakoa
pome kakale tobou agome one oya
ali-mene moa wetekakome okome eya
akapoatino poe. Ali Muno no pa ago
mekuno, anu yapu ne noo wane edoane
omoto-pe. Tokamota. ⁷Ne kakota
widaka noamouno wene pikene ukuno,
nepa pa wida kake wete latoa kamene
wado okalepa anu pupu ago latoa
kawoono, nitoano ta. ⁸Nopa tobou
ago padeke lokoane mekene ta wa
okole-kama tuku. Ni nooke lukoa meki
poyo ali-kitamepa toe wane ukule-kama
yakoa tiki. Panago ne pa wane-kiti
ukulupa yakoa poko. Wa panago no
mekuta oto noo wane-kiti ukulupa
yakoa noko. Anu pupu ago-pala ile ta
wane-kiti ukulupa yakoa ukule toko.
Edikoapa anu pupu ago latoa ka wa
okalepa latoa kawoo wa Yesu akapoe
wa poyo agome one oyali-mene moa
wetekaneya. ⁹Nitikale note akanokoli
yatekome Yesu wene kainya pianeya
kakome one-pala obomoa nokoina
yene-pala ete peketapekome okome
imopa i akedekono yakoe. Mone
agomeke ipa akedeko. Iserele ago
odeneka nooke edikoa wene tugoa
meadekole enamuku wa Yesuyo
akeneya. ¹⁰Nimo okale yakamotekete
eina oa wetekakale nekene ali-kiti
tobou agono yapu wakapea pote enekoli
pupu ago latoa kakedeka.

Yesuyo Neeni Take Tuane Ago Kamotokanemo

¹¹Naniko keneya Yesu Neeni take poademe pokale one oya-lawemeka ete yene peya matiyameka one-pala opia pekeneya. ¹²Eni ta pawe kago keteponoke tigotokoa witanokaka pade-kitame tuane ago oloyo topadete akolono leyo leyo toa aua pekeneya. Aua pokoli take yene peya matiyame tuane agono nine-pala opia pekeneya. Eina tuane agopa nepo meane atoane loma mati. ¹³Leyo leyo toa aua pokoli enekome Yesuyo einatoa ela motokome okome komo wamea wa ootokoa ¹⁴tuane ago auane eina leyo pome mitikakale leyo aua pekene ali-kiti witimoa kakoli okome tuali wete kamokoa wane uku wa okale ¹⁵kamokoa mekome agale oa meaneya. Nitikale Yesuyo nine-pala okome neke mana ina wa metaneya. ¹⁶Nitikale enekete e yene peya tepene piti lobutukale kakete Akolali kei pikete ekete toto pake Akolaline agale akakago tubele mati toko ago i nokono, Akolali one yatene toto mekota ugu nokono, ke wa oa kakeneya. ¹⁷Nitaneyake Yesuyo eni tanemopa Yudea takeka eni ta unukoa plane ta-kitikeka oa pupitikatapeneya.

Yesu Pitia Yakamotoa Yoneyo Alita Takuta

Moa Wetekanemo

(*Matiu 11:2-19*)

¹⁸Yonene agale yakoa motane yename Yesuyo eni tanemo-kama i i wa Yone akanokoli ¹⁹one oyali takuta noe wa Yoneyo kayo oa mootokoa Ali Muno Yesuke wetekakome okome nepa i wa ibini oa plane ago taatekoa noko-pe. Panago taatekoa noo tokolo totome nepia kamotoa oko-pe. Oano ta wa

akapoatino poe wa wetekakale ²⁰nekete ekete ali atoa ue motokama yako Yoneyo eya akapoatino poe wa wetekakale nokoo. Nepa eina noatekago taatekoa noko-pe. Einagale taatekoa panago noo tokolo totome nepia kamotoa oko-pe wa akapoatino poe wa Yoneyo wetekakale nokoo wa akananeya. ²¹Nitikoli einata einapete Yesuyo eya kuya yene tane ali atoa kini tanele-kiti latekoa ni ki-wike awitane ipono-kitika takoa poe wa wetekoa ni leneta lianeya meane-kitika leneta kikakoa enika enile toa kakeneya. ²²Nitoapa einagota-pala okome Yone mekata wakapea pekete kini enoa yakoa tokoinakale i i wa akamene. Leneta lianeya mekoina-kiti lene kikatapeneya yawa ni kawa okeaneya yakoina-kiti pogoa kautoa pote ni kedime nakeneya mekoina yene kini kedi yene takoa pokolo latoa kawa ni kale keneta keteaneya mekoina-kiti kale pekaneya yawa ni tuane yene kamotokaneya kawa ni ponopene ali atoame Akolalinemo yakakoa mea tiki wa Yone akapamene. ²³No i agoke wene tugoa mea akapamene wa Yesuyo einagota Yone mekata kutu wa wetekaneya.

²⁴Yoneyo moa wetekane agota wakapea pokoli Yesuyo eida oboa kakoi yene-pala Yoneke okome okome kime ali piamene take Yone enepeketepa edanele enadete pokoiya-pe. Tauwe wata pupulegeme muku muku toa kakale enepokoiya-pe. E'e mena. ²⁵Nipa edane ago enadete pokoiya-pe. Panago mamina epetaneya kakeneya kakale enepokoiya-pe. E'e mena. Mamina epetaneya-kama kawa kamoya moologoa tiki-kiti ako tobou ali-kitane yapu-kala meki. ²⁶Nipa edaneya enadete pokoiya-pe. Akolaline agale akama yakago enadete pokoiya-pe. Eeno, Yonepa nitane ago. Akolaline agale papete toawe akane ali peya

keku kamotoa Yone einago ako ago kako. ²⁷Yone einagokepa Akolaliyo mana-pala papete akenemo wene takakale panagome Akolaline bokuke eya wa wia mekapiyaneya.

Ne naniko pomotoane anu agale oa aua yawateko agopa namolo takoane moane wetekou. Nitikolu einago pokome ne poateka ka nodokakapima poo wa panagome wia mekapiyaneya.

²⁸Kipala i ukumo yakoe. Papete atoame opiane ali peya keku kamotoa Yone einagopa ako kako. Onepa nitane agoke eya wane uku. Anu uku agale yakoa mootokoa Akolalike lukoa meki-kitipa keku ali atoameke Yone moa patukako wa Yesuyo akeneya.

²⁹Yesuyo okamo eni yatekete ali atoa peyameka takesi kue motokama yakene ali-kitameka ee nimini okono, Akolaliyo kiyoke-kama tokono, ke wa Akolali kei pia kakeneya. Yoneyo kiwi ue motokaneyake ni akeneya. ³⁰Parisi ali-kitameka Mosesene totono pine toa olaukane ali-kitameka nitameneya. Nipa Akolaliyo kini toatekoile wene toopiane toa toamadete wakeneya. Yoneyo kiwi ue motokameneya tokome nitaneya.

³¹Nitaneyake Yesuyo eya wa akeneya. No kaku-pete meki-kitipa kini tikileke ikilepa edeya adeka plane uku patu. Eya adeka plane ukuno, yakoe. ³²Mati-kiti makesike ulu toonali yotokete padekakitame eka e mati-kiti-pala kayo ekete ekete

tiabu toa kawati wa totome tulutu eya pukapekokolo yateketeke toamokoi. Nitamokoile enekete toto tumai meou toa komo lo oa kakoloka enika enileka kote tokale tumai meamadete wakoi wa ulu tootapekete akeneya wa Yesuyo pedia agale akeneya.

³³Nitoapa pine toawe a okome okome Yone einago nokome padeya neeka

gerepi po ku ueka noameneyake ipono oneke awitaneya tokome ni toko wa kime tea agale oa kakoi. ³⁴No Ali Yatenane Oyago eya kuya neeka gerepi po ku ueka nakule enekete ekete no i agopa nee kitipu kakoa noa gerepi po ku ue noa pia toko. Takesi kue motokama yaki ali-kiti-palaka Akolaline agale tagoa toamiki yene-palaka no i agome oya patu piko wa kime akoa agale iki. ³⁵Nimo wapa ikiyake tone agale yakoa motiki peyame ekete mone inapa Akolaline peku noa tadiki wa Yesuyo akeneya.

Poanele Toa Meane Atoame Yesuno Kawatake

Padeya Kalono Taneya Pekoa Yotokanemo

³⁶Parisi ago padame Yesu one yapu nee noano noo wa okale nipa pata wa einagono yapu pome mekome nee nakeneya. ³⁷Eni takepa poanele toa meane atoa pade meaneya. Yesu Parisi agono yapu ponome mekome nee nako wa akenemo yatekome padeya kalono taneya aua Yesu mekata nekeneya. Nipa alabase wa akene kueme latiane mete keneke mekoa aua nekeneya. ³⁸Nitoapa Yesuno mukiti lono nome kakome komo oa kakeneya. Yesuno kawatake komo loba pitikakome tege takaneyake one ludukiya witane pineme kawake pitane komo kqa one kawata nunu oa eina kalono taneya pekoa yotokoa taneya.

³⁹Nitikale enekome one yapu meatono noo wa Yesu-pala akene Parisi ago tepene wene kibutukome okome i agodo Akolaline agale akako ago meadekalepa nipa i one kawata mitikamotoko atoapa poanele toa meane atoa wa wene too wa wene kibutukoa meaneya. ⁴⁰Nitikale Yesuyo einago-pala okome okome Saimone nepala agale ouno, yakamene wa

okale okome Tikisago nipa yakouno, amene-kale okome ⁴¹ali takutame odenagonoke kue nami kakoa oia motaneya. Nipa panagome kina egeme kadukoa (50) nami kakoa oia motaneya. Ni padena agome kina noime kadukoa (500) nami kakoa oia motaneya. ⁴²Wa naniko einagota kini eni nami wiatekoi oi nokale kue toamokale enekome pinagome onena kue oto wa moamou wa kinike eina kue oto moameneya. Nile tokalekepa panago kue pinalike wene mekoa keneya memotoa padena ago oneke wedoa wene mekoa meaneyano, kue pinalike wedoa wene mekoa mekago mani ago-pe wa pitia yatekale ⁴³Saimoneyo okome kue tubeya nami kakoa oia motokagopa pinalime oto wa tubeya moameneyano, einago tadia pinalike wedoa wene mekoa meaneya wa okale okome wini okopa nimini oko wa Yesuyo akeneya.

⁴⁴Yesuyo nimo ootokoa einatoa lono peketapekome Saimone-pala okome i atoa i mekono ena. Nopa neke yapu tuapeane ugu nokouna-pete anu kawake kakene kege kōatekouna uepa pelesi kagonoke neme pekoa pikamokana. Nitamokanake i atoamepa anu kawake kakene kege one komo ueme tege takoa one pineme kogoia tokana. ⁴⁵Nemepa no nunu wamokanake i atoamepa neke yapu nokounata titimoa anu kawata pa nunu okoa meko. ⁴⁶Nemepa anu wagoke welo eya pekoa yotokamokanake i atoamepa anu kawatake padeya kalono taneya pekoa yotokatapeka. ⁴⁷Nitikakano, nepala ukumo yakamene. I atoa one i wene wedoa mekoa mekome tokolepa one poanele padele padele toma nokake mekane po letu wete kekamu taneya tokome ni toko. Wa panago one poanele

natele tuku wa wene piko agopa one poanele tokake mekane po letu keaneya mekomepa nipa one eni po letu kekane agoke wene wedoa mekamoko wa Yesuyo akeneya.

⁴⁸Nimo ootokoa Yesuyo einatoa-pala okome neke poanele toma nokake mekane po letu kekamu taneya wa okale ⁴⁹one-pala opia mekoi-kitame oote tekete ekete i agomepa i atoame poanele toma nokake mekane po letu kekamu tuku wa okome okopa edane ago mekome oko patu-koli ⁵⁰Yesuyo einatoa-pala okome nooke wini wene tugoa meke tokolekepa ne toa motaneya mekono, tepe kolotini mataketikaneya poano pa wa wetekaneya.

Pade Atoa-kitame Yesu Auapema Nekenemo

8 Naniko keneya Yesu ali atoa pitikoika tubeya takeka nateya takeka kutu pima yakomepa Akolaliyo ali atoa talo tokome tokomo kini wene epetekanemo i i wa mo wima yakeneya. Nitima pokaka one oya-lawe tuku kakoa (12) ali-kitame koua pekeneya. ²Pade atoa-meneka koua yakeneya. Einatoa-kitipa namolo ipono awitaneya mea eya kuya yene taneya mea taneyake Yesuyo kini tane yene latekoa ipono-pala takoa poe wa latekaneya. Pade atoapa Maria one pade ibini Magadala. Einatoake ipono tatono kakoa (7) awitaneyake Yesuyo takoa poe wa wetekaneya. ³Pade atoapa Yoana. Einatoapa eyago Kuusa natono. Einagopa ako tobou meane ago Erode onekeya-kiti yopikoa kakene ago. Pade atoapa Susana. Einatoameka pade atoa-kitameka Yesu one oya-laweka auapeatonno pato wa opia yakete kinikiya tatia auapema yakeneya.

Nee Lene Pitikama Pekene Agoke

Pedoa Akenemo

(Matiu 13:1-9, Make 4:1-9)

⁴Ali atoa peya mati Yesu kakata obonaneya. Nipa ta pitikoi peya kawa obomoa note kakala taneya. ⁵Nitaneyake Yesuyo agale pade pedoa okome okome ipe pinagome ipe ludu nee lene pitikama pekeneya. Nitima pokaka nee lene padekapa ka ludu paka tadoa pitaneya. Nitaneta ali atoame kawame kautoa kugutukaneya pikata ini pitoa note napekala taneya. ⁶Ni nee lene padekapa kue yaupea patu paka tadoa pitaneya. Nitaneta tumiake itono kau tootapeaneta tokome wete eni tototokoa tuaneya. ⁷Ni nee lene padekapa tonipo pake tadoa pitaneya. Nitaneta tonipo nee lene-pala odeneka dekoa witakome tukatapeneya. ⁸Ni nee lene padekapa itono epetaneyake pitakome leau akatapea witakome ku tukilepa ege kadukaka tatigime kadukoa (100) tukala taneya wa Yesuyo akeneya. Nimo ootokoa telo mati okome okome kipala ukumo yakou wa kale piyakoa kaki-kiti kime yakoati wane uku wa akeneya.

Akolaliyo Ali Atoa Pawe Toa

Talo Toatekale Papete Kaukoa Meaneya

(Matiu 13:10-17, Make 4:10-12)

⁹Nitaneyake Yesuno oya-laweme neke ina pedoa okana agale pine edoa piko-pe wa pitia yatekoli okome ¹⁰Akolaliyo one ali atoa talo tokome tokolepa papete kaukoa mema nokoyake opi kiwi keleyo oyameteku. Nitikuyake ete ali atoa-palapa pedoane agale-kama oane meteku. Enipa kini leneme enekile enoa moamao kaleme yatekimo yakoa

moamao tomotoane tekene ni tuku wa Yesuyo akeneya.

Nee Lene Pitikama Yakene Agoke Pedoa

Akene Agale Pine Toaweia Akenemo

(Matiu 13:18-23, Make 4:13-20)

¹¹Ina pedoane okouna agale pine dikoa pikono, yakoe. Ipe nee lenepa Akolaline agale toko-la. ¹²Nee lene ka ludu tadoa pitane adeka pikounapa eya tiki yeneke okouna. Akolaline agale yakatekoa pa mekilika Setanu nokome einagale kini tepene meaneya katekamoa poko. Nipa einagale yakoa motikili Akolaliyo toa motokaya tokolo ni katekamoa poko. ¹³Padeka nee lene kue yaupea patu tadoa pitane adeka pikounapa eya tiki yeneke okouna. Pade ali atoame eina agale yakoapa ke wa lukoa wedia meki. Nitiketeki einagale kini tepene teke wetekameneya tokome Akolalinele pa tekei takoa meki. Wa naniko kiwi etepea pomotoa ele kuleme likolopa Akolalinele takoa te witikoa waki. ¹⁴Padeka nee lene tonipo pake tadoa pitane adeka pikounapa eya tiki yeneke okouna. Pade-kitame einagale yakoa motikiyake kinikiya mama moa ni kini kamoya-kitike wene piitiko meka enika enile tikileme Akolalinele agale moa kautako. Nitane yene tokome ku tuamou toa etepea yaki. ¹⁵Padeka nee lene itono epetaneyake pitane adeka pikounapa eya tiki yeneke okouna. Pade-kitame einagale yatekilepa wene epetaneya mea yakoa motiki. Nipa ipe kakoya nee ku wedoa tuou toa Akolalinele takoa togaki wa Yesuyo akeneya.

Labo Toekele Pedoa Akene Agale

(Make 4:21-25)

¹⁶Panagome-kiti labo toele udukoa yapu aua nokomepa eya toamoko.

Okolo moa kaulogamoa ni walai kenekeka piamoa toko. Nitameneya ali atoa yapu tuapea nikita pa keleyo witamotoa tokome labo piatikiya waneke-kama udukoa piko. ¹⁷Padele padele kaukoa toma yakolepa naniko keleyo witatekole toko. Padeya padeya paigakoa pikoya-kiti naniko keleyo pikale peyame enetapei. ¹⁸Nipa Akolaline agale paya nou toa yatekayano, wedoa yakoa moamene. Akolali one i peku wedoa nako agopa nipa Akolaliyo one pekupa wedoa lawetema poo. One peku alekoa nakagopa nipa one alekoa nakene pekupa wene toane noane tuku wa wene pikoyake Akolaliyo agopa takoa atukoo wa Yesuyo akeneya.

Yesuno Nine

Wamene-mikitike Akenemo

(*Matiu 12:46-50, Make 3:31-35*)

¹⁹Einapetepa Yesuno nine wamene-mikitika nokoli ali atoame edea takatapeneya tokome one kakata lekoa poatekoi kene piameadeka. ²⁰Nitua pa kakoli enekome panagome nekaua nekameyo-mikiti ne enadete akolono note kakina wa okale okome ²¹Akolaline agale yakoa tiki ali atoapa agauaka anu wamene-mikitika eni wa Yesuyo akeneya.

Pupulege Tadalita Uu Okoa Kakeneya

Kawikanemo

(*Matiu 8:23-27, Make 4:35-41*)

²²Padepetepa Yesu one oyali-kiti-pala ue dipike peapetekoa pome mepokome okome ue mine eka matanuke mea patoe wa okale mea pekeneya. ²³Mea pokoiika Yesu mea atu pitaneya. Atu eni pitikakoa ue mine pupulege tadalita uu oa ketipea awitikanokome ue-pala pewikanokome ue dipi patua pitoa atukademe taneya. ²⁴Nitademe tokale

one oyali-kiti one pitikaya liti tegeteka tegeteka toa mekete kamotokakete ekete Ali Muno Ali Muno toto ueme atukamedekono, kamao wa okoli kamokakome pupulege-pala pewikakoa kakene ueta kikoa okome okome kapakoa wa wa okala teigalogakome tooko lapa eyaka wametekoa kilikoa meelogaka. ²⁵Nitua teitatapekale one oya-lawe kikoa okome okome nooke wedoa wene tugamekete tadiki wa okale oote tekete ekete pupulege ue minetameka i agome ta wa okole eni yakoa tokono, Yesupa edoa ali kakome tokoto patu wa piti tokale ka oa kakeneya.

Yesuyo Ipono Awitane Ago Latekanemo

(*Matiu 8:28-34, Make 5:1-20*)

²⁶Galili ue mine eka matanuke ue dipike eni mea pote Gegesa yenane take witapaneya. ²⁷Galili ta-pala eni tata eni ue mineme oto piitakutukaneya. Yesu eni ta matanuke katepitakaka ipono awitane ago pade ali atoa pitikoika kawa kotua nekeneya. ²⁸Einagopa koto mamina kawamoa yapu kilikoa piamoa taneya. Nipa ali atoa oloyo toai taneka pa yakeneya. Ni ago Yesu kotukome one kawane pitakome ka telo okome okome ako odene meko Akolaline mana Yesu nepa nopala edele toade noka-pe. No tete meamoano, wa-ye wa kowitaneya. ²⁹Nipa Yesuyo poane ipono ne winago takoa pa wa okale tokome kowitaneya. Eni ipono einagoke lugutukoa awinokale ete ali-kitame dekoa moa kapa po kakoa kapa tepo mekoa tokala taneya. Nitikolika kugutukoa tadekatapekale iponame einago ali piamene ta ludu leau akoo aua yakala taneya. ³⁰Nitane ago Yesuyo yatekome okome neke ibini tepe wa okale okome anu ibinipa pitikali wa akeneya. Nipa oneke ipono peya mati awikolokaneya tokome ni akeneya.

³¹Nitaneyake ipono-kitame Yesu kowitikete ekete geyo nine plane koa keneke wetekamea wa kowitaneya.

³²Nipete einakeya liti tonu kebonoke kai peya mati kimi ke noa kakeneya. Nitaneyake ipono-kitame kowitikete ekete toto opi kunuka kunu kaike awiponono, wetekoa ta-koli okome ³³nipa poe wa okale takoa pootapekete e kai-kitike awipaneya. Nitikoli einaka eina kai tonu payaneke kawa palake ketipea kikilikoa pote atutapeneya.

³⁴Nitikoile enekete einaka eina kai egetane yene pitoa pootapekete ali atoa ta latia pitikoikaka tayo yapu luduka eni tanemo oa pupitikama pekeneya. ³⁵Nitikoli yatekete edele taneyake ikiti patu wa enadete nekeneya. Nitoa Yesu kakata note enekoli ipono takoa pootapeane ago mamina kakeneya Yesuno kawane wene kiyo akaneya mekale enekete ekee wa piti mati tokale kakeneya. ³⁶Nitikoli eida kakete enile tokale enane yename ete dika dika wa Yesuyo ipono awitaneya yakanakago latekanemo toawe akeneya. ³⁷Nitikoli yatekete eni Gegesa take mekoi peyame kini ta tewitikoa pa wa Yesu kowitoa kakeneya. Nipa tepene piti lobutukale kakete ni akeneya. Nitikoli ue dipike peapetekoa poademe kakaka ³⁸ipono takoa pootapeneya mekagome Yesu ne-pala odenekata yatono pato wa kowitikale okome nitamatono, ³⁹neke yapu poano pa. Akolaliyo nepala tokamo tubele eni tokana ali atoa eneke toawe oano pa wa wetekakale ali atoa ta latia pitikoika pokome Yesuyo tubele toa one latekoa tanemo i i wa oa pupitikama pekeneya.

**Tobou Agono Kono
Tuaneyake Kamotokanemo**

(Matiu 9:18-26, Make 5:21-43)

⁴⁰Yesu Galili ue mine oka lono waka-pea nokale ali atoame ke wa wedia makutukoa motaneya. Nipa peyame one

nomotoa nepia kakete ni taneya. ⁴¹Nitoa kakoika Dairasi wa ibini akene ago losu yapu yopikago nokome Yesuno kawane witipitakome one yapu wete noo wa kowitoa kakeneya. ⁴²One konakoma one odene opiane kono tuademe yene taneya pikale ni akeneya. One kono opitikaneyake mali tuku kakoa (12) tadiya ponokale tuatoa meaneya.

Einagome ne noo wa kowitikale nitouno pataoe wa Yesu poademe pokale ali atoame Yesu apua takoa unukamoa pekeneya. ⁴³E ali atoa pakeke eya atoa mali tuku kakoa (12) ponoka toa kamate yokoa kakene atoa Yesu litima nekeneya. Papete einatoa dokosa ali mekoika latekamotoa pokala taneyake padameka one latekakile toameneya. ⁴⁴Nitaneyake einatoa Yesuno mukiti lono lekama nokome one tokoo kakene mamina nami mitikatekaneya. Nitikale eina eina one kamate pegetoa yotokana toa yoameneya teitapeneya. ⁴⁵Nitikale Yesuyo noanu teyo mitikakato-pe wa okale peyame no mena wa okoli Pitayo okome Ali Muno ali atoa apua takoa ne unukamoa mitikakoa tikino, dekolo oko-pe-kale okome ⁴⁶padame no mitikakile toka. Anu tele padeke weamutukome tadekolo ni uku wa Yesuyo akeneya. ⁴⁷Nitikale inakeya teitakale akedekono, i ago mitikakoule one-pala kaukoane meamele toamoko wa einatoa kolu kolu nokale Yesuke nokome kawane witipitaneya. Nitikome e yene kakakoa eya takamotoane yoname mitikatekakou wa one mitikatekakale eina eina latekakanakamo toawe okale okome ⁴⁸anu kono nooke wini wene tugoa meke tokoleme ne latekakolo uku. Neke tepe kolotini kilikoa pimoto no pa wa wetekaneya.

⁴⁹Yesuyo nimo oa kakaka tobou agono yapu pitikakago pade nokome okome neke konakoma tukome tukano, mone i tikisa ago polipo takakoa

kawamea wa okale yatekome ⁵⁰Yesuyo tobou ago-pala okome okome no i agome neke kono oyake latekamele toko wa piti toameneya mekalapa latoa kawoo wa oomotokome ⁵¹yapu pome kakome okome Pita Yoneta Yame toa akomane etene ninetaka no-pala opia namene. Ete yene akolono meati wa tuapea pekeneya. ⁵²Nitaneta tumaika nekene ali atoa peya tuatoake koma kata pitikoa kakeneya. Nitikoli enekome Yesuyo okome i akoma tukome tuaneyana menano, pa atu pia mekono, koma wameo wa okale ⁵³peyame i akoma etene tukome tukano wene tekete tokome Yesu yau takaneyana. ⁵⁴Nitimotoake eina akoma tukome tuaneyana pianeta pokome one yono mootokoa kayo okome okome anu akoma wete kama wa okaka ⁵⁵one yomini wakapea nokale wete kamokoa kakeneya. Nitoa kakale okome one nee wete takoa lawetoe wa Yesuyo akeneya. ⁵⁶Nitaneyake etene nineta wene kainya pianeya kakoli okome anume i tukumo toaweana wamea. Pa kini lukoa meati wa oa tukaneyana.

**Yesuyo One Oya-lawe
Tuku Kakoa (12)**

**Akolalinele Takama
Pomotoa Wetekanemo**

(Matiu 10:5-15, Make 6:7-13)

9 Yesuyo one oya-lawe tuku kakoa (12) one kakuta oboa noe wa kayo oa motokome okome noanu tele patu kautakoa kakete eya toma poatino poe. Ali atoake awitane ipono takoa poe wa wetekatapea kini tane yene latekoa toma poatino poe wa moa wetekaneyana. ²Nipa Akolaliyo ali atoa pawe toa talo tokome tokomo i i wa oa aua yawa kini tane yene latekoa to-motoa wetekakome okome ³kiwi eni peketepa pa pima yamene. Nipa iti toua

moamoa ka ua poamoa palawe waneka kueka ua poamoa tamene. Kini tigini mamina odene kakeneya peketepa pade-pala aua poamoa tamene. ⁴Nitoa pima yawa ta padeka pote meketepa yapu yapu yawameneya eida odene yapu-kama mea kawa pokala tamene. ⁵Nitima yakoli pade yapu pitikoi-kitame kini yapu noe wa makutukoa moamokolipa nipa kini yapu tewitikoapa Akolaliyo kiwi kote motokolo tuku wa kini kawake kakene kege kōketikoa tewitikoa pokala tamene wa Yesuyo wetekaneyana. ⁶Nitaneyake ali atoa ta latia pitikoika pima yakete Akolalinemo i i wa mo wia kawa kini tane yene latekoa toawineya pekeneya.

Erodeyo Yesunomo Yakanemo

(Matiu 14:1-12, Make 6:14-29)

⁷Tobou ago Erodeyo enika enile tanemo-kama yakatekoapa wene kainya pianeya meaneya. Yesukepa pade-kitame ekete ali atoa ue motokama yakana Yone tukome tuaneyake wa kama noko wa oa, ⁸wa pade-kitame ekete Ilaida taatekoa noko wa oa wa pade-kitame ekete Akolaline agale papete akane ago tukome tuaneyake kama noko wa agale oa takoa pilia kakeneya. Nimo okoimo yakatekoa Erode wene kainya pianeya meaneya. ⁹Nitikome okome Yone kabe teigamotoane tokounano, i tanemo-kama yateku agopa te patu wa Yesuno lene timini enademe akeneya.

Yesuyo Ege Egeta Kadukoa (5,000) Ali

Nee Lawetanemo

(Matiu 14:13-21, Make 6:30-44, Yone 6:1-14)

¹⁰Yesuno Aposelo ali tuku kakoa (12) Yesu mekata wakapea nekete kini toma yakoinakamo i i wa ootapekoli okome nipa padeka poti witimotekete patono

noe wa Besaida wa ibini akene take aua pekeneya. ¹¹Nitaneyake Besaida take pekete tiki wa akenemo yakamotekete ali atoa one eni mekata litia nokoli oneme makutukoa motaneya. Nitoapa Akolaliyo ali atoa talo tokome tokomo i i wa toawe a oa kini tane yene latekoa taneya.

¹²Lou eni pene pipademe tokaka one oya-lawe tuku kakoa (12) one kakata eida nekete ekete ipa ali atoa piamene taano, ali atoa ta latia pitikika tayo yapu luduka pote nee topo toa pipoatino poe wa wetekamene-koli okome ¹³nitamouno, kini noatiki neepa kime motokoa lawetamene-kale ekete tone neepa palawe wane ko kakoa-pala mou yomo takuta toa eni-mene odene pikono, i ali atoa adekoa noatiki toa totome nee edoa topo toa motokapomotoa-pe wa akeneya. ¹⁴Nipa e yene kakene toa oi motokoli ali ege egeta kadukoa (5,000) tadiya kakedekoli ni akeneya. Nitaneyake i yene ege kadukako toakama (50) payapono pia mekala tomotono toe wa Yesuyo okale ¹⁵e yene peya edikoa kilikoa mekatapeneya. ¹⁶Nitikoli palawe wane ko kakoa-pala mou yomo takuta toa moa pikoa kakome ate tibuke nepikakome Akolali-pala ke wa ootokoa popimotokome i ali atoa tatikoatino poe wa one oya-lawe mekala taneya. ¹⁷Metekale moa tatika tatika topokoli peyame moa noa tagatapea kipitu meaneya. Nitaneyake kugu paka pitaneya wekotoa moa ua ka katika tuku kakoa (12) mako puputua moa pianeya.

Pitayo Yesu Nepa Keraisu Wa

Toawe akenemo

(Matiu 16:13-19, Make 8:27-29)

¹⁸Wa padepete Yesu witimotokome pome mekome kowitikata one oya-lawe one-pala eida opia mekoli pitia yatekome okome ali atoame no te kaku

wa ikiti-pe wa okale ekete ¹⁹padekitame ne einagopa ali atoa ue motokama yakanakago Yone wa oa ni padekitame ne einagopa llaida wa oa ni padekitame ne einagopa Akolaline agale papete toawe akane ago tuutukaneyake wa kamo nokome toko wa iki wa okoli okome ²⁰nimo wapa akedikiyake kime no te kaku wa iki-pe-kale Pitayo okome nepa Keraisu Akolaliyo one wa papete takoa kakapiane ago wa akeneya.

Yesuyo One Tete Moa Tua Toatekamo

Toawe a Oopianemo

(Matiu 16:20-28, Make 8:30-9:1)

²¹Nitaneyake Yesuyo okome okome Pitayo ina okamo odene ago-palaka toawe wameamene wa ootokoa okome ²²no Ali Yatenane Oyagome tete-kala moane kawou. Nipa Kanosolo ali-kitika Akolalike lodo yotokoai tiki tobou ali-kitika Mosesene totono pine toa olaukoa tiki ali-kitika enika eni ali peyame no kote tokale wawa wia tukoi. Nitikolika ta tebolo takoa pataka-pete Akolaliyo moa kamotokoo wa Yesuyo akeneya. ²³Nimo ootokoa e yene peya-pala okome no i ago litima nou wa wene pikagopa nekele tewitiko wamene. Nipa ne wia dekatiki yomo aua nou toa tete moko kakeka no litima namene. ²⁴One kepene mama motokome tukaya wa piti motoko agopa etepea tua poo. Nitameneya no einagoke toane tuou wa one kepene mama moamoko agopa pa mea kama poo. ²⁵Panagome-kiti one yomini atukome atumotoake itonoke pia kawa tokoya peyado mootapeadekalepa edeya weike moamoo. ²⁶Panagome noka anu olaukakou agaleka ya motokome wakalepa nipa no Ali Yatenane Oyago telekole toane wakapeane nekene oneka ya moane waou. Agetaika one wene

kīyo akeneya meki edelo ali-kitika pā teleta tootapeneya meki toane meane wakapeane nekene nitou wa Yesuyo akeneya. ²⁷Nimo ootokoa okome ita kaki-kiti padeka-kiti wetē tuameneya mekete Akolaliyo ali atoa pawe toa talo tokole enoi wa Yesuyo akeneya.

**Yesuno Lene Timini
Eya Pā Tootapenemo**

(Matiu 17:1-8, Make 9:2-8)

²⁸Yesuyo einaka einamo ootokaneyake ta pataka ketepo kakoa (8) tadia ponokale paka witimotokome pome tonō tobouke Akolali kowitademe ate lewia pekeneya. Nipa Pita Yameta Yone toa aua pekeneya. ²⁹Aida kowitōa kakaka one lene timini padele tootapea one kakene maminaka yati yati toa ake tootapea taneya. ³⁰Nitaneya kakata ali takuta Mosese Ilaidata kotikatapea nekete one-pala ko oa kakeneya. ³¹Nipa pā teleta tootapeneyata kaketepa oneke papete oa plane toa taatekakome Yerusalemē take pokome tuateka ko oa kakeneya. ³²Nitōa kakoika Pita one oyagotaka pia kadukatapea mea kamokoa enekoli Yesu pā tootapeneya kakenele enoa one-pala opia kakene agotaka enoa taneya. ³³Einagotame Yesu tewitikoā poadete pokōika Pitayo okome Ali Munō kiwi ko oa kakita toto odeneya kakono, epetekono, neme nitika wa okalepa nipa aga yapu tebolo Mosese kita Ilaida toa kini wikakakala too wa akeneya. Enipa wene bebo akatapeneya kakome wene toamokome akeneya. ³⁴Enimo oa kakaka wedome agopa takoa kauma nokale Pita one oyalitaka piti tokale kakeneya. ³⁵Nitōa piti tokale kakoika wedo keneke agale ludu nokome okome wini agopa anu mana anu takoane kakapikou agono, one oka toa yakoa tamene wa okale

³⁶yakoa enekoli Yesu odene kakedeka. Nitaneyake kini eni enekoinakamo enipete-mene pā kini luaneya mea odenago-pala i i wa toāwea ikileka toameneya.

**Ipono Awitaneya
Meane Mati Latekanemo**

(Matiu 17:14-18, Make 9:14-27)

³⁷Podolikama eni tonō tobou wane kōa pokoli ali atoa peya mati obomōa Yesu kotunaneya. ³⁸Nitōa oboa kakoita panagome kayo okome okome Tikisago, anu manago i pikono, ena. Onepa anu odene opikouna agono, enoa latekakamene. ³⁹Oneke ipono awinokolo kā wa telo ootapekala toko. Nitane ipono awinokome peteka peteka tokolo timini kabunuke lako kāua yotokoa kakala toko. Nipa mati tewitikoā poamademe wakala toa dika dika toamene tete mekala toko. ⁴⁰Nitikala tokolo tekene neke oya-laweme eni ipono takoa wetekakoe wane auane nokounake takoa wetekaku pekete wili toa wakoi wa etename akeneya. ⁴¹Nitikale yatekome Yesuyo okome ae ipete meki-kiti kime Akolalinele takamōa wene moa koiganeya mea tikino, kini eni poane wene tewitikoā wamotoane edoane nepiane meamou wa ootokoa matiyane etene-pala okome neke mana mati no kakuta aua noo wa okale ⁴²manago noka noka ipono awinokome itonoke telo moa pitikoā peteka peteka takaneya. Nitōa kakaka takoa pā wa Yesuyo ipono takoa wetekakome mati latekaneya. Nitōapa neke mati ino moa wa etene metaneya.

⁴³Nitaneyake Akolaline tele patu kautakoa kakome tokale enekoi peyame ilepa i tokono enatoe wa kā oa kakeneya.

Yesuyo One Tuatekamo Lokoa Akene Agale

(Matiu 17:22-23, Make 9:30-32)

Yesuyo padele padele tokaleke e ali atoa peya wene kainya pianeya kakete ka oa kakoika Yesuyo one oya-lawe-pala okome ⁴⁴kiwi-pala i ukumo we-doa yakoa moa wene taneya meati. No Ali Yatenane Oyalipa pade alikitame wimotoa panagome ete moa meademe toko wa okale ⁴⁵yateketeke kini wene agopa takatapeneya tokome wene toameneya. Nika neme wini okopa edemo wa eke oko-pe wa yakamene piti tokale meaneya.

Kiwi Kako-kitipa Mainago Ako Ago-pe

Wa Oa Takoa Pili Pili Toa Kakenemo

(Matiu 18:1-5, Make 9:33-37)

⁴⁶Yesuno oya-laweme kiwi kako-kitipa mainago ako tobou meateko ago-pe wa oa takoa pili pili toa kakoika ⁴⁷kini tepene pikoi wene tetoa enekome mati pade motokome one kakaya liti kakakome okome ⁴⁸panagome-kiti dikane de mati deya nooke toa makutukoa motokomepa nipa no eni dekoa makutukoa motoko. Ni panagome-kiti no makutukoa motokomepa nipa no moa wetekaka ago dekoa makutukoa motoko. Anu oya-lawe kiwi keku agopa Akolaliyo ako ago tetepo takoa meko wa Yesuyo akeneya.

Kipala Poi Teiamoko Agopa

Kipala Kibutua Kako Ago Eni Wa Akenemo

(Make 9:38-40)

⁴⁹Yoneyo Yesu-pala okome okome Ali Muno anu ukumo yakamene. Panagome neke ibini wedekoapa ali atoake awi-

tane ipono-kiti takoa wetekakala tokale totome enekoo. Einago toto-pala opia yako ago toamokolo tokome wa pade dikamea wa kioa okoo-kale okome ⁵⁰toa kamotono, wa pade edikoa kioa wameamene. Kiwi-pala poi teiamoko agopa kiwi-pala oya kakoa auapeko ago eni wa Yesuyo akeneya.

Sameria Yename Yesu Wakenemo

⁵¹Akolaliyo Yesu a tibuke aua poateka tigotokale Yerusalemepada wa pitimooa pekeneya. ⁵²Nittoa poademe pokome ali pade-mene patepoe wa wetekakale pote Sameria yenane ta padeke Yesu noatekale nodokakadete pekeneya. ⁵³Nitikoli eni take yename ekete einago Yesu mone Yerusalemepa take poademe pokono, Yu ago tadekono, makutukoa moamato wa wakeneya. ⁵⁴Nitikoli enekete one oyalita Yame Yonetame ekete Ali Muno toe a tibuke itipono akeneya pitakome i yene wia nootapemotono ta wa totame Akolali kowitikamotoa oko-pe wa okoli ⁵⁵Yesuyo ete peketapekome wawe wa einagota kioa oomotokome ⁵⁶one oya-mikiti-pala pade take pekeneya.

Yesu Litima Pekete Toatekomo

(Matiu 8:19-22)

⁵⁷Yesu one oya-laweka ka ludu kutu potokakoa panagome Yesu-pala okome okome ne pokoka litima pou-kale okome ⁵⁸yanai ini eya kini piatiki yene pikoyake Ali Yatenane Oyago pade no naliyomo mokoane platekuyaka toamoko wa akeneya. ⁵⁹Wa panago-pala one pukuka litima namene-kale okome age-tai tuaneya pikono, oloyo toomotekene nee litima nou-kale okome ⁶⁰Akolaliele takamekete tuaneya piou toa pa meki-kitame tuane ali atoa oloyo tomotono, tokamota. Akolaliyo ali atoa pawe toa talo tokomo oa pupitikapoano pa wa Yesuyo akeneya. ⁶¹Wa panagome

okome Ali Muno ne pokoka litima noad-ene tukuno, nitadeneke namolo takoane anu yapu pitiki-kiti tebeane lionate opou-kale okome ⁶²panago one nokana lono kabe takakoa pou toa tokome one namolo tokanakaleke wene piitikaneya mekomepa nipa Akolaliyo talo toko take pamele toamoko wa Yesuyo akeneya.

**Yesuyo One Oya-lawe
72 Takoa Motokome**

**Akolalinemo Oa
Pupitikamotoa Wetekanemo**

10 Wa naniko Ali Munoyo one oya-lawe ege odepeta kadukoa wa lene kolo kakoa (72) ali-kiti takuta takuta wa takoa moa wetekakala taneya. Ali atoa ta latia pitikika tayo yapu luduka one nani noateku toa kiwi namolo takoa pima yawatino poe wa wetekaneya. ²Wetekakome okome ipe nee kakoya wakoa momotoa nodokoa kibutukakoa kakoyake eni ipe ludu wakoa moatiki yene natetekoa kakino, Akolali eya wa kowitikamene. Ipe nee kakoya wakoa mou toa neke ali atoa motokamotono, neke pupu yene wete takoa moa wetekoano ta wa Akolali kowitamene. ³Poatino poe wane wetekakilepa lene pianeya yo tane tue-kiti yakika sipi sipi kai tine moane wetekou toane tukuno, eya toma pamene. ⁴Kue ka ua poamo ni padeya-kiti uatiki kaka ua poamo ni kawa yeneka mekoa poamo tamene. Pake pake ali atoa kotuketeka ko wameneya pa ponokala tamene. ⁵Yapu pade tuapea peketepa i yapu pitiki-kiti tepe kolotini mataketikoa meamene wa namolo takoa amene. ⁶Nitoe ootokoa kakete enekoli wene ko akeneya mekago meadekalepa kini okoi agale einagoke weamutukome one tepe kolotini mataketikoa mekoo. Dikane ago pade eida

meameadekalepa nipa kini oa metekoi agale pedekome pinali-kiti kiwike weamuoo. ⁷Panagono yapu tuapea peketepa pa eida-kama meamene. Nee ue eya takoa metekoiya moa namene. Ni edoa-mo. Panagome-kiti panagono pupu takakolopa one eni pupuke kue eya moateko toa pupu pinagome meamedekolo ni ukuno, yapu yapu pima yawameamene. ⁸Ali atoa ta latia pitikoika pokoli makutukoa motekete ue nee eya takoa lawetekoli padeya kekaneya latikameneya peya moa namene. ⁹Nitoapa yene taneya pikoi-kiti kini tane yene latekoapa eya wa oa tamene. Akolaliyo ali atoa pawe toa talo toateko tigotokama noko wa amene. ¹⁰Wa ta padeka pokoli makutukoa moamokolipa nipa kini yapu ludu patukakete ekete ¹¹kini ta ludu piko doo tone kawake kakeneya opi tadekakilepa kiwi pubu ekete tokono, eya wa wene taneya meati. Akolaliyo ali atoa pawe toa talo toateko tigotoma noko wa eni yene tewitikoa pamene. ¹²Ae, wipitia ta pataka-pete Akolaliyo ali atoa takoa enoa kibu motokomepa kiwi makutukoa moamokoi yene dika dika toamene tete meoo. Nipa Sodome take yename panele tubele-kama tokoike nami wia tete meteka toa moa patukoa tete ako mati meoo wa Yesuyo akeneya.

**Korasine Besaida
Kapaneame Ta-meneke**

**Pitikoi Yename Yesu
Wakeneyake Akenemo**

(Matiu 11:20-24)

¹³Ae, Korasine ta-pala Besaida tata pitiki yene kiwi pubu ukumo yakoe. Kiwi pakeke ele kule tubele mati toma yakounakale mone Taia Saidone tata ludu toma yawou tokapa nipa kini namolole tewitikoa wakete palu wa-

tea kuku yotokatapea toi toka. Mone yenameke dikoa wete toi tokake kime pade nitamokoina. ¹⁴ Akolaliyo ali atoa takoa enoa kibu motoka-petepa mone Taia Saidone tata pitane ali atoa tete meoo. Ae, eni tete meteka toa moa patukoapa Korasine Besaide tata pitiki yene kiwi dika dika toamene tete meoona, nepiamene. ¹⁵ Ae, wini Kapaneame take pitiki yenepa Akolaliyo kiwi a tibuke moa kamotokoona wene pianeya meki-pe. Akolaliyo nitameneya poane take poe wa kiwi moa pitikoo.

¹⁶ Anu oya-lawe kini agale yateki yenamepa anu agale-pala dekoa yateki. Kini agale yakamoa kiwi waki yenamepa anu agale-pala dekoa yakamoa no waki. Anu agale yakamoa no waki yenamepa no moa wetekaka agono agale-pala dekoa yakamoa one waki wa Yesuyo akeneya.

Moa Wetekane Ali-kiti Wakapea Nekenemo

¹⁷ Yesuyo ege odepeta kadukoa wa lene kolo kakoa (72) moa wetekane ali-kiti one mekata wedianeya wakapea nekete ekete Ali Muno neke ibini wedekoa ta wa okoole poane ipono-kitameka yakoa tokoi-koli okome ¹⁸ Setanu a tibu kawa pitakitikakale enekou. Nipa katiapale tane tetepo tootapekome pitakale enekou. ¹⁹ Yakoe. Ali tania tukako kaya-kitika kaala-kitika wia kautakoa ni kiwi-pala poi teiane ago Setanuno tele moa kawikoa toino, anu tele patu kautakoa kakete nitoi wane eni toatekoi tele lukakouna. Nitikounano, padameka kiwi toa potokamele toamoo. ²⁰ Takoa poe wa ikili ipono-kitame yakoa tikike wedia kawameamene. Nitameneya, Akolali a tibuke mekome kini ibini one bokuke wia mekaneyano, kee wa wedoa wedia kamene wa Yesuyo akeneya.

Yesu Wedia Kakome Akolali Ke Wa Akenemo

(Matu 11:25-27, 13:16-17)

²¹ Einata einapete Yesu Epetane Yomini patu kautakoa kakome wedikome okome Atai Ali Muno itono tibuta yopia kako ago nepala ke wane uku-ye. I uku agalepa pa nana mati keneya meki-kiti i i wa neme wene taka taka tokoyake itono peku wene toa naki-kiti wene takameke pa neke luaneya mekono, ke wane ni uku. Atai, neke widikakepa neke epene wene-kama piko toa litiapa dikou wa wene toopikanakale taatekoa toko wa Yesuyo Akolali-pala akeneya. ²² Nimo ootokoa okome Agetaiyo one tele patu kautakoa kama pamene wa one peku no lawetetapeka. Nopa dikane ago wa padameka wene toamikiyake Atai Akolaliyo wenepa toko. Atai Akolali onepa dikane ago wa padameka wene toamikiyake one mana noanume wene tuku. I alime i atoame Agetai wene tomotou wane takoane moane kakaku-kitameka Atai Akolali wene tiki wa Yesuyo akeneya.

²³ Nimo ootokoa kakomepa ete-kitame yakamomotoa one oya-lawe kakoi lono ete peketapekome okome kime i enoa kakile-kiti enoa motiki ali atoapa kolotine meoi. ²⁴ Kipala i ukumo yakoe. Kini leneme enoa kaleme yakoa tikiya-kiti ali kainya matiyame enoane yakoane toadiya wa papete nepia meaneya. Nipa Akolaline agale toawe akane ali-kiti ni ako meane tobou ali kainya matiyame nepia meake enoa yakoa toameneya mea pa tuma-kala nekeneya.

Sameria Take Agome Yu Ago Auapeanemo

²⁵ Mosesene totono pine toa olaukoa tane ago pade Yesu kakata nokomepa i agopa wene meane ago patu wa pitia yatekome okome Tikisago, edele

tekene meane kama pou-pe-kale okome ²⁶neme wini okolekepa Moseseno totonoke edemo wa wia mekaneya-pe. Eni agale oi motikilepa edemo wa wia mekanemo oi motoko-pe-kale okome ²⁷neke Ali Muno Akolalike wedoa wene mekoa meamene. Nipa neke tepe kolotinime toa neke yominime toa neke teleme toa neke weneme toa tamene. Ni pinali neke wa wene mekoa mama motoko toapa yete pade ali atoakeka wene mekoa mama moamene wa wia mekaneya piko wa okale okome ²⁸neme wini okopa nimini eke okono, wini okana toa toma pekepa nipa mea kama poo wa akeneya.

²⁹Yesuyo nimo okale one wene muno meaneya mekome akene tetepo takamotoa okome okome Moseseyo yete pade ali atoake wene mekoa mama moamene wapa edane ali atoake okome akeneyape wa okale Yesuyo eya wa pedoa agale akeneya. ³⁰Panago-kiti Yerusalemé ta piimotokome Yeriko take keti poademe pekeneya. Poademe pokomepa ali wia kinikiya odomoa pokala tane ali-kiti kotukale one mamina eya odoa moa layo toua witaneya. Nitikete einago tuademe pimotoa pekeneya. ³¹One eni tuademe pikata Akolalike lodo yotokoai tane ago pade ka ludu naniko nokome enetekoake pa pimotoa eka kebonoke kokotokoa patukoa pekeneya. ³²Wa naniko Lipai yatene ago pade einata einago tuademe pikata nokome enetekoake eina toa pa pimotoa eka kebonoke kokotokoa patukoa pekeneya. ³³Nitikala taneyake mone Sameria take ago ka ludu nome enekale einago tuademe pikale enetekoapa ela moa ³⁴pinele pome one witaneka peto-pala gerepi po ku ueta pekoa yotokatapea togotokaneya. Niti-tikoa one dogi kai tali waneke mekoa ali atoa dekoa piyai tane yapuke aua pome pikoa meaneya. ³⁵Nitoapa podolikama

tewitikoa poademe kakome eni yapu talo tane ago kina takuta metekome okome i ago pikoa meano ta. Nee ue eya lawetekoya-kiti i kueme topo toa motokakale adameadekalepa nipa oto wakapeane nekene nami wiane kue pade meou wa pekeneya. ³⁶Eni witane ago tuademe pikata ali tebolo nokala taneyano, odene agome einagopa one oyago tetepo takaneyano, mani ago-pe-kale okome ³⁷one ela moa auapeka agopa einago eni wa okale okome nipa one eni tane toa toomoa pamene wa Yesuyo akeneya.

Maasa Mariatane Yapu Yesu Ugu Pekenemo

³⁸Yesuyo pato wa one oya-lawe-pala kutu pome ali atoa ta latia pitikoi take witapaneya. Nitikale atoa pade Maasa wa ibini akene atoame one yapu ne noo wa makutukoa motaneya. ³⁹Nitaneyake eina atoane wamene atoa Maria wa ibini akene atoa Yesuno kawane nome mekomepa one olaukoa oka agale yakakoa meaneya. ⁴⁰Nitua mekaka Maasa one pupu nami namita kakale tokome tepe we taneya mea Yesu mekata nokome okome anu wamene atoame anu kidene nee eya takoane pupu tomotoa wawa i nome mekono, neme no ela motekepa nipa no neke wamene atoa auapeano pa wa wetekamene wa okale okome ⁴¹ae, anu oyatoa Maasa ne-pala ukumo yakamene. Pa pupu toatekoya-kala tokoa kake teke wene keda taneya mea tepe-pala we tokolo winipa oko. ⁴²Padele epetaneledo katekoa neme toameadeko. Enilepa Mariayo anu i laweteku peku noada wa yakakoa meko. One i yakoa motokoya padame katekoa moamele toamoko wa Yesuyo Maasa-pala akeneya.

Kowitikete Oatekomo Olaukanemo

(*Matiu 6:9-13, 7:7-11*)

11 Wa padepete Yesu padeka kowittoa meaneya. Kowititikoa mekale one oyago pade nokome okome Yoneyo one ue motokane yene kowitikete toatekoile olaukane toa toto olaukoa ta-kale okome ²Akolali kowitiketepa eya wa kowitikala tamene. Atai, neke ibinipa ali atoame paya tetepo takameneya kei pimotono ta.

Neke ali atoa pawe toa talo toano ta.

³Ta patako toa-kama tone noateko nee moa lawetekala tamene.

⁴Tone tokoo poaneleke po letu mekakana keetapeamene.

Toto-pala poanele tokoi yene peya kini eni tokoi poaneleke totome po letu mekakoo toa keetapekete tekete ni oko.

Padele padeleme toto etepea liamotono, yopikoa kamene wa Akolali kowitikala tamene wa Yesuyo akeneya.

⁵⁻⁶Yesuyo enimo ootokoa okome anu oya-lawe kiwi panago tube likonu ta likale-kiti neke oyagono yapu peke eke anu oyago pade padeka poademe anu yapu dekoa pinoko. Nitikoyake one lawetateku nee piamokono, palawe wane tebolo nami kakoane mouno mea ta wa neme kowitikale okome ⁷anu kago keteaneyaka kako. Anu mati-kitika nopala atu pia mekino, kamoane meamele toamokono, teko takamea wa-kiti oo. ⁸Nimo okaleka mano wa neme oai toa kakale enekome kamoano nokome neke moateko toa-kama moa menoo. Nipa ne i agopa one oyago kakono, moane menada wa moa menokoya mena. Pa neme mano wa oai toa kakaleke nitoo. ⁹Nipa kipala eya wane ukuno yakoe. Akolali kowittoa kakolipa yakoa too. Padeya-kiti tuku toa kaketepa enamuoi. Kago wi wi toa kakolipa pinagome kago

pekanokale tuapea poi wane uku. ¹⁰Eni uku toa kowittoa kaka agomepa nipa one eni kowitikaya moo. Padeya tuku toa kaka agomepa nipa one eni tuku tokaya enamuoo. Kago wi wi toa kaka agopa nipa pinagome pekanoo. ¹¹Anu oya-lawe kiwi panago neke mana agome mou pade nouno mea ta wa-kiti okalepa ali tania tukako kaya pade neme yotokoa meoo-pe. ¹²Ogada mu nouno mano wa-kiti okalepa kaala pade yotokoa meoo-pe. Nitamoo. ¹³Kiwi poanele-kala tiki-kitameke kini mati-kiti epetaneya takoa mekala tiki. Epetaneyaka takoa moa mekala tiki toa moa patukakome a tibuke meko kiniketaiyopa one Epetane Yomini kiwi meoo. Nipa one kowitikoi ali atoake awipoano pa wa moa wetekoo wa Yesuyo akeneya.

Yesu Belesebule Patu Kautakoa Kakome

Ipono-kiti Takoa Wetekako Wa Akenemo

(*Matiu 12:22-30, Make 3:20-27*)

¹⁴Wa padepete Yesuyo panagoke awitane ipono takoa pa wa wetekaneyaka. Agale amele toamene ipono eni takoa wetekaneyake eina agale wamene agome agale titia okale yatekete e ali atoa wene kainya pianeya kakeneya. ¹⁵Nitikete padeka-kitame ekete beita ipa ako odene meko tobou ipono Belesebulene tele patu kautakoa kakome ipono-kiti takoa wetekako wa akeneya. ¹⁶Wa padeka-kitame likoa enekete ekete neke tokolepa Akolali patu kautakoa kake tadekalepa a tibuke padele tubele witakamotono ta wa akeneya. ¹⁷Nitikoli kini tepene pikoi wene tetoa enekome okome ako odene meko tobou agoke lukoa meki yenedo kako poi toa meketepa wete atutapeoi. Odene yapu keneke pitiki-kitika ete oto wa puutakutukoa meketepa nipa

yapu-kiti kilia tadatapeou toa tadoo pootapeoi. ¹⁸ Edikoapa Setanuno yatene puutakutukoa meketepa edoa mea kamotoa-pe. Mea kawamoi. Noanupa eni tobou ipono Belesebulene tele patu kautakoane kakene ipono takoa poe wane wetekakala tuku wa wini iki. ¹⁹ Noanupa Belesebulene tele patu kautakakene ipono-kiti wetekaku wa ikino, kini totono litia tiki ali-kitame ipono-kiti takoa wetekaketepa te patu kautakoa kakete tiki-pe. Anume takoane wetekakene tukuna toa tikino, kime no ina akoo kakinapa kapene wakoo akediki. ²⁰ Akolali patu kautakoane kakene ipono-kiti takoa poe wane wetekakala tukuno, Akolaliyo one ali atoa pawe toa talo tokotapa kiwi pake wini witadeko.

²¹ Telekagome tue poyo dolo eya mana patu pikoo mekome yapu yopikalepa onekeya peyapa kode moameneya pa eida pia kawoo. ²² Wa one tele moa patukoa tele tube mati tane ago nokome einago moa kautakome eya too. Einagome one tue poyo eya ika iyamepa ete yene wiane litiou wa pikoo kakanakeya-kiti odo moa onekeya-pala kode moa aua pokome one yene tatia meetapeoo.

²³ No-pala lipua meamoko agomepa nipa no-pala poi eni teigome toko. No auapeamoa no mekuta ali atoa koukoa mekamoko agomepa nipa ali atoa tadekoa litikome toko wa Yesuyo akeneya.

Ipono One Mekanata Wakapea Nekenemo

(Matiu 12:43-45)

²⁴ Ipono pade panago takoa pokomepa eya toko. One koo meatekota ta pitamene ta ludu tuku toa kawa teko tokolo wako. Nitoo wakomepa one takoane wawane nokounata wakapeane pone mepou wa wene piitikoo ²⁵ wakapea

pome enepokolo einata do pokoo kalotokaneya kakedeko. ²⁶ Nitaneyaa kakolo enemotokome tuku topokome ipono-kiti tatono kakoo (7) one poanele natele tomotoa poanele pine wia tagoo tiki ipono-kiti enamua einata aua noko. Aua nokolo einakagoke awitikete awitikili tokome one namolo poanele nateleka toa meake wipitikomewa poanele tubelekama toma yako wa Yesuyo akeneya.

Ali Atoa Kolotine Meatikimo

²⁷ Yesuyo enimo ootokoo kakale atoa pade ali atoa oboa kakoita kakome kayo okome okome i ago ne opia pikoo mea adu tanikakoo meane atoapa kolotine meko-kale okome ²⁸ winipa nimini okoyake kolotine wedoo meki-kitipa Akolaline agale yakatekoo toma yaki-kiti eni wa Yesuyo akeneya.

Yesuyo Padele Tubele Tomotoa

Likoo Enanemo

(Matiu 12:38-42)

²⁹ Ali atoa Yesu kakata note-kala apua takoo kakoli enekome okome ipete kaki yename poanele wedoo toma yakina. Nipa no i ago Akolali patu kakedekalepa padele tubele mati witakamotono ta wa likoo enekina. Nitikiyake Yona einago-pala tubele mati tane toa tokale enoi. Padele pade enamoi. ³⁰ Akolaliyopa i ago Yona one patu kautakoo kakedeko wa Ninepa yename wene tomotoapa Yona einago-pala padele tubele mati taneya. Eina toa Akolaliyopa one patu kautakoane kakedeku wa ipete kaki yename wene tomotoapa Yonapala tokanakale no Ali Yatenane Oyagopalaka padele tubele mati toono, nepiamene. ³¹ Ae, Akolaliyo ali atoa takoo eneka-pete Siba take ako meane tobou atoa kamokoo kakome okome Yesu kaka-pete mekoi Yu yene kime toa potokaneya wa kiwi akoo agale oo. Ni

edoa-mo. Eina atoa mone atoameke Solomonono peku noademe ta padeka mati mea nekeneya. Nitaneyano, kipala ukumo yakoe. Tobou ago Solomonono keku kamotoane no ako ago nukuyake kime pade anu peku noamadete waki. ³² Ae, Akolaliyo ali atoa takoa enekapete Ninepa take yeneka kamokoa kakete ekete Yesu kaka-pete mekoi Yu yene kime toa potokaneya wa kiwi akoa agale oi. Ni edoa-mo. Yonayo Akolaline agale Ninepa ta ludu mo wima pokale yatekete eni yene Akolalike tepe kolotini pekoa piitapeneya. Mone yenameke nitaneyano. Nitaneyano, kipala ukumo yakoe. Yona einago keku kamotoane no ako ago nukuyake Yu yene kime pade anu peku noamadete waki wa Yesuyo akeneya.

Labo Toleke Pedoa Akenemo

(Matiu 5:15, 6:22-23)

³³ Panagome-kiti one labo udukakomepa nipa bokosi wane keneke potipiamoa okolo petene moa pekoa kautamoa tokome eya toko. Labo piatiki walaike-kama moa piko. Nipa ali atoa yapu tuapea nekete eni papa keleyo toa kakale enemotoa ni toko. ³⁴ Eina toa labo toele yapu pa takalogou toa kini lenetame tepe kolotini eya pa takalogako. Lenetado epetaneya kakepa nipa tepe kolotini pa takatapeneya kawoo. Ae, neke leneta poaneyatado kakepa nipa tepe kolotini yomiyomume agopa takatapeneya kawoo. ³⁵ Tepe kolotini pa takatapeneya meku wa oake yomiyomu keneke mekaya tokale wedoa meamene. ³⁶ Yomiyomu dedeyaka toameneya tepe kolotini pa takatapeneya mekopa nipa labome pa takalogou toa ne pa takatapeneya kawoo wa Yesuyo akeneya.

Parisi Ali-kitika Mosesene Totonono Pine

Toawe Olaukane Ali-kitika Kikoa Akenemo

(Matiu 23:1-36, Make 12:38-40)

³⁷ Yesuyo nimo oa kakaka Parisi ago padame one yapu nee noano noo wa okale nipa pata wa pokome nee mekome nakeneya. ³⁸ Nee noa mekale Parisi agome enekale one yono uele tadameneya pa mekome nakale enekome wene kainya pianeya meaneya. ³⁹ Nitaneyake Ali Munono agome okome ne-pala ukumo yakamene. Parisi ali-kiti kini mete okolo eya abe kogilepa ekolo abe pa kamotoa lede tokoo abe kootapekala tiki. Nipa kepeneme epeteku wa oake kini tepene panagoneya moadiya wa tepi moa enika eni poanele toma yaki. ⁴⁰ Ae, paya nou toa mekete tiki. Akolaliyo tokoo pikoya-kiti latikilepa ekolo pikoya-kitika latikome latia pianeya. Nitaneyano, tokoo ekoloka abe kootapeamediki. Enipa nimini uku-pe. ⁴¹ Kini mete okolo kagono keneke pianeya-kiti tatikoa ponopene ali atoa meteketepa nipa kini mete okolo eya abe kootapeneya piou toa mea epetekoino, nitamene.

⁴² Ae, Parisi ali-kiti kime dika dika toamene tete moino, nepiamene. Ni edoa-mo. Kini yamanu ludu witakoya nee deya-kiti pilia moa oi moteketepa yonota tua pikolopa odene katekamao ipa Akolalineya wa takoa pikakala tiki. Ae, ali atoame tanele kiyotokoa takoa enoa Akolalike wene mekoa mea enika enile tobou kakoa tamedikiyake toamekete pa natele tokala tiki.

⁴³ Ae, Parisi ali-kiti kime dika dika toamene tete moino, nepiamene. Ni edoa-mo. Losu yapu peketeka ibini akene yene meatikita meada wa pote

mepokala tiki. Makesikeka ali atoame Tikisa ago Tikisa ago ke wa kiwi kei pimotoada wa yakala tiki. ⁴⁴Ae, Parisi ali-kiti kime dika dika toamene tete moino, nepiamene. Ni edoa-mo. Kipa tuane yene oloyo toai taneka tetepo taneya meki. Nitimotoake ali atoame enameneya paya nou toa teteponokala tiki wa Yesuyo akeneya.

⁴⁵Nitaneyake Mosesene totono pine toa olaukane ago padame Yesu-pala okome Tikisa ago winipa anu yagono-mikiti-pala dekoa akake oko-kale okome ⁴⁶Ae, Mosesene totono pine toa olaukaki ali-kiti kime dika dika toamene tete moino, nepiamene. Ni edoa-mo. Ali atoa padeya padeya keda tokoya kini kotomaneke moa aukou toa kini wene keda takakala tiki. Nitikiyake eni keda nateya deyaka yapetekoa ate motokamiki. ⁴⁷Ae, dika dika toamene tete moino, nepiamene. Ni edoa-mo. Akolaline agale papete towea akane ali-kiti oloyo taneka kalotokoa yapu deya wikakakala tiki. Kini kaua-mikitame eni ali-kiti wia tukama nekeneyake tiki. ⁴⁸Nipa kini kaua-mikitame tanelepa epetanele tane tetepo takoa tiki. Kini kaua-mikitamepa Akolaline agale towea akane ali-kiti wia tukama nekeneya. Kimepa eni ali-kiti oloyo taneka kalotokoa pikala tiki. ⁴⁹Kime nitoi wa Akolali wene muno meaneya mekome eya wa oa pianeya. *One agale akatiki ali-kitika one agale oa aua yawatiki Aposelo ali-kitika kiwi mekoika moane wetekakala tou. Nitikolu nokoli enekete Yu yene kime padeka-kiti wia tukoa wa padeka-kiti tete mekala toi wa oa pianeya.* ⁵⁰Namolo namolo titimoa kini kaua-mikitame one agale akane ali peya wia tukama-kala nekeneya. Eni wia tukama nekeneke nami papete wiameneyake opi kabe koukoa nami wiapa ipete kaki-kiti kiwi Akolaliyo kibu moonoo, nepiamene.

⁵¹Titikilepa wamene agome Ebele wia tukaneya. Wipitikilepa tobou losu yapu keneke Sekaraia wia tukaneya. Nipa eyata pake Akolalike lodo yoai tane walai-pala tobou losu yapu olege takoa tipi tane yapu lukuta eniyata pake Sekaraia wia tukaneya. Eni ali-kiti wia tukama nekeneke nami papete wiameneyake opi kabe koukoa nami wiapa ipete kaki-kiti Akolaliyo kibu moademe toko.

⁵²Ae, Mosesene totono pine toa olaukaki ali-kiti kime dika dika toamene tete moino, nepiamene. Akolaliyo talo toko take one peku nopadete ali atoa kago ketepono patukoa ponadete tokoiyake eni kago peatekoi kii kime toa pokoina. Nipa kiwi patukoa poamadete wakoiyake ete ali atoa patukoa ponomotoa papukamokoina wa Yesuyo akeneya.

⁵³Nimo oomotokome pokale Mosesene totono pine toa olaukane ali-kitika Parisi ali-kitika one-pala timini luaneya i i wa pitia yakoai toma pekeneya. ⁵⁴Nipa natemoka omotadiya wa kakete one likoa enoai toma pekeneya.

Wene Takuta Pianeya Meki Yeneke Akenemo

(Matiu 10:26-27)

12 Eina ali atoa ege egeta kadukoa apua takakete ete oto wa muku muku toa kakoli enekome Yesuyo one oya-lawe-pala okome Parisi ali-kiti kini yisi kugu kiwike weamutukaya kekatekoa yamene wane uku. Enipa wene takuta pianeya mekike ekene uku. ²Padele padele kaukoa toma yakenele peya naniko keleyo witatapeoo. Padeya padeya paigakoa pianeya-kitika naniko keleyo pikale peyame enetapeoi. ³Nipa likonu kakete okoi agalepa ali atoa lou pake kakete yakatapeoi. Ekolo kini yapu keneke kago keteketikoa kakete

oi oi wa okoi toa pade-kiti yapu yalini lewia kakete i i wa toawe a ootapeoi.

Akolali Piti Moamene

(Matiu 10:28-31)

⁴Anu oya-lawe kiwi-pala i ukumo yakoe. Yete pade ali-kitame kiwi wiou wa lama moa lagotoa tukatekoapa wa naniko kiwi-pala padeleka tamele toamoo. Dikaki ali-kiti piti moameamene. ⁵Kini piti moatiki agopa eya ago. Akolaliyo panago wia tukatekoa poane take pa wa moa pitikamele tokono, Akolali einago piti moamene wane uku.

⁶Dee ini deya ko kakoa (5) topo toa kue motikilepa dedeya tuane kue takuta odene mokala tiki. Enipa nimini ukutu-pe. Dikane ini deyapa dedeyaka Akolaliyo odeneka katekameneya peya talo toa kako. ⁷Ni ago Akolaliyo anu oya-lawe kini wagoke witako pineka kako toa oi moa talo toa kako. Ni agome ini deya-kiti mamapa moake paya tetepo takakome kipa one kolotini yene wa wedoa mama moa talo toa kakono, ete-kitame kipala padele toatikilekeka piti moameamene wa Yesuyo akeneya.

⁸Kiwi-pala i ukumo yakoe. Panago ali atoane leneke kakome no i agono peku noane tuku wa toawe okalepa eina toane no Ali Yatenane Oyago Akolaline edelo ali-kitane leneke kakene einagopa anu peku noa tokago wane toaweane ou. ⁹Wa panago ali atoane leneke kakome no i ago kote tokolo waku wa okalepa eina toane no Ali Yatenane Oyago Akolaline edelo ali-kitane leneke kakene einagopa kote tokolo waku wane waou.

¹⁰Panagome-kiti no Ali Yatenane Oyago tea agale akakalepa one eni poanele tokake po letu mekakana Akolaliyo oyake kekile too. Wa panagomedo one Epetane Yomini tea agale akakalepa nipa one eni poanele

tokake po letu mekakana Akolaliyo kekile toamoa etene kibu moo.

¹¹Anu oya-lawe kipa ete-kitame kini losu yapukeka tobou ali-kiti mekoikaka Kanosolo ali-kiti mekoikaka lia aua poi. Nitikoli peketeka edemo uku patu, edemo topo takoane uku patu wa tepene li li wa kamotoa meameamene wane uku. ¹²Nitikoi-petepa Epetane Yominiyo kini oatiki toa i i wa wene taka taka too tokolo tekene ni uku wa Yesuyo akeneya.

Kamo Ago-pala Pubu Akenemo

¹³Ali atoa kabeta pake kakome panagome Yesu-pala okome Tikisa ago, agetaiyo kadimo okana toa anu wamene agome toameneya toneketaineya tatia no meamokono, neketaiyo kadimo okana toa ta wa neme akamene wa okale ¹⁴Yesuyo kioa okome okome kini koiso yatekamene wa no teyo moa kakaneya-pe. Kinikiya tatikatakutukamene wa no teyo takoa motaneya-pe. Padame pade mena wa Yesuyo ootokoa kakome okome ¹⁵padeya padeya moadiya wa tepi motokayano, wedoa yamene. Panagome-kiti one kamoya moa auma kakakomepa one eniya patu edoa kautakoa mea kamotoa-pe wa Yesuyo akeneya.

¹⁶Nimo ootokoa kakome agale pade pedoa okome okome kamo tokago pade one ipe nee kakoya witakome leau akatapeneya. ¹⁷Nitaneyake one nee kakoya wakoa moa lobutua piatekata toamokale tokome edeku patu wa wene kibutukoa mekome okome ¹⁸ile tou. Namolo yapu-mene keaweane eni-mene moomoane awitikakoane liapeane wiou. Nititikoanepa witi ku anukuya eya kuya peya lobutuane plane tagatapeou. ¹⁹Nitikene ekene anukuya tubeya eni pikuno, mali peya mati ponomotoane eniya patu kautakoane

kama puku. Opi poti kilikoane mekene nee ue eya noane plane wediane meou wane ou wa kamo agome akeneya. ²⁰Nimo akeneyake Akolaliyo one-pala okome paya nou toa meke wini okono, opii ta likale tuke tuono, neke nodokapike lobutukapianeya teyo moa noo-pe. Pinago ne noamoo wa Akolaliyo akeneya. ²¹Nipa panagome one kamoya moa auma kakakomeke Akolalinele takamokalepa Akolaliyo one peku alekoa nakene ago tetepo takoa waoo wane ekene uku wa Yesuyo akeneya.

Akolalike Wene Tugoa Mekete Toatekomo

(Matiu 6:25-34)

²²Yesuyo one oya-lawe-pala okome okome kini kepene mama moameamene. Nipa noateku neepa edoane moane naku patu, kawateku maminapa edoane tatepe toane motuku patu wa edikoa wene keda taneya meameamene. ²³Akolaliyo kini tigini yominita tobou kakoa mama moapa kini noatiki nee mamina eya kekuya tetepo takoa yopiko. ²⁴Ini pukaneya yakete tikile enekoapa eya wa wene taneya meamene. Nipa edikakiya. Nee lene matamoa ipe kakoya nee wakoa moamoa kini nee moa piatiki yapu eya wiamoa tikiyake Akolaliyo talo toa egeteko. Akolaliyo ini eya kekuya tetepo takoa mama moapa anu oya-lawe kiwi akoya tetepo takoa wedoa mama motoko. ²⁵Anu oya-lawe kiwi panago tukina toane tuamekene lou pini odeneka pa meou wa tepe ate keti enoai tekeka padele tamele toamokolo tukina toa tuoo. ²⁶Natele eni tamele toamokono, eteleke edoa mama moamoo. ²⁷Taage kaluga eya witakole enekoapa eya wa wene taneya meamene. Nipa edikakoya. Po itia mamina latia toamokoyake

wedoa kalaneya witako. Ako odene meane tobou ago Solomonoyo mamina epetaneya-kama moa kakome wedoa kalakitikoa kakala taneyake tage kaluga eya kalaneya moa patukamele toameneya. ²⁸Taage kaluga eya ei li ludu pa tekei witako. Nipa opi tou toa tekei witakoyake podolikama alime wakoa moa toele pitikako. Edikoa pa tekei witakoloka Akolaliyo talo toa kalotokako. One dikane ago tokome kini kawatiki mamina moa meono, dekolo wene keda taneya meki. Ae, Akolalike inapa wedoa wene tugameneya mekiya tadiki. ²⁹Nee eya edoane moane naku patu, ue eya edoane nomoane naku patu wa enika eniya mama moameamene. Nipa wene keda taneya meameamene. ³⁰Ta piko peyake mone yatene ali atoame enika eniya mama moma yakino, kime pade nitameamene. Anu oya-lawe kini wenepa kiniketai Akolaliyo moademe tokoto-mo. ³¹Nipa one talo toko take mekene toateku peku noada wa wene piitikaneya meamene. Nitoo mekolipa kini noatekoi nee mamina eyaka Akolaliyo motokoa meoo wa Yesuyo akeneya. ³²Anu oya-lawe kipa sipi sipi kai keneya natetekoa mekino, kiniketai Akolaliyo one talo toko taapa kinino noe wa yameademe okono, one epene wene piko toa litia tokome tokono, piti tokolo meameamene wa Yesuyo akeneya.

A Tibuke Pia Kawateko Kamoyake Akenemo

(Matiu 6:19-21)

³³Kinikiya peya topo toa kue moa ponopene yene tatia meetapeamene. Kini kue uatiki kapa kego noamateko kakama takoa moamene. Nipa kini kamoya a tibuke auma kakou toa epetanele toma pamene. Kini eni kamoya a tibukepa kode agome kode moamoa tiyome teia

noamo a toko. ³⁴Eni ukupa, ali atoa kini kamoya piko takepa wene piitikaneya yakili tekene ni uku. Nipa kini kamoya a tibuke auma kakane tetepo takoa meamene wane ekene uku.

Tobou Ago Wakapea Nomotoa Nepiamene

³⁵Tobou agonole takada wa matiu deka deka toa kawa labo-pala udukoa wedoa nodokoa kamene. ³⁶Nipa eya yename tiki toa tamene. Tobou ago pade panagono atoa motokakete toge kikoita lobutupome mea wakapea nomotoa one pupu yename wedoa nepikoa kaki. Nipa one nokome kago wi wi tokoka eni eni kago pekapadete nepikoa kaki. ³⁷Atu piameneya wedoa nepikoa kakili enekome tobou agome eya toademe toko. One pupu mamina moa kakome nee noatino noe wa kayo oa moa mekatapekome kini nee takoa lawetademe toko. Nipa ke wa kini kolotini natekademe toko. ³⁸Likonu toe lene taku takoa motiki-peteka tebolo takoa motiki-peteka tobou ago nokome enekolo wedoa nepikoa kakili enekome ke wa kini kolotini natekademe toko. ³⁹Enikepa eya waneka ukuno, yakamene. Yapu pinagome-kiti onekeya kode moa poatekago ipete noo wa wene too tokapa yapu bulukoa onekeya-kiti kode motokaya tokale lene kia wedoa nepikoa kawoo toka. ⁴⁰Eina toane no Ali Yatenane Oyago kotikatapeane nouno, wedoa nepikoa kamene wa Yesuyo akeneya.

Panagotame Panagono Pupu Takakete

Taneleke Pedoa Akenemo (*Matiu 24:45-51*)

⁴¹Yesuyo nimo okale Pitayo okome Ali Muno neme wini pedoa oko agalepa neke oya tone takoa oa meteko patu.

Ali atoa peya kikilikoa oa meteko patu wa okale Ali Muno agome okome ⁴²tobou agonole-kama wedoa wene toa takako agoke ukuno, yakamene. Tobou agome dikane ago-pala eya wa oa too. One ali atoa neme yopikamene wa oapa kini nee eya noatekoi toa oneme-kama tatia lawetekamotoa moa kakoo. ⁴³Nitimotokome ta padeka pome mea wakapea nokome enekale tamene wa oa pohanakaledo pa takama pekedekale enekomepa ke wa one kolotini natekoo. ⁴⁴Nipa onekeya peya neme-kama yopikamene wa moa kakoo. Enipa nimini uku. ⁴⁵One pupu takakagomede onekele takoa potokakomepa eya tadiya too. Tobou ago wete wakapea noamoo wa tobou agono pupu takakoi ali atoa layo toua wia nee bia ueka nokoa pia leau oa yawa too. ⁴⁶Paya nou toa nitoa mekaka tobou ago wakapea kotikatapea nokome einago dika dika toamene tete meoo. Nipa tobou agonole takoa potokane yene pitikoika moa kakoo.

⁴⁷Tobou agono wene pikale wene tokomeke nodokoa meamo a one okaleka toamoka agopa tobou agome kibu motokome layo toua wedoa wikala too. ⁴⁸One wene pikale wene toamoka agome padele kibu moatekale tokalepa tobou agome kibu motokome layo toua wedoa wiamoo. Nipa Akolaliyo padele padele toatekale yametekagomepa one eni yametekanakale wedoa toma pamedeko. Pade-kitame kinikiya keda takoa metekoli motokagomepa one eni motokana toa ete wa metekome etene ako meamedeko. Nipa ako mano wa okoli ako-kama meamedeko wa Yesuyo akeneya.

Ali Atoa Puutakutukoa Mekimo (*Matiu 10:34-36*)

⁴⁹Itono ludu toe pitikadene nekene uku. Ae, toe wete udukamotadiyano wene pikene uku. ⁵⁰Ue mou toane

dika dika toamene tete moadene meku. Ae, enile wete taatekameneyake wene keda mati taneya meku. ⁵¹Noanumepa ali atoa poi teigoa wawa poti kilikoa memotoane nekedeku wa wene piki-pe. Nopa nitateku ago mena. Ali atoa puutakutukoa memotoane tekene ni nokou. ⁵²Opi titimoa odene yapu pitiki ali atoa ko kakoa (5) tadiya puutakutukoapa takutame pade wene pia tebolome pade wene pia puutakutukoa meoi. ⁵³Etenakiti etene pade wene pia mana pade wene pia ete oto wa letetakutukoa mea ni nina-kiti nine pade wene pia kono pade wene pia letetakutukoa mea ni atoa-pala anane nine one kua atoata ete oto wa letetakutukoa mea tokala toi. Ali atoa nitoa memotoane ni nuku wa Yesuyo akeneya.

Padele Tokale Eneketepa Ile Toatekolo

Toko Wa Wene Toa Oatekomo

(Matiu 16:2-3)

⁵⁴Yesuyo eida oboa kakene ali atoa-pala eya waka akeneya. Lou pipoko lono wedo witoa nokolo eneketepa ta eni noo tadeko wa ikina. Nimo ikina toa taatekoa ta eni noko. ⁵⁵Ni pupulege keika lono titimoa nokolo eneketepa nipa poto tubeya too tadeko wa ikina. Eni ikina toa taatekoa poto eni toko. ⁵⁶Ae, wene takuta pianeya meki yene kipala i ukumo yakoe. Itonokeka a tibukeka padele witakole eneketepa ile taatekoa toatekolo toko wa kime tetoa eneki. Nitikiyake ipete kiwi pakeke witakolepa ile taatekoa toatekolo toko wa tetoa enamiki wa Yesuyo akeneya.

Poi Teiane Ago-pala

Odene Wene Pia Enamene

(Matiu 5:25-26)

⁵⁷Ipa poanele tadeko ipa epetanele tadeko wa kini weneme dekolo takoa enamiki-pe. ⁵⁸Panagome-kiti i ago neme poanele tokanano, pata wa koiso yatekakago mekata aua pokalepa eya tamene. I ago ame koiso wamatono, odene weneta piata wa oa enamene. Nitameneya eniledo toamokalepa koiso pitia yatekakago mekata lia aua pokale pitia yatekatekoa one poyo ago metekale moa ne po yapu pitikoo. ⁵⁹Nitikale neke take oto noateka kuedo odene tuane kue waneka katekoa wete meameneyake nepa eida pa pioo wa Yesuyo akeneya.

Kini Namolole Wawa Tewitikameketepa Tuei

13 Einata einapete Galili yene-pala tanemopa eida kakoi ali padeka-kitame Yesu-pala toaweake akeneya. Nipa Galili yename kini sipi sipi kai wia Akolalike lodo yoa kakakoa Pailaseyo wia tukapoatino poe wa one poyo ali-kiti moa wetekanemo i i wa toaweake akeneya. ²Nitikoli yatekome Yesuyo okome Galili takepa ete yename poanele tane toa moa patukoa o yename poanele tubele taneya tokome tete mati ni motaneyano wene piki-pe. ³Kipala i ukumo yakoe. Kini namololedo tewitikoia Akolalike tepe kolotini pekoa pia toameketepa kimeka dika dika toamene tete moa tuei. ⁴Siloame takepa ludu yapu ta enapeatekoiya yapu kilikome tanemo yakamokoiya-pe. Kalabe kakoa (18) ali atoa eni kilikome witaneyano. Yerusaleme takepa ete yename poanele tane toa moa patukoa o yename poanele tubele taneya tokome ni kilikome witaneyano wene piki-pe. ⁵Kini namolole tewitikoia Akola-

like tepe kolotini pekoa pia toameketepa kimeka dika dika toamene tete moa tuei wa Yesuyo akeneya.

**Kū Tuamene Yomo
Pikike Pedoa Akenemo**

⁶⁻⁷ Yesuyo nimo ootokoa kakome agale pade pedoa okome okome ipe pinago pade one gerepi po ipe pakeke yomo piki pade eida mataneya kakeneya. Kū wete tuko patu wa enepokale kū tuameadeka. Nitadekale ipe talo takaka ago-pala okome mali tebolo ponokale-kama kū tuko patu wane enenokala tokounake kū wete tuamokala tokono, dekolo ipe pakeke pa kamotoa toko-pe. Wete kawa pitikamene wa okale ⁸ talo agome okome Ali Muno opa kawa pitikamoto. Tokene tuku kakoa (12) ponomotoane wedoane lati lati toane kai te tagolota moane pitikoai tou. ⁹ Nitikoludo kū tukale enekepa pa kamota. Nitameneya kū tuamokalepa nipa kawa pitikato wa talo agome akeneya wa Yesuyo akeneya.

**Yesuyo Mukiti Tukuane
Atoa Latekanemo**

¹⁰ Ko mea pupu toamene-pete pade Yesu losu yapu pade pome olaukapaneya. ¹¹ Eida atoa pade meaneya. Einatoapa ipono awitaneya tokome mali kalabe kakoa (18) ponoka toa mukiti tukuaneya kiyotokakamele toameneya meaneya. ¹² Einatoa enekome Yesuyo nee noo wa kayo oa motokome okome anu oyatoa neke taneya mea kakene yenepa opi takoa pokolo uku wa ¹³ one yono einatoake pikale eina eina mukiti kiyotokakaneya kawa Akolali kei pia kakeneya. ¹⁴ Nitikale enekome losu yapu yopikagomewa i ago Yesuyo tone ko mea pupu toamateko-peteka i atoa eni latekako wa wene poaneya

meaneya. Nitoapa e yene-pala okome okome tone pupu tikilepa ko melepu (6) kakoa-peta-kama tokoyano, enipete-kama oyake latekamotoa namele tokono, tatono takoa (7) ta patako-petepa tone pupu toamateko-pete nitamele toamoko wa wene pokome okale ¹⁵ Ali Munagome eni yene peya kikilikoa okome okome winipa wene takuta pianeya meki. Tone ko mea pupu toamateko-peteka kini pitimekawe kai dogi kai eya kolago taneta akolono ue mekoka ue nomotoa aua pokala tiki. ¹⁶ I atoapa Eberameke taagene atoa mali kalabe kakoa (18) ponoka toa eina yene taneya mea kamotoa Setanuyo moa labakaneya. Nitaneyano, tone pupu toamateko-peteka one pa pia kakene yene dekolo takoane wetekamotoa wamiki-pe wa okale ¹⁷ one-pala wene poaneya meane-kiti yaame tuaneya kakeneya. Nitaneyake ete peyame one tubele toma pekeneleke ke wa wedia kakeneya.

Kalipe Lene Deyake Akenemo

(Matiu 13:31-32, Make 4:30-32)

¹⁸ Yesu pa eida kakome okome Akolaliyo one ali atoa pawe toa talo tikilepa edoa toko patu. Edeya wane adeka plane uku patu. ¹⁹ Kalipe lene deya panagome-kiti yamanu moa pitikakalepa tumia witakome wetini tootapeneya kaka. Nitaneyana kakalepa ini pukaneyana note yeneneke yene wikala taneya wa Yesuyo akeneya.

²⁰ Yesuyo eya waka akeneya. Akolaliyo ali atoa pawe toa talo tokolepa edeaya wane adeka plane uku patu. ²¹ Pade atoame-kiti yisi kugu deya moa palawe kugu odene bekoke pitikoa eletekaneya. Nitikalepa palawe kugu keneke alama pokome eina palawe mono mono akatapeneya wa Yesuyo akeneya.

**Nateya Edetekane Kagoke
Pedoa Akenemo**

(Matiu 7:13-14, 21-23)

²² Yesu Yerusaleme poademe pokome pitikali pitikoikaka ali atoa nateteko pitikoikaka pima pekeneya. Nipa lalinemo i i wa olaukama pekeneya. ²³ Nitima pokaka panago oneke nokome okome Ali Muno eya wane ne yatekene ukuno, yakamene. Akolaliyo ali atoa toa motikilepa nateteko toa motoko patu-kale okome ²⁴ Akolali mekota poatiki ka keteponopa kago nateya edetekaneya kakono, eni kago keneke patukoa ponadetepa wili toa kamene wane uku. Ali atoa peya matiyame patukoa ponadete wili toa kawa teko tokale wakala toi tokolo ni uku. ²⁵ Yapu pinago kamo pokome kago ketepono loko pitikoo. Nitikale kago keteaneya kakale ali atoa kiwi eida note akolono kago koloikoa kakete ekete Ali Muno Ali Muno i kago wete pekanamene wa okoli okome manika kawa niki-pe. Kiwi wene toamuku wa oo. ²⁶ Nitikale ekete nepala odeneya opia mekete nee ue eya nakonano, nepa tone yapu ludu noke olaukanokala tokonano, wene toamuku wapa dekolo oko-pe wa okolika yapu pinagome okome ²⁷ kiwi kawa nikita wene toamukuno, poanele-kala toa kaki-kiti no wete tewitiko poe wa wia liti-tapeoo wa oo. ²⁸ Eidapa komome kabe kawamokale komo kata pitikoa kawei. Nipa Eberame-loe Aisake-loe Yekobe-loe Akolaline agale toawe akane ali-kiti eni yene peya Akolaliyo talo toko ta eida e kaki wa enoa kagoke poadete note kakolika wa kiwi etepea wia lititapeoo. ²⁹ Yu yene kipa oyake patukoa ponamele toamokaleka e ku mone yatene-kitipalou witia noko lonoka lou pipoko lonoka yekeika yukukataka kawa note eni kago keneke patukoa ponete Akolaliyo talo toko take toge lobutukala toi. ³⁰ Ali atoa

padeka-kiti ketea kawake wa namolo ponete kaponoi. Wa padeka-kiti namolo kawake wa ketea kawa ponete kaponoi wa Yesuyo akeneya.

**Yesuyo Yerusaleme Ela
Motokome Akenemo**

(Matiu 23:37-39)

³¹ Einata eina-pete Parisi ali padeka-kiti Yesu eni kakata nekete ekete ako tobou ago Erodeyo ne wia tukademe okono, i ta wete tewitiko pa-koli okome ³² wini agale oa yotokako agokepa agale pade oane wetekakuno, akapoe. Opi podoliyotapa ali atoake awitane ipono takoane wetekoane yene tane ali atoa latekoane toane wa ta tebolopeta patakale anu toatekoule peya takoane wipitiou. ³³ Nipa opi podoliyota eko patepeyo-kitika enile toma pekene Yerusaleme take pamedeku. Ni edoa-mo. Akolaline agale papete toawe akane ali peya Yerusaleme ta eida-kama wia tukakala taneyano, noka eida tuadene eni pukuna.

³⁴ Ae, Yerusaleme ta neke wida pitikoi yenamepa Akolaline agale toawe akane ali-kiti wia tukama-kala nekeneya. Ni Akolaliyo neeke wida moa wetekane ali-kitika kueme kua tukakala tane toa opii pa tiki. Nitaneyake ogadame idini-kiti pawena keneke lumoa pitikou toane tekene neke wida meki yene pawe toane moadene tokounake kite katite toa wakala tokoina. ³⁵ Ae, Yerusaleme ta nepa pa tumu tokamotoa neke wida pitiki yene toa pootapeadete tiki. Ae, no papete wa enekileka toamoo. Nipa no i agopa Ali Muno patu kautakoa kama nokono, Akolali neme wedoa mekamene-ye wa no wete wa makutukoa moameneyake anu lene timini wa pade enamoo wa Yesuyo Yerusaleme tapala akeneya.

14 Yu yene ko mea pupu toamene-pete Yesu ibini akene Parisi ago padane yapu nee noademe pome mepaneya. Nitikale eida oboa meane yename lene tuaneyame wia meaneya. ²Eidapa tigini yoa lobutukatapeneya meane ago Yesuno leneke nome kakeneya. ³Nitikale enekome Yesuyo Mosesene totono pine toa olaukane ali-kitika Parisi ali-kitika pitia yatekome okome Mosesene totono litiapa tone ko mea pupu toamateko-pete yene tane-kiti oyake latekamele toko patu-kale ⁴agale waametekoa pa mekoli yoname moa latekakome opi poano pa wa wetekaneya. ⁵Nititikoa okome kiwi panago one pitimekawe kai dogi kai eya koa pokalepa pinagome edoo-pe. Ko mea pupu toamateka-peteka eni eni pokome one kai ate lia motokomepa pupu eni tokome too. Enipa nimini uku-pe-kale ⁶agale topo takamele toameneya.

Toge Lobutupote Mekete Toatekomo

⁷Wa padepete Yesuyo agale pade pedoa akeneya. Nipa toge nee nonamene wa agale oa wetekaneyake nekene ali-kitame ibini akene yene meatekoi walai tuku toa pote mepokoile enekome tokome ni akeneya. ⁸Nitikome okome panagome manane atoa motokakomepa toge kikakakuno noe wa agale oa wetekakale nekepa ibini akene ago meateka walai poke mepameamene. Ni edoa-mo. Ne keku kamotoa ako tobou meka agopa toge yopikagome ne noo wa agale oa wetekakale noka patu. ⁹Ako ago nekedekale toge yopikagome ne poke mekata nokome okome i ago ako ago meatekota ne wini mekono, i ago wida memotono, ne pa wa okalepa nepa yaame tuaneya poke etene keku ago meatekata mepoo. ¹⁰Wa tobou agome ne no wa agale oa wetekakale nekepa

keku ago meatekata mepamene. Nitikalepa toge yopikagome ne mekata nokome okome anu oya ne ako walaike no mekuya liti menamene wa oo. Nipa ne-pala eida odeneya mekete nee nakoi peya mekakoa yopikagome ne kei pioo. ¹¹Nipa pinali one wa ako ago tetepo takakalepa Akolaliyo one keku ago tetepo takoo. Pinali one wa keku ago tetepo takakalepa Akolaliyo ako ago tetepo takoo.

¹²Yesuyo nimo ootokoa mekomepa ne noo wa agale oa wetekakanakagopala okome toge kikepa neke oyala-weka nekameyo-mikitika neke take kamo yeneka toge kikakakuno, noe wa kayo oa moameamene. Ni edoa-mo. Enika eni yenamepa naniko toge kikakakuno, noo wa neke nami wiei. ¹³Toge kikepa ponopeneya mea yono poaneya mea kawa okeaneyamea leneta lianeya mea tiki-kiti noe wa kayo oa moamene. ¹⁴Dikane yename neke nami wia lawetatikiya toamokale tokome neke nami wiamele toamoo. Nitamele toamokaleka Akolaliyo ke wa neke nami wioo. Nipa wene kiyo akeneya meane yene moa kamotokaka-pete ke wa neke nami witikale kolotine meoo wa Yesuyo akeneya.

Togeke Noamadete Wakene Yeneke Akenemo

(Matiu 22:1-10)

¹⁵Yesuyo nimo okale yatekome one-pala eida opia mekome nee naka ago padame okome Akolaliyo talo toko take mekete nee nakoi yenepa kolotine meoi-kale ¹⁶Yesuyo agale pedoa okome okome panagome-kiti toge mati kikakouno, ipete noe wa ali atoa peya matike agale oa wetekaneya. ¹⁷Eni oi ponokale tobou agome pupu ago-pala okome namene wane agale oane wetekakouna-kiti nee nodokoa pikono, noe wa akapoano pa wa

moa wetekaneya. ¹⁸ Nitikale peyame namele toamoko wa waamu taneya. Panagome okome itono pade pene topo toane motukuno, enepadene noamukuno, ela toko wa wakeneya. ¹⁹ Wa panagome okome kogono pitimekawe kai yonota tuane (10) pene topo toane motukuno, eni kai toane enepadene wida noamukuno, ela toko wa wakeneya. ²⁰ Wa panagome okome anu atoa pene motukuno, namele toamoko wa wakeneya. ²¹ Peyame nitoa wakoli pupu ago tobou agoke wakapea nokome eina wakete akenemo i i wa toaweana onaneya. Nitikale yapu pinago kotimi wene mati luaneya mekome pupu ago-pala okome tone pitiko ta piko peyake batete luduka ka luduka wete pa. Nipa ponopeneya mea yono poaneya mea lene lianeya mea kawa okeaneyana mea tiki-kiti enemopoano pa wa wetekaneya. ²² Nitikale enemoa aua nokome okome Ali Muno neke okale toane enemoane nokounake ali atoa meatikita pa pikono, deku patu-kale okome ²³ ta kebonokeka tayo tayotaka pa pitiki ali atoa noe wa tika tika toa aua noo. Anu yapu edea takatapemotoane ukuno, enemopa. ²⁴ Eina namolo takoane noe wane oane agale wetekakolu wakoina-kiti anu toge nee nomotoane wamuku wa tobou agome akeneya wa Yesuyo akeneya.

**Yesu Litiadete Tonekeya
Wawatekomo**

(Matiu 10:37-38)

²⁵ Yesu pokaka ali atoa obomoa litima nokoli Yesu ete peketapea kakome okome ²⁶ panagome-kiti etene nineta mati atoa wamene laine-mikiti kote motane tetepo takameneya tewitiko wawamokomepa no oyake litia namele toamoko. One kepene mama moa tu-

amene piti motaneyana mekomepa no oyake litia namele toamoko. ²⁷ Ni one wia dekatiki yomo-pala aua poamademe wawou toa anukule takama pokome tete-pala moamademe wakomepa nipa no oyake litia namele toamoko.

²⁸ Kiwi panagome one ta enapeateko yapu ludu yapu wiademe-kiti eni yapu wiane peya takateku kue oyake piko patu wa wene kibutukapia meoo. ²⁹ Eniledo toamokomepa nipa itono pedoa yapu wete wia peya takameneyake one kue pootapeoo. Nitikale enekete ete peyame ekete ³⁰ i agome one yapu titia eina wikanake oyake wia peya takamele toamokolo pa pegene kakalogo wako wa ya motokoa oi.

³¹ Ni tobou ago padame eko tobou agono yatene-pala poi toademe-kiti namolo takoa eya too. Eko yatene wia litikome toateka oi pedoa pia mekomepa one yatene natetekoameke eni yatene pitikali oyake kutu litiku patu wa wene kibutukoa meoo. ³² Pitikali oyake kutu litiambele toamoko wa wene pikomepa eya too. Pitikali ta padeka mati nome dekakoa pitikota one oyago-mene moa wetekakomepa poi pia enepamene wa moa wetekoo. ³³ Eina toa kinikiya peya tewitikoane wawou wa wene kibutua meameketepa no oyake litia namele toamoko wa Yesuyo akeneya.

Paya Kusake Akenemo

(Matiu 5:13, Make 9:50)

³⁴ Kusa eni nakiyapa epetaneya tokolo uku. Nitaneyake me pekene kusapa edoa wa meke takamotoa-pe. ³⁵ Dikane kusapa ipe luduka nee yabunu kai te eya pitikoai tikitaka moa mitikatekole toamokolo pinagome paka miitapeko. Kale piiyakoa kaki-kiti kipala i ukumo yakoa moamene wa Yesuyo akeneya.

Katepitoa Pekene Sipi Sipi Kai

(Matiu 18:12-14)

15 Takesi kue motokama yakene ali-kiti Mosesene totono tagoa toamene yene peyame Yesuyo okamo yakadete one mekata obonokala taneya. ²Nitikoli Parisi ali-kitameka Mosesene totono pine toa olaukane ali-kitameka Yesu akoa lubulubu pikakete ekete i agomepa Mosesene totono tagoa toamiki yene makutukoa moa odeneya opia mekome nee nako wa okoli ³Yesuyo eya wa pedoa agale akeneya. ⁴Kiwi panagome sipi sipi kai ege takupeta kadukoa (100) egetekale-kiti odenedo katepitoa pokalepa pinagome ete (99) sipi sipi kai ali piamene take koukoa kakoika pa kamotoa eina katepitoa atupokana kai pitia tuku toma poo. ⁵Nitoa enamua motokome wedia kawa kotomaneke wia apulogoa wakapea noo. ⁶Yapu eni nome kakome one oya-lawe one yapu liti mekoi peya kayo oa motokome okome auna katepitoa atupokana sipi sipi kai enamua moane nekene ukuno, wedikete wediatono noe wa kayo oo. Enipa nimini uku-pe. ⁷Eina toa Mosesene totono tagoa toamene ago odenemeka one namolole poanele tewitikoia wakalepa a tibuke mekoi peya wedia kawei. Nipa pade ali-kiti ege takupeta kadukoa (99) kini namolole poanele wete tewitikoia wakeneya tekete wene kiyo akeneya mekoi yeneke wedekilepa teketeke einago odene agoke wedoa wedikete kolotine meoi wa Yesuyo akeneya.

Atuane Kue Leneke Pedoa Agale Akenemo

⁸Pade atoame-kiti one kue lene yonota tua pikoyake wa pade odeneka atukolopa nipa eya toko. One labo udukoa yapu do wedoa pokama

pokome tuku toa kawa enamua motoko. ⁹Enamua motokome one oya-lawe one yapu liti meki peya-pala okome auna atuane kue lene enamua motokuno, wedikete wediatono noe wa kayo oa motoko. ¹⁰Eina toapa Mosesene totono tagoa toamokome etepea pome atupoka ago odeneka one namolole poanele tewitikoia wakalepa Akolaline edelo ali-kitame ke wa wedoa wedia kawei wa Yesuyo akeneya.

Atupane Ago Eteneke Wakapea Nekenemo

¹¹Yesuyo eya waka pedoa akeneya. Panagono manata takuta kakeneya. ¹²Padepete putunagome etene-pala okome atai neme kadimo oa no tatikoa meatekoya-kiti opi mouno, wete tatikoa meano ta-kale etename tatikoa metaneya. ¹³Nitaneyake ta pade-mene lia patakale putunagome onekeya peya moa ta tetemada pome mepaneya. Nitoa pale toa mekome onekeya peya paka wetekamu taneya. ¹⁴Wetekamu taneya pa mekale one eida mekata kobu igi mati witaneya. Nitaneyake kobume tuaneyake mekome tokome ¹⁵ta pinago pade mekata pokome okome neke takateku pupu pade piko-pe wa yakapokale tayo lono one kai kakane lono one kai egetekapa wa wetekaneya. ¹⁶Eida egetekakoa mekata kobume tukomepa kai naki neepa nou wa wene pianeyake padameka one noatekaya lawetekile toameneya. ¹⁷Nitaneyake one poane wene wia wakome okome Agetaine pupu takaki yene peya nee noa kitipu-kama mekiyake nopa nee noamoane kobume tuaneyake i mekuno, ¹⁸agetai mekota wete wakapeane poad. Pekene ekene atai, Akolaline leneke kakene poanele tokou. Ne-palaka poanele eina tokou. ¹⁹Nopa dikane agono, neke mana wa neme amele toamokono, neke pupu ago tetepo

takoa pa pupu yameano ta wane opou wa ²⁰kamomotokome oneketai mekata poademe pekeneya.

Nittoa noademe nokale etename enekome elame tuku wa teyapea pome kotua tebea nunu oa kakeneya. ²¹Nitikale mana agome okome Akolaline leneke poanele tokou. Nepalaka poanele eina tokouno, nopa neke mana wa neme amele toamokono, pa pupu ago tetepo takoa pupu pade yamea ta wa kowitaneya. ²²⁻²⁴Nitikaleka etename pupu yene-pala okome manago atupane ago i nokono, tuaneyano wene pikounake i nome kakono, one kawateko mamina epetane mati wete moa kakakoa one yonoke makai wane moa mekakoa kawa yeneka moa mekakoa toe. Togeke wiadete lamotoa egetekoona pitimekawe kai tine wete moa wia kikakamene. Toge kia wedikete wediatoe wa okale toge nodokoa pia wedia kakeneya.

²⁵Nittoa kakakoa namolo ago ipe toa kawa wakapea nome yapu liti kakome yatekale tulutu oa kawa pitikoa wedia kakoimo yakaneya. ²⁶Nittoa yatekome one pupu ago pade ne noo wa kayo oa motokome okome i yatekumopa edele tekete ikiti-pe-kale okome ²⁷neke wamene opi noka. Nitikale neketaiyo one tuamoia padeleka toameneyano ke wa wedia kakomepa tone togeke kiadete lamotoa egetekoona pitimekawe kai tine wia kikakakome toko wa okale ²⁸yatekome kotimi wene luneya kakome kini wedia kakoita poamademe wakale etene ako lono one kakata pokome ne noo wa kowitikale ²⁹okome atai, mali peya mati ponomotoane neke agale odepetaka tagameneya meane neke pupu pa takoane kakou. Nitikouyake meme kai tine i metekuno, neke oya-lawe-pala wia kia noa wedia kawati wa odeneka meamokana. ³⁰Nitamokanake neke mana putunago

wakapea nokalepa togeke kiadete lamotoa egetekoona pitimekawe kai tine wia toge kikakaka. Neke kamoya-kiti moa pokome pamoko atoa-pala opia mekome paka wetekamu taneyake tokakale ³¹etename okome tota odeneyata mea kakoona. Anukuya peyapa nekeno, dekolowene poaneya kake okope. ³²Neke wamene ago tuane tetepo taneyake opi i noko. Atua pekeneyano wene pikounake opi i eneku. Nikepa ke wa wedia mekilepa tamele toko wa etename akeneya wa Yesuyo akeneya.

Kepene Mama Motokagoke Pedoa Akenemo

16 Yesuyo one oya-lawe-pala eya waka pedoa akeneya. Kamo agome-kiti onekeya neme yopikamene wa panago moa kakaneya. Nitikale yopikoa meaneyake pade-kitame ekete winagome nekeya-kiti paka wetekamu toa talo toa potokakako wa toawea onokoli ²kamo agome ne noo wa yopikaka ago kayo oa motokome okome neme toa potokanemo-kiti onikino, anukuya-kiti neme yopikake oi pima neke tadekale enouno, eni wia pika boku aua namene. Anukuya-kiti neme wa oyake yopikamele toamokolo uku wa kamo agome akeneya. ³Nitaneyake one toateka wene kibutua mekome okome kamo agome no ne pa wa wetekademe toko. Itono wetiane ipe enika eni pupu toateku tele meamoko. Eko pade ali-kitaneya oiane moamene ya motukuno, deku patu. ⁴Kamo agome pa wa wetekakale pa pima yakenepa ali atoame kini yapu ne noo wa no makutukoa momotoane tekene ile tou wa wene kibutukapianeya. ⁵Nititikoapa one Ali Muno agonoke padeya-kiti nami kakoa motane yene peya odene odene wa kayo oa mokala taneya. Nitopa panago-pala okome neme tobou agono nami wia ete meatekoyapa

edela piko-pe-kale okome ⁶olipe yomo k_u uepa mete keneke mekoane ege takupeta kadukoane (100) nami wiane meamedeku wa okale okome eina ete meateko oipa bokuke wiane mekakouna pade pilia wawa koikoa eni lukuke ege odepeta kadukoa (50) oi wia mekamene wa akeneya. ⁷Nitoapa padago-pala okome tobou agono nami wia ete meatekoyapa edela piko-pe wa yatekale okome witi k_u kake uane kite toane ege kadukaka kapidime kadukoane (1000) nami wiane ete meamedeku wa okale okome eni oipa bokuke wiane mekakouna pade pilia wawa koikoa eni lukuke ege kadukaka wageneme kadukoa kakoa (800) oi wia mekamene wa akeneya.

⁸Einagome dikoa toa potokakaleka tobou agome okome pinali neke kepene mama moteke toatekale wedoa wene kibutukapiadeko wa one kei pianeya wa Yesuyo akeneya. Nimo ootokoa okome itono peku noa tiki-kitame kini yagonomikiti-pala toatikile wedoa wene toa tikilepa p_a keneke Akolalinele takama yaki-kiti moa patukoa tiki wa Yesuyo akeneya.

Kue Pikoa Mekete Toatekomo

⁹Yesuyo nimo ootokoa okome kini kamo tikilepa yete pade ali atoa-pala tatiane oya kakoane tou wa tamene. Nipa eni kamoya wetekamu tootokoa pa mekepa mea kawateko take namene wa makutukoa momotoa teke nitamene. ¹⁰Panagome-kiti one natele toatekale epetekoa tokomepa nipa tubele toatekaleka epetekoa too. One natele toatekale toa potokakomepa nipa tubele toatekaleka toa potokoo. ¹¹Nipa itonoke kamoya-kitipa kime pikoa mea potokadokolipa nipa one epetaneya pia kawateko kamoya talo takamene wa teyo edoa memotoa-pe. ¹²Panagoneya talo takoa potokadekalepa nipa

one kamoya pade ne pa metekene metekuno, moa ta wa teyo edoa memotoa-pe.

¹³Panagome yono tatikatakutukoa ali takutane pupu oyake takamele toamoko. Nitoado tokomepa panago-pala kotimi wene luaneya mekome wa padena agoke wene mekoa mekome pupu takakala too. Ni panagoke wene tugo mekome wa padena ago paya tetepo takoa too. Nipa Akolalinele takakilepa kamolekeka wene piitikaneya mea tamele toamoko wa Yesuyo akeneya.

Yesuyo Akenemo-mene

(Matiu 11:12-13,

5:31-32, Make 10:11-12)

¹⁴Yesuyo nimo okale Parisi ali-kitame yakakoa kaketeke tea agale oa kak-eneya. Nipa kini kuke-kama wene piitikaneya mekete ni taneya. ¹⁵Nitikoli okome ali atoame kiwi kei pimotoa tekete kini leneke wene kiyo akeneya meane tetepo takoa mekilika Akolaliyo kini wini tepene piko wene tetoa eneko. Ali atoame tobou kakoa kei pikiya-kitipa Akolaliyo kote motuku wa kotimi wene luaneya meko.

¹⁶Papete Moseseyo one totono i i wa yamea wia mekaneya. Akolaline agale toawe akane ali-kitameka one agale i i wa toawe akama nekeneya. Wa naniko Yone taatekoka nekene-pete titimoa weneya totono Akolaliyo ali atoa talo tokome tokomo kini wene epetekakomo oa aua yakili e ku ali atoa Akolalike lukoa meadete togo togo oa kakili uku. ¹⁷Nimopa wane ekeneye eya waneka uku. Itono tibuta oyake takoa pamele tokoyake Mosesene totono pademoka katekamele toamoko.

¹⁸Panagome one natono wawa eko pade atoa motokomepa nipa mone moamateko atoa eni motoko. Aname wakene atoa panagomedo motokomepa nika

mone moamateko atoa eni motoko wa Yesuyo akeneya.

Kamo Ago-pala Lasarusitake Akenemo

¹⁹Yesuyo agale pade pedoa okome okome kamo ago pade ta pataka abuna kamokakome kudulu pagene mamina eya kawa nee epetaneya-kama noa taneya. ²⁰Einagono kago keteponeke ponopene ago pade one ibini Lasarusi tono pageneya nome piai taneya. ²¹Nipa kobume tuaneya mekome kamo agono walai keneke pitaka nee kugu noadiyano wene pia taneya. Nitikata tue-kiti nekete one tonon li abetoai taneya. ²²Ponopene ago nitoo pa mea tukale edelo ali-kitame a tibuke moa aua pote Eberamene yono kounoke kakapaneya. Kamo agoka tukale oloyo taneya. ²³Nitaneyake poane take pome mekome dika dika toamene tete mooka kakome ate enapekome enekale ta padeka mati Lasarusi Eberamene yono kounoke kakale enekome kayo okome okome ²⁴atai Eberame noanu ela moamene-ye. Toe itipono okoa kakota i kakene tete dika dika toamene mookane kakuno, winago Lasarusi one kadapi yono munoke ue takamoo anu keke ko akakanomono, pa wa oto wetekamene-ye wa kayo okale ²⁵Eberameyo okome anu mana ne itonoke mekepa epetaneya-kama motokana. I ago Lasarusi nitameneya edawe mekana. Opa i ago wedia mekoyake nepa tete mooka wini kako. ²⁶Nika ne-pala toto-pala kobu tubeyame pilikaneya mekono, ika meko-kiti winika nouno wene piketeka winika namele toamoo winika meki-kiti oto namele toamoko-kale ²⁷⁻²⁸yatekome kamo agome okome winimopa nimini okoyake eya tamene wane ne kowitikene uku-ye. Agetaine yapu anukameyo-mikiti ko kakoo (5)

mekete tikino, no tete i mookane kakuta note menokayano, wini ago Lasarusi eni yeneke wetekakamene-ye. Nipa kini tiki poanele tewitikoo wawati wa pubu akapomotono ta wa kowitikaneya. ²⁹Nitikale Eberameyo okome Mosesene totonoka Akolaline agale papete toaweaa akane ali-kitane agaleka pa kini oi momotono ta-kale okome ³⁰ae, atai Eberame anukameyo-mikitame enimo oi moamoi-li. Tukome tuane agodo kamomotokome kini mekoita pome pubu opokalepa kini poanele tewitikoo waweino, wini ago wetekakoo ta-kale okome ³¹Moseseyoka Akolaline agale papete toaweaa akane ali-kitameka wia mekane agale yakoo moameketepa nipa tukome tuane ago kamomotokome mekoita pokome okamoka etene yakamoi wa Eberameyo akeneya wa Yesuyo akeneya.

Ali Atoa Likoo Eneki Yeneke Pubu Akenemo

(Matiu 18:6-7, 21-22, Make 9:42)

17 Yesuyo one oya-lawe-pala okome okome ali atoame poanele tomotoo padele padele witakala too. Ae, poanele tomotoo likoo enekoi yename tete mooka kawei. ²I mati deya-kiti odeneka padame likoo enekalepa nipa Akolaliyo kibu motokome dika dika toamene tete meoo. Ae, eni tete mea kibu moamomotoapa papete mati wete likoo enameneyake pade alimedo laukakoo tube kue matiyame one kabe kautoo kusa ue muke keti pitikakalepa epetoo. ³Kipalaka enile takayano, wedoo meamene.

Neke oyago padame ne-pala padele poanele tokalepa kikoo oa moamene. Nitikale one poane wene wia wakalepa nipa one poanele tokanake po letu mekakana keetapeamene. ⁴Nipa ta pataka abuna tatono (7) kakoapeta

poanele ne-pala one tokala toake wa tatono (7) kakoapeta ne-pala poanele eina tekene tadeku wa one poane wene wia wakala tokalepa one poanele tokala tokanake po letu mekakana kekala tamene wa Yesuyo akeneya.

Akolalike Wene Tugoa Mekete Toatekole

⁵ Yesuno oyali-kitame one-pala ekete Ali Muno Akolalilinele akole-kama takama poono, mane mane oano ta-koli ⁶ Ali Muno agome okome kalipe lenepa dedeyameke witakome leau akatapea witako. Akolalilinele edikoado takama peketepa nipa i kako yomo sikamine yomo teke toomoa poke kusa ue muke kapa wa okale toomoa poo wa Yesuyo akeneya.

Tobou Agono Pupu Takakete Toatekole

⁷ Kiwi padago neke pupu takako agomepa neke ipe takoaka neke kai egetekoaka toa peya takamotokome neke yapu wakapea nokale eneke nee wete nonamene wa neme oo-pe. ⁸ E'e mena. Eya wa oo. Nee ue eya nouno, mamina pade moa kawa nee takoa lawetoano ta. Nee nootokoane mekolu neke nee ue eya noano ta wa neme oo. ⁹ Enile tamene wa okale einagome yakoa tokalepa ke wane uku wa neme oo-pe. E'e mena. ¹⁰ Akolalilinele dikoa takamene. Oneme tamene wa oka toakama yakoa teketepa one-pala eya wa amene. Tone toatekole pa eina tokoono, toto pa yene-pala ke wa edoa oade-pe wa amene wa Yesuyo one oya-lawe-pala akeneya.

Yesuyo Kedime Nakene Ali-kiti Latekanemo

¹¹ Yesu Yerusaleme take poademe pokome Galili Sameria tata otoke pake yakeneya. ¹² Nitoapa ali atoa pitikoi ta

pade pome kakaka kedime nakene ali noi kakoa (10) one kotuadete eka mati witimoa kakete ¹³ kayo telo ekete ekete Tikisa ago Yesu toto ela moamene-ye wa kayo oa kakeneya. ¹⁴ Nitikoli enekome okome Akolalike lodo yotokoai tiki ali mekita pekete kini lene timini yameatino poe wa wetekakale poadete pokoika eina kedime nakene yene takoa pootapeadeka. ¹⁵ Takoa pekedekale enekome odene ago Yesu kakata wakapea nekeneya. Nipa Akolali kei telo oa pima nokome ¹⁶ Yesuno kawane aua pitakome ke wa akeneya. Einagopa mone Sameria take agomeke nitaneya. ¹⁷ Nitaneyake Yesuyo okome kiwi kedime nakene ali noi (10) kakoapa kiwi peya latamokoi-pe. Latekakilepa taneyano, eina pogi kakoa (9) ali-kiti edekoti-pe. ¹⁸ Ae, e ali-kiti Akolali kei pinamikiyake o ago odene mone agomeke Akolali ke wa one kei pinoko wa Yesuyo ootokoa einago-pala okome ¹⁹ kamokoa pa. Nooke wini wene tugoa mekolome ne eni latekaneya tokolo uku wa Yesuyo akeneya.

Akolaliyo Ali Atoa Pawe Toa Talo Toateka

Tigotokale Toatekale (Matiu 24:23-28, 37-41)

²⁰ Parisi ali-kitamepa Akolaliyo ali atoa pawe toa talo tikilepa manipete too-pe wa yatekoli okome Akolaliyo eni talo tokoyapa kini leneme enemotoa keleyo witamoo. ²¹ One talo tokoyapa ku witakono enoe, e witakono enoe wa padameka wamoi. Akolaliyo talo tokoyapa kiwi pakeke wete witaneya tokolo ni uku wa Yesuyo akeneya.

²² Nimo ootokoa one oya-lawe-pala okome no Ali Yatenane Oyago waka-peane none meatekou ta pataka odene enadiya wa kime wene pia meketeteke wa pade enamoi. ²³ Enipetepa pade-

kitame winago oto noademe ku nokono, enoe wa oa, wa pade-kitame e nokono enoe wa oa toino, eni yene litia poameamene. ²⁴No Ali yatenane Oyago wakapeane nekenepa katiapale a tibu eka kukata keleyo piatapeko toane pa tootapeneya nokolu peyame enekete enoi. ²⁵Nitatekuyake namolo takoanepa tete-kala mokoane kawou. Nitimotoa no kaku-pete meki-kitame no tewitikoawawadete tiki.

²⁶⁻²⁷Eya ago Noa meane-pete ete mekoi peya paya nou toa mekete gerepi po ku ue eyake wene piitikaneya mekete alime atoa moa atoa alike pote tokala taneya. Nipa Noa one tube ue dipi keneke pome mepokaleka edikoa paya nou toa meaneya. Nitoa mekoika ue mea tagatapekome eni yene wia atukatapeneya. Eina toa ali atoa paya nou toa mekakoane no Ali Yatenane Oyago wakapeane nekene kotikatapeane nou. ²⁸Eyago Loto meane-peteka ete mekoi peyame nee noa eya kuya topo toa moa ipe lene matoa yapu wia enika enile toma nekeneya. ²⁹Nitoa mekoika Loto one Sodome ta tewitikoapokale eina eina Akolaliyo tibuke toepala itipono okoa kakene kuguta pitikoa wia atukatapeneya.

³⁰No Ali Yatenane Oyago wakapeane nokou-pete mekoi ali atoameka einago Loto meane-pete tanele pa enile tokoa kawei. ³¹Enipetepa panago neke pikoya-kiti yapu keneke pimotoa yapu liti koo meapa nipa mopada wa yapu keneke poameamene. Eida mea pitoa pamene. Panago neke ipe toa kawapa wa yapu wakapea poameamene. Eida kawa pitoa pamene. ³²Loto einagono natono-pala tanele kipalaka takayano, kakoika wete tewitikoapitoa pamene. ³³Nipa onekele-kama tokome tukaya wa piti tokolo kepene mama motoko agopa one yomini-pala etepea tua poo. Wa padekagome one kepene

mama moamokome tukaya wa piti moamoko agopa tukomeka Akolaline take mea kama poo. ³⁴Eya waneka ukuno yakamene. Enipetepa adona odene walaike atuta pitikoita-kiti pade eida pimotoa Akolaliyo padena takoa moa poo. ³⁵Atoa takuta kini witi ku kugutukoata kakoita-kiti padatoa eida pa kamotoa Akolaliyo padena atoa takoa moa poo wa Yesuyo okale ³⁷ekete Ali Muno neme wini okotapa manika patu wa okoli okome ali tuaneya lomua kakota kego naki ini-kiti odepeta koukoa note puka puka toa yaita kawei wa Yesuyo akeneya.

Koiso Yateka Agome Nepo Atoa Auapeanemo

18 Yesuyo agale pade pedoa ikilepa Akolaliyo yakoa toatekole nepia mea wawamekete one kowitoai toatiki adeka pikome eya wa akeneya. ²Pitikali ta latia pitikoi take koiso yakateka ago pade eida meaneya. Einagopa Akolaliyoka ali atoameka one akakaya wa piti moameneya atiki toa meaneya. ³Eni take nepo meane atoa pade einago mekata nokome okome panagome nopala poi teia mea toa potokakono, no auapea anu koiso yatekoano ta wa kowitoai taneya. ⁴Nitikale pade-mene yakameneya meake wa naniko wene kibunutukoa mekome okome Akolaliyoka ali atoameka no akakaya wane piti moameneya atiki toane mekuyake ⁵i atoamepa no teko takakoa kakono, no mekuta-kama one koiso yatekoano ta wa kowitoa-kala kakayano, auapeane one koiso yatekada wa akeneya.

⁶Ali Muno agome nimo ootokoa kakome okome koiso yatekakagome okomo yakamene. Wene kiyo wameneya mekomeke okono. ⁷Akolaliyopa one wa takoa motane-kitame ete pia oto pia one kowitoai toa kakolipa kini koiso yatekamoo-pe. Koiso yatekatekoa

wete auapeamoo-pe. ⁸Kini koiso wete yatekoa auapekala too. Nitatekoyake no Ali Yatenane Oyago wakapeane nekene enekolu ali atoa nooke wene tugoa meadekoli enou-pe wa Yesuyo akeneya.

Parisi Ago Takesi Kue Motokane Agotake

Pedoa Akenemo

⁹Yesuyo agale pade pedoa ikilepa pade ali atoa wene kiyo akeneya meku wa kini wa kei piketeke ete-kiti paya tetepo takoa meaneleke eya wa akeneya. ¹⁰Eyagotame Parisi ali takesi kue motokama yakene agotame Akolali kowitadete tobou losu yapu pekeneya. ¹¹Pote kakete Parisi agome one one kakome mate agale keneya oa one tepene kowitikome okome Akolali nepala i ukumo yakamene. Ete-kitame pade ali-kitaneya oa yotokoa moa ele kule poanele toa atoa lia moa nitoa tikiyano, noanumepa nile toamuku. Kuna agopa takesi kue motokama yako ago ku kakono, nopa einago keneya menano, ne-pala ke wane uku. ¹²Ta patako tatono kakoa (7) ponoko toanekama takupeta nee wawane pa mekala tuku. Anu motukuya peya yonota tuane pikala toane pade katekoane moane neke pikakala tuku wa kowitoka kakeneya. ¹³Takesi kue motokama yaka agome nitamokome ete witimoa kakeneya. Nitoa ate tibuke nepikamene ya tokale kakome one palanu wi wi toa kakome okome ae, poanele-kala tuku agome ukuno, Akolali no ela moamene-ye wa kowitoka kakeneya. ¹⁴Nitoa kowitane agopa Akolaliyo poanele toamene ago tetepo takaneyake yapu pekeneya. Padena ago mena. Nipa pinali one wa kei piko agopa Akolaliyo keku ago tetepo takoo. Wa pinali one wa paya tetepo takako agopa Akolaliyo kei pioo wa Yesuyo akeneya.

Yesuyo De Mati Deya-kitike Akenemo (*Matiu 19:13-15, Make 10:13-16*)

¹⁵Wa pade-pete pade-kitame kini de mati deya-kitika yoname mitikakamotoa Yesu kakata aua nokoli one oya-laweme noameo wa kikoa okoli ¹⁶Yesuyo okome wini mati-kiti oto nomotono, etoe. Akolaliyo one talo tuku taapa kinino noe wa yametekilepa dikane mati-kiti yametekono, oto nomotono toe. ¹⁷Nimini ukuno yakoe. Panagopa mati deya-kiti Akolalike lukoa mekete tiki toa lukoa meamademe wakomepa nipa Akolaliyo talo toko take oyake pamele toamoko wa Yesuyo akeneya.

Kamo Tane Agoke Pedoa Akenemo (*Matiu 19:16-30, Make 10:17-31*)

¹⁸Tobou ago padame Yesu yatekome okome epetanele toko Tikisa ago, edele tekene meane kama pou-pe wa okale okome ¹⁹nopa epetanele toko ago wapa wini okono, edekolo oko-pe. Epetanele-kama toko agopa Akolali odene kako. Wa pade lokoaka kawamoko. ²⁰Moseseyo tamene wa papete wia mekanemo neme wene toko. Eya wa wia mekaneya. *Mone padane atoa lia moamoa ni ali wia tukamoa ni monekeya kode moamoa ni panago-pala pa puputua akoa agale wamoa ni neketai nekauata kei pia mama moa tamene* wa Moseseyo akeneya wa okale okome ²¹eni akenele-kama tualike laigoane yakoane toma nuku-kale okome ²²wenepa eni tadekoyake odeneledo katekoa toameadeko. Neke pikoya peya topo toa kue mootokoa ponopene ali atoa tatia meetapeamene. Nitikepa neke kamo toatekoyapa a tibuke auma kakeneya enoo. Nitatekoyano, no litima namene wa Yesuyo akeneya. ²³Nimo okale yatekomepa uu kamo tane ago tokome wene keda taneya kakeneya. ²⁴Nitikale enekome Yesuyo

okome ae kamo tiki yene Akolaliyo talo toko take pamene potu tube mati toko. ²⁵Kamelo kaido noi keneke-kiti patukoa ponokomepa nipa wedoa wili toa kawamoapa patukoa ponoo. Kamo tane ago Akolaliyo talo toko take ponokomepa nipa wili tokoa mati kawapa ponoo. Nipa one take pamene potu mati toko wa Yesuyo akeneya. ²⁶⁻²⁷Nimo okale yatekoi-kitame ekete kamo yeneke winimodo nimini akedekalepa nipa Akolaliyo mainali atoa toa moo tokolo-pe wa okoli okome ali atoame toamatikilepa Akolaliyo oyake tamele toko-kale ²⁸Pitayo okome totomepa tone yapu tewitikoa wawa ne litima noko-kale okome ²⁹nimini ukuno yakoe. Panagomepa Akolaliyo ali atoa pawe toa talo tokomo oa mema poademe tokome one yapu one natono onekameyo-mikiti one etene nineta one mati-kiti tewitikoa wakomepa ³⁰nipa itonoke enika eniya luku ako-kitika mokala too. Nitoa mea tukale Akolaliyo one talo tuku take mea kama pamene wa moa kakoo wa Yesuyo akeneya.

Yesuyo One Tuatekamo Tebolo Takoa

Oa Metaneya

(Matiu 20:17-19, Make 10:32-34)

³¹Yesuyo pato wa one oya-lawe-pala eko keneya aua pokome okome kipala i ukumo yakoe. Opa toto ate Yerusaleme take poadete poko. Pote kakolopa Akolaline agale papete toawe akane ali-kitame no Ali Yatenane Oyagoke wia mekapiane toa-kama aida taatekoo. ³²Nipa ete Yu yename no dekoa moa mone yenane yonoke moa pikoli paya tetepo takoa tea kawa tekelipu toa yotokoa ³³po wapime wia toi. Nitoa wia tukolika ta tebolo takoa pataka-pete kamoane pou-kale ³⁴one oya-laweme nateya weneka toameneya. Nipa eni okamo kaukoa keneya okale

tokome eina agale pine agopa tokale meaneya.

Yesuyo Leneta Lianeya Mekome Eya Kuya

Oia Meane Ago Latekanemo

(Matiu 20:29-34, Make 10:46-52)

³⁵Yesu Yeriko ta tigotokakoa witapademe nokaka leneta liane ago pade eida one ponatekaya liti kue eya oia moa meaneya. ³⁶Nitoa mekome yatekale ali atoa peya obomoa ponokoimokamo yatekome okome ipa edele tikiti-pe-kale ekete ³⁷Nasarese Yesupa wini ponoko-koli kayo okome okome ³⁸Depidi-laweke taagene ago Nasarese Yesu neme no ela moamene-ye wa ka wiko kakeneya. ³⁹Nitikale namolo kawa penane-kitame kiko ekete ekete oyakeno, wa wa okolika kayo telo kamotokoa okome okome Depidi-laweke taagene ago no ela moamene-ye wa kayo akeneya. ⁴⁰Nitikale yatekome Yesu witimoa kakome okome winago no kakuta aua noe wa okale one kakaya liti pinele nome kakale Yesuyo yatekome okome ⁴¹anume edele takamotoa oko-pe-kale okome Ali Muno anu leneta kikakoa wane uku-kale okome ⁴²nooke wene tugo mekolemepa neke leneta epetekakono, neke leneta kiko yeka ete ena wa okale ⁴³eina eina one leneta kikatapeneya. Nitaneyake Akolali kei pia kawa Yesu litima pekeneya. Enile tokale enekete peyame Akolali-pala ke wa kei pia kakeneya.

Sakiasiyo Tanemo

19 Yesu Yeriko ta nome patukoa ponokaka ²uu kamo ago Sakiasi eida nepia kakeneya. Einagopa takesi kue motokama yakene yene yopiane ago. ³Yesu edane ago patu wa nepia kakale ali atoame Yesu ponatekaka

apua takoa edetapeneya. Nitaneyake totono ago tokome one lekoa pokome kawateka kene piameadeka. ⁴Nitadekale teigoa teyapea pome Yesu ponatekaya liti kakene yomo sikamo yomoke lewia pome nepia meaneya. Nipa Yesu enademe taneya. ⁵Eida nepia mekala Yesu nokome lene ate pitikoa enekome okome Sakiasi neke yapu opi no pipato. Wini yomo kōa wete noo-kale ⁶nipa pata wa kōa nome one yapu wedia aua pekeneya. ⁷Nitikale enekete e yene peyame Yesu oa lubu lubu pikakete ekete poanele toko agono yapu eni pome pipoko wa kō oa kakeneya. ⁸Nitaneyake Sakiasi one yapu nome kakome Yesu-pala okome Ali Muno anakuya peya tatitakutukoane padekapa ponopeneya-kiti meou. Wa namolopa pade ali-kitaneke kini kue oane yotokoane kode keneya motadekolupa nipa pine yene kini nami wianepa eni oane yotokoane motokouna toane tuyonopeta kadukoane ete mekala tou-kale okome ⁹opi neke yapu pitiki-kiti Akolaliyo toa motoko wa ootokoa okome i agopa etepea pekene agoke Akolaliyo oneka Eberame-laweke taagene ago wa toa motoko. ¹⁰Nipa no Ali Yatenane Oyagome paka etepea pekene yene tuku tou wane toane moadene nokou wa Yesuyo akeneya.

Tobou Agono Pupu Takane Ali-kitame

One Kue Pikoa Metekakete Tanemo

(Matiu 25:14-30)

¹¹E yename einaka einamo yakakoa kakoika Yesuyo agale pade pedoa akeneya. Nipa one Yerusaleme take tigo-tokakoa witanokono, Akolaliyo ali atoa pawe toa talo tokoyapa itonoke opii witako wa e yename wene pikoli tokome ni akeneya. ¹²Nitikome okome tobou ago pade ta tetemada meane yename kini ako tobou ago moa kakamotoa

poademe eya taneya. ¹³One pupu alikiti noi kakoa (10) noe wa kayo oa motokome kini kini kakoi toa kina kapidi kakoa (20) tatikoa mekala taneya. Metekome okome oto noadene pukuno, i kueme tine pikoa motokamene wa meemotokome pekeneya. ¹⁴Nitaneyake one eina take mekoi yename one-pala kotimi wene luaneya mekete pade alikiti moa wetekakete ekete winagome toto talo tamene kote tokolo wako wa akapoe wa wetekaneya.

¹⁵Wa naniko ete take mekoi-kitame einago kiwi yopiateko ago ne mea wa moa kakatekaneyake one ta pine lono wakapea nekeneya. Nokome pupu ago pade-pala okome kue metekouna ali-kiti enemotokapa. Auna kueme tine pikoa motokakoimo yakouno, enemotokapa wa moa wetekaneya. ¹⁶Nitikale namolo ago nokome okome Ali Muno nemena mea pokana kina kapidi kakoa (20) kina moane tine pikoanepa ege kadukaka kadapime kadukoane (200) kina motokakouno, ina wa metekale okome ¹⁷epeteko neme eni tadeko. Eni pupupa nateleke neme wedoa tadekono, pupu pade tubele yameou. Pitikali ta latia pitikika noi kakoa (10) ta-kiti ne tobou ago mea yopikamene wa yametaneya. ¹⁸Wa taku takoa noka ago nokome okome Ali Muno nemena mea pokana kina kapidi kakoa (20) kina moane tine pikoanepa ege kadukaka tatigime kadukoane (100) kina motokakouno, ina wa metekale okome ¹⁹nipa pitikali ta latia pitikika ko kakoa (5) ta-kiti ne tobou ago mea yopikamene wa yametaneya. ²⁰Wa panago nokome okome Ali Muno nemena mea pokana kina kapidi kakoa (20) kina mootokoane mamina moane togotoane potipikakou. ²¹Nepa telekago teke padeya-kitipa nekeya menake pa neme mokala toko. Panagono ipe neme padeyaka

matamokoyake noa meko. Nepa dikane agono wene tekene piti tokale mekene neke kue pa potipikakouno, ina wa metekale ²²Ali Muno agome okome nepa poanele toko agomeke oko. No telekago padeya-kiti anukuya menake mokala toane ni panagono ipe padeyaka matamukuyake noane meku wa nooke winipa kō okono, neme wini oko toane padele telekole toane ne kibu mouno, nepia. ²³Ne meane pokouna kuepa bage edekale moa pikamoka-pe. Bage pikoo tokapa anu kueme tine pikane kue-pala oto mou tokake nitameke padeleka toameneya pa potipiadeko wa kikoa akeneya. ²⁴Nitoapa eida yakakoa kakoi yene-pala okome winagonoke one kina kabidi kakoa (20) pikoa kako kina moe. Mootokoapa kina ege kadukaka kadapime kadukoa (200) kina pikoa kako ago metekapoe-kale ekete ²⁵ouo, oyagome one kina ege kadukaka kadapime kadukoa (200) kina pikoa kakoyake okoto-pe wa okoli okome ²⁶kipala i ukumo yakoe. Akolaline peku wedoa nakagopa nipa Akolaliyo one peku wedoa lawetema pokale kamo toma pou toa wedoa toma poo. One peku alekoa noma pokagopa nipa onekeya nateyaka eniya peya Akolaliyo takoa wa mootapeoo. ²⁷Kiwi talo tamene kote motoko wa no-pala poi teia mekete wakoina yene wete dekoa motokapoe. No kakakoa wia tukoatino, dekoa motokapoe wa tobou agome akeneya wa Yesuyo akeneya.

Yesu Yerusalemekale Ali Atoame

Ke Wa Wedia Kakete Makutukoa Motanemo

(*Matiu 21:1-11, Make
11:1-11, Yone 12:12-19*)

²⁸Yesuyo nimo omotokome one oya-lawe-pala patono noe wa Yerusalemekale take ate witapademe pekeneya. ²⁹Ni-

toa pome Olipe-pini wa ibini akene tonoke latiane tata Besepase Besani tatake tigotokakoa witapademe kakome one oyalita takuta moa wetekakome okome ³⁰kuka ku take poatino poe. Pote witoa kaalaukete enekoli dogi kai tine po kakoa kebetaneya kakale enoi. One patu panagoka wete mea yawameneyano, po kotokoa oto aua notokamene. ³¹Kotokoa moadete tokoli enekome panagome okome dekoloko tokoa motiki-pe wa okalepa eya wa akamene. Ali Munoyo padele toatekole pikolo ni motokoa poko wa akamene wa Yesuyo oa wetekaneya. ³²Nitikale pote enekoli Ali Muno agome okanakale tadeka. ³³Nipa po kotokamotokoika pine yene nekete ekete i dogi kai tinepa edeyake po kotokoa motiki-pe-koli ekete ³⁴Ali Muno agome padele toatekole pikolo ni toko wa moa pekeneya. ³⁵Nittoa Yesuke aua nekete kini tokoo kakene mamina petene kotokamoa tali waneke tatikoa Yesu mekoa aua pekeneya. ³⁶Nitikoli mea pokaka kini mamina kotokoa one eni mea poatekaka pia tatikakawineya pekeneya. ³⁷Nitaneyake Olipe-pini togoikoa ketipea kōa poademe tigotokoa kakata one agale wete yakoa motane yene one-pala obomoa pote eida titimoa Akolali kei telo pima pekeneya. Nipa Yesuyo telekole toma pokale enekoinakalekeka ke wa Akolali kei pima pekete ekete

³⁸Ali Muno patu kautakoa kako tobou ago i nokono, Akolali neme pewe wia yopiamene-ye. A tibuke meki-kiti tepe mataneya mekete tikino, Akolali kei piatoe wa oma pekeneya.

³⁹Nitaneyake e yene pakeke obomoa nekene Parisi ali padeka-kitame one-pala ekete neke oya-mikiti wawe wa oa kawikamene-koli okome ⁴⁰kipala i ukumo yakoe. I yenedo kawia mekolipa

nipa i piko kue wane-kitameka ke wa wedia kayo oi wa Yesuyo akeneya.

Yesuyo Yerusaleme Ela Motanemo

⁴¹Nitoapa Yesu Yerusaleme tigtotokoa nome enetapekome komo loboa pitikoa kakabu okome ⁴²ae, opika kini tepe mataneya poatiki kaapa kini leneme keleyo pikolo enemotadiyano wene pikuyake opa kauaneya tokome oyake enamele toamoko. ⁴³Ae, Yerusaleme ta nepala poi teja mekoi-kiti wini nekete kobu moa unukatakutukoa dekali toa meoi. ⁴⁴Nitoapa neeka neke wida pitikoi peyaka moa kaua kugu witikoi. Nipa neke yapu pawe eya latia kakene kue peya keawea tadekamu toi. Ae, Akolaliyo kiwi auapeademe wida nekedeke wa wene toamokoli tokome nitoi wa Yesuyo komo oa kakeneya.

Yesu Tobou Losu Yapu Pokome Tanemo

(*Matiu 21:12-17, Make 11:15-19, Yone 2:13-22*)

⁴⁵Nimo oomotokome Yesu Yerusaleme take tobou losu yapu pome kakome eya kuya eida-kama padeya padeya topo toai tane ali-kiti wia tikatapekome okome ⁴⁶anu i yapupa no Akolali ali atoame kowitoai toatiki yapu wa wia mekaneyake kimepa kode yename kodeya paigakoa moa piai tane kota tetepo takakino, poe wa wia tikatapeneya.

⁴⁷Ta pataka abuna Yesu tobou losu yapu pome olaukakala taneya. Nitaneyake Akolalike lodo yotokoai tane tobou ali-kitika Mosesene totono pine toa olaukane ali-kitika ete tobou yene-pala koukoa mekete one katekoa wia tukatekoi oi pedoa pia kakeneya. ⁴⁸Nitikolika ali atoa peyame one oko agale yakatoe wa yakakoa kakeneya tokome one wia tukatekoile toamokale wakeneya.

Te Patu Kautakoa Kako-pe

Wa Yesu Pitia Yakanemo

(*Matiu 21:23-27, Make 11:27-33*)

20 Wa pade-pete Yesu tobou losu yapu pokome ali atoa olaukoa ni Akolalinemo kini wene epetekanemo i i wa mo wia kawa tokale Akolalike lodo yotokoai tane tobou ali-kitika Mosesene totono pine toa olaukane ali-kitika one kakata nekete ekete ²ne tokolepa te patu kautakoa kake tokope. Teyo ta wa okole toko-pe wa pitia yatekoli okome ³kipalaka yakatekumo pikono, yakoe. ⁴Yoneyopa ali atoa ue motokama yakilepa tene peku noa tokape. Akolaline peku patu. One kauamikitane peku patu. Yakouno, oe-nakale ⁵kini kini yakaate tekete ekete Akolaline peku noa toka wado okolopa nipa einagome oka agale edeyake yakoa moamokoi-pe wa oono, nimo wamato. ⁶Nitameneya one kaua-mikitane peku noa toka wado okolopa ali atoame kue katekamoa pitikoa wia tukoi. Ali atoame Yone einagopa Akolaline agale akakago wa wene pikete tekete nitoino, ⁷enimoka wamato wa ete Yesu-pala ekete Yoneyo mainaline peku noa toka patu. Wene toamoko-koli okome ⁸nipa noanu toma yakulepa i ago patu kautakoane kakene tuku wane kipala toaweane wamou wa Yesuyo akeneya.

Panagono Gerepi Po Ipe Yopikoa

Potokane Ali-kitike Akenemo

(*Matiu 21:33-46, Make 12:1-12*)

⁹Yesuyo e yene-pala agale pade pedoa okome okome panagome one ipe toa gerepi po matatekoapa one ipe kime yopikamene wa pade ali-mene yamemotokome ta padeka pokome eida mea kakeneya. ¹⁰Wa naniko eina ipe gerepi po ku putua kikutukakoa

kaka-pete eya taneya. One pupu ago pade moa wetekakome one ipe yopikaki ali-mename one moateku toapa moke toa memotono pa wa wetekaneya. Nitikale nokale one ipe yopikane ali-mename layo tiginame moomoa pitikoa pupuli wia padeyaka meameneya pa pomotoa wetekaneya. ¹¹Nitaneyake pinagome pade pupu ago moa wetekale einagoka layome wia kawa ya motokatekoa pa pomotoa wetekaneya. ¹²Nitaneyake pinagome tebolo takoa ago moa wetekaneyake einagopa wia kamate ponokoa paka lono moa pitikaneya. ¹³Nitaneyake ipe pine agome edeku patu wa wene kibututukoa kakome okome anu kolotini ago anu mana moane wetekou. Einagodo nokale eneketepa one kei pia makutukoa moi wa moa wetekaneya. ¹⁴Nitikale nokale one ipe yopikane ali-mename oote tekete ekete pinagono mana ku nokona. Etename one pikoa pokaya-kiti kadimo okome kunu agono pine pikademe tokono, one moatekoya-kiti toto moatono, one wia tukatoe wa ¹⁵tayo lono aua pote wia tukapaneya.

Nitikala taneyake ipe pinagome eni yene-pala edele tonoo-pe. ¹⁶Nipa eya too. Wakapea nokome one ipe yopikoa potokane ali-mene wia tukatapea kiwi luku pade-mene kime yopikamene wa yameo wa Yesuyo okale e yename ekete ae wini okole Akolaliyo taatekoa toamotamene wa okoli ¹⁷leneme nepikoa pikome okome Akolaline bokuke eya wa wia mekanemo pine edoa piko-pe.

I yomopa poadeko wa yapu wiane yename paya tetepo takoa wakeneyake panagome i yomopa yapu pigi wa moa wianeya wa panagome wia mekaneya.

¹⁸Eni yomo pigike pitakoi ali atoa kua kugu witikatapeneya piei. Wa eni yomo

pigi panagoke pitakome katua tawele takatapeoo wa Yesuyo akeneya.

**Mone Lomane Ako
Tobou Agono Takesi Kue**

Pitikakato-pe Wa Pitia Yakanemo

(Matiu 22:15-22, Make 12:13-17)

¹⁹Yesuyo nimo okale yatekete Mosesene totono pine toa olaukane ali-kitameka Akolalike lodo yotokoai tane tobou ali-kitameka ekete i agome ina pedoa okana agalepa totoke akedekono, dekatapea moatote wa einapete einata one moadete wili toa kakeneya. Nitiketete e kakoi yene piti motekete tokome wakeneya. ²⁰Nitoapa eya toatekoi oi pedoa pia taneya. Ta yopia meko agome koiso pitia yakakamotono, i ago moa meato wa pade ali-kiti Yesu kakata moa wetekakoli nekete one oka agale yakoa motane tetepo takoapa natemo omotadiya wa kakeneya. ²¹Nitikete ekete neme mane oa olaukoa tikilepa kiyoke-kama toko. Nipa ali atoa peya midi pikoapa Akolalinele takama pekete toatikile kiyoke-kama olaukako. Nepa nitane agono wene tekete ido pitia yakoono, yaka. ²²Tone totono litiapa ako odene tobou meko ago Sisane takesi kue pitikamoto-pe, pitikato-pe. Yakoono oa ta-koli ²³one eni labatekoi wene pikoile tetoa enekome okome ²⁴kue lene pade enouno, yameo wa okale yametekoli okome i kue lene tiginikepa padane lene timini-pala agaleta wia mekaneyano, eniyatapa teneta patu wa okale ekete ²⁵tobou ago Sisa one wa okoli okome nipa Sisa meatikiyapa one takoa mea, Akolali meatikiyapa ni Akolali takoa mea tamene wa okale yateketepa ²⁶ali atoa kakakoa i agome natemo omotato wa kamele toameadeko wa one eni

okamoke wene kainya pianeya tekete agale wametekoa wakeneya.

**Tuane Yene Kamoatikike
Pitia Yakanemo**

(Matiu 22:23-33, Make 12:18-27)

²⁷ Sadusi totono litiane ali padeka-kiti Yesu kakata nikilepa agale palene yakadete nekeneya. Eni yene kini totono litiapa tuane ali atoa wa kamoamoi wa iki. Nitane ali-kiti Yesu kakata nekete likoa enekete ekete ²⁸ Tikisa ago, Moseseyo one totono wia mekakome okome panagono atoame one mati opikameneyakedo einago tukalepa one wamene ago neme moa neke natono latikamene. Nipa tukanakago lukuke kawatiki mati-kiti opikamoto, nitamene wa Moseseyo akeneya. ²⁹ Nipa odene aline mana-mikiti tatono kakoa (7) kakeneya. Namolo agome one atoa moapa mati opiameneya one mea tuaneya. ³⁰ Nitikale one liti taku takoa opiane agome einatoa moapa mati opiameneya mea tuaneya. ³¹ Tebolo takoa opiane agomeka einatoa moapa mati opiameneya mea tuaneya. Eni wamene tatono kakoame (7) einatoa kikutua moma-kala nekeneyake panagonoka einatoame mati opikameneya. Peya tiobali mea tukala taneya. ³² Nitikala taneyake wipitikomempa einakatoaka tuaneya. ³³ Eina wamene-mikitame einatoa edikoa kikutua moma-kala nekeneyano, tuane ali atoa Akolaliyo moa kamotokaka-pete einakatoapa mainagono natono wa tugoa meoo-pe wa likoa enekoli okome ³⁴ opi meki-kitipa alime atoa moa atoa alike pote edikatakutukakala toa meki. ³⁵ Nitikiyake tua potepa weneya take mea kawatiki-kiti eida mea kaketepa alime atoa moamo atoa alike poamo toi. ³⁶ Eidapa edelo yene keneya mea kawei. Nipa tukolipa Akolaliyo moa

kamotokakale one mana kono-mikiti mea kawei. Nitoa mea kakete wa tukile toamoi. ³⁷ Tuane ali atoa Akolaliyo moa kamotokakamo Moseseyoka wia mekaneya. Nipa itipono oa kakene yomo deyake Akolaline agale ludu nokome akenemo wia mekakomepa Ali Muno agoke eya wa wia mekaneya. Ali Muno einagopa Eberame Aisaketa Yekobe toa einago-menane Akolali wa wia mekaneyano, ³⁸ onepa tuane ali atoane Akolali mena. Mea kama piki ali atoane Akolali wa okome akedeko. Ali atoa one patu-kama kautakoa kakete mea kama piki wa Yesuyo okale ³⁹ Mosesene totono pine toa olaukane ali padeka-kitame ekete Tikisa ago, agale muno kakoa wini okana wa akeneya. ⁴⁰ Nipa one-pala agale pade wa pitia yakamene piti tokale akeneya.

Keraisu Onepa Tene Mana

(Matiu 22:41-46, Make 12:35-37)

⁴¹ Nitaneyake Yesuyo e yene-pala okome Keraisu wa papete ibini akene agoke ikilepa Depidi-loeke tawateko ago wa ikino, dekolo iki-pe. ⁴²⁻⁴³ Papete Depidiyo Akolaline bokuke lo agale pade wia mekakomepa Keraisuke eya wa wia mekaneya.

Ali Muno Akolaliyo no lukoane meku Ali Muno-pala eya wa oka. Ne-pala poi teia meki-kiti moane kawikoane neke kawane komo pikouno, nepia meamene wa Akolaliyo oka wa Depidiyo wia mekaneya.

⁴⁴ Nipa Depidiyo Keraisu einagopa one lukoane meku Ali Muno wa akeneyake kimepa Keraisupa Depidi-loeke tawateko ago wa ikino, dekolo iki-pe wa Yesuyo e ali-kiti-pala akeneya.

⁴⁵ Nitaneyake ali atoa peyame yakakoa kamotoa Yesuyo one oyali-kiti-pala okome ⁴⁶ Mosesene totono pine toa olaukaki ali-kitame toma yakile titi toma yamene. Eni

yenepa kini ludu mamina epetaneya wiritapea kakeneya yawa ni makesike ali atoame ke wa walikitikakete yono momotada wa yawa ni losu yapukeka tobou ali-kiti meatikita meada wa mepokala tiki. Toge kikoikaka ibini akene yene meatikita meada wa mepokala tiki. ⁴⁷Ni nepo ato-kiti oa yotokoa kini yapu eya kode keneya motikiyake eka ali atoame kiwi kei pimotoa lede kowitikete kutupea pa agale likoa pikala tiki. Ae, Akolaliyo dikaki yene kibu motokomepa dika dika toamene tete meoo wa Yesuyo akeneya.

Nepo Meane Atoame Onekeya Peya

Akolaline Takoa Metanemo

(Make 12:41-44)

21 Yesu kabe togapia ate enekale tobou losu yapu keneke kue pitikoai tokoita tobou yene nekete kue eya pitikakala tokoli enaneya. ²Nitaneyake nepo atoa pade ponopene atoa nome tuane kueta takuta pitikananeya. ³⁻⁴Nitikale enekome okome nimini ukuno yakoe. I kamo yene peyamepa kinikiya tubeya pa pimotoa keku-mene odene moa pitikakala tokoina. I atoamepa onekeyapa nateya deyake one piko toa eni moa pitikatapeka. One nee eya topo toa moateka kue eni pitikakome tokome e yene peya moa patukaka wa Yesuyo akeneya.

Tobou Losu Yapu Tumu Tokatekamo

(Matiu 24:1-2, Make 13:1-2)

⁵Pade-kitame tobou losu yapuke ekete ipa todolo yapu. Kue epetaneyameka Akolaline takoa metaneyameka koniyo takoa wianeya kakono, enoe wa okoli ⁶Yesuyo okome kime i enekoa kakiya-kitipa eni wiane kue odeneka kibunukoa piameneya peya wia tadekatapeneya pa tumu tokaneya pioo wa Yesuyo akeneya.

Ke Enekakale Mekete Tete Moatekoimo

(Matiu 24:3-14, Make 13:3-13)

⁷Yesuyo nimo okale eida kakoi-kitame ekete Tikisa ago neme ina okanakalepa manipete taatekoa toko patu. Enile toatekale tigotoma nokale edeya wa adeka piipioo-pe wa okoli okome ⁸ina okounakale wete taatekoa toameneyakepa pade-kitame anu ibini lede wedekoa nekete ekete Keraisu taatekoane nukuno, noe wa oa ni pade-kitame enile taatekoa toateko tigotokoa nokono, noe wa kiwi oa yotokoino, wedoa lene kia nepikete yakoa poameamene. ⁹Nipa kini ta ludu uu wa poi toa kakoimo yakoa ni pade take poi tago wa okoimo kugu yakoa toino, piti moameamene. Enilepa taatekoa namolo takoa toatekoyake wipitia ta pade tigotokoa wete patamoo tokolo ni uku wa Yesuyo akeneya. ¹⁰Nimo ootokoa okome e ku yatename poi tato wa kamo poi teitakutukakala toi. Ni e ku tobou agoke lukoa meki yatene ete oto wa poi toa winali yoi. ¹¹Momani-kala tube mati toa eka kuka takeka kobu igi nome poane yene igi nome tokala too. A tibukeka ali atoa piti takatekole-kiti witoa ni Akolaliyo one toateka adeka piipikomewa padele padele tubele mati witakakala too.

¹²Enilepa wete taatekoa toameneyake ete-kitame kiwi dekoa moa tete mekala toi. Nipa kini losu yapuka po yapuka lia aua pokala toi. Ni ako odene tobou mekoi ali-kiti mekoika eni ali-kitike lokoa ta yopikoi ali-kiti mekoika lia aua pote koiso akakala toi. Anukule takama pokoileke nitoi. ¹³Nitikoi-petepa kini lene yoto kakete anukumo i i wa tawea akakala toi. ¹⁴Nipa edemo wane uku patu wa kini wa kei platekoimo wene kibunukapiameamene. ¹⁵Noanumepa kiwi wene taka taka tokolu

tokome agale muno kakoa okoli kipala poi teigoi yename moa kautakamele toamoa agaleka topo takamele toamoa too. ¹⁶Kiniketai kinikāua kinikameyo kiwi-pala po plane yene kini oya-mikiti enika eni yene peyameka ete ali-kitane yonoke kiwi moa pikala toi. Nitima pekete kiwi padeka-kiti wia tukakakileka toi. ¹⁷Nipa kipa no-pala odene ibini pedane ali atoa tokome ete yene peya kiwi-pala kotimi yoa meoi. ¹⁸Nitiketete kiwi-pala padeleka tamele toamokale tobou witako pine odeneka toa potokamele toamoo. ¹⁹Eni ke enekakale meake nooke wene tugoā mea togaketepa kini wa toa moino, poapeneya kamene wa Yesuyo akeneya.

Yerusalemē Ta Wia Tadekatapeneya

Tumu Tokatekamo

(Matiu 24:15-21, Make 13:14-19)

²⁰Poyo yatene Yerusalemē take obomoa note dekali toa unukatapea kakoli eneketepa Yerusalemē ta wia tadekatapeneya tumu tokateko oi tigotokoa nekedeko wa wene toi. ²¹Nitikoi-petepa Yudea ta ludu pitikoi-kitipa nipa tono pake pake toa pitoa pote paigakoa mepamene. Yerusalemē pitikoi-kitipa nipa kini eni ta wete toa pitoa pamene. Tayo kakoi-kitipa nipa Yerusalemē take pitoa poameneya paka lono pitoa pamene wane uku. ²²Enipetepa Akolaliyo ali atoa kibu motikilepa one bokuke papete wia mekapiane toa-kama taatekōa too tokolo ni uku. ²³Ae, mati kakene atoa-kitika mati adu tanikakoa mekoi atoa-kitika eni tete witaka-pete manika edoa petoa pomotoa-pe. Ae, enipetepa itonoke dika dika toamene tete witoo. Akolaliyoka one Yu yatene-pala kotimi wene luaneya meoo. ²⁴Nitaneyake kipala poi teiane yename kiwi padeka-kitipa

tueme kawa tukoa ni padeka-kitipa e ku yatenane ta piko peyake tadekamu toa aua pootapeoi. Yerusalemē taapa mone pa yatene-kitame kautoa wia tadekatapekōli pa tumu tokaneya pioo. Nipa Akolaliyo eni mone yatene-kiti kiwika wiou wa moa atukateka oi ponokaleka pa tumu tokaneya pioo wa Yesuyo akeneya.

Ali Yatenane Oyago Wakapea Noatekamo

(Matiu 24:29-31, Make 13:24-27)

²⁵Nitaneyake a tibukepa lou tokene tagoi moa padele padele tokale eneketepa ae ile toatekolo toko wa enekala toi. Kusa ue mekokaka uo okoa kawa pewikōa kawoo. Itonokeka e ku yatene tepe we tokale wene kainya pianeya meoi. ²⁶Nipa itonoke padele padele wipitikome toademe tokale nepia meketepa pitime tukete pitakala toi. A tibuke tele taneya mekiya peteka peteka tokale enekete nitoi. ²⁷Enika enile toka-petepa no Ali Yatenane Oyago wedo patu meane pa teleta toawineya noadene nokolu enoi. ²⁸Enika enile titia witakale eneketepa nipa Akolaliyo kiwi toa moateko oi tigotokama noademe toko wa wene weye akeneya meamene wa Yesuyo akeneya.

Yomo Pikike Pedoa Akenemo

(Matiu 24:32-35, Make 13:28-31)

²⁹Yesuyo agale pade pedoa okome okome yomo piki eteya yomoka witakoleke ukunu, yakamene. ³⁰Luno pitikakolo eneketepa poto toko tokene-mene tigotatekolo toko wa kime wene tiki. ³¹Eina toa anume ina okounakale-kiti witakale eneketepa Akolaliyo ali atoa pawe toa talo toateko eni tigotokona wa wene toi. ³²Etene nimini toatekomo ukuno, yakamene. Ipete meki-kiti peya wete

tuutapeameneyake kiwi-pala ina okounakale peya taatekoa too. ³³Nipa itono tibuta takoa pootapekolika anu agalepa pa pia-kama kawoo wa Yesuyo akeneya.

Taatekoa Toatekale Wedoa Nepikoa Meamene

³⁴Ina okounakale pubu wameneya odepeta wako pitigatapekome toko toa taatekoa toademe tokono, wedoa meamene. Nipa pale paleta toa ni bia ue nokoa pia ni kini toatekoile nami namita kakale wene keda taneya mekayano, wedoa meamene. ³⁵Enika enile taatekoa tokomepa ali atoa ta piko peyake pitikoi toa taatekoa too. ³⁶Enika enile-kama taatekoa toka-pete no Ali Yatenane Oyago kakouta katepitoo note kanadetepa lene tuaneyame wia mea Akolali kowitima pamene. Nipa katepitoo noatekoi tele lukamotoa kowitamene wa Yesuyo akeneya.

³⁷Ta pataka abuna Yesu tobou losu yapu pome olaukapokala taneya. Nitimotokome likonupa Oliwe-pini wa ibini akene tonoke ete wa pome pipokala taneya. ³⁸Nitaneyake one eni olaukakome oka agale yakadetepa ali atoa peya likonu witia tobou losu yapu-kama note obonokala taneya.

Yesu Wia Tukatekoi Oi Pedoa Pianemo

*(Matiu 26:1-5, Make
14:1-2, Yone 11:45-53)*

22 Edelo ago patukane wa ibini akene toge kikete pa palawe yisi kugu pitikamoia yotane palawe yoa noatekoi oi tigotokoa nekeneya. ²Nitaneyake Akolalike lodo yotokoai tane tobou ali-kitameka Mosesene totono pine toa olaukane ali-kitameka Yesu edoa katekoa wiato wa wili tokoa kakeneya. Nipa ete ali atoa piti motekete taneya.

Yesu Moa Meateka Oi Pedoa Pianemo *(Matiu 26:14-16, Make 14:10-11)*

³Yesu-pala tuku kakoa (12) opia yakene ali-kiti pade Yudase einagoke Setanu awinaneya. Einagopa one pade ibini Isekariose. ⁴Einagopa Akolalike lodo yotokoai tane tobou ali-kitika tobou losu yapu talo tane tobou alikitika koukoa mekoita pokomepa Yesu kini yonoke moa piateka oi pedoa pianeya. ⁵Nitaneyake wedia mekete ekete nipa nee kue meoo-koli okome ⁶nitikouno toe wa tewitikoia pokomepa Yesu moa metekome toatekale wene kibutuma yakeneya. Nipa ali atoane kabeta pake kawamokale nitou wa wene kibutuma yakeneya.

Edelo Ago Patukane Wa Ibini Akene Toge

Kikete Tanemo

*(Matiu 26:17-25, Make
14:12-21, Yone 13:21-30)*

⁷Yu yename yisi kugu pitikameneya pa palawe wane-kiti yoa toge kikilepa sipi sipi kai tine-pala moa wia kikala taneya. Nipa edelo ago Idipi ta patukakale Akolaliyo Iserere yene toa motane oi wedekoa nitaneya. ⁸Eni sipi sipi kai wiateka oi nokale Yesuyo Pita Yoneta moa wetekakome okome edelo ago patukane toge kiatono, eni toge nee wete nodokakapoatino, poe wa wetekakale ekete ⁹eni toge nee manika nodokatoa-pe wa okoli okome ¹⁰Yerusaleme take pote kaalaukete enekoli ali pade one wagoke ue mete kakalogoia aua nome kotukale enoino, einago litima pote one tuapea poka yapu tuapea pamene. ¹¹Tuapea pote yapu pinago enekete ekete Tikisa agome okome one oya-lawe-pala opiane mekene toge nee nouno, neke ugu yene note meai tiki yapu luku yameano

ta wa oka wa akamene. ¹²Kitame nimo okoli yatekome pinagome ako yuane yapu luku yametekilepa toto meateko walai eya nodokapianeya yameoono, eidapa tone toge nee eya nodokakoatino, poe wa Yesuyo one oyali-kiti takuta moa wetekaneya. ¹³Nitikale pote enekoli Yesuyo eina okanakale tadeka. Nitadekale einata kini toge kia noatekoiya nodokaneya.

**Yesuyo Palawe Wane
Gerepi Po Kū Ueta**

Moa Lawetekome Akenemo

(Matiu 26:26-30, Make

14:22-26, 1 Korine 11:23-25)

¹⁴Nee noatekoi-petepa Yesu nokome one Aposelo ali-kiti-pala walai waneke lewitooa meaneya. ¹⁵Nitooa mekome okome anu moatekou tete wete moamekenepa edelo ago patukane toge kiko-pete kipala opiane mekene nee noadiyano wene-kama plane mekou. ¹⁶Edelo ago patukane toge nee nakilepa Akolaliyo talo toko take mekene toateku adeka pikene tuku. Papete wa pade noamadeneke tuku wa ootokoa ¹⁷gerepi po kū ue mete mekaneya katekamoā Akolali-pala ke wa ootokoa okome kiwi peya tatia noatino noe. ¹⁸Nipa gerepi po kū uepa Akolaliyo talo toko ta wete witameneyake papete wa pade noamou wa akeneya.

¹⁹Ni palawe waneka moa Akolali-pala ke wa ootokoa popimotokome tatia metekome okome ipa anu tiginino, kiwike toane i metekuno, moa noe. Noe wane metekilepa i mekete toko toapa no wene taneya mea toma pamene wane meteku wa metaneya. ²⁰Nitaneyake nee nootokoa mekete eina toa Yesuyo okome i gerepi po kū ue meteke mekaneya noe wane metekilepa kiwike toane anu kamate ponateko adeka plane meteku. Nipa Akolaliyo oi pedoa pikana toane

tekene kini wenele litia toatiki totono kadimo oane yametekene uku. ²¹Nimo wanepa ukuyake eya waneka ukuno, yakoe. Mone yename no wia tukamotoa moa meateko agopa one yono i walaika anu yono-pala odeneka pianeya. ²²No tukilepa Akolaliyo papete wene toopikana toane taatekoane tuou. Ae, no wimotooa moa meateko agome dika dika toamene tete moo-kale ²³one oyalawe ete oto wa yakaate tekete ekete ina okanapa mainagome toademe tokolo oko patu wa oote toa kakeneya.

Yesuno Oya-lawe Ako Odene Meadete

Togo Togo Oma Pekenemo

²⁴Yesuno oya-laweme agale oa takooa pili pili toa kakete ekete totopa mainago ako ago meko patu wa togo togo oa kakoli ²⁵Yesuyo okome mone pa yatenane tobou ali-kitame kiwike lukooa meki-kiti pupu toe toe wa tika tika tiki. Nitikilipa kiwike lukooa meki-kitame kipa toto auapeki yeneno, ke wa kiwi kei piki. ²⁶Anu oya-lawe kime pade edikameamene. Nitameneya ako ago nepa pene ago tetepo takooa meamene. Tobou ago nepa pa pupu ago tetepo takooa meamene. ²⁷Ali takutapa panago nee mekome nomotoa padena agome one nee takooa lawetekolo-kiti ako agopa mani ago-pe. Nee mekome nako agopa ako ago eni. Noanupa kini pupu ago mekene uku.

²⁸Ke enekakale mema yakouka anu oya-lawe kime no kagekama yakoinano, ²⁹Agetaiyo no ne tobou ago mea wa ali atoa yopiane meatekou ta yameteke toane tekene kime ali atoa yopia meatiki ta opi yametekene uku. ³⁰Nipa anu talo toateku ta no-pala opia mekete nee ue eya nomotoane nitiku. Eni uku toapa tobou ali meatekoi walai-kitike eida mekete Iserere yatene tuku kakooa

(12) tatite toa takoa enoa akakala toi wa Yesuyo akeneya.

Pitayu Yesu Wawa Akatekamo

(Matiu 26:31-35, Make 14:27-31, Yone 13:36-38)

³¹ Saimone Saimone ne-pala ukumo yakamene. Ali-kitame witi kũ yaku-pala eletekoa pianeya peteka peteka tiki toa Setanuyo ne i agopa edikoane toadene mano wa Akolalineke oia motokome ak-eneya. ³² Nitaneyake Akolalinele takama pokeke tewitiko wakaya tokale neke kowitikakene uku. Wa naniko pale toake eni wene wia wakepa neke oya-lawene wene weye akakala tamene-kale okome ³³ Ali Muno ne po yapu pitikakolika wia tukakolika noka po yapu pitikoa wia tukoa toamotoane uku-kale okome ³⁴ ne-pala i ukumodo yakamene. Opi ali ogada ta patameneka wete kã wameneyake nemepa no i ago wene toamuku wa tebolo-peta akoa wakala too wa Yesuyo akeneya.

³⁵ Yesuyo nimo ootokoa okome namolopa Akolalinemo oa pupi-tikapekete kue ka nee uatekoi kaka uameneya kawa yeneka mekameneya pa toma poe wane wetekakounake pa pima yakoi-pe-kale ekete e'e mena-koli okome ³⁶ opidopa kini kue uatiki kaka nee eya uatiki kaka pikolopa nipa moa aua pamene. Tue pade toamokolopa nipa tokoo kakene mamina takoa topo toa moa lua pamene. Ni edoa-mo. ³⁷ *Ete-kitame i agopa Akolaline totono tagoa toamoko ago wa akoa wawei wa wia mekapiane agalepa nooke tugoa taatekamedeko. No toatekoumo wia mekapiane agale taatekateko tigotoma noko wa Yesuyo akeneya.* ³⁸ Nitikale ekete Ali Muno tue takuta i pikono, ena-koli okome nipa oyake toko wa pekeneya.

Yesuyo Oliwe-pini Tonoke Pome Kakome

Kowitanemo

(Matiu 26:36-46, Make 14:32-42)

³⁹ Yesuyo nimo oomotokome one tanele tokome Oliwe-pini tonoke pekeneya. Eni pokaka one oya-lawe litima pekeneya. ⁴⁰ Nitoa eida pome kakome kipala okome kiwi likoa enekaya wa Akolali kowittoa kamene wa ootokoapa ⁴¹ alime kue mitapeko kotuke keneya pome neuwe tukupia kowittoa meaneya. Nitoa kowitikome okome ⁴² meteke no noateku ue enekupa no tete mati moatekulu enipa tokono, Atai neme ete wia pedekamedekalepa nitikamene. Nipa anu wene pikule toa wane ekene wamukuno, neke wene pikole tou wa Yesuyo kowittoa meaneya. ⁴³ Nitoa kowittoa mekaka edelo ago pade one weye akademe tibu kawa nekeneya. ⁴⁴ Nitaneyake tepe we toka matiyame wedoa kowittoa mekale poliga kamate wane keneya pilipita pilipita toa kakeneya. ⁴⁵ Nitoa kowitatekoka kamomotokome one oya-lawe mekoita wakapea pokome enekale elame tuaneya tokome atu pia meadekoi. ⁴⁶ Nitadekoli okome dekolo atu pia meki-pe. Setanuyo kiwi likoa enekaya wa kamokoa kowittoa kamene wa Yesuyo akeneya.

Yesu Dekoa Monanemo

(Matiu 26:47-56, Make 14:43-50, Yone 18:3-11)

⁴⁷ Yesuyo nimo oa kakaka ali peya mati obomoa nekeneya. Yesuno oyago pade Yudaseyo eni yene lia aua nokome Yesu nunu oademe pinele nekeneya. ⁴⁸ Nitoa nunu oademe tokale Yesuyo okome no Ali Yatenane Oyagopa pa yename motokamotoa nunu eke toko-

pe wa akeneya. ⁴⁹ Nitaneyake Yesu-pala toadete tokoile enekete one oya-laweme ekete tone tueme wia litiato-pe wa oa ⁵⁰ one oyago padame panagono kapidi pine takoa pitikaneya. Nipa Akolalike lodo yotokoai tane ako tobou agono pupu ago nimini yono lono kakene kapidi pine takoa pitikaneya. ⁵¹ Nitikale enekeme Yesuyo okome oyakeno wa wa einagono kapidi luku mitikatekoa ete wa kakakaneya. ⁵² Nititikoapa Akolalike lodo yotokoai tane tobou alikitika tobou losu yapu talo tane tobou alikitika Kanosolo alikitika one eni dekoa moadete nekene yene-pala okome kini tue lua layo tigrini-pala nidikoa aua nikino, nopa ali wia kode moa toko ago tetepo takoa tiki-pe. ⁵³ Ta pataka abuna tobou losu yapu keneke kiwi kakakoane eida-kama pone olaukakounake dekoa moamokoina. Opi i dekoa monikilepa yomiyomu yopikago patu kautakete toatiki-pete tokome ni tiki wa Yesuyo akeneya.

Pitayo Yesu Akoa Wakenemo

(Matiu 26:57-58, 69-75, Make 14:53-54, 66-72, Yone 18:12-18, 25-27)

⁵⁴ Nitaneyake eni yename Yesu dekoa moapa ako odene mekome Akolalike lodo yotokoai tane tobou agono yapu aua pekeneya. Aua pokoika Pita kutu mati kawati toma nekeneya. ⁵⁵ Eina tobou agono yapu pawe keneke pade-kitame pomale toe yoa payapono pia unukoa meaneya. Pita oneka eni yene pake pome lukoa mepaneya. ⁵⁶ Nitaneyake tobou agono pupu atoa padame enekale Pita toe paaake mekale leneme nepikoa pikome okome i agoka Yesu kuyago-pala opia pima yakome taneya wa okale okome ⁵⁷ anuyatoa, no winago wene toamuku wa akeneya. ⁵⁸ Naniko keneya panagome Pita enekome okome neka Yesuno oyago-kale okome e'e, nopa

one oyago mena wa akeneya. ⁵⁹ Lou pini odene tadiya ponotekaneyake padekagome okome i agopa Galili agono, Yesu kuyago-pala opia pima yakeneya tadeko-kale okome ⁶⁰ winipa pa okono, neme wini oka agale agopa tokolo meku wa oa kakaka eina eina ali ogada ka oa kakeneya. ⁶¹ Nitikale Ali Muno ago Pita kakata peketapekome nepikoa pianeya. Nitikalepa Ali Muno agome eya wa okana opi ali ogada ka wameneka neme no einago wene toamuku wa tebolo-peta akoa wao wa okana wene ponokale ⁶² akolono pokome komo kata pitikoa kakeneya.

Poyo Ali-kitame Yesu Tea Agale Akenemo

(Matiu 26:67-68, Make 14:65)

⁶³ Yesu eida yopia kakene ali-kitame one tegene matoa layo toua wikala taneya. ⁶⁴ Mamina nateyaka moa one lene timini mutuapa one wane kapidi eyake kala dekoa witikete ekete ne teyo witikato-pe wa wikala taneya. ⁶⁵ Nitoa pademo pademoka oa potokoa tea agale okoa kakeneya.

Yesu Koisoke Lia Aua Pote Kakanemo

(Matiu 26:59-66, Make 14:55-64, Yone 18:19-24)

⁶⁶ Ta patakaka Yu yenane Kanosolo ali peya Kanosolo yapu koukoa meponaneya. Nipa Akolalike lodo yotokoai tane tobou alikitika Mosesene totono pine toa olaukane alikitika eida koukakoita pade ali-kitame Yesu-pala aua note kakakoli ekete ⁶⁷ nepa Keraisu wa papete ibini oa plane ago tadekalepa wete a-na wa okoli okome eno, nopa einago wane okoluka kime yakoa moamoi. ⁶⁸ Noanumedo kiwi agale palene yatekolupa agale topo takoa wamoi. ⁶⁹ Nopa einago tadeko wa yakoa moamokolika opi titimoane no Ali Yatenane Oyagopa telekole-kama

toko Akolaline nimini yono lono meane kama poukene tuku wa okale peyame ekete ⁷⁰nipa Akolaline mana kaku wa eke oko-pe-koli okome nopa einago wa wini ekete iki-kale ekete ⁷¹one koiso akoa oatekomopa pinali one kabunume ina okanano, one pademo okamoka wa pade yakateko toa mena. Oyake yatekoona wa oa tukaneya.

**Yesu Pailase Mekata
Lia Aua Pekenemo**

*(Matiu 27:1-2 11-14, Make
15:1-5, Yone 18:28-38)*

23 Nimo ootokoa eni yene peya kamomotekete Yesu Pailase mekata lia aua pote kakapaneya. ²Nitikete one akakete ekete i agome Yu ali atoa peya paka paleke lia motokome eya wa okale yatekoo. Tobou ago Sisane takesi kue pitikameo wa oa ni onepa ako tobou meateku ago Keraisu taatekoane nuku waka oa potokakale yatekoo wa Yesu akakete okoli ³Pailaseyo Yesu yatekome okome nepa Yu yene peya lukoa meki tobou ago-pe wa okale okome nopa einago wa wini okana wa akeneya. ⁴Nitikale Pailaseyo Akolalike lodo yotokoai tane tobou ali-kiti ni eida oboa kakoi peya-pala okome i agome padele poaneleka toameadeko wa okale ⁵e yename Yesu wedoa akakete ekete Yudea ta piko peyake i agome i i wa olaukoa ali atoa oa kamotokama yako. Nipa kebono ta Galili take laigoa tone i Yerusaleme take tugoa nitiko wa one akoa akeneya.

Yesu Erodeke Aua Pekenemo

⁶E yename Galili ta ibini okoli yatekome Pailaseyo okome i agopa Galili ago-pe wa yakaneya. ⁷Nitoapa Yesupa Erodeyo talo toko take meane ago tadeko wa wene tokome i ago Erode neme pitia yakakamene wa one

Yerusaleme take ugu nome mekata moa wetekaneya.

⁸Nitaneyake Erodeyo i agopa Yesu toko-la wa wedia kakeneya. Nipa Yesuyo tubele toma yakenemo yakatekoapa one mekuta padele tubele nokome tokale onemeka enadiya wa nepia meapa opi nekedeko wa wedia kakeneya. ⁹Nitikome pitia yakoai tokale Yesuyo agaleka wametekoa pa kakeneya. ¹⁰Nitoa kakaka Akolalike lodo yotokoai tane tobou ali-kitameka Mosesene totono pine toa olaukane ali-kitameka dika dika wa one wedoa akoa kakeneya. ¹¹Erodeyoka one poyo ali-kitameka one paya tetepo takoa tegene matoa taneya. Nitaneyake mamina epetane mati moa kakoapa Pailase mekota aua poe wa kutu wetekaneya. ¹²Einapetepa Pailase Erodeti oya kakoa liputakutukaneya. Namolopa poi teia meetakutukoake nitaneya.

**Yesu Yomo Lekaneyake
Wia Dekamotoa**

Pailaseyo Moa Metanemo

*(Matiu 27:15-26, Make
15:6-15, Yone 18:39-19:16)*

¹³Nitaneyake Pailaseyo Akolalike lodo yotokoai tane tobou ali-kitika Kanosolo ali-kitika one mekuta noatino noe wa kayo oa motokome okome ¹⁴i agopa no mekuta lia aua nekete ekete i agomepa Lomane yateneke lukoa meamato wa kiwi Yu yatene oa kamotokama yako wa akoa okoina. Kiwi kakakoane one pitiane yatekeneka kini akoa okoina toa padeleka toameadeko. ¹⁵Erodeyoka one pitia yakatekoapa one koiso akatekale piameadekale oto wetekakona. ¹⁶⁻¹⁷Yakoe. One wia tukatekole piameadekono, eya tatoane uku. Poyo agome po wapime wikala tomotoane tootokoane po kotokoane

wetekou wa Pailaseyo okale ¹⁸kini kabunu koukotukoa kayo ekete ekete winago wia tukakamoto no ta. Eyago Barabasi po kotokoa oto wetekaka-ye wa ka telo okoa kakeneya. ¹⁹Barabasi einagopa Lomane tobou agome po yapu pitikakilepa Yerusaleme take Lomane yene-pala poi kamotokoa ali wia tukoa taneyake pitikaneya.

²⁰Nitane ago po kotokoa oto wetekaka-ye wa kayo okolika Pailaseyo Yesu po kotokoane wetekou wa wene pikome kini wene wia wamotoa oa enekale ²¹ete wa kayo ekete winagopa yomo lekaneyake wia dekanemotoa wia dekanemotoa wa kayo okala tokoli ²²Pailaseyo tebolo takakome okome i agome padele poaneleka toamedekono, one wiane tukatekule piamoko. One poanele edele taneyake iki-pe. Pa po wapime poyo agome wikala toamotoane tootokoane po kotokoane wetekou wa okale ²³agale telo oa kamotokakoa kakeneya. Nipa one wia dekanemotoa tika tika tekete nenome moa patukakoli ²⁴Pailaseyo nitikou toe wa eya taneya. ²⁵Eyago Lomane yene-pala poi kamotokoa ali wia tukoa taneyake po yapu moa pitikane ago Barabasi po kotokoa wetekaneya. Nipa e Yu yenane wene litia taneya. Nitoapa i ago Yesupa moa kini wene litia topoe wa Yu yene moa metaneya.

Yesu Yomo Lekaneyake Wia Dekanemo

*(Matiu 27:31-44, Make
15:21-32, Yone 19:17-27)*

²⁶Nitikale aua pokoika Sairini take ago Saimone tayo lono kawa nome kotukale dekoa motaneya. Nipa one mukitike eina lekane yomo aukakete ekete Yesu i ago namolo kawa pomotono, iyapa neme lia aua notokamene wa dekoa moa aukaneyake. ²⁷Yesu eni pokaka ali atoa obomoa litima nekeneya. Nipa

atoa-kitika one elame tukete komo kata oawineya litima nekeneya. ²⁸Nitikoli peketapekome okome Yerusaleme atoa-kiti nooke pade komo wameamene. Nitameneya kini mati-kitikeka pinatoakiti kiwikeka komo oa kamene. ²⁹Ae, dika dika toamene tete moatiki tigotoma noko. Enipetepa eya wa oi. Kini mati-kitame eni tete motokaya tokale mati opiamoa adu tanikakoa meamoa pa tioboya meki atoa-kiti kolotine meamele toko wa oi. ³⁰Nitua tube tonopala kayo oa ekete kilikete toto wio-ye wa oa ni de tonopala kayo oa ekete kilikete toto kautaye wa kayo oa toi. ³¹Ae, yomo weneyake dikoa tikino, kau toa tuaneyake kakalepa edele toi-pe wa Yesuyo akeneya.

³²Yesu wia tukadete aua peketepa poanele tane agotaka wia tukadete aua pekeneya. ³³Nitua ali wago wa ibini akeneta tuga kakete Yesu eida yomo lekaneyake wia dekaneya. Poanele tane agotaka yomo padetake wia dekaneya. Nipa panago one nimini yono lono wia dekoa padena ago one ewa yono lono wia dekoa taneya. ³⁴Nitua kakoli Yesuyo kowitikome okome Atai wene toamekete tikino, kini i tikike po letu mekoa kibu moameamene wa kowitikaneya. Nitaneyake poyo ali-kitame one mamina-mene tatiato wa tadu toa tatite taneya.

³⁵Pa ali atoa eida kakete nepikoa kamotoa tobou ali-kitame tegene matakete ekete i agome ete ali atoa toa motaneyake i dekaneya kako. I agopa Akolaliyo one wa takoa moa kakapiane ago Keraisu tadekalepa nipa pinali one wa toa moonoo, tokale enato wa tea agale oa kakeneya. ³⁶Poyo ali-kitameka one tegene matakoka pinele nekete kou tane gerepi po ku ue ne na wa metekete ekete ³⁷nepa Yu yene peya lukoa meki tobou ago tadekalepa pinali neke wa toa moa-na wa ya motokakete akeneya. ³⁸Yesu eni wia dekanemotoa one wago pitia

lekane yomo munoke pipia eya wa wia mekoa dekaloganeya. I agopa Yu yene peya lukoa meki tobou ago wa wia mekoa dekaloganeya.

³⁹ One-pala odeneka wia dekane ago poanele tane ago padame Yesu-pala oa potokakome okome nepa Keraisu patu. Nepa einago tadekalepa pinali neke wa toa motekepa totaka toa moa-na wa oa potokaneya. ⁴⁰ Nitikaleka padena agome o ago kikoa okome nepa i ago-pala wia tukatekoi oi pedoa pia wia dekaneyano, Akolali piti moameke oko-pe. ⁴¹ Totapa tone tokoo poaneleke nami wia kibu motaneyano, i agome padeleka toameneyake pa wia dekaneya kakono, dekolo oa potokako-pe wa kikoa ootokoa ⁴² Yesu-pala okome Ali Muno neke talo toko take poke mekepa no wene taneya meamene-kale okome ⁴³ nimini ukuno, yaka. Opi nepa no-pala ali atoa mea epetekaki take Paradaise take odeneka meoo wa Yesuyo akeneya.

Yesu Tukome Tuanemo

*(Matiu 27:45-56, Make
15:33-41, Yone 19:28-30)*

⁴⁴ Einapete lou matai ponome kakaka (lou pini 12 kiloko) tadiya ta lia kadukaneya. Lou pene webokaka (lou pini 3 kiloko) ta pa likatapeneya. Lou pa toameneya tokome taneya. ⁴⁵ Kuna tobou losu yapukeka eya mamina Akolali meko lono wa akene luku olege toa ketekalogane mamina ete oto iyawea tukaketikaneya. ⁴⁶ Nitikaka Yesuyo telo ootapekome okome Atai anu yominipa takoa pomotoane ukuno, neme moa ta wa ootokoa tukome tuaneya.

⁴⁷ Enile tokale enekome tobou poyo agome okome i agopa nami kawamene ago tadeko wa Akolali kei pia kakeneya. ⁴⁸ Einali-mene wia dekakete tokoile enadete obomoa nekene yename enika enile tokale enemotekete kini kini yapu yapu wakapea pekeneya. Nipa

tepe we tokale kini palanu wi wi toma pekeneya. ⁴⁹ Yesuno oya-lawe peyaka one-pala Galili ta kawa Yerusaleme take opia nekene atoa-kitika eka mati kakete enika enile tokale enekoa kakeneya.

Yesuno Tigini Kotake Moa Pipanemo

*(Matiu 27:57-61, Make
15:42-47, Yone 19:38-42)*

⁵⁰⁻⁵¹ Panago Arimasia take ago Yosepe Kanosolo agomeke ete Kanosolo alikitame Yesu wia dekatekoi oi pedoa pianele litia toameneya. Einago wene kiyo akeneya mekome epetanele-kama tane ago tokome Akolaliyo ali atoa pawe toa talo tokale nepia meaneya. ⁵² Einagome Pailaseke pokome okome Yesuno tigini mouno, mea ta wa opokale ⁵³ nipa mopoano pa wa yametekale pokome toa motaneya. Nitoapa ake tane mamina petene moa tatilogo Yesuno tigini pia ewetetapeneya. Nitimotokome pome pala padaneta kokapiane kota keneke moa pipaneya. Nipa tuane ago odeneka wete moa pipameneta eni moa pipaneya. ⁵⁴ Yu yene ko mea pupu toamatekoi oi tigotokale nodokoa meane-pete enile taneya.

⁵⁵ Yesuno tigini eni moa pipokalepa eya atoa-kiti Yesu-pala Galili ta kawa Yerusaleme take opia nekene atoa-kitame einago Yosepe litima pekeneya. Nitaneyake eni kota keneke one tigini pikome tokale enemotekete ⁵⁶ Yerusaleme take wakapea pekete one tigini kalono takatekoiya nodokoa pianeya. Nitoapa Mosesene totono plane toa tekete ko mea pupu toamene-pete yapu pa ko meaneya.

Yesu One Tuaneya Pianeta Kamoa Pekenemo

*(Matiu 28:1-10, Make
16:1-8, Yone 20:1-10)*

24 Egeme ta t̄uei teigaka einatoa-meneme eina kalono

taneya ete pia nodokoa pianeyapa aua pato wa Yesuno tigrini pipaneta pekeneya. ²Nittoa pekete enekoli one pipaneta kota kabunu ketekalogane kue ete koketekaneya kakedeka. ³Nittoa tuapea pote kakete enekoli Ali Muno Yesuno tigrini piameadeka. ⁴Nittoa wene kainya pianeya kakoika alita takuta mamina yati yati tane mati kakeneya kotikatapea kini kakoiya liti note kananeya. ⁵Nitikoli enekete piti moa keti walikoa kakoika einagotame ekete i kota kenekepa tuane ali atoa piai toatikiyano, yomini meane ago dekoloto to tuku toa niki-pe. ⁶Kime tuku toniki agopa wete kamo poka. One Galili take kakome kipala okana agale wene kayapeaneyake tokome ni niki-pe. ⁷Eya wa okana. Panagome Ali Yatenane Oyago moa poane ali-kitane yonoke pikale yomo lekaneyake wia deko. Nitikolika ta pataka teboloke plane kamoane pou wa okana wa einagotame okoli ⁸e winimopa nimini akedikwa wa one eina okana wene kikutukete akeneya.

⁹Nittoa Yesu pipaneta tewitikoa one tuku melepu kakoa (11) oyali mekoita pekete kini enoa yatekoinakamo i i wa one oya-lawe-palaka ete yene-palaka toawe akeneya. ¹⁰Nittoa Yesuno Aposelo ali mekoita pote toawe opikilepa eya atoa-mene Magadala Maria Yoanata Yamene nine Maria toa ni kiwi-pala opia pekene atoa-kiti enika eni atoa-kitame toawe opaneya. ¹¹Nitikoli yatekete pamo akene tetepo tokale yakoa moameneya. ¹²Nitaneyake Pita kamomotokome Yesu pipaneta teyapea pome kota kabunuke kakome watekoa enekale tigrini togotane mamina odene pa pikale enaneya. Nittoa edele taneya patu wa wene kikutuma pome wakapea pekeneya.

Yesu One Oyata Takuta-pala Emease Take

Opia Poademe Pokome Akenemo

(Make 16:12-13)

¹³Einapetepa Yesuno oyata takuta Emease take poadete pekeneya. Emease ta Yerusaleme tata pake tuku melepu kakoa (11) kilomita tadiya pianeya. ¹⁴Emease take eni poadete pekete Yerusaleme take tanemo koota oma pekeneya. ¹⁵Nittoa koota oma pokoika Yesuyo moa tikitikamotokome opia pokale ¹⁶one lene timini agopa motekete pade eina opia pokono wene pia pekeneya. Nipa padeleme kini leneta likatapeane tetepo taneya pekeneya. ¹⁷Nitikoli opia pokome okome koota wini oma pikimopa edemota iki-pe-kale weneta keda taneya witimoa kakeneya. ¹⁸Nittoa kakete panago Keliopasi wa ibini akene agome okome okome Yerusaleme meki peyame wene tomotoake neme odene abela ikonota tanemo wene toameke oko-pe-kale ete kita-pala okome ¹⁹edemoke iki-pe-kale ekete Nasarese Yesuke oko. Einago Akolaline agale akakagome Akolaline lenekeka ali atoane lenekeka padele padele toa pademo pademo oa tikilepa telekole-kama toa toka. ²⁰Nitima yakanake Akolalike lodo yotokoai tiki tobou ali-kitameka tone ete tobou ali-kitameka eya tokoi. Einagopa mone agome wia tukateka koisoke aua pokoi. Nipa yomo lekaneyake wia dekamotoa wakoi. ²¹Inakagopa toto Isererele yene oto toa moatekago taatekoko nokono wene pikoonake wia deka. Eyakeka wene keda taneya meko. Einago wia dekatekaneyake ta patako tebolo eni patukakona. ²²⁻²³Nittoa ta tui teigaka tone oyatoa padeka-kitame one pipaneta enepokoli

one tigini piameadeka. Piameadekale enemotekete toto mekoota wakapea nekete tone wene kainya pikakete ekete pulete keneya enekolo one pipaneta edelo ago takuta eida kakoli enekoo. Enekolo ekete inakago kamo poka wa okoi wa einatoa-kiti toto mekoota note onokoi. ²⁴ Nitikoli tone oya-lawe pade-mene one pipaneta pekete enekoli einatoa-kitame okoina toa tadekale eneketeke Yesu pade enameneya wa einagotame Yesu-pala akeneya.

²⁵ Nimo okoli kita-pala okome okome ae, kolotini lupi toa paya wene pianeya mekete iki. Akolaline agale papete toaweaa akane ali-kitame Keraisuke wia mekapianemo lugutukoa oi mokala teketeke yakoa moamekete tadiki. ²⁶ Keraisuyo eni tete moa meemotokome one pa teleta tootapeneya mekanata wakapea poo wa wene toamokoi-pe wa akeneya. ²⁷ Nimo ootokoapa Moseseyoka Akolaline agale papete toaweaa akane ali-kitameka wia mekanemoke titimoa Keraisuke oa plane agale peya pine i i wa toa kibutukakutu toa ootapeneya.

²⁸ Nitoa oma pomempa one oyata pote platekoita tigotokale patukoa poademe keneya tokale ekete ²⁹ ta lima nokome lou-pala pipademe tokono, tone piatono noo wa kowitikoli nipa piatoe wa yapu tuapea pekeneya. ³⁰ Nitoapa one oyata-pala walaika opia mekome palawe wane moa Akolali-pala ke wa ootokoa popi-moa metekale ³¹ eina eina kini leneta kikatapeneya i agopa Yesu tadeko wa wene tokoli agopa takatapea pekeneya. ³² Nitaneyake oyagota ootakutukakete ekete ataiyo inakago tota-pala ka ludu ko oma nokome Akolaline bokuke wia mekane agale pine toa kibutukakutu toa ootapekale kolotina yakama nokoo wa akeneya.

³³ Nitoa eina eina kamomotekete Yerusaleme wakapea pekete enekoli

Yesuno tuku melepu kakoa (11) ali-kiti ete ali atoa-pala koukoa mekoli enaneya. ³⁴ Nitikoli ekete Ali Muno Saimone Pita mekata ponokome lene timini yametaneyano, one tuake wete kamotadeko wa e yename kita-pala akeneya. ³⁵ Nitikolipa Yesu ka ludu opia nokome akenemoka palawe wane popimoo metekale i agopa Yesu tadeko wa kitame wene tanemoka i i wa toaweaa akeneya.

**Yesu One Oya-lawe
Pakeke Nome Kakenemo**

(Matiu 28:16-20, Make 16:14-18,

Yone 20:19-23, Aposelo 1:6-8)

³⁶ Kitame nimo oa kakoika Yesu kiwi pakeke nome kakome okome tepe kolotini mataketikoa meamene wa okale ³⁷ ekee, yomini pade nome kako wa piti moa kakeneya. ³⁸ Nitoa kakoli okome tepene li li wa kawa pome taneya mea tikino, dekolo tiki-pe. ³⁹ Noanu i kakuno, anu yono kawata enoe. No yominido tokolopa nipa melepu tonono eya kakeneya kawamuku wa ootokoa ⁴⁰ one yono kawata enoe wa yametaneya. ⁴¹ Nitikale wedoa wedia kakete i agopa Yesu tadeko wa wene toake kamo noamene tetepo takoa wene kainya pia kakoli enekome okome no noatekuya pade piko-pe-kale ⁴² yotane mou kugu moa metekoli ⁴³ kiwi kakakoa moa nakeneya.

⁴⁴ Nootokoa kakome okome no wete tuamekene kipala opiane yakene eya wane okouna wene takakene ukuno yakoe. Moseseyo one totono yamea ni Akolaline agale toaweaa akane ali-kitame agale wia mekoa ni Depidi-loeme lo agale wene kibututukoa wia mekoa tanepa no nekene toatekoumo i i wa wia mekapikala taneya. Nooke eni wia mekapiane toa-kama taatekoa too wane okouna wa Yesuyo akeneya. ⁴⁵ Nitoapa Akolaline bokuke oneke

wia mekapiane agalepa ipa iyake akeneya, ipa iyake akeneya wa wene takatapeneya. ⁴⁶Nitikome okome eya wa papete wia mekapianeya. Keraisu taatekoa nome tete moa mea tukomeke ta pataka teboloke kamo a poo. ⁴⁷E ku yatene-kitameka kini tokoi poanele tewitiko a wakolipa eni poaneleke po letu mekakana Akolaliyo keetapea agopa takatapeo. One eni toatekamopa Yerusaleme take titimoa ta piko peyake i i wa Keraisuno ibini wedekoa oa pupitiko i wa wia mekapianeya. ⁴⁸Eni papete wia mekapiane toane taatekoane toma nokoule anu oya-lawe kime enekoinano, i i wa oawineya pamene. ⁴⁹Agetaiyo i ago moane wetekou wa papete oa pika ago kiwike awinomotou. Einago a tibu mea kiwike awinokome

tele lukademe tokono, Yerusaleme take nepia meamene wa Yesuyo akeneya.

**Yesu A Tibuke Ate
Kamotokoa Aua Pekenemo**

(Make 16:19-20, Aposelo 1:9-11)

⁵⁰Nitimotokome Yesuyo one oya-lawe-pala Besani take aua pokome one yono ate kamotokoa kakome Akolaliyo i yene pewe wia ta wa kowitoa kakeneya. ⁵¹Nitoa kawa tewitiko a pokale Akolaliyo moa a tibuke aua pekeneya. ⁵²Aua pekeneyake one oya-lawe neuwe tukupia one kei pia kaamotekete Yerusaleme take wedianeya wakapea pote mepaneya. ⁵³Nitaneyake tobou losu yapuke-kama oboa mea Akolali-pala ke wa oa one kei piai toa kakeneya.

YONE

Yesunomo Yoneyo Wia Mekaneya

Akolaline Agale

1 Namolo namolo titikome padeya deyaka wete latia piameneyake panago pa mea kakeneya. Einago one ibinipa Akolaline Agale. Akolaline Agalepa Akolali-pala opia-kama meaneya. Akolaline Agalepa oneka Akolali. ²Namolo namolo einagopa Akolali-pala odeneka meaneya. ³Padeya padeya peya Akolaline Agaleyo Akolali patu kautakoa kakome latianeya. Padeyaka one weneme titia alaneya mena. Akolaline Agaleyo-kama latikala taneya. ⁴Padeya padeya peya alama nikilepa Akolaline Agale patu-kama kautakoa kakete alama nekeneya. Eniya peya alakakagome ali atoa pa takoa meko. ⁵Yomiyomu keneke eni pa tokoa kakolopa yomiyomume moa atukamele toamoko.

⁶Panagopa Akolaliyo moa wetekakale taatekoa nekeneya. Einago one ibinipa Yone. ⁷Einago taatekoa nokomewa eni toko pa ko oademe noka. Nipa ali atoa peyame eni oka yakoa motekete Akolaline Agaleke wene tugamotoa tokome one ko oma noka. ⁸Einagopa pa pinago mena. Pa pinago ko oademe taatekoa noka. ⁹Pa pine agome ali atoa peya pa takalogakoya. Yone meane-pete eni papa itonoke noademe nekeneya.

¹⁰Einago itonoke taatekoa nokalepa einago i nekedeko wa ali atoame one wene toamokoi. Akolali patu kautakoa kakome itono eya latia pianeyake one latikanakeya-kitame one wene toamokoi. ¹¹One yatene mekoika eni

nokoyake one yename one makutukoa moamokoi. ¹²Nitaneyake one makutukoa motokoi-kiti kipa Akolaline mana kono-mikiti meamele toko wa moa kakapika. Nipa one ibinike wene tugo mekoi-kiti nitika. ¹³Akolaliyo one mati-kiti opiou toa eni yenepa one mana kono-mikiti moa latikakilepa one tanele tokome toko. Nipa ali atoame mati opikete tiki toa mena. One eni mana kono-mikiti itono alike tageneya mena. Kiniketaita Akolali one.

¹⁴Akolaline Agale einagopa ali latia toto pake pa tekei nome meka. Eni nokomewa pewe wia tagatapeneya mea nimini peku-pala nootapeneya mea toka. Nome mekale enekolo pa teleta tootapeneya mekale totome enekoo. Nipa oneketaiyo one mana odene ago eni peku lawetekale noa toma yakale enekoo.

¹⁵Yoneyo one ko oai toka. Nitoa kayo oma yakome okome no namolo takoa opianago kakuluka no moa patukademe toko. No wete opiameneyake one wete mea kama nekene ago tokome no moa patukademe toko. One naniko taatekoa nokagomeke no moa patukademe toko wane okounakagopa einago eni wa Yoneyo kayo oma yakeneya.

¹⁶Akolaline Agaleyo etenane peku toto peya lawetekilepa pewe wima nokome toka. ¹⁷Ali atoame papete litia toatekoi totono Moseseyo i i wa yametaneya. Nitaneyake Yesu Keraisu etenane peku nootokoa taatekoa nokomewa ali atoa toto pewe-kama wia ninimimo-kama oa tokome wenele litia toateko totono yameteka. ¹⁸Padameka Akolaline lene timini enameneyake Akolaline mana odene ago one yono kounoke kakago nokome etenanemo i i wa toaweaka.

**Ali Atoa Ue Motokama
Yakene Yoneyo**

Oma Yakenemo

(Matiu 3:1-12, Make 1:1-8, Luke 3:1-18)

¹⁹Yerusaleme tobou Yu yename eya ali-kiti Akolalike lodo yotokoai tane ali-kitika Lipai yatene ali-kitika takoa moa Yone kakata poe wa wetekaneya. Nipa ne ali te-pe wa pitia yakoatino poe wa moa wetekaneya. ²⁰Nitikoli pitia yakanokoli Yoneyo agale kauameneya toatapea okome okome nopa Keraisu mena-kale ekete ²¹nipa nepa ali te-pe. Nepa Ilaida-pe-koli okome e'e mena wa okale ekete nipa nepa Akolaline agale toawe akamotoa totome nepia meko ago-pe wa okoli okome e'e mena wa akeneya. ²²Nimo okale e yename ekete toto moa wetekakoi-kiti kakita pekete oateko toa oa mano. Nepa te-pe. Ne edane ago wa yakoai tokoli okome ²³Akolaline agale papete toawe akane ago Aisaiayo eya wa oa plane toane taatekoane nuku.

Ali piamene ta ludu panagome eya wa mo wima yawoo. Ali Muno noateko ka nodokakapia one yawateko kakitika kiyotokakapia toatino toe wa taatekoa nokome oo wa Aisaiayo papete oa plane toane taatekoane tuku wa Yoneyo akeneya.

²⁴One eni pitia yakanane yenepa Parisi ali-kitame moa wetekane yene. ²⁵Eni yename Yone eya waka pitia yakaneya. Nipa nepa Keraisu mena Ilaida mena Akolaline agale toawe akatekago mena wa ekeke ali atoa ue motokakono, edekolo toko-pe-koli okome ²⁶noanume kiwi pa ue motokakuno, kiwi pakeke panago taatekoa nome kakoyake kime agopa motiki. ²⁷Nopa namolo takoa opianeyake moa patukatekagoke uku. One auapeane one kawa yene kekatukuyake pa keku ago

tekene kekamele toamoko wa Yoneyo akeneya.

²⁸Enilepa Yodane ue eko matanuke Besani take Yoneyo ali atoa ue motokoai tane take taneya.

Akolaline Sipi Sipi Kai Tine

²⁹Podolikama Yone eida kakome enekale Yesu noademe nokale enekome okome Akolaline sipi sipi kai tinepa ita noademe ku nokono, enoe. Ali atoame toma yakoi poanele kogoa mitapeatekago enina. ³⁰No namolo takoa opianago kakuluka one wete mea kama nekene ago tokome no moa patukademe toko wane okounakagopa einago eni. One naniko taatekoa nokagomeke no moa patukademe toko. ³¹Noanumepa one agopa motokou. Nitikouyake Iserere yename one nokale enekete einago i nekedeko wa wene tomotoane tekene ali atoa ue motokama nuku wa Yoneyo oka. ³²Nitoo Yesuke okome okome Yodane uele kakene enekolu Epetane Yomini ini weuwe keneya a tibu mea ketipea nome oneke awinome mekale enekou. ³³Einago papete agopa motokounake Akolaliyo ali atoa ue motokapamene wa no takoa moa wetekakagome no wene takapikome okome Epetane Yomini panagoke awinome mekale enade toko. Epetane Yomini ali atoake awinomotoa einagome too wa Akolaliyo nopala oka. ³⁴Akolaliyo eina okanakale taatekoa tokale enekouya tekene einagopa Akolaline mana tadeko wane toaweane ukuna-ye wa Yoneyo oka.

**Yesuyo Namolo Takoa
Motane Oyali-mene**

³⁵Podolikama Yone one oyali takuta-pala opia kakome enekale Yesu ponokale enekome okome ³⁶Akolaline Sipi Sipi Kai Tine ku ponokona wa okale ³⁷yatekete one oyagota Yone tewitioa

pote Yesu litima pokoi. ³⁸Nitikoli Yesuyo ete peketapekome enekale einagota one litima nokoli enekome okome edeya tuku toma niki-pe-kale ekete Labai nepa manika mekato-pe wa yatekoi. (Labai wapa Tikisa ago wa ekete akeneya.) ³⁹Einagotame nimo okoli okome nipa enenoe-kale one meka yapu pote enepaneya. Nipa lou wegoukaka (4 kiloko) tadiya tokale eida mea pitaneya. ⁴⁰Yoneyo okale yakamotekete Yesu litima pokoi agota pade Saimone Pitane wamenago Aderu. ⁴¹Einagome wamene Saimone tuku toa enamutukome okome Mesaia wa papete ibini oa plane agopa wete enekoo wa opoka. (Mesaia Geriki agaleke eketepa Keraisu wa oi.) ⁴²Aderuyo Saimone Yesuke aua nokale Yesuyo enekome okome nepa Yonene mana Saimone. Opii titimoa nepa Sipasi wa ibini ato wa Yesuyo oka. (Sipasi Geriki agaleke eketepa Pita wa oi. Nipa kakene kue wa ekete oi.)

Yesuyo Pilipi Natanieleta Enoa Motanemo

⁴³Podolikama Yesu Galili take pouno wene pia poademe pokome Pilipi kotukome okome no pukuka patono no wa enemoma poka. ⁴⁴Pilipi onepa wamena Aderu Pitata-pala Besaida take odene-mene meane ago. ⁴⁵Einago Pilipiyo eyago Nataniele enemotokome okome Moseseyo one totono wia mekakomeka Akolaline agale papete toawe akane ali-kitame kini boku-mene wia mekaketeka Mesaia taatekoa noatekamo dekoa wia mekaneya. I wa papete wia mekapiane ago totome enekoo. Einagopa Nasarese Yesu Yosepene mana tadeko wa Pilipiyo okale ⁴⁶Natanieleyo okome Nasarese take padele epetanele edoa witamotoa-pe wa okale okome nipa einago enoano noo wa Pilipiyo akeneya.

⁴⁷Nimo okale yakamotokome noademe nokale Yesuyo enekome Natanieleke okome etene Iserele ago ku nokona. Pademoka oa yotokamene ago eni wa oka. ⁴⁸Nitikale Natanieleyo Yesu yatekome okome neme nopa edoa wene toko-pe-kale okome Pilipiyo ne no wa pade wete wamokake neke take yomo piki todoke mekale no ita mekene enekou wa Yesuyo oka. ⁴⁹Nitikale okome Tikisa ago nepa Akolaline mana toto Iserele yene lukoa meateko ago toko-la wa okale okome ⁵⁰nepa neke take yomo piki todoke mekale ita mekene enekou wane okounake nooke wene tugako-pe. Ina okounapa pa nami wane okouna. Nanikodopa padele telekole i moa patukatekole-kiti enade toko wa ootokoa okome ⁵¹kipala nimini ukuno yakoe. A tibu peaneya pikaya keneke edelo ali-kiti no Ali Yatenane Oyago mekouta keti nekete ate pekete toa kakoile enoi wa Yesuyo oa pika.

Kena Take Panagono Atoa Motokanemo

2 Ta takupeta patatekaneyake Galili ta keneke piko Kena take panagono atoa motokakoita Yesuno nineka eida pome mepaneya. ²Einata einapetepa Yesu neke oya-lawe-pala namene wa agale oa wetekakoli oneka noka. ³Nome mekaka e yename gerepi po ku ue napetapeneyake niname Yesu-pala okome kini noatiki gerepi po ku ue piamoko-kale okome ⁴anu oyatoa anukule toateku-petepa opi menano, anu toatekule neme witakoa akamea wa okale ⁵niname yapu pupu takane yene-pala okome okome oneme toe wa okole-kama tamene wa oka.

⁶Yu yene kini tanele teketepa aline wene moa koigakoya i koguna wa adeka pikete nee eya noadete mekete yono abe kogakiya. Nitimotoapa yapu yename kamo itonome toa latiane mete

uoya ko melepu (6) kakoa moa pi-
aneya. Tone derame meteke panagome-
kiti ue nomoa eni mete odeneke pekoai
tokomepa ko melepu (6) kakoa-peta
nomoa pekakalepa nipa adoo. ⁷Yesuyo
yapu pupu yene-pala okome okome ue
nomoa i mete-kiti wete kapetekoe-kale
ue nomoa pekoai toa kapetekaneya. ⁸Ni-
tikoli okome eni mete keneke meko ue
pade nomoa moa toge kimotoa yopik-
ago mekota aua poe-kale ue nomoa moa
aua potokakoi. ⁹Nitikoli yopikagome
moa yuumoa nakome okome ekee ipa
epetane gerepi po kũ ue tadeko wa
nakomeke nomotokoika wene toamoka.
Wene toamokaleka eina ue nomotokoi
yename wene tokoi. Nitaneyake toge
yopikagome atoa motokago ne noo wa
okale nokale okome ¹⁰tone toge kikoa
mekete-kama gerepi po kũ ue epetane
mati namolo takoa moa laweteko. Ni-
tikolo ali atoa noa tagoa kitipu mekoli
pa gerepi po kũ ue moa laweteko. Neme
pade nitamoko. Nipa neke gerepi po kũ
ue epetane mati pa pikoa mea opii moa
laweteko wa toge yopikagome oka.

¹¹Yesuyo enile tokapa ele kule
telekole pene toademe enileme titika.
Nipa Galili pikoka Kena take toka.
One eni toka telekole eni eneketepa
one tuku (12) kakoa oya-lawe oneke
wene tugakoi. ¹²Nititikaneyake Yesu
Kena ta tewitioa pokome one nine
wamene-mikiti one oya-lawe-pala
Kapaneame take pa tekei pome mepoka.

Yesu Tobou Losu Yapu Pekenemo

*(Matiu 21:12-13, Make
11:15-17, Luke 19:45-46)*

¹³Edelo ago patukane wa ibini
akene toge kiatekoi tigotokale Yesu
Yerusaleme take ate pome mepoka.
¹⁴Nitoapa tobou losu yapu pokome
enekale pade-kitame pitimekawe kai
sipi sipi kai ini puluma eya topo toa
mea pade-kitame kini kue piane leyo

waneke kue topo toa mea tokoli eneka.
¹⁵Enetekoa po wapi moa eina ali-kiti
kini sipi sipi kai pitimekawe kai-pala
akolono wia tikatapeka. Nitoapa kue
topo toa kakene yene kini kue piane
leyo-kiti moa pekatapea kini kueka wia
tadekatapea toka. ¹⁶Nitoapa ini puluma
topo tane yene kikoa okome okome
Agetaine yapupa kini makesi yapu
tetepo takameo. Wini ini puluma-pala
wete aua poe wa wia tikatapeka.
¹⁷Nitikale eneketepa *Akolali neke
yapu mama moane talo tukuleke tete
moane tuadene meku* wa papete wia
mekapiane toa eni taatekoa tadeko wa
one oya-laweme wene tokoi.

¹⁸Yesuyo enile tokale enekete e Yu
yename ekete neme wini tokolepa Ako-
lali patu kautakoa kake tadekalepa
padele telekole toano ta-koli okome
¹⁹i tobou losu yapu *kẽawea* tadekat-
apekolipa ta tebolo-peta lia patakale eni-
mene moane awitikakoane wa wiou-
kale ekete ²⁰i tobou losu yapupa
wia mekoli ege odepeta kadukoa (46)
mali penaneyake nemepa ta tebolo-
peta lia patakale oyake moa awitikakoa
wa wioo-pe wa okoi. ²¹Yesuyo eni
okapa pinali one tigrini-pala toatekoileke
okome oka. ²²Yesu tuaneyake Ako-
laliyo moa kamotokakalepa one oya-
lawemepa einapa enike akedeko wa
wene tokoi. Nitiketepa eina papete wia
mekapiane agaleka Yesuyo eina okana
agaleka etene taatekaneya tadeko wa
wene tokoi.

Yesuyo Ali Atoa Peyane Tepene Piko Wene

Tetoa Enekomo

²³Edelo ago patukane wa ibini akene
toge kia mekoi-pete Yesu Yerusaleme
take nome mekome padele padele
telekole tokale enekete ali atoa kainya
mati oneke wene tugakoi. ²⁴Nitikolika

ali atoa peyane tepene plane wene tetoa enekome tokome e yene-pala oya patu piamoka. ²⁵Nipa kini tepene plane wene tetoa enekago tokome i ago-kiti one tepene ede wene piko-pe wa ete-kiti pitia yatekileka toamoka.

Yesuyo Nikodimasi Olaukakome Akenemo

3 Parisi ago pade Nikodimasi wa ibini akene agopa Kanosolo ago meaneya. ²Ta lianeya keneke einago Yesu mekata nokome okome Tikisago Akolaliyodo auapeamokalepa padele padele telekole neme tokolepa padameka oyake toamoino, nepa Akolali mekota kawa noke olaukakago tadeko-kale okome ³nimini ukuno yakamene. Panago wa loko opiamene agopa Akolaliyo talo toko ta oyake enepamoo-kale Nikodimasiyo okome ⁴ali wetini tane agopa niname edoa wa loko opimotoma-pe. Niname wa opimotoma tokome wetini ago one ninane tepene oyake pamele toko wa eke oko-pe-kale Yesuyo okome ⁵etene nimini ukuno yakamene. Panagome ue moamoa Akolaline Yomini awiameneya pa mekomepa nipa Akolaliyo talo toko take pamele toamoko. ⁶Ali atoame mati opikilepa pa kini kotu pia-kama tiki. Epetane Yominiyo Akolaline mati-kiti opikakilepa one kotu pia-kama toko. ⁷Ne wa loko opimotomaane uku wane ukunake wene kainya piameamene. ⁸Pupulege popokakomepa one weneme-kama titia popokako. Nitoa popokakome ee okamo yateketeke titia nokota enamoa pokota enamoa tiki. Enipa Epetane Yominiyo Akolaline mati opikakome toko adeka eni pikene uku wa Yesuyo akeneya.

⁹Nimo okale Nikodimasiyo okome neme wini okopa edoa tomotoma oko-pe-kale okome ¹⁰neka Iserere yenane totono olaukoa tokagomeke

i ukumo wene toamoko-pe. ¹¹Etene nimini ukuno yakamene. Enipa tone wene tokomo oa mea tone leneme enekoya toaweaa oa tokoyake ali atoa kime yakoa moamiki. ¹²Itonole tikile-kitike oane metekumopa kime yakoa moamikino, a tibuke tikile-kitike oane metekoumopa edoa yakoa moadete-pe. ¹³Padameka a tibu enepikile toameneya. No Ali Yatenane Oyago a tibu kawane ketipeane nuku agome odene aida mekene enekoumo toaweane uku. ¹⁴Moseseyo ali piameane take kaya yomini latia yomo ludu munoke dekoa moa kakaneya. Moseseyo eni tane toa pade ali-kitame no Ali Yatenane Oyago dikoa yomo luduke dekoa kamotokoi. ¹⁵Nipa nooke wene tugoa mekoi peya pa mea-kala kama pomotoma nitoi. ¹⁶Akolaliyopa ta piko peyake pitiki-kiti one kolotini yene wa wene mekoa mekome tokome one mana odene agopa ali atoake tumotoma moa wetekaneya. Nipa manake wene tugoa mekoi-kiti tuapa atuameneya mea-kala kama pomotoma tokome taneya. ¹⁷Moa wetekakomepa kini tanele poanele tadikino, poane take poe wa koiso akamotoma wetekaneya mena. Toa momotoma tokome ni moa wetekaneya. ¹⁸Manake wene tugoa meki-kiti koiso akoa kibu moamatekoyake manake wene tugamiki yenepa poane take wetekou wa koiso wete akoma pianeya. Nipa one mana odene agono ibinike wene tugamadete wakili tokome toko. ¹⁹Nipa pa pinago kiwi mekoika nekeneyake poanele pa toma pou wa wene pianeya mekete eni pa wawa yomiyomuke wene mekoa mekino, kiwi kibu moatekulepa eni wa kini koiso wete akoma pianeya. ²⁰Poanele toma yaki-kitame eni papa kote moa waki. Nitoapa kini poanele keleyo witakaya tokolo pa keneke witoa noamokala

tiki. ²¹ Nitikiyake nimini peku noa tiki yenepea eni pa keneke witoa nokala tiki. Nipa kini tikilepa Akolali patu kautakoa kakete tadiki wa ete-kitame wene tomotoa tiki wa Yesuyo oka.

Ali Atoa Ue Motokama Yakene Yoneyo

Yesuke Akenemo

²² Nititikaneyake Yesupa Yudea take pato wa one oya-lawe-pala opia pome eida tayo lono mea kakome ali atoa ue motokakala toka. ²³ Nitikakoa Yonepa Salime ta liti plane Inone take mekome ali atoa ue motokakala taneya. Nipa eni ta ludu ue kainya yotokale tokome taneya. Eidapa ali atoa nekete kiwi ue motokoano ta-koli ue motokakala taneya. ²⁴ Enilepa Yone po yapu wete moa pitikameneyake taneya.

²⁵ Yu yename kini losule tekete abe koganelekepa Yoneyo okagale yakane ali padeka-kitame pade Yu ago-pala ete taka oto taka toa kakeneya.

²⁶ Nitoapa Yone kakata nekete ekete Tikisa ago nepala Yodane ue eka lono opia kakanakago neme onekemo akakagome ali atoa ue motokakala toko. Nitikolo peyame ne tewitikoa one kakota-kama pokala tiki-koli okome ²⁷ panagome Akolalinele takakilepa a tibuke meko Akolaliyo one peku lawetekolo nakomepa oyake toko. Pa one weneme tokoya mena. ²⁸ Nopa Keraisu wa papete ibini oa plane ago taatekoane noamuku. One naniko nomotoa Akolaliyo no namolo takoa wetekakolo nuku wane kipala okouna. Enipa nimini ukutu-pe. ²⁹ Atoa tu pikagopa atoa moatekago eni. Einatoa motokolopa one oya patu plane agome one kakoya liti kakome one okagale yatekome wedia kako. Opa no einago keneya wediane kolotini toane kaku. ³⁰ Ali atoame anu oyago Yesuno ibini

kamotoka kamotoka tekete anu ibini etepea wene kayapema pamediki wa Yoneyo akeneya.

A Tibu Kawa Nokago

³¹ Yoneyo nimo ootokoa kakome okome a tibu kawa noko agome ete yene peya moa patukoapa etene ako ago kako. Itonoke alane agopa pa itono peku noa tokome one kaua-mikitame olaukama nekenemo oa mekala toko. A tibu kawa nokagomepa ete yene peya moa patukoa etene ako ago kako. ³² A tibuke mekome yakoa enoa tokaya-kiti i i wa toaweana onaneyake padameka yakoa moamiki. ³³ Nitikiyake one toaweana okomo yakoa motiki-kitame yatekete ekete Akolalipa niminimo-kama oko ago tadeko wa iki. ³⁴ Nipa Akolaliyo moa wetekakale nokagome Akolaline agale-kama akakolo yatekete ni iki. Akolaliyo one Epetane Yomini einagoke awia tagatapemotoa metekome metaneya. ³⁵ Nitoapa einago one mana agoke wene mekoa mea tokome padeya padeya peya one yonoke moa pianeya. ³⁶ One manake wene tugoa meki-kiti pa mea kama poadete tiki. One mana kote moa waki-kitame mea kama poatiki ta enamekete pa etepea tua poadete tiki. Nitiki yene-pala Akolaliyo kotimi yoa meko.

Yesuyo Sameria Atoa-pala Ko Oa Kakenemo

4 ¹⁻² Ali atoa ue motokakilepa Yesuno oya-laweme tokoiyake Yesuyo pade nitamoka. Yesuyo nitamokoyake pade-kitame ekete Yesuyo ali atoa ue motokakilepa Yone moa patukoa toko wa okoi. Kini eni okoimo kugu Parisi alikitame yakadekoli ³ Yesuyo one oya-lawe-pala Yudea ta tewitikoa Galili take wakapea poademe poka. ⁴ Galili take eni poademe Sameria ta patukoa pamedeka.

⁵Nitoea pokome Sameria ta keneke piko Saika take pome kaka. Namolo namolo Saika ta liti Yekobeyo one itono pade oto pia mana Yosepe yametane. ⁶Eni yametane taapa Yekobeyo oloyo pade eida moa ue mekane. Nitaneta Yesu ka ludu noka matiyame koome tukome eina oloyo kabunuke ko mepoka. Nipa lou matai ponome kakaka (lou pini 12 kiloko) tadiya eida pome ko mepoka.

⁷⁻⁸Eida meakoa one oya-laweme nee topo toa moadetepa ali atoa pitikoika kutu pokoi. Nitikolipa Sameria atoa padame ue nomoademe nokale Yesuyo okome ue nouno, mano wa okale okome ⁹nepa Yu agomeke no Sameria atoa ue nouno, mano wa wini okono, dekolo oko-pe wa akeneya. Nipa Yu yene Sameria yenetapa etene pilia kakeneya tokome ni akeneya. ¹⁰Nitikale Yesuyo okome Akolaliyo ne moa meatekoya wene toamoa ni ue nouno, nomoa mano wa okago wene toamoa toko. Eni wene too tokapa nipa noateku ue pade nouno, nomoa mano wa neme noanu-palaka oo toka. Nimo oo tokapa lene toa yoa-kala kawateko ue meou toka-kale okome ¹¹kamo koniyali i oloyopa keti kokaketikaneya mati pikono, ita ue nomoateko mete pade ne toamokono, yoa-kala kawateko uepa neme edoa nomoa no meteko patu. ¹²I oloyopa tone kauago Yekobeyo papete moa pikaneya. Nitaneyake onemeka one mana-mikitameka one egetane-akitameka i oloyoke-kama ue nonokala taneya. Yekobeyo enile taneyake neme pade ue meou wa wini okopa tone kauago Yekobeyo tane toa moa patukake oko-pe-kale Yesuyo okome ¹³i oloyo moa mekane uepa padame nomoa nakomepa wa nodo tokala too. Nitatekoyake noanume meateku ue nakomepa wa ue nodo toamoo. ¹⁴Noanume meateku uepa ali atoane tepene ue lene peleou toa

yoa-kala kawoo. Nipa kiwi mea kama pomotoa too wa Yesuyo akeneya.

¹⁵Nimo okale einatoame okome kamo koniyali wini oko uepa no nouno, mea ta. Eni ue nakolupa wa nodo toamokale mekene i ue nomoai toamoukale okome ¹⁶nekane oto noo wa kayo oano pa. One-pala oto neke namene-kale okome ¹⁷anukane pade kawamoko-kale okome winipa nimini oko. ¹⁸Neke ali ko kakoake pokala toka. Opi poke mekagopa nekane mena. Enipa nimini okokale okome ¹⁹kamo koniyali winimopa nimini okono, nepa Akolaline agale toawe akakago tadekono, eya wane ne yatekene uku. ²⁰Tone kaua-mikitame yete tono waneke-kama Akolali kei pia kowitoai toma nekeneya. Nitaneyake Yu yene kime ekete toto peyame Akolali kei pia kowitikilepa Yerusalem take-kama tamedeko wapa iki-kale okome ²¹anu oyatoa nepala ukumo yakoa moamene. Naniko Agetai kei pia kowitikilepa yete tonokeka Yerusalem takeka kowitamekete kini kini mekika tokala toi. ²²Sameria yene kipa kini kei pia kowitikiyapa agopa tokolo pa etepea kowitoa meki. Akolaliyo ali atoa toa motikilepa toto Yu yene pake titia toko. Nitikono, toto Yu yenepa tone kei pia kowitikiyapa i wa wene toko. ²³Nitikoyake eya toatiki etene tigotoma noko. Agetai kei pia kowitikete toatiki toa kowitiki yenepa Akolali weneke luaneya mekete nimini peku noa tekete tepene kowitikala toadete tiki. Akolaliyo dikakitame one kei pia kowitimotoa okono, nitadete tiki. ²⁴Akolali onepa yomini-kama toko. Onepa nitane agono, one kei pia kowitiki yenepa Akolali weneke luaneya mekete nimini peku noa tekete tepene kowitikala tamediki wa Yesuyo akeneya. ²⁵Nitikale einatoame okome eyago Mesaia noademe tokono wene tuku. Einago nokomepa Akolalinemo-kama toto-pala toawe akoo-kale okome

²⁶ neta kakome ko oa kakagopa einago eni wa Yesuyo akeneya. Einatoame Mesaia wapa Keraisuke okome akeneya.

²⁷ Einata einapete one oya-lawe wakapea nekete enekoli Yesuyo mone atoa-pala ko oa kakedeka. Nitadekale wene kainya mati pianeya kaketeke edeya moade oko-pe. I atoa-pala dekoloko oko-pe wa Yesu yakamokoi.

²⁸ Nitaneyake einatoame one ue mete eida piilogo one yene pitikoika wakapea poka. Pome kakome one yene-pala okome ²⁹ noanume toma nokoulekama toaweake okagopa ku mekome toko. Einagopa Keraisu wa papete ibini oa pianego ago patuno, enoatino noe wa akeneya. ³⁰ Nitikale yakamotekete Yesuke noadete nekeneya.

³¹ Noadete nokoika Yesuno oya-laweme one tika tika toa kakete ekete Tikisa ago neke nee pade moana-koli okome ³² no noateku neepa pade pikoyake kime pade wene toamiki-kale ³³ one oya-lawe yakaate tekete ekete padame one nee pade wete moa lawetaneya patu-koli okome ³⁴ no moa wetekakago one wene pikole toane oneme tamene wa okole-kama toane peya takakupa anu noateku nee eni. ³⁵ Kime eya wa pedoa agale ikina. Tokene tuyono patukakalepa ipe ludu kakoya nee wakoa moa yapu ludu piato wa ikino, noanume ukumodo yakoe. Ipe kakoya-kitipa wakoa moateko toa opii nodokoa kibutua kakono, enoe. ³⁶ Wakoa motokako agomepa nipa mea kama poatikiya eni wakoa moma poka. Wakoa motokama pokoka pinagome ke wa nami wia pupu poi motoko. Nipa matakago-pala wakoa motokakagota wedikete wedia meki. ³⁷ Kini pedoa agale ikina toapa panagome ipe matama pekeneka padame wakoa motokama poka. ³⁸ Nipa poliga yoameneya ipe matama poamenekeka eniya wakoa motokama poati wane

kiwi wetekakouna. Ete-kitame poliga yoa ipe eida matama pekeneka eni yene luku pekete eni yenaneya wakoa motokama piki wa Yesuyo oka.

³⁹ Einatoa pitika take yenepa Yesuke wete noameneyake kainya mati oneke wene tuganeya. Nipa noanume toma nokoulekama kuyagome toaweake wa einatoame okale yatekete tekete Yesuke wene tuganeya. ⁴⁰ Nitimotekete Yesu mekata nekete kowitikete ekete toto pitiko take noke meano, nookoli pokomepa ta taku-peta patamotoka eida mea kaka. ⁴¹ Nitoka mekome okale yatekete eni yene padeka-kitika oneke wene tugakoi. ⁴² Nitikete einatoa-pala ekete namolopa nemena i agome tokale kotukoa onokanakedo oneke wene tugakoo. Opiya i ago toto pake kakome agale oa metekolo yatekete tekete oneke wene wedoa tugako. I agopa ali atoa toa moatekago tadeko wa okoi.

Yesuyo Tobou Agono Mana Epetekanemo

⁴³ Ta taku-peta patatekaneyake Yesuyo eni ta tewitikoa Galili take pome mepoka. ⁴⁴ Yesu eni pokapa eya wa okanake poka. Akolaline agale toaweake akakagopa one take yename paya tetepo takoa wakiya wa okana. ⁴⁵ Galili nome mekale eina yename one makutukoa motokoi. Nipa edelo ago patukane wa ibini akene toge kia mekoi-pete Yesu Yerusaleme take pome mekome telekole tokanakale-kama enekoiya tokome ke wa makutukoa motokoi. Nipa kiwika eina toge lobutupekete one telekole tokoinakale enekoiya tekete one makutukoa motokoi.

⁴⁶ Yesu Galili ta ludu pima yakome Kena take pome mepoka. Nipa pa ue moa gerepi po ku ue latikana take wa pome mepoka. Nitikata ta talo tokagoke lukoa meane tobou ago pade one mana Kapaname take yene pi-

motoa wawa Yesu kotua noka. ⁴⁷Nipa Yesu Yudea ta kawa Galili take nome kako wa okoimo yatekoya tokome noka. Yesu kakata eni nokomepa one mana pene tuademe pikono, Kapaneame take poke epetekakoano poa ta wa kowitikakale okome ⁴⁸Agetaine peku noane tukule padele telekole toane kini wene kainya pikakule enameketepa nipa nooke wene tugakile toamoi-kale ⁴⁹tobou agome okome kamo koniyali oto lukakoa tukayano, wete pata wa kowitikale okome ⁵⁰neke mana tu-amoono, poano pa wa okale einagome Yesuyo nimini oko wa wene tokome one take wakapea poka. ⁵¹Poademe pokale one pupu yene kotua nekete ekete neke manapa tuameneya pene latoa meko wa onaneya. ⁵²Nitikoli manipete lataka-pe wa okale ekete abela lou matai tetekakale (lou pini 1 kiloko) one poto yene teitaka-koli ⁵³etename wene moa pitikakome abelana Yesuyo neke mati tuamoo wa okale eina eina latakome tadeko wa wene taneya. Nitaneyake einago one yapu pitikoi peya-pala Yesuke wene tuganeya. ⁵⁴Yesuyo ele kule telekole tikilepa Yudea ta tewitikoa Galili take pome mekome telekole taku takoa eida tokome enile toka.

Tau Tootokaneya Piane Ago Epetekanemo

5 Nititikaneyake Yu yene kini losule tekete toge kia mekoi-pete Yesu Yerusaleme ate wakapea poka. ²Yerusaleme take sipi sipi kai wa ibini akene kago pikane lono ue mine pade meaneya. Eni ue mine matanuke ali atoa todo takatekoya ko kakoa wianeya kakeneya. Eni ue minepa Iberu agaleke Beteseda wa ibini iki. ³Eni todo takatekoya keneke eya ali atoa leneta lianeya kawa okeaneyau tau tootokaneya piane ali atoa oboai taneya. Nipa ue

bua bua wa kaumotoa nepia meai taneya. ⁴Padepete-kiti Akolaline edelo ago ue muke ketipea nokale ue bua bua okala toka. Nitikalepa uele namolo takoa pome pitikagopa one tanele epetekakale latoa pekeneya. ⁵Nitanetapa panago tau tootokaneya pia mekale mali padeka tuku kakoa (38) penaneya. ⁶Einago pikata Yesu nokome enekale eida tau tootokaneya pia kakeneyano wene tokome yatekome okome nepa latoa poade oko-pe-kale okome ⁷kamo koniyali nopa eni ue bua bua okoka auapea aua poatekago toamokolo pa piane meku. Eni ue muke ketipeane poadene wili toane mekulu panago namolo takoa patukakala toko-kale okome ⁸wete kamokoa neke tatia pitikoya-pala moa aua pa wa okale ⁹eina eina latoa kamokakome one tatia pitikoya-pala moa aua poka. Yu yene kini ko mea pupu toamatekoi-petepa enile toka. ¹⁰Nitikale e Yu yename eina latoa poka ago-pala ekete opi Yu yene tone ko mea pupu toamateko-pete kekaneya latikakole toa neke tatia pitikoya-pala aua ponokopa tone kekanele wini toko-koli okome ¹¹no epeteko wetekakagome neke tatia pitikoya-pala moa aua pa wa okolo tuku-kale ekete ¹²eni neke tatia pitikoya-pala aua pa wa okagopa te-pe wa yakaneya. ¹³Nitikolipa eina latane agome one epetekakanakago agopa motaneya. Nipa ali atoa kabeta pake Yesu wete witimotokome pokale tokome ni agopa motaneya.

¹⁴Naniko Yesuyo einago tobou losu yapu kakale kotukome okome anu oyali nepa opi latoa kakono, neke namolona tane yene moa patukoa naniko wa ke tubeya enekakayano, neke toma poka poanele-kiti wake wamene wa okale ¹⁵yakamotokome eina Yu yene mekoita pokomepa one latekakagopa Yesu tadeko wa opaneya. ¹⁶Yesuyo

enika enile tikilepa Yu yene kini ko mea pupu toamatekoi-peteka tokale tokome enipete titimoa one tete meai tokoi. ¹⁷Nitikolipa Yesuyo okome Agetaiyopa i pupu-kama toko. Noka one peku noane pupu-kama tuku wa oka. ¹⁸Nimo okamoke Yu yename Yesu wia tukadete wedoa wili toa kakeneya. Nipa kini ko mea pupu toamateko-pete kekaneya latikakole pupu eni tokono, Akolalipa oneketai waka oa tokono, onepa Akolalipala midi plane tetepo takakome oko wa ni wioukete taneya.

Mea Kama Poadetepa

Yesu Patu Kautakoa Kamene

¹⁹Nitaneyake Yesuyo okome nimini ukuno yakoe. Padeleka noanu weneme titiane toamuku. Agetaiyo tokole enoane kotukoane tuku. Nipa Agetaiyo peku lawetekolo one mana noanume noane tuku. ²⁰Agetaiyo nopa one kolotini ago one mana wa nooke wene mekoa mea tokome one peku lawettoa tagako. Agetaiyo eni yametekana toa moa patukakome padele padele telekole toatekoule yameoo. Nipa kini wene kainya pianeya memotoa tokome nitoo. ²¹Agetaiyo tua pekene ali atoa mea kama poati wa moa kamotokako toane one mana noanume ali atoa anu weneme takoane motekene mea kama pomotoane tuku. ²²Agetaiyo ali atoa kini toma yakoile pitia enoapa poane takeka epetane takeka takoa wetekakoya mena. Nitameneya kini toma yakoile neme pitia enoapa poane takeka epetane takeka takoa wetekakamene wa Agetaiyo no moa kakapika. ²³Nipa ali atoamepa one kei piyai tiki toa one mana noka kei piyai tomotoa tokome toka. One mana no kei piyamiki ali atoamepa Agetai no moa wetekakago kei piamekete tiki. ²⁴Etene nimini ukuno yakoe. Anu agale

yakoa motekete no moa wetekakago ke wene tugo meki-kitipa mea kama piki. Nipa kini poanele-kala toma yakike nami wiane kibu moamukulupa poane ali atoa tua pote atuatiki ta tewitikoa mea kama piki. ²⁵Etene nimini ukuno, yakoe. Tua pekene ali atoame Akolaline mana noanu tobotobo yakakoa kawatiki tigotoma nome dekanoko. Enilepa wete taatekoko toko. Nitikono, anu tobotobo yatekoi-kiti kamomotekete mea kama poi. ²⁶Agetai one weneme mea kama noko agomepa one mana noanuka anu weneme meane kama nomotoa toka. ²⁷Nipa no nepa Ali Yatenane Oyagono, one patu kautakoa kake ali atoa takoa enamene wa moa kakapika. ²⁸I ukulu yatekimoke wene kainya piameamene. Nimini taatekoko toatekomo ukuno, yakamene. Oloyo tane yene peyame Ali Yatenane Oyago anu tobotobo yakamotekete ²⁹kiwi oloyo taneka tewitikoa kama poi. Nipa epetanele toma yawa tukoi yene kamoapa mea kama poi. Poanele toma yawa tukoi yene kamoapa pokolipa kini poanele-kala toma yakoi ke nami wiane koiso akoane kibu mou. ³⁰Noanu weneme padeleka titiane toamuku. Nipa ali atoa takoane enekilepa Akolaliyo olaukakome oko toane tuku. Nilepa anu wene litiane toamuku. No moa wetekakagono wene pikole-kama tou wane tuku. Nitikuno, kini koiso yakoaane ile tadiki wane ikilepa kiyoke-kama tuku.

Yesu Kei Piki-kiti

³¹Pinali anu wa keido pikenepa nimini ekene wamou. ³²Panagomepa no kei pikoya. Einagome anukumo toawe akedekopa nimini akedekono wene tuku. ³³Pitia yakatekoi yene Yone kakata kime moa wetekakoli nokoli Yoneyo anukumo toawe akedeko wane uku. ³⁴Nimo ukuyake padameka no auapea kei piatiki toa mena. Kipa

nooke wene tugakoli toane moada wane wene plane tekene Yoneyo anukumo toaweake akedekomo wene takakene ukuna. ³⁵Yone einagomepa labo keneya ali atoa pa takalogakoya. Nitane tokale kime one pake wedia meato wa oneke tegetekapote me me tokoina. ³⁶Yone einagome anukumo toaweake ikilepa pa nami deya akeneya. Agetaiyo tamene wa no yametekana toane toma yakilepa nipa ali atoame no i agopa Agetaiyo moa wetekakago tadeko wa wene tomoane tuku. ³⁷Agetai no moa wetekakagomeka anukumo toaweake okoya. Kime Agetaine agale yatekileka toamoa one lene timini-pala enekileka toamoa tiki. ³⁸Agetaiyo moa wetekakago nooke wene tugamekete tekete one agale kime yakoa luamele toamoko. ³⁹Mea kama poatekomo Akolaline bokuke e wia mekaneya pikono, oi moato wa kime one boku lewea tuku tokala tiki. Ae, Akolaline bokuke wia mekane yename no ko-kama akeneyake kime no wene toamiki. ⁴⁰Nipa mea kama poono wene piketeke nooke noamadete wakala tiki.

⁴¹Ali atoame no kei piamikilika kei pikilika nitoa kamotoane pa atiki toane meku. ⁴²Kini tepene piko wene kelayo tetoane enekulu Akolalike wene mekoa meameadiki. ⁴³Agetai patu kautakoane kakene nukuluka kime no makutukoa moamikino, oneke wene mekoa meameadiki. Ae, panago one wenemedo kiwi mekoita wini nokalepa ke wa makutukoa moi. ⁴⁴Akolali wa oko agopa odene ago kako. Einagome kiwi kei piamikilika tokamota wa paya nou toa mekete kini kini ete oto wa kei pinali yokala tiki. Nitikino, nooke edoa wene tugadete-pe. ⁴⁵Kini poanelekala toma yakoilepa Agetai-pala i i wane kiwi akoane wamouno, no i agome kiwi akoane ou wa wene piameamene. Mosese einagopa kiwi mape moatekago

wa wene pianeya mekiyake einagome kiwi akoa agale oo. ⁴⁶Moseseyo one boku-meneke no ko oa wia mekaneya. One wia mekanemo kime yakoa moi tokapa nipa anume ukumoka yakoa moi tokake ⁴⁷Moseseyo nooke wia mekapi-anemo yakoa moamikino, anume ukumo edoa yakoa moadete-pe wa Yesuyo oka.

Yesuyo Ege Egeta Kadukoa (5,000) Ali

Nee Lawetanemo

(*Matiu 14:13-21, Make 6:30-44, Luke 9:10-17*)

6 Nititikaneyake Yesu Galili ue mine eka matanuke ue dipike mea pome mepoka. Eni Galili ue minepa Taibiriasi waka ibini akeneya. ²Yesu eni pokalepa ali atoa peya matiyame one litima nokoi. Nipa one padele padele telekole tokome yene tane-kiti epetekakale enekoiya tekete litima nokoi. ³Nitaneyake Yesu tono padeke ate lewia pokomepa one tuku kakoa (12) oya-lawe-pala aida witipitoa meka. ⁴Edelo ago patukane wa ibini akene toge kiatekoi tigtokale enile toka. ⁵Yesu aida mekome kabe togapia enekale ali atoa obomoa noadete nokoli enekome Pilipi-pala okome i yene lawetateko neepa manika topo toa motokoo-pe wa yateka. ⁶Nipa nee moa lawetateka wene tokomeke pa Pilipiyo oatekamo yakademe oka. ⁷Nitikale Pilipiyo okome ege kadukaka kadapime kadukoa (200) kinado wetekoa palawe wane-kiti motokakolopa adamoo-kale ⁸yatekome Yesuno oyago pade Aderu Saimone Pitane wamenago einagome okome ⁹i kako matiyamepa bali palawe wane ko kakoa-pala (5) mou yomo takuta toa pikoa kako. Eniya-mene moa lawetekoloka adamoo. I ali atoa kainya mati mekino, tokamato wa oka.

¹⁰Eidapa poma piitapeneya. Ali atoa peya pomale meetapemotono toe wa

Yesuyo okale mekatapekoi. Nitaneyake ali-kiti mekoi toa oi moteketepa ege egeta kadukoa (5,000) tadiya meadekoi. ¹¹ Yesuyo eina palawe wane-mene e matiyaneke moa Akolali-pala ke wa oa popimotokome poma ludu meetapekoi yene tatikatapeka. Mou yomotaka moa einakale tokale peyame noa tagatapea kitipu mekoi. ¹² Peyame noa tagatapea kitipu mekoli enekome Yesuyo one oya-lawe-pala okome padeyaka kateaneya pikayano, nee kugu piko wekotoa moa pikoe-kale ¹³ wekotoa mootapekoi. Nipa bali palawe wane namolo ko (5) kakoa moa lawetekoyake kugu wekotoa moa ua ka katika tuku kakoa (12) mako puputua moa pikoi.

¹⁴ Yesuyo eni telekole tokale enekete peyame ekete i agopa Akolaline agale toawe akademe noateko ago tadeko wa okoi. ¹⁵ Nitaneyake kini Ali Muno kakadete one dekoa monoino wene tokome tonoke wa witimotokome kidene poka.

Yesu Ue Mine Tali Ludu Yakenemo

(Matiu 14:22-33, Make 6:45-52)

¹⁶ Ta likaka one oya-lawe ue mineke ketipea pekete ¹⁷ ue dipike pogatekoa pote mea Kapaneame take poadete pokoi. Ta wete likaka Yesu noameneyake ¹⁸ pupulege mati nokome ue pewikamo a pitikaka. ¹⁹ Nitoa kakaka one oya-lawe ue dipike mea kilomita ko melepu (6) tadiya ponokolipa Yesu ue tali ludu tigotokakoa nokale enekete nenei motokoli okome ²⁰ no nukuno, piti moameo-kale ekete ²¹ nipa ue dipike noke meno-koli nome mekale eina eina ue dipi kini mea poatekoita wete eina witapoka.

Ali Atoame Yesu Tuku Tanemo

²² Podolikama oka matanuke kakoina yename eya wa wene taneya. Ete pipapa ue dipi odene ika lono nome

pika. Yesupa one oya-lawe-pala eni ue dipike opia mea poameneyano, kini-mene kidene mea pekete tadiki wa wene taneya. ²³ Eni wene taneya kakoika ue dipi-kiti Taibiriase ta pia nekeneya. Nipa Ali Munagome palawe moa ke wa lawetekale ali atoame nakoinata liti nekeneya. ²⁴ Nitaneyake Yesu one oya-laweka meameadekoli enekete Yesu tuku topato wa eni ue dipi-kitike pogatekoa pote mea Kapaneame take pekeneya.

Yesu Onepa Ali Atoa Mea Kama Pomotoa

Toko Nee Wa Adeka Pikome Akenemo

²⁵ Eni yename Yesu eka matanuke tuku toa kawa enekete ekete Tikisa ago ika manipete noka-pe-koli okome ²⁶ etene nimini ukuno yakoe. Kime no tuku toma nikipa, no einagome telekole tokale enekoonakale Akolaline tele patu kautakoa kakome tadeko wa no tuku toma nikiya mena. Pa palawe wane lawetekolu noa tagakoinake ni tuku toma niki. ²⁷ Pa lomuatero nee-kama pupu toa moato wa wene piameamene. Nitamoano, pia kawateko neeka moa nato wa eniya neeke wene piitikaneya meamene. No Ali Yatenane Oyagome lawetateku pekuke uku. Eni pekupa one patu kautakoa kake lawetamene wa Atai Akolaliyo no moa kakapika tokolo ni uku wa Yesuyo oka. ²⁸ Nimo okale ekete kime Akolalinele edoa takako patukoli okome ²⁹ Akolaliyo moa wetekakale nokou ago nooke wene tugoa meketepa nipa one wene pika toa tekete toikale ekete ³⁰ neke peku pine enoono, padele telekole toa yameano ta. Neeke wene tugamotoapa edele toa yameteko-pe. ³¹ *Tone kaua-mikiti ali piamene ta ludu pima yaketepa maana nee moa noma yak-eneya. Nipa Moseseyo a tibū pia nekene nee lawetekale noma yak-eneya.* Eni tanemopa

Akolaline bokuke wia mekaneya piko-koli okome ³²nimini ukuno yakoe. Eina tibu pia nekene nee lawetane agopa Mosese mena. Tibu nee eteneyapa Age-taiyo lawetekoya. ³³Akolaliyo laweteko neepa a tibu mea ketipea nokome ali atoa mea kama pomotoa tokago eni wa okale ekete ³⁴kamo koniyali wini nee-kama lawetekala toano ta-koli okome ³⁵ali atoa mea kama pomotoa toko neepa no. Nooke nokagopa kobu tokale mekileka toamoo. Nooke wene tugoa mekagopa ue nodo tokale mekileka toamoo. ³⁶Ae, kime no enekala toake wene tugamiki. Nipa kipala okouna toa tekete no wene tugamiki. ³⁷Age-taiyo takoa moa nooke wetekaka peya nooke noi. Nitoa nokoli odene agoka wiane litiamou. Ni edoa-mo. ³⁸A tibu meane ketipeane nekenepa anu wene litiane tou wane nokouya mena. No moa wetekakagono wene pika toane litiane tou wane ni nokou. ³⁹No moa wetekakagome no pa wa wetekakomepa oneme takoa no moa meteka yene odeneka katekameneya peya yopima pone tog-amotono wene pikome wetekaka. Nipa eni yene peya wipitia ta patakale kamotokamene wa wetekaka. ⁴⁰Agetaiyo no pa wa eni wetekakilepa one mana no enekete wene tugakoi peya mea kama pomotoa tokome toka. Wipitia ta pataka-pete eni yene moane kamotokou wa Yesuyo oka.

⁴¹A tibu pia nekene neepa one wa Yesuyo okale yatekete tekete Yu yename Yesu akoa kō oa kakete ekete ⁴²beita, i agopa Yosepene mana Yesu. One nine etenetapa totome wene tokono, one a tibu meane ketipeane nuku wapa edekolo oko patu wa kō oa kakoli okome ⁴³kini kini oa meki kō-pala ete tewitioa wawe. ⁴⁴Panago nooke tegetekoa nikilepa one weneme tamele toamoko. Agetaiyo nooke oto limo limo tokolopa nipa namele toko. Nitikolopa

wipitia ta patakale takoane kamotokou. ⁴⁵Akolaline agale toawe a akane alikitame eya wa wia mekapieneya. Ali atoa peya Akolaliyo mane mane oa olaukoo. Eni wia mekapiene toa Akolaliyo olaukane toa yakoa lukoi peya nooke noi wane uku. ⁴⁶Enipa panagome Agetaine lene timini enaneya wane ekene wamuku. Akolali-pala kawane nuku ago no odene Agetaine lene timini enoane nuku. ⁴⁷Etene nimini ukuno, yakoe. Nooke wene tugoa meki peya mea kama poadete tiki. ⁴⁸Ali atoa mea kama pomotoa toko neepa no. ⁴⁹Kini kaua-mikiti ali piamene ta ludu pima yakete maana nee moa nakeneya. Eni nee moa noake tukala taneya. ⁵⁰A tibu pia nekene neepa dikaneya. Panagome eni nee moa nakomepa nipa tukile toamoo. ⁵¹Pa pia kama poko nee wane ukupa a tibu meane nuku ago nooke uku. Eni nee moa naki peyapa mea kama poadete tiki. Nee na wane meateku neepa anu tigini. Enipa itonoke meki-kiti mea kama pomotoane meadene tuku wa Yesuyo oka.

⁵²Nimo okale e Yu yename ete taka oto taka toa kakete ekete i agome one tigini toto edoa lawetademe okoto patu wa kō oa kakoli okome ⁵³etene nimini ukuno yakoe. Ali Yatenane Oyago noanu tigini kamateta moa noameneya meketepa nipa kini weneme oyake mea kama poamoi. ⁵⁴Anu tigini kamateta noai toko agopa mea kama poatekago eni. Dikane ali atoapa wipitia ta patakale takoane kamotokou. ⁵⁵Anu tiginipa ali atoame noatiki nee eteneya. Anu kamatepa ali atoame noatiki ue eteneya. ⁵⁶Anu tigini kamateta noai tokagopa no-pala lipukoa meko. Noka one-pala lipukoane meku. ⁵⁷Mea kama noko ago agetaiyo no moa wetekakolo nekene one patu kautakoanepa meane kama puku. Nitiku toa no noai tiki-kitipa no patu kautakoapa mea kama poadete tiki. ⁵⁸A

tibu mea ketipea nekene palawe wanepa enina. Eni palawepa kini kaua-mikitame nakene maana nee keneya mena. Eni nee noai toake tukala taneya. I nee noai tiki-kitipa mea kama poadete tiki wa Yesuyo oka. ⁵⁹ Yesuyo einaka einamo oa olaukakilepa Kapaneame take losu yapu keneke kakome toka.

Ali Atoa Mea Kama Pomotoa Toko Agale

⁶⁰ Yesuno agale wete yakoa motane yene peya matiyame einagale yatekete ekete i olaukoa oko agale litia tamene pototo tokono, teyo edoa yakoa tomotoape wa okoi. ⁶¹ Nimo ko oa kakedekoli Yesuyo tetoa enekome e yene-pala okome anu uku agalekepa wene poaneyame mekete iki-pe. ⁶² Ali Yatenane Oyago no kawane nokouna lono wakapeane atepeane pokolu eneketepa ede wene pioimo. ⁶³ Mea kama pomotoapa Epetane Yominiyo toko. Tigini tele takateko peku-kama nakagopa mea kama pamele toamoko. Ina agale oane metekilepa Yomini patu kautakoa kakete mea kama poatikimo oane metekouna. ⁶⁴ Ae, eni uku agale yateketeke kiwi padeka-kiti nooke wene tugoa meamiki wa Yesuyo oka. Nipa namolo papete oneke wene tugamokoi yeneka one wia tukamotoa meatekagoka i i wa wene toopia mekome tokome ni oka. ⁶⁵ Nitikome okome Akolaliyo ka patekoa nooke wetekako yene odene nooke namele toko wane okounapa enike ekene okouna wa Yesuyo oka.

⁶⁶ Enipete titimoa Yesuno agale yakoa motane yene kainya matiyame Yesu tewitikoia wawa one-pala wa lokoa yawamokoi. ⁶⁷ Nitikolipa Yesuyo one tuku kakoa (12) oya-lawe-pala okome kimeka no tewitikoia wawa poadete ikipe-kale ⁶⁸ Saimone Pitayo okome Ali Munu ne wawa peketepa toto teeke pomotoape. Mea kama poateko agale

pinagopa ne odene toko-la. ⁶⁹ Nepa Akolaliyo onekemo-kama akamotoa takoa moa kakapiane ago tadeko wa totome wene toko-kale okome ⁷⁰ kiwi tuku kakoa (12) ali-kitipa anume takoane motokounake kiwi panagopa iponapeku nakago wa Yesuyo oka. ⁷¹ Eni okapa Saimonane mana Yudase Isekarioseke okome oka. Nipa Yesuyo one oyalawe tuku kakoa (12) takoa motokome einagoka motaneyake mone yename one wia tukamotoa einagome moa meo tokale oka.

Yesuno Wamene-mikitame One-pala Akenemo

7 Nititikaneyake Yu yename one wia tukadete tokoli tokome Yesu Yudea ta ludu yawamademe Galili ta ludu pima yaka. ² Einapetepa Yu yene kini losule tekete aga kelekoa yapu wia toge kiatekoi tigtokalepa ³ Yesuno wamene-mikitame one-pala ekete tone Galili ta tewitikoia Yudea take poano pa. Neme toma yakolepa neke agale yakoa tiki yename enemotono pa. ⁴ Panagomekiti ibini akene ago meou wa wene pikomepa one toma yakole kebono take yawa paigakoa keneya toamokono, neke ile toma yakepa ta piko peyake keleyo toma poano pa wa Yesu-pala akeneya. ⁵ Nipa one wamene-mikitika oneke wene tugamekete okoi. ⁶ Nitikoli okome kini toatikilepa kini wene litiapa ipeteka kupeteka tamele tokolo tikino, no pade nitamuku. Anu toatekule taatekoane tukupetepa opi mena. ⁷ Itono peku noai tiki-kitame kipala kotimi yoa meamele toamoko. Anumepa eni yene kini tikilepa poanele-kama tiki wane akoane ukulu tokome nopala kotimi yoa meki. ⁸ A Yerusaleme togeke kini poe. No pade poamuku. Anu toatekule taatekoane tukupetepa opi menano, poamuku wa Yesuyo ootokoa ⁹ one Galili take pa eida meka.

Yerusalem Take Aga Kelekoa Yapu

Wia Toge Kia Mekoita Yesu Nokome Tanemo

¹⁰One wamene-mikiti wete pote toge lobutupokoli Yesu oneka pokome keleyo poameneya paigakoa keneya poka. ¹¹Nitaneyake tobou meane Yu yename toge kikoa mekete Yesu tuku toa kakete ekete Yesupa edekato-pe wa oa kak-eneya. ¹²Nitikolipa pa ali atoa kini kini oboa kakete ekete ekota oi oi wa kakete pade-kitame ekete Yesu einagopa epetanele tokago wa oa wa pade-kitame ekete einagome ali atoa oa yotokakome toko wa oa taneya. ¹³Nimo oa kaketeke kini tobou ali-kiti piti motekete tekete Yesu ko keleyo witoa akaya wa mama moa meaneya.

¹⁴Toge kia meane tiginalo tadiya Yesu tobou losu yapu pokome olaukoa kaka. ¹⁵Nitikale yatekete e Yu yename ka oa kakete ekete i agopa tone totono pine toa olaukaki ali-kitame olaukameneyake imopa i okono, edoa wene toa okoto patu-kale Yesuyo okome ¹⁶anu olaukoane ukumopa anu weneme pade titiane wamuku. No moa wetekakagome akoano ta wa okomo-kama oane mekala tuku. ¹⁷One wene pikole toada wa tiki-kitamepa anu olaukakumopa anu weneme titiane olaukadekoluka Akolaliyo akoano ta wa okomo olaukadekoluka oyake takoa enamele too. ¹⁸Padago one weneme pademo pademo titia okomepa ali atoame one kei pimotou tokome ni oko. Ali atoame one moa wetekakago kei pimotou wa wene pia oko agomepa pademoka kapene yokamoa niminimo-kama oa mekala toko. ¹⁹Moseseyo one totono yametaneyake kiwi padameka litia toamiki. Eni totonodo litikete toi tokapa no wia tukadete wili toamoi

tookano, dekolo tiki-pe wa Yesuyo okale ²⁰peyame ekete nepa teyo wia tukademe wili toa kako-pe. Beita, neeke ipono awinome mekolo teke ni oko-koli okome ²¹tone ko mea pupu toamateko-peteka padele telekole toane pade ago epetekakoule kime enekoina tekete wene kainya pianeya ko oa kaki. ²²Moseseyo eya wa akeneyake tiki. Kini ali mati opiketepa one kepene teigamotamene wa oa pianeya. Eni oa plane toa litiapa ali matiyane kepene teigatiki oi ponokolopa kini ko mea pupu toamatiki-peteka teigakina. Nipa Moseseyo one kaua-mikitame tanele litia tokome akene toa tikina. ²³Nipa Moseseyo akenele tetekamedekolo kini ko mea pupu toamatiki-peteka ali matiyane kepene teigakete pupupa eni tikina. Nitikinano, opi kini ko mea pupu toamatiki-peteka ali pade pupu toane epetekakolu tekete nopala kotimi yoa mekino, dekolo tiki-pe. ²⁴Padame tanemo pine enameneya kaketepa pa akoa agale wameamene. Pine pitia yakatapea kiyoke-kama toa okala tamene wa Yesuyo oka.

Yesu I Agopa Keraisu Taatekoa Noko Patu

²⁵Einapete Yerusalem yene padeka-kitame ekete Yesu i agopa tobou ali-kitame wia tukadete wili toa kaki ago patu. ²⁶Ekee, i keleyo nome kakome okoyake pademoka topo toa ikile toamikino, tone tobou ali-kitame i agopa Keraisu wa papete ibini oa plane ago taatekoa nekedeko wa wene tiki patu. ²⁷Beita, i ago one tobotoi ta totome wene toko. Keraisudo taatekoa nokalepa one tobotoi ta i wa padameka wene toamoi wa okoi.

²⁸Nitaneyake Yesu tobou losu yapu eida pa olaukoa kakome agale telo okome okome kime nopa i ago wa wene toa ni no kawane nokouna ta

i waka wene toa iki. Eni wenepa tikiyake anu weneme nokouya mena. No moa oto wetekaka agome niminimo-kama okoyake kime pade one wene toamiki. ²⁹Wene toamikiyake one wenepa anume tuku. Einago mekota kawane nuku. No ne pa wa oneme no oto wetekakono, einago wenepa tuku-kale ³⁰one dekoa moadete wili toa kakoiyake one moatekoi-pete wete taatekameneya tokome one dekoa moamokoi. ³¹Nitokolika eida oboa kakoi-kiti kainya mati Yesuke wene tugakete ekete Keraisu taatekoa nokomepa i agome telekole tokole moa patukademe toko patu. E'e mena wa oneke wene tugakoi.

Yesu Dekoa Motokapomotoa Poyo Yene

Moa Wetekanemo

³²Eida oboa kakoi yename Yesuke einaka einamo oi oi wa okoli Parisi yename yakaneya. Nitaneyake Akolalike lodo yotokoai tane tobou ali-kitame Parisi yenameka tobou losu yapu yopiane poyo ali-kiti Yesu einago dekoa motokapoe wa moa wetekaneya. ³³Wetekakoli nokoli Yesuyo okome kipala opiane me me tootokoanepa wakapeane no moa wetekakagoke pou. ³⁴Pokolupa kime no tukupa teketeke oyake enamoi. No pone kawatekutapa kiwi oyake noamoi. ³⁵Yesuyo nimo okale e Yu yene kini kini yakate tekete ekete totome tuku toa enamateko takepa maida poademe oko patu. Toto yatene ali atoa Geriki take toa pote mekika i agoka pokome Geriki agale yakoa iki yene olaukapademe okome okoto patu. ³⁶I agomepa one tuku tekete enamoi wa oa one pone kawateku takeka kiwi noamoi wa toto-pala oa tokono, edemo okome okoto patu wa oa kakoi.

Ue Lene Toa Ue Yokoa Kama Poatekomo

³⁷Toge kikoa mea wipitapeane-pete Yu yename kini tobou kakoa kiatekoi toge eni kia peya takakoi. Nitokolipa Yesu oneka nome kakome agale telo okome okome ue nodome tuki-kitipa ue noukete nooke note nonamene-ye. ³⁸Akolaline bokuke papete wia mekapi-ane toapa nooke wene tugoa meki-kiti kini tepenepa ue lene toa ue-kiti yokoa kama poo wa Yesuyo oka. ³⁹Nipa oneke wene tugoa mekoi-kitike pene awinome meateka Yominike okome oka. Einapetepa Yesu one pa teleta tootapeneya mekana take wete wa moa kakameneya tokome Epetane Yomini ali atoake wete awinome meameneya.

Ali Atoa Ete Otota Puutakutukanemo

⁴⁰Yesuyo eni oka agale yakane yene padeka-kitame ekete i agopa Akolaline agale toaweaa akatekago taatekoa nekedeko wa oa ⁴¹wa padeka-kitame ipa Keraisu wa papete ibini oa pi-ane ago taatekoa nekedeko wa oa taneya. Nitaneyake padeka-kitame ekete Keraisu wa papete ibini oa plane agopa Galili ta edoa taatekoa nomotoa-pe. ⁴²One noatekalekepa panagome Akolaline bokuke eya wa wia mekapi-aneya. Keraisu einagopa Depidi-loeke tawa noo wa oa Depidi meane Beseleme take taatekoa noo wa wia mekapi-aneya. Enipa totome nimini okotope wa akeneya. ⁴³Nipa Yesuke e ali atoa ete oto wa puutakutukoa agale toa kakoi. ⁴⁴Nitoapa padeka-kitame one dekoa moadete okoiyake padameka dekoa moamokoi.

Tobou Ali-kiti Yesuke Wene Tugamenemo

⁴⁵Tobou losu yapu yopiane poyo ali-kitipa Akolalike lodo yotokoai

tane tobou ali-kiti Parisi ali-kitika koukoa mekoita wakapea nokoli ekete Yesu einagopa dekoloo aua noamiki-pe wa okoli ekete ⁴⁶namolo okoli yakamoonakamo einagome oa kaka tokolo dekoa moadete poteke wawa noko-koli ⁴⁷Parisi yename ekete einagome kiwika oa yotokakome toka patu. ⁴⁸Tobou ali-kiti toto odene agoka oneke wene tugamoko. ⁴⁹Beita, i oboa kaki ali atoame einagono agale yakoa motikilepa Mosesene totono wene toamekete tiki. Akolaliyo dikane ali atoa poane take pomotoa wako wa Parisi yename akeneya. ⁵⁰Nimo okoli kini yagono ago pade Nikodimasi namolo Yesu mekata pekene agome e yene eya wa yakaneya. ⁵¹Tone totono litiapa panagono koiso akakete eya toamoko-pe. Pinali one kei pikome okomo wete yakameneyake neke tanele ile tadeko wa totome akoo agale oko patu. E'e mena wa Nikodimasiyo okale ⁵²e yename ekete neka Galili ago kake teke ni oko-pe. Akolaline boku moa lewea oi moamene. Nitikepa Akolaline agale toawe akane ago odeneka Galili take taatekoa noameadeko wa wene too wa oomotekete ⁵³kini kini yapu yapu tadao pootapeneya.

Parisi Yenama Motane Atoa Eko Ali-pala

Koua Pitikale Enekete Tanemo

8 Nitaneyake Yesu Oliwe-pini tonoke pome ate lewia mepoka. ²Wa podolikama likonu witia tobou losu yapuke pome kapokale ali atoa peya one kakata obomoa note kakoli witipitoo mekome olaukoa meka. ³Nitoo mekaka Mosesene totono pine toa olaukane ali-kitame Parisi ali-kitameka atoa pade Yesuke lia aua nokoi. Nipa motane atoa eko alike pokome koua pitikale enemotekete

aua nekete e yenane lene yoto moa kakakoi. ⁴Nitikete ekete Tikisa ago i atoame eko alike pome koua pitikale totome enekoo. ⁵Moseseyo one totono yametekompa dikane atoa kueme kaaua wia tukakala tamene wa akeneyano, opi neme edemo oo-pe wa yatekoi. ⁶Nipa Yesu natemo omotadiya wa kakete pa likoa enekete okoi. Nitikoli Yesu one keti itonoke waliketikakome kadapi yoname olea adekoa meka. ⁷Nitoo mekale e yene pa eida kakete yaka yaka tokoli Yesu mukiti kiyotokakome okome kiwi pake poanele toamoko ago kako patuno, einatoo kue moa pitikoo witikilepa einagome titia tomotoane uku wa ootokoo ⁸wa keti itonoke walikitikakome olea adekoa meka. ⁹Nitikale e yene odene odene wa katepita katepita toa pekete ada-kiti namolo kakoo pokala tokoi. Nipa Yesu einatoo-pala pa kamotoo pootapekoi. ¹⁰Nitikoli Yesu wa mukiti kiyotokakome enekale einatoo odene kakedekale enekome okome ne akoo okoina yenepa dekoti-pe. Ne poanele tadekono, kibu mou wameneya wakoti-pe-kale okome ¹¹kamo koniyali padameka no akoo wamokoi-kale okome noanumeke ne poanele tadeko wane akoane wamuku. Neke poanele tokole wake wawano pa wa oka.

Yesuyo Itonoke Meki-kiti Pa Takakoya

¹²Nititikoo Yesuyo e yene-pala agale pade okome okome nopa itonoke meki-kiti pa takakuya. No litima niki-kitipa yomiyomu keneke yawamekete ali atoa mea kama pomotoa toko pa keneke yawa meoi-kale ¹³e Parisi ali-kitame ekete pinali neke wa kei pikopa winipa pa oko-koli okome ¹⁴pinali anu wa kei pikeneke nimini uku wane uku. Noanu kawane nokounata wa pone

kawatekuta pinali anu wene tekene ni uku. Nitikuyake no kawane nokounata wa pone kawatekuta kime pade wene toamiki. ¹⁵Kimepa panagome tanemo pitia yakatekoa ile tadeko wa akoo ikilepa kini kaua-mikitame toma nekenele tiki. No pade nitamekene ali atoame tanele ile tadiki wane akoane wamuku. ¹⁶Ali atoa kini tanele pitiane yakatekoane ile tadiki wanedo akoane ekenepa pine toane ou. No moa wetekakago Agetaiyo no auapekala tokolo tekene ni uku. ¹⁷Kini totono wia mekane bokuke eya wa wia mekanemo kiwi wene takakene uku. Takutamedo padele tokale enoa nekete i i wa odene kotuta kakoo eketepa nimini ekete oi. ¹⁸Nipa pinali anu wa kei plane uku. Agetai no moa wetekakagomeka no kei pia toko. Agetai totame odene kotuta kakoo oko wa Yesuyo okale ekete ¹⁹neketai edekato-pe-koli okome kime no pade wene toamoa Agetaika wene toamoa tiki. Kime no wene toi tokapa Agetaika wene toi toka wa Yesuyo oka.

²⁰Yesuyo nimo ikilepa tobou losu yapu keneke losu kue pitikoai tane mete pianeya liti kakome olaukoa oka. Nitikalepa padameka one dekoa moamokoi. Nipa one moatekoi oi wete ponameneya tokome dekoa moamele toameneya.

One Poatekouta Kiwi Oyake Noamoi

Wa Yesuyo Akenemo

²¹Yesuyo eya waka oka. No ita tewitikoane puku. Pokolupa kime no tuku toa teko tokale wakete kini poanele pa etepea toma pote tukala toi. No poatekuka kiwi pade namele toamoko wa Yesuyo oka. ²²Nimo okale e Yu yene oote tekete ekete i agome one poatekuka toto pade namele toamoko wa okopa pinali one wa wia tukatekomo okome oko patu-koli okome ²³kipa kini pine

taapa keti itono lono. Noanu pine taapa ate tibu lono. Kipa kinikaua-mikitane peku noa tiki. Noanupa eni peku noane toamuku. ²⁴Kini poanele pa etepea toma pote tuoi wane okouna toa taatekoa tutapeoi. Nipa nopa i ago tadeko wa wene toameketepa nitoi wa oka. ²⁵Nimo okale ekete nipa nepa ali te-pe-koli okome namolo titikene nopa i ago wane okala tokounapa einago eni. ²⁶Kini toma yakoinakale pitiane yakatekoane ile tadiki wane akoane oatekumo-kiti ete pa piko. Nitikoyake anu weneme pademoka wamuku. No moa wetekakagome pine toa yameteka toane itonoke meki yene-pala toaweane oadene tuku. Einagomepa niminimo-kama okolo uku wa Yesuyo oka. ²⁷Nitikalepa oneke-taike okono wene toamokoli okome ²⁸no Ali Yatenane Oyago moa yomoke wia dekoa ate kamotokatekoa kakete ae no i agopa eina noatekago tadeko wa wene toa eya waka wene toa toi. No einagome padeleka one weneme toamokome oneketaiyo olaukakana toa-kama oa mekala tokome tadeko wa wene toi. ²⁹No moa wetekakagopa nopala odenekata yako. One wedia memotoane toateku toane-kama tukulu tokome toko. Nipa nepa egetiniya yamene wa no tewitikamoko. ³⁰Yesuyo nimo oa kakaka e yene kainya mati oneke wene tugakoi.

Eberameke Tagene Yeneke Akenemo

³¹Yesuyo oneke wene tugakoi yene-pala okome anume oane meteku agale yakoo teketepa nipa anu oya-mikiti etene meoi. ³²Nipa anu agale pine i i wa wene tootapea mekete tekete namolo egetiniya meake peku mati-kiti latioi. ³³Yesuyo nimo okale ekete totopa Eberameke tagene yene. Mone padane yapuke egetiniya mekileka toamoko. Nitikono, toto egetiniya-kiti namolo meake peku

mati-kiti latioi wapa dekolo oko-pe-koli okome ³⁴nimini ukuno yakoe. Poanele toma yaki-kitipa kini poanele tikileme pine yene kiwi moa kautako. Nitikolo egetiniya meane tetepo taneya meki. ³⁵Egetini ago pade one egetekagono yapu eida mea kawamokoyake yapu pinagono mana eida-kama mea kako. ³⁶No yapu pinagono managome kiwi egetiniya-kiti peku lawetekolupa nipa etene peku mati-kiti latioi. ³⁷Kipa Eberameke tama nekeneyano wene tuku. Eberameke tagene yenameke no wia tukadete tiki. Nipa anu oane meteku agale kini tepene alateko pake piamokolo ni tiki. ³⁸Nopa Agetai-pala opiane kakene enoane yakoane tokou toane ukuno, kipa kiniketaiyo peku lawetekale noa toma yaki wa Yesuyo oka.

³⁹Nimo okale one-pala topo takakete ekete toneketaipa Eberame-koli okome kipa nimini Eberameke tagene yene kawei tokapa nipa Eberameyo toma yakenele toi tokake ⁴⁰no wia tukadete iki. Nipa Akolaliyo one nimini peku lawetekome oka toane niminimo-kama oane meteku agoke wia tukadete iki. Eberameyo niminimo akene ali-pala enile toameneya. ⁴¹Ae, kiniketaine peku noa tiki wa Yesuyo okale ekete toneketaipa Akolali. Panago mena. Toto pade pakeleya-kiti mena-koli okome ⁴²kiniketaido Akolali too tokapa nooke wene mekoa meoi toka. Nipa Akolaline yono kounoke kawane nokolu tokome nitoi toka. No nikilepa anu weneme noamokou. Akolaliyo pa wa wetekakale nokou. ⁴³No nitane ago anu oane meteku agale dekolo wene toamiki-pe. Anu oane metekumo yakoa moamele toamokolo ni wene toamiki. ⁴⁴Kipa kiniketai Setanuno mana-mikiti. Kiniketaine wene pikole-kama toada wa wene pia meki. Tititikakome einagome ali wia atukama nekeneya. Einagopa

nimini patu kautakoa kawamoko. Nimini peku nakileka toamoko. Onepa kapene wakoa oko ago. Oneke-kama kapene wakoa iki agale alama noko. Nitikono, kapene wakoa ikilepa one tepene meane toa-kama yawa oko. ⁴⁵Noanumepa niminimo-kama ukulu tekete no i agome nimini oko wa nooke wene tugamiki. ⁴⁶No i agome poanele tokale enekou wa teyo oo tokolo-pe. Padameka wamoi-li. Nipa niminimo-kama ukulupa ipa nimini oko wa dekolo wamiki-pe. ⁴⁷Akolaline mati-kitame one agale yakama piki. Kipa Akolaline mati-kiti mena. Nitikono, one agale yakamiki wa Yesuyo oka.

⁴⁸Nitikale e Yu yename ekete nepa mone Sameria take agono, neeke ipono awinome mekale wini oko. Enipa totome nimini okoto-pe-koli okome ⁴⁹nooke ipono awinamoko. Noanumepa Agetai kei plane ukuyake kimepa no taumada toa iki. ⁵⁰Nitikipa no kei piati wane none wamuku. Panagome pade no kei piati toko. Einagopa peyame tikile pitia yakoa kini tanele ile tadiki wa pine toa akako. ⁵¹Etene nimini ukuno yakoe. Anu uku agale yakoa tiki-kitipa tua pote atuameneya pa mea kama poadete tiki-kale ⁵²e Yu yename ekete neeke ipono awitadekono wene totome toko. Neke agale yakoa tiki-kiti tua pote atuameneya pa mea kama poadete tiki wapa oko. Beita, Eberameka tua Akolaline agale papete toaweakane alikitika tuma-kala note taneyake oko. ⁵³Tone kaua Eberame wete tuaneyano, one kakene toa ne moa patukoa ako kake oko-pe. Akolaline agale papete toaweakane alikitika tuutapeneyake oko. Ne ali latike oko-pe-koli okome ⁵⁴pinali anu wa keido pikenepe nipa pata pamo ekene tou. No kei piati toko agopa Agetai. Einagopa kini Akolali wa ikiyake ⁵⁵one wene toamiki. Ni-

tikiyake one wenepa anume tuku. Onedo wene toamuku wane ou tokapa nipa kime kapene wakoa iki toane ekene tou tokake one wene toane oneme okole-kama yakoane tuku.⁵⁶ No nokoule enademe tokome kini kaula Eberame wedia kolotine meaneya. Nokoule enekome wene yaapeneya meaneya wa Yesuyo oka.⁵⁷ Nitikale e yename ekete nipa opitikaneyake mali ege odepetaka kadukoa (50) wete ponameneyake okono, Eberamepa neme edoa enoa oko-pe-koli okome⁵⁸ etene nimini ukuno yakoe. Eberamepa wete opiameneyake no pa meane kama nuku wa Yesuyo oka.⁵⁹ Nimo okale e Yu yename i ago wiato wa kue katekamotokoli Yesu paigakoa keneya pome tobou losu yapu wawa poka.

Leneta Lianeya Opiane Ago Epetekanemo

9 Yesu kutu ponokomepa leneta lianeya opiane ago pade enema ponoka.² Einagopa Yesuno oya-laweme enekete ekete Tikisa ago i ago leneta lianeya mekopa dekale taneya patu. Etene niname poanele tokoli taneya patu. Pinali one poanele tokale taneya patu-koli okome³ etene ninameka einagomeka poanele pade toamokoiyake Akolaline telekole winagoke witakale enekamotoa ni taneya.⁴ Lou pa kakolopa no moa wetekakagono pupu totome takama pamedeko. Ta likalepa padameka one pupu oyake takamele toamoo.⁵ Itonoke pa yawane mekenepa ali atoa peya pa takama pukuya wa Yesuyo oka.⁶ Nimo ootokoa itonoke tekeliyu tookitokoa tekeliyu kakene itono wane moa kege latia einagono lenetake yotokaka.⁷ Nitikome okome ne ue Siloame mineke poke kege koba wa wetekakale pokome leneke kakene kege koomotokome leneta kikatapeneya

wakapea nekeneya. (Tone agaleke Siloame wapa moa wetekaneya wa ekete oo.)⁸ Nitikale one yenameka one namolo padeya-kiti oia moa mekale enekoina ali atoameka einago enekete ekete i agopa ina namolo padeya-kiti oia moa mekanakago patu wa akeneya.⁹ Nitikoli padekame ekete eno, einakago i noko-koli wa padekame ekete einakago mena, one keneya ago i noko-koli einagome okome no einago i nuku-kale ekete¹⁰ neke leneta edoa epetekaneya-pe wa okoli okome¹¹ Yesu wa ibini iki agome itono wane moa kege latia anu lenetake yotokoa wetekakome okome ue Siloame mineke poke kege koba wa wetekaka. Nitikale pone kege kogulu anu leneta kikatapeneya wa akeneya.¹² Nitikale ekete einagopa manika kako-pe-koli okome agopa tokono, manika patu wa akeneya.

Parisi Yename

Leneta Lianeya Mekanakago Pitia Yakanemo

¹³E yename leneta lianeya mekanakago Parisi ali-kitike aua pekeneya.¹⁴ Yesuyo itono moa kege latia einagono leneta epetekakilepa Yu yenane ko mea pupu toamatekoi-pete toka.¹⁵ Einago nokale enekete Parisi yename one leneta edoa epetekaka-pe wa yatekoli okome anu lenetake kege yotokakale kege kootokoanepa opi enamele toko-kale¹⁶ Parisi ali padeka-kitame ekete tone ko mea pupu toamateko-pete kekanele eni tokano, einagopa Akolaliyo moa wetekakago mena-koli padeka-kitame ekete enika eni telekole tokolepa poanele tokagome edoa tomotoa-pe wa akeneya. Nitoapa ete oto wa puutakutukoa agale toa kakoi.¹⁷ Nitoa leneta lianeya mekanakago wa yatekete ekete einagonomo neme edemo wa

akako-pe wa yatekoli okome einagopa Akolaline agale akako ago toko-la wa akeneya.

¹⁸Leneta lianeya opianeyake opi enamele toko wa einagome okaleka e Yu yename yakoa moamadete wakoi. Nitoapa einagono etene nineta noe wa agale oa wetekakoli nokoli yatekete ekete ¹⁹i agopa kini mana-pe. Kitame opia pitikaketepa leneta lianeya opikoia-pe. Opi wa edoa lene epetekanya meko-pe-koli ekete ²⁰winagopa tone mana. One leneta lianeya opikooya. Enido wene tokoyake ²¹one leneta epetekanele wene toamoa one leneta epetekane agoka wene toamoa toko. Winago wetinagoke taneyano, one-pala tanemopa one oademe tokono, kini pitia yakoe wa akeneya. ²²Nipa Yu yenane tobou ali-kiti piti motekete akeneya. Eni tobou yename wetena oi pedoa pikete ekete Yesu einagopa Keraisu wa papete ibini oa plane ago taatekoa nekedeko wa okoi-kitipa losu yapuke wa noamomotato wa oi pedoa pianeya. ²³Nitaneyake einagono etene ninetame ekete one wetinagono, one pitia yakoe wa etene niname akeneya.

²⁴Nitikoli wa lokoa Parisi ali-kitamepa leneta lianeya opianeya mekanakago ne no wa kayo oa motekete ekete Akolaliyo yakakoa nimini oano ta. Neke leneta epetekakagopa poanele tokagono wene totome toko-koli okome ²⁵one poanele tokago patu. No wene toamuku. Eni wenepa toamukuyake namolo leneta lianeya mekounake opi leneta epetekakaneya kakuno wene tuku-kale ekete ²⁶oneme edele toka-pe. Neke leneta edele toa epetekaka-pe wa yatekoli okome ²⁷anumena namolo okouna yakamoake wa dekolo yateki-pe. Kimeka one agale litia too wa wene pikete iki-pe wa okale ²⁸poanemo oa kakete ekete nepa eni

pa agono agale litia tokoyake totomepa Mosesene totono litia toko. ²⁹Akolaliyo Mosese-pala ko oa kakeneyano wene totome tokoyake eni pa agopa one kawa noko lonoka totome wene toamoko-koli okome ³⁰ae, kime einago akakipa no wene kainya piko kakina. Einagome anu leneta epetekakaleka one kawa nekene lono pade wene toamekete iki. ³¹Akolaliyopa poanele toma yaki-kitame kowitoo ikimo yakoa toamoko. Nitikoyake one wene pikole toada wa oneke nate wene pia kowitiki-kiti kini kowitoo ikimo yakoa toko wa totome wene toko. ³²Itono tibuta latiane-peteka opika leneta lianeya opiane agono lene epetekakaneya wa akenemo padameka yakameneya. Namolo yakamookonakale einagome titia toko. ³³Einagopa Akolaliyo moa wetekamoo tokapa enilepa oyake toamoo toka wa ena leneta lianeya mekanakagome okale ³⁴e yename agale topo takakete ekete nepa poaneleke alaneyake toto moa olaukade oko-pe wa ootokoa einago dekoa moa losu yapu akolono pitikapaneya.

³⁵Einago losu yapu akolono moa pitikaneya wa okoimo Yesuyo yakatekoa pome kotukome okome nepa Ali Yatenane Oyagoke wene tugako-pe-kale okome ³⁶kamo koniyali winagoke wene tugoane meouno, one te-pe wa yatekale okome ³⁷einagopa neme wete enekona. Opi neta ko oa kako-kale okome ³⁸Ali Munoo neeke wene tugaku wa neuwe tukupia one kei pia kaka. ³⁹Nitikale Yesuyo okome itonoke nikilepa ali atoa takoane enoane akadene nokou. Nipa leneta lianeya meki-kiti epetekoane ni leneta kianeya meki-kiti leneta likoane toadene tekene nokou wa oka. ⁴⁰Yesuyo nimo okale yatekete one-pala eida opia kakoi Parisi ali-kitame ekete tone lenetaka lianeya kakolo oko-pe-koli okome

⁴¹ kini lenetado lianeya kaketepa nipa kini tiki poanele wene toamekete tiki. Eniledo wene toamekete tikilipa koiso akoane oateku pade piamoko. Leneta liameneya mekete oyake enamele toko wa ikili yatekene tekene kini poanele tanepa wene teketeke tadikino, koiso akoane oateku pade pa piko wa Yesuyo oka.

Sipi Sipi Kai Talo Agoke Pedoa Akenemo

10 Yesuyo okome okome etene ni-mini ukuno yakoe. Panagopa sipi sipi kai-kiti kolago taneya kakita kago pikaneta noameneya eko pata paigakoa lewia nokomepa nipa sipi sipi kai-kiti kode mou wa wene pia noko. ²Kago pikaneta noko agopa sipi sipi kai-kiti talo tokago eni. ³Einago nokolo kagoke payaponago kako agome kago pekakolo lobutunoko. Nitoa lobutua kakome okolo sipi sipi kai-kitame yakakoa mekili kini ibini odene odene wa oa moa akolono aua poko. ⁴Nitoa peya akolono aua pomepa one namolo kawa pokolo one sipi sipi-kiti kawatuku pitoa pokala tiki. Nipa talo tokagono tobotobo yatekete tekete one pokoka litima piki. ⁵Nitikiyake mone pade ago nokolopa litima poameneya paka pitoa piki. Nipa mone pade ali-kitane tobotobo wene toamekete tekete pitoa piki wa Yesuyo oka.

⁶Yesuyo nimo pedoa okalepa e yename ike oko wa wene tokoiya mena. ⁷Nitoa agopa moa mekoli Yesuyo lokoa okome okome etene nimini ukuno yakoe. Sipi sipi kai-kiti kolago taneya kakita lobutatiki kago keteponopa no. ⁸No wete noameneyake pade ali-kiti nikilepa sipi sipi kai-kiti kode moato wa noai taneya. Nitaneyake sipi sipi kai-kitame kini agale yakameneya. ⁹Sipi sipi kai-kiti kolago taneya kakita lobutatiki kago keteponopa no. Ali

atoa anu kawane eni note lobutunokoli pawe toane mou. Nitikolupa akolono wititapekete pote nee noa yawa kawa oto wa lobutunokala toi. ¹⁰Kode ago nokomepa eya kuya kode moa ali wia atukoa enika enile-kama toademe noko. Nitikoyake noanu nekenepa ali atoa mea kama pomotoane tekene nokou. Nipa pewe wia tagatapeneya mea kama pomotoane tekene nokou.

¹¹Nopa sipi sipi kai talo toane epetekaku ago. Talo toa epetekakagopa sipi sipi kai-kitike tuademe toko. ¹²Ipa kue moadene tuku wa talo tokagomepa eya toko. I sipi sipi kai-kitipa one mena wa talo toa mekome enekolo lene plane tue tubeyame sipi sipi kai-kiti wia noademe nokolo enekomepa sipi sipi kai-kiti tewitikalogoa pitoa poko. Nitoa pitoa pokolopa tueme sipi sipi kai-kiti deka deka toa wia noa tadekatapeko. ¹³Einagopa kuke-kama wene piitikaneya mea talo tokome tokome sipi sipi kai-kiti mama moameneya pitoa poko. ¹⁴Nopa sipi sipi kai talo toane epetekaku ago. Anu sipi sipi kai-kiti wene taneya meku. Anu sipi sipi kai-kitame no wene taneya meki. ¹⁵Nipa Agetaita tone wene toko toa anu sipi sipi kai-kiti tone tone wene toa meko. Nitoanepa anu sipi sipi kai-kiti talo toane meane tuou. ¹⁶Anu sipi sipi kai padeka-kiti anu kolago tukuta wete koukoa note kawamiki. Eni sipi sipi kai-kitika oto auane namedeku. Nitikolupa anu agale yakakoa meoi. Nipa kiwi talo tuku ago nooke-kama lukoa meoi. ¹⁷Agetaiyo no wene taneya mekilepa eya toatekuleke toko. Kamoane poadene tekene anu sipi sipi kai-kiti talo toane meane tuou. ¹⁸Padameka no oyake wia tukamatikiyake pinali anu weneme tuou. Tukileka kamoane pikileka anu weneme tuku. Nipa Agetaiyo ta wa oka tokolo tuku wa Yesuyo oka.

¹⁹Yesuyo eni okagaleke e Yu yene ete oto wa puutakutukoa agale toa kakoi. ²⁰Nitoe kainya matiyame ekete oneke ipono awinome mekome leau akakolo ni okono, one okomo yakamatoe wa okoli ²¹pade-kitame ekete ipono awitane agomepa enika eni agale oyake amele toamoko. Leneta liane agopa iponame one leneta edoa kikakamotoape wa okoi.

Yu Yeneme Yesu Kote Moa Wakenemo

²²Yu yeneme tobou losu yapu kago peane oi pikoa mekete toge kia meaneya. Niti tane tokene-mene pakeke nitaneya. ²³Eni toge kia mekoi-pete Yesu tobou losu yapu nokomepa Solomonu wa yomini kayo oa ibini akene lono eida yawa meka. ²⁴Nitikaka Yu yene Yesu kakata koukoa nekete ekete neme toto wene kainya pikoa-kala mekona, nepa Keraisu wa papete ibini oa plane ago tadekalepa wete toawe a-na wa okoli okome ²⁵namolo toaweane okounake nooke wene tugoa meamiki. Agetai patu kautakoane kakene toma yakule kini leneme enekipa nopa einakago tadeko wa kime wene toamotoane tukuyake ²⁶nooke wene tugoa meamiki. Kipa anu sipi sipi kai-kiti toamekete tekete ni wene tugoa meamiki. ²⁷Anu sipi sipi kai-kitamepa anu tobotobo yatekala tiki. Nitikino, anu sipi sipi kai-kiti i i wane wene taneya meku. Nitikulu tokome no litima niki. ²⁸Anu eni sipi sipi kai-kiti atua poameneya mea kama pomotoane tuku. Nitikuno, padameka anu yono tatonoke odoa moamele toamoko. ²⁹Eni yene nekeno, talo toano ta wa no metekago Agetaiyo ete yene peya moa patukoa ako kako. Nitane agono yono tatonoke padameka sipi sipi kai-kiti odoa moamele toamoko. ³⁰Agetaita

tone odene wene pia liputakutukoa meko wa Yesuyo oka.

³¹Yesuyo nimo okale yatekete e Yu yeneme i ago wiatoe wa kue wa katekamotokoi. ³²Nitikoli okome Agetai patu kautakoane kakene ele kule epetekoane tikilepa kiwi kakakoane tokounano, edele tokounakaleke no wia tukadete kue katekamotiki-pe-kale ekete ³³neke epeteko tokanakaleke pade ne wiadete kue katekamotokoya mena. Nepa pa agomeke Akolali latike okanano, Akolali-pala tea agale eina okanakamoke ne wiadete toko-koli okome ³⁴kipa Akolaline yagono-mikiti wane okou wa Akolaliyo akenemo one bokuke wia mekaneya piko. Enipa nimini ukutu-pe. ³⁵One agale oa metekale yakane yenepa Akolaline yagono-mikiti wa eni wia mekaneya piko. One bokuke wia mekane agalepa niminimo-kama wia mekane agaleno, padame pademoka oyake katekoa wawamele toamoko. ³⁶Akolaline mana kaku wane ukulu kime ekete enipa Akolali paya tetepo takake oko wa iki. Nipa Agetaiyo onekele-kama takamotoa takoa moa wetekakale nokou agoke ikino, dekolo iki-pe. ³⁷Agetaiyo ta wa okale-kitido tagoane toameadekolupa nipa nooke wene tugameamene wane uku. ³⁸Nipa oneme ta wa okole-kama takama yakeneke uku. Enipa nimini oko wa anu uku agale yakoa moameketeka anu toma yakule-kitike wene tugoa meamene. Nitoe wene tugoa meketepa nipa Akolali noo-pala lipua mekolo nopa one-pala lipuane mekuno wenepa toi wa Yesuyo okale ³⁹e Yu yeneme one wa dekoa moadete wili toa kakoli paka petoa poka.

⁴⁰Nitoapa wakapea pome Yodane ue ketoa Yoneyo pegetoa ali atoa ue motokoa kakana lono enika pome mepoka. ⁴¹One eni pome mepokata ali atoa peya mati nekete ekete Yone

einagomēpa ipa Akolaline tele patu kautakoane kakene tuku wa padele telekole toamokanake i agonokemo akakanakama nimini akedeko wa okoi. ⁴²Nitoapa e ali atoa kainya mati einata einapete Yesuke wene tugakoi.

Lasarusi Tuaneyake Moa Kamotokanemo

11 Besani take eya ago Lasarusi one lainatoata Maria Masatapala meaneya. Einagopa eida yene pia meaneya. ²Eina yene tane agono lainatoa Masayo padeya kalono taneya Yesuke pekoa yotokatekoa one kawata pinatoa one pineme kogane atoa. ³Laine ago yeneme tuupitakale one lainatoatame Yesuke agale oa wetekakete ekete Ali Muno neke oya patu plane ago opi yene pia meko wa agale oa wetekaneya. ⁴Einago tuko wa akedekoli yatekome Yesuyo okome yene taneya pi-ake tuamoo. One yene tokopa ali atoame Akolali kei pimotoa tokome toko. Ni Akolaline mana no one patu kautakoane kakene tokoule enekete noka kei pimotoa tokome toko.

⁵Yesuyo Masa wamena lainago Lasarusi toa wene mekoa meaneya. ⁶Nitaneyake Lasarusi yene pia meko wa akedekoli yatekome one mekata ta takupeta patamotoa pa eida meka. ⁷Nititikoā one oya-lawe-pala okome Yudea take wakapea pato-kale ekete ⁸ekee, Tikisa ago nepa ikonona pakedopa ne wiadete Yu yename kue katekamotokoina take wa poade oko-pe-koli okome ⁹eno, pou toe. Ta pataka abuna lou nome kakome yateta matai teteponome wa keika ponome kakala toko. Nipa lou pini tuku kakoa (12) ponokala toko. Enipa nimini ukutu-pe. Panago loyo yawa mekomēpa lou pa enoa yakome tugala toamoko. ¹⁰Nitamēneya yomiyomu keneke yawa mekomēpa one poka ka

ludu pa takatekoya toamokolo tokome tugala toko wa Yesuyo oka. ¹¹Nimo ootokoa kakome okome tone oyago Lasarusipa pa atu pitikome tokono, kamotokapuku-kale ¹²one oya-laweme ekete atu pia meapa one weneme latoa poademe toko wa okoi. ¹³Nipa Lasarusi tukome toka wa Yesuyo okome okoyake o yename wene toamekete okoi. ¹⁴Nitikoli Yesuyo keleyo okome okome Lasarusi tukome toka. ¹⁵No ita nepiane mekakoā einago tukome tokano, ke wane wediane meku. Nipa kiwi nooke wedoa wene tugamotoane tekene wete poameneya nepiane mekuno, opi one tuaneyā pikota pato wa okale ¹⁶eya ago Tomasi one pade ibini Didimasi wa okala tane agome one oya-lawe-pala okome Besani take Yesu-pala tukete tupatono, one-pala opia patoe wa oka.

¹⁷Yesu Besani take pome kakome yatekale Lasarusine tigini kota keneke moa piitikaneyake ta tuyono-peta lia patakala toka wa okoimo yateka. ¹⁸Besani taapa Yerusalemē ta liti plane ta. Eni taata pake kilomita tebolo tadiya pianeya. ¹⁹Masa Mariatane lainago tukome tuaneyake ete Yu yene kainya matiyame kini wene epetekadete Besani take tumai menaneyā.

²⁰Yesu noko wa okoimo yakamotokome Masa pome Yesu kotupaneya. Nipa Maria yapu memotoa wawa pome kotupaneya. ²¹Nitoa kotua enekome okome Ali Muno nedo ita wete noke meo tokapa anu anai ago tuamoo toka. ²²One tuaneyā pikoyake neme oa kowitikole-kama Akolaliyo yakoa tokono wene tuku wa Masayo okale okome ²³neke anai tuake kamoā pookale ²⁴einatoame okome nimini wini oko. Wipitia ta pataka-pete Akolaliyo tuane ali atoa moa kamotokakalepa anu anai agoka kamoā poo wane wene tuku-kale okome ²⁵nopa tuane ali atoa moane kamotokakuya. Ali atoa mea kama pik-

ilepa no patu-kama mea kama piki. Nooke wene tuganeyā meki-kiti tuake mea kama poadete tiki. ²⁶Nooke wene tugoā mea no patu kautakoa kakete mea kama piki-kitipa tua atukileka toamoi. Ina okouna agalepa no i agome nimini oko wa wene toko-pe wa okale okome ²⁷eeno, winimopa nimini oko. Ali Muno, nepa Keraisu wa papete ibini oa plane ago. Akolaline mana noo wa oa plane ago ne taatekoa nekedeko wa Masayo oka.

Yesuyo Komo Oa Kakome Akenemo

²⁸Nimo oomotokome Masa wakapea wamenatoa Maria mekata ete keneya kakome oi oi ootokoa okome Tikisa ago wete nokome ne noo wa akapa wa wetekakolo nuku wa okaka ²⁹Maria wete kamokoa Yesu mekata noka. ³⁰Yesu Besani take wete nome kawameneya Masayo one kotua enepokata eida pa meka. ³¹Maria wete kamokoa pokale enekete one wene epetekadete tumai menane yename pato wa litima nokoi. Nipa laine ago pipane kotake komo opademe toko wa wene pia nokoi.

³²Maria Yesu mekata eni nokome one kawane aua pitakome okome Ali Muno anu anai agopa wete tuameneyake nedo ita noke meoo tokapa tuamoo toka wa oka. ³³Nimo ootokoa komo oa kawa ni one-pala opia nokoi Yu yeneka komo oa kawa tokoli enekome Yesu tepe we tokome wene keda mati taneya kakome okome ³⁴one tigrini maida pipokoi-pe wa okale ekete Ali Muno ne noke enenookoli ³⁵Yesu komo loba pitikaka. ³⁶Nitikalē enekete e Yu yename ekete i agopa Lasarusike wedoa wene mekoa meaneya tadekono, enoe wa okoi. ³⁷Nitoapa padeka-kitame ekete i agomēpa eina leneta lianeya meane agono leneta epetekakanano, ina Lasarusi wete tu-

ameneyake noo tokapa oyake tuamomotoo toka wa okoi.

Yesuyo Lasarusi Kamotokanemo

³⁸Yesu wa ela mati tokale Lasarusi pipaneta poka. One eni pipaneta kota kabunupa kue makai matiyame ketekaloganeyā. ³⁹Yesu eida pome kakome okome kue ete moa pedeka wa okale tuane agono laine Masayo okome Ali Muno einago tuutukaneyake ta tuyono-peta lia patakala taneyano, kotimi too wa okale okome ⁴⁰dekolo oko-pe. Nepa nooke wene tugoā mekepa Akolaliyo padele telekole tokale enoo wane okouna wene kayapeaneyā kake oko-pe wa okale ⁴¹pade-kitame kue ete moa pedekakoi. Nitikoli Yesuyo a tibu enekakome okome Atai anume kowitoane ukule neme wete yakoa tokono, ke wane uku. ⁴²Anu kowitikule-kama neme yakoa tokono wene tekene uku. Nipa ina ikilepa no i agopa neme moa wetekakale nekedeko wa i oboa kaki yename wene tomotoane tekene uku wa Yesuyo ootokoa ⁴³kayo telo okome okome Lasarusi wete kamokoa noo wa okale ⁴⁴tuane agopa one kawa yonota pueme togotapeneya kawa one lene timini pade mamina tigrini paatapeneya kawa taneya kamokoa noka. Nitikalē Yesuyo e yene-pala okome pa pomotono, togotane pue kekatapeo wa oka.

Yesu Wia Tukatekoi Oi Pedoa Pianemo

(*Matiu 26:1-5, Make 14:1-2, Luke 22:1-2*)

⁴⁵Maria mekata ugu nekene Yu yene kainya matiyame Yesuyo eni tokale enekete tekete oneke wene tugakoi. ⁴⁶Nitikolika padeka-kiti Parisi ali-kiti mekoika pekete Yesuyo tokamo i i wa kotukapaneya. ⁴⁷Nitikoli yatekete eni Parisi ali-kitameka Akolalike lodo yotokoai tane tobou ali-kitameka ete

Kanosolo ali-kiti peya koukoa noe wa agale oa wetekakoli nokoli ekete edele tato patu. Einago Yesuyo telekole toma yakono, ⁴⁸enile toma yamotoa totomodo wakolopa ali atoa peya oneke wene tugoai toi. Nitikolipa Lomane yatename tone tobou losu yapu toto yatene peya-pala wia tadekatapeoi wa akeneya. ⁴⁹Nitikoli Kanosolo ago pade Kayapasi eni malike ako odene mekome Akolalike lodo yotokoai tane tobou agome okome kime nimo ikilepa nateya weneka toamekete iki. ⁵⁰I agodo ali atoa peyake tumotokolopa nipa epetoo. Nitamokolopa Lomane yename toto yatene wia atukakolipa nipa poo wa Kayapasiyo akeneya. ⁵¹Nimo ikilepa one weneme titia wameneya. Eni malike ako odene mekome Akolalike lodo yotokoai tane tobou ago tokome Akolaliyo wene takane toa oa pianeya. Nipa Yesu Yu yateneke tuatekamo eni oa pianeya. ⁵²Ni Yu yateneke odene tuameneya, Akolaline mana kono-mikiti e ku yatene ta piko peyake pilikolokaneya mekoika Yesuyo toa motokome odeneka koukoa mekatekamoka oa pianeya. ⁵³Nitaneyake enipete titimoa Kanosolo ali-kitame Yesu wia tukatekoi oi pedoa pima pekeneya. ⁵⁴Nitaneyake Yesu Yu yene pakeke keleyo yawameneya ali piamene ta liti Epereime wa ibini akene take pome mepaneya. Nipa one tuku kakoa (12) oya-lawe-pala opia pome mepoka.

⁵⁵Einapete edelo ago patukane wa ibini akene toge kiatekoi tigotokale tekete Yu yene kini kini pitikoika kawa a Yerusaleme take penekete eya taneya. Kini losule tekete tigrini yono mamina mete eya uele tadakala taneya. Nipa kini wene moa koigakoyapa i koguna wa adeka pikete taneya. ⁵⁶⁻⁵⁷Papete eya yene Akolalike lodo yotokoai tane tobou ali-kitameka Parisi yenameka ekete Yesu

nome mekata eneketepa toto Kanosolo ali-kiti onamene wa oa tukaneya. One dekoa moadete ni akeneya. Nitaneyake ali atoame Yesu tuku toa kawapa tobou losu yapu pote kakete kini kini yakate tekete ekete ede wene piko-pe. Yesu einagopa togeke noamoko patu, noko patu wa okala taneya.

Besani Take Yesuke Padeya Kalono Taneya

Pekoa Yotokanemo

(Matiu 26:6-13, Make 14:3-9)

12 Edelo ago patukane wa ibini akene toge kiatekoi ta pataka ko melepu (6) kakoa ete pimotoa Yesu Besani take Lasarusi mekata pome mepoka. Lasarusi einagopa tuaneyake Yesuyo moa kamotokane ago. ²Lasarusi mekata Yesuno nee takaketepa Masayo eni nee moa Yesu one oya-laweka lawetekala toka. Lasarusi oneka Yesu-pala nee pikane walaikie odeneka opia meka. ³Eida mekakoa Mariayo padeya kalono taneya mete keneke mekoa aua noka. Eniya motokakome kue peya mati wetekoa motokaneya. Einakeya aua nome Yesuno kawatake pekoa yotokatekoa one pineme kogaka. Nitoa mekale yapu mekoi peyake einakeya kalono tootapeka. ⁴Nitaneyake Yesuno oyago pade Yudase Isekariose Yesu wimotoa moa meatekago ko okome okome ⁵ina kalono taneya ete wa topo tekete kina ege kadukaka ko melepumek kadukoa (300) moa ponopene yene tatikoa meamedekoyake i atoame paka pale tadeko wa oka. ⁶Nipa ponopene yene mama moamokomeke oka. Yesu one tuku kakoa (12) oya-lawene kue ka Yudaseyo ukoa yakome eni kue kode noma yakeneyame oka. ⁷Yudaseyo ko oa kakale Yesuyo okome oyakeno wa. Anu tigrini kota keneke moa piei tokolo

i atoame enakeya pa pikoa kamotono, wa ⁸Ponopene yenepa enabuna kiwi pakeke mekala tikino, noanupa kiwi pakeke pa tekei mekuno, i atoame enilepa toa kamotamene wa Yesuyo oka.

⁹Yesu Besani take nome meko wa okoimo yakamotekete Yu yene peya mati eida obomoa nokoi. Eni nikilepa Yesu odene enadete nokoiya mena. Taneanake Yesuyo moa kamotokakanak-ago Lasarusika enadete nokoi. ¹⁰Nitaneyake Akolalike lodo yotokoai tane tobou ali-kitame Lasarusi oneka wia tukatekoi oi pedoa pianeya. ¹¹Nipa Lasarusi einagokepa Yu yene kainya matiyame kiwi tewitikoa wawa Yesuke wene tugoa mea litikoli tekete taneya.

Yesu Yerusaleme Take Noademe Nokale

Ali Atoame Ke Wa Kei Pima Nekenemo

*(Matiu 21:1-11, Make
11:1-11, Luke 19:28-40)*

¹²Podolikama Yesu Yerusaleme wini noademe noko wa okoimo yakamotekete eina toge lobutunekene yene pote ¹³yo tali tewia moa aua Yesu nokaka kotua nokoi. Nitoa kayo oma nekete ekete Akolali kei piatoe. Ali Muno patu kautakoa kama noko ago i noko. I agopa toto Iserele yene lukoa meko agono, Akolali neme pewe wia yopiamene wa kayo oma nokoi. ¹⁴Yesu eni nikilepa Akolaline bokuke papete oa plane toa taatekakome dogi kai tine pade enoa moa one patu mea noka. ¹⁵Eina papete oa plane agalepa dikoa wia mekaneya piko.

Saione take pitiki yene kipala ukuno, yakoe. Opi kiwi lukoa meatekago dogi kai tine patu mea wini nokono, piti moameo wa wia mekaneya piko.

¹⁶Eina papete wia mekapiane toa Yesuyo taatekoa tokale eneketeke one tuku kakoa (12) oya-laweme wene toamokoi. Wa naniko Yesu tukale Akolaliyo moa kamotokatekoa a tibuke one pa teleta tootapeneya mekanata ate aua pome mekakaleka eina oa plane agale wa wene moa pitikoa wene tokoi. Nipa Yesuke dogi kai moa aua nokolo mea pokanapa Akolaline bokuke oneke oa planele eni taatekakoona wa wene tokoi.

¹⁷Yesupa Lasarusi kota keneke pipaneta pokome ne noo wa kayo oa kamotokakale odeneya kakete enekoi-kitame kini eina enekoinakamo ta piko peyake oa pupitikatapeneya. ¹⁸Nitaneyake Yesuyo eni telekole tokamo yatekoiya tekete Yerusaleme noademe nokata ali atoame patoe wa obomoa kotua pokoi. ¹⁹Nitikoli enekete Parisi ali-kiti kini kini oote tekete ekete ta piko peyake pitiki-kiti one pokoka litikala tikino, totome i ago oyake katekamele toamoko wa akeneya.

Yesuyo One Tuatekamo Oa Pianeya

²⁰Akolali kei pia kowitadete Yerusaleme take toge lobutunokoi yene padeka-kitipa Geriki agale yakoa akene yene. ²¹Eni yenepa eya ago Galili ta keneke piko Besaida take opiane ago Pilipi kakata nekete ekete kamo koniyali totopa Yesu enadete oko wa onokoi. ²²Nimo okoli Pilipi pome Ederu opokale Aderu Pilipita pote Yesu opokoi. ²³Nitikoli Yesuyo okome okome Agetaiyo no Ali Yatenane Oyago pa teleta tootapeneya mekounata ate moa kakateko-pete opi toko-la. ²⁴Nimini ukuno yakoe. Witi ku wane deya yapu tateke-kiti kidene pa pikomema nipa kidene eni pa pioo. Nitatekoyake itonokedo padame moa pitikakalepa keti lomukome ate witoa ku peya mati tukala too. ²⁵One kepene mama motokome tukaya wa piti motaneya

mekagopa etepea tua poo. Nitameneya one kepepe mama moamoko agopa Akolaliyo toa motokale a tibuke mea kama poo. ²⁶Anu pupu takama poko agopa no litima namene wane uku. Anu pupu takama yako agopa nopala odenekata yatoane ni uku. Anukule takama yaki-kitipa Akolaliyo kiwi kei pia kawoo. ²⁷Opi anu wene keda tane matiyame kakene ukuno, edema wane uku patu. Tete metekoi-pete Agetai neme eni tete ete moa pedekamene wane uku patu. O'o mena. Eni tete moadene nokouya tekene enimo wamou. ²⁸Atai ne pa teleta tootapeneya meke peku laweteka toane tokoule ali atoame enekete ne kei pimotono ta wa Yesuyo okale a tibuke agale ludu nokome okome nitimotoane wete tokouyano, wa lokoane toadene tuku wa oka.

²⁹Nitikale eida kakoi yene padeka-kitame yatekete ekete tono tadiya witiko-koli padeka-kitame ekete e'e mena. Edelo agome tadiya onepala ko okome toka wa okoiyake ³⁰Yesuyo okome einagale ikilepa noanume yakamotoa tokome wamokanano, kime yakamotoa tokome okana-la. ³¹Akolaliyo itonoke meki-kiti takoa enoa akateko-petepa opi toko. Itono yopia mekago Setanu Akolaliyo wia litiademe toko. ³²No dekoa moa ate kamotokakolipa ali atoa peya noanuke limo limo toane mou wa Yesuyo oka. ³³Yesuyo nimo ikilepa one tukome toatekaleke okome oka. ³⁴Nitikale e yename agale topo takakete ekete tone totono bokuke eya wa wia mekanemo oi motekete oko. Mesaia einago taatekoa nokomepa pa mea kama poo wa wia mekapienemo oi motokoo. Nitikoono, Ali Yatenane Oyago yomoke wia dekoa kamotokoi wa wini okopa edemo wa eke oko-pe. Ali Yatenane Oyago te-pe wa yatekole ³⁵Yesuyo okome

kiwi pakeke papa me me tootokoa poademe toko. Eni pa tokoa kakoka pa yawa-kala kamene. Pa yawa kakoika ta likaya tokolo uku. Yomiyomu keneke yaki-kitipa ka yomiyomume agopa takatapekolo tugama yakili tekene ni uku. ³⁶Kiwi pakeke pa pa tokoa kakono, eni pake wene tugo meamene. Nitiketepa eni pane mana kono-mikiti latioi wa Yesuyo oka.

Yu Yene Yesuke Wene Tugameneya Meanemo

Yesuyo enimo oomotokome eni yene tewitiko wawa paigakoa mepoka.

³⁷E yene kakakoa Yesuyo enika eni telekole toma yakaleka e yene oneke wene tugamokoi. ³⁸Nipa Akolaline agale toawe akane ago Aisaiayo papete oa plane toa taatekoa tokoi. Eya wa oa pianeya.

Ae, Ali Muno totome oa metekoo agale teyo yakoa motaneya patu. Ali Munagome padele padele telekole yametekale teyo enoa motaneya patu wa enilepa wete tane tetepo takoa oa pianeya.

³⁹Aisaiayo eya waka oa pianeya tokome e yene oneke wene tugamele toamokale pa mekoi.

⁴⁰*Akolaliyo kini leneta likoa kolotini lupi takoa taneya. Nipa enekoiya enoa moamoa yatekoiya yakoa moamoa to-motoa ni taneya. Enipa oneme uku agale yatekete tekete oneke tepe kolotini pekoka pikete ekete kiwi latekoano ta wa akaya tokolo tuku wa Akolaliyo okolo uku wa Aisaiayo papete wia mekapieneya.*

⁴¹Nipa Yesuyo etenane peku noa padele padele telekole tokale Aisaiayo papete enepikome tokome Yesunomo eni wia mekaneya.

⁴²Asaiayo nimo papete oa pianeyake Yu yenane tobou ali-kiti kainya mati Yesuke wene tuganeya. Nitiketete eya taneya. Parisi ali-kitame kini losu yapu-

kiti oto wa noameamene wa wia litikaya tokale kini Yesuke wene tugakoinakamo witakoa wameneya. ⁴³Nipa ali atoame kiwi kei pimotoadiyano wene wedoa pianeyake Akolaliyo kiwi kei pimotoadiyano wene wedoa piameneya. Nitikete kini Yesuke wene tugakoinakamo toawe wameneya pa kini luaneya meaneya.

⁴⁴Yesuyo kayo telo okome okome panago nooke wene tugakomepa nipa no moa wetekaka agokeka wene tugakome toko. ⁴⁵Panagome no enekomempa nipa no moa wetekaka ago eni enekome toko. ⁴⁶No itonoke pa tootapeneya nikilepa nooke wene tugo meki-kiti yomiyomu keneke pa yawa meamotoane tekene tokou. ⁴⁷Anu agale yatekomeke toamokagopa one koiso akoane kibu moamou. Itonoke nikilepa ali atoa takoane enoane akadene nokouya mena. Ali atoa toane moadene tekene ni nokou. ⁴⁸No wawa anu agale yakamoko agopa one koiso akoka ikilepa eyame toademe toko. Wipitia ta patakapete anume okouna agalemepa einago koiso akoka oademe toko. ⁴⁹Anu oane metekouna agalepa anu weneme titiane wamokouna. No moa wetekakago Agetaiyo anume ekene toatekou toa imo amene, imo amene wa mane oa olaukoa toka. ⁵⁰Agetaiyo one totono litia tamene wa ikilepa ali atoa mea kama pomotoa tokome ni oko. Nitikono, agale oane metekilepa oneme amene wa oka toanekama uku wa Yesuyo oka.

Yesuyo One Oya-lawene Kawake Kakene

Kakene Koganemo

13 Edelo ago patukane wa ibini akene toge podolikama kiadete Yu yename nodokoa meaneya. Nitaneyake Yesu i ta tewitikoane Agetaika poateku tigotoko wa wene taneya meaneya. Eni

wene tokome one oya-lawe itonoke mekika kiwike tuou wa wene mekoa meateka kotuke kakoa wene mekoa mea togaka.

²Ta likale Yesu one oya-lawe-pala opia mekome nee nakaka Setanu Saimonane mana Yudase Isekarioseke wete awinome meaneya. Awinome mekome Yesu mone yenane yonoke moa plateka wene moa pitikaneya. ³Nitaneyake Yesuyopa oneketaiyo padeya padeya peya one yonoke moa piadeko wa wene toa ni Akolali-pala kawane none wa oneke wakapeane puku waka wene toa tokome eya toka. ⁴Nee takoa plane walai liti mea kamokakome one tokoo kakene mamina kotokoa pia mamina pade moa tene lutulogoa eya toka. ⁵Ue nomoa okolo kagonoke pekoa pia one oya-lawene kawake kakene kege kogo one tene lutane maminame ue kogama poka. ⁶Nitoo kogama pome Saimone Pita mekata tugakale Pitayo okome nepa Ali Muno agomeke anu kawake kakene kege kogade toko-pe-kale okome ⁷i takakulepa opi wene toameke okoyake naniko wene toade toko-kale Pitayo okome ⁸nopa pa alino, kawake kakene kege kogamoano, kogamea wa okale okome neke kawake kakene kege kogamokolupa nipa nepa anu oyali toamoo-kale ⁹Saimone Pitayo okome Ali Muno nipa anu kawake odene kogameneya, yono wagokeka takake takoa ta-kale okome ¹⁰panago kege koomotokome one yapu pokomepa one kawake kakene kege odene wa koamedeko. Opi kiwi kege kogatapeneya mekiyake odene agodo abe kogameneya meko wa Yesuyo oka. ¹¹Nipa one wimotoa moa meatekago i wa wene toopikome tokome odenagodo kege kogameneya meko wa oka.

¹²Nitoapa Yesuyo one kotokoa pikana mamina wa moa kawa one mea nokana

walai waneke pome mepoka. Nitikome okome kini ina takakoulepa pine i wa wene tiki-pe. ¹³Kime nopa Tikisa ago wa oa Ali Muno wa oa tiki. Enipa oa epetekakili uku. Nopa edikane agono, nimini ekete iki. ¹⁴Nopa kini Ali Muno wa oa kini Tikisa ago wa oa tiki agomeke kini kawake kakene kege kogakouna. Nitikouna toa kini kinika kawake kakene kege ete oto wa kogakala tamene wane uku. ¹⁵Kinikile takakounapa nipa kinikile dikoa ete oto wa takakote toatikile adeka plane metekene tokouna. ¹⁶Nimini ukuno yakoe. Pupu agome-kiti one tobou ago oyake moa patukamele toamoko. Panagono agale aua yatekako agomeka one moa wetekako ago oyake moa patukamele toamoko. ¹⁷Ina okounakale opi wene taneya meki. Eni wene taneya mekete litia tokolipa Akolaliyo pewe witikale kolotine meoino, wedoa litia tamene wane uku. ¹⁸Enipa kiwi peyake ekene wamuku. Kipa anume takoane motokou-kiti kini tepene piki wene tetoane enoane tekene ni uku. Nipa Akolaline bokuke eya wa papete wia mekapienemo taatekoo tokolo ni uku. *Nopala opia mekome nee nakagomepa no ne wiuu wa kawa tapia witiko* wa wia mekapieneya. ¹⁹Enilepa wete taatekameneyake uku. Wa naniko taatekakale enekete ekete ina okana agalepa opi eni taatekakono, onepa i ago wa okana nimini akedeka wa wene toi. ²⁰Etene nimini ukuno yakoe. Anume moane wetekakolu nokago makutukoa moteketepa nipa nopala dekoa eni makutukoa motekete toi. No makutukoa moteketepa nipa no moa wetekakagopala dekoa makutukoa motekete toi wa Yesuyo oka.

Yudaseyo Yesu Mone Yenane Yonoke

Moa Piatekamo

(*Matiu 26:20-25, Make 14:17-21, Luke 22:21-23*)

²¹Yesuyo nimo ootokoa one wa ela mati tokale kakome okome etene nimini ukuno yakoe. Kiwi padame no mone yenane yonoke moa pioo wa okale ²²one oya-lawe kini kini enete tekete onepa teyo moa piatekoyake oko patu wa okoi. ²³Einata Yesuno oyali pade Yesuno kotomaneke lewikoa meka. Einagopa Yesuno kolotini ago. ²⁴Einagopa Saimone Pitayo lene lagatikamotokome okome enipa teeke oko-pe wa neme yakoa a wa okale ²⁵einago Yesuno kotomaneke lewikoa mekome okome Ali Muno neme teeke oko-pe-kale okome ²⁶i nee kugu moane okolo kagonoke uele pitikatekoane laweteku agopa einago eni wa ootokoa moa uele pitikatekoa Saimonane mana Yudase Isekariose ne na wa meteka. ²⁷Nitikale motokaka Setanu Yudaseke awinaneya. Nitikale Yesuyo okome neke toatekole wete ta wa oka. ²⁸Nitikalepa Yesu-pala walaike opia mekoi-kiti padameka inapa ike oka wa wene toamokoi. ²⁹Nipa Yudase kini kue ka ukoa yaka ago tokale kini toge kia noateko nee topo toa motokapa wa Yesuyo okoto patu. Ponopene yene auapea padeya-kiti mepa wa okoto patu wa wene pikoi. ³⁰Nitaneyake Yudaseyo eina nee kugu moa noomotokome wete wititapekome poka. Ta eina lia tagatapeneya.

Wenele Toatikimo

³¹Yudase pootokaneyake Yesuyo okome Ali Yatenane Oyago no wipitiane tukule enekete kei piatiki-pete opi toko-la. Ni Akolaline peku noane wipitiane tukule ali atoame enekete Akolalika kei pikala toi. ³²Enilepa

pa teleta tootapeneya meko Akolali patu kautakoane kakene tukupa nipa Akolaliyo one pa teleta tootapeneya meku peku noa ta wa no lawetademe toko. Enilepa opii toko. ³³Anu mati deya-kiti kipala me me tootokoane puku. Pokolupa kime no tuku toa kawa teko tokale wawei. Yu yene-pala okouna kipala opi lokoane uku. No poatekuka kiwi oyake namele toamoko. ³⁴Namele toamokoyake kini wenele toatiki totono weni oane metekuno, yakoe. Kiwike wene mekoane mekene tuku toa kini kinika edikoa wene mekanali yoma pamene. ³⁵Kini kini wene mekanali yoma pokoile eneketepa peyame no inakagono agale litima tikina wa wene toi.

Pitayo Yesu Akoa Wawatekamo

*(Matiu 26:31-35, Make
14:27-31, Luke 22:31-34)*

³⁶Saimone Pitayo Yesu-pala okome Ali Muno nepa manika poade oko-pe-kale okome no pukuka opi pade ne oyake litia noamoo. Nanikodopa oyake litia noade toko-kale okome ³⁷Ali Muno opi anume ne litiane toamuku wapa dekolo oko-pe. Neeke toane oyake tuadene uku-kale okome ³⁸nooke toapa nimini tuade oko-pe. Etene nimini ukuno yaka. Ali ogadame ka wameneka no wini agopa enamuku ago wa no tebolo-peta akoa wao wa Yesuyo oka.

Oneketai Mekota Ponadetepa One Yoto

Pitia Namene Wa Yesuyo Akenemo

14 Wene keda taneya meameamene. Akolalike wene tugoa meapa nookeka wene tugoa meamene. ²Agetaine yapukepa yapu luku peya mati piko. Nile toamokome too tokapa nipa yapu luku peya piamoko wane ou tokake nopa kiwi note meatikita

nodokakadene puku. ³No pone kini meatikita nodokakatekoanepa wakapeane nekene anu yapu noe wane enemonou. Nipa no mekouta nopala meatoane mou. ⁴No eni take poateku ka kime wene tiki wa Yesuyo okale ⁵Tomasiyo okome Ali Muno ne poke meateko taapa i wa totome wene toamokono, ne poateko ka totome edoa wene tomotoa-pe wa okale okome ⁶Agetaike poatiki kaapa no. Akolaline nimini pekupa no. Ali atoa mea kama pikilepa no patu-kama kautakoa kakete tiki. Agetaike ponadetepa padameka no koekoa ponamoino, no yoto pitia namene. ⁷Nodo wene tekete toi tokapa nipa Agetaika wene toi toka. Nitoi tokake opi titimoo Agetai wene toa one lene timini enoa tiki wa Yesuyo oka.

⁸Yesuyo nimo okale Pilipiyo okome Ali Muno neme Atai wa oko agopa yameano ta. Yametekalepa wene keaneya meoo-kale okome ⁹kipala kotona opiane yawane kakounake Pilipi neme no wene toameke oko-pe. Kime no eneketepa nipa Agetaika eni dekoa eneki. Neketai yamea ta wapa edekolo oko-pe. ¹⁰Nopa Agetai-pala lipuane meku. Agetaipa nopala lipua meko. I ukumopa no i agome nimini oko wa wene toamiki-pe. Kipala oane meteku agalepa anu weneme titiane wamuku. Agetai nopala lipua mekome onekele toma pokome oko toane uku. ¹¹Agetai nopala lipua meko. Nopa Agetai-pala lipuane meku. Eni ukupa no i agome nimini oko wa wene toati wane uku. Kipala i ukumo yakoaake no wene toameketeka Akolalilinele takama yakuleke nooke wene tugamene. ¹²Etene nimini ukuno, yakoe. Nooke wene tugoa meki-kitipa anume toma yakule-kiti kimeka toi. Nipa Agetai mekota pokolu tokome anu toma yakou toa moa patukoa padele padele tubele-kiti toma poi. ¹³Anu ibini

wedekoa kowitikoile-kama yakoane tou. Nipa agetai patu kautakoane kakene auapekolu tekete ali atoame kee wa one kei pimotoane tekene tou. ¹⁴Anu ibini wedekoa kowitikoile etene yakoane tou wa Yesuyo oka.

**Epetane Yomini Wini
Noo Wa Oa Pianemo**

¹⁵Yesuyo nimo ootokoa kakome okome kiwi nooke wene mekoa meketepa nipa anume tamene wane okoule-kiti yakoa toi. ¹⁶Nitikolipa kini kowitikakolu Agetaiyopa kiwi auapeateka Epetane Yomini kipala opia meemoa pomotoa wetekoo. Niminimo-kama oko Yominike uku. ¹⁷Itono peku noai tiki yename eni Yomini enamo wene toamo tekete oyake makutukoa moamele toamokolo pa meki. Nitikiyake anu oya-lawe kime eni Epetane Yomini wene tiki. Kipala opia yawa kiwike awinome mea tokolo tekete ni wene tiki. ¹⁸Kiwi egetiniya kamotoane tewitikoane poamou. Nitamekene kiwi oto wa enemonou. ¹⁹Nani keneya itono peku noai tiki yename anu lene timini wa enamatikiyake anu oya-lawe kime wa enoi. No meane kama pokolu tokome kiwika dikoa mea kama poi. ²⁰Kipala ina ukule taatekaka-petepa no inakago oneketai-pala lipua meko wa wene toa ni kiwi nopala lipua meko wa wene toa ni no inakago kipala lipua meko wa wene toa toi. ²¹Anume tamene wane uku toa yakoa toma poko agopa nooke wene mekoa meko ago eni. Nooke wene mekoa mekagokepa Agetai wene mekoa meoo. Noanuka einagoke wene mekoane meane anu pono yamekala tou wa Yesuyo oka.

²²Nimo okale Yudaseyo yatekome okome Ali Muno itono peku noai tiki yene katekoane kiwi odene pono yamenokala tou wapa edekolo oko-

pe wa oka. Einagopa Yudase Isekariose mena. ²³Yudaseyo enimo okale Yesuyo okome nooke wene mekoa meko agomepa anume oane meteku agale yakoa too. Nitikalepa Agetai einagoke wene mekoa meoo. Einagokepa Agetai tota note awia menoo. ²⁴Nooke wene mekoa meamiki yenamepa anume uku agale yakoa toamiki. Eni ukumo yatikinapa anu weneme titiane wamuku. No moa wetekakagome amene wa okamo-kama okala tuku. ²⁵Ina okounapa kipala pa opiane mekene ukuna. ²⁶Kiwi auapeateko agopa Agetaiyo moa wetekakilepa no patu kautakoa kakome auapemotoa wetekoo. Nitikale awinome mekomepa pademo pademo peya olaukoa ni kipala okouna peya i i wa wene taka taka too. ²⁷Tepe kolotini mataketikaneya meatiki peku lawetoane puku. Nipa no kilikoane meku toa kiwika kilikoa meamene wane puku. Kini kaua-mikitame pa itono peku lawetane toane lawetamukuno, wene keda taneya meamo piti wia mitapeamene. ²⁸Oto wakapeane noadeneke kiwi tewitikoane puku wane okolu kime yatekoina. Nitikoinano, kiwi nooke wene mekoa meadekolipa nipa no i ago one etene mekota pome kapademe oko wa wedia meoi. Nipa oneketai one moa patukoa ako odene meko ago mekota eni pome kapademe toko wa wedia meoi. ²⁹Kipala ina ukule-kiti wete taatekameneyake opi oane piku. Nipa taatekakale eneketepa enapa i tadeko wa nooke wedoa wene tugamotoane tekene ni uku. ³⁰Kipala ko okoane piamele toamokolo uku. Itono yopikago Setanu noademe nokolo tekene ni uku. Setanu einago nokoyake oneme no yopiatekole pade toamokolo uku. ³¹Eya waneka uku. Ta piko peya pitiki-kitame eya wa wene tomotou. No i ago oneketaike wene mekoa mekono, oneme tamene wa okole-kama toa togako wa wene tomo-

tou. Opi kamao ika tewitikoa patoane uku wa Yesuyo oka.

Yesu Onepa Gerepi Po Pine

15 Yesuyo eya wa pedoa okome oka. Etene gerepi po pinepa no. Agetai onepa gerepi po ipe talo toa lati lati tokago. ²Nooke agetamu toa tatia piko gerepi po yenene kũ tuamokolopa talo tokagome teia mitikakala toko. Tatia piko gerepi po yenene kũ tukolopa kũ wedoa tuma pomotoa tokome aeyo wia kakoya teia lati lati toko. ³Anume oane metekouna agalemepa kini tokoi poanelepa aeyo wia kakoya teia waou toa kogoia kiwi wete epetekaneia. ⁴Kipa nopala lipua mekolipa nopa kiwi-pala lipuane meou. Po yenedo pine-pala lipua meamokomepa nipa one weneme kũ tuamele toamoo. Kiwika dikoa nopala lipua meameketepa nipa kũ tuamele toamokale pa meoi. ⁵Gerepi po pinepa no. Kipa po yenene-kiti. Panago nopala lipua mekolo wa no onepala lipuane mekulupa nipa toneta liputakutukoa mekolo einago kũ wedoa tuma poo. No ete kamotoa wawa kini tutu wa meketepa kini weneme padeleka toamoi. ⁶Talo agome pa yenene teia yawe pitikakolo ala toa kau tootapeko. Nitikolo oboa pia toele pitikakolo toeme napetapeko. Nopala lipua meake wako ago-pala enakale too. ⁷Nopala lipua mea kiwi olaukakouna tepene moa mekoa tokolipa kini wene litia kowitikoile-kama Akolaliyo yakoa too. ⁸Kipa kũ wedoa tuou toa mea epetekakolipa ete-kitame no inakagono peku kime nakedikino, ke wa Agetai kei pikala toi. ⁹Agetai nooke wene mekoa meko toane kiwike wene mekoane meku. Kiwike wene mekoane mekene pawe toane talo toa memotoa tekete nopala lipua meamene. ¹⁰Agetaiyo ta wa oko toane takama yakilepa agetai nooke wene mekoa mekome pawe toa

talo toa memotoane tuku. Ena toa noanume tamene wane uku toa kime takama yaketepa nipa kiwike wene mekoane mekene pawe toane talo toane memotoa tekete toi. ¹¹Kipala i ukupa no wediane meku toa eni yano kakoa kiwi wedia mea kadukama pomotoane tekene ni uku. ¹²Eya tamene wane uku. Kiwike wene mekoane meku toa kini kini wene mekanali yoma pamene. ¹³Panago one oya-lawe wene wedoa mekoa mekomepa nipa one oya wateaneia kamotoa oneka wiamene wa ketekako. Eni wene mekoa mekome tokolepa padameka oyake moa patukamele toamoko. ¹⁴Anume tamene wane uku toa teketepa nipa anu oya-lawe kakete tiki. ¹⁵Opi titimoane kipa anu pupu yene wane wamuku. Pupu agomepa one pupu pinagonole takakilepa pinagono tepene piko wene tetao enamokome tokolo tekene ni uku. Opi kipa anu oya-lawe wane uku. Nipa Agetaiyo no peku laweteka toane kiwi lawetekouna tekene ni uku. ¹⁶Kipa kini weneme no takoa moa litikoina mena. Noanume kiwi takoane motokouna. Nipa kawa kawateko kũ wedoa tuma pomotoane tekene takoane motokouna. Kũ wedoa tuma pokolipa nipa anu ibini wedekoa kowitikoile-kama Agetaiyo yakoa too. ¹⁷Kipala ina okounapa kini kini wene mekanali yoma pamene wane ekene okouna.

Itono Peku Noai Tokoi-kitame Yesuno

Oya-lawe-pala Kotimi Yoa Meatekoimo

¹⁸Itono peku noai tiki-kitame kipala kotimi yoa meadekolipa nipa nopala namolo kotimi yoa mekoina toa tiki wa wene taneya meamene. ¹⁹Anu oya-lawe kime itono peku noai tekete toi tokapa eni yename kipa kini yagono-mikiti wa kiwike wene mekoa meoi toka.

Nitoui tokake kipa kini yagono-mikiti mena wa kotimi yoa meki. Nipa eni yene pa kamotoane wawane anu oyalawe kipa anu wane takoane motokouya tokome kipala kotimi yoa meki. ²⁰Nitikino, kipala papete eya wane okouna wene taneya meamene. Pupu agome-kiti one yopikago oyake moa patukamele toamoko wane okouna. Nipa pade ali atoame noodo tete meteketepa naniko kiwika dikoa tete mekala toi. Ni anu agaledo litia teketepa kini agaleka yakoa moi wane okouna. ²¹Kipa anu oyalawe tokale tekete kipala kotimi yoa mea tete mekala toi. Enipa no moa wetekakago wene toameneya mekete ni toi. ²²No none eni yene-pala ko wamou tokapa nipa i yename poanele tikilepa wene toamekete tokoino, nami wiane kibu moateku toa mena wane ou toka. Nitou tokake no none olaukakoumo yatekoiya tekete ae poanele tikilepa wene toamekete tokoo wa kini wa kei piamele toamoko. ²³Dikane yename nota kotimi yoa meketepa nipa Agetai-pala dekoa kotimi yoa meki. ²⁴Kiwi pakeke padame namolo toamokoinakale ele kule telekole toamou tokapa nipa kini poanele tikilepa wene toamekete tokoino, nami wiane kibu moateku toa mena wane ou toka. Nitou tokake ele kule telekole tokoule eneketeke Agetai tota-pala kotimi yoa meki. ²⁵Nipa *nopala kotimi yoa mekilepa pa puputua tiki* wa kini totono bokuke papete wia mekapiane toa taatekoa tiki. ²⁶Kiwi mama moa auapeateko Epetane Yomini Agetai-pala opia mea kako ago taatekoa nokome no ko oademe toko. Niminimokama oko Yominike uku. Eni Yomini anu oyalawe kiwike awinome memotoane wetekakolu Agetai mekata mea noo. ²⁷Anu oyalawe kimeka no ko oma poi. Nipa Akolalinele titiane takakounapete laigoa nopala opia yakoina tekete ni toi wa Yesuyo oka.

16 Yesuyo nimo ootokoa kakome okome kipala ina okounapa nooke wene tugo meake tewitikoa wakaya tokale okouna. ²Yu yename kini losu yapu-kiti oto wa noameamene wa kiwi wia litikala toi. Wa naniko kiwi wia tukaketepa kini Akolalinele takaku wa wene pia wia tukakala toi. ³Nipa Agetai tota wene toamekete tekete nitou. ⁴Eni toatekoile taatekoa tokoli eneketepa ena okana eni taatekako wa wene tomotoane tekene ni papete oane piku.

Epetane Yominiyo Tokomo

Akolalinele titiane takakounapete enimo wamokouna. Nipa kipala pa opiane meadene mekene tekene wamokouna. ⁵Papete wamokounake no moa wetekakago mekota wakapeane poateku tigotokolo tekene enimopa opi toaweane uku. Nitikuyake ne manika poade-pe wa padameka wamiki. ⁶Enimo ukulu yatekete kini wene keda mati taneya kaki. ⁷Nimini ukuno yakoe. Kiwi tewitikoane pikilepa kiwi auapeou wane tuku. Kiwido tewitikoane poamokolupa nipa kiwi mama moa auapeatekago noamoo. Kiwi tewitikoane pekenepa nipa kiwi mama moa auapeateko ago kiwike awinomotoane moane wetekou. ⁸Nitikolu nokomepa Epetane Yominiyo eya too. Itono peku noai tiki-kitame kini tikile epetekoa tokoo wa wene pikoinake poanele tekete tadeko wa wene tomotoa too. Ni kiyotokoa mekete toatekoleka ni Akolaliyo ali atoa takoa enatekoleka kime wene toko wa wene pikoinake wene toamekete tadeko wa wene tomotoa too. ⁹Nipa no Keraisuke wene tugamadete waketepa epetekoa tokoo wa wene pikoinake ae poanele tekete tadeko wa itono peku noai tiki yename wene tomotoa too. ¹⁰Ni no inakago wene kiyo wameneya meane

ago tetepo takakilepa paya wene pia tekete tadeko waka wene tomotoa too. Nipa Agetai mekata wa ate wakapeane pokolu tokome anu oya-lawe kime anu lene timini wa enanoi tokolo tokome nitoo. ¹¹Ni no koiso akoa eketepa epetekoa tokoo wa wene pikoinake Akolaliyo itono yopia mekago Setanuka koiso wete akoa okome tadeko wa itono peku noai tiki yename wene tomotoa too. ¹²Kipala pademo pademota oane meatekuyake opi kime oyake yakoa moamele toamoko. ¹³Niminimo-kama oko Epetane Yomini nokome niminimo-kama i i wa wene taka taka too. Nipa one weneme pademoka titia wameneya one yatekamo-kama toaweaa oo. Padele padele nani toatikileka i i wa toaweaa oo. ¹⁴Nitoapa no nakouna peku kime noa tomotoa tikilepa ali atoame no kei pimotoa tokome too. ¹⁵No nakouna peku kimeka noa tomotoa Epetane Yominiyo too wane okouna. Nipa Agetaiyo onekeya peya nekeno yopiamene wa one peku no lawetekale tekene ni okou wa Yesuyo oka.

Yesuno Oya-lawe Wene Keda Taneya Meake

Wedia Meatekoimo

¹⁶Yesuyo nimo ootokoa kakome okome one lene timini enamatiki tigotoko. Wa nani keneya one lene timini kime wa enoi wa okale ¹⁷one oya-lawe padeka-kiti kini kini yakaate tekete ekete one enamatiki tigotoko wa oa wa nani keneya one lene timini kime wa enoi wa oa toka. Oneketaike puku waka okanano, edemo wa okome okoto patu wa ootokoa ekete ¹⁸tigotoko wapa edemo wa okome oko patuno, totome wene toamoko wa okoi. ¹⁹One oya-laweme one pitia yakadete okoli Yesuyo enekome okome no enamatiki tigotoko wane oane wa nani keneya

anu lene timini kime wa enoi wane oane tokounapa edemo wane ekene uku patu wa kini kini yakate tekete ikino, ²⁰nimini ukuno yakoe. Kiwi komo ue uu keneya kaa okoa kamotoake ete yene wedia meoi. Nitikolika kiwi wene keda taneya meake wa naniko kolotine meoi. ²¹Atoame-kiti one mati pene opiademe welea mekome wene keda taneya meko. Nitoake naniko one mati opia pikomema mati opiane pikuno wene tokome wene yaapekale meoo. Nipa one namolo motokana tete wene kayapetapea wedia meoo. ²²Kiwi mekete tikileke mati kakene atoa adeka pikene uku. Opi wene keda taneya mekiyake wa kotuane enekolupa wene yaapekale kolotine meoi. Wene yaapekale eni mekoile padameka oyake kautoa agopa takamoi. ²³Kipala ina ukule taatekoa toka-petepa kime no padelekeka pitia yakatiki toa mena. Etene nimini ukuno yakoe. Anu ibini wedekoa kowitikoile-kama Agetaiyo yakoa too. ²⁴Papete padeya mano wa anu ibini wedekoa kowitikileka toamokoinano, opi titimoo padeya mano wa anu ibini wedekoa kowitikolipa Akolaliyo yakoa too. Wedia meatiki kotuke kakoa wedia meadetepa dikoa kowitikala tamene wa Yesuyo oka.

Itono Peku Noai Tiki-kiti Moane

Kawikatapeku Wa Yesuyo Akenemo

²⁵Yesuyo nimo ootokoa kakome okome ina okounapa pedoane agale-kama okounano, naniko pedoane agale teigoane wakenepa Agetai ko keleyo toaweane ou. ²⁶Enipetepa Agetai kowitikilepa anu ibini wedekoa kowitikala toi. Nitikolipa Atai kini kowitikile yakoa ta wane wamou. ²⁷Agetai kiwike wene mekoa mea tokome one weneme kini kowitikoile yakoa too. Nipa anu oya-lawe kiwi

nooke wene mekoa mea ni no i ago etene Akolali-pala opia-kama mea nekedeko wa kime wene toa tikili tokome kiwike wene mekoa meko. Nitikono, kini kowitikoile yakoa too.²⁸ Agetai mekata meane itonoke nokou. Opi itono tewitikoane Agetai mekota wakapeane puku wa Yesuyo oka.

²⁹ Yesuyo nimo okale one oyali-kitame ekete opi pedoa agale wamokono, enipa keleyo toaweaa oko.³⁰ Padeya padeya peya neme wene tootapekono, tone pitia yakatekomo ne wete yakamokoyake neke weneme toaweaa okono, nepa Akolali-pala opia-kama mea nekedeko-koli okome³¹ ina okounapa no i agome nimini oko wa nooke wene tugakete iki patuno,³² pade-kitame kiwi moa tadekakolipa no kidene kamotoa kini kini yapu yapu tadoo pootapeoi. Eni toatiki tigotoma noko. Kime no tewitikoa wakolika Agetai nota opia meoono, anu kidene kawamou.³³ Ina okouna oane pikilepa kiwi nopala lipua mekete kilikoa memotoane tekene okou. Itonoke meketepa ke enekakale mea tete-kala moma yawei. Nitatikiyake itono peku noai tiki-kiti noanume wete moane kautakouyano, piti moameneya atiki toa meamene wa Yesuyo oka.

Yesuyo One Oyali-kitane Kowitikanemo

17 Yesuyo nimo ootokoa tibuke atepea enekakome okome Atai enapetepa opino. Ne pa teleta tootapeneya meke peku lawetekale noane toane wipitiatekule ali atoame enekete no kei pimotono ta. Nipa ali atoamepa nepa dikane ago tadeko wa neka kei pimotono ta wane uku.² Atai, ali atoa peya nooke-kama lukoa memotoa teke no moa kakaka tokolo ni uku. Nipa neme takoa moa no metekanakeya peya noanu ne patu mea

kama pomotono ta wa no moa kakaka.³ Atai nepa nimini Akolali. Neke yagono ago pade kakileka toamoko. Neme moa wetekakago Yesu Keraisu no i kakene uku. Ali atoa mea kama pikilepa Atai tota wene taneya mekete tiki.⁴ Neke pa teleta tootapeneya meke peku lawetekale toane noane tekenepea nipa ali atoame nepa dikane ago tadeko wa ne kei pimotoane tekene tokou. Ni neke takatekoule i i wa neme yametekana toane peya takakene uku.⁵ Atai itono tibuta wete latiameneyake nepala opiane meane kakolu ne pa teleta tootapeneya meke peku lawetekale noane tokouna. Opi ne patu kautakoane kakene enakale wa toane meouno ta.

⁶ Itono peku noai tiki-kiti katekoa wawa neme takoa moa no metekana ali-kiti-pala neke ibini i wane toaweane okou. I ali-kitipa nekeke neme no moa metekale neke agale yakoa litikoi.⁷ Yakoa litikete tekete opi eya wa wene tiki. Neme no lawetekana peku peya neeke-kama titiadeko wa wene tiki.⁸ Neme no mane oa olaukakana toane i ali-kiti-pala i i wane toaweane okolu yakoa motokoi. Nitoapa no nepala opiane meane kawane nekedeku wa wene toa ni nemepa no moa wetekadeko waka wene toa tiki.⁹ I ali-kitane kowitikakene uku. Nipa neme takoa moa no metekana ali-kitane kowitikakene uku. I ali-kitipa neke tokolo ni uku. Nitikuyake pa itono peku noai tiki yenane kowitikakene wamuku.¹⁰ Anukuya-kama neke. Nekeya-kama anu. Anu peku lawetekulu i ali-kitame noa tikilepa ete ali atoame no kei pimotoa tiki.¹¹ Opi i ali-kiti itonoke pa mekete kamotoane tewitikoane neeke nuku. Atai nepa epetanele-kama tokagono, neme takoa moa no metekana yene neke ibini kautakoa kawa kamotono, pawe toa talo toa kamene. Nipa toneta odene wene piitikoa mekete

toko toa anu oya-laweka edikoa odene wene piitikoa memotono ta. ¹²Neme takoa moa no metekana oya-lawe-pala opiane yakenepa neke ibini kautakoa kawa kamotoane talo toane mekou. Eni yene talo toma nekenepa atuatega odene katekaku. Enipa neke bokuke padame papete wia mekapiane toa taatekamotoa einago katea poka.

¹³Opi neeke nuku. Anu oyali-kitipa no wediane meku toa kotuke kakoa wedia memotoane tekene itonoke pa mekenepa imo toaweane uku.

¹⁴Neme oa metekana agalepa anu oya-lawe-pala toaweane akakou. Nitikouyake itono peku noai tiki-kitame i yenepa kini yagono-mikiti mena wa kotimi yoa meki. Nipa noanume itono peku noane toamuku toa anu oya-mikitameka noa toamikili tekete kipala kotimi yoa meki. ¹⁵Nitikili tekene anu oya-lawene kowitikakilepa itonoke meaneya moa a tibuke kakoano ta wane kowitikamukuno, Setanuyo toa potokademe tokale pawe toa talo tamene wane ni kowitikaku.

¹⁶Noanupa itono peku noane toamuku toa anu oya-mikitameka noa toamiki.

¹⁷Neke agalepa nimini pekuno, anu oya-mikitipa takoa moano ta. Nipa neke nimini peku laweteke nitoano ta.

¹⁸Atai nekele takamotoane itonoke moa wetekakana toanepa anu oya-laweme neke agale oa pupitikakamotoane moane wetekakou. ¹⁹Anu oya-mikiti auapeadenepa Atai nekele-kama takou wane ne patu kautakoane kaku. Nipa anu oya-mikitame neke nimini peku noa nekele-kama takama pomotoane tekene tuku.

Yesuyo Ali Atoa Peyane Kowitikanemo

²⁰Anu oyali-kitane odene kowitikakene wamuku. Anu oya-mikitame neke agale oa mema pokoli yakoa moa

nooke wene tugakoi peyane kowitikakene uku. ²¹Eni yene peya odene wene-kama piitikoa memotono ta. Atai toneta liputakutukoa meko toa eni yene peya tota-pala lipua memotamene. Nipa itono peku noai tiki-kitame no inakago neme moa wetekadeko wa wene tomotono nitamene. ²²Ne pa teleta tootapeneya meke peku lawetekana toane anu oya-mikiti lawetekala tokou. Nipa toneta odene wene piitakutukoa meko toa kini kinika odene wene piitakutukoa memotoane tekene tokou. ²³Edikoa mekolipa nipa nopa kipala lipuane mekou nepa nopala lipua meoo. Anu oya-mikiti kini kini odene wene piitakutukoa meatiki kotuke kakoa memotono ta. Nitoa mekoile enekete itono peku noai tiki-kitame eya wa wene toi. Neme no inakago moa wetekadeko wa wene toa ni ne nooke wedoa wene mekoa meko toane anu oya-lawekeka wene mekoane meku waka wene toi.

²⁴Atai neme takoa moa no metekana-kitipa no wida none meatekuta nopala opia memotoane uku. Itono tibuta wete latiameneyake ne nooke wene mekoa mea teke neke peku lawetekana. Eni peku noane pa teleta tootapeneya meane tokouna toane wida wa meane tokolu anu oya-mikitame enemotoane uku. ²⁵Atai nepa wene kiyo akeneya-kama meko. Itono peku noai tiki-kitame nepa dikane ago wa wene toamikiyake noanume wene tuku. Anu i oya-lawemepa ne dikane agome no moa wetekadekonon wenepa tiki. ²⁶Ne ko i i wane anu i oyali-kiti-pala toaweane okala tokou. Nitikouno, wa toaweane oma pou. Enipa ne nooke wene mekoa meko toa anu oya-mikiti kini kini wene mekanali yoma pomotoane tekene tou. Nipa nopa kipala lipuane meadene tou wa Yesuyo Akolali-pala oka.

Yesu Dekoa Motanemo

(*Matiu 26:47-56, Make 14:43-50, Luke 22:47-53*)

18 Yesuyo Akolali-pala einaka einamo oomotokome pome one oya-lawe-pala Kiderone wa ibini akene ue ketoa poka. Ketoa pome one oyali-kiti-pala yomo olipe ipeke mepoka. ²Yesupa one oya-lawe-pala eni ipeke lugutukoa koukoa mepokale tokome one wiateka oi pedoa pianago Yudaseyo kini eni pokoita wene taneya. ³Eni wene tokome Yudase eida nikilepa poyo ali-kiti-palaka tobou losu yapu talo tane ali-kiti-palaka koua noka. Nipa Akolalike lodo yotokoai tane tobou ali-kitameka Parisi ali-kitameka moa wetekaneyake nokoi. Neketepa peti tole labota udukoa kikutua lama eya-pala aua nidikoa nokoi. ⁴Nitaneyake Yesuyopa onepala toatekoile peya wene toopianeya tokome eni yene kotua pokome yatekome okome te tuku toniki-pe-kale ekete ⁵Nasarese Yesu wa okoli okome ni agopa no toko-la wa oka. Eni nokoi yene pakeke Yesu wimotoa moa meatekago Yudase oneka kaka. ⁶Yesuyopa ni agopa no toko-la wa okaka e yene kutu witimotekete itono aua pitakolokakoi. ⁷Nitikoli Yesuyo wa lokoa yatekome okome te tuku toniki-pe-kale ekete Nasarese Yesu-koli okome ⁸ni agopa no toko-la wane okounano, kime no dekoa moadete tuku tonadekolipa nipa anu oyali-kiti pa pomotono toe wa oka. ⁹Eni okapa Atai neme moa no metekana yene peya talo toane odeneka katekakile toamuku wa papete oa pikana toa taatekamotoa ni oka.

¹⁰Saimone Pitayo one kepete tue lu-aneya kakome padago wiou wa witi-moa kagome nimini yono lono kapidi pine takoa pitikaka. Einagopa ako odene mekome Akolalike lodo yotokoai tane

tobou agono pupu ago. Einago one ibinipa Malakasi. ¹¹Einagono kapidi pine takoa pitikakale Yesuyo Pita-pala okome neke kepete tue wa ete lua. Agetaiyo no noatekou ue mete keneke mekoa metekilepa no tete moatekolu toka. Eni tete edoane momotoa wamoko-pe wa Yesuyo oka.

Yesu Anasi Mekata Aua Nekenemo

¹²Poyo yeneka kini tobou agoka tobou losu yapu talo tane ali-kitika enika eni yene peyame Yesu dekoa moa yonotake kapa po kakamotekete ¹³Anasi mekata namolo takoa aua pokoi. Anasi onepa Kayapasine natonane etene. Eni malikepa einago Kayapasi ako odene tobou ago mekome Akolalike lodo yotokoai taneya. ¹⁴Kayapasi einagome Yesu tu-atekamo ete Yu yene-pala papete oa pikome okome ali atoa peyake ode-nagodo tukalepa nipa epetoo wa akene ago.

Pitayo Yesu Wakenemo

(*Matiu 26:69-70, Make 14:66-68, Luke 22:55-57*)

¹⁵Eya agota Saimone Pita-pala Yesuno pade oyagotapa Yesu aua pokoika litima nokoi. Ako odene mekome Akolalike lodo yotokoai tane tobou agomepa Pita-pala opia noka ago wene tokale tokome einagome Yesu koua ako tobou agono yapu pomale pome mepoka. ¹⁶Nitikalepa Pita akolono kago keteponoke pa nepia kaka. Nepia kakalepa ako tobou agome wene tane ago akolono pokome kago ketepono yopia kaka atoa-pala agale ootokoa Pita enemoa yapu keneke aua noka. ¹⁷Nitikale eina kago yopia kaka atoame Pita-pala okome neka einagono oyali-pe-kale Pitayo okome e'e mena wa oka.

¹⁸Niti tokale tokome tobou losu yapu talo tane ali-kitameka poyo yenameka totoi moa koukoa toe yokoa kakete kini

yono toe yame yame toa kakoi. Nitikoita Pitaka niti paletoa kaka.

Anasiyo Yesu Pitia Yakanemo

(*Matiu 26:59-66, Make
14:55-64, Luke 22:66-71*)

¹⁹ Ako odene mekome Akolalike lodo yotokoai tane tobou agome Yesu one oya ali-kitikeka one olaukanemo-kitikeka pitia yakoai tokale ²⁰ Yesuyo okome ali atoane lene makono-kama kakenepa olaukakala tokou. Nipa sinokoke losu yapu-kitikeka Yu yene peyame oboai tiki tobou losukeka kakene olaukakala tokou. Nitoanepa pademoka paigakoane wamokouna. ²¹ Nitikounano, no edekolo pitia yateko-pe. Anu agale yatekoina yename anu olaukakouna wene tekete tikino, eni yene pitia yaka wa oka. ²² Yesuyo nimo okaka one kakaya liti kaka poyago padame Yesu yoname witikome okome tobou ago-pala widikoa wamea wa kikoa okale ²³ okome oane potokadekolupa anu oane potokakoumo i wa a-na. Oane potokameneya nimini akedekolupa no edekale witikato-pe wa oka. ²⁴ Nitikalepa Anasiyo i ago Yesu ako tobou ago Kayapasike aua poe wa one poyo ali-kitike moa metekale kapa po pa kakeneya aua pokoi.

Pitayo Winago Wene Toamuku Wa

Yesu Akoa Wakala Tanemo

(*Matiu 26:71-75, Make
14:69-72, Luke 22:58-62*)

²⁵ Pita one yono toe poto yame yame toa kakaka padame yatekome okome neka einakagono oyali-pe wa okoli okome e'e, no mena wa oka. ²⁶ Nitaneyake ako odene mekome Akolalike lodo yotokoai tane tobou agono pupu ago pade Pitayo kapidi pine takoa pitikane agono wamenago einagome

Pita enekome okome nepa einakagopala ena ipe kakale enekouno, nimini ukutu-pe-kale ²⁷ Pitayo wa lokoa mena wa okaka eina eina ali ogada ka oa kaka.

Pailaseyo Yesu Pitia Yakanemo

(*Matiu 27:1-2, 11-14, Make
15:1-5, Luke 23:1-5*)

²⁸ Yu yename Kayapasine yapu tewitikoia pote kini ta talo toa meane ago Pailasene yapu Yesu-pala aua pokoi. Nipa likonu witia pokoi. Nitoapa edelo ago patukane wa ibini akene toge nee noadete mekete tekete mone Lomane tobou agono yapu poamadete wakoi. Nipa kini kekanele tekete toge nee noamokaya tokale mone yatene agono yapu poamadete wakoi. ²⁹ Nitikolipa Pailase eni Yu yene kakoita akolono pokome okome edeya namike i ago koiso akoa iki-pe-kale ekete ³⁰ i agopa poane ago toamoo tokapa nipa ne kakota aua noamoo toka-koli ³¹ Pailaseyo okome kini totono piko toa kini pitia yakoatino, aua poe-kale ekete toto Yu yename ali pade oyake pitia yateketeka wia tukamelepa toamoko wa okoi. ³² Nimo ikilepa Yesuyo one tukene toatekoule i wa oa pika taatekamotoa tokoi.

³³ Nitikoli Pailase one yapu keneke wakapea pokome Yesu ne noo wa kayo oa motokome okome nepa Yu yene peya lukoa meki tobou ago-pe wa yatekale okome ³⁴ winimopa neke weneme titia yateke oko-pe. Ete-kitame no ko okoimo yakoa teke pitia yateko-pe-kale ³⁵ Pailaseyo okome nopa Yu ago wene pike oko-pe. Beita, neke Yu yenameka Akolalike lodo yotokoai tiki tobou ali-kitameka ne dekoa moa nooke aua nikino, neme edele tokake tikiti-pe-kale okome ³⁶ noanume itono talo tukuya mena. Noanumedo itono talo tekene tou tokapa Yu yename no dekoa moamomotoa tekete anu

oya-laweme poi kamotokoi toka. Nitoi tokake pade ta talo tukuya tokolo poi kamotokamiki-kale ³⁷ Pailaseyo okome nipa nepa ako tobou ago wa eke oko-pe-kale okome nopa ako tobou ago wa neme wini okona. Nopa ako tobou ago memotoa ni opianeya. Ni nimini peku lawetadene tekene itonoke opiane mati latitapeane nokou. Nimini peku noai tiki-kitame anu agale yakoa motiki wa okale Pailaseyo okome ³⁸ nimini peku wapa edemo wa eke okoto patu. Pailaseyo Yesu-pala nimo ootokoapa Yu yene kakoita akolono wakapea pokome okome i agopa one wiane tukatekule pade piameadekono, ³⁹ eya wane uku. Malike-kama edelo ago patukane wa ibini akene toge kikoi-pete kini totono litiane po yapu pitane ago pade po kotokoane wetekakala tukuna. Opi kiwi Yu yenane ako tobou ago po kotokoane wetekamotoa iki-pe wa Pailaseyo okale ⁴⁰ e Yu yename ete wa kayo telo ekete ekete winago menano, Barabasi moa wetekaka-ye wa kayo okoi. Barabasi einagopa poi kamotokane ago.

19 Nitaneyake Pailaseyopa i ago po wapime wiamene wa one poyo ali-kiti Yesu moa meteka. ² Metekale one poyo yename kagani kakene po ludu moa makatikoa one wago lobutukakoa ni kikome kiane mamina petene moa kakoa tokoi. ³ Nitoapa one kakata nekete ekete Yu yenane ako tobou ago nepa kawa kamene-ye wa one kabunu kugutukoa wikala tokoi.

⁴ Nititikaneyake Pailase Yu yene oboa kakoita akolono wa wakapea pokome okome i agopa wiane tukatekule piameadekolo tekene kiwi kakita oto auane nukuno, enoe wa oka. ⁵ Nitikale Yesu one wago kagani kakene po makai lobutukaneya kawa ni kikome kiane mamina petene kawa taneya akolono witoa noka. Nitikale Pailaseyo e Yu yene-pala okome einakago ino, enoe wa

oka. ⁶ Yesu eida nome kakale enekete Akolalike lodo yotokoai tane tobou alikitameka tobou losu yapu talo tane alikitameka kayo ekete ekete winago yomo lekaneyake wia dekaka-ye wia dekaka-ye wa kayo okala toa kakoi. Nitikoli Pailaseyo okome one wiane tukatekule piamokono, kini moa yomo lekaneyake wia dekapoe wa okale ⁷ e Yu yename ekete i agopa Akolaline mana kaku wa oka. Nimo ikilepa toto Yu yenane totono paya tetepo takakome tokano, tone eni totono litiapa dikane ago wia tukamedeko wa Pailase-pala okoi.

⁸ Nimo okoli yatekome Pailase pitime tuane matiyame ⁹ wa wakapea yapu keneke Yesu kakata nokome okome ne manika kawa noka-pe-kale Yesuyo agale wametekoa pa kaka. ¹⁰ Nitoa kakale Pailase okome ne po kotokoane wetekamele toko. Ni yomo lekaneyake wia dekamotoane moane meamele toko. Nepala eni toateku wene toameke teke agale wametekako-pe wa okale okome ¹¹ Akolaliyodo neme enile tomotoa wamokalepa neme nopala padeleka toatekale toamoo. Nikepa wia tukakamotoa no neeke moa wetekakago Kayapasi one eni poanele tokoleme neke i poanele tokole moa patukako wa Yesuyo oka. ¹² Nimo okale yakatekoapa Pailaseyo i agopa po kotokoane wetekamedekuno, edoane tuku patu wa wene kibusukoa meka. Nitikale e Yu yename kayo ekete ekete nemedo winago po kotokoa wetekakepa nepa Ali Muno Sisane oyali toamoko. Ako tobou ago meku wa okagopa Sisa luku tobou ago kawou wa okome oko. Nimo okagopa agopa Sisa-pala poi teiane ago tadeko wa okoi. ¹³ Nimo okoli yakatekoa Pailaseyo Yesu akolono aua pokomepa koiso yopikome meateka walaike witipitoa meka. One eni pome mekatapa kue yaupea tatianeya piko poma wa ibini ikiya.

Iberu agalekepa eni pomapa Gabasa wa ikiya. ¹⁴Einapetepa edelo ago patukane wa ibini akene toge podolikama kiadete nodokoa meane-pete. Nitane-pete lou matai pene teteponademe tokaka Pailaseyo e Yu yene-pala okome kiwi Yu yenane ako tobou ago ino enoe wa okale ¹⁵kayo ekete ekete winago aua pa. Yomo lekaneyake wia dekaokoano, witika-ye wa kayo okala tokoi. Nitikoli Pailaseyo okome kini ako tobou ago yomo lekaneyake wiane dekaokamotoa iki-pe-kale Akolalike lodo yotokoai tane tobou ali-kitame ekete tone ako tobou agopa Sisa odene. Winago mena-koli ¹⁶yatekome Pailaseyo Yesu yomo lekaneyake wia dekaokamotoa moa meteka.

**Yesu Yomo Lekaneyake
Wia Dekanemo**

*(Matiu 27:32-44, Make
15:21-32, Luke 23:26-43)*

Nitikale poyo yename Yesu dekoa moa aua pokoli ¹⁷Yesuyo one lekane yomo moa aulogoa ali tobou wa ibini akene take poka. Eni ta ibini Iberu agaleke eketepa Gologosa wa ikiya. ¹⁸Eidapa Yesu yomo lekaneyake wia dekaoketepa pade alitaka eka okata yomo padetake wia dekaokakala tokoi. ¹⁹Nititikaneyake yomo lekaneya munoke dekaoketepa pipia Pailaseyo eya wa wia mekaneya. I ago Nasarese Yesupa Yu yenane ako tobou ago wa wia mekaneya. ²⁰Nipa Iberu agaleke Latine agaleke Geriki agalekeka eina odenemo-kama wia mekaneya. Yesu wia dekanetapa Yerusalem ta liti plane ta tokome ali atoa peyame eina-gale enema ponokala tokoi. ²¹Nitikoli enekete Akolalike lodo yotokoai tane tobou ali-kitame Pailase-pala ekete i agopa Yu yenane ako tobou ago wa neme wia mekamikinakeya. Eya wa wia mekoano ta. I agome okome onepa Yu yenane ako tobou ago kaku wa oka wa wia mekoano

ta-koli okome ²²eni wiane mekaokouna pa taneya kamota wa oka.

²³E poyo ali-kitame Yesu yomo lekaneyake wia dekaoketepa kakete one kakeneya-kiti moa kini-mene kakoi toa tuyonome tatite toa kakoi. Nipa one mamina pade petene mati ete pimotoka tokoi. Eni mamina petenepa lipukile toameneya pa odene petene mati. ²⁴Odene petene mati tokome poyo ali-meneme oote-mene tekete ekete i mamina petene pilite toamatono, tadu toa enatow wa okoi. Nipa eya wa papete wia mekapiane toa taatekakoi.

Anu kakuya-kiti moa tatite toa anu mamina petenepa tadu toa moa tokoi wa panagome wia mekapianeya.

Eina wia mekapiane toa poyo ali-meneme taatekoka tokoi.

²⁵Yesu wia dekaneya kaka yomo liti one nine eida kaka. One ninane wame-natoka Kelopasine natono Maria ni Magadala Mariatoka eida kakoi. ²⁶One kolotini oyago one nine kakaya liti kakale enekome Yesuyo nine-pala okome anuy-atoa neke mana wini wa oa ²⁷ni one oyali-pala okome nekaua wini wa oa toka. Nimo oka-pete titimoa one oyagome einatoka-pala one yapu aua pome mekoa talo toa meka.

Yesu Tukome Tuanemo

*(Matiu 27:45-56, Make
15:33-41, Luke 23:44-49)*

²⁸Yesuyo nimo ootokoapa padele padele one toatekule toane peya takaku wa wene tokome eya toka. Akolaline bokuke oneke wia mekapiane toa taatekamotoka tokome okome ue nodome tuku wa oka. ²⁹Eidapa mete pade kou tane gerepi po ku ue kapetaneya pianeya tokome pade ali-meneme ue takamoatekoi obi wane moa eni gerepi po ku uele tadamo yomo isope luduke kakamo one kabunuke udakoka lawetekoi. ³⁰Nitikoli

Yesuyo mitumotokome okome opa anu toatekule toane peya takaku wa ootokoa one kabe waliketikakome one yomini takoa pomotoa tukome tuka.

Yesuno Modono Lamame Lagotanemo

³¹Einapetepa edelo ago patukane wa ibini akene toge kiadete nodokoa meane-pete Yu yename Pailase mekata pekete ekete eni wia dekan ali-menane kawa pedoa tukoa yomo lekaneyake kitapea momotono ta wa akeneya. Nipa podolikama ko mea pupu toamatekoi-pete ibini akene ta pataka-pete tokome einago-mene yomo lekaneyake pa dekaneya kakoli enekaya kekatekoa ni akeneya. ³²Nitaneyake Pailaseyo moa wetekane poyo ali-mene neketepa Yesu-pala odeneka wia dekan alitane kawata pedekaneya. ³³Nitoapa Yesu wia dekaneya kakata pekete enekoli one wete tuadekale enekete one kawata pedekamokoi. ³⁴Pedekamekete poyo ago padame one lama moa Yesuno modono lagotoka. Nitikaka eina eina kamate ueta odeneka ponoka. ³⁵(Enile tokale enekagomepa one eni enekana toaweaa oka. One toaweaa okamo einapa nimini uku wa einagome wene taneya meko. Kiwika Yesuke wene tugamotoa tokome ni oko.) ³⁶Enika enile tikilepa Akolaline bokuke papete eya wa wia mekapiane toa taatekamotoa taneya. *I toaweane uku agopa one tono odeneka pedekamoi wa wia mekapianeya.* ³⁷Enilekepa Akolaline bokuke eya waka wia mekaneya piko. *Kini lamame wia lagotokoinakagopa nepikoa piei.*

Yesuno Tigini Moa Kota Keneke Pipanemo

*(Matiu 27:57-61, Make
15:42-47, Luke 23:50-56)*

³⁸Nitaneyake Arimasias take meane ago Yosepe einago Pailase mekata

pokome Yesuno tigini mou ta wa kowitipaneya. Eni Yosepepa Yesuno agale litikomeke ete Yu yene piti moa mekome tokome Yesu litiku wa toaweaa wameneya. Einago Yosepeyo Yesuno tigini mou ta wa kowitikale Pailaseyo nipa mopa wa yametekale pokome toa moa aua pekeneya. ³⁹Nitoa aua pokaka Nikodimasi koua pekeneya. Einagopa ta lianeya keneke Yesu enepane ago. Einagome Yesuno tigini kalono takatekaya de yomota mire alouta page-pala aua pekeneya. Nipa keda tube mati taneya padeka kapidi kakoa (30) kilo moa aua pekeneya. ⁴⁰Nitoa pekete einagotame ake tane mamina yagalogo kakete Yesuno tigini toa moa pianeya. Nitoapa eina kalono taneyata pekoa yotokoa ewetooa togotaneya. Nipa Yu yename tanele taneya. ⁴¹Yesu wia dekaneya kakeneka yamanu pade pianeya. Eidapa tuane ali atoa pi ai toatekoi kota pene kokapianeyake tuane ago odeneka wete pipameneya. ⁴²Ko mea pupu toamatekoi nodokoa meane-pete tokome Yosepe Nikodimasitame ekete kitau oono, Yesuno tigini wete pipata wa eni kotake moa pipaneya. Nipa one wia dekaneya liti plane kota tokome taneya.

Yesu Tuaneyake Moa Kamotokanemo

*(Matiu 28:1-8, Make
16:1-8, Luke 24:1-12)*

20 Egeme ta pa lianeya keneke Magadala Maria Yesuno tigini pipane kotake nekeneya. Nokome enekale kota kabunu ketekalogane kue petene ete koketekoa piadekale ²enemotokome wa wakapea eyagota Pita-pala Yesuno kolotini oyagota mekoita teyapea pokome okome tone Ali Munono tigini kota keneke pianeta pade-kitame moa aua pekete tokoi. One aua pote pipokoika toto agopa toko wa Mariayo opoka. ³Ni-

tikale Pita-pala Yesuno pade oyagota Yesu plane kotake teyapea pokoi. ⁴⁻⁵Nittoa teyapeata pekete padena agome Pita moa patukoa namolo kakoa pome kota kabunuke kakome watekoa eneka. Enekale Yesuno tigini togotane ake tane pue pa pikale enekomeke kota keneke tuapea poamoka. ⁶Nitaneyake Pita one naniko nome kota keneke wete tuapea pokome enekale ena ake tane pue eneka. ⁷Wago togotane pueka eneka. Enekale tigini togotane pue-pala odeneka piameneya eko keneya ewetaneya pikale eneka. ⁸Nititikaneyake kotake namolo kakoa nome kakagoka tuapea pome enekome ipa Yesu kamoa pokome tadeko wa wene toka. ⁹Nipa ipa Akolaline bokuke wia mekapiane toa taatekoa tokome tadeko wa einagotame wete wene toamokoiyake toka. ¹⁰Nitooapa Yesuno oyagota kini yapu waka-pea pokoi.

**Yesuyo Magadala Maria
Pono Yametanemo**

(Matiu 28:9-10, Make 16:9-11)

¹¹Nitikakoa Maria ako lono kota kabunu liti pa kakome komo oa watekoa enekale ¹²edelo ago takuta ake tane pue kakeneya mekoli enaneya. Nipa panago Yesuno wago plane luku mea padena ago one kawata plane luku mea tokoli enaneya. ¹³Enoa kakale edelo agotame Maria-pala eketu anuyatoa ne komo edekolo oko-pe-koli okome pade-kitame anu Ali Muno moa pekediki. Nitadikiyake one moa pote pipokoika agopa tokolo komo oane kaku wa ootokoa ¹⁴peketapekome enekale Yesu kakale enaneya. Enekile tokomeke Yesu kakono wene toameneya. ¹⁵Nitikale Yesuyo okome anuyatoa ne komo edekolo oko-pe. Te tuku toko-pe wa okale einatoame i agopa yamanu tokago wa wene pikome okome anuyali nemedo Yesu moa

padeka pipadekalepa one moa pikatapa i wa oano ta. One tigini mopouno, yamea ta-kale ¹⁶Yesuyo okome Maria wa okale peketapekome Labonai wa akeneya. Nipa Iberu agaleke akeneya. Labonai wapa Tikisago wa okome akeneya. ¹⁷Nimo okale Yesuyo okome Agetai mekota wete atepeane poamukuno, adekoa tebekoa kakono, wa. Nitamoano, anu wamene-mikiti mekita eya wa akapoano pa. Agetai kiniketai mekota atepeane wakapeane puku. Anu Akolalike kini Akolalike ate wakapeane puku wa akapoano pa wa oa wetekaneya. ¹⁸Nitikale Maria Yesuno oya-mikiti mekoita pokome okome Ali Muno enoane nuku wa ootokoa kakome okome i ukumopa Yesuyo no enekome okamo uku wa oka.

**Yesuyo One Oya-mikiti
Pono Yametanemo**

*(Matiu 28:16-20, Make
16:14-18. Luke 24:36-49)*

¹⁹Eina ta pataka-pete egeme ta lianeya keneke Yesuno oyali-kitame ete Yu yene piti motaneya mekete tekete odene yapu keneke kago loko tooketikoa odeneya oboa mekoi. Nitoo mekoika Yesu kiwi pakeke nome kakome okome kilikaketikoa meamene wa ootokoa ²⁰one modono one yono tatonotaka enoe wa yameteke. Nitikale one oya-laweme kini Ali Muno enekete kolotini naka matiyame wedia mekoi. ²¹Wedia mekoli Yesuyo wa lokoa okome okome kilikaketikoa meamene. Agetaiyo onekele takamotoa no moa wetekaka toane noanume kiwi dikoa Akolaline agale oa pupitkakamene wane wetekaku wa oka. ²²Nimo ootokoa one oyali-kiti mekoi patu poome pukapekome okome Epetane Yomini kiwike awinome memotoane tuku. ²³Nitikuno, ali atoa padekapa kini poanele tokoike Akolaliyo po

letu mekakana keetapemotoane uku wa kime takoa okolipa nipa po letu keetapekale nami kawameneya meoi. Wa ali atoa padekapa kini poanele tokoike Akolaliyo po letu mekakana keemotoane wamuku wa kime takoa okolipa po letu keamokale nami kakanyeya meoi wa Yesuyo oka.

Yesuyo Tomasi-pala Akenemo

²⁴ Yesu one oyali-kiti pakeke eni nokalepa one oyago pade Tomasi katekoa meamoka. Einago one pade ibinipa Didimasi. Didimasi wapa wamene-pala odeneka opiane ago wa ekete ikiya. ²⁵ Einago naniko nokale o ali-kitame ekete tone Ali Muno enekoo-koli okome one yono tatonoke pitime wianeta kodo enamoane eni lukuke yono pitikamoane lama lagotane lukukeka yono pitikamoane tokouya tekene Ali Muno kamotadeko wane wamou. Eniledo tekene pa kamotadeko wane ou wa Tomasiyo oka.

²⁶ Wa ta pataka tatono kakoa (7) ponotekaneyake eina toa Yesuno oyali-kiti eni yapu keneke odeneya oboa mekoi. Nipetepa Tomasika eni pakeke meka. Nitoa kago loko tooketikoa mekolika Yesu one oyali-kiti pakeke nome kakome okome kilikaketikoa meamene wa ootokoa kakome ²⁷ Tomasi-pala okome neke kadapi yono i pia anu yono tatono enoa ta. Anu modonokeka neke yono pitikoa ena. Nipa poome toameneya nooke wene tugo meamene wa okale okome ²⁸ nipa nepa anu Ali Muno, nepa anu Akolali wa okale ²⁹ Yesuyo okome Tomasi neme no i eneke teke no i ago kamotadeko wa wini oko. Anu lene timini enameketeke no einago tuake wa kamotadeko wa nooke wene tugo mekoi-kitipa etene wedia meoi wa Yesuyo oka.

³⁰ Yesuyo one oyali-kiti kakakoa padele padele telekole toma

pokanakamo peya i bokuke wiane mekamele toamokolo padele-kiti tokamo katekoane wiane mekamuku. ³¹ Nipa i boku wiane mekakilepa Yesu onepa Keraisu wa papete ibini oa plane agono, onepa Akolaline Mana tadeko wa kime wene tomotoane tekene tuku. Nika one ibini patu kautakoa kakete mea kama pomotoane tekene tuku.

Yesu Taibriase Ue Mine Nokome Tanemo

21 Naniko Yesu Taibriase ue mine matanu one oyali-kiti mekoita nokome pono wa yameteka. Nipa enile taneya. ² Eya ali-kiti Saimone Pita ni wamene-pala odeneka opiane ago Tomasi ni Galili ta keneke plane Kena take ago Nataniele ni Sebedine manata ni Yesuno oyali padeta eida odeneya oboa mekoi. ³ Eida mekome Saimone Pitayo o yene-pala okome nopa mou tagi topada wa okale ekete nipa pato wa ue dipike peapeteko pote mea ue muke mou tagi topokoi. Nitoapa padeyaka moameneya pa tagi toa ta patakakoi. ⁴ Nitikolipa ta pene patakaka Yesu ue mine matanuke nome kakalepa one oyali-kitame yuku agopa Yesu wa wene toamokoi. ⁵ Nitikoli Yesuyo kayo okome okome anu oya-mikiti mou pade motokoi-pe wa okale ekete e'e, mena wa okoli okome ⁶ kini tagi ka moa nimini yono lono moa pitikoa enoe wa okale eina okana lono moa pitikakoi. Nitoapa mou kedame wa oto lia moamele toameneya.

⁷ Enile tokalepa Yesuno kolotini agome Pita-pala okome ipa Ali Muno wa oka. Ipa Ali Muno wa okale yatekome Saimone Pita one mamina-mene kotokoa pianeya tokome one tokoo kawateka mamina wa moa kawa uele tigapitaka. ⁸ Nitikale o yename ue dipike mea tagi ka moume kapetaneya lia aua matanuke nokoi.

Nipa ue mine matanu ete keneya (90 mita) pimotoa ue dipike mea pekete uele pitikapokoi tagi ka lia aua nokoi. ⁹Nitoo matanuke katepitoa kakete enekoli palawe wane-kiti mou yomo-kitika toe totoike yotaneya pikale enekoi. ¹⁰Nitikoli Yesuyo one oyali-kiti-pala okome kini tagi toa motokoi mou pade-mene takoa aua noe wa okale ¹¹Saimone Pita ue dipike pome kakome tagi ka tube moume kapea pitaneya lia aua matanuke noka. Eni mou oi moapa ege tebolo-peta kadukoa (153) mou utadeka. Mou kainya matiyame kapetaneyake tagi ka piliameneya. ¹²Nitaneyake Yesuyo kiwi-pala okome nee nonoe wa okale peyame ne te-pe wa yakamene piti moa kakoi. Nipa i agopa Ali Muno wa wene tekete ne te-pe wa yakamokoi. ¹³Nitikoli Yesu toele nee pikata pokome palawe wane-kiti moa tatikoa mouka moa tatikoa toka. ¹⁴Nipa Yesu tukale moa kamotokatekaneyake one oyali-kiti pono tebolo takoa yametekilepa enile tokome toka.

Yesuyo Pita-pala Akenemo

¹⁵Nee nootokoa mekoli Yesuyo Saimone Pita-pala okome Yonene mana Saimone i yene nooke wene mekoa meki toa neme moa patukoa nooke wedoa wene mekoa meko-pe wa yateka. Nitikale okome Ali Muno neeke wene mekoane mekuno neme wene toko-kale okome nipa anu sipi sipi kai tine-kiti egetekamene wa Yesuyo oka. ¹⁶Nitoo wa lokakome okome Yonene mana Saimone ne nooke wene mekoa meko-pe wa okale okome Ali Muno no neeke wene mekoane mekuno neme wene toko wa okale Yesuyo okome anu sipi sipi kai-kiti egetekamene wa oka. ¹⁷Nitooapa tebolo takakome okome Yonene mana Saimone ne nooke wene

mekoa meko-pe wa yateka. Yesuyopa ne nooke wene mekoa meko-pe wa tebolo takakome okamoke Pita wene keda taneya kakome okome Ali Muno neme pademo pademo peya wene tootapekono, neeke wene mekoane mekuno weneka toko-kale okome anu sipi sipi kai-kiti egetekamene. ¹⁸Nimini ukuno yakamene. Ne tuali mekepa neke matio moa kaamotekepa neke wene ponoka toa yakala toka. Nitikala tokoyake ne ada mekepa neke yonota lido ootapea kakale panagome lutua tau toologoo. Nititikoapa ne poamateka lono moa aua poo wa Yesuyo oka. ¹⁹Eni okapa ali atoame Akolali kei pimotoa tokome Pita tukome toatekaleke okome oka. Nimo ootokoa kakome okome no litima namene wa oka. ²⁰Yesuyo nimo okale Pita peketapekome enekale Yesuno kolotini agome litima nokale eneka. Einagopa Yesuno ete oyali-kiti-pala opia nee noa mekome Yesuke ete lewikakome okome Ali Muno ne wimotoa moa meatekago te-pe wa yatekanakago. ²¹Einago enekomepa Pitayo Yesu yatekome okome i ago-palapa edele toko patu wa okale ²²Yesuyo okome wakapeane nokoluka i agodo pa mea kamotou wane wene toopikolupa neke pupu menano, no litima namene wa Yesuyo oka. ²³Yesuyo nimo okamokepa one agale yakoa motane yene pitikoika eya wa oa pupitikaneya. Einagopa tuamoo wa oa pupitikaneya. Yesuyo nimo pade wa wamokake taneya. Eya wa oka. Wakapeane nokoluka i agodo pa mea kamotou wane wene toopikolupa neke pupu mena wa Yesuyo Pita-pala oka.

²⁴Einago Yesuno oyagome enika enimo peya i i wa t̄awea oa i bokuke koukoa wia mekoa toka. One eni t̄awea okamopa nininimo-kama akedekono wene totome toko.

Wipitia Wia Mekanemo

²⁵Yesuyo padele padeleta toma
yakamo peyado bokuke wia mekaketepa

boku peya mati wia mekama poo.
Nitikolopa eni boku-kitame itono edea
takatapeono wene piku wa i boku wia
mekakago no i mekene uku.

APOSELO

Aposelo Ali-kitame

Yesunole Takama Yakete Tanemo

1 Anu oyali Tiopilasi, Yesuyo titikome tane-pala wipitikome taneta ni titikome olaukane-pala wipitikome olaukaneta i i wane neke namolo bokuke kabe koukoane wiane mekakakou. ²Nipa Akolaliyo a tibu pene ate moa aua poameneyake Epetane Yomini patu kautakoa kakomepa one takoa motane Aposelo ali-kiti tamene wa oa tanemoka wiane mekatapekou. ³Yesuyo tete-kala mootokoa tukale moa kamotokatekaneyake one tuake kamotadeko wa one Aposelo ali-kitame wene tomotoa tokome ele kule toa pono yametekala taneya. Nipa ta pataka padeka noi kakoa (40) ponoka toapa Akolaliyo ali atoa pawe toa talo toko ko-pala oa mekala taneya. ⁴⁻⁵Wa padepete one oya-lawe-pala opia mekome nee noa mekome okome Yerusaleme ta tewitikoa poameamene. Agetaiyo kiwi auapeou wa okanakale taatekoa tomotoa eida nepia meamene. Yoneyopa ali atoa pa ue motokama yakoyake Agetaiyopa one Epetane Yomini kiwike awinomotoa moa wetekoo. Kiwike noo wane oane pikolu yatekoina ago awinoateko tigotokono, Yerusaleme tewitikoa poameneya eida nepia meamene wa akeneya.

Yesu A Tibuke Moa Aua Pekenemo

⁶Wa naniko odeneya koukoa mekete one yatekete ekete Ali Muno tone takepa mone yene yopinaneyano, i taapa pine yene tone yopiatono, mone yene neme litia wetekoa eni luku Yu yene totome yopimono wene piko-pe wa yatekoli

okome ⁷padele padele witateko oipa Agetaiyo one wene litia oi pedoa pikala toko. One eni pedoa piko toa kime oyake wene toamiki. ⁸Eni wene toamikiyake Epetane Yomini kiwike awinome meoo. Nitikalepa one tele patu kautakoa kakete eya toma yawei. Anume toma yawei-oule kime enekoinapa ta piko peyake oa pupitikama yawei. Nipa Yerusaleme Yudea Sameria yeka yukuka takeka nitoi wa Yesuyo akeneya. ⁹Nimo okalepa o yename enekakoa Yesu a tibuke moa aua pekeneya. Nipa enekoa kakoli we-dome agopa takaneya.

¹⁰Nitaneyake a tibuke nepikoa pikoli ali takuta ake tane mamina kakeneya kiwi kakoiya liti kotikatapea note kananeya. ¹¹Nitikete ekete kiwi Galili yene a tibu dekolo pa nepikoa piki-pe. Ina Yesupa ate tibu moa aua pokanakago tibuke pokana toa dikoa wakapea nokale enoi wa edelo agotame akeneya.

Yudase Luku Mataiasa Takoa Kakanemo

¹²Nitaneyake Yesuno oya-lawe Olipe-pini tono keti toa Yerusaleme take wakapea pekeneya. Olipe-pini tono Yerusaleme tata pake odene (1) kilomita pianeya. ¹³Yesuno oya-mikiti Yerusaleme take eni peketepa ako yapu kini oboai tane yapu pote mepaneya. Eidapa eya ali-kiti oboa meaneya. Pita Yoneta mea ni Yame Aderuta mea ni Pilipi Tomasita mea ni Batolomiu Matiuta mea ni Alepiasine mana Yame mea ni Saimone one pade ibini Selote wa ibini akene ago mea ni Yamene mana Yudase mea taneya. ¹⁴Eni ali peya lugutukoa odeneya oboa mekete Akolali kowitikala taneya. Nipa Yesuno nine Maria ni pade atoa-kiti ni Yesuno wamene-mikiti eni yene-pala koukoa mekete kowitikala taneya.

¹⁵Einapetepa eni yene ege takupeta kadukoa wa lene kolo kakoa (120) ali atoa koukoa mekoita kini lene makono Pita kamokoa kakome okome ¹⁶anukameyo kipala ukumo yakamene. Papete Epetane Yominiyo wene takakale Depidiyopa Yudaseyo toatekamo Akolaline bokuke wia mekapianeya. Yesu wimotoa moa metekanakagoke uku. Einago Yudaseke papete wia mekapiane toa taatekamedekale taatekoka toka. ¹⁷Yudase einagopa Yesuyo onekele takamotoa takoa motokale toto-pala opia yakona wa Pitayo akeneya.

¹⁸(Yudasepa one toka poaneleke kue mootokoapa itono pade topo toa motaneya. Nitoapa aka mati kawa pitakale tepe kolotini tookolokaneya. ¹⁹Eni tanemo Yerusaleme take mekoi peyame yakatapeneya tokome eni itonopa Akeledama wa ibini akeneya. Akeledama wapa lokeyo itono wa ekeke akeneya.)

²⁰Enilekepa Pitayo okome okome lo akene bokuke eya wa wia mekaneya piko.

*Einagono itonopa tumu tokaneya
pimotono, odenagoka eida
meamomotono toe wa wia
mekapianeya.*

Eya waka wia mekapianeya.

*Einago pupu luku panagome tomatato wa
wia mekapianeya.*

²¹Eni wia mekapiane toa taatekoka taneyano, einago luku eya ago moa kakato. Ali Muno Yesu toto-pala opia yaka toa-kama kagekama yakanakago pade takoa moa kakato. ²²Nipa Yoneyo ali atoa ue motokama yakale laigoa toto-pala opia yawa ni Akolaliyo Yesu tibuke ate aua pokaleka pa kagekama yawa tokanakago pade Yudase luku moa kakatoane uku. Yesu tukale Akolaliyo moa kamotokakale enekoonakamopa dikane

ago pade toto-pala yakome oma pomotoane tekene ni uku wa Pitayo akeneya.

²³Nitikale nitato toe wa ootokoa ali takutane ibini takoa akeneya. Panagopa Yosepe, Basabasi waka ibini akeneya. One pade ibinipa Yasasi. Padena agopa Mataiasi. ²⁴Einagotane ibini takoa oa Akolali kowitikete ekete Ali Muno ali peyane tepene wene pikolepa neme lekoka enamele tokono, neme takoa motokagopa i wa totome wene tomatono ta. ²⁵Yudase one poatekata poademepa Aposelo ago mea Yesunole takoake wakanano, one luku panagome Yesunole takakome memotoono, neme mainago takoa motoko-pe wa kowitoka kakeneya. ²⁶Nitoapa einagono ibini moadete gutu lua kea mea Mataiasine ibini i tadeko wa enoa einago moa kakaneya. Nipa ali tuku melepu kakoa (11) ali-kitipa Aposelo ali-kiti wa akene toa einagoka Aposelo ali wa akeneya.

Epetane Yomini Ali Atoake Awinameno

2 Pedikose wa ibini akene ta patakalepa Yesuno oya-mikiti peya odeneka oboa meaneya. ²Nitikoika a tibuke pupulege mati uu oa kawa nekene tetepo tootapekome eni yene odeneya koukoa mekoi yapu lobutua tagatapeneya. ³Nitikale eni yene ete oto enete tokoli toe itipono keneya kini kini tobouke tete tete toa pitakolokakale enaneya. ⁴Epetane Yomini kiwike awia tagatapekome wene taka taka tokale ta padeka padeka yakoa akene agale-kitike pademo pademo oa kakala taneya.

⁵Einata einapete ta piko peyake mea Akolalilinele wedoa takama yakene Yu yene Yerusaleme take toge kikoa mekoika note oboa meaneya. ⁶Eni uu okamo yatekete eni Yu yene eida eni uu okata obomoa pote kapaneya. Pote kakete yatekole Yesuno oya-mikitame e yene kini kini take mekete yakoa

akene agale-kitike Akolalinemo oa kakoli yatekete wene kainya pianeya kakeneya. ⁷Nitoe ka oa kakete ekete i yene peyapa pa Galili yenameke ikino, ⁸tone tone ta-kitike mekete yakoa oko agale-kitikepa okala tikili totome yateko. Edoa wene toa iki patu. ⁹Totopa eya ta-kitike kawa nokoya wa kini kini ta ibini takoa okala taneya. Pasia ni Midia ni Ilame ni Mesopotemia ni Yudea ni Kapadosia ni Podase ni Esia ¹⁰⁻¹¹ni Perisia ni Pabilia ni Idipi ni Sairini ta liti piko Libia ni Lome enika eni ta kawa nokoo. Toto padeka-kiti etene Yu yene mea ni padeka-kiti namolo pa yateneke Yu yene-pala lipua mea tokoo. Ni toto padeka-kiti Keriti Arebia tata kawa noko. Totopa ta piko peyake tutu tutu wa kawa noko. Opi tone yakoa oko agale-kitike i yename Akolaliyo tubele toma pokomo i i wa mo wia kakili totome yateko. ¹²Nitoe wene kainya pianeya kakete kini kini yakaate tekete ekete opi-la, edele toatekolo iki-pe wa ka oa kakeneya. ¹³Nitikolipa padeka-kitame tea agale kikoa ekete beita ipa gerepi po ku ue noa pia tekete leau oa kakete iki wa akeneya.

Pitayo Mo Wia Kakome Akenemo

¹⁴E yename enimo okoli Pita one tuku melepu kakoa (11) oya-mikiti-pala kamokoa kakome telo okome okome no yatene Yu ali-kiti ni i Yerusaleme take pitiki peya kime yatekimopa pine toaweane ukuno, wedoa yakoe. ¹⁵Totome gerepi po ku ue nokoa pia tekete leau oa kaki wa kime ikino, opi lou pini 9 kilokoepa totome gerepi po ku ue sisoake edoa moa nokoa pimotoa-pe. ¹⁶Totome pade nitamokoo. Ipa eya ago Yoeleyo papete oa plane toa taatekoa toko. Eya wa oa pianeya.

¹⁷No Akolaliyopa wipitia ta patateka tigotokale toatekoumo ukuno yakoe.

Ali atoa peyake anu Epetane Yomini moane wetekakolu kini tepene lobutua tagatapeoo. Nitikalepa kini mana kono-mikitamepa anu agale toaweaa akoi. Kini tuali-kitamepa pulete keneya padele padele yametekoule enoi. Kini ada yatename pule pitikoita pule enekala toi. ¹⁸Enipete-menepa anu Epetane Yomini anu pupu yeneke moane wetekakolu ali-kitikeka atoa-kitikeka awia tagatapekale anu agale oa pupitikakama poi. ¹⁹A tibukepa ele kule tubele witakoane itonokepa padele padele telekole witakoane tekene anu tele pine yametekala tou. Nitikolupa kamate yokoa kawa toe nokoa kawa lodome eya kuya peya agopa takoa too. ²⁰Ni lou moa yomiyomu takatapeoo. Tokeneka kamate pagene tetepo taneya kawoo. Nipa Ali Muno pa teleta tootapeneya noateka tigotokale enika enile too. ²¹Nitikalepa Ali Muno wa-ye wa kowitikoi peya Akolaliyo toa moo wa Yoeleyo wia mekaneya.

²²Pitayo nimo ootokoa okome Iserere yene kipala i ukumo yakoe. Kiwi pakeke ele kule telekole toma yakanakago Nasarese Yesuke uku. Einagome Akolaline peku noa tadeko wa kime wene tomotoa tokome Akolali patu kautakoa kakome enika enile toma yakana. ²³Akolaliyo papete wene toopiane toa taatekoa tekete Iserere yene kime one-pala eya tokoina. Poane peku nakene yename yomo lekaneyake wia dekaamotoa moa metekoina. ²⁴Nitikoinake Akolaliyo moa kamotokaka. Nipa wakome labakaneya kawou toa Yesu tuane ali atoa tete mokoa kaki take pome mepaneyake Akolaliyo toa motoka. Eida labaneya kamele toamokale tokome toka. ²⁵Enilekepa Depidiyo

Akolaline bokuke papete eya wa wia mekapianeya.

Ali Muno Akolalipa anu lene timini takakoane pikou lono-kama kakale enekou. Anu nimini yono lono kakome no yopikolo tokome padelemeka no toa potokamele toamoko. ²⁶ Nitikono, kolotini nakolo wediane meane ke wane uku. Nipa tukile toatekuyake Akolaliyo toatekole nepiane meane wediane mekene uku. ²⁷ Tuane ali atoa pote meki take anu yomini mea kamotoa neme wawamoo tokolo tekene ni uku. Nipa nekele-kama takamotoa takoa motokago noanu tigi-ni lomumotoa wawamoo. ²⁸ Pa meane kama poateku kaapa i wa neme no wete yamepikana. Nopala odenekata opia yakilepa nipa wediane meane tagamotoa teke too wa Depidiyo papete wia mekapianeya.

²⁹ Pitayo nimo ootokoa okome anukameyo tone kaua Depidi-loeke eya wane ukuno, yakoe. Einago tua pokale oloyo taneya. One oloyo tane lukupa tone take pa pia kakeneya. ³⁰ Einagomepa Akolaliyo toatekamo papete toawe wia mekapikala taneya. Nitane ago-pala Akolaliyo eya wa akeneya. Neeke tawateka ago pade ne luku ako odene mekome ali atoa pawe toa talo toa kawoo wa oa togotaneya. Akolaliyo nitoo wa Depidiyo wene tokome eya taneya. ³¹ Akolaliyo toatekale papete enepikomepa Keraisu moa kamotokatekamoke eya wa wia mekapianeya. *Einagopa tua pekene ali atoa pitikoika mea kamotoa Akolaliyo wawamoka. One tigini lomumotoa wawamokome moa kamotokaka wa Depidiyo wia mekapianeya. Nipa enile wete tane tetepo takoa wia mekapianeya.* ³² Eni wia mekapiane toa Akolaliyo taatekakomepa ina Yesu wete moa kamotokaka. Enipa toto peyame leneme enekoomo uku.

³³ Einagopa Akolaline nimini yono lono ate moa kakaneya kakome opi eya toka. Oneketaiyo one Epetane Yomini ne meou wa papete oa togotopikana toa taatekoa metekale moapa one Epetane Yomini toto mea tagatapeka. Nitikale tone tepene lobutua tagatapekolo tokome totome imo oa ika ile tokolo kime yakoa enoa tiki. ³⁴⁻³⁵ Depidi-loe a tibuke wete poameneyake eya wa akeneya.

Ali Muno Akolaliyo anu Ali Muno-pala eya wa oka. Nepala poi teja meki yenepa moane kawikoane neke kawane koma pikouno, anu nimini yono lono nooke menamene wa oka wa Depidiyo wia mekapianeya.

³⁶ Iserele yene kiwi peya-pala eya wane ukuno, yakoa moe wane uku. Ina Yesu kime lekane yomoke wia dekokoinapa Akolaliyo moa Ali Muno wa oa Keraisu wa oa kakaka wa Pitayo akeneya.

³⁷ Pitayo nimo okale yatekete e Yu yene tepe tebemo tebemo toa kak-eneya. Nitoapa Pita-pala ete Aposelo alikiti-palaka ekete ame-loe poanele eni tekete tadeko. Tone toatekole agopa tokono, edele tomotoa iki-pe wa okoli okome ³⁸ kini poanele toma yakoinake Akolaliyo po letu mekakanapa keetapea poanele wia mitikakamotono, kini poanele tewitikoia Yesu Keraisu patu kautakoa kakete ue moamene. Nitikolipa Akolaliyo one Epetane Yomini metekale kiwike awinoo. ³⁹ Akolaliyo one Epetane Yomini meou wa papete oa togotokomepa kiwika kini mana kono-mikitika ta tetemada pitikoi yeneka metekene meou wa oa pianeya. Nipa tone Ali Muno Akolaliyo one takoa moa kayo oateko yene peya one Epetane Yomini meademe oko wa Pitayo e Yu yene-pala akeneya. ⁴⁰ Nitoapa e yene mama motokome pademo pademo okome okome i take poane peku lawe-

tane yenepa kini poanele toma yakoike Akolaliyo kibu moonoo, eni poanele tokoi yene-pala odeneka dekoa kibu motokaya tokolo pilia wawati wa Pitayo pubu oa kakeneya. ⁴¹Enika enimo oa kakale ali atoa kainya matiyame yakoa moa ue motaneya. Nipa eina ta pataka-pete ege egeta kadukoa (3,000) ali atoa tadiya Yesuno yatene-pala lipuaneya.

Yesuno Peku Nakene-kiti Mekete Tanemo

⁴²Eni yenamepa Aposelo ali-kitame olaukane toa litima pekete odene wene piitiko koukoa mekala taneya. Nitoapa palawe wane popimoo moke toa noa Akolali kowitoo tokala taneya. ⁴³Aposelo ali-kitame telekole toma yakoile enekete peyame ka oa kakete ekete Yesuno tele patu kautakoo kakete tadiki wa okala taneya. ⁴⁴Yesunomo yakoa motokoi peyapa odeneya koukoa mea kinikiya ete oto wa tatikamu taneya. ⁴⁵Nipa kini oya-lawe padeya toamokale enekete kini itono eya topo toa kue moa moke toa mekala taneya. ⁴⁶Nitima pekete ta pataka abuna tobou losu yapuke obopokala taneya. Nitimotekete kini yapu-kiti obopekete palawe wane popimoo moke toa nokala taneya. Nipa kolotini nakale odene wene-kama pianeya mekete taneya. ⁴⁷Nitoo mea Akolali kei pia kakoli enekete ete peyame ke ke wa kiwi pewe wiiai taneya. Nitikakoo Ali Munoyo ta pataka abuna ali atoa toa moma pokomepa one yatene-pala moa lipukoai taneya.

Kawata Lepo Taneya Meane Ago Epetekanemo

3 Wa pade-pete lou wegoukaka (lou pini 3 kilokoke) Pita Yoneta tobou losu yapu pekeneya. Nipa Yu yene tobou losu yapu pote kowitooi tane-pete pekeneya. ²Nitoata pekete

enekoli kawata lepo taneya opiane agopa one oya ali-mename tobou losu yapu kago ludu mekadete leyo leyo toa aua ponokoli enaneya. Ta pataka abuna koniyo kago wa ibini akene kagoke tua-pea tobou losu yapu ponokoi yenaneke kue oia mokala tomotoo eida aua pote mekoai taneya. ³Eina mekoai taneta Pita Yoneta tobou losu yapu lobutadete tokoli enekome einagome kue mano wa okale ⁴Pita Yonetame einago nepikakete Pitayo okome tota nepikamene wa okale ⁵padeya mouno wene pikome nepikaneya. ⁶Nitikale Pitayo okome silepa kue golo kueka toamokoyake padeledo ne auapeane touno, ⁷Nasarese Yesu Keraisu patu kautakoane kakene ukuno, kamokoo pa wa ootokoo one nimini yono moa katekamotokale eina eina one kawata one kawa lamenetaka tele tootapeka. ⁸Nitikale tigoa kamokoo kakome opi yamele toko wa yakeneya. Nitoo Pita Yoneta-pala tobou losu yapu opia pome Akolali kei pia tigawineya pekeneya. ⁹⁻¹⁰Nitima pokale enekete peyame ekete ekee i agopa tobou losu yapu koniyo kagoke-kama mekome kue oia mekanakagono, ke ke wa one-pala tokanakaleke ka oa kakeneya.

Pita Tobou Losu Yapu Kakome Akenemo

¹¹Pita Yonetame latekakoinak-agomepa einagota yono mokoo kakaka ali atoa wapokamoo pote unukamoo kakeneya. Nipa Solomonoo wa yomini kayo oa ibini akene lono ka akeneya teyapea pote kakeneya. ¹²Nitikoli enekome Pitayo e yene-pala okome Iserere yene anu oya-lawe edekolo wene kainya pianeya kakete tota lene wikoo kaki-pe. Totame Akolalilinele wedoo takama yakete tekete i agopa tone teleme kamotokakoono wene pikete tiki-pe. Tone teleme pade latekamele toamokoyake ¹³Akolaliyo latekaneya.

Nipa one patu-kama kautakoa kako ago Yesupa ali atoame kei pimotoa tokome taneya. Tone kaua-mene Eberame Yekobeta Aisake toa yopikoa kako Akolalike uku. Eni Yesupa Pailaseyo pitia yakakamotoa kime aua pote mepokoina. Nitikoli pitia yakatekoa i ago po kotokoane wetekou wa okake Yu yene kini Yesu tumotono wene pikete wakoina. ¹⁴Nipa Akolaliyo one wa takoa moa kakapikago Yesu wene kiyō akeneya-kama mekago eni wakoina. Nitoapa ali-kiti wia tukakala tane ago Barabasi po kotokoa wetekaka-ye wa okoina. ¹⁵Nitoapa ali atoa poome mekoa wene takoa latikagopa kime wia tukakoli tua pokanake Akolaliyo moa kamotokakale kamoā poka. Enipa Yone totame enekoomo uku. ¹⁶Ina kawata lepo taneya mekanakago kime i enoa wene tiki agopa Yesuno ibinike wene tunganeya tokome weye akatapeneya. Nipa Yesuno ibini wedekoa one patu kautakoa kakete latekatapeneya kime eni enekina.

¹⁷Ame-loe Yesu einakago wia tukakoinapa kimeka kini tobou ali-kitameka wene toamekete tokoinano wene tekene uku. ¹⁸Einapa Akolaliyo wene takane toa one agale toaweā akane ali-kitamepa Keraisyuo tete moa tuatekamo papete wia mekapikala taneyano, kime Yesu wia tukakilepa Akolaliyo papete wene toopiane toa taatekakete tadiki. ¹⁹Nipa kini toma yakoi poanele Akolaliyo moa kogamotono, kini namolo poane wene wia wawe. ²⁰Nitikolipa Ali Munoyo kiwi weye akoa pewe wia too. Nitoapa kiwi auapeou wa one takoa moa kakapikanakago eina Yesu wa lokoa oto wetekoo. ²¹Nitatekoyake papete Keraisu a tibuke nepia meo. Nipa Akolaliyo one agale papete toaweā akane ali-kiti wene takakana toa taatekakome one namolo latikanakeya

peya weneya latimotoa Keraisu a tibuke nepia meo. ²²Moseseyo einago Keraisuke papete eya wa oa pianeya. *Kini Ali Muno Akolaliyo one agale toaweane akamotoa no moa kakakana toa naniko kini wamene ago pade one agale toaweā akamotoa moa kakoo. Nitoono, einago taatekoa nokome toe wa okale-kama tamene.* ²³One nokome oka toa yakoa moamokagopa Akolaliyo one yatene pakeke katekoa atukoo wa Moseseyo oa pianeya wa Pitayo e Yu yene pubu okome akeneya. ²⁴Nimo ootokoa kakome okome totome ipete taatekoa toatekoomopa eya ago Samueleyoka toaweā oa pianeya. One eina toaweā oa plane toa Akolaline agale toaweā akane ali peya lokama nekete akeneya. ²⁵Kini papete toaweā akapianele ni Akolaliyo kiwi yatene auapeou wa kini kaua-mikiti-pala papete oa togotaneleka kime pikoa kakete opi taatekakolo enoa yakoa tiki. Enipa Eberame *neeke tāmōa pokoi ali atoake tekene e ku yatene ta piko peyake tāmā pote mekoika talo toane pewe wioū* wa Akolaliyo Eberame-pala oa togotopiane toa taatekoa tokoleke uku. ²⁶Akolaliyo papete oa togotopikana toa taatekakomepa onekele-kama takama pokago kiwike namolo takoa moa wetekakana. Nipa kini toma yaki poanele tewitikoa wawe wa kiwi pewe wia kamotoa moa wetekakana wa Pitayo akeneya.

Pita Yoneta Kanosolo Ali-kitane Leneke

Kakete Akenemo

4 Pita Yonetame e Yu yene-pala pa ko oa kakoika Akolalike lodo yotokoai tane ali-kitika tobou losu yapu talo tane yene yopikagoka Sadusi yeneka einagota kakoita nekeneya. ²Nipa Yesu tua pokome wa kamoā pokale tokome

ali atoaka tua potepa wa kamoā poi wa einagotame olaukanemoke kotimi yoa tekete nekeneya. ³Nitoa einagota dekoa motekete ekete opi ta wete likono, kini koiso podolio akato wa po yapu pitikapaneya. ⁴Nitaneyake einagotame okoimo yakane yene peya matiyame kini okoimo yakoa motaneya. Nitaneyake Yesunomo wete yakoa motane yene-pala eni yene kibutukoa oi moapa ali-kama takoa oi motokoli ege egeta wakala kadukoa (5,000) kakedekoi.

⁵Podolikama Akolalike lodo yotokoai tane ako tobou ali-kiti Kanosolo ali-kiti Yu yenane totono pine tōa olaukane ali-kiti enika eni ali peya Yerusaleme take odeneka koukoa meaneya. ⁶Ako odene mekome Akolalike lodo yotokoai tane tobou ago Anasika one wamene-mikitika Kaiapasika Yone Alesadataka eida koukoa meaneya. ⁷Eni yename Pita Yoneta kini lene yoto moa kakoa pitia yatekete ekete kitame abela tokoinakalepa tene tele patu kautakoa kakete tokoiya-mo. Tene ibini wedekoa epetekakoiya-mo wa okoli ⁸Pita one tepene Epetane Yomini lobutua tagatapeneya kakome okome tobou ali-kiti Kanosolo ali-kiti kipala i ukumo yakoe. ⁹Kawata lepo taneya mekanakagopa Yone totame auapea epetekakooa edoa epetekakoiya-mo wa kime tota pitia yatekino, ¹⁰kipalaka Iserlele yene peya-palaka eya wane ukuno, yakamene. Kime yomo lekaneyake wia dekakoli tuaneyake Akolaliyo moa kamotokane ago Yesu Keraisuno ibini wedekaneya tokome i ago kini leneke latekatapeneya kako. ¹¹Yesu einagokepa Akolaline bokuke eya wa wia mekaneya pikono, yakoe.

I yomopa poadeko wa yapu wiane yene kime paya tetepo takoa wakeneyake panagome i yomopa yapu pigi wa moa wianeya wa wia mekaneya piko.

¹²Ta piko peya pitiki ali atoa toa motokagopa einago odene. Pade lokoaka mena. Kiwi toa momotoa one ibini wedekoa oatiki agopa einago odene wa Akolaliyo one ibinipa Yesu wa akeneya wa Pitayo akeneya.

¹³Nimo okale yatekete e yene oote tekete ekete i agotapa pa agotano, mane mane pine pitia yakoa luamene agotameke piti toamokolo kakete imopa i ikino, einakago Yesu-pala opia yakoi agota tadeko wa akeneya. ¹⁴Nitoapa einagotame latekane ago kita-pala opia kakale enekete tekete pademoka ete topo takoa wameneya. ¹⁵Nitoapa einagota Kanosolo yapu meaneya moa akolono wetekatekoa pedoa pikete ekete ¹⁶i agota-pala edele tato patu. Padele telekole ina tokoi. Ae, kini ina tokoimopa Yerusaleme take pitiki peyame yakatapekete tikino, kauatiyake oyake kauamele toamokono, ¹⁷eya tato. Kini ina tokoinakamo ta peyake oa pupitikaya tokolo einakago Yesuno ibini patu kautakoa kakete odene agoka wa pade olaukameamene wa ato wa oa tukaneya.

¹⁸Nitoapa oto noe wa Pita Yoneta kayo oa motekete ekete einakagono ibini patu kautakoa kakete pademoka wa pade olaukoa wameamene-koli ¹⁹Pita Yonetame ekete Akolaline leneke kawapa totame edele tomotoa iki-pe. Kini wene litia tomotoa iki-pe. Akolaline wene litia tomotoa iki-pe. Kini takoa oe-na. ²⁰Totame pade tone leneme enoa kaleme yakoa tokoomo kauameneya tōawea oo wa akeneya. ²¹Nitikoli Kanosolo ali-kitame einagota wa kikoa ootokoapa poe wa wetekaneya. Nipa edele toa kibu moo wa wene kibutua mekoiyake ete ali atoa peyame einagotame tokoinakaleke Akolali kei pia kakoli tokome kibu moamele toameneya pa poe wa wetekaneya. ²²Mali padeka noi kakoa

(40) ponoka toa pa lepo taneya meane agoke latekakoiya tokome ete peyame ke wa Akolali kei pia kakeneya.

Yesunomo Yakoa Motane Ali Atoame

Akolali Kowitikete Akenemo

²³Kanosolo ali-kitame kita wete poe wa wetekakoli Pita Yoneta kini oyamikiti mekoita pata wa pekete Akolalike lodo yotokoai tane tobou alikitameka Kanosolo alikitameka kita kikoia okoinakamo toaweia opaneya.

²⁴Nitikoli yatekete kabunu kokotukoa ekete tone Ali Munu Akolali tibuka itonoka kusa ueka enika eniyake meki peya neme latikoya. ²⁵Nitikago neme toaweia okana toa Epetane Yominiyo wene takakale tone kua ago Depidi-loe nekele takama pokagome eya wa wia mekapianeya.

E ku yatene pa tepene poto witoa kotimi yotaneya mea tikilepa edekolo tiki-pe. Ali atoame pa pata pale toatiki oi pedoa pikilepa edekolo tiki-pe. ²⁶Ta piko peya ako tobou mekitame poi kamotokoa ni kiwike lokoia tobou mekitameka Ali Munu-pala one Keraisu-palaka poi topato wa poi kibutuai toniki wa Depidiyo wia mekapianeya.

²⁷Eina wia mekapiane toa etene taatekadeko. Nipa nekele takama pomotoa takoa moa kakapikago Yesu itonoke nokale Erode Podiase Pailasete pa yatene-kiti-pala Iserere yatene-palaka koukoa mekete one wia tukatekoi oi pedoa pikoina. Tone i Yerusaleme take koukalogoia nitikoina.

²⁸Enile tokoinapa Akolali ne tele tootapeneya meke wene toopikanakale taatekoa tokoina. ²⁹Eni yename toto tete meatekoi agale amoa okoinano, neke pupu yene toto piti moameneya kakete nekemo atiki toa akoono, auapeano ta. ³⁰Nipa nekele takama

pomotoa moa kakanakago Yesu one ibini patu kautakoa kakete yene tane ali atoa latekoa ele kule telekole toma poono, auapeano ta wa kowitao meaneya. ³¹Nitao kowititikoia mekoi kiwi oboa mekoi yapu muku muku tootapekale Epetane Yomini kiwike awia tagatapeneya. Nitikale peyame Akolaline agale i i wa piti moameneya kakete toaweia akaneya.

Yesuno Ali Atoame Kinikiya Moke Tanemo

³²Yesunomo yakoa motane yene peya odene wene-kama pianeya meapa kinikiya-kiti anukuya mati wa wamato, odene pa pikoa mekete moke tato wa tatikala taneya. ³³Aposelo alikitame pa padele padele telekole toma yakete Ali Munu Yesu tua pokale Akolaliyo moa kamotokanemo wedoa oma yakoli Akolaliyo pewe-kama wia yopia kakeneya. ³⁴Nitaneyake Yesuno ali atoa ponopeneya mekileka toameneya. Nipa itono pine yenameka yapu pine yenameka kini itono yapu eya topo toa kue moomotekete ³⁵Aposelo alikitike aua pokala tokolipa padeya toameneya pa mekoi ali atoa moke toa tatikala taneya.

³⁶Saiparase take Lipai yatene ago Yosepeyo einakale taneya. Einagopa Aposelo alikitame Banabasi wa ibini akeneya. (Banabasi wapa ali atoa wene weye akakago wa ekete akeneya.)

³⁷Einagome one itono pade topo toa kue moomotokome Aposelo alikitiki mekoita aua pome meetapeneya.

Ananaiasi Sapairatame Toa Potokanemo

5 Pade ago Ananaiasiyo one natono Sapaiara-pala oi pedoa pikana toa tokome itono pade topo toa kue moapa kue padeka teia moa one wa pa pikoa pianeya. ²Nitao pa keku kue Aposelo

ali-kiti mekoita aua pome mepaneya. Nipa kue peya aua nome metane tetepo takoa taneya. ³Nitikale Pitayo okome Epetane Yomini-pala kapene wakake kue padeka teia moa pikoa piake peya iya auane nuku wa wini okopa Setanuyo eni poane wene edekale moa lukamotoa toka-pe. ⁴Eni itono wete topo toameneka nekeya-kama pianeya. Nipa eni itonome topo toa motoka kue peya pa pikoane meada wa wene pioo tokapa itonoka kueba nekeya-kama tokome oyake pikoa kawoo toka. Neke kapene wakateka oipa edeyake pedoa pikatope. Neme kapene wakoa ikilepa pa alikiti toto-pala wamoka. Akolali-palapa oka wa Pitayo okale ⁵yatekome eina eina one kakata aua witipitakome tuaneyaya. Nitaneyake einago-pala tanemo yatekoi peyame ekee wa piti tuuloganeya meaneya. ⁶Nitaneyake tuali-kiti nekete tukanakago katekamo mami-name ewetemotekete aua pote oloyo topaneya.

⁷Lou pini tebolo tadiya ponotokaneyake natonoka onekane-pala tanemo yakameneya atiki toa nekeneya. ⁸Nokale Pitayo yatekome okome kini itonome topo toa motokoi kuepa nekaneyo kotu kakoa aua noka-pe-kale okome eno, eni kue peya aua nokome toka-kale okome ⁹Epetane Yomini-pala kapene wakoa enatekoi oipa edeyake pedoa pikoti-pe. Nekane oloyo topokoina tuali-kiti wakapea note a kago ludu kakete ikino, yaka. Neeka dikoa aua pote oloyo topoi wa okale ¹⁰eina eina natonoka one kakata aua witipitakome tuaneyaya. Nitaneyake eina tuali-kiti nekete ina atoaka tuadeko wa moa aua pote odene oloyoke lewitikatakutukoa pipaneya. ¹¹Nitaneyake Yesunomo yakoa motane yename ete ali atoa peyameka enimo yatekete ekee wa pitime tuuloganeya meaneya.

Aposelo Ali-kitame Toma Yakenemo

¹²Aposelo ali-kitame padele padele telekole toma yakilepa Akolaline tele patu kautakoa kakete tadiki wa ali atoame ka oa kamotoa taneya. Yesunomo yakoa motane yene peyapa tobou losu yapu keneke Solomonu wa yomini kayo oa ibini akene lono oboai taneya. ¹³Ete yename eni yene-pala lipua meadete piti moteketeke ke ke wa kiwi kei pikala taneya. ¹⁴Nitoapa pade ali atoa Ali Muno agoke wene tugaketepa one agale yakoa motane yene-pala lipuai lipuai taneya. ¹⁵Enika enile tanelekepa ali atoame kini yene pitane-kiti moa akolono aua pote ka ludu tomo tatia mekakala taneya. Nipa Pita one yomini takoa ponokale latoa poi wa moa mekakala taneya. ¹⁶Yerusaleme ta liti plane take pitikoi ali atoameka yene pitane-kitika ipono awitaneya mekete tete mokoa kakene-kitika koukotukoa aua nokoli peya epetekatapeneya.

Aposelo Ali-kitame Tete Motanemo

¹⁷Aposelo ali-kitame nitima yakoileke ako odene mekome Akolalike lodo yotokoai tane tobou agomeka one Sadusi oyali-kitameka eya taneya. Ali atoame kiwi tewitikoa Aposelo ali-kiti litiei wa wene poaneyaya mekete tekete ¹⁸Aposelo ali-kiti dekoa moa po yapu pitikapeneya. ¹⁹Nitaneyake likonu Ali Munoyo moa wetekane edelo ago nokome po yapu kago pea Aposelo ali-kiti akolono aua pokome okome ²⁰ali atoa mea kama poatiki totono wenele toatikimo-kama tobou losu yapu pote olaukapamene wa oa pekeneya. ²¹Nitikale ta pene patakaka edelo agome oka toa tekete tobou losu yapu pote olaukoa kakeneya.

Nitaneyake ako odene mekome Akolalike lodo yotokoai tane tobou agomeka one oya-mikitameka ete Kanosolo ali

peya koukoa noe wa moa obokaneya. Iserele Kanosolo ali peya eni koukoa mekete ekete po yapu pitiki Aposelo ali-kiti enemotokapoe wa poyo ali-kiti moa wetekaneya. ²²Nitikoli pekete enekoli po yapu meameadekoli enekete waka-pea nekete ekete po yapu kago loko pitikoa keteaneyaya kakale enekoo. ²³Ni kago yopia kakoina ali-kitame e kago akolono nepikoa kakoli enekoo. Nitoa kago pea enekolo padeka meameadeka wa akeneya. ²⁴Nitikoli tobou losu yapu talo tane ali-kiti yopikagomeka Akolalike lodo yotokoai tane tobou ali-kitameka edoa pokoti patu wa wene kibusukoa mekoika ²⁵pade ago nokome okome kime moa po yapu pitikakoina ali-kitipa tobou losu yapu kunu kakete ali atoa olaukoa kakina wa onaneyaya. ²⁶Nitikale tobou losu yapu talo tane ago one poyo ali-kiti-pala opia pokome Aposelo ali-kiti moa Kanosolo yapu aua nekeneya. Nipa ali atoame kue katekamoia witikaya wa piti motekete tekete poti moa aua nekeneya.

²⁷Aua note Kanosolo ali-kitane lene yoto moa kakakoli eyago ako odene mekome Akolalike lodo yotokoai tane tobou agome okome ²⁸Yesunomo wa pade olaukameamene wa totome oa tukakoonake onekemo Yerusaleme take oa pupitikatapeadiki. Nipa Yesu wia tukanepa toto aukakala toa ni iki wa okale ²⁹Pita-loeme ete Aposelo ali-kitameka ekete tone Akolaliyo ta wa okole-kama litia toono, pa ali-kitane wene litiamoo. ³⁰Tone kauamikiti yopikago Akolaliyopa Yesu tuaneya pikata moa kamotokaka. Kime yomo lekaneyake wia dekoa tukakolika moa kamotokaka. ³¹Nitoapa ali atoa toa momotoa tokome oneke lokoa Ali Muno latikoa one nimini yono kounoke moa kakaneya. Enipa Iserele yename poanele toma yakoike po letu mekakouna keetapeane waou wa taneya. Nipa

tepe kolotini pekoa pikolipa nitou wa taneya. ³²Kipala i okopa Aposelo ali-kiti tone leneme enekoomo oko. Epetane Yominiyoka enimopa wene takakala toko. Akolaliyo one agale litia tiki yeneke awia memotoa wetekane Yominike oko wa Aposelo ali-kitame akeneya.

Kanosolo Ago Gamalieleyo Akenemo

³³Aposelo ali-kitame enimo okoli yatekete e Kanosolo ali-kiti kotimi wene mati luaneya tekete kiwi wia tukadete akeneyake ³⁴Kanosolo ago pade Gamaliele wa ibini akene agome eya taneya. Einagopa Parisi ago Mosesene totono pine toa olaukakago ete peyame kei plane ago kamokakome okome i ali-kiti akolono tekei meati wa moa wetekoe wa okale ³⁵wetekakoli okome Iserele ali-kiti kipala i ukumo yakoe. Ina ali-kiti-pala toateko oipa poti pedoa piato. Kini toma yakilepa kinikile tiki patu, Akolaliele takaki patu. ³⁶Namolo eya ago Tiudasiyo tube ago i kakuno, noe wa poi kamotokakale ege kadukaka ketepome kadukoa kakoa (400) ali-kiti one lono takoa pokoi. Nitikolipa poi keneke poyo yename einago wia tukakete one agale litia tane ali-kitika wia tadekatapekoi. ³⁷Naniko Galili Yudaseyo eya toka. Ali atoame takesi kue pitikamotoa kini ibini bokuke wia mekane-pete Yudase kote tokale okome itapa tepe kikono, poadi wa ete takoa pokome ali atoaka wia lokoa iyawea aua poka. Nitikale poyo yename einago wia tukakete one agale litia tane yeneka wia tadekatapekoi. ³⁸I Aposelo ali-kitipa kini tikile pa kini weneme tadekolipa wete edikoa tadatapeoino, toa kamotono toe. ³⁹Kini tikilepa Akolali patu kautakoa kakete tadekolipa kime oyake ketekamele toamoo. Nipa Akolali-palaka dekoa poi teigete toi wa Gamalieleyo akeneya.

⁴⁰Nimo okale yatekete ete Kanosolo ali-kitame ekete nitoono ta wa eina Aposelo ali-kiti noe wa kayo oa motekete eya taneya. Layo tiginame wiati wa poyo ali-kiti metekoli witikoli wa motekete ekete Yesuno ibini patu kautakoa kakete onekemo wa pade wameamene wa wetekaneya. ⁴¹Nitikoli Kanosolo ali-kiti mekoita tewitikoia pekete wedikete ekete eina witikoinapa Yesuno ibini wedekoa onekele takakoonakaleke totome oyake ya momotoa Akolaliyo ni tadeko wa pekeneya. ⁴²Nititikaneyake ta pataka abuna tobou losu yapuka kini kini yapu luduka obopokala tekete Keraisu Yesunomo one epetane ko i i wa oma yakeneya.

Ali Tatono Kakoa (7) Takoa Moa Kakanemo

6 Einapete-mene ali atoa kainya matiyame Yesunomo yakoa mootokoa one yatene-pala lipuai lipuai taneya. Yesuno yatene eni tubetema pekene-pete Geriki agale yakoa akene Yu yename Iberu agale yakoa akene Yu yene-pala ko oa kakete ekete ta patako abuna nee eya tatia meteketepa tone nepo atoa wanakala tiki wa wene pokete akeneya. ²Nitaneyake Aposelo ali-kitame Yesuno agale yakoa motane yene peya noe wa moa obokoa mekete ekete toto Aposelo ali-kitame kini nee eya tatikadetepa Akolalinemo olaukoa wamele toamokono, ³nee eya tatikamotoapa kini oyali-kiti tatono kakoa (7) takoa moamene. Nipa Epetane Yomini awia tagatapeneya mea epetane peku noa tikileke ete-kitame kei piki ali-kiti takoa moamene. Nitikolipa toto luku kakete nee eya tatikamene wa totome moa kakatekoapa ⁴eni pa pupu wa toameneya Akolali kowitua mea Yesunomo oma yawa too wa Aposelo-kitame akeneya. ⁵Nitikoli

peyame ke wa wedia mekete nee eya tatikatekoi ali-kiti tatono kakoa (7) takoa motaneya. Einali-kiti dikoa. Panago Sitipene einagopa Yesuke wedoa wene tugoa meane ago. Eingoike Epetane Yomini awia tagatapeneya. Ni Pilipi ni Perokorasi ni Naikena ni Taimone ni Pamena ni Nikolasi. Nikolasi einagopa Adioke take pa yatene ago meake Yu yene-pala lipuaneya. ⁶Ete yename o ali-kiti takoa mootokoa Aposelo ali-kiti mekoita aua pokoli Aposelo ali-kitame Akolali kowitua yono pianeya. ⁷Nitaneyake Akolaline agale oa pupitikatapeneya. Yerusalem ali atoa peya matiyame Yesunomo yakoa mootokoa one yatene-pala lipuai toa kakeneya. Akolalike lodo yotokoai tane ali kainya matiyameka Yesuke wene tugoa mea onekele takama pekeneya.

Sitipene Dekoa Motanemo

⁸Sitipene einagopa Akolaliyo pewe wia tagatapekale one tele patu kautakoa kakome telekole toma yakale enekete ali atoame ekete padameka toamatikilepa i tokono, enatoe wa ka oa kakeneya. ⁹Nitaneyake Libetine wa ibini akene losu oboai tane ali-kiti Sitipene-pala wene poaneya mekete one-pala agale toonali yoa kakeneya. Eni losu oboai tane Yu ali-kitipa eya ta-mene Sairini Alesaderia Silisia Esia enika eni ta kawa nekeneya. ¹⁰Eni yename Sitipene moa patukadete wili toa kawa teko tokale wakeneya. Nipa Epetane Yominiyo wene takakale agale muno pewe kakoa oa kakale tokome one moa patukamele toameneya. ¹¹Nitoapa kapene wakoa oatekoi ali-kiti tuku toa kawa motekete kue laukakete ekete i agomepa Mosese Akolalitate poane agale okale kime yatekoo wa akoa amene wa kue metaneya. ¹²Nitikolipa eina kapene

wakoa agale okoli yatekete ali atoaka tobou ali-kitika Mosesene totono pine toa olaukane ali-kitika wene pokete kamotokoa Sitipene kakata pote dekoa moomotekete Kanosolo ali-kiti koukoa mekoita aua pekeneya. ¹³Nitoapa eina kapene wakoa oatekoi ali-kiti Kanosolo ali-kitane lene yoto moa kakakoli kapene wakakete ekete i agomepa tone Akolaline takoa wikakakoona tobou losu yapukeka Mosesene totonokeka poane agale oma yako. ¹⁴Eya waka okale yatekoo. Nasarese Yesuyopa tone tobou losu yapu keaweata tadekatapea ni toto Yu yename litia toateko totono Moseseyo yametane totono katekoa weneya totono yamea too wa i agome okale yatekoo wa akeneya.

¹⁵Nitaneyake Kanosolo yapu mekoi peyame Sitipene nepikakoli one lene timinipa edelo agono lene timini tetepo tootapekale enaneya.

Sitipeneyo Kanosolo Ali-kiti-pala

Akenemo

7 I agome dika dika wa kapene wakoa okoli yatekome eya ago ako odene mekome Akolalike lodo yotokoai tane tobou agome Sitipene yatekome okome i yename neke tanemo-kala ikino, nimini ikiti-pe-kale Sitipeneyo okome ²atai ame-lawe agale pade oane metekuno, yakoe. Tone kauago Eberame Arane take wete toa pome mepameneyake one opiane ta Mesopotemia ta pa eida mekalepa pa teleta tootapeneya meko Akolali pono yamenokome okome ³ne yemeateku take mepoano, nekameyo-mikiti tewitikoa neke ta-pala toano pa wa akeneya. ⁴Nitaneyake one Kaledia ta toa pome Arane take mepaneya. Oneketai eida mea tukalepa Akolaliyo wini ta toano pa wa okale tewitikoa kiwi i pitiki take nome menaneya.

⁵Einata einapete Akolaliyo one itono nateya dedeyaka yameameneyake okome naniko neeka neeke taamoak pokoi yeneka eni take meo wane mekoane yameou wa Akolaliyo oa pianeya. Eberameyo one mati odeneka wete opiameneyake ni akeneya.

⁶Nitikome okome neeke taamoak pokoi yenepa mone take pote mepokoli eni ta pine yename kinikile-kama takamotoa kiwi tika tika toa tete mea toi. Nitikoli mali ketepome kadukoa (400) ponoka toa pa edikoa meku pekete toi.

⁷Nitoo mekoli enekene kiwi yopikoa potokakoi yene kibu motokakolupa neeke tama pokoi yename eni mone ta tewitikoa oto wakapea note mekete anukule takama yawei wa Akolaliyo Eberame-pala oa pianeya. ⁸Nitoapa ne yatene auapeouno, dikamene wa oa togotokome one eina auapekome toateka adeka pikome ali yatene kepene teigakete toatekoile yametaneya. Nitaneyake Eberameyo Aisake opia pikome ketepo kakoa (8) ta pataka-pete matiyane kepene teiganeya. Aisakeyoka mana Yekobe opia pikome einakale taneya. Yekobeyoka one ali mati tuku kakoa (12) opikome-kama einakale tokala taneya.

⁹Wa naniko tone kaua-mikiti Yosepe-pala wene poaneya mekete eya taneya. Idipi take panagono pupu-kama takamotoa dekoa moa topo toa kue motaneya. Nitaneyake Akolaliyo einago Yosepe mama moa yopikoa kakome ¹⁰tete motane-pete-kama toa mokala taneya. Nitoapa Idipi ako odene meane tobou ago Perouyo i ago Yosepe wene muno kakene ago tadeko wa wene tomotoa tokome one peku lawetekala taneya. One eni peku noa toma yakale enekome Perouyo one Idipi ta one yapulu yene peya neme yopikoa kamene wa oneke lokoa tobou ago moa mekaneya. ¹¹Wa naniko

Idipi Kenane tatake kobu igi noka matiame ali atoa kobume tukete welea meaneya. Tone kaua-mikitameka kini noatekoi neepa piamokale tuku tokoa kawa teko tokale wakeneya. ¹²Nitoe mekete Idipi take nee pade piko wa okoimo kugu yatekome Yekobeyo one mana-mikiti Idipi take noatekoo nee topo toa mopoatino poe wa wetekakalepa tone kaua-mikiti enipete titimoo Idipi take pekeneya. ¹³Wa taku takoapeta Idipi take pokoli Yosepeyo one Yosepe kaku wa one ibini toaweake akeneya. Nititikaneyake Idipi ako meane tobou agome inapa Yosepe yatene nekete tadiki wa wene taneya. ¹⁴Nitaneyake Yosepeyo etene Yekobe laine wamene-mikiti peya noatino noe wa agale oa wetekakale keti note menaneya. Eina yene kakoi toa oi motokolipa ege odepeta kadukoa wa timini mukitini patukoa padeka pagini (75) kakoa ali atoa kakedekoi. ¹⁵Yekobe Idipi take eida nome mea tuaneya. One mana-mikitika eida mea tukala taneya. ¹⁶Tone kaua-mikiti eida mea tukala taneyake kini tugini leyo leyo toa ta pine lono Sekeme take aua pote tuane ali atoa piai tane kotake pipokala taneya. Eina kotapa Eberameyo Emono mana-mikitaneke kueme topo toa motaneya.

¹⁷Akolaliyo Eberame-pala neeke tawateko yatene auapekene ile tou wa papete oa plane agale wete taatekameneyake tone kaua-mikiti Idipi take eida tamoata nekeneya. Wa naniko one einagale taatekateka tigotokalepa ¹⁸Yosepe wene toamene tobou agome Idipi ta yopia meaneya. ¹⁹Einagome toto yatene oa yotokoa talo toa potokaneya. Nipa kini mati-kitipa tumotono, opitikoa paka lono pote pipokala toe wa tone kaua-mikiti tete motokoa kakeneya. ²⁰Einapetepa pade adoname koniyo mati Mosese

opikete akolono pipameneya kini yapu tokene teboloke pa ukoa mekete adu lawetaneya. ²¹Wa naniko akolono moa pikoli Idipi ako tobou agono koname enamutukome one mana mati latikoa tubetekaneya. ²²Nitikalepa Idipi take mane luane-kitame kini peku-mene yamoo lawetekoli noa tokome agale muno kakoa oa padele padeleta wene toa toma pekeneya.

²³Mali timini mukitini patukoa padeka noi kakoa (40) ponokale Mosese one Iserere yeneke ugu pou wa wene pia meaneya. ²⁴Nitoapa ugu pokome enekale Idipi agome Iserere ago witikale enekome Iserere ago auapekome Idipi ago kibu motokoa wia tukaneya. ²⁵Nipa one yenamepa no i agome kiwi toa momotoa Akolaliyo moa kakapiadeko wa wene tikino wene pikome taneya. Eni wene pikanake one yatename wene taneya mena. ²⁶Wa podolikama Mosese eida wakapea pome enekale Iserere agota takuta poita tootakutukoa kakoli enekome okome anu oyata kita wameneta edeyake tete meetakutukoa kaki-pe wa kawikoa enaneya. ²⁷Nimo okale tete metane agome Mosese-pala wene pokome ete pedekakome okome tota yopia ka wa teyo okale teke toko-pe. ²⁸Neme abela Idipi ago pade wia tukadeko toa noka opi wia tukade oko-pe wa okale ²⁹Moseseyopa abelana tokounakamo peyame yakatapeadiki wa piti tokale Idipi ta toa pekeneya. Nitoapa Midiane take toa pome mekome one matita takuta eida opia kakaneya.

³⁰Mali lene timini togoikoa padeka noi kakoa (40) ponokale eya taneya. Mosese Kati Sainai tonono liti ali piamene take pome meane-pete de yomo deyake toe itipono okoa kaka pakeke edelo ago pade pono yamenokale ³¹enekome wene kainya pianeya tokome pinele pome enepaneya. Nitoe pome yatekale

Akolaliyo agale okale yakaneya. ³²Yakakoa kakale Akolaliyo okome okome neke kua ali-mene Eberame-loe Aisake-loe Yekobe-loe einago-mene yopiane kaku Akolali no i kakuna wa okale yatekome tokome enamene piti tokale kolu kolu moa kakeneya. ³³Nitoo kakale okome ne wini kakotapa tipi tanetano, neke kawa yene kotokoa pia. ³⁴Eya wane ukuno, yaka. Anu yatene Idipi take tete moa kakili enoane komoka oa kakili yakoane tekene toane moadene i nukuno, opi nepa Idipi take wakapea poano pa wane ne moane wetekada wa Akolaliyo akeneya.

³⁵Mosese einagopa one yatename wakete ekete toto yopia koiso akoo ta wa teyo okale teke toko-pe wa wakene ago. Ni agome toto yatene toa moa talo tomoa tokome Akolaliyo takoo moa Idipi take eni wetekaneya. Einapa Akolaliyo one edelo ago Mosese kakota imo akapa wa oka toa pome yomo deyake toe itipono okoa kaka pakeke kakome akaneya. ³⁶Nitaneyake padele padele telekole ali atoa wene kainya pikanele toma pokome one yatene Idipi ta tewitikoa aua pokome Kiane Ue ketoa ali piamene take aua pekeneya. Nitoo ali piamene ta ludu aua yakilepa mali lene timini togoikoa padeka noi kakoo (40) ponoka toa padele padele telekole toma yakome taneya. ³⁷Mosese einagomepa Iserere yene-pala papete oa pikome okome Akolaliyo no takoo moa kakakana toa tokome kiwi pakeke meka ago pade one agale akamotoa takoo moa kakoo wa oa pianeya. ³⁸Mosese einagopa ali piamene take ali atoa-pala koua meaneya. Ni Kati Sainai tonoke agale akanane edelo ago-pala opia kakeneya. Ni tone kua-mikiti-pala koua meaneya. Ni ne yatename yakamotoa ta wa Akolaliyo toto mea kama pomotoa toko agale i i wa Mosese yametaneya.

³⁹Mosese nitane agoke tone kua-mikitime one agale litia toameneya. Nipa kini wenepa Idipi take pianeya mekete one wakeneya. ⁴⁰Nitooapa Eronepala ko oa kakete ekete toto Idipi ta tewitikoa aua yakanakago Mosesepa Sainai tonoke kawa kakono, one-pala tokale agopa tokono, tuko patu, tuamoko patu. Tone kowitateko gode-kiti latikoano ta. Nipa i ta ludu namolo kakoo toto aua yawatiki gode-kiti adeka pia yomini latikoano ta wa akeneya. ⁴¹Einapetepa eina yename pitimekawe kai tine yomini latia kakakete Akolali tetepo takoo padeya-kiti aua note mea lodo yoai taneya. Nipa kini yoname latikoinakeyake ke ke wa wedia kakeneya. ⁴²Nitaneyake Akolali mukiti yamea mekomepa eina yename a tibuke kakene lou tokene eya etepea kowitima pomotoa wakeneya. Einapa Akolaline agale akane ago padame eya wa wia mekane toa taneya.

Iserere yene kipala ukumo yakoe. Mali lene timini togoikoa padeka noi (40) kakoake ali piamene ta ludu pima yakete kini pitimekawe kai sipi sipi kai eya wia lodo yoma pokoi. Eni lodopa nooke yotokoia mena. ⁴³Moloko einagono mamina yapu latia aua yakete eina yapu keneke lodo yoai tokoi. Ni kini kowitiko ago Lepane one tagoi tibuke a kakona wa one tagoi adeka pia yomini latia aua yakoi. Moloko Lapaneta kowitato wa kini yominike lodo yoma yakoinano, kini ta pine lono ete takooane lititapeane Babilone take ete moane wetekou wa Akolaline agale akane ago padame wia mekaneya.

⁴⁴Tone kua-mikiti ali piamene ta ludu pima yakete meme kai kepeneme latiane yapu-pala aua yakeneya. Nipa Akolaliyo Mosese kotua ko oai tane yapu-pala aua yakeneya. Eina yapupa Akolaliyo Mosese-pala adeka

pia akene toa latianeya. ⁴⁵Eina yapu-pala aua yawa tua pekete kini manamikiti laukoa pekeneya. Wa naniko Akolaliyo Kenane take pitane yatene-kiti ete takoa lititapekale tone kaua-mikiti tobou ago Yosua-pala Kenane take pote awia meketepa eina yapu-pala aua pote kakapaneya. Nitoapa kini mana-mikiti eida opia kakoa tuma note wipitiketepa Depidi opiane-peteka eina yapupa eida pikoa kama pekeneya. ⁴⁶Einago Depidi Akolaliyo pewe wia yopikale okome ne meateko yapu oyake wikakou-pe wa yatekale ⁴⁷Akolaliyo neme mena wa akene yake mana Solomonone one luku tobou ago mekome wikakaneya.

⁴⁸Nitaneyake Ali Muno Akolalipa alime wikakane yapu mekilepa toamoko. Enikepa Akolaline agale akane ago padame Akolaliyo okamo wia mekakome okome

⁴⁹*Tibupa anu tene pogakoane mekuya. Itonopa anu kawa pogakoane mekuya. Anu edeya yapu wikakadete iki-pe. Alime wikakane yapu kenekepa no edoane memotoa-pe. ⁵⁰Tibu itono enika eniya peya anume-kama latiane pikouya.*

Eina akenepa Akolaliyo papete akenemo uku wa Sitipeneyo oa kakeneya.

⁵¹Nimo ootokoa Sitipeneyo e Kanosolo ali-kiti-pala okome kepene teigamene pa yatene meki toa kini kabe ko akameneya meki. Nipa kini kaua-mikitame tane toa kimeka Epetane Yomini ete pedekakala tiki. ⁵²Kini kaua-mikitame Akolaline agale akane ali peya padeka katekameneya tete mema-kala nekeneya. Ni wene kiyo akeneya-kama meko ago noatekamo toaweaa oa plane ali-kitika wia tukama-kala nekeneya. Einago taatekoa nokalepa one wia tukakoe wa mone yenane yonoke kime moa pikoina. ⁵³Akolaline totonopa one edelo ali-kitame papete toaweaa akoo

metaneyake kime pikoa kaketeke litia toamekete enile tokoina wa Sitipeneyo oa kakeneya.

Sitipene Kueme Kaua Wia Tukanemo

⁵⁴Sitipeneyo nimo okale yatekete e Kanosolo ali-kiti kotimi yotokoi matiame one-pala eei wa kime kolukoa kakeneya. ⁵⁵Nitikolika Sitipenepa oneke Epetane Yomini awia tagatapeneya kakome tibu ate nepikakale Akolali tele pata tootapeneya kakale enoa ni Yesuka one nimini yono kounoke kakale enoa taneya. ⁵⁶Nitikome okome tibu kene peaneya pikolo enoane ni Ali Yatenane Oyago Akolaline nimini yono kounoke kakolo enoane tukuno, enoe-kale ⁵⁷e yename agale tayo ootapea kini kale kene yoname ketekoa one unukamoa dekoa motaneya. ⁵⁸Nitoapa Yerusaleme ta kago ketepono patukoa lia pitikakete kueme kaua wia tukaneya. Nipa i ago Sitipeneyo Akolali taumada toa okale yatekoo wa akoo akene ali-kitame one wia tukadete kakete kini tokoo kakene mamina kotokoa pala pitikaneya. Nipa tuali pade Solo wa ibini akene agono kawane pala pitikaneya. ⁵⁹Nitikakoa Sitipeneyo kowitikome okome Ali Muno Yesu neeke nukuno, anu yomini moa ta wa kowititikoa ⁶⁰neuwe tukuketikakome agale telo okome okome Ali Muno i yene kini i poanele tikileke nami wia kibu motokameamene wa ootokoa atu piou toa tukome tuaneya.

Eni yename Sitipene wia tukamotoa kakome eyago Solo kipala odene wene-mene pia kakeneya.

Soloyo Yesuno Ali Atoa Tete Metanemo

8 Sitipene wia tukane ta pataka-pete eina eina titimoo ete yenamepa Yerusaleme take Yesunomo yakoo

motane-kiti dika dika toamene tete meai taneya. Nitaneyake Yerusaleme ta toa Yudea Sameria tata piko peyake tadoo pekeneya. Nitaneyake Aposelo ali-kiti toa poamekete pa eida meaneya. ²Nitikakoa Yesunole wedoa takama yakene ali padeka-kitame Sitipenene tigni moa aua kotake pipekete oneke komo kata pitikoa kakeneya.

³Solo einagome Yesunomo yakoa motane yene wiane atukou wa wene pikome kini kini yapu yapu mekoi toa tuku toma pome enamutukome akolono lia pitikoa alika atoaka po yapu pitikakala taneya.

Yesunomo Sameria Take Oa Pupitikanemo

⁴Yesunomo yakoa motane yenepa Yerusaleme ta toa ta piko peyake tadoo pekete Yesunomo mo wima pekeneya.

⁵Pilipi oneka Sameria take pokome Keraisunomo i i wa mo wia kakeneya.

⁶One eni okamo yakoa one telekole tokale enoa tekete ali atoame one oka agale wedoa yakakoa kakeneya. ⁷Einata einapete ali atoake awitane ipono-kiti ka akeneya takoa pokala taneya. Ni kawa yono tau taneya meane-kiti ni kawa okeaneya meane-kiti kainya mati epetekatapeneya. ⁸Nitaneyake Sameria take pitikoi ali atoa wedia kakala taneya.

⁹Sameria takepa Saimone wa ibini akene ago meaneya. Einago koto mati otoi ago mekome taneleme ali atoa wene kainya pikakala taneya. Einagopa ibini akene ago kaku wa mate okala taneya.

¹⁰One nitane ago tokale kamo yene ponopene yene peyame ekete i agopa Akolali keneyano, Akolaline tele patu kautakoa kako wa one okagale-kama wedoa yakakoa kakala taneya. ¹¹Nipa koto mati otoi ago mekome taneleme kini wene kainya pikaneya tokome one agale wedoa yakakala taneya. ¹²Wa naniko Pilipi eida nome mekome eya

epetane ko Akolaliyo ali atoa talo tokome toko ko ni Yesu Keraisuno ibini oa mekala taneya. Nitikale yakoa motekete ali atoa peyame ue mokala taneya. ¹³Saimone einagomeka Pilipiyo okamo yakoa moa ue mootokoapa Pilipi pokaka litima pekeneya. Litima pome enekale padele padele telekole toa ali atoa wene kainya pikoa tokale enekome wene kainya pianeya meaneya.

¹⁴Aposelo ali-kitipa Yerusaleme take eida pa meketepa Sameria yename Akolaline agale yakoa motokoi wa akedekoimo yakatekoa Pita Yoneta takoa moa Sameria take poatino poe wa wetekaneya. ¹⁵Wetekakoli note meketepa Epetane Yomini eni yeneke awinome memotoa kowitikaneya.

¹⁶Nipa papete eina yename Yesuno ibini wedekoa ue motaneyake Epetane Yomini kiwike wete awinameneya tokome ni kowitikaneya. ¹⁷Nitoo kini mataike yono pikoli Epetane Yomini awinaneya.

¹⁸Aposelo agotame eni yenane mataike yono pikoli Epetane Yomini awitikale enetekoa Saimoneyo einagota kue metekome okome ¹⁹kitame wini telekole tiki toane toada. Nipa anume takoane mataike yono pikou-kitike Epetane Yomini awinomotouno, yameatino toe wa kue metaneya.

²⁰Nitikale Pitayo okome neke kue-pala aua iponane poane take pamene wane uku. Epetane Yomini Akolaliyo nami kakameneya pa mekala tokoyake neke kueme topo toane mou wa neme wene pika tokolo ni uku. ²¹Akolaline leneke wene kiyo wameneya kake tokanano, Akolaline pupu tota-pala odeneka takama yamele toamoko. ²²Wini poanele tokake Akolaliyo po letu mekakana oneme kea mitikademe toko patu. Kea mitikakamotoa toa enoano, neke wini poane wene wia wawa one kowitamene. ²³Ae, neke tepene

poane wene mati alatapekome nime ne labakome tadeko wa Pitayo okale okome ²⁴poanele tekene tadekuno, neke wini okole-kiti nopala takayano, Ali Muno kowitikamene wa akeneya.

²⁵Nitaneyake Pita Yonetamepa Keraisyuo toma yakale enekoinakamoka Ali Munono agaleka mo wima yawa peya takamotekete eni ta tewitikoia Yerusaleme take wakapea poadete pekeneya. Nitoa Sameria ta ludu pekete ali atoa pitikoika Yesunomo oa mekutu toma pekeneya.

Pilipiyo Isiopia Take Tobou Ago

Yesunomo Pine

Toaweia Oa Metanemo

²⁶Wa naniko Pilipi Sameria take eida pa mekakoa Ali Muno agono edelo ago Pilipi mekata nokome okome wete kamokoa pa. Yerusaleme take titimoa Gasa take keita witane bateteke pamene wa wetekaneya. Eni batetepa ali piamene ta ludu pianeya. ²⁷Edelagome oka toa tokome Pilipi kamomotokome eni bateteke poademe pokome Isiopia take ago kotuaneya. Einagopa ibini akene tiobago. Isiopia take ako odene meane tobou atoa Kadesike lokoa tobou ago mekome einatoane kamoya peya yopikoa kakeneya. Einagome Akolali kowitademe Yerusaleme take pome mepaneya. ²⁸Pome mea kowitimotokome Isiopia take wakapea poademe pekeneya. Nipa osi kaime lia aua pokoya waneke mea poademe pokomepa Akolaline agale akane ago Aisaiayo wia mekane boku lewea oi moma pekeneya. ²⁹Nitikaka Epetane Yominiyo Pilipi-pala okome eni osi kaime lia aua pokoya waneke mea ponokago kotua pamene wa okale ³⁰teyapea kotua pokome yatekale einagome Akolaline agale akane ago Aisaiayo wia mekane agale oi moa

mekale yakaneya. Yatekome okome neme wini oi motoko agalepa wene toko-pe-kale okome ³¹eni agale pine toaweia oateko ago pade enamukuyano, edoane wene tuku patu wa ootokoa mekome okome nopala odeneya mea patono, lewia meno wa okale nitaneya. ³²Nitoa mea enekale einagome oi moma pome tugane agalepa dikoa wia mekaneya enaneya.

I toaweane uku agopa padame sipi sipi kai wiademe lia aua pou toa pade alikitame one wiadete lia aua pekeneya. Sipi sipi kai tine pine pitukoa kakili agale wametekaneya pa kako toa einagoka agale wametekaneya pa kakeneya. ³³Einago koiso akoo ya motokakoli padameka one kei piameneya. Itonoke mea togameneya pa tekei mekale po tewitikale pekeneyano, oneke tama pokoi yene i i wa teyo toaweia omotoa-pe.

Eni akenelepa wete tane tetepo takoo Aisaiayo papete wia mekapianeya.

³⁴Einagalepa tobou agome oi moa mekome tokome Pilipi-pala okome Akolaline agale akane agome teeke akeneya patu. Pinali oneke akeneya patu. Panagoke akeneya patu wane ne yatekene uku-kale ³⁵Pilipiyoapa einagome eina oi moma pome tugakata titimoapa Yesu ko oa meaneya. ³⁶Nitoa batete ludu opia mea potepa ue meaneya liti witakete tobou agome Pilipi-pala okome ue i meadekono, ue mouno, anume ue momotoa padeleme ketekako patu-kale okome ³⁷poome toameneya Yesuke wene tugoa mekepa oyake moamele toko-kale okome eno, Yesu Keraisu onepa Akolaline mana wane wene tuku wa ootokoa ³⁸osi kai yopikago-pala okome no ponene meouno, osi kai witimoa kamotono ta wa akeneya. Nitoapa eniya waneke mea katepitoa Pilipi-pala uele keti pome kakale Pilipiyo ue motokaneya. ³⁹Ue

motokakale Isiofia ago Pilipita ue matanuke ate pogatekoa pote kakoika eina eina Epetane Yominiyo Pilipi takoa moa aua pekeneya. Nitikalepa tobou agome Pilipi wa pade enameneya one ta pine lono wedianeya pekeneya. ⁴⁰Nitaneyake Pilipi Asedose take witakome eida titimoa pima yakomepa pitikali latia pitikoi ta piko peyake Yesunomo oa mekutu toma pome Sisaria take tugapaneya.

Solo Yesuke Wene Tuganemo

(Aposelo 22:6-16, 26:12-18)

9 Sitipene tuutukaneyake Ali Munono agale yakoa motane yene keteane wiou wa Solo kotimi yoa meaneya. Nitoapa ako odene mekome Akolalike lodo yotokoai tane tobou ago mekata pokome eya wa akeneya. ²Damasikase takepa Keraisunole takama piki yene tuku toane enamutukene ali-kitika atoa-kitika po kakoane oto Yerusaleme take liimoane auane nouno, enile toateku pipia pade eni take losu yapu yopikali-kiti yamepouno, pipia wia meano ta wa opaneya. ³Nitoo pipia moomotokome Damasikase take poademe tigotokakoa pokata odepeta a tibu laigoa toawineya noka pame one payapono pia unukakale ⁴itonoke aua pitalogakale agale ludu nokome okome Solo Solo nepa no edekolo tete mekala toko-pe wa okale yatekome okome ⁵Ali Muno nepa te kake oko-pe-kale okome neme tete mekala toko ago Yesu kakene ukuno, ⁶Damasikase take wete poke mepamene. Poke mekalepa neke toatekale panago nome toaweana onoono, wete kamo pa wa akeneya. ⁷Nimo okaka Solo-pala opia nekene ali-kiti witimoa kakete agale wametekoa pa nepia kakeneya. Agalepa eina okake alika enaneya mena. ⁸Nitaneyake Solo kamokakome lene kikoa enoake one leneta liitapeneya

tadekale enamele toamokale tokome one oya-laweme yono moa aua Damasikase take pekeneya. ⁹Nitikoli nome mekale ta tebolo-peta lia patakale padeka enameneya ue neeka wawa pa meaneya.

¹⁰Damasikase takepa Yesunomo yakoa motane ago pade Ananaiasi one eida mekata Ali Munoyo pule menokome okome i ago Ananaiasi wa okale okome nopa i kakuno, yakouno oano ta-kale okome ¹¹eya yapu kiyu akeneya piko wa ibini akene batete kebonoke kako yapu Yudasene yapu poke eya wa yakapamene. Tasase take Solo neke i yapu nome meko-pe wa yakapa. Solo einago eni yapu mekome no kowitoa mekome tokono, one mekata wete kamokoa poano pa. ¹²Solo einagome one pulete enekale panago one ibini Ananaiasi nepa one mekata nokome one lene wa kikoa enekamotoa yono piademe nokale enekano, one lene kikakapamene wa Ali Muno agoyo akeneya.

¹³Nimo okale okome ekee Solo einagome Yerusaleme take neke agale yakoa motane yene dika dika toamene tete motokama yako wa akedekoimo yatekou. ¹⁴Ika Damasikase takeka ne kowitoai tiki yene peya po kakoa po yapu pitikamotoapa Akolalike lodo yotokoai tiki tobou ali-kitame one pipia pade wia metekoli eni pipia-pala oto aua nekedeko wa okale ¹⁵Ali Munoyo okome wete poano pa. Einagopa noanume takoane motokou ago. Ni agome e ku pa yateneka kini ako tobou ali-kitika anu Iserere yeneka enika eni yene pitiki toa anu ibini i wa toaweana oma pomotoane tekene takoane motokou. ¹⁶Nipa nooke toa dika dika toamene tete moma poatekoya one ooyamepiadene tukuno, one mekota wete pa wa Ali Muno agome okale ¹⁷yakamotokome pome

one meka yapu keneke tuapea pome Solo enekome yono pikome okome ame Solo Damasikase take noade nokale ne pono yameteka ago Ali Muno Yesuyo wetekakolo nuku. Nipa neke leneta wa kiko a enoa Epetane Yomini awia tagatapeneya mea tomotoane nuku wa okale ¹⁸eina eina Solo one lene kidonome keneya ketekalogane toe takoa pitakale lene kiko a enaneya. Nitoa kamokakome ue motaneya. ¹⁹Nititiko a nee pade moa nakale popeyo nekeneya.

Damasikase Take Soloyo Yesunomo

Mo Wia Kakome Akenemo

Soloyo Damasikase take ta pataka-mene Yesuno agale yakoa motane yene-pala opia meaneya. ²⁰Nitoapa Damasikase losu yapu kako toa Yesu onepa Akolaline mana wa oma-kala yakeneya. ²¹One eni okamo yatekoi peyame ekete ekee i agopa Yerusaleme take Yesu kowitoai tokoi yene wia atukakanakago patu. Ikaka edikaki yene po kakamotokome Akolalike lodo yotokoai tiki tobou ali-kiti mekita liimoa aua poademe nokagomeke imopa i oko wa ka oa kakeneya. ²²Nitaneyake Solo Akolaline tele patu wedoa kautakoa kama pokome okome Yesu einakago onepa eina papete Keraisu wa ibini oa plane ago tadeko wa onekemo pine toawe a oa kakale Damasikase take Yu yename one-pala agale topo takoa amele toameneya. ²³⁻²⁴Soloyo Damasikase take nitoa mekale eina Yu yename one wia tukatekoi oi pedoa piitiko a Damasikase ta kago keteponoke ta ete patakakete oto likakete toa poi pi ai taneya. Nitaneyake panagomepa Yu yename ne wiadete tiki wa Solo

mekata pome pubu opokale ²⁵likonu one oya-laweme Solo moa pawe tobou waneke pote kakete tube ka keneke uuketiko a makoke po kakoa widoa keneke akolono pomotoa keti tukaketikaneya.

Solo Yerusaleme Take Pokome Tanemo

²⁶Nitaneyake Solo Yerusaleme take pokome Yesuno agale yakoa motane yene-pala lipuademe wili toa mekale peyame i agopa Yesuno agale yakoa motokago mena wa piti motekete one wakeneya. ²⁷Nitaneyake Banabasiyo one-pala oya kakatekoa Aposelo ali-kitike aua pokome okome i agopa Damasikase take poademe pokome Ali Muno Yesu enekale Yesuyo one-pala ko oa kakeneya. Wa naniko Damasikase take pome mekome Yesu patu kautakoa kakome onekemo atiki toa toawe a akeneya wa Banabasiyo Solo kei pia kakeneya. ²⁸Nitaneyake Solo Yerusaleme take eni yene-pala ete oto wa opia yakome Ali Muno patu kautakoa kakome onekemo atiki toa toawe a oma yakeneya. ²⁹Nitoa Geriki agale yakoa akene Yu yene-pala agale topo takoa okale eni yename one wiadete tuku toa kakeneya. ³⁰One wia tukatekoi oi pedoa pikoimo yakatekoa one oya-laweme Solo moa Sisaria take nabisike wetekapekete ekete neke Tasase take wakapea poano pa wa ue dipike mekoa wetekaneya.

³¹Nitaneyake enipete-mene Yesuno ali atoa Yudea Galili Sameria ta-meneke mekete tete moameneya poti kiliko a meaneya. Nipa Epetane Yominiyo auapekale Akolalike nate wene pianeya mea onekele wedoa takama yakeneya. Nitaneyake ete ali atoa Yesuke wene tugo a mea kipala lipuai lipuai taneya.

Pita Lida Dopa Tatake Pokome Tanemo

³²Pita ta piko peya pima yakome padepete Yesuno ali atoa Lida take mekoika ugu pome mepaneya. ³³Pome mekome enekale eya ago Iniasi yono kawata tau toomotaneya pikale enaneya. Einagopa mali ketepo kakoa (8) ponoka toa-kama pa dikaneya walaike pia kakeneya. ³⁴Pitayo einago enekome okome i ago Iniasi nepa Yesu Keraisuyo latekakono, neke yene pitike tatikoa pitikoya wete moa ewetoano, kama wa okaka eina eina kamokoa kakeneya. ³⁵Nitaneyake Lida Sarone tatake pitikoi peyame eina latoa pokago enoai tekete tepe kolotini pekoka pia Yesuke wene tuganeya.

³⁶Einapete Dopa take Yesuno agale yakoa motane atoa Tabisa wa ibini akene atoa tuaney. Tabisa Geriki agaleke eketepa Dokasi wa ibini ikiya. Einatoapa epetanele-kama toa ali atoa auapekala tane atoa. ³⁷Einatoa yene pia mea tukale one oya-laweme ueme abe kogatekoa ako yapu moa pipaneya. ³⁸Lida taapa Dopa ta namike pikale tokome Yesuno agale yakoa motane yename ekete Pita Lida take ponome mekome tokono, wida meameneya tone Dopa take wete noo wa Pita enemopoe wa ali takuta moa wetekanya. ³⁹Nitikoli pekete ne noo wa kowitikoli nipa patoe wa Pita einagota-pala opia pekeneya. Nitoa tumai yapu nokale einagotame ako yapu aua pokoli nepo meane atoa-kitame Pita unukamo kakete kini tigini mamina eya pikoa kakete ekete ika iyapa i tuane atoame tone takoa mekala toka wa Pita yamea kakete komo oa kakeneya. ⁴⁰Nitikoli Pitayo peya akolono moa wetekatekoa neuwe tukua Akolali kowitaneya. Nitoa peketapekome tuane atoa enekakome okome Tabisa wete kama wa okaka leneta kikatapeneya. Nitoa

Pita enekome kamokoa meaneya. ⁴¹Nitikale one yono moa katekamotokome nepo meane atoa-kitika ete Yesuno agale yakoa motane-kitika noe wa kayo oa motokome einatoa i latoa kakona wa yametanya. ⁴²Nitaneyake Pitayo tanemo Dopa take oa pupitikaneyake eni take mekoi peya mati Ali Munoke wene tuganeya. ⁴³Pita onepa Dopa take eida pa mea kakeneya. Nipa kai kepeneme padeya padeya latia tane ago Saimonane yapu meaneya.

Pita Koniliasi Mekata Pokome Tanemo

10 Sisaria takepa Koniliasi wa ibini akene ago meaneya. Einagomepa Itali wa ibini akene poyo yatene yopia meaneya. ²Einagomeka one yapu meane ali atoameka Akolalinele takama pote oneke nate wene pia lukoa meaneya. Nitanane ago tokome onekeya-kiti ponopene Yu yene tatikoa mekala toa Akolali kowitoai toa taneya. ³Wa padepete lou wegoukakaka (lou pini teboloke) tadiya pule pitikome enekale Akolaline edelo ago pade nokale enaneya. Edelo ago eni nokome okome i ago Koniliasi wa okale ⁴piti tokale nepikoa pikome okome Ali Muno edade noke kake oko-pikale okome Akolaliyopa neke kowitike okamo yakoa nekeya-kiti tatia metekale eno tokome ne wene taneya mekono, ⁵Saimone Pita enemotokapoe wa neke pupu ali pade-mene Dopa take moa wetekamene. ⁶Einagopa kai kepeneme padeya padeya latia toko ago Saimonane yapu tube kusa ue liti mekome tokono, nitamene wa edelo agome akeneya. ⁷Nimo oomotokome pokale Koniliasi eya taneya. One pupu ali takuta ni oneke lukoa meane poyo ago pade Akolalinele wedoa takama yakene ago einago-mene noe wa kayo oa motokome ⁸one pulete enekanakamo-kama tawea

okome okome Dopa take Pita enemotokapoatino poe wa wetekaneya.

⁹Podolikama einago-mene Dopa take tigotakakoa nokoika Pitayo Akolali kowitademe one meka yapu yalini waneke ate lewia pome mepaneya. Nipa lou mataike ponome kakale taneya. ¹⁰Nittoa mekome kobu tokale nee noademe akeneya. Nitane-pete yapu pine yename nee noatekoi nodokakete kakoika ¹¹Pita pule pitikome enekale tibu peaneya pikata mamina petene nami-meneke po kakoa itonoke tukaketikakale enaneya.

¹²Eni mamina kagonoke eya kuya kai kaya ini lobutaneya pikale enekakoa

¹³agale ludu nokome okome Pita ne wete kamo eniya-kiti moa wia namene wa okale okome

¹⁴Ali Muno wini okolepa toamou. Neme yametekoya-kitipa toto Yu yename kekaneya latikoa noamokoya-kiti toko-la. Enika eniya pade wete noamokouya tekene noamoukale ¹⁵agale ludu wa nokome okome ika iya nomotoane latikakou wa Akolaliyo yametekaya-kitipa neke kekaneya wa wamea. Eniyapa moa na wa akeneya.

¹⁶Enilepa tebolopeta tokala taneya. Niti-tikaneyake eina mamina petene a tibuke wete katekamotaneya.

¹⁷Nitikale Pita atu kamokoa mekome eni pulete enekuyapa edoa tokoto patu wa wene kibutua mekaka Koniliyasiyo moa wetekane ali-mename Saimone one yapu manika kako-pe wa pitia yakatekoa one meka yapu kago keteponoke note kananeya. ¹⁸Nittoa kayo ekete ekete Saimone one pade ibini Pita wa iki ago wida meko-pe wa yakaneya. ¹⁹Nimo kayo ekete kakoika Pitayo one pulete enekanakale wene kibutua mekale Epetane Yominiyo one-pala okome ali tebolome ne tuku toma note kei kagoke kakete tikino, ²⁰wete kamo kotua pa. Poome toameneya eni ali-mene-pala opia pamene. Anume oto wetekakolu

tokome ni nikino, opia pamene wa okalepa ²¹Koniliyasiyo moa wetekane ali-mene kakoita pokome okome kime tuku toniki agopa no i kakuno, edekolo tuku toniki-pe-kale ekete ²²poyo yatene tobou ago Koniliyasiyo poe wa wetekakale nokoo. Einagome epetanele-kama toa Akolalike poti wene pia lukoa mekagopa Yu yene peyame one kei piai tiki. One mekata Akolaliyo one edelo ago pade wetekakale nokome okome Pita oto nomotono ta. One nokome okamo neme yakamotoane ukuno, one mekota neke pupu ali pade-mene wetekamene wa edelo agome Koniliyasi-pala oka toa toto ni nokoo-koli okome ²³nipa i yapu piatono noe wa makutukoa motaneya.

Pimotokome podolikama Pita einago-mene-pala opia pekeneya. Dopa take Yesuno agale yakoa motane ali pade-kitika kipala opia pekeneya.

²⁴Pita eni yene-pala Sisaria take noademe nokale Koniliyasiyo one wamene laine-mikiti one oya-lawe enika eni ali atoa obokoa yapu nepia meaneya. ²⁵Nitaneyake Pita one yapu eida tuapea noademe nokaka

Koniliyasi kotua pokome Pitane kawane keti pekoa pitakome ke wa one kei pianeya. ²⁶Nitikale Pitayo one yono moa katekamotokome okome noka pa agono, winile toameano, kamokoa ka wa moa katekamotaneya. ²⁷Nititioa

one-pala ko oma pome yapu pokome enekale ali atoa peya mati eida oboa mekoli enaneya. ²⁸Enekome okome no Yu yatene tone kaua-mikitame kitau laukane toa pa yatene ali-pala opia poamoa yapu-kitika ugu poamoa toko. Eni kitau noanumeka laukoane mekouyake Akolaliyo pule metekome okome odene agoka pa yatene ago wa wamoa kitau laukameamene wa oka. ²⁹Nitikale tekene Koniliyasiyo moa wetekane ali-mene no mekouta

nokoli kqamoane wete oto nukuno, no enemonomotoa einago-mene edekale moa wetekakoiya-pe wa Pitayo yatekale ³⁰Koniliyasiyo okome eko ikouna ipetepa lou pini teboloke Akolali kowitoane mekolu panago yati yati tane mamina kakeneya anu lene timini lono kotikatapea nome kaka. ³¹Nitikome okome Akolaliyopa no neke kowitoai teke okamo yakoa nekeya-kiti tatia ponopene ali atoa mea tokale enoa tokome ne wene taneya mekono, eya toano ta. ³²Dopa take Saimone one pade ibini Pita wa iki ago eya agono yapu pitimekawe kai eya kepeneme padeya padeya latia toko ago Saimone one yapu tube kusa ue matanu liti ponome mekome tokono, einago enemopoe wa neke pupu ali pade-mene moa wetekamene wa edelagome okale ³³eina aina ne oto nomotoane anu pupu ali pade-mene moane neeke wetekakou. Ne epetekoia teke opi nokono, ke wane uku. Akolaliyo neme a wa oka toa yakoono, Akolaline leneke toto peya i oboa mekono, wete a wa Koniliyasiyo akeneya.

Pitayo Koniliyasi Yatene-pala Oa Metanemo

³⁴⁻³⁵Koniliyasiyo nimo okale Pitayo okome papetepa Akolaliyo no Yu yatene odene one wa takoa moa yopikoa mekono wene pianeya mekou. Opa e ku pa yatene oneke nate wene pianeya lukoa mekete kiyo akenele toma yaki peyaka Akolaliyo one wa pawe toa talo toko wane wene tuku. ³⁶One agalepa Iserele yene mekoika oa memotoa Akolaliyo Yesu Keraisu moa wetekaneya. Nitikale nokome Akolali-pala poi teigoa wawa odene wene pianeya meatekoimo i i wa oawineya yakeneya. No Yu yatene e ku pa yatene peyaka yopia meko Ali

Muno Keraisu Yesuyo nitaneya. ³⁷Kipala i uku agalepa Yudea ta piko peyake oa pupitikanemo kimeka yatekete tokoi. Yoneyo ali atoame ue moatekoimo oma yawa ue motokatekaneyake Galili take titimoa oa pupitikanemoke uku. ³⁸Enipa Akolaliyo Nasarese Yesuke Epetane Yomini moa awitikoia tele lukoa tokale ele kule epetanele toa ni Setanuyo moa kautane yene peya latekama yawa taneya. Akolaliyo one auapekala tokale nitaneya.

³⁹Yu yatenane ta piko peyake Yerusaleme takeka Yesuyo padele padele toma yakale-kama tone leneme enekooya tekete dika dika wa toaweamele tokolo uku. Yesuyo nitaneyake tobou ali-kitame dekoa moa yomo lekaneyake wia tukakoi. ⁴⁰Nitikolipa ta tebolo takoa pataka-pete Akolaliyo Yesu moa kamotokatekoapa ali atoa mekoika pono yamepomotoa taneya. ⁴¹Nitaneyake ali atoa peya pono yametaneya mena. One toma yakale enemotoa Akolaliyo takoa kakapikana yene odene pono yametekala toka. Nipa one kamoia pootokaneyake onepala opia mekete nee ueka nokala tokoo yene toto odene pono yametekala toka. ⁴²Nitikome okome onekemo ali atoa-pala i i wa akama yamene. Ni wipitia ta pataka-petepa ali atoa peya tua pokoi-kitika yomini meaneya mekoi-kitika kini koiso akoane omotoa Akolaliyo one moa kakapika wa akama pamene wa pono yamenokome oka. ⁴³Einagokepa Akolaline agale papete toaweamele akane ali peyame eya wa ekete akeneya. Oneke wene tugoia mekoi peyapa Akolaliyo kini poanele toma yakoiike po letu mekakana keetapea mitikoo. Nipa Yesuno ibinike tokome nitoo wa Pitayo akeneya.

Pa Yatene Ali Atoake

Epetane Yomini Awinanemo

⁴⁴Pitayo nimo oa kakaka one agale yakakoa mekoi peyake Epetane Yomini awinaneya. ⁴⁵Nitikale enekete eya yene Yesuke wene tuganeya mea Pita-pala opia nekene Yu ali-kiti wene kainya pi-aneya. Nipa Akolaliyopa Epetane Yomini kiwike namolo awitikakana toa i pa yatenekeka awitakadeko wa wene kainya pianeya kakete akeneya. ⁴⁶Eni yename agopa tane agaleke Akolali kei pia kakoli yatekete tekete ni akeneya. ⁴⁷Nitikoli Pitayo okome Epetane Yominipa totoke namolo awinokana toa i pa yatenekeka awinadekono, ue motokameo wa teyo omotoa-pe. ⁴⁸Yesu wedekoa ue moamene wa okome eni yene ue motokaneya. Nitikale Koniliasiyo one yenameka ue mootokoapa kipala opia mea kamene wa Pita kowitikoli tokome ta pataka pade-meneke eida pa meaneya.

Pita Yerusaleme Ta Wakapea Pokome One

Toma Yakanakamo Toawe Akenemo

11 Mone pa yenameka Akolaline agale yakoa motiki wa akedekoimopa Aposelo ali-kitame yakaneya. Yude ta piko peyake Yesuke wene tugo meane yene peyameka yakatapeneya. ²Wa naniko Pita Yerusaleme take ate wakapea nome mekale eina ali padeka-kitame one kikoa akeneya. Nipa Akolaline mati-kiti latiadetepa ali mati yatene kepene teigamedeko wa akene yename Pita kikoa ekete ekete ³nepa kepene teigamene pa yatene agono yapu poka one yene-pala opia meke nee nakeneya. ⁴Nitikoli Pita one yakome tokanakamo

titikome toka-pala wipitikome tokata eya wa toawe akeneya.

⁵Dopa take Akolali kowitoane mekene pulete keneya enekolu a tibuke padeya mamina petene nami-meneke po kakoa no pitikou pitia ketipea tukaketikakale enekou. ⁶Leneme nepikoane pikolu eya kuya yo tane kai eteya egetamene kai kaya ini enika eniya peya lobutua pianeya enekou. ⁷Nitoane yatekolu agale ludu nokome okome Pita ne wete kamo eniya-kiti moa wia na wa okale ⁸yatekene ekene Ali Muno wini okolepa toamou-li. Neme no yametekoya-kitipa toto Yu yename kekaneya latikoa noamokoya-kiti. Enika eniya pade wete noamokouya tekene noamou-kolu ⁹agale ludu wa nokome okome Akolaliyo nomotoa latikaneya-kitipa neke kekaneya tokolo noamuku wa wamea wa oka. ¹⁰Enilepa tebolopeta tokala taneya. Nititikaneyake eni mamina petene a tibuke ate katekamotaneya. ¹¹Nitikale eina eina ali tebolo no mekou yapu kotikatapea note kakoi. No enemonomotoa moa wetekaneyake Sisaria ta kawa nokoi. ¹²Nitikoli Epetane Yominiyo nopala okome poome toameneya wini ali-mene-pala opia pamene wa okale opiane pokou. Nitikolupa Yesuke wene tugo mekoi ali ko melepu (6) kakoa nopala Sisaria take opia pokoi. Einali-kiti i note kaki. Toto peya pote Koniliasine yapu tuapea pokolo ¹³Koniliasiyo one pulete enekana toa kekome okome edelo ago pade one yapu nome kakome okome Saimone one pade ibini Pita wa iki agopa Dopa take mekome tokono, enemotokapoe wa neke pupu ali pade-mene moa wetekamene. ¹⁴Einago nome mekompea neeka neke yapu pitiki-kitika toa moateko agale oa meo wa edelo agome oka toa Koniliasiyo nopala oka. ¹⁵Nitikale agale titikene

okouka Epetane Yomini eni yeneke awia tagatapeka. Nipa totoke namolo awinokana toa toka. ¹⁶Nitikale enekene inapa Yesuyo namolo wa oa pikanakale taatekoa tadeko wane wene tokou. Nipa Yoneyo ali atoa ue motokaneyake oneme ue motokou toane Epetane Yomini kiwike awitikou wa oa pikana wene tokou. ¹⁷Nipa Yesuke wene tugakoo-kiti totoke Akolaliyo one Epetane Yomini awitikakilepa nami kakameneya tokana toa eni pa yenekeka awitikakano, ipa Akolaliyo tadekono, one wene pika toane tagamedekale eni yene ue motokakou wa Pitayo e yene-pala akeneya.

¹⁸Nimo okale yatekete e yename Pita wa kiko wa wameneya Akolali kei pikete ekete pa yatene ali atoaka mea kama poadetepa oneke tepe kolotini pekoa pimotoa tadeko wa Akolali kei pia kakeneya.

Adioke Yene Yesuke Wene Tuganemo

¹⁹Yu yename Sitipene wia tukatekoa ete ali atoa tete motokakala tokolipa Yesuke wene tugoa meane-kiti Yerusaleme ta toa Pinisia Saiperase Adioke ta-meneke tadoa pekete Yu yene takoa Yesunomo oa mekala taneya. ²⁰Eni yene padeka-kiti Saiperase Sairini tatake opiane ali-kiti Adioke take pote mekete Ali Muno Yesunomo pa yatene ali atoa-palaka oa mekala taneya. ²¹Nipa Ali Munoyo auapea yopikale oa mekala tokoli eni pa yatene ali atoa peya matiyame yakoa motekete oneke tepe kolotini pekoa pia lukoa meaneya.

²²Nitaneyake Yerusaleme take Yesuke wene tugoa meane-kitamepa eni tanemo yatekete tekete Banabasi takoa moa Adioke take poano pa wa wetekaneya. ²³Nitaneyake Banabasi Adioke take nome mekome enekale Akolaliyo eni yene pewe witikome tadekale enekome wedia mekome

okome Ali Munagole wedoa takama pamene wa kini wene weye akakala taneya. ²⁴Banabasi einagopa epene wene pianeya meane ago. Epetane Yomini oneke awia tagatapeneya tokome Yesunole wedoa takama yakeneya. Nitane ago Adioke take eida mekakoa eni yene peya mati Ali Muno-pala lipukala taneya.

²⁵Wa padepete Banabasiyo Solo enemopou wa Tasase take tuku topaneya. ²⁶Tuku toa kawa enamutukome Adioke take pata wa wakapea aua pekeneya. Nitoa Adioke take poteta mekete odene malike Yesuke wene tugoa meane yene-pala obokala taneya. Obokala tekete ali atoa peya mati olaukoa kakeneya. Yesuke wene tugoa mekoi-kitipa Keraisuno ali atoa wa ibini ikilepa eida Adioke take titia taneya.

²⁷Einapete pake Akolaline agale akane ali pade-kiti Yerusaleme kawa Adioke take keti note menaneya. ²⁸Note meketepa eya ago Agabasiyo okome ta piko peyake kobu igi mati noo wa oa pianeya. Nipa Epetane Yominiyo wene takaka toa akeneya. (Eni kobu igi mati taatekakilepa Lomane ako tobou ago Kelodiasiyoy ta piko peya yopia meane-pete taneya.) ²⁹Agabasiyo nimo okale yatekete Yesuke wene tugoa mekoi peyame kini Yudea take meki oya-mikiti auapeato wa padeya-kiti kini pikoi toa takoa oboa pikakala taneya. ³⁰Nitatekoa Banabasi Solota metekete ekete Yudea take Yesuke wene tugoa meki yene yopiki ali-kiti metekapoatino poe wa wetekaneya.

Pita Po Yapu Pitaneya Toa Motanemo

12 Eina-pete laigoa tobou ago Erodeyo Yesuke wene tugoa mekoi yene padeka-kiti tete motokakala taneya. ²Nitikomempa one poyo ali-kitame Yonene wamene ago Yame

kabe teigamotoa taneya. ³Nitikale tokome Yesuke wene tugamene Yu yene wedia mekoli enekome ena toane Pitaka mou wa one poyo ali-kitame dekoa motokamotoa moa wetekaneya. Enilepa Yu yename mono mono akamene palawe yoa nakene wa ibini akene toge kia mekoi-pete taneya. ⁴Nitikale Pita dekoa moa aua note po yapu pitikakoli one poyo ali-kiti tuyono tuyono wa yopikakala tomotaneya. Nipa Yu yename eni toge kia nootokoa mekoika Pita moane eni Yu yenane lene yoto kakoane pitiane yakou wa Erodeyo wene pikome taneya. ⁵Nitikale Pita po yapu eida pia mekalepa Yesuke wene tugoa mekoi-kitame Pitane kowitikoai taneya.

⁶Erodeyo podolikama Pita moane pitiane yakou wa wene pia pitikakoa Pita po yapu pitikome atu pitikata poyo ago takuta one kouna takoa dekamoa pitaneya. Nipa kapa pota takuta kakoa kebetoa pitikaneya. Akolono kago keteponokeka poyo ali pade-kiti eida kakete yopikoa kakeneya. ⁷Nitikakoa Ali Munu agono edelo ago Pita pitikata kotikatapea nome kakale one po yapu pitikata pa toa kakeneya. Nitaneyake edelo agome Pitane podene wia kamotokakome okome wete kamokoa kamene wa okaka one yonoke kakane kapa pota kotokoa pitaneya. ⁸Nitikale edelo agome okome neke matiu moa kawa neke kawa yeneka moa mekoa ta wa okale nitaneya. Nitikale okome neke tokoo mamina peteneka lobutukoano, no pukuka namene wa oa pekeneya. ⁹Nitikale Pitayo litima pokomeke edelo agome tokalepa niminile toko wa wene toameneya. Nipa ipa pulete tukutu patu wa wene pia pekeneya. ¹⁰Nitao edelo ago Pitata poyo ali tuyonome yopia kakoi kago patukoa penaneya. Wa eina toa poyo ali tuyonomeka pade kago yopia kakoita patukoa ponetekoa

kapame latiane kago keteponoke tugoa kapaneya. Nitikoli ena kago one weneme pekale akolono witoata pekeneya. Nitao batete ludu pote ka katepake edelo agome Pita tewitikoai pekeneya.

¹¹Pokalepa Pita one-pala tokale niminile tadeko wa wene tokome okome Erodeyoka Yesuke wene tugamene Yu yenameka no i ago tete meou wa wene pokoinake Akolaliyopa one edelo ago moa wetekakale toa motokome tadeko wa akeneya.

¹²Nitao eni wene kibusutukoapa Yone one pade ibini Make einagono nine Mariane yapu pekeneya. Eni yapu keneke ali atoa peya mati oboa mekete Pitane kowitikoai meaneya. ¹³Pita eni yapu kagoke pome kakome wi wi tokale yatekome yapu pupu atoa pade Rodayo kago pekademe nome yatekale ¹⁴Pitayo okomokale yatekome wedikome tokome kago pekameneya yapu kouna lono teyapea pokome okome Pita kago kene akolono ku nome kakome toko-kale ekete ¹⁵leau eke oko-koli okome e'e mena. Pita kagoke ku kakome toko wa okala tokale ekete ni tadekopa Pita one edelo ago latia nome kakome toko wa wene toamekete akeneya. ¹⁶Nitikakoa Pitayo akolono kago wi wi toa kakale note kago peetapekete enekete ekete ekee inapa Pita tadeko wa ka oa kakeneya. ¹⁷Nitikoli Pita yoname kawikatekoa kakomepa Ali Munuyo edelo ago moa wetekakale po yapu nome akolono aua pokanakamo i i wa toawe akeneya. Nimo ootokoa kakome okome kipala i ukumo Yameka anu ete oya-mikitika mekoika toawe akapoe wa oomotokome padeya pekeneya.

¹⁸Podolikama pene ta patakaka poyo yename ekete ekee inakago Pita manika pokome pokato patu wa poome kau kau yakeneya. ¹⁹Erodeyopa einago wete tuku topoe wa okale tuku tokoa kawa

teko tokale wakoli eya taneya. Ete pi-apa Pita yopia kakoina poyo ali-kiti pitia yakatekoapa einago yopia potokadeki wa ootokoa kakome i poyo ali-kiti wia tukoe wa ete poyo ali-kiti moa metaneya. Nitimotokome Erode Yudea ta tewitikoaa Sisaria take keti pome mepaneya.

Erode Tukome Tuanemo

²⁰Erodeyopa Taia Saidone tatake pitikoi yene-pala kotimi yoa meaneya. Nitikalepa eni yene koukoa nekete one pitika yapu luku talo tokago Bilasasiyo kiwi auapemotoa oya kakatekoa Erode mekata nekete ekete tone noateko neepa neke take-kama topo toa monokala tokono, odene wene piato wa kowitaneya. ²¹Nitaneyake ipete wa namene wa oi metekana-pete eni yene wa nokoli Erodeyo tobou ago kawateka mamina-mene moa kawa tobou ago meateka walaike pome mekome eni yene-pala agale oa metaneya. ²²Nitikale yatekete kayo ekete ekete inapa alime oko toa mena. Akolaliyo oko toa eni okono, yakatoe wa kayo oa kakoli ²³eina aina Akolaline edelo ago padame one winaneya. Erodeyopa ipa Akolaliyo wene takako toane uku wa Akolali kei piamokale tokome taneya. Nitikalepa pukiname tepe noa teianeyake tukome tuaneya. ²⁴Nitaneyake Akolaline agale ta piko peyake oa pupitikama pekeneya tokome ali atoame yakoa moma-kala pekeneya.

²⁵Banabasi Solotame Yerusaleme pekete tatikoa metekatekoiya-kiti tatikoa meemotekete Adioke take wakapea pekeneya. Nipa Yone one pade ibini Make einago-pala aua pekeneya.

Banabasi Solotame Yesunole Takama

Yamotoa Takoa Moa Wetekanemo

13 Adioke take losu yapu oboai toa Akolalinele takakoi-kitipa padekame one agale toaweaa akoo padekame onekemo pine toa olaukoa taneya. Eya yename nitoa meaneya. Banabasi ni Simione ni Lusiasi ni Maneyene ni Solo. Simione one pade ibini Naisa wa akeneya. Lusiasi onepa Sairini take ago. Maneyene einagopa Erode-pala tau takoa egetane ago. Eni Erodepa tubetooa wetini toa kakome Galili ta yopia kakeneya. ²Eni yename Akolalinele takoa mekete nee wawa mekoika eya taneya. Epetane Yominiyo kiwi wene takakome okome Banabasi Solotame anu pade pupu takamotoane kayo okouno, anu eni pupu takamotoa einagota moa kakamene wa akeneya. ³Nitikale eni yename nee wawa kowititikoapa nitato wa yono pia wetekaneya.

Saiperase Take Tanemo

⁴Epetane Yominiyo okana toa tekete wetekakakoli Banabasi Solota Selusia take keti pote pipaneya. Piimoteketepa tube ue dipike peapetekoa mea Saiperase take pote mepaneya. ⁵Saiperase ta keneke piko Salamise take pote mekete Yu yenane losu yapu kaka toa Akolalinemo oa mekutu toma pokoli tuali Yone opia pokome auapema pekeneya.

⁶Saiperase ta ludu pima yawa eka matanu lono Pepose take pekete otoi ago pade Ba-Yesu wa ibini akene ago kotuaneya. Einago Yu yatene agomewa Akolaline agale akama yakuna wa oa meake otoi ago mekome ali atoaa otokakala taneya. ⁷Einagopa Saiperase ta yopia kakago Sesiasi Polasi-pala opia-kama yakene ago. Eni ta yopikago Sesi-

asi Polisi wene muno meane ago tokome Akolaline agale yakademe okome Banabasi Solota oto nomotoa wa agale oa wetekakale nekeneya. ⁸Nitikoli tobou agome kini agale yakoa motokaya tokale Elimasi wa ibini akene agome kita-pala neno oa kakeneya. (Einago Geriki agaleke Elimasi wa ibini ikilepa otoi ago wa ekete iki.) ⁹Nitikale Solo one pade ibini Polo wa akene agome eya taneya. Epetane Yomini oneke awia tagatapekale kakome eina otoi ago nepikakome okome ¹⁰nepa nipa Setanuno peku noa tokagono, padele padele kiyo akenele-kiti moa agopa takade wili tokoa kawa poanele-kama toa ali atoa oa yotokoa toko. Akolaliyo nimini akene agale pamo tetepo takoa koigaku peke toapa manipete wako patu. ¹¹Akolaliyo ne kibu moonoo, nepia. Opii-mene neke leneta liitapeneya yake lou paka enameneya pa yawa meoo wa Poloyo okale eina eina one lene libu takatapekome yomiyomume agopa takaneya. Nitikale one yono moa aua yawatekago tuku toa kakeneya. ¹²Nitikale enekome ta yopikagome okome Ali Muno agonomo i agotame olaukoa kakipa etene nimini akedikwa wene kainya pianeya kakome yakoa motaneya.

Pisidia Ta Keneke Piko Adioke Take Tanemo

¹³Nitaneyake Poloyoka one oya-mikitameka Pepose ta tewitikoia ue dipike peapetekoa mea pote Pabilia ta keneke piko Peka take witapeneya. Eidapa Yoneyo o yene tewitikoia Yerusaleme take wa wakapea pekeneya. ¹⁴Nitaneyake o yename Peka ta tewitikoia Pisidia ta keneke piko Adioke take pote mepaneya. Eidapa ko mea pupu toamene-pete losu yapu tuapea pote witipitoa meaneya. ¹⁵Nitoo mekoli Mosesene agale tiginika Akolaline agale papete toawe akane ali-kitame akene

agale tiginika oi moa peya takakete losu yapu talo tane ali-kitame eya taneya. Agale wetekakete ekete oya-lawe i oboa meki ali atoa auapeatiki agale oa meadete eketepa yakamotono oe wa akeneya. ¹⁶Nitikoli Polo kamooka kakome yono pitikakome okome

Iserere ali-kitika Akolalike nate wene pia one kowitoai tiki pa yatene alikitika kiwi peya-pala i ukuno yakoe. ¹⁷Iserere yenane Akokaliyo tone kauamikitipa one wa takoa motaneya. Nitaneyake mone Idipi take pote mea kakoli pewe wia kakale eida pitikali opia tagatapeneya. Wa naniko Akolaliyo padele padele telekole toa eni ta tewitikoia aua pekeneya. ¹⁸Nipa mali padeka noi kakoa (40) ponoka toa-kama tone kaua-mikiti mama moa ali piamene take egetoa aua yakeneya. ¹⁹Nitimotoke Kenane ta ludu pitane yatene tatono kakoa (7) yatene wia atukoa eni yatenane ta tone kaua-mikiti kini wa yametaneya. ²⁰Nipa mali ege kadukaka pogime kadukoa (450) mali ponoka toa edikoa pewe wia yopia kakeneya.

Nititikaneyake kini tanele takoa enoa akatekoi ali-kiti Akolaliyo moa kakama pome wipitikomepa one agale akane ago Samuele moa kakaneya. ²¹Nititikaneyake tone kaua-mikitamepa kini Ali Muno meatekago neme takoa moa kakakamene wa Akolali kowitoai tokoli Bedamine yatene ago Kisene mana Solo takoa moa kakakaneya. Nitaneyake mali padeka noi kakoa (40) ponoka toa Solo einago Ali Muno mekome talo toa kakeneya. ²²Akolaliyo einago Solo katekatekoo one luku Depidi kini Ali Muno moa kakakaneya. Nitoapa Depidi kei pikome okome *i agopa Yesine mana Depidi nota odene wene pianeya yakagono, anu wene pikule-kama too* wa one kei pianeya. ²³Wa wipitikome toto Yu yatene toa momotoa tikilepa einago Depidike tagakago Yesu moa kakaneya.

Nipa kiwi yatene auapekene dikou wa papete oa pikana toa taatekoa taneya. ²⁴Yesu wetē taatekoa noameneyake Yone namolo takoa nokome Iserēle yene peya kini namolo poane wene wia wawa tepe kolotini pekōa piatino, ue moamene wa mo wima yakeneya. ²⁵One eni pupu toa peya takateka tigotokale kakome okome nopa edane ago kakuno wene piki-pe. Papete oa pi-ane toa taatekoa noatekagopa no mena. Nopa einago menake one naniko nomotoane no namolo takoane nuku. Einago nokolopa one auapekilepa toatekuyake pa ago tekene one kawa yeneka oyake kekamele toamoko wa Yoneyo oka.

²⁶Anu oya-mikiti Eberameke tagene yeneka Akolalike nate wene pia kowitoai tiki mone yeneka Akolaliyo ali atoa toa moateka agale oa wetekakilepa totoke oa wetekaneya. ²⁷Yesu taatekoa nokale Yerusaleme take pitikoi yenameka kini tobou ali-kitameka einago eni nekedeko wa wene toameneya. One wene toamekete koiso akakoipa nipa oneke papete oa plane toa taatekoa taneya. Einapa kini ko mea pupu toamiki-pete-kama Akolaline bokuke oneke wia mekane agale oi mokala tikiyake taneya. Nipa Akolaline agale papete toaweā akane ali-kitame oneke papete wia mekapiane agale oi mokala tikiyake nitaneya. ²⁸Einagopa Pailase mekata aua pekete i ago wia tukakoano ta wa akeneya. Nipa one wia tukatekoi nami kawameadekaleka pa puputua taneya. ²⁹Nitoapa Akolaline bokuke oneke papete wia mekapianele-kama toa peya takatekoapa one tigrini yomo lekaneyake wia dekaneya toa moapa tukoi-kiti piadete kokapiane kotake moa pipaneya. ³⁰Nitaneyake one eni tuaneyā pikata Akolaliyo moa kamotokaneya. ³¹Nititikaneyake eya yene Galili ta laigoa onepala opia yawa

Yerusaleme take pokoina oya-lawe pono yametekala taneya. Nipa ta kainya mati pataka toa tokala taneya. Nitikale enekoia tekete one eni oya-laweme toto Iserēle yatene-pala dika dika wa toaweā oma yaki. ³²⁻³³Einapa Yesunomo kini wene epetekateko ko totome eya wa toaweā oko. Akolaliyo kiwi yatene auapekene dikou wa tone kaua-mikiti-pala papete oa pikana toa taatekoa tokomēpa kiwike tagene yene toto kako-pete Yesu tukale moa kamotokaneya. Eni toatekalekepa Akolaline bokuke taku takoa samo lo agale eya wa wia mekaneya piko.

Nepa anu mana. Opi nopa neketai latiane meku wa Akolaliyo mana-pala akene toa wia mekaneya piko.

³⁴Akolaliyopa one tukale moa kamotokakale tigrini wa lomuumatekaleke eya wa akeneya.

Auapekene dikou wane Depidi-pala kiyo akenele toatekoumo oane pikouna toane ne auapekene taatekoane tou wa Akolaliyo mana-pala akeneya.

³⁵Enilekepa panagome Akolaline bokuke eya waka papete wia mekaneya. *Nekele-kama takama pomotoa takoa motokago tukalepa lomumotoa neme wawamoo* wa wia mekapianeyā.

³⁶Depidiyo Iserēle yene yopia mekome Akokalinele takoa peya takatekoa tua pekeneya. Nitaneyake one kaua-mikiti oloyo toai tanetake one yename oneka oloyo tokolipa one tigrini eida lomuaneya. ³⁷Depidipa nitaneyake Akolaliyo moa kamotokane agopa lomukile toameneya. ³⁸Nipa anu oya-lawe kiwi eya wane wene takakene uku. Einago Yesuyo tokalekepa Akolaliyo kini poanele toma yakoike po letu mekakana keetapea mitikoo wa totome kipala toaweā oko. ³⁹Akolaline leneke poanele toamene yene meadete Mosesene totono litia tootapeato wa kime wili toa kawa teko tokolo tetekoa

poanele pa tiki. Nitikiyake Yesuke wene tugoa meki peyapa Akolaliyo poanele toamene yene tetepo takoa wene keaneyameko. Yesu tukaleke ni toko. ⁴⁰ Akolaline agale papete toaweake akane ali-kitame pubu akene toa kipala takayano, wedoa meamene. Akolaliyo akene toa eya wa pubu akeneya.

⁴¹ *Tedu mea ya takoa tiki-kiti kipala eya wane uku. Anume tukule enoa ka oa tuati. Kiwi meki-petepa padameka namolo toamokoinakale toadene tekene ni uku. Enilepa i i wa panagome toaweake okaleka kime yakoa moamoi wa akeneya wa Poloyo e yene-pala oa kakeneya.*

⁴² Nitaneyake Polo Banabasitame eni losu yapu tewitiko poadete kakoika e yename ekete ye pupu toamatiki-pete wakapea note enika enimo wa oa menamene wa kowitaneya. ⁴³ Nitoapa kini losule toa peya takatekoa padeka-kiti Yu ali-kitameka Yu yene-pala lipuane pa yatene ali-kitameka Polo Banabasita litia pekeneya. Litia nokoli e yene-pala ko oma pekete ekete Akolaliyo kiwi pewe wima pomotono, onekele wedoa takamoapamene wa oma pekeneya.

Polo Banabasitame Yesunomo

Pa Yatene Ali Atoa-pala Oa Metanemo

⁴⁴ Wa ye ko mea pupu toamatekoi-petepa eni take pitane ali atoa pa natetekoa kamotoa ete peyame Ali Munagonomo yakadete koukoa nekeneya. ⁴⁵ Koukoa note kakoli enekete Yu yene wene mati poologaneya kakete Polopala neno oa tea agale oa taneya. ⁴⁶ Nitikolika Polo Banabasitame piti moameneya kakete ekete Akolalinemo oa metekilepa Yu yene kipala namolo takoa ato wa totome oa metekoyake kote tokolo waki. Nipa kipa Akolaline take mea kamele toamene tetepo takakete ikili tokome kiwi tewitiko wawa mone

pa yeneke poo. ⁴⁷ Tone Ali Muno agome tamene wa oka toa toadete toko. Eya wa oka.

E ku mone pa yatene-kiti pa takalogamene wane kiwi moane kakapikouna. Nipa e ku yatene ta piko peya pitiki toa pekete kiwi toane motukumo oa pupitakamotoane tekene tokouna wa Ali Muno agome oka wa Poloyo akeneya.

⁴⁸ Nimo okale yatekete e pa yatene ali atoame ke wa Ali Munono agale kei pia kakeneya. Nitaneyake Akolaliyo mea kama pomotoa takoa moopiane ali atoa peyame Yesunomo yakoa motaneya.

⁴⁹ Ali Munono agale eni ta piko peyake oa pupitakatapeneya. ⁵⁰ Nitaneyake Yu yenamepa Polo Banabasitane agale yakamotoe wa Akolalinele takama yakene ibini akene atoa-kitika eni take tobou meane ali-kitika oa kamotokama yakeneya. Nitoapa einagota tete meetekoa kini ta tewitiko poe wa titakatapeneya. ⁵¹ Nitikoli einagotame kiwika tewitiko wako wa kini kawake kakene kege tadamotekete Aikoniametake pote mepaneya. ⁵² Nitaneyake Yesunomo yakoa motane yename ke wa wedia meaneya. Nipa Epetane Yomini kiwike awia tagatapeneya kolotine meaneya.

Aikoniametake Tanemo

14 Adioke take tokoinakale Aikoniametakeka wa einakale taneya. Polo Banabasita Yu yenane losu yapu pote kakete Akolaline agale wedoa oa metekoli yatekete Yu yeneka mone pa yeneka peya matiyame ee, nimini iki wa Yesuke wene tunganeya. ² Nitaneyake kini agale yakamadete wakoi Yu yenamepa i agotame ikimo yakamotoe wa mone pa yene oa kamotokakoli mone yenameka einagota-pala kotimi yoa meaneya. ³ Nitikolika eida mea kakete

Ali Munagonomo oa metekilepa piti moameneya taneya. Nipa Ali Munoyo ali atoa pewe wia talo tokome tokomo eni oa mekala tanepa ina okoinapa nimini akedikwa e yename wene tomotoa tokome Ali Munoyo einagota tele lukakale padele telekole toma yakeneya. ⁴Nitaneyake eni take pitane yene padekamepa Yu yenane totono litia tato wa oa wa padekamepa i Aposelo agotane agale yakoa litiato wa puutakutukoa meaneya. ⁵Nitaneyake Yu yenameka mone pa yenameka kini tobou ali-kiti-pala koukoa mekete einagota tete mea kueme k̄aua tukatekoi oi pedoa pianeya. ⁶Eina koina tanemo kugu yateketepa einagota wete kamokoa Aikoniamē ta tewitikoa eya ta ludu t̄oa yakeneya. Likionia ta keneke piko Lisira Debi tatake ni eni tata liti kebono piko ta-kitikeka t̄oa yakeneya. ⁷Nit̄oa t̄oa yawa Yesunomo-pala oa aua yakeneya.

Lisira Debi Tatake Tanemo

⁸Lisira takepa niname kawata lepo taneya opiane ago pade kawa kautoa pikileka toamene ago eida meaneya. ⁹Einagomepa Poloyo agale okale yakakoa meaneya. Nitikale Poloyo one nepikoa pikale Akolaliyo one epetekamele toko wa einagome wene piadekale enekome telo okome okome ¹⁰neke kawata kiyotokoa kamokoa ka wa akeneya. Nit̄oa okaka tigatapekome yawa kakeneya. ¹¹Poloyo enile tokale enekete e yename kini Likionia take akene agaleke ekete pule alita tone yagono ali latitapea toto pakeke i note kaki wa k̄a oa kakeneya. ¹²Nit̄iketepa Banabasi tobou pule ali Siasi wa ibini oa wa Polo Emesi wa ibini oa taneya. Polo mo wia kakago tokale Emesi wa ibini akeneya. ¹³Pule ali Siasike lodo yoai tane yapupa Lisira ta eko keneya

wikakaneya kakeneya. Eni yapu talo tokagomeka ete yenameka i agotake lodo yat̄oe wa akeneya. Nit̄oapa talo agome yomo tidiyo pilia moa poke apetoa pitimekawe kai-meneka moa ta keteponoke aua pekeneya.

¹⁴Kitake lodo yoadete tokoimo yatekete Polo Banabasita wene poaneya kakete kini kakene mamina iyatapeneya. Nit̄oapa eida oboa kakene yene pakeke teyapea kayo oawineya pekete ekete ¹⁵ame-lawe dekololo tiki-pe. Totapa kini yagono alita, pule alita menano, lodo yoa enile paya nou toa mekete tikile tewitikoa wawa Akolalike tepe kolotini pekoa piati wa kipala oko-ye. Einago Akolali pa mea kama nokagome tibu itonota tube ue toa latia eniya-meneke yakoiya-kitika latia taneyano, oneke wene tugamene. ¹⁶Einago Akolaliyopa namolo papete ta piko peya pitane yatename kinikile etepea toma yamot̄oa yopia kakeneya. ¹⁷Kinikile toma yakolika wawamokome eya toa pewe wima nekeneya. Kini pagu ama aua eya mekateka ta nomotoa toa ni nee noatekoi kotuke mea kolotini kakoa taneya. Ipa Akolaliyo tokome toko wa wene tomotoa ni taneyano, oneke odene wene t̄ugoa meamene wa Aposelo agotame akeneya. ¹⁸Nimo okolika e yename kitake lodo yoo-li wa neno oa kakoli poti oa kawikoa motokoli wakeneya.

¹⁹Wa naniko Yu yene Adioke Aikoniamē tata kawa nekete i agota wia tukatono toe wa Lisira take ali atoa awitikatapea Polo dekoa moa kueme k̄aua tukaneya. Nit̄oapa tukome tukono wene pia tayo lono lia aua pote pipaneya. ²⁰Nitaneyake one oya-lawe one pikata unukapia kakoli kamokamoto-kome Lisira take wakapea pekeneya. Podolikama Solo Banabasitame Lisira ta tewitikoa Debi take pote mepaneya.

Solo Banabasita Siria Ta Keneke Piko**Adioke Take Wakapea Pekenemo**

²¹Debi take Yesunomo eni epetane ko einagotame oa kakoli ali atoa peya matiayame yakoa motaneyake kini nokoina toa wakapeata pote Lisira Aikoniname tata pima pote Pisidia ta keneke piko Adioke take tugapaneya. ²²Nitoo pimata pekete kini agale yakoa motokoina yene mama motekete ekete Akolalinea wedoa takamoa yamene. Ni tone Akolaliyo talo toko take poadetepa ke enekakale-kama mea poo wa omata pekeneya. ²³Kini losu yapu kaka peyakeka kiwi talo toatekoi ali-kiti takoa moa kakakala taneya. Nitoo nee wawa mea Ali Muno kowitikakete ekete i yene neeke wene tugoa mekino, talo toa kamene wa kini kowitikakala taneya.

²⁴Nitoapa Pisidia ta ludu pimata pote tewitiko Pabilia take pote mepaneya. ²⁵Pabilia ta keneke piko Peka take Ali Munagonomo oa meemotekete Atalia take keti pote mepaneya. ²⁶Eni ta tewitiko ue dipike peapetekoa mea pote Adioke take wakapea nekeneya. Nipa i agotame nekele takama poadete tikino, neme talo toa pewe wima pamene wa kowitikakoina take kini eina pupu toa peya takamotekete wakapea nekeneya.

²⁷Note meketepa Yesuke wene tugoa meane yene peya moa obokaketepa Akolali patu kautakoata kama pekete tokoinakamo i i wa toawe akeneya. Ni e ku mone yatename Yesunole takamotoa Akolaliyo ka patekoa yametane moka toawe akeneya. ²⁸Nititikoapa Yesuke wene tugoa meane yene-pala eida mea kakeneya.

Aposelo Ali-Kiti Yerusaleme Take**Koukoa Mekete Akenemo**

15 Polo Banabasita Adioke take eida pa mekakoa pade ali-kiti Yudea ta kawa nekete Yesuno agale yakoa motane ali-kiti olaukakete ekete Mosesene totono litikete kini kepene teigamoto to. Toamokolipa Akolaliyo kiwi toa moamoo wa olaukaneya. ²Nitikoli Polo Banabasitame eni yene-pala agale liitakutukakoli Adioke yene koukoa mekete eya taneya. Polo Banabasita Adioke ali pade-meneka takoa moa kakakete ekete Aposelo ali-kiti Yesuno yatene yopiki ali-kitika Yerusaleme take mekika eya wa yatekapoe. Toto pa yatene ali-kitameka Moseseyo akene toa kepene teigamotoa iki-pe wa yatekapoe wa wetekaneya. ³Wetekakoli Pinisia Sameria tata ludu pima yaketepa pa yatene-kiti Akolalike wene tunganemo toawe oma pekeneya. Nitikoli yatekete eni tatake Yesuno agale yakoa motane yename ke wa wedia meaneya. ⁴Nitaneyake kutu pima yawa Yerusaleme take pote kakoli Aposelo ali-kitameka Yesuno yatene yopikoi ali peyameka einago-mene makutukoa motaneya. Nitikolipa Akolali patu kautakoa kakete tokoinakamo i i wa toawe okoli ⁵yatekete eya ali-kiti Parisi totono litia toake Yesuno yatene-pala lipua meane ali-kiti kamokoa kakete ekete pa yatene eya wa olaukamene. Yesunomo yakoa mootokoapa ali yatene kepene teigoa Moseseyo yametane totono litia toa tamene wa olaukamene wa akeneya.

⁶Nitaneyake Aposelo ali-kitika Yesuno yatene yopikoi ali-kitika koukoa mekete edemo ato patu wa wene kikutukoa meaneya. ⁷Nitoo ete oto wa agale takoa meapa Pita kamokakome

okome ame-loe agale pade ukuno, yakoe. Akolaliyo namolo namolo kiwi pakeke no takoa motikilepa pa yatene mekoika Yesunomo oane mema pomotoa toka. Nipa eni pa yename Yesunomo yakoa moa oneke wene tugamotoa tokome ni toka. ⁸Ali atoa peyane tepene piko wene tetoa enekago Akolaliyopa one Epetane Yomini eni pa yenekeka awipomotoa wetekaka. Nipa totoke namolo takoa awinomotoa wetekakana toa toka. Einapa mone pa yeneka oneme takoa motokome tadeko wa totome wene tomotoa tokome ni toka. ⁹Edikakomepa toto Yu yatene eni pa yateneta midi pikoa toka. Nitoa eni pa yatene ali atoane tepene poane wene takoa koikakilepa pa Yesunomo yakoa moa oneke wene tugakoike ni toka. ¹⁰Nitikano, tone kaua-mikitame toma nekenele tamene wapa edekoli iki-pe. Tone kaua-mikitameka totomeka Moseseyo akene toa kepene teigatekoa one totono litia toadete wili toa kakilepa edoa litia tootapeko patu wa wene keda taneya mekete tokoo. Eni pa yatene alime Mosesene totono litia tamene wa ikilepa Akolali toa enekete tikino, ¹¹wameo. Tone Ali Munago Yesuyo toto Yu yene toa motikilepa eni pa yatene toa motokome toko toa toko. Nipa one weneme pewe witikome toa motoko wa totome wene toko wa Pitayo akeneya.

¹²E koukoa mekoi peyame agale wametekoa Banabasi Polotame okoi agale pa yakakoa mekolipa o agotame Akolali patu kautakoa kama pekete pa yatene mekoika padele padele telekole kini wene kainya pikakoile toma yakoinakamo i i wa toaweaa akeneya. ¹³Nitooa oa peya takakoli Yame kamokakome okome ame-loe agale pade ukuno, yakoe. ¹⁴Akolaliyo pa yatene-kitika mama motokome eni yene padeka-kiti one wa pegetoa takoa

motokome tanemo Pitayo ina toaweaa okano, ¹⁵Akolaliyo edikakomepa one agale papete toaweaa akene ali-kitame oa plane toa taatekoa tadeko. Eya wa wia mekaneya piko.

¹⁶Nititikaneyake wakapeane nekene eya tou wa Akolaliyo oka. Depidine yapu kilia tadoa tumu pikake eni-mene wa moane awitikakoane wikou. ¹⁷Nititolupa ete yene e ku pa yatene peyame no tuku toma noi. Nipa anu wane takoane moane kakapikou-kitame nitoi. ¹⁸Kipala i ukupa i i wane namolo namolo wene takapikou ago Ali Munoyo uku wa one agale akane ago padame wia mekakaneya wa Yameyo akeneya.

¹⁹Yameyo nimo ootokoa okome ile tatoane uku. Akolalike tepe kolotini pekoo plane pa yatene ali atoane wene moa keda takakayano, ile tamene ele toameamene wa tika tika toamato.

²⁰Nitameneya eyado tewitikoa wamene wa eni yeneke pipia wia wetekatoane uku. Paya gode-kitike lodo yotane nee tawe eya wawa noameamene. Koua piamatiki ali atoa-pala koua piameamene. Kamate ponamomotoa tokome kabe dekoa tukane sipi sipi kai tu eya eniya melepu moa noameamene. Kamateka moa noameamene wa pipia wia wetekatoane uku. ²¹Ali atoa ta pitikoi peyake namolo namolo titimoo Mosesene totonopa mo wia oma nekeneya. Opika ko mea pupu toamiki-pete-kama losu yapu kako toa one totono oi moa toaweaa okala tikino, ta piko peya pitiki pa yatename one totono wete yakatapekete tiki wa Yameyo akeneya.

Pa Yatene-kitike Pipia Wia Wetekanemo

²²Yameyo nimo okale ete Aposelo alikitameka Yesuno ali atoa yopiane alikitameka Yerusalemee take losu oboai

tane yene peyame oa togotokakete ekete agalepa widikoa wia wetekato. Polo Banabasita-pala opia pote Adioke take pipia-pala aua potokamene wa tone oyagota takuta takoa moa wetekato wa oa tukaneya. Nitoapa Yudase one pade ibini Basabasi einago-pala Sailasita takoa motaneya. Ibini akene agota eni takoa motaneya. ²³ Nitoa pipia wia wetekakete eya wa akeneya.

Yesuke wene tugo meki-kiti Adioke Siria Silisia ta-meneke mekika kini pipia wia wetekako-ye. Nipa Aposelo ali-kiti Yesuno ali atoa yopiki ali-kiti kini oya-mikiti totome wia wetekaketepa mea epetekamene wa oko-ye. ²⁴ Toto-pala opia mekoi ali padeka-kiti kini ta-meneke ugu note mekete kini wene potokoa bebo akatapea tadikimo totome yateko-ye. Einapa totome amene wa okoomo wamekete pa kini wene kibusu akedikiki. ²⁵ Nitadikili yatekete ali takuta takoa moa tone kolotini agota Banabasi Polota-pala wida wetekato wa totome oa togotokakoo-ye. ²⁶ Einagota Banabasi Polotame tone Ali Muno Yesu Keraisunole takama yakilepa tukaya wa piti moamekete atiki toa taneya. ²⁷ Einagota totome oi pedoa pikoona toa tekete eyagota Yudase Sailasita takoa moa wida wetekako-ye. Einagota wida neketepa tone pipia wia wetekakomo kini kabunume kotukoa oa meoi. ²⁸ Eyado tewitiko wamene wa Epetane Yominiyoka totomeka kipala oadete oko-ye. Kini wene keda takakaya tokolo pademo-kitika wamoko. ²⁹ Paya gode-kitike lodo yotane nee eya wawa noameamene. Kamate moa noameamene. Kamate ponamomotoa tokome kabe dekoa tukane sipi sipi kai tu eya eniya melepu moa noameamene. Koua piamatiki ali atoa-pala koua piameamene. Enika enile takaya kekatekoa yaketepa nipa epetekoa mekete toi. Tone agale eni

peya tokono, wete kamene-ye wa wia mekaneya.

³⁰ Nitoapa kini takoa motokoina alita i pipia-pala aua poatino poe wa mea wetekakoli Adioke take pekeneya. Nitikete Yesuke wene tugo meane yene peya obokoa eina pipia yawa metaneya. ³¹ Nitikoli moa oi mootokoa ekete ipa wene yapeateko agaleno, ke wa wedia kakeneya. ³² Einagota Yudase Sailasitapa Akolaline agale toawe akane agota tekete Yesuno ali atoa eida mane mane oa kaketepa tele lukoa wene weye akoo taneya. ³³ Nitoata mea kakolipa kita takoa moa wetekakoina yene mekoita wakapea poatino, tepe kolotini kilianeya poe wa kini oya-laweme ete wa wetekakoli ³⁴ (Sailasiyo wakapeane poamou wa eida pa meaneya.) ³⁵ Polo Banabasitaka Adioke take eida mea kakete ali atoa olaukoa Ali Munagono agale-pala toawe akoo taneya. Pade ali kainya matiyameka einagotame tane toa taneya.

Polo Banabasita Pilitakutukakete Tanemo

³⁶ Wa naniko Poloyo Banabasi-pala okome tone namolo pote Ali Munagono agale oa metekoona ta-kitike einaka eina ali atoa edoa meki patuno, wakapea enema pato wa akeneya. ³⁷ Nitikale Banabasiyo eya ago Yone Make-pala aua pato-kale ³⁸ Poloyo wakome okome namolona einagomepa tota-pala Akolalinele takama yawake Pabilia take pegene kakalogo wawa pokana wa wakeneya. ³⁹ Nitoa neno oa letetakutukaneyake Banabasiyo Make-pala aua tube ue dipike peapetekoa pome mea Saiperase take witapaneya. ⁴⁰ Nitaneyake Poloyo Sailasi takoa moa poademe kakale kini oya-kitame i agota pewe wia talo toa kamene wa Akolali kowitikakoli

⁴¹ Sailasi-pala aua pome Siria Silisia tata ludu pima pekeneya. Nitoa eni ta-kitike Yesuno ali atoa koukoai tane toa pokomepa Akolalinele wedoa takama pomotoa mane mane oma pekeneya.

Polo Sailasita-pala Timosi Opia Pekenemo

16 Poloyo nitima yakome Debi take pome mepaneya. Wa naniko eni ta tewitikoia Lisira take pome mepaneya. Eidapa Yesunomo yakoa motane ago pade one ibini Timosi meaneya. One ninepa Yu atoa Yesuke wene tugoa meaneyake one etenepa Geriki yatene ago. ²Lisira Aikoniamme tatake mekete Yesunomo yakoa motane ali-kitame einago Timosi kei piiai taneya. ³Poloyo one pukuka Timosi-pala auane pouno wene pikome tokome Timosine kepene teigamotaneya. Nipa eni take pitikoi Yu yene peyame Timosine etenepa mone Geriki ago wa wene tekete Timosi aue paia titi tokaya tokale nitaneya. ⁴Niti-motokome eni ta ludu ali atoa pitikoika Timosi-pala pima yakome eya taneya. Yerusaleme take Aposelo ali-kitameka Yesuno ali atoa yopiane ali-kitameka pa yatene-kitame Yesunole takama pekete toatekoi oi pedoa pikoina totono dika dika wa oa mema yakeneya. ⁵Nitikalipa Yesuke wene tugoa meane yename Yesunole wedoa takamoa pokoli ete ali atoa kainya mati Yesuno ali atoa-pala lipuai lipuai taneya.

Polo Teroase Take Mekome Pulete Enanemo

⁶Poloyo one oya-lawemeka eni ta tewitikoia Esia ta ludu agale oma poadete tokoli Epetane Yominiyo mena wa ka ketekakale Perisia Galesia tata ludu pima yakeneya. ⁷Nitoa pima yawa Misia ta kebonoke tugoa Bisinia ta ludu kutu poadete tokoli Yesuno Yominiyo mena wa okale ⁸Misia ta

patukatapea pote Teroase take keti witoa pekeneya. ⁹Eida ta likale Polo pule pitikome enekale Masedonia take ago pade kakome kowitikome okome Masedonia take toto auapenamene wa kowitikale yakoa enaneya. ¹⁰Nitoa Polo pia kamokakome pule kekale totome yatekete ekete einapa eni take pitiki yene-palaka totome Yesunomo onomotoa tokome Akolaliyo kayo oa akedekono, patoe wa Masedonia take poatekole nodokoa kakoo.

Pilipai Take Eya Atoa Lidia

Yesuke Tepe Kolotini Pekoia Pianemo

¹¹Nitoapa ue dipike peapetekoa pote mea Teroase ta tewitikoia Samoterese take pote witakoo. Piimotekete podolikama Niapolise take pote mepokoo. ¹²Eni ta tewitikoia ka ludu pote Pilipai take mepokoo. Pilipai taapa Masedonia ta pikoka Lomane yatene awia note latiane ta. Eni ibini akene takepa ta pataka pade-mene toto mea kakoo. ¹³Eida meketepa ko mea pupu toamatekoo-pete eni ta kago ketepono patukoa eka yotane ue matanuke pokoo. Nipa ali atoame eida kowitoai tekete tiki wa tuku toma pokoo. Nitoa enamutukete witipitoa mekete eida oboa kakoi atoa-kiti-pala ko oa mekoo. ¹⁴Tone ko okoomo yakakoa kaka atoa pade one ibini Lidia. Einatoapa Taiataira take kudulu ue paigene mamina latia taneya. Onepa pa yatene atoameke Akolali kowitoai taneya. Nitane atoa Ali Munagome wene takakale mekome Poloyo okamo yakoa motoka. ¹⁵Yakoa mootokoapa one yapu pitikoi yene peya-pala ue motaneya. Nitikome okome kime no i atoapa Ali Munagoke wene tugoa meko wa wene piketepa nipa anu yapu meatono noe wa toto kowitikale nipa pato wa one yapu pote mepokoo.

Polo Sailasita Po Yapu Pitanemo

¹⁶ Wa padepete eina kowitoai taneta poadete pokolopa kueme topo toa moa egetane atoa padame toto kotuka. Eina-toa ipono awitaneya mekomepa naniko witatekole papete toaweia oa pikala taneya. Nipa e ku ali atoa-pala toatekale toaweia oa pikome kinike kue moapa one egetane ali-kiti kamo takaneya. ¹⁷ Eina-toamepa Polo-loe toto pokooka litia kayo oma nokome okome ako odene meko Ali Muno Akolaline pupu takama yaki ali-kiti i pinikino, enoe. Akolaliyo toto toa motokome toko agale oa mema pinikino, yakoe wa kayo oma noka. ¹⁸ Ta pataka pade-mene enile toma nokale Poloyo yakama pome teko tokale ete peketapekome ipono-pala okome Yesu patu kautakoane kakene ukuno, eina-toa takoa pa wa okaka eina eina takoa poka. ¹⁹ Nitikale one egetane ali-kitame ekete ae i atoame naniko toatekomo opi amele toamokono, tone kamo edoa toko patu wa wene poaneya kakete Polo Sailasita dekoa motaneya. Dekoa moa makesike liimoa aua pote Kanosolo yenane lene yoto kakapokoi. ²⁰ Nitoa koiso yatekakoi-kiti mekoita aua pote kakakete ekete i agotapa Yu agotano, tone i take pitiki yene eya toa kamotokaki. ²¹ Toto i take pitiko yenepa Lomane yateneke i agotame kini totono planele olaukoa tikino, tone kekanele tomotoa tekete ni tiki wa akoo okoi. ²² Nitikolipa eida oboa kakoi-kitame eni yene-pala kibutua kakete winagota wia-toe wa kayo oa kakoli koiso yakakakoi yename Polo Sailasita poyo ali-kitike metekete ekete i agotane mamina kotokoa pia layome wiamene wa moa metekoi. ²³ Nitikoli moa wiai toa kawa po yapu pitikapekete po yapu yopikagopala ekete winagota wedoa nepikoo kamene wa pekeneya. ²⁴ Nitaneyake po yapu yopiane agome einagota moa ekolo

yapu keneke pome pitikapokome kini kawata tau toologoa pekeneya.

²⁵ Nititikaneyake tube likonu Polo Sailasitame Akolali kowitoa lo oa mekoli ete po yapu pitane-kitame yakakoa mekoika ²⁶ momani toka matiyame eni po yapu lokokoa aua yakome kago-kiti peya odepeta wia peetapekala taneya. Po yapu pitane-kiti kini yono kawatake kakane kapa po-pala kotokoa pitaneya. ²⁷ Nitaneyake po yapu yopiane ago pia kamokoa pokome enekale po yapu kago peya peetaopeneya pikale enekome okome ekee po yapu pitane-kiti wete pitoa pootapekete tiki wa one kepete tue witimoa pinali one wa wia tukademe kakeneya. ²⁸ Nitikale enekome Poloyo kayo telo okome okome toto peya i kakono, pinali neke wa wia tukamea wa kayo akeneya.

²⁹ Nitikale yopiane agomepa tole udukoa aua noo-ye wa kayo oa moomotokome po yapu keneke teyapea pokome Polo Sailasitane kawane aua pitaneya. ³⁰ Kolu kolu nokale aua pitoa mea kamokakome einagota akolono moa aua pokome okome kamo koniyalita Akolaliyo no toa momotoanepa edele tou-pe-kale ekete ³¹ Ali Munago Yesuke wene tugamene. Nitikalepa Akolaliyo neeka neke yapu pitiki peyaka toa moo wa ootokoapa ³² po yapu yopikago one yapu pitikoi peya Ali Munagonomo oa metaneya. ³³ Oa peya tokale tube likonu po yapu yopikagome einagota moa kiwi layome witaneta kamate kōa togotokaneya. Nitoa eina eina einagomeka one mati atoa peyameka ue motaneya. ³⁴ Ue mootokoapa yopikagome Polo Sailasita one yapu aua pokome kini nee takoa lawetaneya. Nitaneyake einagoka one mati atooka Akolalike wene tugakete tekete ke wa wedia meaneya.

³⁵ Podolikama likonu witia koiso Kanosolo ali-kitame kini poyo ago-mene

moa po yapu yopiane ago mekata wetekakete ekete winagota poe wa wetekamene wa akapoe wa wetekaneya. ³⁶Nitikoli pote akapokoli po yapu yopikagome Polo opokome okome koiso Kanosolo ali-kitamepa Sailasi kita wetekakamene wa oa wetekadikino, tepe kolotini kilikoa pimotono pamene-kale okome ³⁷abelapa Sailasi totame tokoomo pitia yakamekete ali atoane lene yoto pa puputua layome wikala tokoi. Totapa Lomane yatenagotake tokoi. Nititiko po yapu pitikakoina. Opa tota paigakoapa edoa pomotoa iki-pe. Paigakoa poamoo-li. Eina ali-kiti oto nekete Sailasi tota ka ludu wetekamotoane uku wa Poloyo akeneya. ³⁸Nitikale poyo ago-mene koiso Kanosolo ali-kiti mekoita wakapea pekete Poloyo okanakamo toawe opokoli ekete ekee einagotapa Lomane yatene agotake witikete tadeko wa piti moa kakeneya. ³⁹Nitao po yapu pekete einagota-pala ekete poanele tekete tadekono, ela toko wa akolono wetekapaneya. Nitikete ekete tone i ta tewitikoa pamene wa kowitikoli ⁴⁰po yapu tewitikoa pote einakatoa Lidiane yapu pekeneya. Nitoapa kini oya-mikiti eida enekete piti moatoane toamuku wa kini wene epetekoa mea pekeneya.

Polo Sailasitame Tesalonaika Take Tanemo

17 Polo Sailasitame Pilipai ta tewitikoa Abipolise Apolonia tata patukoa pote Tesalonaika take tugapokoi. Eni takepa Yu yenane losu yapu pade eida kakeneya. ²Eidapa Polo one tanele tokome losu yapu pokala toka. Nipa Yu yene ko mea pupu toamatekoi ta tebolo pataka toa-kama pome kakome Akolaline bokuke wia mekane agaleke eni yene-pala agale

topo takoa okala toka. ³Nipa Akolaline bokuke Yesuke wia mekapiane toa pine toawe okome okome Keraisu tete moa tuake kamoia pikilepa nipa Akolaliyo wene toopiane toa taatekoa tamedekale taneya. Kipala i toaweane uku ago Yesu onepa eina papete Keraisu wa ibini oa plane ago wa Poloyo okala toka. ⁴Nitikale e Yu yene padeka-kitame one agale yakoa moa Polo Sailasita lono takanokoi. Akolalike nate wene pia lukoa meane pa yatene ali atoa peya matiyameka ibini akene atoa padeka-kitameka einagota-pala lipunokoi.

⁵Nitaneyake Yu yename einagota-pala wene poaneya meapa nego noma yakene ali-kiti makesike loyo mekoika tuku toa moomotekete yapu ludu eni take yene oa kamotokama pote eya ago Yesone one yapu pekeneya. Nipa einagota moa akolono ali atoane lene yoto moa kakato wa tuku topaneya. ⁶Nitao tuapetapea tuku toa teko tokale yapu pinago Yesone dekoa motaneya. Keraisuno agale yakoa motane ali padeka-kitika dekoa moa lia aua Kanosolo ali-kiti mekoita pekeneya. Nitao kayo ekete ekete ta piko peyake ke enekawineya yaki agota opa tone take tugoa note mekete tiki. ⁷Einagotapa Yesoneyo makutukoa motokome one yapu pikoa meko. Einagotameka kini oya-mikitameka ako tobou ago Sisane totono tetekakete ekete toto peya lukoa meateko tobou ago pade meko. Einagono ibinipa Yesu wa iki wa kayo oa kakeneya. ⁸Nitikoli yatekete eida oboa kakoi-kiti Kanosolo ali-kitika ekee wa tepe ate keti enoai toa kakeneya. ⁹Nitaneyake Kanosolo ali-kitame Yesone einago one oya-mikitika kikoa ekete ekete wa dikamoatino, opi kini oto toatiki kue meo wa okoli metekoli kini yapu ludu poe wa wetekaneya.

Polo Sailasita Beria Take Mekete Tanemo

¹⁰Ta likaka Yesuke wene tugoa meane ali-kitame Polo Sailasita Beria take poe wa moa wetekakoi. Nitikoli pekete eni take Yu yenane losu yapu wete eni pokoi. ¹¹Eni take pitane Yu yenepa Tesalonaika Yu yene keneya mena. Epene wene pianeya mekete Yesunomo wete yakoa motekete ekete i ago Poloyo imo ikilepa Akolaline boku keneke piko agale kotuke oko patuno, tuku toa enato wa Akolaline boku ta pataka abuna lewea enoai toa kakoi. ¹²Nitoapa padeka-kitame nimini eni akedeko wa Yesuke wene tugakoi. Ibini akene Geriki atoa padeka-kiti Geriki ali padeka-kitika Yesuke wene tugakoi. ¹³Nitaneyake Poloyo Beria take Akolaline agale oa mekala toko wa akedekoimo yakamotekete Tesalonaika Yu yene nekete Beria take ali atoa oa kamotokakoi. ¹⁴⁻¹⁵Nitikolipa Sailasi Timosita Beria take pa kamotoa Yesuke wene tugoa meane yenamepa Polo ne ita meamoano, kusa ue matanuke wete pa wa Polopa ka ludu Atena take wetekapaneya. Wetekamotekete Beria take wakapea nokoi. Nipa Poloyo Sailasi Timosita one mekuta oto nomotoane ukuno, akapoatino poe wa wetekakale nokoi.

Poloyo Atena Take Mekome Tanemo

¹⁶Sailasi Timosita nomotoa Polo Atena take eida nepia mekome wene keda taneya meaneya. Nipa iya-kiti kowitato wa padeya padeya adeka pia latia kakane yomini-kiti eida kaatapekale enekome tepe we tokale meaneya. ¹⁷Tepe we tokale mekome tokome eya taneya. Yu yenane losu yapu pokome kakome Yu yene-palaka Akolalike nate wene pia lukoa meane pa yene-palaka agale topo takoa okala

taneya. Makesikeka ta pataka abuna pokome ali atoa kotua enekome agale topo takoa oa kakeneya. ¹⁸Nitikalepa Epikuriane totono litia tane ali-kitame Sitoike totono litia tane ali-kitameka Polo-pala agale topo takoa okala taneya. Nitoapa padekame ekete i pamo okagome edemo okome oko patu wa oa wa padekame ekete mone gode-kitike oko patu wa oa taneya. Nipa Yesu tua pekeneyake Akolaliyo moa kamotokanemo yatekete tekete ni akeneya. ¹⁹Nitoa Polopa Ariopagase wa ibini akene Kanosolo yapu aua pekete ekete neke eina okanapa namolo yakamokoonamo okanano, pine yakadete oko. ²⁰Neke kuka kake okanapa monekemo ena okanano, pine toawe oano ta wa akeneya. ²¹(Atena ta pine yene toa nekene yeneka loyo-kama mekete eya taneya. Padele padele weneleke agale topo takoa oa ni titia oko agale-kitika yakoa tokala taneya.)

²²Polo eni Ariopagase wa ibini akene Kanosolo yapu eida pokome eni yenane lene yoto kamokoa kakome okome anu oya-lawe Atena take meki-kiti agale pade oane metekuno yakoe. Kini yapu ludu yakene enekolu e ku gode-kitike lodo yotokoile enekou. ²³Nitikene kini yoname latia kakoa kowitane gode-kiti enema penekene eyaka enekou. I agoke lodo yotikilepa one ibinipa wene toameketeke toko wa wia mekanemo oi motokou. Eina wene toameketeke kowitiki godepa paya nou toa kowitikiyake noanumepa wene tuku. Onekemo oouno, yakoe. ²⁴Einago Akolaliyopa itono latia eniya patu witoa kakoya peya latia taneya. Einagopa tibu itonota yopia meko Ali Munagono, alime wikakane losu yapu keneke meamele toamoko. ²⁵Einagomepa ali atoa toto wene takoa poome mekoa padeya padeya peya kini wa latia pikaneyano, one aua-peato wa tone yoname mitikoa latikoon-

akeya edoa meamoo. ²⁶E ku yatene peyapa odenago Adameke tawa ta piko peyake alama pomotoa oneme taneya. Eni yatene peyapa kini titimoa alama noatekoi oi kini atua tadatekoi oika oneme pedoa pianeya. Kini tutu tutu wa ta latia pima poatekoikaka oneme oto pikapianeya. ²⁷Nipa e ku yatename one tuku toma yakete tugawineya lau lau enoa enamumotoane tuku wa taneya. Nipa tone tone mekoya liti mekomeke taneya. ²⁸Enikepa panagome eya wa akeneya. Akolaliyo totopa wene takoa poome mekoa tokono, one patu-kama kautakoa kama yako wa akeneya. Eni akene toa kini lo agale wene kibutua akene yenameka eya wa akeneya. Totoka Akolaline mati-kiti wa akeneya.

²⁹Totopa Akolaline mati-kitino, golo silepa eya kamo kue pa kueka moa one adekapa i wa totome edoa latiato-pe. ³⁰Namolopa ali atoame one adeka pia eya kuya yomini latia kowitikilepa one wene toamekete tekete ni tiki wa Akolaliyo kibu moameneya. Opa ali atoa peya kini poanele tikile tewitiko wa wawe wa oa tukako. ³¹Nipa ali atoa peya kini toma yakoile kiyoke-kama takoa enoa akateka oi Akolaliyo wete meepianeya tokome ni oko. One takoa moa kakapiane ago one patu kautakoa kakome takoa enoa akoo. Nimini eni akedeko wa toto peyame wene tomoapa one eni moa kakapikanakago tua pokale Akolaliyo moa kamotokaneya wa Poloyo oka.

³²Tuane ago moa kamotokanemo okale yatekete padeka-kitame one yau takoa kakoi. Nitaneyake padeka-kitame ekete neke wini okomo wa yakoono, padepete wa onamene wa okoi. ³³Nitikoli Poloyo eni Kanosolo yapu tewitiko poka. ³⁴Pokalepa eni yene padeka-kitame einapa nimini oka wa one-pala lipua mea Yesuke wene tugakoi. Nitane yenepa panago

Ariopagase Kanosolo ago Dayoniasia ni padatoa one ibini Damarisi. Pade ali atoaka Polo lono takanekete Yesuke wene tugakoi.

Polo Korine Take Ponome Mekome Tanemo

18 Nititikaneyake Poloyo Atena ta tewitiko Korine take pome mepokome ²Yu ago pade eida kotuaneya. Einagopa Podase take opiane ago Akuwila wa ibini akene ago. Einagopa Lome take toa pome mepaneyake ako tobou ago Kelodiasio Yu yene peya Lome ta tewitiko poe wa tikatapekale Akuwila one natono Perisila-pala Lome ta toa Korine take pome mepaneya. Einago Akuwila adonane yapupa Polo ugu pome mepaneya. ³Akuwila adoname mamina yapu latia taneya. Polo one odene pupu tokago tokome eida kita-pala mekome mamina yapu latia meaneya. ⁴Nittoa mekome ko mea pupu toametekoi-pete-kama losu yapu pokome Yu yene-palaka Yu yene lono takanane Geriki yene-palaka agale topo takoa okala taneya. Nipa Yesunomo yakoa momotoa toa enekala taneya.

⁵Wa naniko Sailasi Timosita Masedonia ta kawa note mekoli Poloyo eni pa pupu tewitiko wawa Yesunomokama Yu yene-pala oa mekala toka. Nipa Yesu onepa eina Keraisu wa papete ibini oa plane ago taatekoa nekeneya wa oa mekala toka. ⁶Nitikale e Yu yene one-pala neno oa poanemo oa kakoli one tokoo kakene mamina petekakoa kakome okome Keraisunomo oane metekolu yakamadete wakoike Akolaliyo nami wia kibu moonoo, nepio. Enipa kini kogono. Opi titimoane Keraisunomo e ku pa yatene pitikika oma pukuno, Yu yene kiwi pa tuati wane tewitikoane wakuna wa oka. ⁷Nittoa e Yu yene tewitikoapa kini losu

yapu kakaya liti kakene yapu pome mepoka. Nipa eya ago Tisiasi Yasasi Akolalike lukoa mea kowitikagono yapu eni pome mepoka. ⁸Wa naniko eina Yu yenane losu yapu talo tane ago Kerisipasi einago one mati atoame Poloyo okamo yakoa moa Ali Munagoke wene tugakoi. Korine take mone pa yatene ali atoa peya matiyameka Poloyo okamo yakoa mootokoa ue mokala tokoi.

⁹Wa padepete ta likale Ali Munoyo Polo pule metekome okome piti moameneya agale wedoa oa meemoa pamene. Agale teigoa wawameamene. ¹⁰Ne auapeane kouane pekene tekene ni uku. I take pitiki ali atoa kainya mati nooke lukoa mekino, ete-kitame ka ketekoa ne tete metekileka toamoi wa akeneya. ¹¹Akolaliyo eina okana toa Polo Korine take eida mekome ali atoa olaukoa meka. Nipa tokene kalabe kakoa (18) ponoka toa Akolaline agale olaukoa meka.

¹²Eina-pete-mene Lomane yenane eyago Galio neme Geriki ta talo toa meamene wa moa kakakoli talo toa mekakoa Yu yene koukoa Polo dekoa mootokoa Galioyo koiso yopia mekata aua pokoi. ¹³Nitikete ekete i agomepa toto Yu yene Akolalike nate wene pia kowitikete toatekole olaukakomepa tone totono piko toa toamokono, neme pitia yatekoano ta-koli ¹⁴Poloyo agale awa oademe kakaka Galioyo e Yu yene-pala okome kipala i ukumo yakoe. I agome padele poaneleka tone totono tetekaneleka tokaledo nooke lia aua noi tokapa nipa kipala poti ko ootokoane winago pitiane yatekou toka. ¹⁵Nitikou tokake kimepa pa natele deyakeka kini totono tetekaneleka i ago pa puputua lia aua nikino, enika eni dikane notokanemopa yakamouno, ¹⁶kini pitia yakoatino, poe wa one koiso yapuke tikatapeka. ¹⁷Nitikale kini losu yapu talo tane ago Sosensisi dekoa

mootokoapa koiso yapu eko kamotoa layo toua wikala taneya. Nitoa kamotoa Galio paya nou toa meaneya.

Polo Adioke Take Wakapea Pekenemo

¹⁸Polo Korine take eida pa mea kakeneya. Wa naniko Siria take wakapeane pukuno, poti kamene-ye wa one oya-mikiti-pala oomotokome ue dipike peapetekoa pome mea Korine ta tewitika. Nipa Perisila Akuwilata-pala opia pokome Senekeria take pome dekoa pipokome eya toka. Ile tou wa Akolalipala papete oa pikana toa taatekoa tokome one tobou pine eida pitukamoto. ¹⁹Nitoapa ue dipike peapetekoa pome mea Epesase take witapaneya. Eidapa Akuwila adona tewitikatekoapa Yu yenane losu yapu pome kakome eni yene-pala agale topo takoa kaka. ²⁰Nitikale eni yenane kiwi mekota poti mea kamene wa kowitikoli waka. ²¹Wawa tewitiko poademe kakome okome Akolaliyo pa wa wetekakalepa nipa nani oto none menou wa oomotokome ue dipike peapetekoa pome mea Epesase ta tewitiko Sisaria take witapeka.

²²Nitoa Sisaria take ete katepitoa ka ludu pome Yerusaleme ate pome mepoka. Eida Yesuno yene-pala ko oa meemotokome Adioke take keti pome mepoka. ²³Eidapa Polo mea kawa pome Galesia Perisia tata ludu pima yakomepa Yesuno ali atoa peya wene weye akama yaka.

Apolosi Epesase Korine Tatake Tanemo

²⁴Yu ago pade one ibini Apolosi Alesaderia take opianeyake toa nome Epesase take menaneya. Einagopa agale muno pewe kakoa oa kakene agome Akolaline bokuke wia mekane agale wene agopa moameneya tepene yakoa luaneya. ²⁵Ali Munagonole

takama pokome toatekale olaukane ago tokome Yesunomo i i wa kiyoke-kama wedoa olaukakala taneya. Einagomewa Yoneyo ali atoa ue motokama yakome olaukanemo yakoa motaneyake Yesuyo Epetane Yomini ali atoake awitikanemo wete yakameneya. ²⁶Nitane ago Yu yenane losu yapu pokome olaukakilepa piti moameneya taneya. Nitikale yatekete Akuwila Pirusilatame kini yapu aua pekete Akolalingle takakome toateka ko pine toa olaukoa kakeneya. ²⁷Wa naniko Apolosi Geriki take poademe okale one oya-laweme auapekete eya taneya. Geriki take Yesuke wene tugoa meane yene meateka pipia wia mekakete ekete i ago Apolosi wida nokale wedoa makutukoa moamene wa wia mekakaneya. Nitoa metekoli Apolosiyo moomotokome Geriki take pome mekome eya taneya. Akolaliyo pewe wia kakale tekete Yesuke wene tugane-kiti wedoa auapekala taneya. ²⁸Nitikome okome Yesu onepa Keraisu wa papete ibini oa plane ago wa Akolaline bokuke Keraisuke wia mekane agale pine toaweake akeneya. Nipa kini lene yoto kakome Yu yene-pala agale muno pewe kakoa oa kakale ete agale topo takamele toameneya.

Polo Epesase Take Ponome Mekome Tanemo

19 Apolosi einago Korine take mekakoa Polo tono tono pake ka ludu pima yakome keti Epesase take ponoka. Nitoapa Yesuno agale litia tane yene eida kotukome yatekome okome ²Yesuke wene tugakolipa Epetane Yomini kiwike awinoka-pe-kale ekete e'e mena. Eni Yomini ko yatekileka toamokoo-koli okome ³ue motikilepa tene agale litia tokoi-pe wa okale ekete Yonene agale wa okoli ⁴Poloyo okome Yoneyo ali atoa ue motokakilepa kini

poanele tewitikoia wamotoa taneya. Nipa one liti naniko nokagoke wene tugamene wa oa taneya. Eni akenepa Yesuke okome akeneya wa Poloyo oka. ⁵Poloyo enimo okale yatekete eni yename Ali Munago Yesuno ibini wedekoa ue motokoi. ⁶Nitikoli Poloyo kini mataike yono pikale Epetane Yomini kiwike awinokale agopa tane agaleke emo kumo oa ni Akolaline agale toaweake akoa tokoi. ⁷Enilepa ali tuku kakoame (12) tadiya tokoi.

⁸Polo Yu yenane losu yapu pokome Akolalinemo i i wa piti moameneya kakome oa mekala toka. Nipa Akolaliyo ali atoa talo tokome tokomo yakoa momotoa agale muno pewe kakoa oa mekala toka. Tokene tebolo ponoka toa nitikala toka. ⁹Nitikale eni yene padeka-kitame Poloyo okamo kote tokale yakamadete wakete ali atoa kakakoa Yesunolepa pale tane tetepo takoa tea agale oa kakoi. Nitikoli Poloyo e yene tewitikakome one agale yakoa motokoina yene takoa moa eya ago Tiranasi one sukili yapu pato wa poka. Nitoapa ta pataka abuna eida-kama one eina oya-lawe-pala agale topo takoa oa kakala toka. ¹⁰Mali takutake Poloyo nitikala taneyake Esia take pitikoi Yu ali atoa mone pa yatene ali atoa peyame Ali Munago Yesunomo yakatapekoi.

Sipane Mana-mikitame Tanemo

¹¹Polo Akolali patu kautakoa kakome ele kule telekole toma yaka. ¹²Nitikalepa Epesase yenamepa Poloyo pikoa kakene pue nateya wane-kiti moa aua pote yene tane ali atoa tiginike letetekapokoli kini tane yene takoa pootapekala taneya. Ali atoake awitane ipono-kitika takoa pokala taneya.

¹³Ipono takoa wetekakala tane otoi ali padeka-kitame Ali Munago Yesuno ibini wedekoa ipono takoa wetekoa enekala taneya. Nipa ipono-pala ekete

one agale tōaweā akama pomotoa Polo moa kakapiane ago Yesu einagono ibini wedekoa eya wa oko-ye. Winago takoa pa wa okala taneya. ¹⁴Sipa wa ibini akene Yu agono mana tatono kakoame (7) enile taneya. Sipa einagopa Akolalike lodo yotokoai tane tobou ago. ¹⁵Einagono mana-mikitame Yesuno ibini wedekoa okoli ipono padame okome Yesu wene toane Poloka wene toane tukuyake kiwi wene toamukuno, mainali-kitame iki-pe wa okale ¹⁶one awitikanakagome eina ali-kiti aukamoa pokome wia atukaneya. Nitikale yapu mea akolono wititapekete teyapea pitoa pekeneya. Nipa kini mamina kawameneya kamate tuawineya pekeneya. ¹⁷Eni tanemopa Epesase take meane yene Yu yeneka pa yeneka eni yene peyame yakatapeneya. Yakatapekete piti motaneya mekete Ali Munago Yesuno ibini kamotokaneya. ¹⁸Nitaneyake Yesuke wene tugoa meane ali atoa peya matiyame kini poanele pa kaukoa toma yakoinakamo i i wa tōaweā akeneya. ¹⁹Otoi ali padeka-kitame kini boku-kiti oboa moa pala pitikoa wakete ali atoane lene yoto toele yotaneya. Kini boku-kiti motekete wetekane kue oi moteketepa ege egeta kadukoa (50,000) silepa kue lene wetekadekoi. ²⁰Enika enile tanele-kitikepa Ali Munagonomo ta piko peyake oa pupitikatapea Setanuno peku moa kautakama pekeneya.

Epesase Take Ali Atoa Oa Kamotokanemo

²¹Nititikaneyake Poloyopa Masedonia Geriki tata ludu pima yawane Yerusaleme take pone mepou wa wene pianeya mekome okome Yerusaleme take pone meemotekene Loma takeka pou wa oka. ²²Nimo ootokoa eya agota one auapea koua yakoi agota Timosi Erasasi kita namolo takoa pote mepoat-

ino poe wa Masedonia take wetekatekoa Esia take one pa eida meaneya.

²³Einapetepa Esia take meane yene Ali Munagonoleke poane wene pianeya mekete ali atoa oa kamotokaneya. ²⁴Eni poane wenepa Demiteriasiyo pine wia titianeya. Einagomepa silepa kueme pule atoa Atemisine losu yapu adeka pia yapu yomini deya latikala taneya. Eni de yapu-kiti kenekepa eni take yename pule atoane yomini moa kakoa kowitoai taneya. Pule atoane losu yapu yomini latia topo teketepa Demiteriasi einagomeka one eni pupu takane ali-kitameka kamo toma pekeneya. ²⁵Einagome one pupu takane ali-kitika eni odene pupu tane ali-kitika moa obokakome okome pule atoa Atemisikepa tone kamo toma poko. ²⁶Nitikoyake tone ika iyapa Poloyo paya tetepo takama pokolo kime enoa yakoa tiki. Enilepa Epesase take odene toamoko. Tone Esia ta piko peyake pima yakome okome pule ali atoa eyane yomini kini yoname mitikoa latikoinakeya-kitipa Akolaline yagono mena wa oma yako. Nipa ali atoa peya matiyame one agale etepea litia tomotoa tokome toko. ²⁷Nitikono, ali atoame tone toko pupupa poane pupu wa wakete pule atoa Atemisika one tube losu yapuka paya tetepo takoi. Esia ta keneke pitiki yene ete ta piko peya pitiki yene toto peyame einatoanele takama pokoyake nitoi tokolo uku wa Demiteriasiyo akeneya.

²⁸Nimo okale yatekete e yene kotimi wene luaneya kakete agale telo oa kakete ekete toto Epesase yenane pule atoa Atemisi ako atoa meko wa uu kayo okoa kakeneya. ²⁹Nitaneyake Epesase ta piko peyake ali atoa uu kayo oma yakete ete patuka oto patuka toa kakeneya. Nitoapa Masedonia agota Gayasi Arisakasita Polo-pala opia yakene agota dekoa moa kini oboai taneta lia aua pekeneya.

³⁰Nitikolipa Poloyo eni yenane lene yoto kakene agale oukene eida pou wa okale one agale yakoa motokoina yenane poamea wa agaleme lauane lauane tokoi. ³¹Esia take Polo-pala oya kakane tobou ali padeka-kitameka Poloke agale oa wetekakete ekete ani yene oboa kakita poamea wa okoi.

³²Eida oboa kakoi yene wene bebo ootapeneya kakete padekamepa pade kayo oa padekamepa pade kayo oa taneya. Nitaneyake padeka yene peya matiyame edekale nokotu patu wa wene kikutua kakeneya. ³³Nitaneyake Yu yenane Alesada takoa moa eni yenane lene yoto kakakoli pade ali-kitame one-pala kayo okolipa ina poto witakanapa i tokaleke taneya wa Alesadayo oademe yoname kawikoa enekale ekete ³⁴beita i agopa Yu ago tadeko wa peyame eya wa uu kayo oa kakeneya. Toto Epesase yenane pule atoa Atemisi einatoapa ibini akene atoa wa kayo okala taneya. Nipa lou pini takutake pa einakamokama kayo oa kakeneya.

³⁵Nitaneyake Kanosolo yapu yopiane agome eni yene kawikoa motokome okome Epesase yene ame-loe kipala agale pade oane metekuno yakoe. Ibini akene pule atoa Atemisi one losu yapupa toto Epesase yenane talo toa meko. A tibu pia ketipea pitane kuepa ipa pule atoane adeka tadeko wa totome enamua moa talo toko. I ukumopa ta piko peya pitikitame wene taneya meki. ³⁶I ukumopa padameka kapene agale winipa oko wa wamoino, padele tikilepa mekamotekete pitoa toameneya poti kilikoa mea toati. ³⁷Kime i alita oto lia aua nikilepa tone losu yapu keneke pikoya-kiti kode noamo a pule atoa Atemisi taumada toamo a tokoinake tokoi. ³⁸Eya ago Demiteriasiyoka one pupu ali-kitameka padagono koiso akouketedo tadekolipa nipa koiso oatekoi-pete Kanosolo ali-

kiti oboa mekoita koiso akamotono toe. ³⁹Padele tanemoka pitia yatekamotoapa nipa Kanosolo ali-kiti-pala ali atoa peya oboa mekoi-pete kini koiso aua namene. ⁴⁰Opi ali atoa oa kamotokakilepa kime tokoi wa Lomane tobou agome toto kikoa akaya tokolo uku. Totodo kikoa okalepa tone kei pia oatekomo toamoono, wawe wa einagome eina yene moa kawikaneya. ⁴¹Nimo ootokoa kakome eni yene poe wa wetekaneyaya.

Polo Masedonia Geriki Tata Ludu Yakenemo

20 Eni yenane agale oa kawitikaneyake Poloyo Yesuno agale litia tane yene moa obokakome kini weneke tele lukoa mea opi pukuno poti meamene wa Masedonia take poka. ²Masedonia ta ludu pima yakome ali atoane wene epetekoa pademo pademo oma-kala pome Geriki take tugapoka. ³Geriki take tugapokome tokene teboloke eida mea kaka. Nitoapa Siria take ue dipike mea poademe tokaka Yu yenane one wia tukatekoi oi pedoa piadekoimo yakatekoapa Masedonia ta ludu eka patukoane pou wa poka. ⁴Pokale eya ali-mene one-pala opia pokoi. Beria take opiane ago Pirasine mana Sopata ni Tesalonaika take opiane agota Arisakasi Sekadasita ni Debi take meane ago Gayasi ni Timosi ni Esia take opiane agota Tikikasi Teropimasita eina ali-kiti Polo-pala opia pokoi. ⁵Nipa toto naniko nomotoapa einali-kiti Polo-pala ka ludu opia pote Teroase take tugo a nepia meaneya. ⁶Nitikakoa totome eya tokoo. Pilipai takepa yisi kugu pitikamene palawe wa ibini akene toge kiatekoi oi nokale eni toge nee noomotekete ue dipike peapetekoa pote mea Pilipai ta tewitikoo. Nitoapa ta ko kakoa (5) pataka-pete Teroase take e ali-kiti wete pote mepokoita

witoa nekete ta tatono (7) kakoa-peta patamotoa eida mea kakoo.

Polo Teroase Take Pome Mepokome Tanemo

⁷Toto Teroase take eida meapa ta pataka egeme palawe wane popimoa noadete oboa mekoo. Poloyo podolikama poademe tokome agale oa-kama kawa tube likonu teigakaka. ⁸Toto eida oboa mekoota ako yapukepa labo peya mati udukaloganeya noa kaka. ⁹Tuali pade one ibini Yutikasi eida widoa waneke yakakoa meka. Poloyo agale oa-kama kakakoa einago atu togoikoa mea widoa waneke pitiku pokome toa togoikamotokome itono keita pitaka. Nipa eni yapu kibatate toa walai tebolo tatima pekeneyake ako yapuke pia togoikamotokome pitaka. Nitikale o yename keti toa pekete ekete ae tuadeko wa kamotokoa motokoi. ¹⁰Poloka keti toa pokome einago patu aua pitakome tebea motokome okome i agopa tuameadekono, mama moameamene wa oomotokome ¹¹ate wa ako yapu pome mekome palawe wane popimoa nootokoa e yene-pala agale wa topo toa-kala kawa ta patakakoa poka. ¹²Nitaneyake eina tuali tuake wa latoa kakalepa pade-kitame one yapu koua pokoi. Nitoapa peyame ke wa wene weye akeneya meaneya.

Poloyo Teroase Ta Tewitikoa

Mailitase Take Pome Mekome Tanemo

¹³Nitaneyake Poloyo one naniko Asose take ka ludu nouno, kiwi namolo takoa mepoatino poe wa toto-pala okale nipa Asose take kotua ue dipike ne enemonoo wa ue dipike peapetekoa pote mea Asose take witapokoo. ¹⁴Asose take pote mekooka Polo ka

ludu pima nome toto kotukale ue dipike moa aua pote Mitiline take witapokoo. ¹⁵Podolikama pupulegeme popokoa aua pokale ue dipike mea pote Kiose ta eka pimotoa oka patukoa pokoo. Nitoa pote podolikama Samose take witapokoo. Eida piimotekete podolikama ue dipike mea pote Mailitase take witapokoo. ¹⁶Mailitase take witapikilepa Esia ta keneke piko Epesase ta aka pimotoa keika lono kokotoa pote witapokoo. Nipa Pedikose wa ibini akene ta patakilepa wete toameneyake Poloyo Yerusaleme take wete pone mepouno, Esia take oyake pone meamele toamoko wa wene pianeya tokome Mailitase take pitimoo pokoo.

Poloyo One Epesase Oya-mikiti Kiwi

Wa Enamou Wa Lionate Oomotokome Pekenemo

¹⁷Polo Mailitase take pome mekomepa eya ali-kiti Epesase take Yesuke wene tugoane meane yene yopiane ali-kiti noe wa agale oa wetekakale ¹⁸note mekoli Poloyo eya wa oka. Kini Esia take kiwi pakeke namolo laigoane toma-kama nokouna pupupa kime wene tiki. ¹⁹Yu yename no wiatekoi oi pedoa pikala tokoli ke enekakaleka Ali Munagoke nate wene pianeya meane komo oane meane tekene onekele takama yawane togakouna. ²⁰Nipa kiwi epetekoa mekete toatekoimopa natemoka kipala kauane wamokouna. Enimopa ali atoane lene yoto kakene oane kini yapu ludu pone kakene oane tokouna. ²¹Nipa Yu yeneka mone pa yateneka kiwi peyame padele padele poanele tewitikoa wawa Akolalike tepe kolotini pekoa pia tone Ali Munago Yesuke wene tugoane meamene wane oma yakouna. ²²Opi Epetane Yominiyo pa wa wetekakolo tekene Yerusaleme

take poadene tuku. Nipa eni take meki yename nopala toatikile agopa tokolo mekeneke poadene tuku. ²³Eni wenepa toamukuyake ali atoa tube take pitikika yaku toa Epetane Yominiyo eya wa wene takakala toko. Pade-kitame no nepa dekoa moa po yapu pitikoa ke enekoi wa no wene takakala toko. ²⁴Nitoi tokoloka anu kepene mama moamukuno, tuadekolupa tuou. Ali Munago Yesuyo ta wa no ooyametekale-kama peya takadene uku. Nipa Akolaliyo ali atoa pewe wima pokome tokomo Yesunomo toaweane akama pone togadene uku. ²⁵Kiwi pakeke Akolaliyo ali atoa talo tokome tokomo i i wane mo wima yakounano, anu lene timini kime wa pade enamoi. ²⁶Kiwi panagomede poanele toa etepea tua atupekedekekalepa padame no i ago neme eni yene edekale pubu wamokato-pe wa amele toamoo. Ni edoa-mo. ²⁷Akolaliyo wene piko toane-kama wina peetapeane okouna. ²⁸Akolaliyo manane kamateme topo toa motane yenepa eni ali atoa sipi sipi kai tetepo takoa yopia kamene wa Epetane Yominiyo kiwi takoa moa kakakanano, talo toa yopikakete paya nou toameamene. Kiwika etepea poinalino, wedoa yamene. ²⁹Kiwi tewitikoane pootokaneyake poane ali-kiti kiwi pakeke note menoi. Nipa lene pianeya yo tane tueme-kiti sipi sipi kai mama moameneya tania wia tadekou toa kiwi toa potokoino wene tekene uku. ³⁰Anu oya-lawe kiwi padeka-kitameka poanele tagoa Akolalinemo moa koigoa uku pekete toi. Ali atoame kiwi litimotoka tekete toi. ³¹Nitikaya tokale tekene mali tebolo ponoka toane-kama kiwi peya pubu okala tokouna. Nipa ete pia oto pia ta pataka abuna komo okoane kakene pubu okounano, lene kilikoa piameneya wedoa meamene.

³²Opa Akolaliyo yapu wiou toa kiwi pewe witikome peku lewetemotoane uku. One peku noa toma pote wipitiketepa a tibuke Akolaliyo one wa takoa moma poko ali atoane pikoa katekakoya pine enoa moi. ³³Kiwi pakeke yawane mekenepa panagono kue mamina eya eniya moadiya wane tepi moameneya yakouna. ³⁴Nopala opia yakoina oya-lawe tone noateko neeka tone kawateko maminaka enika eniyapa anu yoname pupu toane kue mootokoane topo toane mokala tokouna. Enipa kime wene tiki. ³⁵Padele padele toma yakilepa dikoa pupu wedoa toa ponopeneya-kiti mama moa auapeatoane uku wane oyamema yakouna. Nitikouna toa litia teketepa nipa Ali Munago Yesuyo akene toa wene taneya mea tamene. Eya wa akeneya. Panagome panagonoke padeya moa pikoa mekomepa wedia meko. Wa einagome onekeya pade nami kakameneya eko ago pa metekome metekomepa etene wedoa kolotine meko wa Yesuyo akeneya wa Poloyo oka.

³⁶Poloyo enimo ootokoapa eni yene peya-pala neuwe tukupia mekome Akolali kowitoka meka. ³⁷Nitikale peyame komo okoa kakete Polo tebea moa nunu oa kakoi. ³⁸Nipa one lene timini kime wa enamoi wa eina okanakamoke e yene elame tuaneya kakete tokoi. Nititikoapa one mea poateka ue dipi pikata wetekapokoi.

Polo Yerusaleme Take Pekenemo

21 Totome eni yene poti kamene wa lionate ootokoa ue dipike peapetekoa pote mea Kose take pitimotoka pote witapokoo. Eida piimotekete podolikama Lodese take pote witapokoo. Lodese take piimotekete Patara take pote witapokoo. ²Eida ue dipi nome piai tokata peketepa

Pinisia take poateka ue dipi pade enamutukete peapetekoa pote mea pokoo. ³Nitua Saiperase ta eka pikale nami enemotekete eni taapa ewa yono lono eka pimotoa pote Siria ta keneke piko Taia take witapokoo. Nitua witapekete ete katepitoa pokoo. Nipa eina ue dipike moa pikoina kopapu pupu ali-kitame yawa moa platekoi ta eni witapeketepa katepitoa pokoo. ⁴Eida Yesuno agale litia tane yene tuku toa enamutuketepa ta pataka tatono (7) kakoake eni yene-pala mea kakoo. Nitikolopa Epetane Yominiyo wene takakale tokome eni yename Polo nepa Yerusaleme poamea wa pubu okoi. ⁵Nitikoiyake tone poatekoo oi nokalepa eni ta tewitikoa pokolo e yename wetekapekete kini mati atoa-pala ta kago ketepono patukoa kusa ue matanuke tugapokoi. Nitikete toto peya neuwe tukua pia Akolali kowitikoo. ⁶Nititikoapa tebetagutukoa kawa ue dipike lewia pote kakete wete kamene-ye wa ootokoa pogatapea mekolo kini kini yapu yapu wakapea pokoi.

⁷Nitikolipa Taia ta tewitikoa pote Tolemesi take witakete ete katepitoa potepa Yesunomo yakoa motane yene kotukete ke wa tebetekoo. Nitoapa ta pataka odeneke eni yene-pala eida mekoo. ⁸Wa podolikama eni ta tewitikoa ka ludu pote Sisaria take pote mepokoo. Nipa Yesunomo oa aua yakene ago Pilipi one yapu pote mepokoo. Namolopa ponopene ali atoa auapea yopikamotoa tatono (7) kakoa ali-kiti takoa motikilepa einago takoa motaneya. ⁹Einagono kono tuyonopa alike wete poamene atoa one-pala eida mea Akolaline agale toaweaa akakala taneya. ¹⁰Kini etenane yapu ta pataka pade-mene toto pa eida mekooka Akolaline agale toaweaa akane ago pade Yudea ta kawa noka. Einago

one ibinipa Agabasi. ¹¹Einago nome kakome Polono matiu kotokoa moa pinali one kawa yonota matiume tau toologaka. Nitikome okome Epetane Yominiyo okana toanepa Yerusaleme Yu yename i matiu pinago poome lutua pa yatenane yonoke moa piatiki adeka pikene tuku-kale ¹²yatekete eida pitikoi yene toto peyame Polo kowitikete ekete Yerusaleme poamea wa kowitikolo okome ¹³edekolo komo oa anu wene keda mati takoa iki-pe. Yerusaleme yename no poome lutukolika oyake lutumotou. Tuadekolupa Ali Muno Yesuke oyake tuou wa okale ¹⁴totome poamea wa kowitikoa kawa teko tokale ekete nipa Ali Munagono wene pikole taatekakoano pa wa okoo.

¹⁵Wa naniko tonekeya-kiti moa nodokatekoo Yerusaleme take poo wa poadete tokolopa ¹⁶eina Sisaria yene padeka-kitame pekete pato wa eya agono yapu Yesunole koto kakome takama yakene ago Nesone one yapu toto wetekapokoi. Nipa einago Saiperase take opiane ago-pala toto meatekooya tokale ni one yapu wetekapokoi.

Polo Yame Mekata Ugu Pekenemo

¹⁷Yerusaleme take witakolopa tone oya-mikitame ke ke wa toto maktukoa motokoi. ¹⁸Wa podolikama Yame enepato wa Poloyo toto-pala koua pome enekale Yesuno ali atoa yopia meane ali peya one mekata eida oboa meadekoi. ¹⁹Kini oboa mekoita eida pome kakome Poloyo e yene yono mootokoapa i i wa e ku pa yatene mekoika Akolali patu kautakoa kakome toma yakanakamo toaweaa oka. ²⁰Nitikale yatekete e yename Akolali kei pia kakoi. Nitoapa Polo-pala ekete ame i take toto Yu yatene ali atoa ege egeta wakala kadukoa Yesuke wene tugoaa meketepa Mosesene totono wedoa litia tiki. ²¹Ete

Yu ali-kitame eni yene-pala eya wa ak-
 eneya. Ne einago Poloyo e ku pa ya-
 tenane take toa pote meki Yu yene
 eya tamene wa olaukama yakome toko.
 Mosesene totono tewitikoia wawa kini
 ali matiyanane kepene teigamoa kini kau-
 mikitame tanele litia toamoa tamene wa
 olaukama yakome toko wa ne akoa iki.
²²Opi ne noke mekomo yakoino, edato-
 pe. ²³Ne einagome Mosesene totono
 litia tadeko wa eni Yu yene wene
 keaneyana memotoa teke eya tamene.
 Tone oya ali-kiti tuyonome ile too wa
 Akolali-pala oa togotokoina toa tekete
 padeya-kiti kekoa wawa noamoa tobou
 pine pituameneya meki. ²⁴Einali-mene-
 pala kibutua kake Akolaline leneke
 poanele takoa koikatapeneya meadete
 toatikile tamene. Nitoa oneke padeya
 lodo yoatikiya motokoa meamene. Ni-
 tikalepa einali-mename Akolali-pala ile
 too wa papete oa togotokoina toa toa
 peya takaketepa kini tobou pine pitu-
 tapeamele too. Neme eni yene auapea
 enile tokale enekete peyame eya wa
 oi. Ne i agome Mosesene totono litia
 tokono, ete yename ne akoa okoinapa
 kapene wakoa akedikiki wa oi. ²⁵Yesuke
 wene tugoia meki pa yatene ali atoame
 edikoa toatiki toa mena. Nipa eya-mene
 odene kekoa wawa noameamene wa to-
 tome oi pedoa pikoona toa pipia wia
 wetekakoo. Iponole toa toge kiane neeka
 kamateka noamoa ni kamate kakeneya
 kabe dekoa tukane kai tawe eya kia
 noameamene. Ni pamoko toameamene
 wa e ku pa yatene-kitike pipia wia
 wetekakoo wa Yesuno ali atoa yopiane
 ali-kitame Polo-pala okoi.

²⁶Nitaneyake podolikama Poloyo
 einali-mene moa aua poka. Nitoapa
 Akolaline leneke poanele takoa
 koikatapeneya meadete toatekoile
 einali-mene-pala odeneka toomotokome
 tobou losu yapu poka. Nitikome
 okome Akolaline leneke poanele takoa

koikatapeneya meadete toatekole ipete
 toa peya takadete toko. Ipete kime lodo
 yotokate tomotoa tone tone sipi sipi
 kai eya aua note menoo wa Akolalike
 lodo yotokoai tane ali-kiti-pala eina oi
 mepaneyana.

Polo Tobou Losu Yapuke Dekoa Motanemo

²⁷Ta tatono (7) kakoa patakale enile
 toa pea takatekoi tigotokale Polo tobou
 losu yapu pome kaka. Nitikale enekete
 Esia ta kawa nekene Yu yename eida
 kakoi peya oa kamotokoa Polo dekoa
 motokoi. ²⁸Nitoa kayo ekete ekete Is-
 erele yene tone ame-lawe toto wete
 auapenoe. I agomepa ta piko peyake
 ali atoa olaukama yakome toto Yu yene
 akoa agale oa tone totonoke poanemo
 oa tone i tobou losu yapuka paya
 tetepo takoa olaukama yako. Opi i to-
 bou losu yapu keneke pa yatene ali-
 mene moa aua nikilepa tone kekanele
 eni toko wa kayo oa kakoi. ²⁹(Kime eni
 tokoipa Epesase take opiane ago Teropi-
 masi Yerusaleme ta ludu Polo-pala opia
 yakale enekoiya tekete Poloyo eni pa
 yatene ago kini tobou losu yapu aua
 nokome toko wa wene pikete ni tokoi.)

³⁰Nitikolipa Yerusaleme take mekoi
 peya timini nakale padeka padeka kawa
 teyapea nekete Polo tobou losu yapu
 kakata note one dekoa motokoi. Dekoa
 moa akolono lia pitikakoli eina eina
 yopikoi-kitame kago-kiti ketekala tokoi.
³¹Nitaneyake one wia tukadete wili
 toa kakolipa ako tobou meane poyo
 agomepa Yerusaleme take meki-kiti ko-
 timi yoa kamokolokaki wa okoimo
 yatekome ³²eina eina oneke lokoia poyo
 ali-kiti yopiane ago-meneka pa poyo
 ali-kitika moa kepoke ketipea teya-
 pea kikilikoa aua eni Yu yene oboa
 kakoita pekeneya. Nitikale enekete e
 yename Polo ikimu wia wakoli ³³to-
 bou ago pinele pome Polo dekoa mo-

tokome okome i agopa kapa po takuta kakoa kebetamene wa ootokoa kakome okome i agopa mani ago-pe. Edele tokale tokoiya-pe wa yateka. ³⁴Nitikale eida oboa kakoi-kiti padame pade oa padame pade oa ate keti toa kakoli tokome pine pitia yakamele toamokale kakome okome i ago ate poyo yene tone pawe kago kawa motane yapu aua yatepoe wa poka. ³⁵Nitikale Polo a yapu ate poademe tili waneke keku keneya kakale e Yu yename apua takoa kobeyo pote edelogakoli tokome poyo ali-kitame kini yoname leyo toa Polo yonoto yonoto toa aua pokoi. ³⁶Nittoa aua pokoika eni yename litima note kayo ekete ekete winago wia tukakoe wa awitikama nokoi.

Polo Pinali One Wa Kei Pikome Akenemo

³⁷Nitaneyake poyo ali-kitame Polo a yapu tuapea aua poadete tokoika Poloyo ako tobou poyo ago yatekome okome nepala agale pade ukuno, ne oyake yateko pe-kale okome ekee Geriki agale wene toa oko. ³⁸Nipa nepa eya ago toameadeko. Ali atoa wia tukakala tane ali ege egeta kadukoa (4,000) poi kamotokoa moa ali piamene take aua pekene Idipi ago ne toameadeko wa okale ³⁹Poloyo okome nopa Yu yatene ago Silisia ta keneke piko Tasase take opiane ago. Nopa eni ibini akene take agono, e Yu yene-pala agale pade ouno, oyake-pe-kale okome ⁴⁰geno, amene wa okale Polo tili waneke kakome yoname e yene kawikoa kakale agale kawilogakoli Iberu agaleke eya wa oka.

Poloyo Yerusalemey Yu Yene-pala Akenemo

22 Ame atai-loe pinali anu kei plane oatekumo ukuno, yakoe wa okale ²yatekete ekete ekee i agome tone Iberu agaleke eni oko wa agale

teitoa wawa kakoli okome ³nopa Yu ago Silisia ta keneke piko Tasase take opianeyake Yerusalemey take tubetoane kakene eya ago Gamelielene sukilike pokouya. Einago Gamelieleyo tone kua-mikitame litia toma nekene totono litia olaukatapekale yakoane tokou. Nipa kime Akolalinele wedoa takama niki toane noanumeka wedoane takama nuku. ⁴Nitikenepa i weneya totono litia tiki yene tete meane wiane tukoane alika atoaka kebetoane po yapu pitikoane tokou. ⁵Kipala i ukumopa ako odene mekome Akolalike lodo yotokoai toko tobou agomeka ete Kanosolo ali peyameka no einagome nimini eni oko wa no kei pia amele toko. Eni tobou ali-kitame kini oya-mikiti Damasikase take mekika i pipia meamene wa pipia wia metekoli moomotekene Damasikase take pokou. Nipa weneya totono litia tiki-kiti kibu momotoane oto Yerusalemey take liane auane nou wane pokou.

⁶Damasikase take poadene pekene tigotokakoane witapokouta lou matai ke pene kelema ponokale a tibuke pa toa kaka matiyame keti toawineya nome no ewetemoa pikale ⁷itonoke auane pitakene yatekolu padame agale okome okome Solo Solo no edeyake tete mekala toko-pe wa okale ⁸yatekene ekene Ali Muno nepa te kake oko-pe-kolu okome neme tete mekala tokago Nasarese Yesuyo uku wa oka. ⁹Nitikake nopala opia nokoi ali-kitame eni toka pa eneketeke nopala agale oa kakamo yakamokoi. ¹⁰E yename yakamokolika ekene Ali Muno anume edele tomotoa oko-pe-kolu okome Damasikase take poke mepamene. Poke mekale neke toatekale Akolaliyo kotukapikale-kama i i wa panagome nokome oono, wete kamo poano pa wa oka. ¹¹Eni toka pame anu leneta likaneywa tokome nopala opia nokoi

ali-kitame anu yono moa aua pote Damasikase take mekapokoi.

¹²Eni takepa Mosesene totono wedoa litia tokago Ananaiasi meaneya. Damasikase Yu yene peyame one kei piai taneya. ¹³Einago no mekouta nokome okome ame Solo neke leneta wa kikoa ena wa okaka eina eina leneta kikakatapeneya enekolu einago kakale enekou. ¹⁴Nitikolu okome ame tone kaua-mikitane Akolaliyopa eya tomotoa ne moa kakapianeya. One wene pikole wene toa toa ni wene kiyo akeneya-kama mekago enoa ni einagome nepala agale awa okale yakoa tomotoa tokome ne moa kakapianeya. ¹⁵Nitaneyano, neke leneme enoa kaleme yakoa tokanakamo ali atoa pitikoi toa pima yake i i wa akama poo. ¹⁶Edoa ita nepia meade-pe. Neke poanele kōa mitikakamoto, Yesuno ibini wedekoa ue moamene. Wete kamo wa Ananaiasiyo oa poka.

¹⁷Nitaneyake Yerusalemewakapeane none mekou. None mekene tobou losu yapu pone kowitikoane kakene pulete keneya enekolu ¹⁸Ali Muno no kakouta nokome okome anukumo neme oa metekolo i take meki-kitame yakamadete wakino, i ta wete tewitikoapa-kale ekene ¹⁹Ali Muno papete losu yapu kaka toane pikilepa neeke wene tugo mekoi-kiti po wapime wiane po yapu pitikoane toadene tokouno, i take meki-kitame anu eni toma yakounakamo yatekete tokoi. ²⁰Neke agale akama pokago Sitipane ete Yu yename wia tukakoina-pete noka e yene-pala opiane kakene oyakeno toe wane eya tokou. E Yu yename einago wia tukadete kini tokoo mamina kotokoa pitikakoita eni mamina nepikoane kakou wane Ali Muno-pala okou. ²¹Nimo okolu okome e ku pa yatene ta tetemada mekika ne pa wane ne wetekouno, wete pa wa Ali Munoy nopala oka wa Poloyo oka.

Onepa Lomane Yatene Ago

Wa Polo Pinali One Wa Kei Pianemo

²²Poloyo agale okoa kakale e Yu yename yakakoa meaneyake one wip-itikome okale yatekete agale telo oa kamotokakete ekete i agopa katekoa wato. Wete wia tukato wa kōa kakoi. ²³Nitikete kini tokoo kakene mamina kotokoa kogoa itono kugue-pala moa ate tadekoa tokoi. ²⁴Nitikakoa ako tobou poyo agome okome Yu yename i agopala wene pokete uu kayo oa kakino, one tanemo tete nakome omotono, tone a yapu aua pote layo toua wipoe wa oa poka. ²⁵Nitikale e poyo ali-kitame aida aua pekete wiadete kebetelogakili Poloyo kiwi yopikago one lutukoia liti kakale eya wa yateka. Lomane yatene agopa one tanemo-kiti koiso yopikagome wete pitia yakameneyake oyake layo toua wiamele toko-pe wa okale ²⁶yakamotokome einagome ako tobou poyo ago mekata wete pokome okome mone i agopa Lomane yatene ago tadekono, edoa layo toua wimotape wa okale ²⁷tobou ago Polo kakata nokome yatekome okome nepa Lomane yatene ago-pe-kale okome eno, nopa Lomane ago kaku-kale okome ²⁸ae nopa pa yatene ago opianeyake tubetoane kakene Lomane yatene ago latiadene kue peya mati metekou wa okale Poloyo okome Lomane agome no opianeya wa oka. ²⁹Nimo okalepa one pitia yakatekoi ali-kiti ete witimoa kakoi. Ako tobou poyo agoka i agopa Lomane yatene agoke kapa po kakakou wa pitime tuaneya kaka.

Polo Kanosolo Yenane Lene Yoto Kakenemo

³⁰Podolikama ako poyo tobou agome eya toka. I agome edele taneyake Yu yename akoo agale ikiti patuno, pine

toane pitiane yakou wa Polo kakane kapa po kotokaka. Nitoapa Akolalike lodo yotokoai tane tobou ali-kiti ete Kanosolo ali peya koukoa noe wa agale oa wetekakale koukoa note mekoli Polo moa aua pome kini lene yoto kakapoka.

23

Poloyo e Kanosolo ali-kiti nepikoa pikome okome anu oya-mikiti tubetelaukene Akolaline leneke tepeme epetanele ta wa okale-kama toma nokou. Opi-kitika pa edikoane toma yaku wa oka. ²Nimo okalepa ako odene mekome Akolalike lodo yotokoai tane tobou ago Ananaiasiyo Polo kakaya liti kakoi ali-mene-pala okome winago kabunu kugutukoa wia wa okale ³Poloyo okome yapu ekolopa kego nakeneya kamotoake akolono kegelepa koniyo takoa peno yotokou toa wini toko. Mosesene totono litia neme no pitia yakamedeko. Nitameneya eni totono tetekake eke no i ago wio wapa wini meke okono, pale wini tokona wa Poloyo okale ⁴one kakaya liti kakoi ali-kitame Polo-pala ekete ako odene mekome Akolalike lodo yotokoai toko tobou ago-pala wini oa potokako-koli okome ⁵ae anukameyo einagopa ako tobou ago mekono wene toamekene okou. Neke ako tobou ago-pala poanemo wameamene wa Akolaline bokuke wia mekaneyake tokou. Ela toko wa Poloyo oka.

⁶Nimo ootokoa enekale e Yu yene padekapa Sadusi yene wa padekapa Parisi yene kakedekoli enekome kayo okome okome anu oya-lawe noka Parisi ago. Agetaika Parisi ago. Tua pekene ali atoa kamoia pomotoane nepikoane mekene wediane mekuleke pade-kitame no koiso akaki wa okale ⁷yatekete eina eina Parisi ali-kiti Sadusi ali-kiti ete oto agale oa pilia puutakutukoa kakoi. ⁸(Einapa Sadusi totono litia tiki Yu yenamepa tua pokoi ali atoa wa

kamoia poamoi wa olaukoa ni edelo alikitika ali atoane yominika meamiki wa olaukakiya. Nitikiyake Parisi yenamepa tua pokoi ali atoa kamoia poi wa olaukoa ni edelo alikitika ali atoane yominika meki wa olaukakiya.) ⁹Poloyo oka agaleke e yename agale telo oa kamotokakoi. Nitoapa Yu yenane totono pine toa olaukane ali padeka-kitipa Parisi yene tekete kamokoa kakete agale telo ekete ekete i agome poanele padeleka toameadeko. Edelo agomeka yomini padameka onepala ko akeneya patu wa okoi. ¹⁰Nitikoli peyame uu wa ete oto wa pili pili toa kakoli enekome ako tobou poyo agomepa e yename Polo kawa yono tekea tadekakaya tokale one poyo ali-kiti keti wetekakome okome kei ago odoia moa tone poyo yapu oto aua noatino poe wa keti wetekaka.

¹¹Podolikama ta likaka Ali Muno one pono Polo yamenokome okome anukomopa Yerusaleme wini akama pokana toa Lomane takeka akama poano, piti moameneya wedia meamene wa oka.

Polo Wia Tukatekoi Oi Pedoa Pianemo

¹²Podolikama ta patakaka Yu ali pade-kitame Polo wia tukatekoi oi pedoa pianeya. Nipa one wete wia tukameneyake ue neeka wawa noamato wa taneya. ¹³Eni oi pedoa pikilepa padeka noi kakoa (40) alime taneya. ¹⁴Nitimotekete Akolalike lodo yotokoai tane tobou ago-kitika Yu yene yopiane ali-kitika oboa mekoita pekete ekete Polo wia tukateko oi pedoa pia noko. One wete wia tukameneyake ue neeka wawa noamato wa oi pedoa pikooyano, ¹⁵eya tamene. Ete Kanosolo ali peya kime tobou poyo agoke agale wia wetekakete ekete winago Polo one tanemo pine toa pitia yakoono, Kanosolo yapu oto keti aua namene wa agale oa wetekamene. Polo einago

oto noameneka kutu dekaoko poi pia wipoono, einago oto nomotono, agale oa wetekamene wa onaneya.

¹⁶ Polo wiatekoi oi piadekoimo Polono awene matiyame yatekome poyo alikitane yapu pome awene pubu opaneya.

¹⁷ Nitikale yatekome Poloyo poyo alikiti yopikago pade nepala agale pade oono, wete no wa kayo oa motokome okome i matiyamepa neke ako tobou ago-pala agale pade oademe tokono, one mekota aua pa-kale ¹⁸ tobou ago mekata aua pokome okome po yapu pitikago Poloyo no kayo oa motokome okome i tualime tobou ago nepala pademo oono, ne mekota aua pa wa okolo auane nuku wa akeneya. ¹⁹ Nitikale tobou poyo agome matiyane yono moa paka witimoa aua pome yatekome okome nopala edemo oade noka-pe-kale okome ²⁰ Yu yename kini oi pedoa plane toa eya wa oa toi. Winago Poloyo tanemo pine toa pitia yakoono, podolio winagopa oto keti Kanosolo alikiti koukoa mekoota aua namene wa ne oa yotokoa agale oa wetekoino, ²¹ kini okoimo yakameamene. Padeka noi kakoa (40) alikitame one wiadete poi pia mekete tiki. Nipa agetai tia one wete wia tukameneyake nee ueka wawa noamato wa oi pedoa plane toa poi pia mekete tiki. Ipete auane nou wa neme oi metadekamo yakoukete nepia mekete tiki wa matiyame akeneya. ²² Nimo okale tobou agome okome wini okagalepa eko alikiti enekepa tobou ago-pala imo wane okou wa wamoano pa wa wetekaneya.

Polo Sisaria Take Moa Wetekanemo

²³ Nititikoia tobou agome oneke lokoia tobou meane poyo ali takuta wete noe wa kayo oa motokome okome ka ludu kawame poatiki poyo ali kadapime kadukoa (200) takoa moa ni osi kai patu mea poatiki poyo

ali ege odepeta kadukoa wa kapidi kakoa (75) takoa moa ni lama tigine poatiki poyo ali kadapime kadukoa (200) takoa moa tamene. Ta likaka 9 kilokoke eni poyo ali-kiti-pala Sisaria take aua poatino, wete takoa mopamene. ²⁴ Polo mea poateko osi kai-meneka takoa moamene. Nitoapa onepala padele takaya tokale osi kai patu mekoa wedoa yopikoa-kama aua pamene. Nipa ta yopikago Pilikisi mekota aua pamene wa akeneya. ²⁵ Nititikoapa Sisaria ta yopikago Pilikisike pipia wia wetekakome okome ²⁶ nopa Kelodiasi Lisiasiyo i pipia wiane mekaku. Kamo koniyali Pilikisi neeke agale deya wiane wetekakene eya wane ukuno, yakamene. ²⁷ Ne mekota moane wetekaku agopa Yu yename dekoa moa wia tukadete tokoiyake toane mopokou. Nipa one Lomane yatene ago tadekale yakamotekene anu poyo ali-kiti-pala auane pone toane mopokou. ²⁸ Nitoanepa i agopa koiso edeyake akooa iki-pe wane pitiane yakadenepa Yu yenane Kanosolo alikiti oboa mekoita auane pokou. ²⁹ Nitoane pitiane yatekolupa one po yapu pitikakene one wiane tukakene toatekoule piameadeka. Yu yene pa kini totono i agome tetekakala toko wa ni koiso akooa akedekoi. ³⁰ Wa naniko Yu yename einago poi pia mea wioukete oi pedoa pianemo yatekenepa eina eina ne mekota i ago moane wetekou wane neeke wetekaku. One koiso akaki yeneka ne mekota koiso akapoatino poe wane neeke wetekakuna. Anu agale eni peya. Wete meamene-ye wa ako tobou poyo agome ta yopia meane agoke eni pipia wia wetekaneya.

³¹ Tamene wa akenele litia teketepa likonu poyo alikitame Polo-pala aua pote Adipaterise take dekoa pipokoi.

³² Piimotekete podolikama osi kai patu mea nokoina poyo alikitame Polo-

pala Sisaria take aua pote-kama kamo-toapa kawame nokoina poyo ali-kiti Yerusaleme take kini poyo yapuke waka-pea pokoi. ³³Nitikoli o yename Polo-pala aua pote Sisaria take witakoi. Ni-toapa ta yopiane ago Pilikisi mekata pekete pipia metekete einago Polo ina wa metekoi. ³⁴Nitikoli ta yopiane agome pipia moa oi mootokoa Polo ne mani take ago-pe wa yatekale okome Silisia ago kaku-kale okome ³⁵ne koiso akatekoi yene oto nokolipa neme tanemo pitiane yakou wa ootokoa kakome one poyo ali-kiti-pala okome i agopa Erodeyo Yu yene talo tokome meko yapu aua pote mekoa yopikoa kamene wa meteka.

Yu Yename Polo Koiso Akakete Akenemo

24 Ta ko kakoa (5) patakalepa ako odene mekome Akolalike lodo yotokoai tane tobou ago Ananaiasi Kanosolo ali padeka-kiti-pala koua Sisaria take keti nekeneya. Lomane totono wene toa koiso akene ago Tetalasi einagoka eni yene-pala opia nekeneya. Enika eni yenepa ta yopikago Pilikisi mekata note Polo koiso akananeya.

²Nitaneyake koiso yopikagome Polo ne noo wa kayo oa motokale Tetalasi kamokakome agale titikome okome kamo koniyali Pilikisi nemepa tone ta talo toa epetekakolo tokome toto peya kotona kilikoa meko. Ele kule poaneleka neme oa pilia motokakana tokome toto peya mea epetekako. ³Ta pataka abuna eka kuka meko toa totome nepala kekama oko. ⁴Agaledo ludukiya okolupa ne koome tukayano, pa tigini ouno, toto ela moa yakamene. ⁵Winago Polo enekakole-kama tokagopa Yu yene pitiki toa pima yakome oa kamotokama yako. Nasarini totono litia tiki yene kini tobou ago pade wini kako. ⁶Winagome tobou losu yapuka toa potokoa eneka. Ni-

tikalepa tone totono litikete pitia yakoa koiso akato wa totome dekoa motokolo ⁷ako tobou poyo ago Lisiasi one poyo yene-pala teyapea nome einago telo odoa moa poka. ⁸Nititikoapa winago Polono koiso akako-kiti toto ne mekota koiso aua poatino poe wa wetekakale nokoo. Winagome toma yakole totome ni koiso akakopa inapa nimini akedeki wa wene toadepa one tanemo neke pitia yakamene wa Tetalasiyo oka. ⁹Nitikale e Yu yene peyameka Polo koiso akakete ekete ¹⁰eno, Tetalasiyo nimini oko wa oa kakoi.

Polo Pinali One Wa Kei Pikome Akenemo

¹⁰Nitikolipa Polo pinali one wa kei pimotoa tokome tobou ago Pilikisi kabe togoikakale Polo kamokakome okome nemepa toto Yu yenane ta kotona yopikoa kakanano, pinali anu wa kei pikilepa atiki tootapeane tuku. ¹¹Yerusaleme take Akolalinele takoane kowitoane toadene i ta tewitikoane pone mekilepa ludu pitikoane meamokou. Ta tuku (12) kakoa wete patameneyake oto wa nokou. Einapa nimini akedekolu neme oyake pitia yakou. ¹²Aida Yerusaleme take pone mekenepa tobou losu yapu keneke ete Yu ali-kiti-pala mokota wamoane kini sinokoke losu yapu-kiti kenekeka kini yapu luduka ali atoa oane kamotokamoane tokou. Enile toma yakoule i Yu yename enekoiya mena. ¹³Nopa neme poanele dikoa tokale enekou wa padameka neke leneke kakete oyake toaweana wamoi. ¹⁴Eya wane toaweane ukuno, yakamene. Yu yene tone kaua-mikitane Akolali onekele takama nekenepa weneya totono litiane tuku. Eni weneya totonopa i yenamepa kapene totono wa iki. Mosesene totonoka Akolaline agale toaweana akane ali-kitame wia mekane

agaleka eni agale peya noanumeke yakoane motokouyake iki. ¹⁵I yename Akolaliyo taatekoa toatekole nepia meki toane noanuka kolotine mekene nepiane meku. Nipa epetanele toma yawa tuane yeneka poanele toma yawa tuane yeneka Akolaliyo moa kamotokamotoane nepiane meku. ¹⁶Nitikenepa Akolaline lenekeka ali atoane lenekeka kiyo akenele-kama tou wane toane enekala tuku.

¹⁷Mali pade-mene ta tetemada pima yawane Yerusaleme take wakapeane nokou. Nipa no yatene ponopene ali atoa kue eya tatikoane Akolalike padeya lodo yoane toadene nokou. ¹⁸Eida tobou losu yapu keneke Akolaline leneke poanele koikatapeneya kakene enile toane kakouka Yu yename no ena-mutukoi. No eida kakouka ali peya mati kawamoa uu wa oa kawamoa tokoi. ¹⁹Einata einapete Esia ta kawa nekene Yu yeneka kakoi. Eni yename padeya namike no koiso akatekoimo piadekalepa ne mekota koiso akanoi tokano, noameadiki. ²⁰Eni yenepa oto noameadikino, i note kaki Yu yenamepa no Yerusaleme take Kanosolo ali-kitane lene yoto kakolu pitia yakoai tokoino, no poanele tadekolupa eni poanele tokoumo neme yakakakolo toaweaa omo-toane uku. ²¹Yu yename anu koiso akakilepa eya tokouleke tiki. Kanosolo alikitane leneke kakene kayo ekene ekene Akolaliyo tua pekene ali atoa moa kamotokoo wane okounakamo ke anu koiso akaki wane kayo okou.

²²Polono koiso yatekakago Pilikisiyo eina weneya totono wene tane ago tokome poti yakakoa meka. Nitoapa Poloyo enimu okamo yatekome okome koiso opipa eida nami kakalogoawatoe. Tobou poyo ago Lisiasi oto nokalepa neke tanemo pitiane yakatapeou wa oka. ²³Nitoapa one poyo ali-kiti yopikago Polo yametekome okome i ago

Polo po yapu wa pitikapekepa mama moa nepikoa kamene. Nipa padeyakititi toamokalepa one oya-mikitame motokoa aua nomotamene wa oa poka.

²⁴Ta pade-mene patatekaneyake Pilikisi one natono Derusila-pala eida nekeneya. Einatoapa Yu atoa. Pilikisi eni nokomepa Polo oto nomotamene wa kayo okale nokome ali atoa Keraisu Yesuke wene tugakete toatekoimo toaweaa okale yakakoa meka. ²⁵Nipa ali atoa wene kiyo akeneya mekete toatekoimo ni ua moa yawatekoimo ni Akolaliyo ali atoa takoa enoa akatekamo Poloyo i i wa toaweaa okale yakakoa mekome Pilikisi tepe lagotokale piti tokale mekome okome wa padepete padele-kiti toamekene yakameledo tokapetepa namene-ye wane kayo ouno, opi pa wa wetekaka. ²⁶Pilikisi einagome Poloyo one yapu poukome kue memotoa ni taneya. Eni wene pianeya mekomepa ipete kue meteko patu wa lugutukoa kayo oa moapa one-pala ko lede okala taneya.

²⁷Mali takutake Pilikisiyo edikakala taneya. Nitaneyake one luku eya ago Posiasi Pesasi Yudea ta yopiademe nokale Pilikisiyo Yu yenane wene epetekadene tuku wa Polo po yapu eida pa memotoa wawa poka.

Poloyopa Ako Tobou Ago Sisayo One Koiso

Yatekamotoa Akenemo

25 Pesasi einago Yudea take nome mekomepa ta tebolo takoa patakale Sisaria ta tewitikoaa Yerusaleme take ate pome mepaneya. ²⁻³Nitikalepa Akolalike lodo yotokoaitane tobou ali-kitika ete tobou ali-kitika Pesasi mekata nekete ekete Polono koiso akoono, oto Yerusaleme take nomotono, agale oa wetekoano ta wa

akeneya. Nipa Polo nokata poi pia mea wiadete ni akeneya. ⁴Nitikoli Pesasiyo agale topo takakome okome Polo einago Sisaria take pa eida mea kamotou. Sisaria take keti poateku tigotokono, ⁵einagome poanele tadekalepa one koiso akadete kini tobou ali padeka-kiti nopala opia keti nomotamene wa Pesasiyo akeneya.

⁶Ta pataka ketepo (8) kakoa patu noi (10) kakoa patu Pesasi eni Yu yene-pala Yerusalem eida mea kawa Sisaria take keti wa wakapea pome mepaneya. Nitoapa podolikama koiso yopikago meateka walaike pome mekome kunago Polo oto aua noe wa okale ⁷Polo nome kakale Yerusalem kawa nokoi Yu yename one kakata unukoa kakete ekete i agome dika dika toamene poanele toka wa okala tokolika kini eni akoo okoimopa niminimo wameadekoi. ⁸Nitikoiyake Polo pinali one wa kei pikome okome toto Yu yatenane totonoka tone tobou losu yapu totonoka tetekamoane ako tobou ago Sisane totono tetekamoane tokou wa oka.

⁹⁻¹⁰Nitikale Pesasiyo e Yu yenane wene epetekademe tokome Polo-pala okome i yename nepala akoo ikimopa Yerusalem take pekene pitiane yakouno, patoa-pe wa okale okome e'e, mena. Tobou ago Sisayo anu koiso Lome take pitia yatekamotoane uku. Noanu koisopa Lome take eida akamediki. Yu yene toane potokakileka toamokou. Enipa neme wene toko. ¹¹Lomane yatenane totono tetekakouleke no wia tukameledo tokalepa nipa no wia tukamotoane keku. Yu yename nopala akoo ikimopa niminimo wameadekolipa nipa i Yu yenane yonoke teyo no moa meoo tokolo-pe. Ako tobou ago Sisayo anu tokoumo Lome take eta pitia yatekamotoane ukuno, koiso opi ita wamato wa Poloyo oka. ¹²Nitikale Pesasi one koiso auapekoi

ali-kiti-pala oboa mekome dikou wa oa togotokakome Polo-pala okome tobou ago Sisayo neke tokoumo pitia yatekamotoane uku wa wini okono, tobou ago Sisa mekota moane wetekou wa oka.

Polo Tobou Ago Ageripane Leneke

Kakome Akenemo

¹³Ta pade-mene patatekaneyake tobou ago Ageripa natono Benaisi-pala Sisaria take ugu nome menaneya. Nipa Pesasine yono moa agale akademe nekeneya. ¹⁴Ageripa adona ta pade-mene pataka toa eida meetekaneyake Pesasiyo tobou ago-pala Polo ko oa kakome okome Pilikisiyo i Yudea ta yopia mea tewitikakomepa padago po yapu pa mea kamotoa wawa poka. ¹⁵Noanupa ate Yerusalem pokolupa Akolalike lodo yotokoai tane tobou ali-kitika ete Kanosolo ali-kitika no mekouta nekete einagono koiso akakete ekete Polo winago pitia yakatekoa kibu motokamene wa akanokoi. ¹⁶Nitikoli ekene toto Lomane yatenane totonopa dikakoya. Koiso yakoo meketepa odene lono yakamoko. Nipa pade-kitamedo panagono koiso akakilipa einago nokome pinali one kei pia enemotoa toko. Nipa one koiso akaki yenane yonoke toto Lomane yatenane pa moa pikoya mena wane okou. ¹⁷Eina Yu yene nopala opia oto Sisaria take nokoli podolikama koiso yopiane meatekou walaike pone mekene einago Polo oto motokapoe wane poyo ali-mene moane wetekakou. ¹⁸Nitikolu einago nome kakale one akoo agale okoi-kitame kamologoa i i wa one akoo oa kakoi. Nipa einagome padele padele poanele tanemo toaweao oino wene plane yatekolu pamo-kama akakala tokoli yatekou. ¹⁹Nipa kini losu totonoke einago-pala agale

toonali yoa ni panago one ibini Yesu tuake wa kamoā pekeneya wa Polo einagome akenemoke wene pokete akōa okoli yatekou. ²⁰Nitoane yakakoane mekenepa edoane pine toane pitiane yakou wane wene pikene i ago Polo-pala eya wane okou. Yerusaleme pekene ne wa pitiane yakouno, patoa-pe wane okolu okome ²¹e'e, mena. Ako tobou ago Sisayo anu koiso yatekamotoane ukuno, ita po yapu wa plane meou wa oka. Nitikalepa i ago Sisa mekota moane wetekouno, po yapu wa pitikōa poti nepikōa kamene wane anu poyo ali-kiti metekou wa Pesasiyo akeneya. ²²Nitikale Ageripayo Pesasi-pala okome einagome agale okale onemeka yakou-kale okome nipa podolio yakamene wa Pesasiyo akeneya.

²³Podolikama Ageripa-pala Benaisita ali atoa koukoai taneta note menokoi. Poyo ali-kitane ako tobou ali-kitika eni take ibini akene ali-kitika kaloa tukoa eida kibutua nokoi. Nitikolipa Pesasiyo Polo oto aua noe wa agale oa wetekakale nokale ²⁴Pesasiyo okome tobou ago Ageripa ame-loe nepalaka ita oboa kaki-kiti kikalaka agale oane meteku. Tone leneke kakagoke ukuno, yakoe. I Sisaria takeka Yerusaleme takeka Yu yene peya nooke-kama nekete kayo telo ekete ekete i poane agopa toto mekota meamele toamokono, neme wia tukakamene wa tikakoa kakala tokoi. ²⁵Nitikoiyake one tanemo pitiane yakatapekolu one wiane tukatekoule oneme pade toameadeka. Nika tone ako tobou ago Sisayo one koiso yatekamotoane uku wa i agome oka tokolo Sisa mekota moane wetekakuno wene pikene uku. ²⁶Sisake pipia wiane wetekatekuyake i agome tanemo i wane wiane wetekatekumo pade piamoko. Tobou ago Ageripa nepa wene tane agono, nemedo opi pitia

yakoa wane i ago neke leneke moane kakakuno, neme pitia yakatekōa okamo yatekene i agome tanemo i wane wene tekene pipia oyake wiane wetekou. ²⁷Nipa po yapu pitikago Sisake moane wetekakilepa one koiso akōa ikimo i wane wiane wetekamekenepa nipa pale tekene tou. Nitamedekuno, neme pitia yatekamene wa Pesasiyo Ageripa-pala oka.

Ageripane Leneke Kakome Polo Pinali

One Wa Kei Pikome Akenemo

26 Nitikale Pesasiyo Polo-pala okome pinali neke wa kei pia agale oano ta wa okale Poloyo agale oademe yono kamotokakome pinali one wa kei pikome okome ²ako tobou ago Ageripa i Yu yename no koiso akōa ikili pinali anu wa kei plane ikilepa ne kakakoane ukuno, ke wane wediane kakene uku. ³Nipa no Yu yatenamepa kini kua-mikitame tanele po pitia toma pikileka emo kumo pili pili toa ikimoka neme wene tootapekolo tekene ni ukuno, i ukumo poti yakakoa meamene.

⁴No yatene pakeke mekene tokoumo tualike laigoane Yerusaleme take pone mekene tokoumo Yu yene peyame wene tiki. ⁵Nipa Parisi yename tone losu totono-kama litia tikilepa ete Yu yene peya moa patukakete tiki toane litiane tokou. Nitima nokoule Yu yename koto enoa wene taneya mekino, no auapead-etepe einapa nimini oko wa no kei pitikiyano, omotono ta. ⁶Opi anu koiso akōa ikilepa eyake tiki. Akolaliyo toto Yu yenane kua-mikiti auapeatekamo papete oa plane toa taatekakolo kolotine nepiane mekulu tokome koiso akōa iki. ⁷Enile taatekakolo toto Yu yatene tuku (12) kakoa yateneka kolotine nepia meki. Nitoa nepia mekete onekele ete pia oto pia wedoa takama

piki. Ali Muno Ageripa, Akolaliyo oa pi-ane toa taatekakolo nepiane mekuleke Yu yename anu koiso akoa iki. ⁸Akolaliyo one eina oa pikana toa taatekoa tokomepa tua pekene yene moa kamotokamele toamoko wa wene pikipa edekolo wene piki-pe.

⁹Papetepa padele padele toane Nasarese Yesuno ibini paya tetepo takou wane wene plane mekou. ¹⁰Yerusalem take nitoane mekene Yesuno agale litia tane yene peya mati po yapu moane pitikakala tokou. Nipa Akolalike lodo yotokoai tane tobou ali-kiti patu kautakoane kakene tokou. Nitoanepa eina ali atoa wia tukatekoi oi pedoa pikolika oyakeno, toe wane okala tokou. ¹¹Losu yapu kakoka ali atoa kibu moane ni Yesuke poanemo omotoane toane enekala tokou. Nitoanepa Yesuno ali atoa-pala kotimi yotokou matiyame mone ta-kitike toa pekene ali atoaka tuku toane moane tete mekala tokou wa Poloyo oka.

Polo One Tepe Kolotini Yesuke Pekoa

Pianeleke Akenemo

(Aposelo 9:1-19, 22:6-16)

¹²Damasikase takeka enakale tou wane pokou. Nipa enile toatekou pipia Akolalike lodo yotokoai tane tobou ali-kitame wia metekoli moane pokou. ¹³Poadene pekene enekolu lou mataike keleponokaka a tibu laigoa pa toka matiyame pitoa no payapono pia unukakale enekou. Kamo koni tobou ago Ageripa, eina papa lou pa toko toa moa patukaka. Nitika pame nopala opia pokoi ali-kiti toto payapono pia unukakale ¹⁴toto peya itono aua pitakolo panagome Iberu agaleke nopala okome okome Solo Solo no edeyake tete mekala toko-pe. Pinagome layo toua witikolo pitimekawe kaime ete pedekaku pokome toa tete motoko

toa pinali neke wa tete motokakala toko-kale yatekene ekene ¹⁵Ali Munago nepa te kake oko-pe-kolu okome neme tete mekala tokago Nasarese Yesuyo ukuno, ¹⁶opa wete kamokoa ka. Ne pono yametekilepa anukule takama poatekago moane kakadene tekene tuku. Nitikuno, ne pono yametekumoka ne naniko yameatekoule-kitika i i wa ali atoa pitikika toawe akama pamene. ¹⁷Iserere yatene pitikikaka e ku pa yatene pitikikaka anukumo akama pa wane wetekakenepa ne auapeane yopiane-kala kawou. Nipa eni yename ne-pala padele tokolipa toane mokala tou. ¹⁸Eni ali atoa yomiyomu keneke mekete tikino, pa tokota meati wa kini lene kikakoa yamema pamene. Eni ali atoa Setanuke lukoa mekete tikino, Akolalike lukoa meponomotamene. Nitikalepa Akolaliyo eya too. Eni yene no Yesuke wene tugakolipa kini poanele toma yakoi ke po letu mekakanapa keetapea poanele wia mitikoo. Nitoapa one wa takoa motane yene odeneya moa obokakomepa onekeya-kiti kuni wa yameoo wa Ali Munoyo nopala oka wa Poloyo oka.

¹⁹Nitikome okome tobou ago Ageripa eina pulete enekounakale tagamoane onekemo akama yakou. ²⁰Onekemo akama yakilepa Damasikase ta laigoane tokou. Nititikoane Yerusalem takeka Yudea ta luduka pa yatene-kiti pitikikaka pima yakene ekene kuni namolo poane wene wia wawa Akolalike tepe kolotini pekoka piamene. Tepe kolotini nimini pekoka pianeya meadiki wa ete-kitame wene tomotono, epetanele toma pamene wane oma pokou. ²¹Nitikolu tokome Yu yename tobou losu yapu pone kakouta no enamutukete wia tukadete wili toa kakoi. ²²Nitaneyake Akolaliyo no auapekala tokano, opika einaka einamo ita kakene ikilepa ibini akene yene-pala

ibini wamene yene-palaka uku. Nipa Moseseyoka Akolaline agale toaweaa akane ali-kitameka papete oa plane toane ikilepa pademoka anu weneme titiane wamekene eya wane uku. ²³Keraisu taatekoa nokome tete moa mea tuamedeka. Nome tukomeke ali atoa naniko kamao pomotoa one namolo takoa kamao pamedeka. Kamao pokomepa Akolaliyo Yu yeneka e ku pa yateneka toa moa pa takatekamo i i wa toaweaa amedeka wa Poloyo Ageripa-pala oka.

²⁴Polo pinali one wa kei pikome nimo oa kakaka Pesasiyo teigakome okome i ago Polo leau oa kake wini okono, pademo pademota yakoa luaneya teke pinali neke wa wene bebo akatapeadeko wa telo okome okale okome ²⁵kamo koniyali Pesasi, leau ekene wamukuno, poti uutukoane kakene ipa niminimo uku. ²⁶Ako tobou ago Ageripayo anu ina ukumopa yatekala tokome tokano, one mekakoane ikilepa atiki toane kakene uku. Ina ukule-kitipa paigakoa taneya menano, ee nimini wa oneme wene toko. ²⁷Tobou ago Ageripa ne eya wane yatekene uku. Akolaline agale toaweaa akane ali-kitame papete wia mekapiane agalepa enipa nimini akedikiki wa neme wene toko-pe. Ee nimini wa neme wene toko wa Poloyo oka. ²⁸Poloyo nimo okale Ageripayo okome wini agale tigini ikilepa noanume Kerai sunole takamotoa oko-pe-kale okome ²⁹agale tigini ekeneka ludu pitikoane ekeneka Akolaliyo eya toamotoane kini kowitikakene uku. Tobou ago neka anu agale opi yakoa meki-kitika kiwi peya no keneya ago latimotono ta wane kowitikakene uku. Noanu yono kapa po kakaneya kaku toa dikaneya kamotoane wamuku wa Poloyo oka.

³⁰Nitikale tobou ago Ageripa natono Benaisita Yudea ta talo tane ago Pesasi toa kipala opia mekoi peya kamotokoa

pokoi. ³¹Nittoa akolono pote ootakutukakete ekete i ago wia tukatekoleka po yapu pitikatekoleka pade piameadeko wa oma pokoi. ³²Nitikoli Ageripayo Pesasi-pala okome ae i agomepa Sisayo one koiso yatekamotoane uku wa wamoo tokapa padele poanele toameadekono, poano pa wa neme one po kotokoa wetekatekale pioo toka wa oka.

Polo Lome Take Ue Dipike Mea Pekenemo

27 I yene totopa ue dipike Itali take ipete mekoa wetekato wa oi pedoa plane ta patakale Poloka ete po yapu pitane yene padeka-kitika tobou poyo ago Duliasine yonoke moa pianeya. Duliasi einagopa ako odene meane tobou ago Sisane poyo yatene ago. ²Nitaneyake Esia ta matanu ludu ue dipi noai tane ta-kitike kutu pima poademe Aderamitiame ta pia nekene ue dipike toto peapetekoa mea pokoo. Eya ago Masedonia keneke plane Tesalonaika take opiane ago Arisakasi toto-pala opia mea poka. ³Nittoa ue dipike mea pote podolikama Saidone take witakoo. Eidapa Duliasiyo Polo mama motokome okome neke oya-lawe mekita eta kokoa mepoano pa. Neke noateko nee eya metekete toino, pa wa okale katepitoa pome mepoka. ⁴Wa naniko eni ta tewitikoaa pokolo pupulegeme oto-kama popokakoa kaka. Nitaneyake Saiperase tame pupulege pedekale popokamoka lono ete keneya pimotaa kokotaa ponokoo. ⁵Kokotoma ponetepa Silisia Pabilia tata matanu ete pimotaa kusa ue muke penekete Lisia keneke plane Maira take witaonokoo. ⁶Eni takepa tobou poyo agome toto mea poateko ue dipi pade tuku toa kakeneya. Nitoapa Itali take kutu poademe Alesaderia pia nekene ue dipi enetekoapa pato wa toto moa mekaka. ⁷Nitikale mea pokolo ta pataka

pade-mene pupulegeme oto-kama popokakoa kaka. Nitikale Naidasi ta patukoa kutu poadete wili tokoa kawa teko tokale paka lono Keriti take pokoo. Nitoapa Keriti tame pupulege pedeka lono kokotoa Salomone ta patukoa ponokoo. ⁸Keriti matanu eko keneya pimotaa potii wa kutu kokotoa ponete kusa ue koianeka tugaponokoo. Nipa Lasia ta liti pupulege popokamoko lono ue dipi pinoai taneta tugaponokoo.

⁹Ta kainya mati patakamotoa eida mea kakoo. Mea kakooka Yu yene kini losule tekete nee tekei wawa noamatekoi oipa wete penaneyake pupulege tadalita uu wa noka tokene taatekoa nome kaka. Nitaneyake Poloyo eya wa pubu oka. ¹⁰Ame-loe opido mea pokolopa ue dipi wia kaa kopapu atua ali-kiti tua too wa pubu oka. ¹¹Nitikaleka tobou poyo agome Poloyo okamo yakamokome eya agota ue dipi yopikago ue dipi pinagota kini agale yakoa toka. ¹²Eida ue dipi pinoai tane takepa pupulege tadalita taatekoa noka tokene-mene poti kilikoa piamele toamokale tekete ue dipike mekoi-kiti peya matiyame Pinikisi ta kutu pipote enato wa oi pedoa pikoi. Keriti ta keneke latiane Pinikisi taapa pupulege wedoa popokoa kawamene ta tokome ni tokoi.

Pupulege Tadalita Uu Wa Noka Matiyame

¹³Wa nani keneya pupulege poti kawia popokakale eneketepa kini oi pedoa pikoona toa Pinikisi take oyake mea tugapoo wa wene pikete eni ta tewitikoa pokoi. Nitoa Keriti ta matanu eko keneya pimotaa kokotoa ponokoi. ¹⁴Eni ta pene tewitikoa pokooka pupulege mati Keriti lono titimoo popokawineya noka. ¹⁵Nitoa ue dipi dekoa popokakale pupulege pine wia noka lono poadete wili toa kawa teko tokale wakolo pupulegeme dekoa aua poka. ¹⁶Ni-

tikale paka katekoa mea penekete tube kusa ue muke plane ta Kooda wa ibini akene ta patukoa ponokoo. Eni de taame pupulege pedekale peneketepa po kakamoo lia aua nekene ue dipi deya oto tube ue dipike liimoo kakadete wili tokoa kakoo. ¹⁷Ate liimoo kakatekoapa tube ue dipi pilage wia pedoa pitakaya tokale pupu yename ue dipi kouna lono poome lutua tagatapekoi. Nititikoapa pupulegeme ue dipi Libia ta matanu liti ue kekulu kibi tonoo keneya kak-eneta popokoa aua pokome wia mitikoa kaugaya tokale eya tokoi. Ue dipi pigike lekane yomoke tukane mamina petene kaawea moa pikoi. Nitikoli pupulegeme ue dipi pa popokoa aua poka. ¹⁸Podolikama pupulege uu wa popokoa kawa aua pokale pupu yenamepa ue dipi yaapemotaa kopapu moa kusa uele pitikakala tokoi. ¹⁹Wa podolikama ue dipi wa yaapemotaa ue dipi pupu toatekoiya wane-kiti po eya moa kusa uele pitikakala tokoi. ²⁰Nitoapa ta pataka pade-mene lou tagoi wedome agopa takatapeneya pa mea ponokoo. Nipa pupulege tadalita pa uu wa okoa kaka matiyame toto peya tua atuamedeko wa wene pia mekoo.

²¹Pupu ali-kiti nee wawa noameneya pa pupu tokoa kakoi pake Polo kini lene yoto pome kakome okome ame-lawe Keriti ta opi tewitikoa poameo wane okounakale yakoa tikiakaya. Yakoa toi tokapa nipa i ke enekakoa kawa kinikiya tadoo atua padele toamoo toka. ²²Opi wene yaapeaneya meamene. I ue dipi uele atuatekoyake odene agoka tua atukile toamoono, piti moameo. ²³Akolaliyo nopa one wa takoa motoka tokolo onekele takama puku agome uku. Ete piapa oneme wetekane edelo ago no kakouta nokome okome ²⁴oya Polo piti moamea. Nepa ako tobou ago Sisane leneke poke kamedeko. Nitamedekono, Akolaliyo ne pewe witikome wini yene

peyapa nekeya-kiti wa neke yonoke pikano, odene agoka tua atukile toamoo wa edelo agome onokano, ²⁵wene ya-peaneya meati. Akolaliyo eni akedekopa taatekoa too wane oneke wene tugakene uku. ²⁶Kusa ue muke plane ta deya eni matanuke i ue dipi pewikoa pitikatekoy-ake uku wa Poloyo oka.

²⁷Atoa leme (14) kakoa ta pataka-pete pupulege pa popokakoa kakomepa ue dipi Ederia wa ibini akene kusa ue lono ete otota pa popokoa aukoa kaka. Nitikale tube likonu pupu yename pade ta nami kunuka piko patu wa eya tokoi. ²⁸Ue kekulu plane itono pikome tokole enadete po namike kue ua tukatekoa eina adeka pikutu toa enema pokoi. Itono kebonoke tugakaya wa tokoi. Nitoa titikete po uele pitikoa limo limo toa motekete yonota lido akoo kotu pia enekolipa kapidi (20) kakoa adekake itono tadeka. Kuku keneya pekete wa pitikoa limoa enekoli wagene melepu (15) kakoa adekake itono tadeka. ²⁹Ue tigotoma pekedekale eneketepa ue kekulu tube kue pikata pewikoa pitikakaya tokale eya tokoi. Ue dipi pa lauaneya pimotoa tekete mabo kakeneya wane tuyono tene lono po kakoa uele pitikakoi. Pitikatekoa ta wetepata pata wa kowitoo kakoi. ³⁰Nitoapa pupu yene tube ue dipi toa poadete eya tokoi. De ue dipi ue talike moa tukaketikakoi. Nipa mabo kakeneya pade-mene ue dipi timini lonoka uele pitikadete keneya lede eni yotokoa tokoi. ³¹Nitikoli enekome Poloyo poyo tobou ago kakata pokome okome wini pupu ali-kiti tube ue dipi keneke toto-pala odeneka meamokolipa Akolaliyo kiwi toa moamoo-kale ³²poyo ali-kitame de ue dipike kakoa tukane pomene wakamu toa de ue dipi paka pomotoa wakoi.

³³Ta pene patama nokaka Poloyo e yene kowitikome okome ta pataka atoa

leme (14) kakoa-peta ke enekakale mea nee noameneyano, nee pade opi moa noe. ³⁴Kipala padeleka toamoono, ue dipi katepitoa poadetepa nee noatino noe wa ootokoapa ³⁵e yene kakakoa palawe wane moa Akolali-pala ke wa oa popimotokome naka. ³⁶Nitikale enekete peyame ke wa wedia mea moa nakoi. ³⁷Eni tube ue dipike toto meko yene ege kadukaka oi moapa koome kadukoa wa lene timini togoikoa kolo (276) kakoa meadekoo. ³⁸Nee adekoa nootokoapa pupu ali-kitame ue dipi wa yaapetekakoi. Nipa ue dipi keneke lobutua pikoina witi ku moa kusa uele pitikakoi.

Ue Dipi Kusa Ue Matanuke Wia Mataloganemo

³⁹Ta patakale enekoli e taapa maida ta patu wa padeka lono kusa ue koianeka kibi piitapekale enekete ue dipi kuka tugakoa pia enato wa eya tokoi. ⁴⁰Ue dipi lauaneya pimotoa uele pitikakoinakeya-mene po wakamu toa wakoi. Nititikoapa ue dipi kiyotokoa pomotoa tene lono poome kebetoa kakane yomo peteneta po keetapekoi. Timini lonoka mamina petene pigike lekane yomoke ate moa tukakoi. Pupulegeme ue dipi matanuke popokoa aua pomotoa tekete ni tokoi. ⁴¹Nitikoli pupulegeme ue dipi popokoa aua pokome ue kekulu kibi tono keneya kakeneta wia matalogaka. Tene anakoa kamotoa wago ue kibike wia mataloganeya kaka. Nitikale tene lonopa ueme lokokoa kawa pedoa tadekakolokaneya. ⁴²Nitaneyake poyo ali-kitamepa po yapu pitikatekoi yene yonoto pia paka petoa pokayano, wia tukato wa wene pikolipa ⁴³kiwi yopik-agome Polo toane mouno wene pikome tokome wia tukameo wa oka. Nitikome okome uele yonoto pia wene tiki-kiti kiwi namolo takoa uele pitoa matanuke yonoto pia poe. ⁴⁴Ete-kiti kipa yomo

pilage-kitika ueme wia pedekolokane yomo-kitika tebetaneya pia pamene wa oka. One eni okana toa petoa peketepa padeka ue nakameneya peya matanuke witoa pokoi.

Molita Take Mekete Tanemo

28 Toto matanuke eni petoa pote kaketepa eni taapa Molita ta tadeko wa wene tokoo. ²Eni take meane yename toto mama moa wedoa auapekala tokoi. Nipa ta nokome niti-pala tokale tokome toe moa yotokakete kiwi peya noe wa makutukoa motokoi. ³Nitikakoa Poloyo toe adali wekotoa moa toele pitikakale toe potome ki-imotokale tokome ali wia tukako kaya yomo adali pake meaneya witimotokome nokome Polono yono waneke taniannya tuka. ⁴One yono waneke taniannya tukale enekete eni take yename ekete ekee i agopa ali wia tukane ago tadeko. Ue nakameneya petoa nokanake kayame tania tukamedekale tuono, enato wa enekakoi. ⁵Enekakoli Poloyo kaya toe pake tadekatekoa kakale onepala padeleka toamoka. ⁶Nitikale one tugini yoa lobutuko patu, one kakota aua pitakome tuko patu wa nepikoa kakoiyake padeleka toamokale enekete kini wene wia wakete ekete i ago tumokono, pulali tadeko wa okoi.

⁷Eniya liti eya ago Pabiliyasi one itonomeneyaneya. Einagopa Molita ta talo toa meane ago. Einagome toto makutukoa motokome ta pataka teboloke one yapu moa mekoa nee epetaneya takoa lawetekala toka. ⁸Einagono etene tepe moa poto yene taneya pianeya. One yene taneya pikata Polo pokome Akolali kowitikoa yono pia epetekaka. ⁹Nitaneyake eni kusa ue muke pianeyaneya ta deyakapayene pitane ali atoa Polo mekata notekalakakoli epetekakala toka. ¹⁰Nitaneyake eni yename ke wa toto peya pewe wia kakoi. Wa naniko ue dipi

padeke mea poadete mekooka tone mea pekete noatekoya eya ue dipike moa pikoai tokoi.

Molita Ta Tewitikoa Lome Take Pekenemo

¹¹Molita ta tokene teboloke mea kawa pade ue dipike lewia pote mea pokoo. Eni ue dipipa Alesaderia ta pia Molita take nekeneya. Nipa pupulege tadalita taatekoa noka tokene-meneke pa eida pianeya. Eni ue dipipa pinagome pulali Susine manata yomini kayo ekete Kasito Polokosita wa ibini akeneya. ¹²Ue dipike peapetekoa mea pote Sairakuse take witapekete ta pataka teboloke eida mekoo. ¹³Eida mea tewitikoa pote Risiametake witapokoo. Podolikama pupulege toto nokoo lono titia popokaka. Nitoa popokoa kawa aua pokale ta pataka takutake Puteoli take witapokoo. ¹⁴Eidapa Yesunomo yakoa motaneyene kotukolo ekete ta pataka tatono (7) kakoa-peta kipala opia meato wa makutukoa motokoi. Nitikoli eida mea kawa tewitikoa Lome take pokoo. ¹⁵Nitoa ka ludu poadete pokolopa Lome take mea Yesunomo yakoa motaneyename toto noatekomo yakamotekete kotua nokoi. Padeka-kitame Apiase Makesike kotua note wa padeka-kitame eni ta patukoa Pasidia Yapu Tebolo wa ibini akene take kotua note tokoi. Nitikoli enekete Poloyo Akolali-palake wa oa wene weye akeneya kutu poademe poka. ¹⁶Toto Lome take pote kakolo Lome ta yopia meane yename Polo po yapu pitikamekete yapu padekeneke one yopiateka poyo ago-pala meamele toko wa moa mekakoi.

Polo Lome Take Mekome Tanemo

¹⁷Ta tebolo takoa patakale Poloyo Lome take meane Yu yenane tobou alikiti kiwi noe wa agale oa wetekakale

obomoa nokoli okome anukameyo toto Yu yatene-pala padeleka toamoane tone kaua-mikitane totonoka tetekamoane tokoluka Yerusalemene Yu yename no dekoa Lomane yenane yonoke moa pikoi. ¹⁸ Nitikoli no pitia yakatekoa no i ago wia tukatekole piameadekono, neke yapu pa wa wetekadete tokoli ¹⁹ Yu yename mena-kama okoi. Nitikoli ekene kini koiso tokamotonono, ako tobou ago Sisayo anu koiso pitia yatekamotoane uku wane okou. Nipa Yu yatene koiso akoane ouno wene piamekeneke okou. ²⁰ Ina ukulekepa anu oya-lawe kipala agale oadene tekene oboa noe wane agale oane wetekakouna. Ete Iserеле yename Akolaliyo taatekoa tokale nepia mekete wedia meki toane noanumeka nepiane mekuleke kapa poo kakoa kebetaneya kaku wa Poloyo oka.

²¹ Nimo okale ekete Yudea Yu yenameka nekemo pade oto wia wetekamo toto mekota nekene Yu yenameka enika enimomo wamoane ne akoo akene agale pademoka wamoane tokoi. ²² Enilepa toamokoiyake ta piko peya pitiki-kitame eni weneya totono litia tiki yene akoo ikino, pinali neke wa kei platekomo yakoono, ²³ ipete wa oto nekete yakoo wa oi mea pokoi. Eni oi nokale eina ali peya mati Polo mekata obomoa nokoli Poloyo Akolaliyo ali atoa talo tokome tokomo i i wa toaweaa oka. Nipa Moseseyoka Akolaline agale toaweaa akane ali-kitameka Yesuke papete oa plane toa pine toa olaukakome okome Yesu onepa eina Keraisu wa papete ibini oa plane ago wa onekemo olaukoa meka. Nipa Yesuke wene tugamotoa toa enekome likonu

witia titimoa olaukoa mea ta likaka. ²⁴ Nitikale padeka-kitame winipa nimini oko wa one okamo yakoo moa wa padeka-kitame yakoo moamadete wakoi. ²⁵ Nitoa odene wene piameneya tewitikoo pokoika Poloyo agale pade oa metekome okome ae Epetane Yominyopa tone kaua-mikiti-pala oatekamo Akolaline agale toaweaa akane ago Aisaia wene takakome eya wa akeneya.

²⁶ *I yatene kini kaleme yakoo meake yakoo moamoane leneme enoane meake enoane moamoane toi.* ²⁷ *I yatene kolotini lupi taneya mekete kaleme wedoane yakamele toamokolo mea lenepala lakaputukoo yawa tiki. Enipa leneme enoane moa kaleme yakoo moa teketepa ipa Akolaline pekuno, noa tato wa nookedo tepe kolotini pekoo pikolipa latekou wa Aisaiyo toaweaa akaneyano, enipa nimini akedeko.*

²⁸ Kipala i ukumo yakoe. Akolaliyo ali atoa toa motokome tokomo e ku pa yatene pitiki toa oa pupitikaneya. Nitaneyake eni pa yename one eni tokomo yakoo moi wa Poloyo oka. ²⁹ (Nimo okale yakamotekete e Yu yene one mekata tewitikoo pote agale tetao oma pokoi.)

³⁰ Polo mali takutake Lome take mekilepa one pitika yapu pinago kue mea topo tootokoo meka. One eni yapu nokoi peya Poloyo ke wa makutukoo mokala toka. ³¹ Nitoapa Akolaliyo ali atoa talo tokome tokomo Ali Munu Yesu Keraisunomoka i i wa atiki toa mea olaukakala toka. Nitikalepa enika enimomo olaukamea wa padameka wamokoi.

LOMANE

Poloyo Lome Yeneke Wia Wetekane Pipia

1 Polo nopa Keraisu Yesunole-kama takama yaku ago mekene uku. Akolaliyo ali atoane wene epetekakomopa one agale patu kautakoane kakene oane auane yamotoa tokome nopa one wa kayo oa motoka tokolo ni uku.

²Enimopa Akolaliyo kiwi yatene auapekene dikou wa one agale toaweane akane ali-kiti namolo namolo papete wene taka taka tokale one bokuke wia mekama-kala nekeneya. ³⁻⁴Eni epetane ko ikilepa tone Ali Muno Yesu Keraisu ko uku. Einagopa ali latia nikilepa Depidi-loeke tawa nekeneya. One yomini-pala mekome epeteko-kama tikilepa Akolaline mana tokome taneya. Nome mea tua pokale Akolaliyo moa kamotokakilepa i agopa one manago one tele patu kautakoa mea kakono wene tamene wa taneya. ⁵Kipa one Aposelo ali-kiti meamene wa toto pewe witikome takoa motikilepa Yesu einagome taneleke toka. Nipa e ku yatename Yesunomo yakoa mootokoa oneme tamene wa akene toa litia toa one kei pia tomotoa tokome toka. ⁶Wini Lome take meki yene kiwi padeka-kitika Akolaliyo one wa takoa motaneya. Nipa Yesuke lukoa memotoa tokome taneya.

⁷I agale wiane mekakilepa wini Lome take meaneya Akolaliyo kipa one kolotini yene wa takoa motane-kitike wetekou wane tuku. Kini kowitikakilepa eni yene pewe wia kilikoa memotono toe wane toneketai Akolali tone Ali Muno Yesu Keraisuta kowitikaku-ye.

Polo Lome Take Poateka Wene Pianemo

⁸I pipia titiane wiane mekakenepe Yesu Keraisu patu kautakoane kakene Akolali-pala ke wane uku. Kiwi peyake ke wane ikilepa kini Yesuke wene tugoane mekete tikimo ta piko peyake meki-kitame yakatapeadikili tekene ni uku. ⁹Akolaline leneke kakene eya wane uku. One kowitikene-kama kiwi wene taneya kowitikoane uku. Nipa onekele wedoane takama yawou wane one manake epetekoane akene agale oane mema yakene uku. ¹⁰Nitoane Akolali kowitikenepa no Lome takeka moa wetekateko wene pikepa moa wetekoa ta wane one kowitoane okala tuku-ye. ¹¹Epetane Yominiyo no wene takaka toane kiwika olaukadene tekene kiwi enadiya wane kowitoane uku. Kipa one tele patu kautakoa kama pomotoane tekene ni uku. ¹²Nipa tone Yesuke wene tugoane mekete tokomo yakaate toa mape wiitakutukoa meatoane ekene uku. ¹³Anu oya-lawe eya wa wene taneya meamene. Yesunomopa ete pa yatene-kiti pitikoi toane oane mema yakolu padeka-kitame yakoa motokoi toa wini Lome takeka kime yakoa momotoane tou wane lugutukoane noadene tokala tokou. Nitikala tokouyake papukamokale wete noamokou. ¹⁴Geriki agale yakoa iki yene ni Geriki agale yakamene yene ni wene meameane yene ni wene muno meane yene enika eni yene peyame yakamotoane tekene Yesunomo ta piko peyake toaweane oma pamedeku. ¹⁵Nitamedekuno, wini Lome ta ludu kiwi mekika tugatekoane Yesunomo oane meadiya wane wene pianeme mekene uku.

¹⁶Yesunomo toaweane amene ya toamokolo meku. Onekemo yakoa motiki peyapa Akolaliyo telekole

tokome toa mokala toko. Ete pa yatene naniko toa moademe Yu yene namolo takoa toa motokono, one eni tokomo edoane amene ya momotoa-pe. ¹⁷ Akolaliyo ali atoapa poanele toamene yene tetepo takoa toa motikilepa pa kini Yesuke wene tugakileke ni toko. One eni toko ko ikilepa Yesunomo toaweane uku. Enilekepa one bokuke eya wa wia mekaneya piko. *Akolaliyo poanele toamene tetepo takane yene meemoa pikilepa titiketeka wipitiketeka oneke wene tugoa mekete tekete nitoi.*

Akolali Ali Atoa-pala

Kotimi Yoa Mekomo

¹⁸ Akolaliyo a tibu mekome enekolo one nimini agalepa ele kule poanele toa kaukoa agopa takatapeki yename onekele takamoa poanele-kama tikili enekome kotimi yoa meko. ¹⁹ Nipa one kakome tokole wene toatiki toa padeya padeya kiwi pakeke keleyo witakakala tokoyake paya nou toa poanele pa toma yakili tokome kotimi yoa meko. ²⁰ One kakome tokole kini leneme enamele toamokoyake itono tibuta latia pianepeteka opika one latia pianeya-kiti leneme keleyo enamele toko. Keleyo enekete tekete one tele taneya meemoa pokona, Akolali wa amele toko wa amediki. Akolali kawamoko wa edoa omotoa-pe. ²¹ Akolali onepa dikane ago wa wene taneya meketeke one kei pitiki toa kei piamoa ke wa wamoa tokoi. Nitoapa kini wenepa bebo akatapea yomiyomume agopa takatapea taneya mekoi. ²² Nipa wene muno kakeneya meku wa oake kaua kaloa kakete tokoi. ²³ Nitoapa pa tootapeneya meemoa poko Akolali kowitoake wakete kini yoname latikoinakeya-kiti kowitoai tokoi. Nipa eya adeka ali ini kai kaya enika eni yomini latia kakoa etepea kowitima pokoi. ²⁴ Nikepa ele kule poanele touno

wene pikoile pa toma pomotoa Akolaliyo wakeneya. Nipa pamoko mea kini kini tigini toa potokatakutukakete ya tanele toma-kala pomotoa wakeneya. ²⁵ Nitane yename Akolalinemo ete pimotoa wawa kapene peku noai taneya. Nitoapa padeya padeya peya latia plane ago Akolali kowitamoa onekele takamoa tekete one latia pianeya-kiti adeka pia yomini latia kakoa kowitima nekeneya. Nitaneyake ali atoa toto peyame one kei enabuna pia-kala kamedeko. Ee nimini.

²⁶ Eni yename etepea poanele toma pokoike Akolaliyopa pamoko mea kini tigini toa potokoa ya tanele toma pomotoa wakeneya. Nitikalepa kini atoameka toa potokakete kinikane tebea piameneya atoa yatene kini kini wa kinikane latikoa tebea pikala taneya. ²⁷ Alimeka kini atoa tebea piameneya ali yatene kini kini wa atoa latikoane tebeane piouno wene kibutuma yakeneya. Nipa kini kini ete oto wa ya tanele tuku pekete toapa kini tiginike wa kini tokoinakale nami wipitinokala taneya. ²⁸ Nipa Akolali edeya weike wene taneya meamoono, tokamotato wa paya nou toa mekoli enekomepa kini toamatekoile-kama toma pomotoa wakeneya. ²⁹ Nitaneyake kini tepene e ku poane wene witoa tagatapeneya mea eya toma yakeneya. Poane peku noa toa ni padeya padeya tepi moa ni lenee pia ni epetanele toma yakoi yene-pala poane wene pia ni ali wia tukoa ni neno-kama oa ni kapene wakoa ni kotu kabunu kawa ³⁰ ni akoa agale oa ni Akolali-pala kotimi yoa ni ete yene paya tetepo takoa ni mate agale oa ni ele kule poanele titia toa ni etene ninetane agale tagoa toamoa ³¹ ni ete ali atoake wene meameneya mea ni ne auapeane ile tou wa oake toamoa ni ete yene mama moamoa ela moamoa tiki. ³² Enika enile tikileke Akolaliyo one totono litikome kibu moa tukoono

wene teketeke pa toma yaki. Nika kini eni tikina toa ete yename toma yakile eneketepa epetanele tiki wa kei pikala tiki.

Akolaliyo Ali Atoa Takoa Enatekamo

2 Anu oya enika eni poanele tikipa poanele mati eni tiki wa neme-kiti kikoak akakilepa pinali neke wa kikoake eke toko. Nemeka enika eni poanele toma pekeke okono, pinali neke wa kei piamele toamoko. ²Enika eni poanele toma yaki-kitipa Akolaliyo kini tanemo pitia yakoa kibu motikilepa kiyokekama tokono wene totome toko. ³Enika eni poanele nemeka pa toma yakeke ete yename poanele tikimo pitia yakoa toaweak akakepa nipa Akolaliyo ete yene kibu motokome nepa kibu moamoono wene pianeya meke toko-pe. ⁴Akolaliyo ne pewe-kama wia poti mama moa tokoyake one eni tokolepa neme pale tane tetepo takoa meko patu. Nipa neke poanele tewitikoa oneke tepe kolotini pekamotoa nepia mekome tokome ni pewe-kama wia kako wa neme wene toamoko patu. ⁵Ae, oneke tepe kolotini pekamade kolotini lupi taneya meke toko. Widikakolekepa Akolaliyo nepala kotimi yoa mea kibu moo. Nipa ali atopala kotimi yoa mea kiyoke takoa enekapetepa nitoo. ⁶Enipetepa Akolaliyo ali atoa kini kini toma yakoileke nami wia topo takakala too. ⁷Pade-kitame epetanele toma yaketepa nipa Akolali pa tootapeneya meko toa kiwika meadiya wa wene pia mea ni Akolaliyo kiwi kei platekale toa enekala toa ni mea kama poatiki ka tuku tokoa kawa tekete epetanele toma yaki. Nitiki yene-pala Akolaliyo ke wa topo takakome mea kama pomotoa toademe toko. ⁸Pade-kitame nitameneya kinikile-kama toa nimini agale yakamadete wawa poane

peku noa tikilipa nipa Akolaliyo topo takakome kotimi yoa mea tete meademe toko. ⁹Poanele toma yaki peya Akolaliyo eni tete mea ke enekoa mekakilepa Yu yene namolo takoa ni Yu yeneke lokoa pa yatene ali atoa kikilikoa toademe toko. ¹⁰Epetanele toma yaki peya Akolaliyo one pa tootapeneya meko toa memotoa tokome kei pia tepe kolotini kilikoa pikoa toademe toko. Nipa Yu yatene namolo takoa ni kiwike lokoa pa yatene ali atoa kikilikoa toademe toko. ¹¹Nipa Akolaliyo Yu yatene ali atoa e ku pa yatene ali atoa takoa enoa akakilepa Yu yatene e ku pa yatene midi piitapeane tetepo takoa toko.

¹²Akolaliyopa Mosesene totono yakamene pa yatene ali atoame poanele tokoileke nami wia kibu motikilepa nipa one totono ete pimotoa koiso akoa kibu moa atukoo. Eni totono yametane Yu yename poanele tokoileke nami wia kibu motikilepa nipa eni totono kime tetekadiki wa eni totono litikome koiso akoa kibu moo. ¹³Akolaliyo ali atoa poanele toamene yene tetepo takoa wene keaneya mekilepa Mosesene totono yatekoileke tokoya mena. Eni totono litia tokoileke ni toko wane ekene uku. ¹⁴Moseseyo one totono pa yatene ali atoa yameameneyake padeka-kitame kini weneme epetanele toma yaki. Nipa eina totono yakoa motane tetepo takoa tiki. Enipa kini tepeme epetepa tamene wa oko toa tiki. ¹⁵Ile poanele tadeku ile epetanele tadeku wa tepeme takatakutukakono, Akolaliyo Mosesene totono kini tepene lukane tetepo takoa tiki. ¹⁶Akolaliyo ali atoa takoa enekilepa kini tepene meaneya yawa takoa enoa akakala too. Nipa Keraisu Yesu one patu kautakoa kakome nitikamotoo. Enipa Yesunomo pine toane oane metekuna toa too.

Yu Yene Mosesene Totonoke Lukoa Meanemo

¹⁷ Ae, anu oyago neme-kiti Yu ago kaku wa oa ni Mosesene totonoke tugoane meku wa oa ni Akolaliyo Yu yatene-pala oya kakoa meku wa mate agale oa toko. ¹⁸ Eya waka neme-kiti oko. Akolaliyo wene pikole wene taneya meku wa oa ni Mosesene totono olaukaneya tekene epetanele-kama takoane tuku wa oa ¹⁹ ni leneta lianeya meki-kiti yono moane ka yameane auane pone ni yomiyomu keneke meki-kiti pa takoane tuku wa oa ²⁰ ni Mosesene totonokepa Akolaliyo wene takanemo niminimo-kama kabe koukoa wia mekaneya pikono, eni totonopa wene meamene-kiti i i wane olaukoane mati-kitika mane mane oane tuku wa enika eni mate agale neme-kiti okala toko. ²¹ Ae, anu oyago ete yene wini mane mane ekeke pinali neke wa mane mane wamokono, dekolo toko-pe. Panagoneya kode moameamene wa mane mane ikilepa kode noake oko patu. ²² Mone padane atoa tebea piameamene wa mane mane ikilepa padane atoa tebea piitikoake oko patu. Pa yene kini yoname latia kakoa lodo yoa kowitikiya-kiti kote motuku wa neme ikilepa kini losu yapu keneke pianeya-kiti kode moake oko patu. ²³ Mosesene totonopa ne Yu yatename pikoa kako wa neme-kiti mate agale ikilepa eni totono tetekama peke Akolali ya takatekoake oko patu. ²⁴ Nilekepa Akolaline bokuke eya wa papete wia mekaneya piko. *Yu yene kini toma pikilekepa pa yatene-kitame eketi ipa Akolaline yatenameke tikiti patu wa one ibini tema piki.*

²⁵ Mosesene totono litia teke pene opiane matiyane kepene teigamotoa tokolopa nipa Akolaliyo eni matipa one wa takoa motoko. Ae anu oyago

nedo kepene teiganeya meake Mosesene totono tetekakolopa nipa Akolaliyo nepa kepene teigamene ago tetepo takoa meku. ²⁶ Mone pa yatene agome one kepene teigameneya meake eni kiyo akene totonodo litia tokolopa Akolaliyo einagopa kepene teigane ago tetepo takakome one yatene ago wa takoa motoko. Enipa nimini uku-pe. ²⁷ Nika dikane pa yatene agopa one kepene teigameneya meake eni totono litia tokomepa ne-kiti eya wa kikoa akademe toko. Nepa kepene teiganeya meku Yu agome eni totono bokuke wia mekaneya pikoa kakeke tetekakala tadeko wa ne kikoa akademe toko. ²⁸ Yu agopa one tepene paya wene pimotoko kepene teiganeya mekomepa nipa one eni adekapa yoname pa tokoo pianeya pata pale taneya. ²⁹ Akolaliyo panago-kiti i agopa one nimini Yu yatene agono, one wa takoa motoko agopa one adekapa kepene tokoo pianeya mena. One tepene pianeya. Eni adekapa Epetane Yominiyo pianeya. Nipa Mosesene totono litia taneya mena. One eni tepene plane adekapa ali atoame enoa kei piamikiyake Akolaliyo enoa kei piko.

3 Akolaliyo toto Yu yateneka e ku pa yateneka takoa enameneya midipiitapeane tetepo takoa mekono, toto Yu yenepa edeya weike kepene teigako patuno, tokamota, pa meato wa totome amele toko patu. ² E'e mena. Akolaliyo toto Yu yatene ele kule toa pewe wia yopia meku. Tobou kakoa pewe eni witikomepa one agale pikoa kamene wa toto yatene takoa oa metaneya. ³ Nitaneyake toto yatene padeka-kitame one agale yakoa moamokoi. Nitikoino, Akolaliyo kiwi yatene auapekenepa dikou wa oa pikana toa taatekoa toamoko patu. ⁴ E'e mena. Ali peyamedo kapene wakoa okolipa Akolaliyo niminimo-kama oo. Enilekepa Akolaline bokuke

one-pala akenemo eya wa wia mekaneya piko.

Pademo pademo ikilepa niminimo-kama wini oko wa peyame oi. Peyamedo ne koiso akoa eketepa padele padeleta neme tikilepa niminile-kama tadeko waka oi wa padame wia mekaneya.

⁵Totome poanele tikilepa Akolaliyo niminile tokole keleyo witamotoa tokono, tone eni tokoo poaneleke Akolaliyo kibu motokomepa poanele onemeka toko wa totome amele toko-pe. Enipa itono peku noai tiki-kiti paya nou toa mekete ikina toane uku.

⁶Akolaliyo nitikome toamoko. Akolali onedo kiyoke-kama meamokome too tokapa nipa ali atoa edoa takoa enoa akamotoa-pe. ⁷Panagome eya wa-kiti paya nou toa mekome oo. Yomiyomume tole pa wedoa witakako toapa anu kapene wakoane uku agaleme Akolaline nimini agale keleyo witakakala toko. Nitikolo peyame one kei pikala tikino, Akolaliyo eni kapene wakoane uku agaleke edoa kibu momotoa-pe wa panagome-kiti oo. ⁸Nimo wado ikilepa epetanele witamotoa tekete poanele toma pato wa okome oo. Pade ali-kitamepa noanuka enimo uku wa no akoa akedikili yateku. Dikoa kapene yokaki yene nami wia enatiki toa Akolaliyo kibu moademe toko.

Kiyo Akenele-kama Toko Ago

Odeneka Meamoko

⁹Nipa toto Yu yene mea epetekakete ete pa yatene moa patukakono, Akolaline leneke atiki toa meamele toko wa totome mate agale amele toko patu. E'e mena. Yu yeneka e ku pa yateneka toto peyapa tone toko poaneleme moa

labakaneya meko. Enipa kipala wete olaukakounakamo uku. ¹⁰Nikepa Akolaline bokuke eya wa wia mekaneya piko.

Kiyo akenele-kama toko ago odeneka meamoko. ¹¹Akolalinemo wene taneya meko ago odeneka meamoko. Akolali mekota poateko ka tuku toa kaka ago odeneka meamoko. ¹²Ali atoa peyame Akolali tewitiko wa wakete etepea pale toma pekeneya. Epetanele toko ago odeneka meamoko. ¹³Nipa tuane ago pade oloyo tootokoa itonome kauameneka kotimi atepea noko toa kini tomo pookepa poanemo atepea witakala toko. Kini kekemepa ete yene oa yotokakala tiki. Kini kabunumepa kayame tania tukou toa oa potokakala tiki. ¹⁴Kini kabunumepa ele kuleme ke enekakolo memotoa ete yene-pala poanemo oa kaki. ¹⁵Lene pia mekamotekete pitakete ete yene pa wia tukapokala tiki. ¹⁶Padeka padeka yaketeka ete yene tete mea ke enekakole toma yaki. ¹⁷Tepe kolotini kilikoa meamene agopa tokolo meki. ¹⁸Akolali piti motikileka toamiki wa panagome Akolaline bokuke wia mekaneya.

¹⁹Moseseyopa ile tamene ile toameamene wa one totono yametikilepa eni totonoke lukoa mekoi peya kikilikoa yametaneya. Nitaneyano, Akolaliyo koiso akaka-petepa poanele padeleka toamene ago no i meku wa teyo oo tokolo-pe. Peyame one eni totono tetekakala tiki. ²⁰Padameka eni totono litiane tootapekuya tekene Akolaline leneke poanele toameneya meku wa amele toamoko. Eni totonomepa ali atoane poanele i i wa keleyo wene taka taka tokolo tekene ni uku.

Akolaliyo Ali Atoame Poanele Toameneya

Meane Tetepo Takoa Wene Keaneya Mekomo

²¹Opa eina namolo totono ete pimotoa Akolaliyo one ali atoapa poanele toamene yene tetepo takoa wene keaneya mekome toko totono yameteko. Nipa Moseseyo one totono wia mekakomeka ni Akolaline agale toaweaa akane ali-kitame kini buku wia mekaketeketa i i wa deka deka toa wia mekapiane toa opi taatekoa yameteko. ²²Akolaliyo one ali atoapa poanele toamene yene tetepo takoa wene keaneya mekilepa pa kini Yesu Keraisu wene tugakileke toko. Nipa oneke wene tugoaa meki peya midi piitapeane tetepo takakome toko. ²³Yu yateneka pa yatene-kitika toto peyame Akolaline totono tetekaketepa one mekome tokole kotuke adekoa meamele toamokolo pa meko. ²⁴Nitikoyake Keraisu Yesuyo toto oto toa moademe tuaneya tokolo Akolaliyo pa pewe witikome totopa poanele toamene yene tetepo takoa wene keaneya meko. ²⁵Ali atoaa kini poanele tokoike tua atukayano, neke kamate ponomotoa tuamene wa Akolaliyo Keraisu Yesu moa wetekaneya. Nipa ali atoaa oneke wene tugakolipa kini poanele tokoike po letu mekakana keetapea wene keaneya meademe tokome ni wetekaneya. Nitoapa kini tokoi poanele oneme enoa wawameneyake one leneke poanele toameneya meane tetepo takakome tanele eni yametaneya. Papetepa ali atoame poanele tokolika Akolaliyo tigotokoa layo wete pitikameneya. ²⁶Nitaneyano, opi onepa poanele-kama kote motokago mekomeke tadeko wa totome wene tomotoa tokome Keraisu tone tokoo

poaneleke tumotoa moa wetekaneya. Opa Akolaliyo Yesuke wene tugoaa meki-kitipa poanele toamene yene tetepo takoa wene keaneya meko.

²⁷Akolaliyo toto toa momotoa tekete tone wa kei pia mate agale oko patu. E'e mena. Ni edoa-mo. Mosesene totono litiane tootapekene epetanele-kama tuku wa padameka mate agale amelee toamoko. Akolaliyo totopa poanele toamene yene tetepo takoa toa motikilepa tone Yesuke wene tugoaa mekoleke ni toko. ²⁸Nipa panagome-kiti Mosesene totono litia tootapeamokomeke Yesuke wene tugakolopa Akolaliyo einagopa poanele toamene ago tetepo takoa wene keaneya meko. ²⁹Akolaliyo pa yatene-kiti wawa Yu yatene takoa talo toa meko patu. E'e mena. Yu yateneka e ku pa yateneka toto peya Akolalike-kama lukoo meko. ³⁰Akolali wa oateko agopa one odene meko. Ni agomepa kepene teigane agoka kepene teigamene agoka Yesuke wene tugakolopa poanele toamene ago tetepo takoa wene keaneya meko. ³¹Nipa Yesuke wene tugoane mekuno, Mosesene totono edeya weike litiku patuno, tokamota wane ekene ukutu-mo. E'e mena. Yesuke wene tugoaa meketepa nipa Mosesene totono wedoa pikoo kako.

Eberame Akolalike Wene Tuganeleke

Poanele Toamene Ago Tetepo Takanemo

4 Nipa tone kaua ago Eberameke edemo ato patu. ²Eberameyo epetanele toma pekenelekedo Akolaliyo onepa poanele toamene ago tetepo takoo tokapa nipa Eberame pinali one wa kei piamele too toka. Nitoo tokake Akolaline leneke kakome pinali one wa kei piamele toameneya. ³Akolaline bokuke Eberameke eya wa

wia mekaneya piko. Akolaliyo tou wa ikilepa nimini taatekoa toatekomo eni oko wa Eberame Akolalike wene tugoa meaneya. Nitaneleke Akolaliyo Eberame poanele toamene ago tetepopa ni takaneya.

⁴Panagome-kiti panagono pupu takakolopa pupu pine agome topo toa kue eya ete metekilepa iya pa puputuane ne pewe witikene meteku wa metekoya mena. ⁵Akolaliyo pa puputua pewe wiou toa tokome poanele tiki ali atoapa poanele toamene yene tetepo takoa wene keaneya meko. Nitikono, panagome-kiti Mosesene totono litia tootapeamokomeke Akolalike wene tugakolopa Akolaliyo one eni wene tugakoleke einagopa poanele toamene ago tetepo takoa wene keaneya meko. ⁶Mosesene totono litia tootapeamele toamokaleka Akolaliyo poanele toamene tetepo takane agopa kolotine meatekaleke Depidiyo papete eya wa wia mekaneya.

⁷Akolaliyo kini poanele tokoike po letu mekakana kea wawa ni kini poanele moa agopa takatapea taneya mekoi-kitipa kolotine meoi. ⁸Nipa poanele toma yakaleka Akolaliyo poanele toamene tetepo takane agopa kolotine meoo wa wia mekapianeya.

⁹Kolotine meoi wa ikilepa kepene teigane Yu yeneke odene akeneya patu. Kepene teigamene yatene-kiti kikilikoa okome akeneya patu. Nikepa eya wane okouna. Eberame Akolalike wene tuganeleke Akolaliyo one poanele toamene tetepopa ni takaneya. ¹⁰Nipa Eberame einagopa poanele toamene ago tetepo takakilepa Akolaliyo manipete titia taneya-pe. Eberame one kepene wete teiganeya mekale titia taneya-pe. E'e mena. One kepene wete teigameneya pa mekale titia taneya. ¹¹Nititikaneyake Eberame pinali one wa kepene teigamotaneya.

Nipa one kepene wete teigameneya pa mekome Akolalike wene tugakale Akolaliyo one poanele toamene ago tetepo takane adeka eni pianeya. Akolaliyopa naniko pa yatene-kitika kepene wete teigameneya pa mekete oneke wene tugakoileke poanele toamene yene tetepo takateka adeka eni dekoa piipianeya. Nitaneyano, eni yene peyane pinepa Eberame. ¹²Kepene teiganeya meki Yu yeneke kini pinepa Eberame. Eberame one kepene wete teigameneya pa mekome Akolalike takama yakene toa Akolalike wene tugoa meki Yu yeneke uku.

Akolaliyo Dikou Wa Oa Piane Toa Tokome

Oneke Wene Tugaki-kiti Auapekomo

¹³Oneme latiane pikou taapa nemeka neeke tama pokoi yenameka yopia mema pomotoane yameou wa Akolaliyo Eberame-pala oa pianeya. Akolaliyo nimo ikilepa Eberameyo one totono litia tokale tokome akeneya mena. Eberame oneke wene tugoa mekale tokome ni akeneya. Nipa Akolaliyo Eberame poanele toameneya meane ago tetepo takakome tokome ni akeneya. ¹⁴Akolaliyo nitameneya eina papete oa pikana toa taatekoa tokome kini totono litia tiki-kitido one mana kono-mikiti latikoa auapekome too tokapa Akolalike wene tugakilepa edeya weike toko-pe wa to-tome oatekole pioo toka. Ni Akolaliyo dikou wa Eberame-pala eina oa pikilepa pata pamo eni akedeko waka oatekole pioo toka. ¹⁵Nitoo tokake padameka kini totono oyake litia tootapeamele toamokono, Akolaliyo kotimi yoa mea kibu moo. Ae, kini litia toatiki totonodo piamokolopa Akolaliyo ali atoapa kini totono tetekakala tiki wa akamele toamoko.

¹⁶ Akolaliyo one papete oa pikana toa taatekoa tikilepa ali atoa oneke wene tugakileke toko. Kini totono litia tikileke tokoya mena. Ali atoa auapekilepa pa pewe witikene tou wa wene toopikana toa toko. Ni Eberameke tagoi yene peya auapeou wa wene toopikana toa toko. Nitikome Mosesene totono litia tiki Yu yene takoa auapekoya mena. Eberame tane toa oneke wene tugoa meki pa yeneka pa pewe witikome auapeko. Nitikono, toto peyapa Eberamene mana kono-mikiti wane uku. ¹⁷ E ku yatene opia tagateko ago ne moane latikuna wa Akolaline bokuke wia mekaneya pikono, Akolaliyo Eberame einagopa toto peyane kaua ago tetepo takoa meko. Eberame wene tugoa meane ago Akolaliyopa tuane ali atoa moa kamotokoa ni eya kuya wete witamene-kiti witamotoa kayo oa toko. ¹⁸ Akolaliyo dikou wa oa pikana toapa edoa taatekoa tamele toko patu wa Eberameyo oake poti nepia meaneyano, Akolaliyo e ku yatene peya mati Eberameke tama nekene tetepo takoa meko. Nipa *neeke tama pokoi yenepa tagoi keneya aloa tagatapeoi* wa oa pikana toa taatekoa toko. ¹⁹ Eberame einagopa mali ege takupeta kadukoa (100) tadiya ponokale koto kawane kaku ago tuadene meku wa wamoa ni tiobatoa Sera atue deya tokome one mati opikamele toamoko wa wamoa tokome Akolalike wene tugoa meaneya. ²⁰ Nipa poome toameneya nepia mekilepa Akolaliyo oa pikana toa taatekoa toamoko patu wa wameneya one taatekoa toatekale pa nepia meaneya. Nitoapa Akolalike-kama wene wedoa tugoa mea one kei pia taneya. ²¹ Nipa Akolaliyo tou wa oa pikana toa taatekoa tamele toko wa wene taneya meaneya. ²² One eni wene tuganelekepa *Akolaliyo Eberame einagopa poanele*

toamene ago tetepopa ni takaneya. ²³ One wene tuganeleke poanele toamene ago tetepopa ni takaneya wa padame wia mekakomepa Eberameke odene akeneya mena. ²⁴ Totokeka akeneya. Tone Ali Muno Yesu tuaneyana pikale moa kamotokane ago Akolalike wene tugoa meko-kiti totoke uku. ²⁵ Einago Yesupa tone tokoo poaneleke tumotoa Akolaliyo moa wetekaneya. Nitoapa totopa poanele toamene yene tetepo takoa wene keaneyana meademe tokome one moa kamotokaneyana.

Akolaliyo Ali Atoa Toa Motikilepa

Kini Yesuke Wene Tugakileke Toko

5 Tone Yesuke wene tugakileke Akolaliyo totopa poanele toamene yene tetepo takoa wene keaneyana mekono, poi pitikolo tokome poti kilikoa meamele toko. Tone Ali Muno Yesu Keraisu nome mea tuaneleke toko. ² Oneke wene tugakolo tokome one etename pewe wia yopikota meamene wa yametaneyake toto eida-kama meko. Nipa a tibuke Akolali pa tootapeneya meko toa totoka meemoa poo wa kolotine yako. ³ Ke enekakolo meake wedia-kama meko. Nipa Akolaliyopa onekele takoa wawameneya poti takoa togakete toatekole ooyametekono, ke wa kolotine meko. ⁴ Ke enekakolo meake onekele poti takoa togoo tokolo enekome Akolaliyo totopa nitatiki yene tadeko wa kei pioo. Toto kei pioo wa wene teketepa nipa one wipitikome toatekale taatekoa too wa nepia meko. ⁵ Nitoa nepia-kala mekilepa eya wa wene taneya nepia meko. Oneme totoke wene mekoa tagatapeko wa wene tomotoapa one Epetane Yomini totoke moa wetekaneyano, one taatekoa toatekale nepia mekilepa poi nokotikameneya nepia meko. ⁶ Pinali tone wa toa moamele toameneyake

toto poanele toko-kitike Keraisu taatekoa nome mea tuaneyaya. Nipa Akolaliyo one tuateka oi meepikana toa taatekoa tuaneyaya. ⁷Panagome-kiti Mosesene totono litia kiyo akenele tokagoke tuamou wa wene pikomeke nee epetaneyaya-kama lawettoa auapeko agoke tuademe oko patu. ⁸Totome poanele toma yakoloka kiwi toane mou wa Keraisu nome mea tuaneyaya. Nipa kipa one kolotini yene wa wene tomotono ta wa Akolaliyo okana toa nitaneyaya. ⁹Yesuno kamate ponokaleke Akolaliyo totopa poanele toamene yene tetepo takoa wene keaneyaya meko. Nitikono, Akolaliyo ali atoa-pala kotimi yoa mekome kibu motoka-pete Yesuyo toto kei pia toa moo tadeko. ¹⁰Totome Akolali-pala poi teja meko-peteka etenane wene kekou wa manago Keraisu totoke tuaneyaya. Nitaneyake tone Akolali-pala odene wene pianeyaya mekono, Akolaliyo toto-pala edoa kotimi yoa mea kibu momotoa-pe. Opa kiwi toane mou wa Yesu one etene mekota mea kakono, Akolaliyo toto kibu moamoo. ¹¹Kibu moamoo wa wene taneyaya mekete eya wa oa toko. Tone Ali Muno Yesu Keraisuyo taneleke totopa one etene-pala oya kakoa mekono, Akolali-pala ke wa kolotine yako.

Poloyo Eyagota Adam Keraisutake Akenemo

¹²Adam odene agokepa poane totono itonoke tageneyaya. Eida eni tageneme enipete titimoa ali atoa tuma-kala nekeneyaya. Ali atoa peyame poanele toma-kala yakete tekete nitaneyaya. ¹³Moseseyo one totono wete yameameneyake ali atoame poanele toma yakenyaya. Nitaneyake eni totono piameneyaya tokome Akolaliyo kini eni poanele tokoike po letu pikoa mea kibu moatekalee pade piameneyaya.

¹⁴Nitaneyake Adam einagoke titimoa Moseseke tugoapa ali atoa peya tuma-kala nekeneyaya. Kini poanele tikilepa Adam einagome Akolaline totono tetekakome tanele toameketeke tuma-kala nekeneyaya.

Adam einago mekilepa naniko taatekoa noateka ago Keraisu adeka pia meaneyaya. ¹⁵Nitaneyake einagotapa odenele tane agota mena. Odene ago Adam einagome poanele tanelekepa ali atoa peya mati tuma-kala nekeneyaya. Wa Akolaliyo padele akole tikilepa eya taneyaya. Panagome-kiti panago nami kakameneyaya padeya pa meou toa padena ago Yesu Keraisu moa wetekaneyaya. Nitikale nokome ali atoa peya mati pewe wia tagama pekeneyaya.

¹⁶Akolaliyo ali atoa nami kakamoa Keraisu pa wetekaneleka odene ago Adameyo titia tane poaneleka odene kotu kakoa taneleta mena. Odene agome padele poanele tanelekepa oneke tagoi peya Akolaliyo koiso akoane kibu mou wa oa pianeyaya. Wa ali atoame poanele-kala toma yakolika Akolaliyo Keraisu moa wetekakilepa kipa poanele toamene yene tetepo takoane wene keaneyaya meou wa wetekaneyaya.

¹⁷Odene ago Adameyo poanele titia tanelekepa ali atoa peya tuatekoi peku laweteko agoke lukoa mea tuma-kala nekeneyaya. Wa Akolaliyo padele akole tikilepa ali atoa peya poanele toamene tetepo takoane wene keaneyaya meada wa nami kakamoa pewe-kama wia kako. Nipa padena ago Yesu Keraisu patu kautakoa meki-kitipa tobou ali atoa latia meemoa pomotoa toko. ¹⁸Titia tane poanele odenelekepa ali atoa peya kibu moamele taneyaya tokome tuma-kala nekeneyaya. Nitaneyake padele kiyo akenele odenelekepa ali atoa peya poanele toamene tetepo taneyaya meamele tokolo meemoa poadete tiki. ¹⁹Odene ago Adam einagome Akolaline

agale tetekanelekepa ali atoa peya mati poanele tane yene tetepo taneya meaneya. Nitaneyake padena agome Akolaliyo tamene wa okana toa litia tootapeanelekepa ali atoa peya mati poanele toamene yene tetepo taneya meoi.

²⁰Moseseyo one totono yametekilepa ali atoame ele kule poanele keleyo toma pomotoa taneya. Nitaneyake ali atoame poanele toma pekene toa Akolaliyo pewe wima pokome moa patukatapeneya. ²¹Ali atoa kini toma pekene poaneleme kiwi moa laboa yopima nekeneya tokome tuma-kala nekeneya. Akolaliyo pewe wia yopima pikilepa ali atoa poanele toamene yene tetepo takoane wene keaneya meou wa toko. Nipa tone Ali Muno Yesu Keraisu patu kautakoa kakete meemoa pomotoa tokome ni toko.

Tone Keraisu-pala Lipuaneya Mea Tukomo

6 Ina okounakalekepa nipa eya wa amele toko patu. Totome poanele toma poko toa moa patukakome Akolaliyo pewe ate toa wima poo. Pewe ate toa wima pomotono, poanele pa toma pato wa ato-pe. Enimo wamato-li. ²Poane peku laweteko agoke lukoa mekoota mea tuumotekete pou toa tone namolo poane wene wia wakeneya mekono, eina namolole edoa pa toomoo pato-pe. Enile pa toma poamato-li. ³Anu oya-lawe totome Yesuno ibini wedekoa ue motikilepa nipa one-pala dekoa tuou toa tokoo. Enipa wene toamikiti-pe. ⁴Totome ue motikilepa one-pala dekoa tukolo moa oloyo taneya piou toa tokoo. Nipa Akolaliyo pa teleta tootapeneya mekome Keraisu moa kamotokakana toa totoka wete moa kamotokakale meou toa weneya totono litia toma poadete ue motokoo.

⁵Tone Keraisu-pala odeneka dekoa tuou toa mekono, one moa kamotokane toa totoka moa kamotokaneya meemoa poo. ⁶Nitoono, totome eya wene toko. Tone namolo poane wene tepene pa meaneya yomo lekaneyake Yesu-pala odeneka wia dekaneya kawou toa mekilepa eina namolo wene wia wawadete toko. Nipa tone poaneleme toto moa labaneya mekota tewitikoa poadete toko. ⁷Ali pade tua pokolopa nipa one poaneleme one wa moa labakamele toamoko. ⁸Keraisu-pala odeneka dekoa tuou toa meketepa eya wa wene toko. Toto tuake wa kamomotekete one-pala lipukaneya meemoa poo. ⁹Keraisu-pala one tukale moa kamotokaneya tokome wa tuamoo. Wa tuamateko ago tokome tukileme one wa lauaneya piamoo. ¹⁰One tukilepa ali atoa tone toko poanele wia atukatapea taneyano, wa pade tuamoo. Opi Keraisu meemoa pikilepa Akolalinele-kama takoa meemoa poko. ¹¹Nitikono, kipa kini tokoi poaneleme kiwi moa labaneya mekoita mea tuane tetepo takoa meamene. Nitikete Keraisu Yesu patu kawa kelekoa mekete Akolalinele takoa mema pamene.

¹²Kini tokoi poaneleme kiwi moa labakoa talo tomotoa laukameamene. Nipa ele kule poanele toatiki wene ponoko toa litia toameamene. ¹³Kini yono kawa lene eyame poanele tomotoa laukameamene. Nitameneya Akolali neeke-kama lukoane meou wapa tuake kama pekene yene tetepo takoa meamene. Nipa yono kawa lene ika iyame nekele takakilepa epetanele-kama tou wa oneke lukoa meamene. ¹⁴Kini papete litia toatekoi totono litiku pekete toa teko tokale wakoi. Opi pewe-kama wia kako agoke lukoa mekete tikino, kini tokoi poaneleme kiwi wa moa labakoa talo tamele toamoko.

¹⁵Ina okounakalekepa totome eya wa amele toko patu. Eina namolo totonoke lukoa meameneya pewe-kama wia kako agoke lukoa mekono, poanelepa atiki toa tamele tokono, tato wa ato-pe. E'e mena. ¹⁶Nekele-kama takouno, kueme topo toa moa egetamene wa panagoke lukoa meketepa nipa einagome ta wa okale-kama litia toi. Enakale toa poaneleke-kama lukoa meketepa poanele etepea toa tua poi. Nitameneya Akolali neke agale-kama yakoane tou wa oneke lukoa meketepa one leneke poanele toameneya meane tetepo taneya meemoa poi. Enipa nimini ukutu-pe. ¹⁷Anu oya-lawe kiwi papete poaneleke-kama lukoa meake opi lukoa meamekete tiki. Naniko olaukane totono pine toa litia tekete tikino, Akolali-pala ke wane uku. ¹⁸Kipa poaneleke-kama lukoa mekoita Akolaliyo toa motaneyano, opa kiyo akeneleke-kama lukoa meatiki yene latitapeneya mekete tiki. ¹⁹Anu oya-lawe kipa wene meamene yeneno, kime yakatiki toane eya wane uku. Papete kini kawa yono lene kabunu ika iyame poanele tou wa poaneleke lukoa mekete abeyale ele kule ya tanele toma yakoi. Opi nitameneya kini kawa yono ika iyame kiyo akenele tou wa epetanele toma pamene. Nipa panagome kueme topo toa moa egetaneya meou toa mekete kinikile toameneya Akolalilinele takama pamene. ²⁰Papete poaneleke-kama lukoa meketepa epetanele toma pamedeku wa wene toamokoi. ²¹Opi poanele-kama tekete tadeko wa ya tokolo mekete tiki. Eni ya tanele toma yakoinake edeya nami enekoi-pe. Widikoado pa toma yaketepa padeya epetaneya moameneya tua atutapeoi. ²²Nitatekoiyake kipa kini tokoi poaneleme moa labakaneya mekoitake Akolaliyo toa motaneyano. Opa kueme topo toa moa egetaneya meou

toa onekele-kama takama yakete tiki. Nitoapa padeya epetaneya mou toa wene kiyo akeneya mekete mea kama poadete tiki. ²³Eya wane ekene uku. Poane pekudo noai teketepa ku poaneya enou toa etepea tua poi. Akolaliyo kiwi pa pewe witikome peku lawetekale noai teketepa ku epetaneya enou toa mea kama poi. Nipa tone Ali Muno Keraisu Yesu patu kautakoa kakete nitoi.

Adona Mekete Toatiki Adeka Pianemo

7 Anu oya-lawe kipa Mosesene totono wene tiki yeneno, eya wane uku. Panago tuameneya pa mekomepa eni totonome moa lauane meko. ²Motane atoa pade one ana pa mekolopa nipa eko tutu pade alike pamele toamoko. Anado tukolopa nipa tutu pade alike oyake pamele toko. ³Ana wete tuameneyake eko pade alike pokolopa nipa ete-kitame i atoa nepa mone poamateko alike wini pokono, pamoko atoa tadeko wa iki. Wa anado tukolopa kinita adona mekete toatiki totonome moa lauane meamoko. Nipa tutu pade alike pokolopa i atoa nepa pamoko atoa wa padameka amele toamoko.

⁴Anu oya-lawe kipa yomo lekaneyake Keraisuno tigini-pala odeneka wia dekane tetepo taneya mekete tikino, Mosesene totonome moa lauane meamekete tiki. Opa atoa pade ana tukolo pade alike pou toa kipa Keraisuke lukoa mekete tiki. Ku wedoa tuou toa onekele takama pomotoa tokome Keraisu einago tukale Akolaliyo moa kamotokaneya. ⁵Papete tone poane wene litia tokoo-petepa Mosesene totonome mena wa akenele ele kule poanele toada wa totome wene pia tokala tokoo. Nipa poane ku tuou toa tua atua poatekoole tokoo. ⁶Papetepa toto poo yapu piou toa Mosesene totonome moa lauane

mekoo. Opa toto moa labakanele litia toa mea tuou toa mekono, Mosesene totonome moa lauaneya meamele toamoko. Opi weneya totono Epetane Yominiyo wene takakole totome litia tokono, eina namolo totono wia mekane toa litia toateko toa mena.

Tone Toko Poaneleme Toto Moa Koigako

⁷Ina okounakalekepa edemo ato patu. Eina totonokepa poanele tageneya wa totome amele toko patu. E'e mena. Eina totonomepa poanele i i wa yametaneya. *Mone panagoneya tepi moameamene* wa-kiti yameamoo tokapa nipa eina toadiyano wenepa poane wene piadeku wane wene toamou toka. ⁸Eina totonome mena wa okale tekene eya kuya moadiya wane tepime tuaneya yakou. Eina totonodo piamoo tokapa poanelepa i i wane tetoane enamele toamoo toka. ⁹Papete eina totono yakameneya mekenepa epetanele tukuno wene pianeya mekou. Wa naniko eina totono wene tokou-pete laigoapa ele kule poanele tepene pia tagatapekale ¹⁰ae, nopa tuane atuane poateku ago tadeko wane wene tokou. Nipa eina totonomepa no meemoane pomotoa yamepianeyake etepeane pone tuou wane wene tokou. ¹¹Anu tepene poanele witakomepa eni totono litia tootapeke meemoa poo wa no oa yotokokale litiane tootapeane enoane meane teko tokale wakou. Teko tokale wakenepa ae nopa tuane atuane ago tadeko wane wene tokou.

¹²Eina totonopa Akolalinele takakete toateko totono. Eina totono wia mekanepa Akolalinele takakete toateko agale *kīyo* akene agale epetane agale kabe koukoa wia mekaneya. ¹³Eina epenemo-kama wia mekane totonomeke no tuane atuane pomotoa toko-pe. Mena-li. Toto wia tukakilepa

tone toko poaneleme-kama toko. Nipa no auapeateko totonomeke no tuane atuane ago tadeko wane wene tomotoa tikilepa anu toma yaku poaneleke toko. Nitikono, ele kule tikilepa dika dika toamene poanele eni tekene tadeku wane wene tomotoa toko.

Tone Tepene Kako Poi Tokomo

¹⁴Eina totonopa Epetane Yominine weneke alaneya wa totome wene tokoyake no pa itonole tuku ago meku. Nipa poane peku laweteko agome kueme topo toa moa egetekale meou toane poaneleme moa lauaneya meku. ¹⁵No nitane agome ele kule toma yakilepa wene bebo ootapeneya meane tuku. Nipa padele epetanelepa toadiyano wene pianeke toamoane ni padele poanelepa kote motukuno, toamou wane wene pianeke tokala tuku. ¹⁶I poanelepa toamouno wene pianeke wa tekene nipa eina totonopa epetaneya wane wene tekeneke tuku. ¹⁷Poanele eni tukupa anu weneme tukuya mena. Anu tepene poane wene witakome ta wa okole-kama tuku. ¹⁸Eya wane wene tukumoka uku. No itono peku naku agopa anu weneme epetanele padeleka toamuku. Nipa padele epetanele toadiyano wene pianeke tamele toamokolo wakala tuku. ¹⁹Nipa padele epetanele touno wene pikule toamukuyake padele poanele toamou wane wene pikule tokala tuku. ²⁰Poanele toamouno wene pianeke wa tekene nipa anu weneme tukuya mena. Anu tepene poane wene witakome ta wa okole-kama tukuya.

²¹Edikakilepa moa koigane totono litiane tou toane tuku. Padele epetanele tou wane wene piku-pete-kama padele poanele toateku wene patukatapekala toko. ²²Anu tepemepa Akolalinele takou wane wediane mekuyake ²³anu lene

yono kawa eyame poane totono litia tou toa tokome tepene epene wene piku toa moa kautakala toko. Nipa lene yono kawa eyame tane poanelemepa pinali no wa moa labakala toko. ²⁴Ae, no wene kedame tuaneya mekuno, pinali no wa moa laboa atukama eni pokoya-kitike teyo toa motoko patu. ²⁵No toa motikilepa Yesu Keraisu oneme toono, one tokaleke Akolali-pala ke wane uku.

Nipa Akolaline totonome moa lauaneya meada wane wene pikuyake poane peku naku ago tekene anu lene yono kawa eyame poane totono etepea litiku pokome toko.

Epetane Yomini Totoke Awinome Mekilepa

Meemoa Pomotoa Tokomo

8 Toto Yesu-pala lipua meko-kitipa Akolaliyo tone poanele tokooke nami wia kibu moatekole piamoko. ²Ni edoa-mo. Papete eina namolo totono litiku pekete toapa tone tokoo poaneleme toto etepea tuma pomotoa taneyake opi Epetane Yominine totono litia tekete Keraisu Yesu patu kautakoa kakete meemoa poko. ³Tone wene pikoole etepea litia toma pokoya tokome Mosesene totonome toto oyake moa kiyo akamele toameneya. Nitaneyake tone toko poaneleke tumotoa Akolaliyo one mana itonoke moa wetekakakalepa toto poanele toko ali-kitane lene timini tigini eya kakeneya nome mea tuaneya. ⁴Nipa ali atoapa kini tokoi poaneleke kibu moa wia tukamedeko wa eina namolo totono wia mekapiane toa taatekoa tokome toto luku Yesu tuaneya. Nitaneyake tone poane wene pikole litia toamekete Epetane Yominiyo wene takako toa litia toko-kitipa Akolaliyo poanele toamene yene tetepo takoa wene keaney meko.

⁵Kini poane wene litia itonole toma yaki-kitame kinikileke-kama wene piitikaneya yaki. Epetane Yominine wene litia tiki-kitame Epetane Yominineleke-kama wene piitikaneya yaki. ⁶Kini poane wene pianeleke wene piitikaneya yaki-kitipa kinikile etepea toa tua poi. Epetane Yominineleke-kama wene piitikaneya yaki-kitipa meemoa pekete tepe kolotini-pala kilikoa meoi. ⁷One wene pikole-kama tokagome Akolali-pala poi teia meko. Dikane agome Akolaline totono litia toamademe wawa tagakala toko. One eni totono litia tamele toamokolo tokome ni toko. ⁸Kini wene pikile-kama litia tiki-kitame Akolaline wene kekamele toamoko.

⁹Anu oya-lawe kiwi pade edikoa meameneya kini namolo poane wene litia toamekete tiki. Nipa Epetane Yominiyo wene takako toa litia tekete tiki. Akolaline Epetane Yomini kiwike awia nome mekolopa nitikete tiki. Keraisu Epetane Yomini awinameneya meko agopa Keraisu oyago mena. ¹⁰Keraisu kipala lipua mekalepa Akolaliyo kipa poanele toamene yene tetepo takoa mekome kini yomini-pala meemoa pomotoa too. Kini tokoi poaneleme kini tugini wia tukakaleka nitoo. ¹¹Nika Yesu tukale moa kamotokane ago one Yomini kiwike awinome mekalepa Keraisu moa kamotokane ago Akolaliyo kiwika tuaney pikoika moa kamotokoo. Nipa one Epetane Yomini kiwike awinome mekale tokome nitoo.

¹²Akolaliyo nitoono, anu oya-lawe one Epetane Yominine wene pikole-kama totome litia tamedeko. Tone namolo poane wene pikole litikileka toamato. ¹³Kini poane wene pikoiledo litia teketepa etepea tua poi. Nitameneya kini namolole poanele tokoilepa Epetane Yomini patu kautakoa kakete tewitikoa wawapa meemoa poi. ¹⁴Epetane Yominiyo

wene takako toa litia tiki-kitipa Akolaline mana kono-mikiti eni. ¹⁵Kime papete Akolali piti motaneya meketepa kueme topo toa moa egetane yename pinago piti motaneya meou toa mekoi. Akolaline Epetane Yomini kiwike awinikilepa edikoa pa mea kamotoa tokome awinaneya mena. Akolaline mana kono-mikiti latikademe ni awinaneyano, Akolali kowitikilepa Atai wa totome kayo oa tokala toko. ¹⁶Nitikolopa Epetane Yominiyoka tone yominimeka kipa Akolaline mati-kiti tekete ni tiki wa toto wene takakala tiki. ¹⁷Totopa Akolaline mati-kitino, Atai Akolaliyo onekeya-kitipa kini wa nani yameoo. Onekeya eni motikilepa Keraisu-pala lipua mea odeneka motekete moo. Nilepa toatekoyake papete Keraisuyo tete mokoa kakene toa totomeka tete mokoa kako. Nipa one pa teleta tootapeneya meko toa meadete tekete ni toko.

Wipitikete Mea Epetekatekomo

¹⁸A tibuke Akolali pa tootapeneya meko toa meateko peku naketepa mea epetekoono, opii-mene tete motikilepa pa nateya motane tetepo takoa moa-toane uku-ye. ¹⁹Akolaliyopa one peku mati-kiti ino, enoe wa toto keleyo moa yameatekole one eteya latianeya peyame nepia mekilepa eni toateko ta wete pata wete pata wa nepia meki. ²⁰Akolaliyo latianeya peyapa etepea pata pale toa alama nekeneya. Nilepa kini weneme taneya mena. Akolaliyo papete wene toopiane toa taneya. Nitaneyake Akolaliyo wipitia toatekale poti nepia mema nekeneya. ²¹Papete Akolaliyo one eteya latianeya peya poo yapu moa pitikou toa etepea lomuma pomotoa wakeneyake wipitikome eya too. One peku mati-kiti poaneleme moa labakanetake toa motokome toka toa tokome one eteya latianeya peya pewe

wia kawa pa takalogoo. ²²Namoloka opika one eteya latianeya peyame eni toateko ta patamotoa nepia mekilepa mati kakene atoame mati opiademe ka oa welea meko toa toko. Enipa totome wene tokomo uku. ²³Totomeka edikoa nepia meko. Nipa toto tuaneyu pikolo Akolaliyo moa kamotokoa one mana kono-mikiti latikatekole nepia meko. One eni toatekole titia tokome one Epetane Yomini totoke moa wetekaka tokolo wete toa togamene wa totome kenemada oa nepia meko. ²⁴Akolaliyo enika enile toa togatapeoo wa oneke wene tugoa meketepa toto toa momotoa nepia meko. Padele toatekaledo wete taatekoa tokale eneketepa pa nepia meamoo. Wete taatekaneya tokome nepia meateko toa mena. ²⁵Wa padele toatekale wete taatekoa toameneyake nepia meato wa wedia mekilepa pegene kakalogoa wawameneya poti nepia mea togako.

²⁶Epetane Yominiyoka toto auapekomo uku. Toto taba ali atoame edemo oane kowitiku patu wa Akolali kowitadete wili toa meko. Nipa tone tepene meaneya kabunume toaweamele toameneya mekete pa kenemada oa meko. Edikakilepa Epetane Yominiyo mama moa auapekome kowitikakolo toko. ²⁷Akolaliyo takoa motane ali atoane edikoa kowitikakilepa Epetane Yominiyo Akolaline wene pikole-kama litia toko. Nitikolo tokome ali atoane tepene meane toa tetoa enekago Akolaliyo one Epetane Yomine wene pikole-kama wene taneya meko.

²⁸Padele padele ke enekakole-kama Akolaliyo kabe koukoa talo toa mekilepa oneke wene mekoa meki-kiti mea epetekamotoa tokome ni toko. One papete wene toopikana toa taatekoa kayo oa motane ali atoake uku. Enipa totome wene tokomo uku. ²⁹Akolaliyo one papete takoa moopiane-kitipa one

mana kako toa kamotou wa moa kakapi-aneya. Nipa mana Keraisuke lokoa one mana kono-mikiti memotoa taneya.³⁰ Mana Keraisu kako toa kamotoa moa kakapikana yene noe wa Akolaliyo kayo oa motaneya. Nitoa memotoa kayo oa motokana yenepa poanele toamene yene tetepo takoa meaneya. Nitane yenepa a tibuke pa tootapeneya meemoa poatekoi peku lawetaneya.

Keraisuyo Taneleke Akolaliyo Totopa

One Kolotini Yene Wa Yopia Mekomo

³¹ Kipala ina okounakalekepa totome edemo oko patu. Akolaliyo edikoa auapekono, toto-pala teyo edoa poi teia memotoa-pe. ³² Akolaliyopa one mana pa kamotono, wateamene wa wamokome toto peyake tumotoa taneya. Nitaneyano, toto auapekilepa padele padele epetaneleka toa pewekama wia kakome too. ³³ Akolaliyo one takoa motokana yenepa poanele toamene yene tetepo takoa wene keaneyamekono, one eni ali atoamepa poanele tiki wa teyo akoa agale omotoa-pe. ³⁴ One eni ali atoa poane take pomotono ta wa Akolali-pala teyo edoa akamotoa-pe. Keraisu Yesu totoke tuaneyame. Tuaneyame pikale Akolaliyo moa kamotokatekaneyake etenane nimini yono lono pome kakome waye wa toto kei pikome toko. ³⁵ Keraisu einago totoke wene wedoa mekoa mekono, edeyame moa letekamotoa-pe. Padele padeleme ke enekakolo mekilepa wene kedame tuaneyame mea ni tete moko kawa ni kobume tuaneyame mea ni kawateko mamina toameneyame pa mea ni kotikaneta mea ni pade-kitame wia tukadete tikili mea tokoloka Keraisu toto-pala lipua-kama mekono, padameka moa letekamele toamoko. ³⁶ Enikepa padame papete Akolaline bokuke eya wa wia mekapianeyame.

Akolali, totopa ne yatene ali atoano, ta patako abuna ete-kitame kiwi wiou wa totopa sipi sipi kai tetepo takoa wikala tiki wa wia mekapianeyame.

³⁷ Nitaneyake totoke wene mekoa meko ago Keraisu patu kautakoa kakete eni yene moa kautalogako. ³⁸⁻³⁹ Akolaliyo kipa one kolotini yene wa toke wene mekoa meko toa Keraisuka totoke wene wedoa mekoa meko. Toto tua pokoloka pa mekoloka Keraisu totoke wa wene mekoa-kala mekono, edelo ali-kitameka ipono-kitameka toto moa Keraisu-pala pilikamele toamoko. Opi-mene witakole-kiti nani witatekole-kiti a tibuke tokole-kiti keti itonoke tokole-kiti enika enilemeka toto moa Keraisu-pala pilikamele toamokono wene tuku. Ee nimini.

Poloyo Iserere Yene Mama Motanemo

9 Kipala imo ikilepa Keraisu patu kautakoane kakene nimini uku. Kapene yokakene wamuku. Winimopa nimini-imo oko wa Epetane Yominiyo no wene takakolo tekene ni uku. ² Nipa wene kedame tuane matiyame uku. Tepe-pala we tokolo meane kakene uku. ³ Enipa Akolaliyo no yatene luku nopa kekaneyame latikoa wawou toa no mukiti yamea tewitikoa wamotadiyano wene pianeyame mekene uku. Nipa no moa Keraisu-pala pilikoa no luku Iserere yatene no yatene ali atoa moa lipukoa toa momotadiyano wene pikene uku. ⁴ Papete no yatene ali atoapa Akolaliyo kipa one wa takoa motokome one mana kono-mikiti latikaneyame. Nitoapa kiwi pakeke one toko paka witakaneyame. Ni kiwi auapekene dikouno ile tamene wa oa togotoa ni kini litia toatekoi totono i i wa yamea taneyame. Kini losule tekete toatekoileka i i wa yamea ni kiwi toa moatekago moa wetekatekamo oa mea taneyame. ⁵ Iserere yatene eya ibini akene ali-mene

Eberame Aisaketa Yekobe toa einago-meneke t̄ama nekeneya. Einali-meneke Keraisuka tageneya. Einagopa ako odene mekome eya kuya peya talo toa meko ago Akolalino, one-pala ke wa oa-kala mema patoane uku. Ee nimini.

⁶Kipala eni ikilepa Akolaliyo tou wa papete oa pikana toa taatekoa toamead-eko wane ekene wamuku. Akolaliyo i ali atoa one wa takoa motikilepa Iserele yene peya takoa moameneya. ⁷Akolaliyo papete Eberame-pala okome okome mana Aisake t̄ama pokoi yenepa neke kaua-mikiti tetepo takoane meou wa akeneyano, Eberameke tagene yene peyapa Akolaline mana kono-mikiti mena. ⁸Eya wane ekene uku. Akolaliyo one mana kono-mikiti i i wa takoa moa latikakilepa Eberameke t̄ama nekeneya tokome tokoya mena. Ne-loeke tagene yene auapekene dikou wa Eberame-pala papete oa togotokana tokome ni toko. ⁹One eni toatekalekepa Akolaliyo Eberame-pala eya wa oa pianeya. *Nepala oane pikouna toane taatekoane toatekou oi nokalepa oto wakapeane nokolu neke natono Serayo neke mati opikoo wa akeneya.*

¹⁰Nika Rebekayo one matita takuta opikilepa odene ago tone kaua ago Aisakene opikaneya. ¹¹⁻¹²Eni matita wete opikameneyake Akolaliyo papete odene mati one wa takoa moopikome einatoa-pala okome *namolo agome putunagono pupu takoa meoo* wa oa pianeya. Nipa eni matitame padele poaneleka epetaneleka wete toameneyake akeneya. Akolaliyo edikakomepa kini padele taneleke taneya mena. I ago takoane mou wa wene toopikilepa one wene litia tadeko wa ali atoa peyame wene tomotoa tokome ni taneya. ¹³Akolaliyo one eni tokanakaleke akene toa panagome one bokuke wia mekakome okome *Yekobeke*

wene mekoane mekeneke Iso kote tokolo waku wa wia mekaneya.

¹⁴Akolaliyo edikakomepa nipa kiyu wamenele eni toko wa totome amele toko patu. E'e mena. ¹⁵Enilekepa Akolaliyo Mosese-pala eya wa akeneya. *Panago ela moane auapeouno wene pikenepe nipa ela moane auapeou. Wa panago mama moane auapeouno wene pikenepe nipa mama moane auapeou wa Akolaliyo akeneya.* ¹⁶Nipa Akolaliyo edikakomepa tone tokolekeka tone wene pikolekeka kipa one wa takoa motokoya mena. Pa one wene litia tokala toko. ¹⁷Enilekepa Akolaliyo Idipi tobou ago Perou-pala akenemo one bokuke eya wa wia mekaneya piko. *Ne tobou ago meamene wane moane kakakilepa nepala telekole tokoule-kiti ete-kitame enemotoane tekene tokouna. Nipa ta piko peya pitiki-kitame anu ibini kamotokamotoane tekene nitikouna wa Petou-pala akeneya.* ¹⁸Akolali nitane ago tokome panago ela moane auapeouno wene pikomepa nipa eni toko. Wa panagome one agale yakamademe wamotoapa one kolotini lupi takatapeko.

Akolaliyo Pade Ali Atoa Kote Motokome

Wa Pade Ali Atoa Ela Motokome Tokomo

¹⁹Akolali onepa nitane agono, anu oya-lawe kiwi panagome-kiti eya wa kikoa oko patu. Akolaline wene pikole teyo edoa tagamotoa-pe. Padame pade menano, Akolaliyo poanele wini tiki wa tone poanele tokooke koiso edoa akamotoa-pe wa oko patu. ²⁰Anu oya-lawe ne-kiti pa ali kakeke Akolali widikoa kikoa ikilepa edekolo oko-pe. Panagome-kiti kamo itono moa mete pade latikolopa one eni latiko meteme eya wa amele toko-pe. No dikane mete

edekolo latiko-pe wa kikoamele tokope. ²¹ Mete latikagome kamo itono wane mutua moa mete takuta-kiti latikilepa iya keneke epetaneya-kama lobutou wa latia wa iya keneke nee yabunu eya lobutou wa latia toko. One pine ago tokome one wene kibunukoamea tokome padeya epetaneyaka poaneyaka oyake latiamele toko.

²² Eni toko toa Akolaliyo eya taneya. Poaneleke kotimi wene mati luaneya meaneya. Nitoa padele padele tubele toa keleyo kibu moademake one kibu moa wia atukateka yename poanele tokoi tokoi kibu moamoapoti nepia meaneya.

²³ Nitaneyake one ela moa yopiatekakitipa a tibuke one keneya pa teleta taneya meemoa pomotoa one wa takoa moopianeya. Nipa one eni peku a tibuke lawetoane tagatapeou wa takoa moopianeya. ²⁴ Totopa one wa eni takoa motokomepa padeka-kiti Yu yatene ali atoa padeka-kiti ete pa yatene ali atoa takoa motaneyaya. ²⁵ Enilekepa Akolaliyo akene toa Oseyayo one bokuke eya wa wia mekakaneya.

Papete pa yatene tetepo takakene wakouna ali atoapa no yatene wane oane wa papete wene mekamekene wakouna mone yenepa anu kolotini yene wane oane tou. ²⁶ Papete kipa no yatene mena wane okouna takepa eida kipa meemoane puku Akolaline mana kono-mikiti wane ou wa Oseyayo wia mekakaneya.

²⁷ Eina toa Akolaline agale toaweake akane ago Aisaiayo Iserere yateneke eya wa kayo akeneya. *Iserere yene kipa ue kibi keneya oi moamele toameneya kainya mati mekolika Akolaliyo pa natetekoa one wa toa moo. ²⁸ Ali Muno agome ali atoa peya kini poanele tokoike nami wiapa kotikatapea koiso akanokome kibu mootapeou wa Aisaiayo akeneya. ²⁹ Nipa Aisaiayo papete eya waka wia mekapiane toa too. Telekole-kama toko Ali Munagome*

natetekoa kiwi meati wa ali lene moamoo tokapa nipa Sodome Gomora tatake meane ali atoa keneya toto yateneka tua atu-tapeou toka wa wia mekapianeyaya.

Iserere Yename Yesunomo Wakenemo

³⁰ Nipa eya wane ekene uku. Akolaliyo kiwi poanele toamene yene tetepo takoa wene keaneyaya memotoa e ku pa yatename toa enameneyake Akolaliyo eni pa yenepa poanele toamene yene tetepo takoa meaneya. Nipa kini Keraiusuke wene tugakoike taneya. ³¹ Nitaneyake Yu yatename Akolaline leneke poanele toameneya meato wa wili tokoa kawa teko tokale wakeneya. ³² Edekale taneya-pe. Keraiusuke wene tugamekete tekete Mosesene totono litia tootapeadete wili tokoa kawa teko tokale wakeneya. Nipa Akolaliyo takoa moa pi-anekue waneke ogo witikale kaji-aloganeyaya. # ³³ Enilekepa Akolaline bokuke eya wa wia mekaneypiko.

Anume tukule enoe. Saione take kue wane takoane moane piku. Ali atoa ogo witikolo kajalogamotoane tuku. Nipa puku pekete toa tugamotoane tuku. Nitikuyake kue wane adeka pikene uku agoke ali atoa wene tugoa meketepa oneke ya tokale mekileka toamoi wa panagome wia mekapianeyaya.

10 Anu oya-lawe kipala ukumo yakamene. No yatene Iserere yatene Akolaliyo toa momotadiya wane kini kowitikakala tuku. ² No yatene ali atoame Akolalinele wedoa takadete wili tokoa kawake one wene kekatikile agopa tokolo pata pale tiki. ³ Nipa Akolaliyo ali atoa poanele toamene tetepo takakome tokole agopa tokolo kini weneme one leneke poanele toameneya meoone wene pianeya mekete tiki. Nipa Akolaliyo kipa poanele toamene yene tetepo takoa wene keaneyaya memotoa toatikile

toamadete waki. ⁴Keraisyuo Mosesene totono litia tootapea mea tukome eni totono teiganeya. Nitaneyano, opa Akolaliyo ali atoapa poanele toamene yene tetepo takoa wene keaneyu mekilepa Keraisu einagoke wene tugoa mekili tokome toko.

⁵Papete Moseseyo one totono yame-tekilepa poanele toamene tetepo taneya meemoa poadetepa nipa i totono-kama litia tootapeamene wa yametaneyu. ⁶⁻⁷Opa ali atoapa Yesuke wene tugoa mekili tokome Akolaliyo poanele toamene yene tetepo takoa wene keaneyu mekoke eya wa wia mekaneya piko. Eya wa wameamene. Kipa poanele toamene tetepo taneya meadetepa teyo Keraisu enemotoko patu. *Nipa ate tibukeka tu-ane ali atoa pote meki takeka teyo enemopoko patu* wa wameamene. Keraisu one weneme itonoke wete nome mea tua wa ate kamo pekeneya wa panagome wia mekaneya. ⁸Eya wa okome akeneya. *Onekemopa ta tetemada akenemo mena. Kini kabunu kenekeka kini tepeneka wete lukaneya* wa wia mekakome akeneya. Enipa Yesuke wene tugatikimo totome toawe okomoke uku. ⁹Totome eya wa toawe oko. Yesu einakagopa kini Ali Muno wa kini kabunume peetapea oa ni einakago tukale Akolaliyo moa kamotokaneyu wa eni tanemo tepene lua tokolipa Akolaliyo kiwi toa moo. ¹⁰Nitoo, kini tepene Yesunomo yakoa moa luketepa poanele toamene tetepo taneya meoi. Ni kini kabunume Yesuke wene tugakoinakamo toawe eketepa toa motaneyu meoi. ¹¹Enilekepa Akolaline bokuke eya wa wia mekaneya piko. Yesu einagoke wene tugoa mekikitame ya moamoi wa wia mekaneya. ¹²Enipa Akolaliyo Yu yateneka e ku pa yateneka takoa enameneya odene yatene tetepo takoa meko. Yu yatene e ku pa yatene-kitika odene ago onekekama lukoa meki. One ibini wedekoa

kowitiki peyapa einago Akolaliyo pewekama wia kako. ¹³Enilekepa Akolaline bokuke eya wa wia mekaneya piko. *Ali Munono ibini wedekoa kowitikoi peya oneme toa mokala too* wa panagome wia mekaneya.

¹⁴Einagokedo ali atoa wene tugoa meameketepa auapeano ta wa one edoa kowitimotopa-pe. Onekemodo yakameketepa oneke edoa wene tugamotoa-pe. Ni paka mekoika pade-kitame onekemo oa aua noamokolipa onekemo edoa yakamotoa-pe. ¹⁵Akolaliyo onekemo oa aua yawatekoi yenedo moa wetekamokalepa onekemo yakamene yene mekoika Yesunomo edoa oa aua nomotopa-pe. Akolaliyo eni taatekoka toatekalekepa Aisaiayo wia mekakome okome *tone wene epetekamotoa agale oa aua niki yenepa kawame kautoa ku nikimokono, ke wa makutukoa moato* wa wia mekaneya. ¹⁶Onekemo oa menokolika peyame yakoa motaneyu mena. Enilekepa Aisaiayo wia mekakome okome *Ali Muno nekemo totome oa metekoonakamo pa natetekoame yakoa motokoi* wa wia mekapianeyu. ¹⁷Nimo ikilepa eya wane ekene uku. Ali atoa Yesuke wene tugakilepa pade ali-kitame oa metekimo yatekete ni tiki. Enimo oa metekilepa Yesunomo-kama eni oa meteki. ¹⁸Nipa eya wane yatekene uku. Iserele yene paka mekete tekete onekemo yakameneya-pe. Yakatapeneya-li. Eya wa wia mekaneya pikolo tekene ni uku. *Onekemopa ta piko peyake oa pupitikatapeneya. Kini agalepa e ku take oa tugatapeneya* wa panagome wia mekaneya.

¹⁹Eya waneka yatekene uku. Akolaliyo kiwi wakome e ku pa yatene takoa moo wa Iserele yename wene toameneya-pe. Wene tootapeneya-li. Akolaliyo eni papete wene toopianele taatekoka tokale Is-

erele yename wene toamokaya tokale Moseseyo namolo Akolaliyo oka toa eya wa wia mekaneya.

No Akolaliyo pa yatene mama motokoule enekete Iserele yene kime ni yatene-pala wene poaneyameoi. Nipa wene meamene pa yatene ela moane auapekoule enekete kotimi wene luaneya meoi wa Moseseyo Iserele yene-pala akeneya.

²⁰Wa naniko Aisaiyo one Iserele yatene piti moameneya mekome eya wa akeneya.

No tuku toamokoi pa yatenameke no i ago Akolali meadeko wa wene tokoi. No i ago Akolali edane ago patu wa pitia yakameneyake ni pa yene pono yamepokou wa akeneya.

Nipa enilepa wete taatekoa tane tetepo takoa wia mekaneya. ²¹Pa yateneke nimo okomeke Iserele yateneke eya wa akeneya. *Anu yatene makutukoane moadene kawane ta likakouyake kolotini lupi taneya mekete anu agale tagoa toamiki wa Akolaliyo akene toa Aisaiyo wia mekaneya.*

Akolaliyo Iserele Yatene Mama Motanemo

11 Akolaliyo nimo akeneyano, eya wane yatekene uku. Akolaliyo one Iserele yatene wakeneya patu. E'e mena. Noanupa Iserele yatene ago Eberameke tageneya. Bedamine ti pitikene ukuno, Akolaliyo Iserele yene peya wakeneya wa edoa oadete-pe. ²Akolaliyo namolo namolo one wa takoa motane yatene pa wakome wawameneya. Akolaline bokuke Ilaidayo Iserele yatename poanele-kala tokoike Akolali-pala ko oa akanemo agopa tokolo meki-pe. Eya wa akeneya. ³Neke i yename neke agale toawe akakoina ali-kiti wia tukoa ni neke lodo yoadete kue moa latiane walai-kiti wia tadekoa tokoi. Nekele takaku ago anu kidenali meku. *Eni yename noka wia*

tukadete wili toa kaki-kale ⁴Akolaliyo edemo akeneya-pe. Eya wa akeneya. *Ege egeta kadukoa (7,000) ali-kiti nooke pa lukoa mekete paya gode Beale einagonole takamiki. Eni ali-kiti wawamoane pa yopiane kaku wa Akolaliyo Ilaidapala akeneya.* ⁵Opika one Iserele yatene pa nateteko one wa takoa motikilepa pa pewe witikome tokome toko. ⁶Eni yenepa one weneme pewe witikome one wa takoa motikilepa nipa kini padele epetanele tikike nami witikome tokoya mena. Kini padele epetanele tikilekedo takoa motokolopa nipa one weneme pa pewe witikome ni toko wa amele toamoko.

⁷Nipa eya wane ekene uku. Iserele yename kini moatekoiya tuku tokoa kawa teko tokale wakeneya. Moameneyake Akolaliyo pa nateteko one wa takoa motane yename motaneya. Ete-kitipa kolotini lupi takatapeneya mekete moameneya. ⁸Enilekapa Akolaline bokuke eya wa wia mekaneya piko.

Akolaliyo ni yenane wene moa agopa takatapeneya tokome opika kini leneme enekile enoa moamele toamoa kini kaleme yatekimoka yakoa moamele toamoa tokolo pa meki wa wia mekaneya piko.

⁹Depidiyoka dikane yeneke Akolali-pala okome okome

I yene kini toge nee mekete nakoika kini yukakoina wakoke moa labakou toa kibu moamene. Kini toge nee eyake wene pitikaneya yaku pekete toa ogo witikale pitamotamene. ¹⁰Kini leneta lianeya mea etepea tugawineya yamotamene. *Ke enekakale-kama memotamene wa Depidiyo akeneya.*

¹¹Eya waneka yatekene uku. Akolaliyo ni Iserele yene etepea tugawineya yamotaa wakome wako patu. E'e mena. Iserele yene etepea pikili tokome Akolaliyo e ku pa yatene

toa mokala toko. Nipa eni pa yatene toa motoko toa kiwika toa momotadiya wa Iserele yename wene pimotoa tokome ni toko. ¹²Iserele yename Yesunomo yakameneya tokome Akolaliyo kiwi luku ta piko peya pitiki pa yatene-kiti kamo takou toa pewe wima poko. Nipa Iserele yene kini moatiki toa moameneya pa memotoa wakomepa e ku pa yatene kamo takou toa pewe wima poko. Wa naniko one papete wene toopikanakale taatekoa Iserele yeneka oto wa motokomepa kiwi peya pewe wia tagatapeoo.

¹³Opi kiwi pa yatene ali atoa-pala ukuno, Akolaliyo kiwi pa yatene meki toane onekemo oane auane yamotoa no takoa kakaka tokolo ni uku. Nikepa pinali anu wa kei piamele toko. ¹⁴Kipala i ukupa kiwi pa yatene Akolaliyo pewe witikale mekoile enekete no yatename kiwika dikoa meadiya wa wene pimotoane tekene uku. Nipa no yatene ali atoa padeka-kiti toane moadene ni uku. ¹⁵Akolaliyo one Iserele yatene tewitikoa wakomepa e ku pa yatene-pala oya kakaneya. Nitaneyano, naniko onena yatene oto wa moa pewe witikalepa ali atoa peya tuake wa kamo pou toa wedianeya-kama meoi.

¹⁶Panagome-kiti one noateko palawe yotokome pade deya Akolaline takoa pikakolopa nipa Akolaliyo eni palawe peyapa one wa tetepo takoa wene keaneyaya meko. Yomo pade pinedo Akolalineya wapa yenene-kitika Akolalineya wa kikilikoa oko. ¹⁷Ni ipele olipe yomodo yenene pedaneyaya kakolo enekomepa pinago tayo lono pome paya olipe yomo yenene teimoa nome eina pedane luku kikutukoa lutua kakako. Eina toa Akolaliyo kiwi pa yatene-kiti moa one yatene pakeke moa kakaneya. Nipa one matane yomo-pala moa lipukou toa

kiwi weye akoo meko. ¹⁸Nitikono, anu oya-lawe kime eni wakene Iserele yenepa pedane yomo yenene wa paya tetepo takameamene. Eya wa wene taneya meamene. Yenenekepa yomo pine witakoya mena. Yomo pinekepa yenene witakoya. ¹⁹Kime eya wa mate agale iki patu. Pinagome eina pedane yomo yenene wakilepa kiwi moa lua kakademe ni toko. Tamele tadeko wa iki patu. ²⁰Winimopa nimini ikilika eya wane uku. Akolaliyo onena Iserele yene wakilepa Yesunomo yakoo moamokoli tokome ni taneya. Nitoapa kiwi pa yene moa lua kakakilepa Yesunomo yakoo motokoli tokome ni taneya. Nitaneyano, kini wa kei piamoano, Akolali piti moamene-ye. ²¹Akolaliyo onena Iserele yatene wakene toa pa yene kiwika wakayano, wedoa meamene. ²²Akolali nitane ago tokome padeka-kiti ela motokome wa padeka-kiti kote tokolo wakome toko wa wene taneya meamene. Onekele takoake wakene-kiti kote tokolo wakomeke anu oya-lawe kiwi ela moa yopiko. One ela moa mekome yopikota pa mea kakilipa nipa kiwi ela moa yopia-kala meko. Mea kawameadekolipa Akolaliyo kiwi-palaka pilia wawoo. ²³Onena Iserele yename ae poanele tekete tadeko wa Yesunomo yakoo motokolipa oto toa motokome kiwi pegetoa kakoina luku wa moa kakoo. One nitane ago tokome tamele toko. ²⁴Kipa matameneya paka witakoya olipe yomoke teimoa one mataneyaya kako olipe yomoke lua togotoa kakakona. Nipa ali-kitame padele lugutukoa toamikile Akolaliyo eni tokona. Iserele yatenepepa one mataneyaya kako olipe yomono, kiwi kakoina lukudo wa moa kakakomepa nipa ali-kitame kini matane yomo yopikete lugutukoa tikile eni too.

Akolaliyo Ali Atoa Peya Ela Motokomo

²⁵ Akolaliyo papete ali atoa-pala kaukoa meanemo toaweane uku. Anu oya-lawe kini wa kei pia mate agale akaya tokolo ni uku. Iserele yename Yesunomo yakoa moamo tugi akeneya meake pa edikaneya mea togamoi. Nipa Akolaliyo takoa moopiane pa yatene ali atoa peya oneke lukoa menokoli Iserele yene oneke wa lukoa menoi. ²⁶ Nitikoli Akolaliyo onena Iserele yene peya toa moo. Nipa eya wa wia mekapiane toa taatekoa too.

Kiwi toa moateka ago nikilepa Saione ta kawa noo. Eni nokomepa Yekobeke tagoi-kiti kini Akolaline totono tagoa poanele tokoile moa kogatapeoo. ²⁷ Kini tokoi poanele moane kogatapekilepa nipa kiwi auapekene dikou wane papete oane togotokouna taatekoane tou wa Akolaliyo akeneya.

²⁸ Iserele yename Yesunomo yakoa moamikili Akolaliyo poi teja mekilepa nipa kiwi luku e ku pa yatene ali atoame Yesunomo yakoa momotoa tokome toko. Nitikoyake Iserele yatene papete one wa takoa motaneya tokome kiwi opia tagaane ali-mene wene taneya mea Iserere yateneke pa wene mekoa meko. ²⁹ Akolali nitane agono, i yatene one wa takoa moa pewe witikilepa one wene wia wawamokome pa toa togako. ³⁰ Papete kiwi pa yatene ali atoame Akolaline agale tagoa toamokoino, opi Akolaliyo eya toko. Onena Iserele yatename one agale tagoa toamikili tokome kiwi pa yatene-kiti ela moa yopia meko. ³¹ Akolaliyo kiwi pa yene ela moa yopikolo tokome onena Iserele yename Akolaline agale tagoa toamiki. Nipa Akolaliyo kiwika eina toa ela moa yopimotoa tekete tiki. ³² Eya wane ekene uku. Papetepa ali atoa peya one agale tagoa poanele ete-

pea toma pomotoa Akolaliyo wakilepa eya tou wa wene toopikome taneya. Wipitikene kini poanele tokoike nami wiameneya kibu moamikilepa kiwi peya pa ela motekene tou wa wene toopikome taneya.

Ali Atoame Akolali Kei Pikete Oatikimo

³³ Akolaliyo toto kamo takou toa edikoa pewe wia kako. Wene muno meane ago tokome pademo pademota wene tootapeneya meko. One toateka wene toopiane toa pine edoa toa atope. One wene toopiane toa taatekoa tikilepa dikoa toko wa padameka toaweane akamele toamoko. ³⁴ Enilekepa eya wa wia mekaneya piko.

One tepene piko wene i i wa teyo tetoa enoa toaweane omotoa-pe. Ali Muno ago teyo olaukamotoa-pe. ³⁵ Ali Muno agome padeya tukua memotoa onekeya pade metikilepa teyo tomotoa-pe wa wia mekaneya piko.

³⁶ Padeya padeya peya Akolaliyo-kama latia pianeya. Enika eniya peya oneme pa yopia-kala kako. One kei pimotoa tokome ni toko. Nitiko ago kei pia-kala mema patoane uku. Ee nimini.

Akolalike Padeya Mea Lodo You Toa

Yono Kawa Eyame Onekele Takama Yamene

12 Anu oya-lawe kipala ina okounakalekepa eya wane uku. Akolaliyo toto edikoa ela moa mekono, one kalono takoa padeya lodo you toa eya tamene. Tepe kolotini yono kawa ika iyame nekele-kama takou wa one wene kekama pamene. Nitou wa onekele wendoa takama pamene. ² Itono peku noa tiki-kitame tiki toa toameamene. Nita-meneya kini namolo poane wene wia wawa Akolalike-kama wene piitikaneya meamene. Nitiketepa Akolaline wene

pikole wene toa toi. Nipa padele padele epetanele ni Akolaline wene kekatikile ni onekele takakete toatikile i i wa wene toa toi.

³Akolaliyo one agale oa aua poano pa wa no pewe wia moa kakaka tokolo kiwi peya-pala eya wane uku. One peku kiwi tutu tutu wa laweteko toa noa teketepa odenele-kama toameneya onekele tatite toa takoa mekino, onekele takakene tuku toa neme ta wa mate agale wameamene. ⁴Eni uku toapa yono kawa lene timini tepe kolotini eya odeneya kaaloganeyake eniya-kitame odenele-kama toamoa ele kule tutu tutu wa tatite toa tiki. ⁵Eina toa toto Keraisu-pala lipua meko-kiti peya mati mekoyake odene ago Keraisuno tigini kaalogane tetepo taneya meko. Nipa ete oto wa liputakutukoa meko. ⁶Akolaliyo toto pewe witikome peku tutu tutu wa laweteko toa noa teketepa odenele toamoa onekele tutu tutu wa tatite toa takako. One agale toawe akateko peku lawetekolopa nipa onekele takakete toatekole yameteke toa litia toawe akato. ⁷Ete-kitanele takamedekolopa nipa kinikile takama pato. Akolalinemo olaukamedekolopa nipa onekemo olaukato. ⁸Ali atoame onekele takoa togamotoa tekete kini wene weye akoa auapeamedekolopa nipa nitato. Padeya toameneya pa meki-kiti tonekeya tatia meamedekolopa nipa keda takoa mekala tato. Ali atoa yopia kamedekolopa nipa wedoa yopikoa kato. Ke enekakolo meki-kiti ela moa auapeamedekolopa nipa ko wameneya wene epetaneya mea tato.

⁹Tepene poane wene pimotoake pa kabunume i ago neeke wene mekoane meku wa wameamene. Ele kule poanele peya kote moa titi toma pamene. Ele kule epetaneleke-kama wene piitikaneya meamene. ¹⁰Kipa Keraisuno wamene laine-mikitino, ete oto wa

wene mekanali yoma pamene. Nipa kini kini ete oto wa kei pikala tamene. ¹¹Ali Muno agonolepa kote au keneya moa takameneya poga poga toa takama pamene. ¹²Akolaliyo wipitikome epeteko tokale nepia mekilepa wedia mea nepia meamene. Nipa ke enekakale meketeka Akolalinele poti takoa togato wa one kowitikala tamene. ¹³Akolaline ali atoa padeya-kiti toameneya pa mekolipa kinikiya pade tatia meamene. Ni pade ta kawa noka ago eneketepa nee noano noo wa makutukoa moamene.

¹⁴Panagome-kiti ne tete metekalepa nipa topo takoa poanemo wameamene. Nitameneya einago pewe wia kamene wa Akolali kowitikamene. ¹⁵Panago-kiti wedia mekalepa nipa one-pala wediata meamene. Wa panago-kiti komo oa kakalepa nipa ela moa one-pala komo oata meamene. ¹⁶Wene odene kotuta kakatagutukoa meamene. Ete yene paya tetepo takoa meamoano, ponopene yene-pala wedoa oya kakoa meamene. Ni anume tuku toa neme ta wa mate agale wameamene.

¹⁷Panagome-kiti ne toa potokakalepa nipa padele poanele topo takoa toameamene. Nitameneya padele padele tikilepa ali atoane leneke epetanele-kama tamene. ¹⁸Wene odene kotuta kakatagutukoa meato wa ete yene-pala oya kakoa enekala tamene. ¹⁹Panagome-kiti ne toa potokakalepa kibu motikileka toameamene. Nipa Akolaliyo einago-pala kotimi wene luaneya mekome kibu motokamotoa nepiamene. Eya wa wia mekaneya piko. *Padele padele poanele tokoike kibu motokilepa no Ali Munagoyo-kama nami wiane tou wa wia mekaneya piko.* ²⁰Akolaliyo nitoono, kibu moamoano, eya tamene. *Nepala poi teiane ago kobume tuaneya mekalepa one nee takoa lawetamene. Ue nodome*

tuaneya mekalepa ue nomoa lawetamene. Nitikalepa one poanele taneke ya tokale meoo. ²¹Einago kibu moateka wene ponoka toa neke wene moa koigakayano, epetanele toma pamene. Nitikepa poanele moa kautoo.

Ta Talo Tiki Ali-kitike Lukoa Meatekomo

13 Kanosolo Kapomane eya ali-kitame tamene wa okoi toa litia tamene. Enika eni yenepa Akolaliyo one wene toopikana toa tokome moa kakakala taneya. Nipa e ku yatene mekoi toa tatikamu toa moa kakakala taneya. ²Kini okoile toamadete wawa tagaketepa nipa Akolaliyo moa kakane ali-kiti eni wakete toi. Nitikolipa Akolaliyo koiso akoa kibu moo. ³Epetanele toma yaketepa nipa Kanosolo Kapomane ali-kiti edoa piti moadete-pe. Poanele toma yaketepa nipa kibu motokaya wa piti moamele toko. Piti moameneya atiki toane meou wa wene piketepa nipa epetanele toma pamene. Nitikoli enekete ta talo tokoi-kitame ke wa kiwi kei piei. ⁴Kiwi talo toa epetekamotoa tokome Akolaliyo Kanosolo Kapomane ali-kiti moa kakaneyano, nitoi. Anu oya-lawe kime poanele toma yaketepa nipa kibu motokaya wa piti moamene. Kiwi kibu moatiki tele lukatapeneya kakino, kini tokoi poaneleke nami wia kibu motikilepa Kanosolo Kapomane ali-kiti Akolali patu kautakoa kakete toi. ⁵Eni yename okoi toa litia tikilepa nipa kibu motokaya wa piti moa tamene. Ni tepeme epetekoa tamene wa oko toane tamedeku waka litia tamene. ⁶Takesi kue pitikakilepa nipa ta talo yename Akolaline pupu takoa mekili tekene pitikamedeku wa tiki. ⁷Nipa Kanosolo Kapomane ali-kiti meatiki toa meamene. Takesi kue pitikamedekalepa takesi kue pitikamene. Kasetome takesi

kue meamedekalepa kasoteme takesi kue meamene. Panagoke nate wene pianeya lukoa meamedekalepa oneke nate wene pianeya lukoa meamene. Ni panago kei piamedekalepa one kei piamene.

Ali Atoake Wene Mekoa Mekete Toatekomo

⁸I agome onekeya nani oto memotoane tekene anukuya pade opi meteku wa edikoa ete oto wa nami kakanali yoameamene. Eya tamene. I ago nooke wene mekoa memotoane tekene oneke wene mekoane meada wa ete oto wa wene mekanali yamene. Edikaketepa nipa Akolaline totono litia toatiki kotu kakoa tekete tiki. ⁹Kini totono dikakoya. *Panagono atoa-pala koua piamoa ni ali atoa wia tukamoa ni panagoneya kode moamoa ni ete ali atoa akoa agale wamoa ni panagoneya tepi moamoa ele kule poanele peya toameamene* wa wia mekaneya piko. Enika enile toameamene wa akenepa nipa *pinali neke wa wene mekoa mea mama motoko toa ete ali atoakeka wene mekoa mea mama moamene* wa Moseseyo okome akeneya. ¹⁰Eko ali atoake wene mekoa mekagomepa eko ali atoa-pala toa potokakileka toamoko. Eko ali atoake wene mekoa mekomepa nipa eina totono litia toateko kotu kakoa litia tootapekome toko.

¹¹Kime edikoa meketepa eina oipa opi nekedeko wa wene taneya meamene. Akolaliyo toto toa moo wa papete Yesuke titia wene tugoa meketepa enile tomotoa poti nepia mekoo. Opa eni toateko tigotoma nokono, atu pia meameneya kamokoa nepia meamene. ¹²Kolopa pilia ta patademe tokono, likonu poanele toma pokoonakale tewitikoa wato. Nitoapa pa keneke poi topadete tue kotokoto eya moa pikoa kawou toa epetanele

toma pato. ¹³Nipa pa keneke yakete toateko toa epeteko meato. Bia ue eya noa piamoa ni pamoko atoa-palaka padane atoa-palaka koua piamoa ni neno wamoa ni panagoneya tepi moamoa edikoa toamato. ¹⁴Nipa poi topadete moa kawatiki mamina moa kawou toa Ali Muno Yesu Keraisu-pala lipua meamene. Wene ponoka toane ele kule poanele toada wa wene kibutukoa meameamene.

Yesunomo Wedoa Yakoa Moamoko Ago

Ela Motekete Toatekomo

14 Panago Yesuke wene tugoa meake wedoa lipua meamokolopa nipa one-pala oya kakaketepa one kekanele latikoa toamokoleke neno wameneya pa makutukoa moamene. ²Yesuke wene wedoa tugoa mekagomepa padeyaka kekaneya latikoa wawamoa nee melepu eya atiki toa moa nako. Wa panago Yesuke wedoa wene tugoa meamokagomepa one kekanele tamene piti moa mekome kai melepu eya wawa ipe witakoya nee takoa moa nako. ³Eya kuya peya moa nako ago nemepa kekaneya wawa noamoko ago paya tetepo takameamene. Ipe witakoya nee odene takoa moa nako ago nemepa o ago-pala kekanele wini toko wa kikoa wameamene. Kita odeneletapa toamiki agotake Akolaliyo kita one wa takoa motaneya tokolo ni uku. ⁴Panagono pupu takako ago one tokolepa ete-kitame edoa takoa enemotoa-pe. Epetanele tadekaleka poanele tadekaleka one pupu pinagome odene takoa enamele too. Nimo ukuyake pupu agome pinagonole takoa togoo. Nipa Ali Muno agome one patu poapeneya kautakoa kamene wa one tele lukakale takoa togoo.

⁵Panagome-kiti ta patako pade Akolaline takoa oi pikoa kako. Wa panagome e ku ta patako takoa enameneya ta patako peya midi plane tetepo takako. Enipa kini kogonono, mainagome tokole litiane tuku patu wa wedoa wene kibututukoa litia tamene. ⁶Panagome-kiti ta patako pade Akolaline takoa oi pikoa mekilepa Ali Muno agono wene pikole tuku wa wene pia toko. Wa panagome melepu eya moa nakilepa Ali Muno agono wene pikole tuku wa wene pia toko. Nipa Akolali-pala ke wa ootokoa nako. Panagome tawe eya wawa noamikilepa nika Ali Muno agono wene pikole tuku wa wene pia toko. Nipa Akolali-pala ke wa oya wawa noamoko. ⁷Itonoke pa meadeteka tua poadeteka tone tone wene pikolekama litia tamele toamoko. ⁸Totopa pa meketeka tua peketeka Ali Muno patu kautakoa kakete toko. Nipa pa meketeka tua peketeka tone Ali Muno agokekama lukoa meko. ⁹Einago Keraisu tuake wa kamao pikilepa toto pa meketeka tua peketeka Ali Muno oneke lukoa memotoa tokome ni taneya. ¹⁰Wipitia ta pataka-pete Akolaliyo toto peya one leneke moa kakoa koiso akoono, neke oyagome tokolepa edoa takoa eno akade-pe. Neke oyago edoa paya tetepo takade-pe. ¹¹Eya wa wia mekaneya piko.

No tuamateku ago Ali Munoyo uku. Ali atoa peya no kakakoa wadini tukukala toi. Peyame no Akolali-pala ke wa kei pia kawoi wa wia mekaneya piko.

¹²Eni toateka oi witaka-petepa toto peya tone toma pokoonakale i i wa tone tone toawe okala too. Akolaline leneke kakete nitoo.

¹³Nitoono, papete ete oto wa akoa agale wamatoane uku. Nitameneya kini oya-mikitame etepea poanele toma pomotoa tikile-kiti toamato wa oa to-

gotamene. ¹⁴Enipa Ali Muno Yesu patu kautakoane kakene eya wane uku. Padeya nee odeneyaka totome kekaneya latikoa wawateko toa mena. Nitoa wawateko toa menake panagome-kiti iya neepa kekaneyano, waou wa wene piake nakomepa poanele eni tokome too. ¹⁵Dikane ago neke oyago kakakoa one kekaneya pade neme-kiti moa nakepa nipa one wene keda takake too. Nipa oneke wene mekameneya meke too. Einagokeka Keraisu nome tuaneyano, einago kakakoa one kekaneya pade moa noameamene wane uku.

¹⁶Nipa neme-kiti eya kuya nee kekaneya latikameneya atiki toa namele tokoyake ete-kitame kini kekanele wini toko wa ne akoa agale akaya tokolo ni uku.

¹⁷Akolalike lukoa meketepa nipa edikoa eya kuya nee ue edoa takoa enatope. Nitameneya eya tato. Akolaliyo totopa poanele toamene yene tetepo takoa wene keaneyaya memotato wa one-pala odene wene pia kilikoa mea ni Epetane Yomini awinaneya mea tekete wedia meato. ¹⁸Kerai sunole edikoa takaketepa nipa Akolaline wene kekatekole eni tekete too. Nitikolo enekete eko ali atoame ke wa toto kei piei.

¹⁹Kipala ina okounakalekepa tone tepe kolotini kilikoa meatekole toa enato. Nipa Kerai sunole wedoa takadetepa ete oto wa auapenali yatoane uku. ²⁰Panagome-kiti Akolalinele takoa meake wakaya tokale kini nakoi nee melepu eyake neno oa piliameamene. Padeya padeya nee melepu eya ali atoame noatekoi toa latia pikaneya. Nitaneyake one kekaneya wawa noamokago etepea pomotoa one kekaneya moa naketepa poanele tekete toi. ²¹Dikane ago kini oyago pade etepea pokaya tokale one kekaneya melepu gerepi po ku ue eya titi takoa noameketepa nipa epetekoa tekete toi. ²²Padeya padeya ue nee

melepu namele toko wa wene piketepa kini wa lukoa meamene. Akolaliyo wene tokono, eya kuya namele toko wa toaweameameamene. Panagome-kiti eya kuya nee melepu namele toko wa wene pia tikilepa one tepeme mena wa wawameneya tokopa kolotine yawatekago eni. ²³Panagome padeya nee-kiti namele toamoko patu namele toko patu wa poome taneya mekomeke moa nakomepa poanele eni toko. Nipa one tepeme ta wa wameneyake tokomepa poanele eni toko. Padele padele tikilepa ipa kiyo akenelene, tamene wa tepeme wameneyake tokomepa poanele eni toko.

Eko Ali Atoane Wene Moa Auapeamene

15 Totopa Yesunole wedoa takama poko-kiti tonekele toameneya eya tatoane uku. Padele padele kekanele tamene piti motaneya mekete Yesunole wedoa takama poamiki-kitipa mama moa auapeato. ²Eko ali atoame Yesunole wedoa takama pomotono, wene epetekoa auapeatoane uku. ³Keraisu itonoke nikilepa onekele toademe nekeneya mena. One eni nokome oatekamo panagome Akolaline bokuke papete eya wa wia mekaneya. *Atai, pade-kitame nepala taumada toa ikili yatekenepa nipa no-pala odeneka dekoa poanemo akene tetepo takoane yateku* wa wia mekapianeya. ⁴Akolaline bokuke wia mekanemo peya wia mekakilepa totoka ke enekakale meake wedia memotoa olaukatekoimo eni wia mekaneya. Nipa ke enekakale meake onekele poti takoa togane yene Akolaliyo auapekana toa totoka auapeoo wa nepia memotoa taneya. ⁵Nitaneyano, onekele poti takoa togamotoa auapeko ago Akolali-pala eya wane kini kowitikaku. Keraisu Yesuyo nekele-kama takako toapa

anu oya-mikiti odene wene-kama pianeya mea takamotono ta wane kini kowitikaku. ⁶Nipa odene wene pianeya mea kabunu koukotukoa tekete tone Ali Muno Yesu Keraisu Akolali oneketai kei pia kamotoane uku.

⁷Nitikuno, Keraisu Yesuyo kiwi makutukoa motane toa tekete kini kini ame anai wa ete oto wa makutukoa moamene. Akolaline ibini kamotokamotoane tekene ni uku.

⁸Enipa eya wane ekene uku. Keraisu Yu yenanele takademe nokomepa Akolaliyo kiwi yatene auapekene dikou wa tone kua-mene-pala papete oa pikanakale taatekamotoa tokome nekeneya. ⁹Ni Akolaliyo kiwi pa yeneka ela motokome makutukoa motoko wa pa yename Akolali kei pimotoa tokome nekeneya. Akolaliyo eni taatekoa toatekaleke eya wa wia mekaneya piko.

Pa yatene ali atoa dekoane mekene Akolali kei piato wane ne kei plane neke ibini wedekoane lo agale oane tou.

¹⁰Eya agale tiginika wia mekaneya piko. *Kiwi pa yatene ali atoa Akolaliyo takoa motane Yu yene-pala wedikete wediamene wane uku.*

¹¹Eya waka wia mekaneya piko. *Kiwi pa yatene ali atoa peya Ali Muno kei piai tamene. Ta piko peya pitiki yene kiwi peya nitamene.*

¹²Aisaiayoka eya wa wia mekapianeya. *Yesi-loeke tawateka ago pade taatekoa noo. E ku pa yatene talo toa-kala kawademe noo. Pa yatene-kitame one tokale nepia mekete wedia meoi wa papete wia mekaneya.*

¹³Einagome tokale nepia mekete wedia memotoa toko ago Akolali-pala eya wane kini kowitikaku. Anu oya-mikiti neeke wene tugoa meketepa tepe mataketikoa wedia memotono ta wane kowitikaku. Nipa one Epetane Yominine tele patu kautakoa kakete kolotone mea

nepia memotoane tekene kowitikoane uku-ye.

Poloyo Yesunole Takakome Tanemo

¹⁴Anu oya-lawe kiwi wene epetaneya-kama mea ni Yesunomo yakoa mootapea ni kini kini ete oto wa wene toa olaukoa tikino wene tekene uku. ¹⁵Widikoa meketeka padele toatikile wene kayapea toamokaya tokolo pademo telekomo wa wiane wetekaku-ye. Akolaliyo no pewe witikome moa kakaka tokolo tekene ni uku. ¹⁶No moa kakakilepa e ku pa yatene pitikika Yesu Keraisuonele takama pomotoa toka. Nitikale tekene Akolaliyo ali atoa wene epetekakome tokomo eni oane auane yakilepa oneme eya tomotoane uku. Pa yatene ali atoame onekemo yakoa motokoli Epetane Yominiyo wene moa kiyoyo akakome i yenepa neke wa metekale momotoane uku. Nipa anu padeya-kiti oneke meane lodo yotane tetepo takoa wene keaney mekome momotoane uku. ¹⁷Nilepa Keraisu Yesu-pala lipuane mekene uku wane pinali anu wa kei piamele tokolo uku. ¹⁸Nitamele tokoyake eya takama pokoumo odene kiwi wene takakene uku-ye. Pa yatene ali atoame Akolaline agale yakoa tomotoane tikilepa Keraisu Yesu patu-kama kautakoane kakene onekemo oane onekele takama yawane tekene tokou. ¹⁹Nipa padele padele telekole ali atoane wene kainya pikanele toma yakilepa Epetane Yominine tele patu kautakoane kakene tokou. Keraisuonele-kama eni oane auane yakenepa Yerusaleme take laigoane Ilirikume take tugakou. ²⁰Nipa ete ali-kitame onekemo wete oa aua pokoika poamou wane ali atoa yakameneya mekoika-kama oane auane yakou. ²¹Enipa Akolaline bokuke eya wa wia mekane toane taatekoane tokou.

*I uku agonomo oa aua poamene
take pitikoi-kitame einago enoi.
Ni einagonomo yakameneya
mekoi-kitame onekemo yakoa moi.*

Polo Lome Take Ugu Poateka Wene Pianemo

²²Ete yatene eka e paka paka pitikoi toane Yesunomo oane auane yakouya tekene Lome take wida wete noamokou. ²³Opa i ta-kitike Yesunole takoane peya takaneya meane ni mali peya mati ponokale-kama wida ugu none menadiyano wene pianeya meane tekene eya wane uku. ²⁴Sipeine take poadene kini Lome take dekoane menadene uku. Nipa anu oya-lawe kime anu wene epetekoa auapemotoane wida me me tootokoane Sipeine take poadene uku. ²⁵Nitadeneke namolo takoane Yerusaleme take Akolaline ali atoa ponopeneya meki-kiti kue eya tatikadene puku. ²⁶Anu eni tatikatekuyapa Masedonia Geriki tatake Yesunomo yakoa motane yename no takoa mekala tokoi. Nipa Yerusaleme take Akolaline ali atoa padeka-kiti ponopeneya mekete tikino, iya aua pake tatikapoano pa wa mekala tokoi. ²⁷Enipa kini weneme tokoi. Nipa papete Yu yename kamoya meou toa kini wene epetekanemo Yesunomo oa aua mepokoinake ke wa kini tigini kamotoa tekete kinikiya kue eya etepea meamedekoli ni tokoi. ²⁸Masedonia Geriki tata pitikoi yename kini eni metekoiya peya Yerusaleme take auane pone tatikamotekene Sipeine take poadene kini Lome take wida dekoane pinou. ²⁹Nipa wida nikilepa Keraisu yo no pewe wia tagatapeneya nouno wene tekene uku.

³⁰Anu oya-lawe eya tamene wane uku-ye. Papete no-pala padele takayano, no auapea wedoa kowitikamene-ye. Tone Ali Munu Yesu Keraisu patu kau-

takoa kakete nitamene. Epetane Yominiyo wene takako toa tone tone ete oto wa wene mekanali yoa mekono, anu wedoa kowitikamene-ye. ³¹Nipa Yudea take Yesunomo yakoa moamene yenane yonoke no toa momotoa tekete anu kowitikamene. Akolali-pala eya waka kowitikamene. Yerusaleme take pekene kue eya tatikoane metekolu one yename ke wa momotono ta wa kowitikamene. ³²Nitikolipa wida Lome take kolotone none menou. Nipa Akolaliyo nitimotou wa wene piadekalepa wida ko mekene tepe kolotini kilikoa pimotoane meou. ³³Tone tepe kolotini kilikoa pikako ago Akolaliyo anu oya-lawe kiwi peya yopia-kala kamotoane uku-ye. Ee nimini.

Poloyo Agale Lionate Akenemo

16 Tone oya atoa Pibi wida noademe toko. Einatoapa Yesuno ali atoa Senekeria take mekika auapeko atoa. ²Einatoa Ali Munu-pala lipua mekono, nokalepa Yesunomo yakoa motane yene makutukoa motekete tiki toa makutukoa moamene. One padeya-kiti toamokalepa kinikiya pade tatia meamene. Einatoame ali atoa kainya mati auapekilepa noka auapea tokano, nitamene.

³Perisila Akuwilata Yesu Keraisunole no-pala kibusu takakoi ali atoata-pala wete meamene wa akamene-ye. ⁴Wini ali atoatame no toa motikilepa nooke toa kita oyake tuoo wa tokoi. Wini adoname auapekala tokoinake Yesuno pa yatene ali atoame ta piko peyake oboa mekika kita-pala ke wa amediki. Noanume odene mena. ⁵Wini adonane yapu Yesunole takoa oboai tiki yene-palaka wete meamene wa akamene-ye.

Anu kolotini ago Epinitasi one-palaka wete meamene wa akamene-ye. Esia takepa ete yene Yesuke naniko wene tugamotoa one namolo takoa wene tugaka. ⁶Kinikile wida wedoa

takama yakana atoa Maria one-palaka wete meamene wa akamene-ye. ⁷No Yu yatene agota Aderonikasi Yuniasita no-pala odeneka po yapu pitikoinakagota einagota-palaka wete meamene wa akamene-ye. Einagotapa ibini akene Aposelo agota. No Keraisuke wete wene tugameneyake einagota oneke wene tugoa meaneya. ⁸Eya ago Abelietasi one-palaka wete meamene wa akamene-ye. Ali Munago-pala lipua mekolo wene mekoane meku agoke uku. ⁹Eya ago Ebanasi toto-pala kikutua Keraisunole takama yakanakago one-palaka wete meamene wa akamene-ye. Anu kolotini ago Sitekisi one-palaka wete meamene wa akamene-ye. ¹⁰Apelisi einagopa Yesu Keraisuke wedoa wene tugoa mekago wane uku. One-palaka wete meamene wa akamene-ye. Eya ago Arisobulasi one yapu pitiki yene-palaka wete meamene wa akamene-ye. ¹¹No Yu yatene ago Erodiono one-palaka wete meamene wa akamene-ye. Eya ago Nasisasi one yapu pitiki yene Ali Muno-pala lipua meki-kiti eni yene-palaka wete meamene wa akamene-ye. ¹²Ali Munagonole wedoa takama yaki atoata Teraipina Teraiposata kita-palaka wete meamene wa akamene. Ali Munagonole wedoa takama yako atoa anu kolotini atoa Pesis one-palaka wete meamene wa akamene-ye. ¹³Ali Munagonole wedoa takama yakoleke ibini akene ago Rupasi nina-palaka wete meamene wa akamene-ye. One niname nopa one mana tetepo takoa meko. ¹⁴Eya ali-mene Asinekitasi ni Peligono ni Emisi ni Patobasi ni Emasi eni ali-mene-palaka wete meamene wa akamene. Ni eni ali-mene-pala odeneka obokala tiki oya-mikiti-palaka wete meamene wa akamene-ye. ¹⁵Ni eya agota Pilologasi Yuliata ni eya ali atoata

Neriasi laina ni Olibasi ni Akolaline ali atoa eni yene-pala odeneka obokala tiki-kiti kiwi peya-palaka wete meamene wa akamene-ye. ¹⁶Yesunole takoa oboa mekete-kama ke wa yono ete oto wa mokala tamene. Yesuno ali atoamepa e ku take oboai tikika mekete ekete kiwi peya wete meamene wa agale oa wetekakamene wa no-pala iki-ye.

Poloyo Wipitikome Akenemo

¹⁷Anu oya-lawe kipala eya wane uku-ye. Pade ali-kitamepa kime ete oto wa neno oa pili pili toa mekete Yesunole takoa wamotoa toi. Nipa kiwi wida mane mane oa olaukane toa tetekoa toino, dikane ali-kiti titi takama yamene. ¹⁸Dikane yename tone Ali Munu Keraisunole takameneya kinikile-kama tiki. Nitoa wene meamene ali atoa enekete taba po pitikoa oa yotokakala tikino, lene kia wedoa meamene-ye.

¹⁹Anu oya-lawe kini Yesuno agale litia tekete tikimo ta piko peyake oa pupitikaneyano, ke wane wediane meku. Ke wane ikilepa one agale litia tekete ele kule epetanele toatikile wene toa tomotoane uku. Ele kule poanele tamene agopa momotoane uku. ²⁰Tone tepe kolotini kilikoa pikako ago Akolaliyo toto auapekilepa tone kawame Setanu kautoa witaipemotoa pene tokono, nepiamene. Tone Ali Munu Yesuyo kiwi pewe wia yopia kamotoane kini kowitikaku-ye. ²¹Yesunole takama yakilepa no-pala kikutua tokago Timosi einagomepa kiwi peya wete meamene wa oko-ye. No Yu yatene ali-mene Lusiasi Yesoneta Sosipata toa einalimenameka kiwi peya wete meamene wa iki. ²²Poloyo oko toane anu yoname wiane mekoane meku ago no Tetiasiyu wete meamene wane uku. Nipa Ali Munu-pala lipuane mekene uku-ye. ²³Gaiasi einagomeka wete meamene wa

oko-ye. One yapu ne noo wa no maku-tukoa moa mekakagoke uku. One yapukepa Yesuno ali atoa oboai tiki. I take gapomane kuse kuse ago Erasetasi ni tone oyago Kuwotasi einagotameka kiwi peya wete meamene wa iki-ye.

²⁴ (Tone Ali Muno Yesu Keraisyuo kiwi peya pewe wia yopimotoane uku-ye. Ee nimini.)

Poloyo Akolali Kei Pikome Akenemo

²⁵ Akolali kei piatoane uku. Oneme eya tokoke ni uku. Yesu Keraisunomo ali atoane wene epetekakene ukumo olaukaku toa wedoa litia tomotoa kiwi tele takoa auapekala toko. One

eni auapeatekamopa papete one kaukoa mema nekeneyake ²⁶ one agale toaweaa akane ali-kitame i i wa wia mekama-kala nekeneya. Nititikaneyake tuameneya meemoa poko ago Akolaliyopa e ku yatene peyame yakoa moa litia tomotono, onekemo oa pupitikakama pamene wa oa tukaneya.

²⁷ Akolali wa oatekagopa one odene meko. Pademo pademota padele padeleta peya oneme odene wene tokono, one kei pia-kala katoane uku. Nipa Yesu Keraisu patu kautakoa kakete enabuna nitatoane uku-ye. Ee nimini.

1 KORINE

Poloyo Korine Yeneke

Namolo Takoa Wia Wetekane Pipia

1 Polo nopa Akolaliyo no i ago Keraisu Yesuno Aposelo ago moane kakou wa one wene litikome kayo oa motoka agome uku. Nipa tone oyago Soseni-pala opiane mekene i pipia wia wetekato wane wiane wetekakilepa ²Akolaline yene wini Korine take meki-kitike wetekaku-ye. Keraisu Yesuno taneleke Akolaliyo kipa one wa takoa moa one-pala lipukaneya. Nitoa onekele takama pamene wa kayo oa motikilepa eya yene ta piko peya mekete tone Ali Muno Yesu Keraisu ibini wedekoa one kowitoai tiki yene kikilikoa kayo oa motaneya. Keraisu onepa kini Ali Muno mea tone Ali Muno mea toko. ³Toneketai Akolali-pala Ali Muno Keraisu Yesutame pewe wia tepe kolotini kilikoa pikamotoane kini kowitikakene uku-ye.

Poloyo Akolali-pala Ke Wa Akenemo

⁴Akolali kowitikene-kama ke wane okala tuku. Nipa anu oya-lawe kiwi Keraisu Yesu-pala moa lipukakome pewe wia kakolo tekene ni uku. ⁵Keraisu-pala eni moa lipukakome kamo takou toa one peku lawetaneya. Nitikale noa tekete ete onekemo toawe akatapea one niminimo pine toa wene taneya mea tiki. ⁶Keraisu-nomopa totome okoona toa kime yakoa mootokoa wedoa litia toma nikili tekene ni uku. ⁷Nittoa meapa tone Ali Muno Keraisu Yesu wakapea nomotoa nepia mekete tiki. Nipa one peku nateya waneka katekameneya noa tagatapekete kolotine mea nepia

mekete tiki. ⁸Widikoa nepia mea togamotoa tokome one tele patu poapeneya kautakoa kamene wa kiwi yopia-kala kawoo. Nipa tone Ali Muno Yesu Keraisu ali atoa takoa enoa akaka-pete Akolaliyo kipa poanele toamene yene tetepo takamotoa tokome nitoo. ⁹Akolaliyopa one mana tone Ali Muno Yesu Keraisu-pala odene wene pia lipua memotoa tokome kiwi kayo oa motaneya. Nitane agome tou wa oa togotoka toa-kama taatekoa too.

Yesuno Agale Yakoa Motane Yename

Oa Takoa Kakete Pili Pili Tanemo

¹⁰Anu oya-lawe, Yesuno ibini wedekoane eya tamene wane kiwi kowitikene uku-ye. Odene wene-kama pianeya meamene. Ete oto wa pili pili tomotoane wamuku. Nipa ete oto wa wene odene kotuta kakatakutukoa meamene. ¹¹Anu oya-lawe kiwi oa takoa pili pili toa meki wa eya atoa Kelowi-lawene yapu pitiki-kitame akedikili yatekene ni uku-ye. ¹²Eya wane ekene uku. Kiwi padeka-kitame no Polo einagoke lukoane meku wa oa wa padeka-kitame Apolosike lukoane meku wa oa wa padeka-kitame Pitake lukoane meku wa oa wa padeka-kitame Keraisuke lukoane meku wa ete oto wa pili pili toa mekete tiki. ¹³Beita, Keraisupa ali atoane nateya nateya wa edoa moke takamotoa-pe. No Polopa kini poaneleke yomo lekaneyake wia dekaneya tokolo ni iki-pe. Panagome kiwi ue motokakilepa Polo anu ibini wedekoa ue motokaka tokolo ni iki-pe.

¹⁴⁻¹⁵Anu oya-lawe kiwi kainya ue motokamokouna tekene Akolali-pala ke wane uku. Panagome-kiti no Polo pinali one ibini wedekoa ali atoa ue motokaka wa akaya tokolo ni uku. Wida none mekenepa eya agota Kerisepasi Gaya-sita odene ue motokakou. ¹⁶O'o, eya ago

Sitepanasi one yapu pitiki-kitika ue motokoane tokou. Ali atoa pade-meneka wida ue motokakou patuno, wene agopa tokoyake uku. ¹⁷ Keraisyuo no takoa motokomewa ali atoa ue motokama poano pa wa wetekamokome onekemo oa aua poano pa wa wetekaneya. Nipa ali atoame one yomo lekaneyake tu-anemo wene kayapeaneyake mekete no Polo-kama wene taneya mekaya tokale eya wa oa toka. Agale muno pewe kakoa wameneya Epetane Yominiyo wene taka taka toko toa oa aua poano pa wa no moa wetekaka.

Keraisu Akolaline Tele Patu Kautakoa

Kakome One Peku Nootapea Agale Oko

¹⁸ Keraisu one yomo lekaneyake tu-anemopa tua atua poadete piki ali atoame pamo tetepo takoa waki. Nitikiyake Keraisyuo toa moma poko-kiti totome eya wa wene toko. Einakamopa Akolaliyo padele telekole tokome ali atoa toa motanemo eni wa wene toko. ¹⁹ Enilekepa Akolaline bokuke eya wa wia mekaneya piko.

Wene muno meane yene kini mane mane olaukakoi toane moane bebo akakala tou. Agale logoni okoi-kitika kini agale muno pewe kakoa okoi toane pamo tetepo takoane wakala tou wa Akolaliyo akeneya.

²⁰ Nitaneyano, kiwi pakekepa wene muno meane yene ni pademo pademota wene toa iki yene ni agale muno pewe kakoa ete taka oto taka toa wene toa pitia yateki yene enika eni yene edoa kei piato-pe. Itonoke kini kaua-mikitame lawetane pekupa Akolaliyo paya peku tetepo takoa wakeneyano, kei piamato.

²¹ Akolaliyo one papete wene toopikana toa taatekoa tikilepa ali atoame kini kaua-mikitane peku

nootokoapa one wene toameneya memotoa taneya. Nipa Keraisyunomo mo wia kakoimo yakoa oneke wene tugakoi-kiti toane moada wa wene pikome taneya. Ete-kitame enimopa pamo tetepo takaneyake nitaneyano. ²² Nitaneyake Yu yenamepa Akolaliyo padele tubele tokale eneketepa nipa nimini akedikiki wa oo wa yakamokala tiki. Geriki yenamepa eya kuya peku noane tagadiyano wene pikete Keraisyunomo yakoaake pamo tetepo takoa waki. ²³ Nitikiyake anu oya-lawe totomepa Keraisu yomo lekaneyake tu-anemo-kama mo wima yako. Nitikolo yatekete Yu yenamepa winimopa ya tanemo ekete tiki wa yakoa moamiki. E ku pa yatene ali atoamepa winimopa pamo ekete tiki wa paya nou toa meki. ²⁴ Nitikilika Akolaliyo one wa takoa motane yene Yu ali atoameka e ku pa yatene ali atoameka eya wa oa tiki. Keraisu einakago Akolaline tele patu kautakoa kakome one peku nootapea etene agale logoni okago tadeko wa onekemo yakoa motiki. ²⁵ Akolaliyo mana tumotoa moa wetekanelepa wene muno meane yename pale tane tetepo takakiyake kime kotukoa toamatekoile Akolaliyo akole eni taneya. Akolaliyo eni tanelepa telekole-kama tiki yename taba tanele tetepo takakiyake kime kotukoa toamatekoile Akolaliyo akole eni taneya.

²⁶ Anu oya-lawe kipala imo ukuno yakamene. Akolaliyopa kime Keraisu litia tomotoa kayo oa motikilepa kipa edane ali atoa takoa motokato-pe. Wene meane-kiti telekole toma yakoi-kiti ibini akene ali atoa enika eni ali atoa kainya mati takoa motokato-pe. E'e mena. Dikane ali atoa one wa takoa motikilepa pa natetekoa takoa motoka. ²⁷ Nipa ete-kitame leau akene tetepo takoa wakene yene Akolaliyo one wa takoa motaneyano. Enipa wene muno meane yene ya

takademe ni taneya. Ete ali atoame tabaya tetepo takoa wakene yene Akolaliyo one wa takoa motaneya. Enipa telekole toma yakoi yene ya takademe ni taneya. ²⁸Ponopene yeneka paya tetepo takoa wakene yeneka padeya padeya itonoke wete witameneya-kitika Akolaliyo one wa takoa motaneya. Itoloke ali atoame padeya padeya tobou latikakiya peya agopa takoa wawademe tokome nitaneya. ²⁹One leneke odene agoka pinali one wa kei piamomotoa tokome taneya. ³⁰Nitane agome kiwi pa ali ato mana Keraisu Yesu-pala moa lipukaneya tokale etenane peku i i wa lawetaneya. Nitikomepa i yene totopa poanele toamene yene tetepo takoano ta wa one etene yametane. Ni etenanele kiyo akenele takakete toatekole yamea ni tone toko poaneleme toto moa labakanetake toa motaneya. ³¹Nitaneyano, Akolaline bokuke wia mekane toa tatoane uku. Eya wa wia mekaneya piko. *Kini wa kei piameneya Ali Muno-kama kei pia kamene.*

Keraisu Yesu Yomo Lekaneyake Tuanemo

2 Kiwi mekoika wida none mekene Akolalinemo i i wane oane metekounapa wene muno meane ago keneya wamoane agale muno pewe kakoane wamoane tokouna. ²Nipa wida kipala opiane mekenepa Keraisu Yesunomo one yomo lekaneyake tuanemo-kama oane meouno wene plane nekene okouna. ³Onekemo oane meatekou tele meameneya taba tekene tokome pitime kolu kolu nokale pa poti mekene okouna. ⁴Enimopa mo wiane kakene ikilepa agale muno pewe kakoane taba po pitikoane tekene okouna mena. Nitamekene anu ukumopa nimini eni akedeku wa kime wene tomotoane Epetane Yominine tele patu kautakoane kakene okouna. ⁵Nipa kime Keraisunole

takama yakilepa kini kauane peku patu kautakoa kakete tomotoane wamokou. Akolaline tele patu kautakoa kakete tomotoane okouna.

Akolaline Peku

⁶Nimo ukuyake Keraisunole takatiki kotu kakoa tiki-kiti olaukakilepa agale muno pewe kakoane tuku. Nipa itono peku noa tiki yene ni kini tobou meki yene enika eni yename agale muno pewe kakoa olaukakina toane wamuku. Eni yename kinikile tikilepa etepea pata pale toma yaki. ⁷Noanu agale muno kakoane olaukakumopa Akolaliyo itono wete latia piameneyake dikou wa wene toopia kaukoa mema nekenemo uku. Ali atoa one keneya pa teleta tootapeneya meemoa pomotoa tokome one peku lawetou wa wene toopianemoke uku. ⁸Enimopa ipete tobou meki ali-kiti padameka wene toamokoi. Eni wene toi tokapa nipa Ali Muno etene Akolali pa tootapeneya mekome peku lawetane ago yomo lekaneyake wia dekamoi toka. ⁹Eni yename Akolaliyo papete wene toopianemo wene toameneyake one bokuke eya wa wia mekaneya piko. *Akolaliyo oneke wene mekoa meki-kitane padeya padeya nodokoa pikaneya. Nipa kini leneme enamo kaleme yakamo tokoinakeya ni kini namolo wene toamokoinakeya nodokoa pikaneya wa panagome wia mekaneya.*

¹⁰Akolaliyo one eni wene toopikana toapa i i wa totome wene tomotoa tokome one Epetane Yomini totoke moa wetekaka. Ali ato-pala kaukoa meaneya peyapa one eni Yominiyo tetoa enekala toko. Nipa Akolaliyo toto-pala kaukoa meaneya one tepene pianeyaka tetoa enamele toko. ¹¹Panagome-kiti eko agono tepene piko toa lekoa enamele toamokoyake pinaline yominime one tepene piko toa tetoa enamele toko.

Eina toa Akolaline tepene piko toa one Epetane Yominiyo odene tetoa enam-ele toko. ¹²Akolaliyo one eni Epetane Yomini totoke moa wetekakilepa nipa toto pewe witikome laweteko pekupa i i wa wene toa noa tomotoa tokome toka. Eni pekupa tone kaua-mikitame lawetane peku mena.

¹³Nitaneya tokome totome mane mane ikilepa tone kaua-mikitame peku lawetekoina toa wamoko. Epetane Yominiyo i i wa wene taka taka toko toa oko. Nipa Epetane Yomini awitaneya meki-kiti totome takoa mane mane oko. ¹⁴Nitikoyake Epetane Yomini awiameneya meko agomepa one wene takako toa yakoa moamademe wako. One wene takakomopa pamo tetepo takakome ni toko. Nipa one wene takako toa pine toa tetoa enemotoa toko Epetane Yomini einagoke nome awinamokolo tokome oyake yakoa moamele toamoko. ¹⁵Epetane Yomini awitaneya meko agomepa padele padele tanele peya takoa enamele toko. Nitikoyake Epetane Yomini awitaneya meko agono tepene piko toa padameka i i wa takoa enoa akamele toamoko. ¹⁶Enikepa Akolaline bokuke eya wa wia mekaneya piko.

*Ali Muno ago ete wa olaukademepa teyo
Ali Munono tepene piko toa tetoa
enemotoa-pe.*

Nimo wa wia mekaneya pikoyake anu oya-lawe totomepa Keraisuno wene pikole wene taneya meko.

Akolalinele Takakete Toatekomo

3 Anu oya-lawe kiwi mekoika none agale oane metekilepa kipa Epetane Yomini awitaneya meane yene tetepo takoane amele toamokale tekene itono peku nakene yene tetepo takoane okouna. Keraisuno nana mati tetepo takoane okouna. ²Nipa wetini ali atoame nakiya nee namele toameneya

meane nana mati tetepo takoane adu-kama lawetou toane okouna. Opika eniya nee namele toameneya pa nana mati keneya mekete tikili uku. ³Itono peku noai tekete tikili ni uku. Anu oya-lawe kiwi ete oto wa wene poaneya mea pilitakutukoa mekete tiki. Widikoapa pa itonole toma yakete tiki. Enipa nimini ukutu-pe. ⁴Nipa panagome no Poloke lukoane meku wa oa wa panagome Apolosike lukoane meku wa ikilepa pa itono peku noai tiki-kitame tiki toa ekete tiki.

⁵Apolosi totapa edane agota-pe. Totapa Akolaline pupu takakagota pa agota. Akolaliyo one pupu tutu tutu wa tatikamu tokome Apolosi tota meteka toa takaketepa Keraisunomo wina oa metekolo tone oya-lawe kime yakoa motokoina. ⁶Noanumepa nee lene matakakouna. Wa naniko Apolosi nome ue nomoa pekoai toa itono ko akakakana. Totame nitipia pokolo ipe kakoya atepea witakakilepa Akolaliyo-kama toko. ⁷No nee lene matakakou ago-pala ue nomoa pekoai toa itono ko akakaka agota tota kei edekale piei-pe. Tota kei piameneya ipe kakoya witakako ago Akolali odene kei piamene. ⁸Akolaliyopa nee lene matakakoule-pala e agome itono ko akakaleta odeneleta tane tetepo takoa meko. Nipa onekele tutu tutu wa takakoo kotu kakoa pupu poi mokala toademe toko. ⁹Apolosi totame one eni pupu takakilepa Akolali-pala kibutua toko. Anu oya-lawe kipa Akolaliyo one ipe wa tetepo takoa one yapu waka tetepo takoa toko. ¹⁰Akolaliyo no pewe witikome peku laweteka toane noane tikilepa kodou ago tekene ete yename yapu wiatekoi adeka plane kue petene wina moane tatikalogakouna. Nitikalogakounata panagome eni kue petene patu kelekoa yapu ate toa wima poko. Eni yapu wikilepa wedeteko

tamene wane kiwi peya-pala uku. ¹¹ Kue petene wina moane tatikalogakouna wane ukupa Keraisu Yesu adeka plane uku. Yapu wiketepa eni kue wawa pade kue moa tatikamele tokoya mena. ¹² Eni patu kelekua yapu ate toa wikilepa pade-kitame yapuya epetaneya golo silepa enika eni kamo kue takoa moa tiki. Nitikiyake pade-kitame kini yapuyapa paya yomoka peti youka tua dekoa kakene kala youka takoa moa wiki. ¹³ Wipitia ta pataka-petepa toe noko kawateka ta patoa pitoo. Nitikalepa kini wikoina yapu toeme nakome tokale peya kakete enoi. ¹⁴ Nitikolipa epetekoia wikoina yapu peya toeme noamokale enekome Akolaliyo pine yene kei pia pewe wikala too. ¹⁵ Wia potokakoina yapu toeme napetapekale pine yene kini enekete anu pupupa igi wiane yotekene tadeku wa kini yapu nomotoa katepitoo poi. Nipa toe itipono okata mea katepitoo pou toa poi.

¹⁶ Kipa Akolaline yapu tokome one Yomini wini kiwike nome mekono, enipa wene toamiki-pe. ¹⁷ Panagome-kiti Akolaline wikakane yapu keawe tadekakalepa Akolaliyo oneka wia atukoo. Eni yapupa one wikakane yapu tokome nitoo. One yapu wane ukupa anu oya-lawe kiwike uku.

¹⁸ Kini wa oa yotokakaya tokolo eya wane uku. Kiwi panagomede one kauane peku nootapekouya tekene wene muno meane ago i meku wa wene pikolopa nipa einago-pala eya wane uku. Leau akene ago tetepo takoa meamene. Nipa wene muno meane ago meadepa nitamene wane uku. ¹⁹ Akolaliyo kini kaua-mikitane pekupa paya tetepo takakolo tekene ni uku. Enilekopa one bokuke eya wa wia mekaneya piko. *Akolaliyopa wene muno meane ali-kiti kini yukakoina wakoke kini wa labamotoa toko.* ²⁰ Eya

waka wia mekaneya piko. *Wene muno meane yene kini wene pikilepa pata pale toatiki wene piki* wa Ali Munoyo wene taneya meko. ²¹ Nitikono, i agoke lukoane meku wa one taneleke mate agale edoa oadete-pe. Eya kuya peyapa Akolaliyo kini wa yametaneyano, mate agale wameamene. ²² Apolosi Pita toto-menepa Akolaliyo moa kakakilepa kiwi peyane takoa taneya. Itonoka kini wa latia pikaneya. Nitane agome padele padele witakakilepa kinikile-kama takoa toko. Nipa kipa pa memotou wa oa tumotou wa oa tikilepa kiwi auapeou wa wene pia toko. Opika nanikoka ele kule witakakilepa kiwi auapeademe toko. ²³ Ni kipa Keraisuke-kama lukoa meki. Keraisu onepa Akolalike-kama lukoa meko.

Keraisuno Aposelo Ali-kitike Akenemo

4 Totopa Keraisuno pupu takama yako ali-mene. Akolaliyo one papete kaukoa meanemo kime toawe akamene wa toto moa kakaka. Totopa dikane ali-kiti wa wene taneya meamene. ² Tobou agono pupu yopia meko agomepa tobou agonole wedoa takamedeko. ³ Anu oya-lawe kimeka koiso yatekaki-kitameka anu tobou agonole takakene tukule takoa enoa akamene piti moamekene atiki toane meku. Anu tokounakalepa pinali anu wa takoane enoane ipa epetanele ipa poanele tadeku wane amele toamoko. ⁴ Anu tepeme ne poane ago tadeko wado no kioa akamokolopa poanele padeleka toamokou wane amele toamoko. Anu toma yakule takoa enoa akakilepa Ali Munago oneme odene tamele toko. ⁵ Nipa papetepa ipa poanele tadeko ipa epetanele tadeko wa takoa enoa akameamene. Ali Muno wakapea nokome okale yakato wa nepia meamene. One wakapea

nokomepa yomiyomu keneke taneleka ali atoane tepene plane weneka keleyo witaakala too. Nipetepa ali atoa peya kini epetanele tokoike Akolaliyo odene odene wa kei pikala too.

⁶Anu oya-lawe kipala i ukupa kiwi auapeou wane Apolosi tota-pala tanele adeka plane uku. Nipa kini totono wia mekane toa litia tamene wa ikina toane pine toweane eya wane uku. Tikisa ali pade kei pia wa pade tikisa ali kei piameneya paya tetepo takoa teketepa poanele tekete tikino, toameamene.

⁷Kiwi tobou ali-kiti latikete tiki-pe. Kinikiya peyapa Akolaliyo-kama takoa metaneya. Nitaneya-kiti kini teleme motane tetepo takoapa edeyake mate agale oadete-pe.

(Anu oya-lawe kipala i ukumomepa kiwi ya takadene wamuku. Anu mati-kiti latikoane mama motekene mane oane moadene uku.)

⁸Eya kuya moada wa wene pikoina toa kime wete mootapekoinano, kipa kamo yene mekete tiki. Apolosi tota pa kamotoa kiwi ta talo tiki ali-kiti latia ete yene yopia meki patu. Ae, kime ali atoa yopia memotoane uku. Nipa toto Aposelo ali-kiti kipala kibunua ali atoa yopiatu wane wene pikounake ⁹ali atoa edelo ali-kitika kakakoa Akolaliyo toto Aposelo ali-kiti-pala eya toko. Tobou agome-kiti one-pala poi teiane yene one take wiane tukapou wa po kakoa ketea kakoa lia aua pou toa Akolaliyo toto Aposelo ali peya paya tetepo takoa meko. ¹⁰Toto Aposelo ali-kitame Keraiunole takakilepa leau akene tetepo taneya mea tokoyake anu oya-lawe kime Keraiunole takakilepa wene muno meaneya mea tekete tiki. Totopa taba taneya mekoyake kimepa telekole toma yakete tiki. Ete-kitamepa kiwi kei pikiyake toto paya tetepo takoa waki. ¹¹Opika tone nee ue wananeya mea tone epetaneya kawa-

teko mamina toameneya pa meko. Ete-kitame toto layo toua wikala tiki. Tone plateko yapuka toameneya pa pima yako. ¹²Tone nee eya moadetepa tone yoname pupu tokoa kako. Panagome-kiti toto-pala poanemo okolopa agale epetaneya topo toa oko. Pade ali-kitame tete metekili agale wametekoa poti meko. ¹³Panagome-kiti toto pa puputua akakolopa oya kakoa enekala toko. Opika ete ali atoame toto Aposelo ali-kiti pa kege nee yabunu eya tetepo takoa wakala tiki.

¹⁴Anu oya-lawe ina ukumomepa kiwi ya takadene wamuku. Anu kolotini matikiti tetepo takokane mane oane motekene uku. ¹⁵Nipa Keraisu Yesunomo olaukakene anu mati-kiti latikakouna tekene uku. Kini Keraiunole takama yamotoa yopikoi ali-kitido ege egeta wakala kadukoa (10,000) meadokolika kiniketaipa no odene i mekene uku.

¹⁶Nitikuno, noanume toma yaku toa kime toma yamene wane kiwi we-doane kowitoane uku-ye. ¹⁷Kime nitimotoane tekene Timosi wini moane wetekaku. Einagopa Ali Muno agonole wedoa takama yako ago anu mana latikoane wene mekoane meku. Einago Timosi wini nokomepa Keraisu Yesu patu kautakoane kakene tukumo kiwi wene takakome oo. Nipa losu yapu kako peyake olaukakule litiane tukumo wene takakome oo.

¹⁸Anu oya-lawe kiwi padeka-kitame no wete noamou wa paya nou toa mekete ikipa enipa kime ali-kiti latikete iki-pe. ¹⁹Ali Munagome ka yametekalepa wini wete nouno, nepio. Nekenepa eni yene kini iki agalepa pa agaleme iki patu. Akolaline tele patu kawa kelekoa mekete iki patu wane enenou. ²⁰Akolaliyo talo toa mekilepa pa agaleme tokoya mena. Telekole-pala toa toko. ²¹Kiwi meki take nekenepa layo tigini taatekaneya nomotoa iki

patu. Kiwike wene mekoane meane poitali nomotoa iki patu.

Korine Take Poanele Tane Agoke Akenemo

5 Anu oya-lawe widapa panagome mone panagono atoa koua meko wa akedikili yateku. Eni poanelepa Akolaline agale yakamene yenameka toamatikile toko. Ali padame one etenane natonopa one natono moa latikako wa akedikili yatekene ni uku. ²Enile pa toa memotoake kini wa kei pia mekete tiki. Tumai yapu meou toa mekete eni toko poaneleke komo oa meamedikiyake tiki. Eni poanele toko agopa kini losuke wa noamoano, pa wa wetekamene wane uku. ³Noanupa ta padeka mati i mekeneka kiwike wene kakakoane meku. Nipa wida kipala opiane meane tetepo taneya mekenepa winagome poanele mati tokake nami wiane kibu moateku wene kibutupikene ukuno, yakamene. ⁴Wida Ali Muno Yesuno ibini wedekoa oboa mekoi-petepa no-kitika kipala opiane meane tetepo taneya meouno, Ali Muno Yesuno tele patu kautakoa mekete eya tatoane uku. ⁵Eni poanele toko agopa Setanuyo one tigini wia tukou toa ke enekakoa kamotono, watoane uku. Wipitia ta pataka-pete Ali Muno Yesu wakapea nokome einagono yomini toa momotoane tekene ni uku.

⁶Kini wa kei pikilepa poanele wini tekete tiki. Palawe wane mono mono omotoa yisi kugu deyaka pitikakilipa mea tagatapekome mono mono oologako. Enipa nimini ukutu-pe. Winagone poanele kiwi peyake weamutukakaya tokolo ni uku. ⁷Kipa weneya palawe yisi kugu pitikameneya yotane palawe tetepo taneya meamene. Namolo yisi kugu mitikatapea wawou toa tekete kini namolole wawa wenele toma pamene. (Papete Iserele yatene poane Idipi ta

wete tewitikoa poadetepa palawe yisi kugu pitikameneya pa yotaneya. Nitoapa edelo agome kiwi wia tukamomotoa tekete sipi sipi kai tine wia kagoke kamate tadekamu taneya.) Sipi sipi kai tine tou toa Keraisu tone toko poaneleke tuaneya. ⁸Nitaneyano, eina namolo toge kikete tane toa tekete mono mono akene palawe peya yisi kugu-pala dekamoa mitikoa wauo toa tone namolo lene pia poanele tokoonakale wato. Wenele toma patoane uku. Nipa kiyu akene wene-kama pia niminimo-kama oa tatoane uku.

⁹Kiwike pade pipia wiane wini wetekakene eya wane okouna. Pamoko mea enile poanele tiki yene-pala odeneka yawameamene wane okouna. ¹⁰Nipa Yesunomo yakamene yeneke wamokouna. Dikane yenamepa atoa lima yawa ni eya kuya moadiya wa tepime tuaneya mea ni mone panagoneya yotokoa moa ni kini yoname latikoinakeya Akolali tetepo takoa kowitoai tiki. Enika enile tiki ali atoado tima yaketepa itono tewitikoa poi. Dikane yeneke wamokouna. ¹¹Eya yeneke okouna. Yesunole takama yaku wa iki-kitameke atoa lima yawa ni eya kuya moadiya wa tepime tuaneya mea ni kini yoname latikoinakeya Akolali tetepo takoa kowitoa ni eko ali atoa akoo agale oa ni bia ue eya noa pia ni panagoneya yotokoa moa enika enile tiki ali atoake okouna. Nee natono noo wa dikane yene makutukoa motikileka toameamene.

¹²⁻¹³Yesunomo yakamoa kipala wida oboamoa tiki-kitipa kini tanele pitiane yakoane akateku toane mena. Akolaliyo pitia yakoo akoo. Yesunomo yakoo moa kipala oboai tiki ali atoa kini tikile pitia yakoo akakilepa anu oya-lawe kime toi. Nipa kipala obokala toake etenane natonopa one natono moa latikakago *wini poane ago pa wa tikatapea wamene.*

Keraisuno Ali Atoa Ete Oto Wa

Koiso-nali Yotekete Tanemo

6 Kiwi panagome-kiti panago-pala padeya namike koiso oatekale pikalepa Akolaline agale yakamene ago mekata koiso yatekamotoa edoa aua poadete-pe. ²Wipitia ta pataka-pete Akolaline ali atoamepa ete yename toma nekenele pine toa akatikiyano. Ae, papete natele tokoleka kime pine toa akamele toamoko-pe. ³Totome Akolaline edelo yatename toma nekeneleka koiso yakoa akakilepa tubele eni toatekoyano, opi papete natele ali atoame tikile kime koiso akamele toamoko-pe. ⁴Nitamele tokoyake kiwi pakeke padeya namike koiso oatikile witakolopa Akolaline agale yakameneya pa ali-kiti mekika koiso aua poadete tiki-pe. ⁵Kiwi ya takadene eya wane yatekene uku. Kiwi panagotame padeleke agale toonali yotikilipa kini koiso wene toa yatekako ago wida meamoko-mo. ⁶Pine toa akateko ago padeka tetepo toamokolo kini kini koiso akanali yokala tekete tiki. Nipa Akolaline agale yakamene-kiti kakakoa tekete tiki.

⁷Kini kini koiso akanali yotekete tikino, Akolalinele takakilepa pata pale tadiki. Eya toatikiyano. Padame kipala toa potokakalepa ete topo takameneya toa kamotono wamene. Kinikiyado yotokoa motokalepa momotono wamene. ⁸Edikoa epetekoa tamedikiyake kini kini ete oto wa poanele topo takoa kinikiya ete oto wa yotokoa mokala tiki. Yesuno ali atoameke ame wa iki ago-palaka edikakala tekete tiki. ⁹Edikoa poanele toma yaki-kitipa Akolaliyo one talo tuku taapa kinino inoe wa yameamoo. Yameamoono, pine yene kini wa oa yotokoa poanele takayano, eya wa

wene taneya meamene-ye. Eya toma yaki ali atoapa Akolaliyo one talo tuku taapa kinino inoe wa yameamoo. Ali atoa pamoko mea ni kini yoname latikoinakeya Akolali tetepo takoa kowitoo ni mone padane atoa lia moa ni ali yatene kini kini wa atoa latikoa koua pia ¹⁰ni panagoneya kode moa ni eya kuya moadiya wa tepime tuaneya mea ni bia ue eya nokoa kawa ni eko ali atoa pa puputua akoo agale oa ni panagoneya yotokoa moa enika enile toma yaki-kitipa Akolaliyo one talo tuku taapa kinino inoe wa yameamoo. ¹¹Papetepa kiwi padeka-kitame enika eni poanele tokoinake opa Akolaliyo kini eni tokoi poanele peya kootapea ni kipa one wa takoa moa ni poanele toamene yene tetepo takoa wene keaneya mea toko. Nipa kipa Ali Muno Yesu Keraisuno ibini kautakoa mea tone Akolaline Yomini-pala lipua mea tikili tokome ni toko.

Pamoko Mea Eni

Poanele Toameamene

¹²Panagomede ele kule peya tamele tokolo tuku wa nopala okalepa eya wane topo takooane ou. Ele kule peyame tigrini weneta moa epetekakoya mena. Padele padele peya tamele tokoyake padeleme no moa koigakaya tokolo padele-kiti katekoane toamuku. ¹³Padagome-kiti eya waka oo. Akolaliyo imu latikomempa nee ue ponome meatekoya eni latia ni nee ueta latikomempa imuke ponome meatekoyata eni latia taneya wa oo. Einagome nimini okoyake Akolaliyo wipitikome nee ueta imu toa takoa wawoo. Tone tigrini latikilepa pamoko mea eni poanele tomotoo taneya mena. Ali Munagonole takamotoa ni latianeya. Nitoapa tone tigrini yopia memotoa Ali Muno moa kakaneya. ¹⁴Einago Ali Muno tuaneya pikale moa kamotokane

toa one eina telekole tanele tokome to-toka tuaneyake moa kamotokoo.

¹⁵Kipa Akolaliyo Keraisuno yono kawa eya tetepo takoa yopiko. Enipa wene toamiki-pe. Nitikono, Keraisuno yono kawa eya tetepo tane-kiti moa pamoko atoa-pala edoa koua piato-pe. Koua piamato-li. ¹⁶Panagome-kiti pamoko atoa-pala koua pitikolopa kini tiginita odene tigrini tetepo tootapeko. Enilekepa Akolaline bokuke eya wa wia mekaneya piko. *Kinita odene tigrini tetepo tootapeneya meoi* wa wia mekaneya. ¹⁷Panago Ali Munopala lipua mekomepa nipa onepala odene wene pia meoo.

¹⁸Pamoko toa enile poanele tikika titi toa pitoa pamene. Panagomede etele poanele-kiti tokomepa one tigrini toa potokamokoyake pamoko tokomepa pinali one tigrini wa toa potokako. ¹⁹Kini tigrinipa Epetane Yomini nome meateko yapuno, eni poanele toameamedeku wa wene toamiki-pe. Eni Yominipa Akolaliyo moa wetekaneya. Nipa kini tigrinipa kini wa talo tamele toamoko. Kini tigrini talo toko agopa Akolali. ²⁰Kipa one wa oto toa motokomepa one kamoya ete topo toa mou toa manane kamateme oto toa motaneyano, kini tigrinime ele kule tikilepa ete-kitame Akolali kei pimatada wa tamene.

Adona Mekete Toatikimo

7 Namolo anu oya-lawe kime nooke pipia pade wia wetekakilepa alime atoa oyake moamele toko-pe wa pitia yakoa wetekadikino, opi eya wane ukuno, yakamene.

Panagomede one atoa moameneya pa mekomepa nipa epetoo. ²Nimo ukuyake eya waneka uku. Mone koua piamateko alika atoaka koua pia ta-la wa Setanuyo kiwi likoa enekayano, adona-mikiti latiamene. ³Adono-mikiti eya tamene wane uku. Kinita mekina toa koua

pikala tamene wane uku. ⁴Enipa eyake uku. Pade atoa one tigrini pinatoa one wa talo tamele toamokoyake onekaneyo oyake talo tamele toko. Nika panago one tigrini pinali one wa talo tamele toamokoyake one atoame oyake talo tamele toko. ⁵Nipa nekaneka nekatoaka koua piamene kote moameamene. Akolali wedoa kowitoo meatono, opi-mene koua piamato wa enipete-mene koua piamokolipa epetoo. Wa naniko Setanuyo likoa enekale eko ali atoa leneme kode nakaya tokale Akolali kowititiko meapa nipa kinita mekina toa wa koua pikala tamene. ⁶Enipa anume tikamoane pitikakene enile tamene wane wamuku. Pa kiwi mama motekene uku. ⁷Nopa atoa moameneya pa pima yakuno, kiwi peya idikoa memotadiyano wene pikuyake amele toamokolo waku. Enipa Akolaliyo toto latikilepa odenele-kama toa latianeya mena. Panago-kiti atoake wene kamotokoa mea wa panago-kiti atoake wene kamoameneya mea tomotoa latikala taneya.

⁸Tualika tuatoaka nepo atoaka no pa meku toado mekolipa epetoo. ⁹Pa meouno wene piake kini leneme eko alika atoaka kode noa mekolipa nipa ali neme atoa moamene ni atoa ne alike pamene wane uku. Eko alika atoaka leneme kode noa mekayano, nitamene.

¹⁰Opi adono-mikiti kipala eya wane uku. Nipa Ali Munagome akoano ta wa no wene takaka toane ukuno, anu wene wamukuno, yakamene. Ali pekene atoa nekane tewitiko wawameamene wane uku. ¹¹Eni uku toa toameneya nekane tewitiko wakepa nipa eko alike poameamene. Pa mea tuamene. Pa meane tuamou wa wene pikepa nipa nekanake wa wakapea pamene. Atoa motane ago neke natono tewitiko wawameamene.

¹²Opi ete ali atoa-pala eya wane ikilepa Ali Muno agome akoano ta wa okomo wamuku. Anu weneme titiane ukuno yakamene. Yesunomo yakoa motaneya meko ago-pala eya wane uku. Neke natono Yesunomo yakoa moameneya mekomeke i ago nepala kouane meane tuou wa neeke tegetekakoa mekolopa nipa neke eni natono takoa wawameamene. ¹³Ni Yesunomo yakoa motaneya meko atoa-pala eya wane uku. Nekane Yesunomo yakoa moameneya mekomeke i atoa nepala kouane meane tuou wa neeke tegetekakoa mekolopa nipa nekane tewitiko wawameamene. ¹⁴Nipa eya wane ekene uku. Pade atoa nekane Yesunomo yakoa moameneya mekagomeke nepala pa lipua mekolopa nipa Akolaliyo nekane kitapa one wa takoa yopiko. Eina toa panago-kiti neke natono Yesunomo yakoa moamene atoameke nepala pa lipua mekolopa nipa Akolaliyo neke natono kitapa one wa takoa yopiko. Akolaliyo kita yopiamokome too tokapa nipa kini mati-kiti Yesunomo yakamene mati-kiti tetepo takoa wao toka. Nitoo tokake eni mati-kiti one wa takoa yopiko. ¹⁵Adono-mikiti alimeka atoameka Yesunomo yakoa moameneya mekome ne wawane pou wado okalepa kinita letetakutukamele tokono, one pomotamene wane uku. Akolaliyo toto one wa takoa motikilepa adono-mikiti kilikoata memotoa tokome tokolo ni uku. ¹⁶Atoa-kiti nekaneyo ne waouno wene pikaake poamade wakepa nipa Akolaliyo one toa momotoane tuku wa wene pike teke toko patu. Panago-kiti neke natoname ne wawane pouno wene pikaake poamomotoa lauane lauane tekepa nipa Akolaliyo one toa momotoane tuku wa wene pike teke toko patu.

Akolaliyo Kiwi Kayo Oa Motokale

Mekoina Toa Pa Edikoa Meamene

¹⁷Akolaliyo kiwi kayo oa motokale mekoina toapa pa edikoa meamene. Papete Akolaliyo kiwi dikoa memotoa latia kakaneyano, pa edikoa meamene. Enipa Yesuno ali atoa oboai tiki losu yapu kakoka yakene tamene wane oma yakumo kipalaka uku. ¹⁸Panago-kiti nepa papete Yu yatene ago teke kepene teiganeya mekaka Akolaliyo kayo oa motoka patuno, eni adekapa koikoa enameamene. Wa panago-kiti nepa papete pa yatene ago teke neke kepene teigameneya mekaka Akolaliyo kayo oa motoka patuno, kepene teigamotou wa wene piameamene. ¹⁹Akolaline wene kekadepa oneme ta wa okale-kama litia tamene. Kepene teiganeya mekoloka kepene teigameneya mekoloka Akolaliyo i ago nepa one wa talo toa kako. ²⁰Akolaliyo ne kayo oa motokale mekana toapa pa edikoa meamene. ²¹Panago-kiti Akolaliyo ne kayo oa motoka-pete panagono pupu-kama takamotoa kueme topo toa moa egetaneya meka patuno, wene keda taneya meamoa pinagonole pa takoa meamene. Wa naniko one eni pupu tewitiko wawateka ka piadekalepa onekele tewitiko wawa nekele toma pamene. ²²Panago nepa kueme topo toa moa egetaneya mekaka Ali Muno agome kayo oa motikilepa nipa nepa ta pine ago tetepo takakome taneya. Wa panago-kiti nepa ta pine ago mekaka Ali Muno agome ne kayo oa motikilepa nipa nepa Keraiuno pupu-kama takateka ago tetepo takakome taneya. ²³Akolaliyo kipa one wa oto toa motikilepa manane kamateme taneyano, nipa kueme topo toa moa egetane yene tetepo takoa meameamene. ²⁴Anu oya-lawe

Akolaliyo kiwi kayo oa motokale mekoina toapa pa edikoa meamene. Nipa one-pala lipua mea nitamene.

Ali Atoa Peya Mane Mane Akenemo

²⁵Opi ali poamene atoa-kiti atoa moamene ali-kiti eya tamene wane ikilepa Ali Muno agome akamene wa okamo wamuku. Pa anu weneme ukuye. Nipa Ali Muno agome ela moa pewe witiko agome ukuno, yakoa moamediki. ²⁶⁻²⁷Opi-mene ke enekako-peteno, eya tamene. Panago ne-kiti atoa wete motokaneya mekepa nipa neke natono poano pa wa takoa wetekameamene. Wa panago ne-kiti atoa wete motokameneya pa mekepa nipa atoa moameamene. ²⁸Panago neme-kiti atoa mouno wene pia motekepa nipa poanele toameke too. Wa pade atoa ne ali pekepa nika poanele toameke too. Pade ali atoata adona meketepa poanele toamekete tiki. Imo ikilepa adono-mikiti ke enekakolo mekaya tokolo mama motekene uku.

²⁹Anu oya-lawe kipala ina ukumopa eya wane ekene uku. Tone itonoke meateko toa pa natetekoa pikono, opi titimoa eya tamene. Atoa motane ali-kitipa atoa moameneya meane tetepo takoa meamene. ³⁰Ni komo oa meki yenepa wene keda toameneya meane tetepo takoa meamene. Ni ulu yau taneya meki yenepa wediameneya meane tetepo takoa meamene. Ni topo lene kiane yenepa kinikiya toamene tetepo takoa meamene. ³¹Ni kamo toma yaki yenepa kini kamoya-kitike wene piitikaneya meameamene wane uku. Itonoka kini kamoya-kitika pia kawameneya takoa poademe tokolo ni uku. ³²Kini kepene mama moameneya memotadiyano wene pikene uku. Eni wene plane mekene kipala eya wane uku. Atoa moameneya pa mekagome Ali Muno agonole takakilepa Ali Munoke-kama wene piitikaneya mea

toko. Ali Muno ago wedikou wa wene pia mekome ni toko. ³³Atoa motane agome nitamoko. Einagome one natono wedikou wa itonoleke wene piitikaneya meko. ³⁴Nipa wene takuta pianeya mekome kilikoa meamele toamoko. Nitikoyake ali poamene atoamepa Ali Muno agonole-kama takou wa one-pala odene wene pianeya mekome onekele wedoa takama poko. Ali pekene atoame pade nitameneya, onekane wedikou wa itonoleke wene pitikaneya meko.

³⁵Kipala i ukumopa kiwi auapeou wane wene pikene uku. Padele kekanele latikoa toameamene wane ekene wamuku. Nipa Ali Munagonole takatiki kotu kakoa takakete odene wene pianeya mea epetanele toma pamene wane ekene uku.

³⁶Tuali neme-kiti neke tuupiane atoa wetini toma ponokale eneke eke anu tuatoa pa mea kakayano edeku patu wa wene pikepa eya tamene. Neke eni tuatoake wene kamotokoa mekepa nipa neke natono latikoa moamene. Kita adonado meketepa poanele toamekete toi. ³⁷Wa tuali pade neme-kiti wene wedoa kikutukatekoapa neke tuupiane atoa moamou wa oneke-kama wene kamotokameneya mea moamekepa poanele toameke too. ³⁸Wa neke tuupiane atoa motekepa epetanele teke too. Nitameneya moamade wakepa wedoa epetanele teke too.

³⁹Ali pekene atoapa nekane tuameneya pa mekolopa nipa nekane-pala lipua meamene. Wa nekanedo tukolopa tutu pade agoke oyake pamele toko. Nipa Yesunole takako agoke pomotoane uku. Pa agoke mena. ⁴⁰Wa pade atoa nepa nepo atoa meane tuou wa wene pia mekepa nipa kolotine meoo. Eni agalepa anu weneme ukuyake Akolaline Epetane Yominiyo no wene takakomo ukuno wene pikene uku.

Iponoke Padeya Mea Lodo Yotaneleke

Pale Yakanemo

8 Ipono eyake lodo yotane nee melepu eya oyake namele toko wa no agale pale yakadikimoke eya wane uku. Iponameka paya gode-kitameka toto oyake lauane lauane tamele toamoko wa toto peyame wene toko wa akedikiki. Eni wene taneya meketepa wene toamene yene paya tetepo takakayano, dikane ali atoa auapeato wa kiwike wene mekoa meamene. ²Panagome-kiti pademo pademo pine toane wene taneya meku wa wene pia mekomepa nipa wene toateko kotu kakoa wene toamoko. ³Panago-kiti Akolalike wene mekoa mekolopa nipa Akolaliyo einagopa wene taneya meko.

⁴Ipono eyake lodo yoa naki melepukepa eya wane uku. Melepu eya mea lodo yotikilepa nipa paya gode-kitike tiki. Eni gode-kitipa nimini gode mena. Nimini godepa Akolali odene. One yagono ago pade kawamoko wa totome wene toko. ⁵A tibukeka itonokeka kini gode peya mati kakete tiki wa ete-kitame melepu mea lodo yokala tiki. Paya gode-kiti paya ali muno-kitika peya mati mekilika ⁶tone kowitateko agopa Atai Akolali odene. One weneke-kama padeya padeya peya alatapekala taneya. One-pala lipua meato wa onekele takama yako. Ni tone Ali Muno odene ago kako. Einago Yesu Keraisuwo padeya padeya peya latia kakaneya. Einago patu toto kautakoa kako.

⁷Pade ali-kitame paya gode-kitike melepu eya mea lodo yoma-kala nekeneya. Opika kini namolole wene kayapeameneya mekete eya tiki. Dikane melepu nakete ekete paya godeke lodo yotane melepu i nakono, kitau oko wa wene katoganeya mekete naki.

⁸Anu oya-lawe toto eniya melepupa noameketeka naketeka edikoapa Akolaline wene oyake kekamele toamoko. Noamokoloka nakoloka Akolaliyo odenele tane tetepo takoa meko.

⁹Dikane melepu oyake namele tokoyake tone oya-lawe padeka-kitame kitau oko wa namene piti motaneya mekino, kini wene toa potokakaya tokolo kiwi eya wene takakene uku-ye. ¹⁰Yesunomo wene tootapeane ago nekiki lodo yoai tiki yapuke meke eniya melepu nakale enekome dikane melepu namene piti motane agome eya wa oo. Eni melepupa paya godeke mea lodo yotaneyake ne i agome nakono, onemeka noada wa naku pokome too.

¹¹Nipa neke eni oyago Keraisuwo wedoa wene toamene agoke Keraisuwo toa moademe tuaneyake one kitau okoya neme nakaleme one wene moa bebo akakale tokome etepea atua poo.

¹²Neke oyago Keraisuwo wedoa wene toamene ago edikoado toa potokoa wene bebo akakepa nipa Keraisu-pala dekoa toa potokake toko. ¹³Nitikono, anu nakoulekepa anu oya ago pade etepea pekedekalepa nipa melepu eya wa noamekene noamadene wakene waou. One etepea pokaya tokale nitou.

Aposelo Ali-kitike Akenemo

9 Nopa Polo anu wene litikene ele kule tamele tokolo meku. Nopa Aposelo ago. Tone Ali Muno Yesu enekilepa tokou. Kipa Ali Munago-pala lipua memotoane tikilepa kodou agome-keneya one yapu wikakou toane tokouna. Nipa one patu kautakoane kakene tokouna. Enipa nimini ukutu-pe. ²Ete-kitame no paya Aposelo ago tetepo takoa wakiyake kiwi Korine yename nitamekete tiki. Kiwi olaukakouna toa litikete Ali Muno agonole wedoa takakete tiki. Nitikili enekete ete-kitame ekete kiwi olaukane

ago Polopa etene Aposelo ago tadeko wa iki. Nipa kiwi Korine yeneke pikouana adeka enou toa enekete iki. ³Pade-kitame no akoa agale ikilika pinali anu wa kei pikenepe eya wane uku.

⁴Keraisunole takama yakuke onekemo yakoa motokoi yeneke nee ue eya oyake oiane moamou wa iki-pe. Oyake mou-li. ⁵Ete Aposelo ali-kitameka Ali Munagono wamene-mikitameka Pita-lawemeka Yesunomo oa aua yaketepa natono Yesunomo yakoa motane atoa-pala aua yakala tikino, noanumepa natono-pala oyake auane poamuku patu. Auane pamele too-li. ⁶Kimepa ete yene auapekiyake no Polo Banabasita tone nee eya moadetepa tone yoname pupu toa momotono wene piki-pe. ⁷Poyo agome-kiti one noateko nee eya motikilepa pinali one kue wetekoa motoko patu. Nitamoo-li. Panagome-kiti ipe toa gerepi po matoa lati lati tokopa nipa ku tukolopa oneme kotia noamoko patu. Kotia noo-li. Wa meme kai egeteko agome-kiti atoa meme kai adu peia noamoko patu. Adu peia noo-li.

⁸Wini adeka plane ikilepa padele padele itonoleke ukuyake enilekepa odenemo keneya Mosesene totono wia mekane bokuke eya wa wia mekaneya piko. ⁹*Pitimekawe kaime witi ku yaku takoa kawame kautoa yakilepa witi ku-pala noma yamotono, timini po toameamene* wa wia mekaneya. Eni wia mekanepa Akolaliyo pitimekawe kai mama motoko wa okome akeneya patu. ¹⁰Akolaliyo toto mama motoko wa adeka pikome akeneya patu. Ee nimini ni okome akedeko. Panagome-kiti ipe toa itono wetia kugutukama pome wa panagome eni ipele witakoya wakoa moma pome tokopa nipa takutame eni ipe witakoya nee padeya moane nou wa wene pia tokala tiki. ¹¹Wida ipe nee lene matou toa tekete kini yomini tele

takatekomo totome oa metekoonano, kinikiya tone tigni tele takatekoya totome oyake oia moamoko patu. Oyake oia moo-li. ¹²Ete ali-kitame Yesunomo wida oa metikili ke wa oa kinikiya pade ete tatia meamediki. Nitamedikino, toto keda takoa meamene wa totome amele toko.

Nimo wa amele tokoyake kinike padeya deya oia motikileka toamokoo. Nipa totome Keraisunomo oa aua yakilepa padeya-kiti ete memotoa tekete ni tiki wa kime onekemo yakoa moamokaya tokale totome kinike padeyaka oia moamokoona. ¹³Eya wene taneya meamene. Tobou losu yapu keneke Akolalinele takaki ali-kitame one pikane nee eya pade takoa moa naki. Ni Akolalike melepu eya mea lodo yotokoai tikita pupu takaki ali-kitame eniya pade takoa moa naki. ¹⁴Eina toa Ali Munagome tamene wa akene toapa onekemo oa meteki-kitame oa metekilipa nipa take yename ke wa kinikiya pade takoa meamediki. ¹⁵Nitamedikiyake kinike padeyaka oiane moamokouna. Opika i pipia wiane wetekakilepa kinikiya pade memotoane tukuya mena. Kobume tuadekolupa oyake tuou wane uku. Nipa kue eya oiane moamekene Yesunolepa pa takama yaku wane pinali anu wa kei pikoumopa pata pamo eni akedeko wa padame no akaya tokolo uku. ¹⁶Yesunomo oane auane yakilepa Akolaliyo tamene wa oka tokolo tukuno, anu weneme toamukuno, pinali anu wa edoane kei pimotoa-pe. Yesunomodo oane meamokolupa Akolaliyo no kibu moo. ¹⁷Yesunomo anu wenemedo akama yakenepa eni pupuke nee kue eya oyake oiane moamele toko. Nitamele tokoyake onekemo akama yakilepa anu weneme toamuku. Akolaliyo onekele takamene wa oka tokolo tuku.

¹⁸Nipa Yesunomo akama yakukepa edeya motuku patu. Yesunomo oane metekilepa nami kakamoane tuku wane kolotine yaku. Nipa onekemo akama yakukepa padeya-kiti oiane moamele tokoyake padeyaka oiane moamuku wane kolotine yaku.

Poloyo Akolalinele Takama Yakome Tanemo

¹⁹Padameka onekele-kama takoano ta wa no-pala amele toamokolo tekene pa atiki toane meku. No nitane agomeke pade ali atoame Yesunomo yakoa momotoane tekene kini pupu-kama takateku ago tetepo takoane meku. ²⁰Nitoane Yu yatene mekika pone mekenepa eni yename Yesunomo yakoa momotoane tekene kini totono litiane tuku. Ni pade Mosesene totonome moa lauaneya meki-kiti mekika pone mekenepa noanuka one totonome moa lauane tetepo takoane mekene kini tikile litiane tuku. ²¹Wa e ku pa yatene mekika pone mekenepa nipa eni yene Mosesene totonome moa lauameneya mea tiki toane tuku. Nipa eni ali atoameka Yesunomo yakoa momotoane tekene tuku. Enipa Akolaline totonome moa lauameneya meane tuku wane ekene wamuku. Keraisuno totonome moa lauaneya meane tuku wane ekene uku. ²²Yesuke wene tugo meake kini kekanele tamene piti motaneya meki yene mekika pone mekenepa nipa Yesunole wedoa takama pomotoane tekene kini tikile litiane tuku. Nitima yakenepa e ku yatene ali atoa padeka-kiti Akolaliyo toa momotoane tekene kiwi mekika pone mekenepa kini tikile litiane tuku. ²³Yesunomo edikoane oane pupitikama yakilepa nipa Akolaliyo dikane ali atoa pewe wima pokome noka dekoa pewe wimotoane tekene tuku.

²⁴Ali-kiti teyapea pote moa patukanali yotokete tikimo uku. Teyapea-kama peketeka odene agome odene namolo agome moatekoya wane motoko. Nitikono, eniya wane moadiyano wene pia tou toa Yesunole wedoa takama pamene. ²⁵Ele kule toa moa patukanali yotiki peya kini tigini kini wa wedoa lauane lauane toa meki. Nipa ali atoame namolo ago kei pia meatikiya wanepa moadiya wa wene pia tiki. Eniya wanepa pa yomo tatame latiane makai wane tokome wete ala tootapeademe tokoyake tiki. Totome Yesunole takakilepa oneme kei pia meatekoya pa pia kawatekoya mou wa toko. ²⁶Noanu teyapeane pikilepa pone wipitiatekuta lene mekoane puku. Nika yumili mutoa pia winali yotiki ali-kitame eko ali-kiti odepeta wia pitikadetepa ulu takameneya wedoa wiou toane eya toane-kala kaku. ²⁷Anu tiginipa anu wene piku toa litia toamotoane tekene lauane lauane toane meku. Nipa Yesunomo ete ali atoame yakoa momotoane oane meetekoanedo paka etepeane pokolupa Akolaliyo no meatekoya meamoo wane tuku.

Yu Yenane Kaua-mikiti Etepea Pekenemo

10 Anu oya-lawe Moseseyo tone kaua-mikiti Idipi ta tewitiko aua pokale tanemo kiwi wene takakene uku. Eina yene peya ka yametekilepa tibu yali yapu a tibuke todo takama ponokome taneya. Nitima ponokaka Kiane Kusa Ue ketoa eka lono pootapeneya. ²Tibu yali yapu todo takama ponokaka kusa ue ketakilepa nipa Moseseke lukoa mekete one-pala odeneka bapetaise ue motekete mou toa taneya. ³Nika Akolaliyo lawe-tane nee-kama peyame moa nokala taneya. Maana wa ibini akene neeke uku. ⁴Eina toa Akolaliyo yametane kakene kue pake ue lene togata peyame

ue nomoai toa nakeneya. Eni kuepa Keraisuke uku. Eina kue kipala opia pou toa Keraisuyo kini noatekoiya moa lawetema pekeneya. ⁵Enika eni tubele tokale eneketeke kainya matiyame etepea toma pekeneya. Nitikoli Akolaliyo wene poaneya mekomepa kibi yati kakene ta ludu pima yawa tua tadatapemotoa wakeneya.

⁶Akolaliyo nile-kala tikilepa toto-palaka toateka adeka piipianeya. Nipa eina yename padeya padeya poaneyake wene piitikaneya mea tane toa totome toamomotoa taneya.

⁷Nitaneyano, tone kaua-mikiti padeka-kitame eya kuya yomini latia kakoa kowitane toa toameamene. Enilekepa Akolaline bokuke eya wa wia mekaneya piko. *Ali atoa kini nee ue koukoa mekete natoe wa noa tagatekoapa kamoia tiabu toa kakeneya* wa wia mekaneya piko. ⁸Eina yene padeka-kitame mone koua piamatekoi atoa koua pitane toa toameamene. Eina yene edikoa meketepa odepeta ege egeta wa-kala kadukoa (23,000) tuutapeneya. ⁹Wa padepete kini poanele tokolepa Akolaliyo enoa kani nako patuno toa enato wa eina yename toa enekoi-pete kaya-kitame peya mati tania tukakala taneya. Anu oya-lawe toto-palaka enile takaya kekato. ¹⁰Wa tone kaua-mikiti padeka-kitame eni maana nee kote tokale wakete Akolali-pala ko oa akene toa toameamene. Nitane ali atoa wia tukatapemotoa Akolaliyo dikateka edelo ago moa wetekaneya.

¹¹Akolaliyo tone kaua-mikiti-pala enile-kala tikilepa ete yene-palaka toateka adeka pikome taneya. Ni toto mane oa moatekamo i i wa one bokuke wia mekamotaneya. Toto ipete meko-kitipa wipitia ta patatekoya liti tigotokakoa meko. ¹²Nitikono, poapeneya kaku wa wene piko ago

neeka etepea pokayano, wedoa yamene. ¹³Setanuyo kiwi likoa enekilepa nipa ete ali atoa peya likoa eneko toa kiwika likakala toko. Nitikolo ete pedekamele toamokaya tokolo Akolaliyo yopia-kala kako. Ke enekakale meake poapeneya kamotoa tokome eni poanele titi takoa poatekoi ka yametekala too. Nipa nitou wa oa pikana toa taatekoka too.

¹⁴Nitooono, ete ali-kitame padeya yomini latikoinakeyake lodo yoa kowitoka tikika titi toma pamene. ¹⁵Kiwi wene muno meane yene-pala ukuno, wene wedoa kibutukoa meamene-ye. ¹⁶Gerepi po ku ue meteke mekaneya moa Akolali-pala ke wa ootokoa mekete naketepa nipa Keraisuno kamate patu kautakoa mekete one-pala odene wene-kama pia nako. Palawe waneka moa popimoa naketepa Keraisuno tugini patu kautakoa mekete one-pala odene wene-kama pia nako. Enipa nimini uku-pe. ¹⁷Anu oya-lawe toto kainya mati mekoyake odene tugini kaaloganeya meou toa mekete nako. Odene palawe wane-kama moa popimoa nokala tekete ni uku.

¹⁸Iserere yenamepa Akolalike padeya mea lodo yotikilepa padekapa Akolaline takoa yoa ni padekapa kini wa moa naki. Nipa Akolali-pala odene wene-kama pia tiki. ¹⁹Pa yatene ali-kitame paya gode-kitike melepu eya mea lodo yotiki wane ukupa nipa paya gode-kiti meane tetepo takakene uku patu. Ni melepu eyame paya gode-kiti wene kekamele toko wane ekene uku patu. ²⁰E'e mena. Akolalinemo yakamene pa yename melepu eya lodo yotikilepa ipono eyake mea yokala tiki. Akolalike mena. Edikakilepa ipono-pala odene wene-kama pia tiki. Anu oya-lawe kiwi ipono-pala odene wene pia meameamene. ²¹Ali Muno agono takane meteke mekane gerepi po ku ue naki yenepa iponane takane gerepi po ueka namele toamoko. Ali Munagono takane walaike mekete nee naki

yenepa iponane takane nee eya namele toamoko. ²²Ae, Akolalinele-pala iponaneleta odeneka takakete takakilepa nipa Akolali toto-pala wene poaney a memotoa toa eneki patu. Onepa telek-agono, toto kibu motokalepa one edoa ete pedekato-pe.

Kekaney a Latikaneleke Akenemo

²³Pade-kitame ekete totopa Keraisuno ali atoano, opi tone kekaneya latikakoole peya tamele toko wa iki. Ae, kini kekaneleka tamele toko wa padele padele peya tikilepa nipa epetanele-kama tiki-pe. Padele padele peya tikilepa nipa kini oya-mikiti auapekile-kama tiki-pe. ²⁴Kinikile-kama toameneya ete-kitaneleka takakala tamene wane uku. ²⁵Makesike piko melepu eya iyapa iponaneya patu wa pinago pitia yakamo pa tatepe toa moa pamene wane uku. Eniya melepu nakilepa atiki toa mekete nomotoane ni uku. ²⁶*Itonoka itono ludu pia kawa tokoyaka eniya peyapa Akolalineya* wa one bokuke wia mekaneya pikolo uku. ²⁷Akolalinemo yakamene agome-kiti one yapu nee noano noo wa melepu eya takoa lawetekalepa nipa iyapa iponaneya patu wa pitia yakamo pa moa namene. Einagomede ee wa okalepa namene ya moonoo, pa moa namene. ²⁸Wa panagome-kiti nepala okome i melepupa iponoke mea lodo yotaney a wa okalepa noameamene. Einago wene keda takakayano, noameamene. ²⁹Ne wene keda taneya mekayano, noameamene wane ekene wamuku. Nepala okago mama motekene uku. Nikepa panagome eya wa-kiti oko. Einagopa Yesunomo wedoa wene toamene ago tokome eniya melepu namene piti motokome okano, nitane agono wene edoane litiane tomotoa-pe. ³⁰Akolali-pala ke

wane ootokoanepa oyake namele toko. Eniya melepu moane nakolupa tone noamatekoya wini nako wa dikane agome no edoa kiko akamotoa-pe wa panagome-kiti oko.

³¹Nimo wado okalepa eya wane topo takoane ou. Melepu nee ue eya moa nakeka padele padele tekeka ete-kitame Akolali kei pimotoane tekene tamedeku wa tokala tamene. ³²Yesunomo yakoa motane yene Yu yatene ali atoaka pa yatene ali atoaka wene poaney a mea etepea pokayano, kini wene moa koigakileka toameamene. ³³Noanume padele padele tikilepa ali atoa peyane wene epetekoane enoane tokala tukuno, kimeka tamene. Anukule-kama touno wene pianeya pima yakuya mena. Akolaliyo ete ali atoa toa momotoane tekene kiwi peyanele takama yaku.

11 Keraisuyo tane toane litiane tuku toa kime toma pamene.

Losu Yapu Oboa Mekete Toatekomo

²Kime no wene taneya-kama mea ni anu mane mane oane olaukakounakale wedoa pikoa kakete tikino, ke wane kiwi kei plane uku-ye. ³Eya wane kiwi wene takakene uku-ye. Toto ali yatenepe Keraisuke-kama lukoa meko. Atoa yatenepe kinikaneke-kama lukoa meki. Keraisu einagopa Akolalike-kama lukoa meko. ⁴Panagome nunagu wateaney a kakome Akolali kowitoa one agale toawe a akoo tokomepa one lukoa meko ago Keraisu ya takakome toko. ⁵Pade atoame nunagu wateameneya kakome Akolali kowitoa one agale toawe a akoo tokomepa onekane eni ya takakome toko. Nipa tobou pine pitutapeneya kakene tetepo takakome toko. ⁶Nunagu wateamademe wako atoapa one tobou pine pitutapemotoane uku. One pine pitukaya wa ya motokomeka teigaya wa ya motokomeka one nunagu

wateaneya-kama memotoane uku. ⁷Ali yatename kowittoa kaketepa kini tobou pine kauatiki toa mena. Akolali pa teleta tootapeneya meko ago adeka pianeya kakili tekene ni uku. Atoa yatenepa mea epetekane ali yatene adeka pianeya kaki. ⁸Akolaliyo ali latikilepa atoa moa latianeya mena. Wa atoa latikomepa ali moa latianeya. ⁹Akolaliyo ali latikomepa atoane latikaneya menake wa atoa latikome aline latikaneya. ¹⁰Nitaneyano, ipa onekaneke poti lukoa meadeko wa edelo yatename enekete omotoa tekete atoa yatene nunagu wateaneya-kama meamediki. ¹¹Nitamedikiyake Ali Muno-pala lipua meketepa alime atoa mape moa atoame ali mape moa tiki. Nipa onekele tutu tutu wa takamele toamokolo ete oto wa mape mootakutukakala tiki. ¹²Nimo ikilepa eyake uku. Namolo atoapa alike latianeya. Opi ali mati opikilepa atoa yatename tokoya. Eniletapa padele padele peya titia toko ago Akolali oneme titia taneya.

¹³Kipala i ukumo wene kibutukoa meamene. Pade atoame-kiti nunagu wateameneya kakome kowitikomepa nipa epeteko toko patu. E'e mena. ¹⁴Panago pine kiliga kotomaneke pianeya kakilepa nipa ya tanele eni toko. ¹⁵Atoa pade one pinepa lapia kotomaneke pianepa nipa koniyoya wa totome kei piko. Akolaliyo atoa latikilepa one pine ludu taneya witakome tobou kaumotoa taneya. ¹⁶Ina ukulekepa panagomede neno oa kakalepa eya wane ou. Kipala i ukupa ete Aposelo ali-kitame odenemo-kama oa olaukakala tiki. Ta piko peyakeka Yesuno yatene ali atoa peyame eni totono litia tiki.

Gerepi Po Ku Ue-pala Palawe Waneta

Nakete Toatekomo

(*Matiu 26:26-29, Make 14:22-25, Luke 22:14-20*)

¹⁷Kime eya tikilekepa kei piamuku. Kiwi losu yapu keneke oboa meketepa Yesunole wedoa takamekete toa potokakala tekete tikili uku. ¹⁸Yesunole takoa oboa meketepa neno oa pili pili tokala tiki wa namolo takoa akoa akedekimo yatekene ni uku. Eni yatekenepa i i wa akedikimo pade nimini ekete tiki wane wene piku. ¹⁹Neno oa pili pili toa mekilepa Akolaliyo kei plateko ali atoa i i wa ete-kitame takoa enemotoa tikino, tamele toko. ²⁰Ae, palawe wane-pala gerepi po ku ueta noadete koukoa meketepa ali atoake Yesu tuanemo wene taneya mekete namedikiyake eyaka pale tokala tiki. ²¹Pade ali atoa kobume tuaneya pa memotoa kiwi padeka-kitame nee ue eya wete noa tagatapekala tiki. Nipa gerepi po ku ue noa pia leau oa mekala tiki. ²²Ae, widikakilepa kini yapu toameneya tokome losu yapu keneke oboa mekete tiki-pe. Yesunomo yakoa motane ali atoa paya tetepo takoa ni ponopene ali atoa ya takoa toadete ni tiki-pe. Widikakilepa kipala edemo wane uku patu. Kiwi kei plane-pe. Kei piamou-li.

²³Ali Muno agome no olaukaka toane kiwi olaukakouna. Likonu Yudaseyo Ali Muno Yesu one-pala poi teiane yenane yonoke pene moa piameneyake Ali Munagome palawe wane moa eya taneya. ²⁴Akolali-pala ke wa ootokoa popimotokome okome ipa anu tiginino, moa noe. Kiwike tuateku adeka pikene ni uku. Kiwi oboa mekete-kama no wene taneya mea dikoa moa nokala tamene wa akeneya. ²⁵Eina toa kini nee nootokoa mekete Ali Mu-

nagome mete moa metekome okome i gerepi po ku ue meteke mekaneya noe wane metekilepa Akolaliyo oi pedoa pikana toane wenele litia toatiki totono kadimo oane yametekene tuku. Eni totono taatekoane tikilepa anu kamate ponomotoane tou. I meteke mekane gerepi po ku ue moa naketekama no wene taneya meamene wa Ali Munagome akeneya. ²⁶Nitaneyano, Ali Munago wete wakapea noameneyake palawe wane popimoa noa gerepi po ku ue noa tekete-kama one tukome tanele i i wa ete ali atoa wene takakete toi.

²⁷Ali Munono palawe wane-pala gerepi po ku ueta paya nou toa moa nakagomewa Ali Munono tigini kamateta paya tetepo takakome poanele eni tokome too. Nitikalepa Akolaliyo kibu moo. ²⁸Nitikayano, eya tamene. Panagome-kiti eni palawe wane popimoa noa mete moa gerepi po ku ue noa toademe mekomewa pinali one tepene poane wene pikutu patu wa teta enamedeko. ²⁹Ni edoa-mo. Panagome-kiti palawe-pala gerepi po ku ueta moa nakilepa Ali Munono tigini wene toameneya mea tokalepa Akolaliyo kibu moamele too. ³⁰Edikakilekepa anu oya-lawe kiwi kainya mati yene taneya mea tigini motaneya mea tiki. Ni padeka-kiti tua pokala taneya. ³¹Eniya wete noameneyake tone tepene poane wene pikutu patu wa teta enekolopa Akolaliyo toto kibu moamoo. ³²Enika eni ke enekakole enemotoa tikilepa Ali Munagome toto mane oa motokome toko. Nipa itono peku noai tiki-kiti kibu motokomewa toto kibu moamademe ni toko.

³³Anu oya-lawe kime Ali Muno agono palawe-pala ueta moa noadete oboa meketepa kini oya ali atoa peya obonomotoa nepia meamene. ³⁴Papetedo kobume tuaneyake meketepa

nipa pa nee ueta kini kini yapu yapu mekete namene. Noomotekete losu yapu pote koukoa mekete Ali Muno agono palawe-pala gerepi po ku ueta poti mekete namene. Nitikolipa Akolaliyo kiwi kibu moateko toa mena.

Kipala pademo oatekumo-kiti pa pikono, wida none mekene ouno, pa nepia meamene.

Epetane Yominiyo Peku Lawetekomo

12 Anu oya-lawe Epetane Yominiyo peku lawetekomo wene takadene ukuno, yakamene.

²Papete kiwi pa yatene ali-kitame Yesunomo wete yakoa moameneyake kini yoname mitikoa latikoinakeyakitike padeya mea lodo yoai tomotoa Setanuyo lia aua pokala taneya. ³Nitaneyake opi eya wane wene takakene uku. Epetane Yomini awinome wene takako ago odenemeka Yesu einagopa Akolaliyo wakene ago wa ikilepa toamoko. Ni Epetane Yomini awinome wene takakagome odene Yesu einagopa one Ali Muno wa amele toko.

⁴Yesunole ele kule takateko pekupa odene ago Epetane Yominiyo-kama lawetekala toko. ⁵Ele kule toateko peku noa teketepa odene ago Ali Munagonole-kama takakala toko. ⁶Ele kule tikilepa odene ago Akolaline tele patu-kama kautakoa kakete tokala toko. ⁷Epetane Yomini toto peyake tutu tutu wa awinome mekome peku lawetekilepa tone tone auapenali yomotoa tokome ni toko. ⁸Nitoo panago-kiti wene muno meaneya mekome oateko peku lawetoo wa panago emo kumo pine toa oateko peku lawetoo toko. Enilepa odene ago Epetane Yominiyo-kama toko. ⁹Ni panago-kiti Yesuke wedoa wene tugoa meateko peku lawetoo wa panago-kiti yene tane ali atoa latekateko peku lawetoo toko. Enilepa odene ago

Epetane Yominiyo-kama toko. ¹⁰Ni panago-kiti ele kule tubele toateko peku lawetoa wa panago-kiti Akolaline agale toawe akateko peku lawetoa toko. Ni one peku lawetekolo panagome-kiti eya wa wene toa toko. Ete-kitame ikimo yatekompe imopa Epetane Yominiyo aka wa akene toa akedeko, imopa Epetane Yominiyo aka wa akene toa mena wa wene toa takoa eneko. Ni Epetane Yominiyopa panago-kiti agopane agaleke emo kumo oateko peku lawetoa wa panago-kiti enika enimo pine toa oateko peku lawetoa toko. ¹¹Ele kule toatiki peku lawetekilepa odene ago Epetane Yominiyo-kama toko. Nipa one wene litia tokome kini toatiki peku lawetekilepa odene odene wa takoa moa lawetekala toko.

Kawa Yono Eya Koukalogopa Ali Wa Okomo

¹²Anu oya neke kawa yono tobou tiginini eya tutu tutu wa kawake odeneya koukalogakoya. Eina toa toto peyapa odene ago Keraisuno tiginini tetepo taneya meko. ¹³Nipa Yu yene pa yene kueme topo toa moa egetane yene ta pine yene toto peyake odene ago Epetane Yomini tutu tutu wa awikolokamotoa ue motokaneya. Ue eni motokakilepa kabe koukoa odene ago Keraisu-pala lipukoa taneya. Nitoapa ue epetaneya nomoai toatekota yameou toa one peku namene wa Akolaliyo one Epetane Yomini toto metaneya.

¹⁴Tone tiginipa odene tiginike yono kawa enika eni wane kainya tutu tutu wa kako. ¹⁵Nipa neke kawame-kiti nepala okome onepa yono menano, tiginipala lipukoya wane mena wado okalepa pinago neke kawapa paya wane tetepo takoa waoo-pe. ¹⁶Neke kapidime-kiti nepala okome onepa lene menano, tiginipala lipukoya wane mena wado okalepa pinago neke kapidipa paya

wane tetepo takoa waoo-pe. ¹⁷Anu oya ne-kiti kapidi eya kawameneya lene-kama kaatapeneya meadekalepa pademo okoimo edoa yakade-pe. Nika neke timini eya kawameneya kapidikama kaatapeneya meadekalepa padeya kalono tokoya edoa yakade-pe. ¹⁸Akolaliyo one wene litia tokome lene kapidi timini kabunu yono kawa eya koukalogoa ali latianeya. ¹⁹Nitameneya lenedo odene latikompe nipa ipa ali latiku wa amele toameneya. ²⁰Neke lene kapidi yono kawa enika eni wane kainya mati kakoyake nepa odene ali wini kako.

²¹Lenemedo yono-pala agaleme okompe neke toatekole pade piamoko wa paya tetepo takoa wawamele toamoko. Ni lene timinimedo kawa-pala agaleme okompe neke toatekole pade piamoko wa paya tetepo takoa wawamele toamokolo uku.

²²Eya waneka uku. Tone taba tokoya-kitido toamokalepa pa tiobali atoa meoo. ²³Ni tone paya tetepo takakoya-kitipa mama motekete wedoa kalako. Nipa leneme enamatekoya-kiti padame enekaya kekoa mamina moa kawa paigako. ²⁴Nitikoyake tone leneme enatekoya-kitipa koniyoya tokome maminame kaukoya mena. Enika eni peya latiane ago Akolaliyo yono kawa lene timini eya kibusukoa ali latikilepa tone paya tetepo takakoya-kiti mama motekete kalamotoa tokome taneya. ²⁵Nitikome enika eni peya paya tetepo takakoya-kitika koniyoya-kitika ete oto wa auapenali yomotoa tokome kibusukoa ali latianeya. ²⁶Nitaneyano, yonome-kiti tete motokompe eteya-kitameka tete odeneka moa kako. Wa panagome pade wanedo takoa kei pikolopa eteya-kitika odeneka wedia kako.

²⁷Eina toa Akolaliyo kiwi koukalogakilepa odene ago Keraisuno yono kawa tiginini eya tetepo takoa toko.

Nipa onekele tatite toa takamotoa tokome toko. ²⁸Akolali nitiko agome tone Yesunole takatekoole tutu tutu wa tatimo tatimo taneya. Nipa namolo takoa Aposelo ali-kiti moa kakoa ni taku takoa one agale toawe akatekoi yene moa kakoa ni tebola takoa onekemo olaukatekoi yene moa kakoa taneya. Ni liti padele padele tubele toatekoi yene moa kakaneya. Nititikoa eya yene tane ali atoa latekatekoi yene ni ali atoa auapeatekoi yene ni one ali atoa talo toatekoi yene ni agopa tane agaleke emo kumo oatekoi yene moa kakakala taneya. ²⁹Eni peyapa Aposelo ali-kiti mena. Peyame Akolaline agale toawe akakiya mena. Peyame Akolalinemo olaukakiya mena. Peyame padele padele tubele tamele tokoya mena. ³⁰Peyame yene tane ali atoa latekamele tokoya mena. Peyame agopa tane agaleke amele tokoya mena. Peyame eni agopa tane agaleke akene toa pine i i wa toawe amele tokoya mena. ³¹Padameka enika enile-kama tamele toamokoyake Akolaliyo tobou kakoa laweteko peku noada wa eni toatikileke wene piitikaneya meamene.

Eteya totono peya moa patukako totono opi i yametekuno, yakamene.

Eko Ali Atoake Wene Mekakete Toatekomo

13 Ali-kitame yakoa iki agalekeka edelo ali-kitame yakoa iki agalekeka emo kumo agale muno pewe kakoane amele tokolo ikilepa tekeneke eko ali atoakedo wene mekameneya meane tadekolupa nipa wagome-kiti ddu ddu oko toane ni tue kabeke loko pianeya loko lapa oko toane tekene pata pamo eni ekene tou. ²Akolaline agale toaweane akateku peku noane ni one papete kaukoa mema nekenemoka pademo pademotaka wene tootapeane ni oneke

wedoane wene tugakouya tekene tonokiti padeka toa kapomotoane toane enika enilepa tekeneke wa eko ali atoakedo wene mekameneya meane tadekolupa nipa paya ago mekene pata pale eni tekene tou. ³Ponopeneya-kiti auapekene anukuya peya tatitapeane ni Yesunole wedoane takama yakilepa no-pala poi teiane yename no toele wia pitikamotoane toane enika enilepa tekeneke wa eko ali atoakedo wene mekameneya mekene tadekolupa nipa ipe yolo enadene keneya enipa pata pale tekene tou.

⁴Eko ali atoake wene mekoa meateko kotu kakoa wene mekoa mekagomepa nipa eya toomoa poko. Ete-kitame meteki tetepa ete topo takameneya poti mokoa kawa ni eko ali atoa mama moa auapea kinikiya tepi moamoa ni mate agale wamoa pinali one wa ke piamoa toko. ⁵Edikoa mekomepa ya tanele toamoa onekele-kama toamoa toko. Ni mekamotokome pitakome kotimi yoamoa ni ete yename one-pala poanele tikileke oi moameneya po letu mekamoa toko. ⁶Ni ete yename padele padele koiga koiga tikile enekome wediamokome ni ete-kitame ele kule kiyo akenele tikili enekome wedia meko. ⁷Ni ete-kitame one-pala padele poanele tikilipa kini tanemo i i wa wete toawe wamoa pa luaneya meko. Naniko epeteko tiki patuno nepiane enou wa ke enekakolo meake poapeneya kako.

⁸Eko ali atoake wene mekoa meateko kotu kakoa wene mekoa meketepa nipa wene mekoa mea wawamoko. A tibukeka nitima poo. Opi papete Akolaline agale toawe akateko peku noa ikilepa tokoyake a tibuke toawe akateko toa mena. Opi agopa tane agaleke oateko peku noa ikilepa tokoyake naniko a tibuke agopa tane agaleke pademoka wamoo.

Opi emo kumota wene toateko peku nakoyake naniko a tibuke enika enimo wene toateko toa mena. ⁹Opi totome Akolaline agale toaweaa akakilepa one agalepa nami deya yakou toa yakoa toaweaa akako. Emo kumo wene tikilepa nika pa nami deya wene toko. ¹⁰Nipa Akolaliyo one papete wene topikanakale taatekoa toa togatapekalepa namolo peku nootokoa tekei tokoonakale totome wa pade toamoo. ¹¹No dee mati deya mekene agale oane ni ile tou wane wene plane ni ele kule toatekou wene kibutukoane meane tikilepa anu yagono mati-kitame tokoile-kama tokou. Opi wetini ago kakene tekene no de mati deya mekene toma yakounakale tewitikoane wawane wa toamuku. ¹²Opi Akolaliyo tokolepa ue mineke yomini takane tetepo tokolo tokome totome keleyo enamokoyake naniko tone leneme pogakoa enetapeoo. Opi onekemopa pademo-kiti katekoane wene toamukuyake naniko wene tootapeou. Nipa no toma yakumo-kama oneme wene tootapeko toane nitou.

¹³Eya tebololepa a tibuke pote meketeka pa toma-kala poo. Akolalike wene tugoaa mea ni one peku noane tagatapeada wa nepia mea ni ete oto wa wene mekanali yoa too. Eni tebolole a tibukeka pa toma peketepa ete oto wa wene mekanali yoma pikile tobou kakoa too.

Epetane Yominiyo Peku Lawetekomo

14 Eko ali atoake wene mekoane meateku peku noane tagadiya wa wene pianeya meamene. Nike lokoa etele toatikileke wene piitikaneya meapa Akolaline agale toaweane akou wa eni toatiki peku tobou kakoa toa enamene. ²Agopa tane agaleke oko agome eko ali atoa-pala okoya mena. Akolali-palapa oko. Nipa papete kaukoa meanemo yominime wene

takako toa oko. ³Nitikoyake Akolaline agale toaweaa akakagome eya toko. Akolaline yapu wikakou toa onekemo i i wa eko ali atoa olaukoa ni ile tamene ile tamene wa mane mane oa toko. Ni ke enekakolo meki-kitane wene epetekakala toko. ⁴Agopa tane agaleke oko agopa pinali one wa auapeko. Akolaline agale toaweaa akako agomepa yapu wikou toa Yesuno ali atoa mape moa auapeko. ⁵Kiwi peyame agopa tane agaleke omotoane ukuyake Akolaline agale toaweane akou wa tobou kakoa omotoane uku. Ni edoa-mo. Panagome-kiti Akolaline agale toaweaa akakomepa nipa padele akole tokome agopa tane agaleke oko ago moa patukako. Wa panagome-kiti agopa tane agaleke pademo kaukoa ootokoa kakome pine ina wado toaweaa akakomepa ete ali atoa auapeko.

⁶Nipa wida none mekenepa Akolaliyo wene takanemo toaweane wamoane onekemo pade pine ina wane wene takamoane one agale toaweane akamoane pademo olaukamoane tekene agopa tane agale-kamado ekenepa kiwi edoane auapemotoa-pe. ⁷Panagome-kiti moio wiane tulutu oane tuku wa oake oa potokakolopa ete-kitame iya lo oa tadeko wa edoa wene tomotoa-pe. ⁸Wa panagome-kiti poyo ali-kiti poike kamotokademe beta wiake wa wia potokakolopa nipa poike kamo pomotoa tokome beta wia tadeko wa teyo poike poademe nodokamotoa-pe. ⁹Enakale toa Akolalinemopa yakatiki toa oa meamekete agopa tane agalekedo pademo oa meteketepa nipa pupulege popokakome okomo atuponoko toa pata pamo ekete tiki. Nitikilipa ete-kitame onekemo edoa yakoa momotoa-pe. ¹⁰Ali atoa kini kini take mea kini yakoa iki agale okala tiki. Nipa kini oya-mikitame yakatiki toa-kama okala tiki. ¹¹Panagome-kiti nopala

pademo ikilepa tokoyake one yatename yakoa iki agaledo yakamukulupa einago totapa monekagota tetepo takatakutukoa meko. ¹²Kime nitikaya tokolo eya wane uku. Akolaline peku noane tou wa kime wene pia mekino, one yapu wikakou toa Yesuno ali atoa wedoa mape wiatiki peku noai tamene.

¹³Kipala ina ukulekepa eya waneka uku. Agopa tane agaleke okagomewa einagale pine toaweane oateku peku lawetamene wa Akolali kowitimotoane uku. ¹⁴Noanume-kiti agopa tane agalekedo oane kowitikenepa nipa anu yominime wene takaka toane kowitikene tou. Nipa anu kowitikene okoumo agopa tokale kowitikene tou. ¹⁵Nipa edeku patu. Eya tou. Anu yominime wene takakalepa agopa tane agaleke kowitikala tou. Wa padepete-kiti noanu yakoaane uku agaleke kowitikala tou. Nika anu yominime wene takakalepa agopa tane agaleke lo okala tou. Wa padepete-kiti noanu yakoaane uku agaleke lo okala tou. ¹⁶Anu oya-lawe neke yominime wene takako toapa agopa tane agaleke Akolali-pala ke wa oa one kei pia kowitoo kakoka neke okagale yakamoko agodo nome yatekomewa edemo oko patu. Nipa neke kowitike okomo yakamokome tokome winimopa nimini oko wa einagome amele toamoko. ¹⁷Nipa agopa tane agaleke ke wa kowitike okomo epetekoa ekeka einago auapeamoko.

¹⁸Noanumewa agopa tane agaleke kowitikilepa kiwi moane patukoane lugutukoane tukuno, Akolali-pala ke wane uku. ¹⁹Nitikuyake eya waneka uku. Yesuno ali atoa koukoa mekika agopa tane agaleke agale ludukiyado okoane kakenepa ali atoa wedoane auapeamuku. Nitameneya kini yakatiki toane agale tiginido ekenepa wedoane

auapeku. Nipa Yesuno ali atoa koukoa mekika kini yakatiki toane amedeku wane wene pikene uku.

²⁰Anu oya-lawe kini toatikile wene kibutua mekilepa papete mati mekete tokoina toa toameamene. Nitameketeka de matiyame-kiti poanele tamene agopa tokolo meko toa meamene. Ni pade Akolalinele takatikile wene kibutua meketepa wetini yename tiki toa tamene. ²¹Kini litia toatekoi totono i i wa wia mekane bokuke eya wa wia mekaneya piko.

I yatene ali atoa-palapa mone pa yename kini yakoa okoi agaleke pademo pademo oa metekapomotoane wetekakoluka yakamadete wakala toi wa Ali Munagome oko wa papete wia mekaneya.

²²Nitaneyano, panagome-kiti agopa tane agaleke ikilepa nipa ipa Akolaline agale patu kautakoa kakome akedeko wa Yesunomo yakamene yename wene tomotoa eni oko. Nipa Yesunomo yakane ali atoa-palapa okoya mena. Panagome-kiti Akolaline agale toawe akakilepa nipa Yesunomo yakoa motane yename yakatiki toa eni oko. Nipa Yesunomo yakoa moamene yene-palapa okoya mena. ²³Nipa ali atoa koukoa mekete agopa tane agale-kitike Akolali odene-pete kowitiketete kowitikolido kini agale yakamene yeneka Yesunomo yakamene yeneka note yateketepa ipa leau ekete iki wa oi. ²⁴⁻²⁵Wa peyame Akolaline agale keleyo toawe akoo kakoika pa agoka Yesunomo yakamene agoka nome yatekome eya wa oa too. Ae, nimini iki. I agaleme anu tepene piku wene keleyo witaakono, no poane ago tadeko wa one namolo wene wia wakome one kakata aua pitakome Akolali kei pia kowitoo. Nitikome okome kiwi pakeke Akolali nimini nome kakedeko wa toawe oo.

Losuke Akolalinele Wedeteko Takatikimo

²⁶ Anu oya-lawe inapa eya wane ekene uku. Kiwi koukoa mekete-kama eya tokala tamene. Kini papete wene kikutupikoina tekete pa panagome lo agale oa ni panagome mane mane oa ni panagome Akolaline agale toawe akoa ni panagome agopa tane agaleke pademo oa ni panagome agopa tane agaleke akene toa pine toa oa tamene. Nipa padele padele tikilepa Akolaline yapu wikakou toa one ali atoa auapekala tamene. ²⁷ Agopa tane agaleke oatikimo pikolopa takuta tebolomeka odene odene wa okala tamene. Nitikilipa agale pine toawe akagome i i wa ete yename yakamotoa toawe akakala tamene. ²⁸ Pine toawe akateko ago kawamokolopa nipa Akolaliyo odene yakamoto, kini eni oatikimopa toawe wameneya kini tepene lukoa meamene. ²⁹ Wa Akolaline agale toawe akatikimo pikolopa ali takuta tebolomeka i i wa okala tamene. Nitikili yatekete ete-kitame ipa Epetane Yominiyo wene takakomo iki patu wa takoa enekala tamene. ³⁰ Namolo agome Akolaline agale toawe akoa kakoka Akolaliyo imo akamene wa one mekoya liti meka ago pade wene takakolopa nipa namolo agale akakanagome agale teigoa witipitoa memotoane uku. ³¹ Nipa Akolaline agale toawe akakilepa kiwi peya wene weye akoa olaukoa toatiki toa odene odene wa tokala tamene. ³² Akolaline agale toawe akako agopa pinali one wa yopia kakome uutukoa poti toawe akakala toko. ³³ Akolaliyopa kime one agale toawe akakilepa togo togo wameteko uutukoa poti akamotoa okono, odene odene wa toawe akakala tamene.

Yesuno ali atoa ta piko peya koukoa mekete-kama ³⁴ atoa yatename agale wameteko poti memotoane uku. Nipa agale wameneya pa yakakoa memotoane uku. Kini totono piko toa ali yateneke lukoa mekiya tokome nitimotane uku. ³⁵ Pademo pitia yakatikimo pikolopa nipa kini yapu yapu wakapea pote mekete kinikane pitia yakakala tamene. Ni edoa-mo. Atoa yatene losu yapu mekete agale ikilepa ya tanele eni tekete tiki.

³⁶ Beita, Akolaline agale kime wida titia akakoo wa anu agale yakamekete iki patu. One agalepa ete ta-kitike oa tugameneya kiwi mekita wida odene oa tuganeya waka iki patu. ³⁷ Kiwi panagome-kiti Akolaline agale toaweane akaku ago one meku wa wene pia ni Epetane Yomini oneke awitaneya meku wa wene pia tokopa nipa i pipia oi motokomepa eya wa oa tomo toane uku. No Polo einagome kiwike i wia wetekadekomopa Ali Muno agome akamene wa akene toa akeneya tadeko wa yakoa momotoane uku. ³⁸ Anu i ukumo yakoa moamokome pamo tetepo takoa wakalepa one okamoka yakoa moameamene wane uku.

³⁹ Kipala ina ukulekapa Akolaline agale toaweane akadiya wa wene pianeya meamene. Pade-kitame agopa tane agale oa kakilepa edikoa wameo wa wameamene. ⁴⁰ Padele padele koukoa mekete toatikilepa wedeteko poti tokala tamene.

Yesu Tuaneyake Akolaliyo Kamotokanemo

15 Anu oya-lawe Yesunomo papete olaukakounakamo opa wene takadene uku. Onekemo i i wane oane metekolu kime yakoa motokoina. Opa einagale patu poapeneya kautakoa kakete tiki. ² Yesunomo i i wane olaukakounakamo wedoa pikoa kakilepa

einagaleme kiwi toa motoko. Paya nou toa yakadokolipa kiwi toa motokoya mena.

³Noanu yakoane motokou toane tobou kakoane kipala eya wane olaukakouna. Akolaline bokuke papete wia mekapiane toa taatekoa Yesu nome tukilepa tone tokoo poaneleke ni taneya. ⁴One tigini moa aua pipaneyake ta tebolo takoa pataka-pete Akolaliyo moa kamotokaneya. Nipa one bokuke papete wia mekapiane toa taatekoa taneya. ⁵Nitikale kamo pokome one lene timini eya yene yamepokala taneya. Namolo takoa Pita yamea wa naniko one Aposelo ali-kiti koukoa mekoita pome pono yamea taneya. ⁶Nititikaneyake one oyali atoa ege kadukaka pogi kakoapeta kadukoa (500) koukoa mekoita pome pono yamepaneya. Einapete pono yametane ali atoapa nateteko tukoiyake ete peya mati pa meki. ⁷Wa naniko one wamene ago Yame mekata pome pono yameteko one Aposelo ali peya koukoa mekoita wa pome lene timini yamea taneya. ⁸Nititikaneyake wipitikome no-kitika one Aposelo ago latikome no pono yamenoka. Nopa atoame mati koula lakapea opiane tetepo tane agoke toka.

⁹Papete Akolaline ali atoa tete meemoane pokounake Yesuyo nopa paya ago keku Aposelo ago tetepo takoa wakinakeya tokake toameadeko. ¹⁰Nopa dikakou agoke Akolaliyo pewe witikome one Aposelo ago takoa moa kakakilepa pata pale toameadeko. Papete poane agomeke naniko Akolalinele wedoane takama pekene ete Aposelo ali peya moane patukatapekou. Nipa anu weneme tokouya mena. Akolaliyo pewe-kama wia yopia kakale tekene tokou. ¹¹Ni pade Yesunomopa noanumeka oane meane ete Aposelo ali-kitameka oa mea

tekete odenemo-kama oa mekala toko. Kime yakoa motokoinakamo ke uku.

Akolaliyo Tuane Ali Atoa Kamotokatekamo

¹²Toto Aposelo ali-kitame eya wa olaukakouna. Akolaliyopa Keraisu tuaney a pikata moa kamotokaneya. Nimo wa olaukakoonake kiwi padeka-kitamepa Akolaliyo tuane ali atoa moa kamotokamoo wa akedikili yateku. Edekolo enimo wa iki-pe. ¹³Kini eni akedikimodo nimini akedekalepa nipa Akolaliyo mana Keraisuka moa kamotokameneya. ¹⁴Ni mana Keraisudo moa kamotokameadekalepa onekemo kipala oa metekoonakamo pata pamo okoo. Ni Keraisudo kamo poameadekalepa oneke wene tugoa mekilepa pata pale tekete tiki. ¹⁵Ni pade Akolaliyopa Keraisu moa kamotokameneyake moa kamotokaneya wa totomede eketepa onekemo uku pekete toa kapene agaleka oko. Ni tuane ali atoado moa kamotokamoo tadekalepa mana Keraisuka moa kamotokameneya. ¹⁶Akolaliyo tuane ali atoado moa kamotokameadekalepa mana Keraisuka moa kamotokameneya. ¹⁷Ni mana Keraisudo moa kamotokameadekalepa kini Keraisuke wene tugoa mekilepa pata pale tekete tiki. Kini tokoi poaneleka kogameneya pa mekete tiki. ¹⁸Nika Akolaliyo Keraisudo moa kamotokameadekalepa Yesuke wene tugoa mea tuane ali atoa etepea tua atua pekeneya. ¹⁹Papete itonoke mekete Yesuke wene tugoa meatekole pikoyake wa wipitikedo etepea tua poo tadekalepa kini Yesuke wene tugakilepa pata pale tadiki wa eko yene peyame toto ela moa kawei. Nipa ete yene ela motiki toa moa patukoa toto ela mati mokoa kawei.

Adam Keraisutame Tokala Tanemo

²⁰ Mana Keraisu tuaneya pikale Akolaliyo moa kamotokaneya-li. Pegetoa mana moa kamotokakilepa toto tua pokolo moa kamotokateka adeka eni piipikome taneya. ²¹ Namolo ago Adameyo poanele taneleke oneke tagene ali atoa peya tuma-kala nekeneya. Wa padenakago Keraisu tuake wa kamoia pekeneya tokome toto tuake wa kamoia poo. ²² Toto peyapa Adam einagono peku noai tekete etepea tuma-kala poko. Nitoake padenakago Keraisuno peku noai teketepa tuake wa kamoia poo. ²³ Kamoia pikilepa pato takoa toameneya Akolaliyo wene piko toa too. Pegetoapa mana Keraisu tuake kamoia pekeneya. One wakapea noka-pete oneke lokoapa toto Keraisuke wene tugoa mekoo-kiti kamoia poo. ²⁴ Nititikaneyake Keraisu einagome e ku tobou mekoi yene ta piko peya yopia mekoi toa moa agopa takatapeoo. Nitoa mea wipitia ta patakakome ika iya nekeno, yopia kamene wa etene Akolali yameoo. ²⁵ Nitatekoyake papete one-pala poi teia mekoi peya one kawane moa lukademe tokome eya kuya peya yopia kawoo. ²⁶ Nitoa mea wipitikome ali atoa tumotoa tokoya moa agopa takatapeoo. ²⁷ Akolaliyo padeya padeya peya manake-kama lukoa memotoo wa panagome wia mekapianeya tokome nitoo. Nipa eya wa wia mekakome okome akeneya mena. Padeya padeya peya manake lukoa memotoa toko ago Akolali oneka Keraisuke lukoa meoo wa okome akeneya mena. ²⁸ Padeya padeya peya Keraisuke lukoa mekolipa nipa Keraisuka Akolalike lukoa meoo. Nipa eteya peya oneke lukoa memotoa toko ago Akolalike lukoa meoo. Akolali odene ako ago memotoa tokome nitoo.

²⁹ Akolaliyo tuane ali atoado moa kamotokameadekalepa pade-kitame tuane ali atoa luku ue motikilepa edadete tiki-pe. Nipa ue moameneya mea tuane ali atoa luku ue motikilepa edeya weike tiki-pe. ³⁰ Tuane ali atoa kamoia poamoi tadekalepa nipa Keraisunomo one moa kamotokanemo ete pia oto pia tete-pala moane oma yakilepa edeya weike tuku patu. ³¹ Ta pataka abuna ete-kitame no wia tukamele tokokaka pima yaku. Nitoanepa tone Ali Muno Yesu Keraisu patu kautakoane kakene tokounakaleke pinali anu wa kei pikilepa eya wane uku. Onekemo oane metekolu kime wedoa yakoa motokoinano, wini Korine take Keraisunole takama yakilepa pata pale toameadeku. ³² Epesase take ali wia nomotoa moa egetane laione kai-kiti-pala poi tou toane dika dika toamene tete moma yaku. Tuane ali atoado kamoia poamoi tadekalepa Keraisunole tete-pala moane takama yakilepa edeya weike tuku patuno, pa itonole tekene tadekuno, tokamota wane ou. Nipa podoliyopa tuatekoyano, opa paya nou toa mekete nee ue eya nokoa kato wane ou. ³³ Poanele tiki yene-pala opia yakilipa kini tiki poaneleme kini wene moa koigako wa kime ikina. Tuane ali atoa kamoia poamoi wa iki yene titi takoa wamene. ³⁴ Kini namolo epetane wene pianeya mea tokoina toa wa toomoa pamene. Ele kule poanele toma pikile tewitikoia wamene. Kiwi ya takadene eya wane uku. Kiwi padeka-kitame Akolali wene toamekete tiki.

Padele Tane Tigini Kakeneya

Kamoia Poatekomo

³⁵ Panagome-kiti eya wa oko patu. Akolaliyo tuane ali atoa moa kamotokakilepa edoa too-pe. Edane tigini kakeneya kamoia poi wa okale ekene ³⁶ beita, leau akene agome keneya wini

oko. Witi ku eya itono kenekedo lomua meneya pikomepa nipa kadene oyake tumiamoo. ³⁷Nika itono ludu witi ku eya matakilepa pa ku deya-kama mataki. Pine pudunukau tigrini pade matakiya mena. ³⁸Eya kuya nee lene witakomepa Akolaliyo witateka wene kibututukoa latia plane toa-kama eya kuya tigrini kakeneya witakala toko.

³⁹Ni Akolaliyo eya kuya latikomepa odenele tane tigrini-kama kakoa latianeya mena. Ali latikome ni ali tigrini kakoa ni kai ini mou eya latikome eya kuya tigrini tutu tutu wa kakoa latikala taneya. ⁴⁰A tibuke kakoya-kiti latia kakoa ni itono patu eya kuya pia kawa tokoya latia kakoa tikilepa enika eni koniyoya odenele tane tigrini-kama kakoa latianeya mena. ⁴¹Lou tokene tagoi eni koniyoya odenele tane pa toa kakoya mena. Tagoi-kitipa padekapa kikateka pukateka toa kawa wa padekapa nile toameneya pa tokoa kawa toko.

⁴²Edikoapa tuane ali atoa kamo pa. Nipa lomuatekoi tigrini kakeneya mea tuutukaneyake Akolaliyo tuamatekoi tigrini-kama kakoa kamotokakala too. ⁴³Nipa oloyo keneke paya wane-kiti pianeyake Akolaliyo koniyoya-kiti latia kamotokoo. Ni popeyo noamatekoi tigrini oloyo keneke pianeyake Akolaliyo tele takatapea kamotokoo. ⁴⁴Pa itonole toatekoi tigrini kakeneya mea tuaneyake moa kamotokakilepa Akolali-pala opia mea kawatekoi tigrini kakeneya moa kamotokoo.

Itonoke meketepa pa itonole toateko tigrini kakeneya mekono, a tibuke meketepa Akolali-pala opia meateko tigrini kakeneya mea kawoo. ⁴⁵Enilekepa Akolaline bokuke papete eya wa wia mekaneya piko. Adam namolo ago latikilepa poome mekoa wene takoa taneyake padenakago wipitikome nekene Adam einago ali

atoa a tibuke meemoa pomotateka ago latianeya. ⁴⁶Akolaliyo tone a tibuke meemoa poateko tigrinipa namolo takoa latianeya mena. Itono patu mea toateko tigrinipa namolo takoa latianeya. Wa naniko a tibuke meemoa poateko tigrini latia kakoo. ⁴⁷Namolo ago latikilepa itono kugu moa latianeya. Padenakago nikilepa a tibu kawa nekeneya. ⁴⁸Itono kugu moa latiane agome itonole toma yakene toa one yagono-mikitame itonole toma yaki. Wa padenakago a tibu mea nekene ago one yagono-mikitame one peku noa one tanele tiki. ⁴⁹Papete totopa namolo agono yagono-mikiti mekoyake naniko padena ago a tibu mea nekene agono yagono-mikiti mea kawoo.

⁵⁰Anu oya-lawe kipala eya wane ekene uku. Itonole toateko tigrini kakeneya meapa Akolaliyo pawe toa talo toko take oyake pamele toamoko. Lomuateko tigrini kakeneya meapa meemoa poateko take oyake pote mepamele toamoko. ⁵¹Akolaliyo papete wene kibutukapia kaukoa meanemo toaweane uku. Toto padeka-kiti wete tuameneyake eya too. One wipitikome toateka oi ponokale eina eina toto peya moa weneya tigrini latia kakakala too. ⁵²Nipa beta ka okaka katiapale toko toa too. Beta witika-petepa tuane ali atoa tuamatekoi tigrini kakeneya moa kamotokoo. Nititiko totoka moa weneya tigrini latia kakakala too. ⁵³Nipa namolo mamina wawa weneya moa kawou toa tone lomuateko tigrini kotokoa eni luku tuamateko tigrini kawoo. Nipa papete itono patu pa tekei meateko tigrini takoa wawapa mea kama poo. ⁵⁴Nipete Akolaliyo tuatekoi ali atoa meemoa pamene wa weneya tigrini latia kakakalepa wa tukile toamoi. Enipa Akolaline bokuke papete eya wa wia mekapiane toa taatekoa too.

Ali atoa tumotoa tokoya-pala Akolaliyo poi toa moa patukatapekoyano, ⁵⁵ *ali atoa tumotoa tokoyame toto edoa moa atukamotoa-pe. Edoa tete memotoa-pe wa wia mekaneya piko.*

⁵⁶ Kalame ali tania tukou toa tone tokoo poaneleme toto wia tukako. Tone toko poaneleme toto eni moa kautakilepa Akolaline totono litia tootapeamele toamokolo tokome ni toko. ⁵⁷ Nitikoyake Akolali-pala ke wa atoane uku-ye. Tone Ali Muno Yesu Keraisu patu kautakoa kaketepa toto tumotoa tokoya moa kawikamele tokolo tekene ni uku.

⁵⁸ Nitamele tokono, anu kolotini yene kipala i ukumo yakoa moa poapeneya kamene. Nipa Ali Munagonole wedoa takama pato wa one patu kautakoa kakete tamene. Nitiketepa onekele takakilepa pata pale tekene tadeku wa oatiki toa mena. Enipa kini wene tikimo ukuno, nitamene.

Ponopene Yu Yene Kue Tatia Metanemo

16 Yudea take Yesuno ali atoa ponopeneya meki-kiti auapea kue koukoa wetekatikimo ukuno, yakamene. Galesia ta ludu Yesuno ali atoa oboa mekika yakene tamene wane okoule kimeka tamene. ² Ko mea pupu toamiki-pete-kama eya tamene. Kini kini pupu toa motokoi kue pade Yudea take meki ponopene ali atoane takoa pikakala tamene. No wete noameneyake kini kini meatiki toa pikapikala tamene. Nitikolipa wida nokolu kue wa pitikatekoi toa mena. ³ Eni uku toa tootokaneyake nekenepa eya tou. Kime takoa moa kakakoi ali-kitane pipia witikoane metekene ekene iya kue Yerusaleme take meki-kitane aua potokoano, pipia-pala aua pote mepoatino poe wane meane wetekou. ⁴ Nitikou-pete

noka Yerusaleme take pamedekalepa eni ali-kiti nopala opia ponoi.

Poloyo Korine Yene Tamene Wa Kowitanemo

⁵ Korine take wida nikilepa Masedonia ta ludu pima yawane nou. ⁶ Nipa niti toko tokene-meneke wida meane kawouno wene pikene uku. Wa ta padeka poatekou wene nokale poadene mekolu nipa poano pa wa kime no auapea wetekamotoane tekene ni uku. ⁷ Wida pa tekei meemotekene pou wane wene piamekene tekene opi noamuku. Ali Muno agome wida none meane kawatekou ka yametekalepa nipa nani none meane kawou.

⁸ Wida noadeneke papete Pedikose wa ibini akene ta pataponomotoane Epe-sase take ita pa nepiane meku. ⁹ Nipa i take meki yene Yesuke wene tugamotoane toateku pupu Akolaliyo yametekolo tekene i take opi-mene pa meku. Pade-kiti kainya matiyame nopala poi teja mekilika tuku.

¹⁰ Timosi wida nome mekalepa one tepe kolotini kilikoa pianeya memotoa tamene. Einagome Ali Munagonole takakilepa noanume takama yaku toa tokono, wedoa makutukoa moamene. ¹¹ Padameka einago paya tetepo takameneya. Tepe kolotini kilikoa pikoa oto no mekuta wetekamene-ye. Einago Timosi anu ete oya-lawe-pala opia wakapea nomotoane nepiane mekene tekene ni uku.

¹² Opi anu oyago Apolosike ukuno, yakamene. Anu ete oyali-kiti-pala Korine take ugu poano pa wane oane kakoluka naniko pamedekalepa nipa pouno, opi oyake pamele toamoko wa waka.

Poloyo Wipitikome Akenemo

¹³ Lene kilikoa piameneya wedoa meamene. Akolalinele takakilepa one

patu poapeneya kautakoa kakete tamene. Kini kepene mama moameneya tele lukatapeneya kamene. ¹⁴Padele padele tikilepa kini oya-laweke-kama wene mekoa mekete tamene.

¹⁵Wini ago Tepanasi one mati atoa mekete tikimo kime wene tekete tiki. Kini Geriki take ete yene Yesuke wete wene tugameneyake einago one mati atoaka wete wene tugakoi. Nititikoapa Akolaline ali atoa wedoa auapekala tokoi. ¹⁶Dikanele tiki yeneke poti lukoa mea auapeamene. Nipa Akolaline ali atoanele takama piki yene peyake lukoa mea auapeamene. ¹⁷Eyago-mene Tepanasi Potunetasita Akaikasi toa no mekuta ugu note mekili tekene ke wane wediane meku. Eni yene nikilepa kiwi peya nekene tetepo tokolo uku. ¹⁸Einago-mename no wedikakilepa kiwi namolo wedikakoina toa tiki. Dikaki ali-kiti kei piyai tamene.

¹⁹Esia ta pikoka eka kukata Yesuno ali atoame kiwi wini Korine take meki-kiti

wete meamene wa iki-ye. Ni Akuwila natono Perisilatameka kini yapu keneke oboai tiki yenameka mea epetekamene wa kiwi wene taneya mekete iki. Nipa Ali Munago patu kautakoa kakete iki. ²⁰I take tone oya peyameka kiwi Korine take meki-kiti wete meamene wa iki-ye. Wida koukoa mekete-kama kini kini yono ete oto wa mokala tamene.

²¹I agalepa anume oane mema mema tuku toa panagome wia mekakoyake eya wane wipitikene ukumo no Polo noanu yoname wiane mekakuno, enamene-kutu. Kiwi peya wete meamene-ye. ²²Padago Ali Muno Keraistuke wene mekoa meamokolopa nipa Akolaliyo one wakome wamotoane uku.

Ali Muno nepa wete wakapea namene-ye. ²³Ali Muno Yesuyo kiwi pewe wimoa pomotoane kowitikakene uku-ye. ²⁴Keraisu Yesu patu kautakoane kakene kiwi peyake wene mekoane mekene uku. Wete meamene-ye.

Opa anu agale eni.

2 KORINE

Poloyo Korine Yeneke

Taku Takoa Wia Wetekane Pipia

1 Polo nopa tone oyali Timosi-pala opiane mekene i pipia wiane wetekaku-ye. Nipa Akolaliyo papete wene toopiane toane taatekakene Keraisu Yesuno Aposelo ago mekene uku. Enipa Akolaline ali atoa wini Korine take meki-kiti ni Geriki ta piko peyake Akolaliyo one wa takoa motane yene peyake i pipia wiane wetekakuno, yakamene. ²Tone etene Akolali-pala Ali Munu Yesu Keraisutame kiwi peya pewe wia tepe kolotini kilikoa pikoa tamene wane kini kowitikakene uku-ye.

Poloyo Akolali-pala Ke Wa Akenemo

³Tone Ali Munu Yesu Keraisuno Akolali one etene-pala ke wa-kama oa one kei pia tatoane uku-ye. Akolali einagome toto peya mama moa auapekala tokolo tekene ni uku. ⁴Nitiko agomepa toto ke enekakolo meko-pete-kama auapekala toko. Nipa paapa toamoko. Ke enekakolo mekolo auapekilepa nipa ete ali atoa ele kuleme ke enekakolo mekili enekete totome kiwika edikoa ela moa auapemotoa tokome ni toko. ⁵Keraisuyo papete tete mokoakakene toane noanumeke tete mokoane kakupa nipa Akolaliyo no i agopa mana Keraisu-pala lipua mekome tokome tete motoko wa padele padele akole toa no wedoa mama moa auapekala toko. ⁶Noanu ke enekakolo memotoa tikilepa Akolaliyo eya wa wene pia toko. Anu oya-lawe kime tete motiki-pete-kama noanume mama moane auapekene kiwi toa motaneya poatiki ka yamemotono wene pia toko. Nipa noanume tete-kala

motekeneka onekele poti takoane togaku toa kimeka tete moteketeka nitikala tomotoa tokome Akolaliyo no mama moa auapekala toko. ⁷Nitikono, anu oya-lawe kime nile-kama toi wane wene taneya meku. Nipa pade-kitame no tete mekala tikina toa kiwika tete mekala tikilipa nipa Akolaliyo no mama moa auapeko toa kiwika mama moa auapeko wane wene taneya mekene uku.

⁸Eya wa wene taneya meamene wane kiwi wene takadene uku. Esia ta ludu pima yakenepa tete-pala mokoane kakou matiyame tuateku tigotoko wane wene keda toologaneya pima yakou. ⁹Nipa Akolaliyo anu po-kitika tewitikademe toko wane wene plane mekou. Akolaliyo eni ke enekakale memotoa tikilepa noanume eya tomotoa tokome toka. Anu weneme padeleka toamekene one patu-kama kautakoane kamotoa tokome toka. Tuane ali atoa moa kamotokako ago Akolaliyo nitika. ¹⁰Akolali nitane ago tokome einapete no tukaya wa toa motokana toa waka tokala toatekoleno, enakale toa wa toa mokala too wane oneke wedoane wene tunganeya yawane pitiku. ¹¹Akolaliyo no edikoa auapekala tomotono, anu kowitikakala tamene. Ali atoa kainya matiyame kowitikakala tokoli yakoa tokalepa nipa no einago pewe wia kakome tokono, ke wa peya matiyame okala toi.

Poloyo Papete Toateka Wene Wia Wakenemo

¹²Pinali anu wa kei plane oatekumopa anu tepeme a wa oko toane atiki toane mekene ukuno, yakamene. Ali atoa pitikoi toane pima yakene Akolaline weneke titia tanele tikilepa anu oya-lawe kipala etene wene epetaneya meane kiyo akenele-kama tokouna. Enipa anu kaua-mikitane peku

noane tokouna mena. Akolaliyo pewe witikome yametekale toma yakouna. ¹³Nitima yakou agome i wiane wetekakumopa kime oi motekete wene toatiki toane-kama uku. Pademoka potipiane oane yotokamuku. ¹⁴Opi papete no mekene tukule kime nateya wene taneya mekiyake Ali Muno Yesu wakapea noka-pete noanume kiwi kei pikou toa kimeka no kei piamele too wa wene tootapeadete tiki.

¹⁵Kime no kei pioino etene wene tokouya tekene eya tou wane wene kibutuane mekou. Masedonia take poadene kiwi mekita wida dekoane pinou. ¹⁶Wida meemotekene Masedonia take pone meane wida wa none menou. Enipa anu oya-lawe kiwi taku takoane auapeou wane wene kibutuane mekou. Ni anu oya-lawe kimepa no Yudea take wakapeane pomotoa auapeoi waneka wene kibutuane mekou. ¹⁷Wida nou wane okounake wete noamokoupa nipa noanume mekamotokome pitakome akedeko wa kime iki patu. Nipa pa itonole toma yaki-kitame toamadeteke ile tou wa pamo ekete tiki toane noanumeka akedeko wa iki patu. ¹⁸Kime eni wene pikaya tokolo eya wane uku. Nou wane ikilepa nipa Akolaliyo niminimo-kama oko toane okou. Noamadeneke wida none menou wane wiane mekakene okouna mena. ¹⁹Akolaline mana Yesu Keraisu one ko Sailasi Timosita totome i i wa kipala oa metekoonakago einagome dikou wa ootokoapa one wene wia wawameneya one oka toa-kama toko. ²⁰Nika Akolaliyo dikou dikou wa oka toa-kama mana Yesuyo nitikou ta-la wa kabe koukoa taatekoa toko. Yesu one nitane ago tokolo tekete Akolaliyo niminimo-kama oko ago tadeko wa totome one kei piai toko. ²¹Anu oya-lawe toto Yesu patu poapeneya kautakoa kamotoa tikilepa

Akolali einagome toko. Nitimotou wa Keraisunole takamotoa toto takoa motokome eya taneya. ²²Toto-pala wipitikome epetekoa toateka adeka pikome papete one Yomini totoke moa wetekaneya. Nipa kipa one wa one adeka tone tepene piou toa taneya.

²³Akolaliyo yakakoane kipala eya wane ukuno, yakamene. Korine take wida nou wane okounake noamokoupa nipa kini padele poanele tokoike kikoane akakolu ya motokayano, noamou wane noamokou. ²⁴Enipa Akolalinele takama yaketepa ile tamene ile tamene wane tika tika toadene wamuku. Onekelepa kini weneme wedoa takama yakete tikino, eyaka toadene uku. Onekele wedia mekete takama yamotoane auapenouno, nitima yatoane uku.

2 Nipa eya tuku wane oane togotokou. Wida padepetena nekeneka kiwi kikoane akakolu tekete wene keda toologaneya mekoina. Wa taku takoane kini wene keda takakaya tokolo opi wa none meamadene waku. ²Kiwi wado wene keda takakolupa nipa anu wene teyo epetekamoo. Anu oya-lawe kime odene anu wene epetekamele toko. Padame pade mena. ³Nipa noamekene pipia pade wiane wetekakouna. Nipa no wete wida wa wakapeane noameneyake anu wene epetekatiki-kiti kime no einagono wene keda takakaya tokolo eina poanele tewitikoia wato wa kime wamotoane tekene ni wiane wetekakouna. No wediane mekolupa kiwika wedia meoi wane wene pikene tokouna. ⁴Eina pipia wiane wetekakilepa wene keda toologane mati meane tepe-pala we taneya meane tokouna. Nipa komo oane mekene wiane wetekakouna. Kiwi wene keda taneya memotoa tekene wiane wetekakouna mena. Anu oya-lawe no einagome kiwi mama moa kakome ni tadeko wa kime wene tomotoane tekene tokouna.

Korine Yename Poane Ago Ela Moatekoimo

⁵Panagome wene keda takaneleke ikilepa einagome no wene keda takaka wane wamuku. Kiwi padeka-kiti wene keda takakome toka wane ekene uku. Nipa padele tubele tane tetepo takamadene tekene einagome kiwi peya wene keda takakome toka wane ukuya mena. ⁶Opa kiwi peya matiyame einago kibu moatekoi kotuke kakoa kibu motekete tokoino, oyakeno, wa pade kibu moameamene. ⁷Opika einago wene kedame moa pagetekaneya etepea pokome pokaya tokolo one eina poanele tokake nami wiitapeane tetepo takoa mama moamene. ⁸Onekepa namolo wene mekoa mekoina toa opika pa wene mekoa meadiki wa einagome wene tomotono, nitamene wane kiwi kowitikene uku-ye. ⁹Kime tamene wane ukule-kama litia tiki patuno, toane eneku wane wene pikene kini pipia pade wiane wetekakouna. ¹⁰Padame poanele tokake po letu mekakoina kea wakolipa noanumeke enakale tou. Tamedekalepa nitou. Nitou wane einagome poanele tokake nami wiitapeane tetepo takoane mama motikilepa Keraisu leneke kakene anu oya-lawe kiwike tuku. ¹¹Setanuyo toto-kitika etepea pomotoa oa yotokakaya tokolo nitatoane uku-ye. Einago Setanuyo edikanele ele kule poanele toateko wene pianeya-kama meko wa totome wene toko.

Polo Teroase Take Kilikoa Meamenemo

¹²Keraisuonomo oneke epetekoakakene agale mo wima pou wane Teroase take ponene mekenepa Ali Munagome ena toatekou ka wete patekakaneya tadeko wane wene tokou. ¹³Nitikeneke tone oyago Taitasi eida meameadekale

enekene eni take yene wete meamene wane tewitikoane Masedonia take meponokou. Nipa Teroase take tepe kolotini kilikoa piameneya mekene tokou.

Poloyo Akolali-pala Ke Wa Akenemo

¹⁴Nitikouyake Akolaliyo toto-pala eya tokoleke ke wane uku. Tobou poyo agome keneya toto moa kawikoa Keraisu-pala lipukoa aua yako. Nipa ta piko peyake meki-kitame padeya kalono tokoya yakou toa Keraisuonomo yakamotoa tokome toko. ¹⁵One take toa motaneya poatiki-kitika etepea tuma poatiki-kitika meki toa totome Keraisuonomo oa aua yakolopa Akolaliyo ke wa okomepa Keraisu eni yene pakeke yakome kalono takama yakene tetepo takoa wedia meko. ¹⁶E yename Keraisuonomopa yateketeke kiwi tua poatiki kotimi yakane tetepo takoa kote tokolo waki. O yename ipa toto mea kakatekoyano, yakoa moato wa padeya kalono tokoya yakane tetepo takoa wedia meki. Ae, Akolalinele edikoa takakilepa teyo adekoa tamele toko-pe. ¹⁷Pade ali-kitame kue moato wa Akolaline agale pa itonoya tetepo takoa oa aua yakilepa paya wene pianeya mea tiki. No pade nitamuku. Keraisu-pala lipuaneya meaneya Akolaliyo onekele takapoano pa wa no moa wetekaka tokolo tekene one leneke kakene onekemo odene wene pianeya mekene oma yaku.

Weneya Totonoke Akenemo

3 Nimo wane ukupa nipa pinali anu wa kei pikene uku wa kime wene piki-pe. Ni no nekene okoumo yakoa moamene wa pade take meki-kitame pipia pade kiwike wini wia wetekamotoa iki-pe. Kimeka pade take meki-kitame no makutukoa momotoa tekete pipia pade eni

yeneke wia wetekadete iki-pe. Ete tikisa ali-kitame dikane pipia moa aua yawa yameamele tokoyake no pade nitamele toamoko. ²⁻³Ete ali atoame no makutukoa momotoa wia mekane pipiapa anu oya-lawe kiwi. Keraisyuo no moa wetekakale onekemo olaukanokolu kime yakoa mootokoa mekete tokoinakamoke uku. Einakamopa ete ali atoa peyame yawa oi momotoa anu tepene wia lukane tetepo taneya yaku. Nitaneya yakulu enekete einakamopa Keraisyuo wia lukaneya tadeko wa nimini pipia moa oi mou toa oi mootokoa no makutukoa mokala tiki. Mosesene totonopa padeya pa takoa poatekayame kue peteneke wia mekaneya. Nitaneyake Yesunomo kipala olaukakolu yakoa motokoinakamopa mea kama poko Akolaline Epetane Yominiyo tone tepene wia lukako.

⁴Kipala eni ukupa Akolalinele takakilepa Keraisu patu kautakoane kakene tuku wane Akolaline leneke atiki toane kakene ameke tokolo tekene uku. ⁵Akolalinele edikoane takama yakenepa padeleka anu weneme tukuya mena. Akolaliyo one peku lawetekolo nootokoane tuku. ⁶Nipa Akolaliyo one ali atoa i weneya yameteku totono olaukoa ta wa eni toatekou peku no laweteka. Weneya totono wane ukupa bokuke wia mekanemoke wamuku. Epetane Yominiyo wene takakomoke uku. Eina namolo totonopa kuele wia mekanepa padameka litia tootapeamele toamokale tokome ali atoa peya tua atuamediki wa wia mekaneya. Nitaneyake Epetane Yominiyo weneya totono wene takakilepa mea kama pomotoa tokome toko.

⁷Eina namolo totonopa Akolaliyo kue peteneke wia mekoa Mosese yametekale one pa Moseseke weamutukaneya. Ali atoame tetekakete tua atuatekoi

totono yametaneyake taneya. Eni papa takoa poatekake o Iserele yename Mosesene lene timini nepikoa piamene piti motaneya kakeneya. ⁸Opi Epetane Yominiyo toto mea kawateko totono i i wa wene takakilepa Moseseyo eina pa tootapeneya kakome tanele natele tetepo takakome padele akole eni toko. ⁹Eina namolo totonopa ali atoame lituku pekete toa tua poatekoike Akolaliyo papete yametekilepa one tibuke pa teleta tootapeneya mekome tanele nami yametaneya. Wa wipitikome ali atoame poanele toamene tetepo takoane wene keaneyameou wa mea kawatiki totono yametekomepa one telekole keleyo yameteko. ¹⁰Nipa eina namolo totono pa tootapeneya kakome yametanelepa natele tane tetepo takakome padele akole eni toko. ¹¹Eina namolo totono pa tekei platekake yametekilepa pa tootapeneya kakome taneya. Wa wipitikome pa pia kawateko totono yametekilepa ali atoa totome kei pia kawatekole akole eni toko.

¹²I weneya totonopa pa pia kawatekoya tokolo Yesunomo atiki toane oane auane yaku. ¹³Moseseyo eina namolo totono Iserele yene yametekilepa one lene timini mamina waname kauaneya kakome taneya. Nipa Iserele yename one lene timini pa takaneya takoa pokale enekaya tokale nitaneya. Totome pade nitameamedeko. ¹⁴Moseseyo eina totono edikoa yametekale Iserele yene kolotini lupi taneya mekete wedoa yakoa moameneya. Opika kiwike tama nekene Yu yename eina totono oi moteketepa kini wenepa mamina waname kauaneya meou toa wene toameneya mea oi mokala tiki. Keraisu-palado lipuaneya meketepa eina mamina wane takoa wakene tetepo takoa mea eina totono pine piko toa

wene tootapeoi. ¹⁵Nitamekete opika Mosesene totono oi motekete-kama kini wenepa mamina waname kauaneya meou toa wene toameneya mea oi mokala tiki. ¹⁶Nitima yakiyake Akolaline bokuke eya wa wia mekaneya pikono yakamene. Kini tepe kolotini Ali Munoke pekoa pikolipa kini wene moa kauane mamina wane takoa poo. ¹⁷Ali Munoo wane ukupa Epetane Yominike uku. Eni Yomini ali atoa totoke awinome mekolopa nipa eina namolo totono eyame toto moa labakanele tewitiko atiki toa yamele toko. ¹⁸Totopa tone lene timini moa kauane mamina wane takoa wakeneya meko. Nitaneya meko-kitikepa yomini pokoke pinaline yomini pome meou toa one Epetane Yomini awinoko. Awinome mekome pa teleta tootapeneya meateko peku lawetekilepa Keraisu meko kotuke-kama meemoa pomotoa lawete lawete toko.

Akolaline Kamoya Itonome Latianeya

Keneke Lobutua Piko Wa Pedia Akenemo

4 Akolaliyo no ela motokome one weneya totono piko katekamene wa yametekale tekene ke enekakale mekeneka onekele pa takama yaku. ²Nitoanepa pade-kitame paigakoa mekete ya takanele toamadene wakene pademoka oane yotokamoane onekemo koigamoane tuku. Nipa Akolaline leneke kakene onekemo ali atoame yakatiki toane t̄aweanē ikilepa peyame imopa nimini eni oko wa yakamotoane toane enekala tuku. ³Nitikuyake pade-kiti kini wenepa mamina waname kauane tetepo takoa mekete yakameneya meki. Etepea tua atuma piki ali atoake uku. ⁴Itono yopia meko ago Setanuyo dikane yene Yesunomo yakoa moamene yenane

lene likatapeneya. Akolaline peku noa tootapeko ago Keraisu einagono pa enekaya tokale ni taneya. Nipa onekemo yakoa motokaya tokale taneya. ⁵Onekemo olaukakilepa anukumo wamekene Yesu Keraisu einagopa tone Ali Munoo wane oane onekemo-kama olaukoane tuku. Nipa Yesuke tekene anu oya-lawe kinikile takama yakene uku. ⁶Akolaliyo yomiyomu keneke pa toologamene wa akene agome tone tepeka pa takaloganeya. Nipa one pa teleta tootapeneya kakome lawetane peku mana Keraisuyo noomotokome nokome tanele totome wene tomotoa tokome taneya. Nipa etene Akolali onepa dikane ago tadeko wa wene tomotoa ni taneya.

⁷Akolaliyo onekemo i i wa toto wene takakilepa one kamoya-kiti kamo itonome latiane mete keneke paya waneke moa lobutua piou toa toko. Nipa onekemo totome oa aua yakilepa one tele patu kautakoa kakete tadeki wa ali atoame wene tomotoa tokome toko. ⁸Ele kuleme ke enekakoleme no moa kautamele tomoko. Padepete-kiti toatekule agopa tokolo mekeneke anu wene moa bebo akatapeneya meamuku. ⁹Ete-kitame no tete meadete litikala tikiyake Akolaliyo pade no tewitiko wawamoko. Pade-kitame no ne wiouno nepia wa wikala tikiyake wia tukamele toamoko. ¹⁰Yesu wia tukane toa noka wia tukamotoane nepianekala meku. Nitoane tuameneya Keraisu patu kautakoane mekulu enekete etekitame ekete Keraisu einagopa tuake pa meadeko wa wene tiki. ¹¹Itonoke mekene Yesunole takama yakuke ta pataka abuna pade-kitame no wiadete tokala tikiyake onekele pa takama yaku. Enipa no tuateku agoke mea kama poko Yesuno tele patu kautakoane meadeku wa ali atoame wene tomotoane tekene

tuku. ¹²Anu oya-lawe kiwike toane tuou wane Yesunole takaku pekene toanepa nipa kiwi mea kama pomotoane tekene tuku.

¹³Akolaline bokuke panagome papete eya wa wia mekane toane eni tuku. *Akolalinemo t̄aweane ikilepa oneme no auapekala too wane ni tokou wa einagome wia mekaneya.* Nitane toanepa Akolaliyo noka auapekala too wane onekemo i i wane t̄aweane uku. ¹⁴Nipa eya waneka wene taneya mekene uku. Ali Muno Yesu Keraisu tuaneyana pikata moa kamotokane ago Akolaliyo noka moa kamotokoo. Nipa Yesu-pala lipuane mekulu tokome nitoo. Ni pade anu oya-lawe kiwika moa kamotokakome toto peya one mekata odeneya koukoa mekatapeoo. ¹⁵Ele kule tete motikilepa anu oya-lawe kiwike oyake motuku wane Keraisunomo oane pupitikama yaku. Nipa eya wane wene taneya mekene tuku. Akolaliyo kiwi pewe wia kakomo eni okono ke wa peya matiyame kouka kouka toa one kei pikala toi.

Poloyo One Motane Tetepa

Natele Tetepo Takanemo

¹⁶Eni wene taneya mekenepa wawada wane tewitikamuku. Anu tigrini idima pokoyake ta pataka abuna Akolaliyo anu wene weye akakala toko. ¹⁷Opi-mene ke enekakolo mekupa nipa Akolaliyo one tibuke pa tootapeneya meane kawateku peku noane tomotoa nodokakome toko wane wene tekene eni tetepa pa natele tetepo takoane meku. ¹⁸Nikepa itonoke pia kawa tokoya-kitike wene piitikaneya meamekenepa a tibuke opi-mene enamukuya-kitike wene piitikaneya meku. Itonoke leneme enekuya-kitipa pa tekei pia takoa poademe toko. Nitatekoyake a tibuke opi-mene

enamukuya-kitipa takoa poameneya pa pia kawademe toko.

Tone A Tibuke Meateko Yapu

5 Kipala ina ukupa eyake uku-ye. Opi-mene pa mamina yapu keneke meou toane itonoke pa tekei meku. Eni yapu keaweane mitikou toane tuane pokolupa nipa Akolaliyo a tibuke latikane yapu anu meane kawateku yapu ipa nekeno, noo wa yameoo. ²Nipa ae, a tibuke meane kawateku yapu opi pone mepadiya wane kenemade oane meku. ³A tibukepa tigrini kawameneya pa yomini meamou. Akolaliyo latikane yapu loboutou toane weneya tigrini kakeneya meane kawou. ⁴Anu i mamina yapu keneke opi-mene wene kedame tuaneyana mekene kenemade oane meku. Enipa wete tukene tuada wane ekene ukuya mena. Anu i takoane wawateku tigrini luku a tibuke pa meane kawateku tigrini moane kawadiya wane ekene ukuna. ⁵Namololo tigrini takoane wawane wa weneya tigrini kakeneya meane kamotoa toko agopa Akolali one. Nitiko agome enile toateka adeka piipikome papete one Yomini totoke awinome memotoa moa wetekaneya.

⁶Nitaneyake eya wane atiki toane yaku. Akolaliyo nitatekoyake papete anu i tigrini kakeneya pima yakene Ali Muno mekota wete pone mepamele toamokolo paka lono pa meku. ⁷Nitikenepa Akolaliyo wipitikome toatekole anu leneme enamekeneka oneme tou wa okana toa nimini tatekoa too wane oneke pa wene tugoane meku. ⁸Nipa anu tigrini takoane wawane Ali Muno-pala opiane mepadiya wane atiki toane meku. ⁹Nitoanepa itonoke pa mekeneka one mekota pone mekeneka one wene epetekamedeku wane onekele-kama takama yaku. ¹⁰Wipitia ta pataka-pete toto peya Keraisuyo koiso yopia mekota pote kapamedekolo

tekene ni uku. Enipetepa tone tigini kakeneya mekete tokole peya epetekoa tokooleka toa potokakooleka oneme nami wia topo takakala too.

Keraisuyo Ali Atoa One Etene-pala

Oya Patu Kakakome Tanemo

¹¹Ali Munoyo tone toma-kala pokooke nami wia topo takoo wane piti tokolo mekene tekene ali atoame onekemo yakoa momotoane wili toane kaku. Nopa edikakene odene wene plane tuku wa Akolaliyo wene toko. Anu oya-lawe kimeka Polo nopa dikane ago wa wene tomotoane uku. ¹²Enipa pinali anu wa kei pikene ukuna mena. Pade ali-kitame no akoa agale okoli yatekete kime i i wa no kei pimotoane tekene ni uku. E yename kini wa kei pia mate agale ikilepa kini tepene poane wene pimotoake kepeneme epeteku wa agale epeneya-kiti witoa oa kaki. ¹³Padeka-kitame no Polo leau akeneya yakene ni uku wa ikipa nipa ele kule tukulepa Akolalingle takaku wane topo takoane uku. Wa padeka-kitame no Poloyo utanele-kama tuku wa ikipa nipa enilepa ali atoa kiwike tuku wane topo takoane uku. ¹⁴Edikakilepa Keraisu totoke wedoa wene mekoa mekome tanele wene tekene ni tuku. Keraisu odene ago toto peya luku tuaneyano, Akolaliyo toto peya tuane yene tetepo takoa meko. ¹⁵Ali atoa peya luku eni tukilepa nipa itonoke mekete kinikile-kama toamekete one wene moa onekeleka takamotoa tokome taneya. Kiwi luku tukale moa kamotokane ago Keraisuke uku.

¹⁶Onepa nitane agono, opi titimoapa itono peku noai tiki-kitame tikina toa tatoane wamuku. Nipa panagono tepene meaneya tetoa enameketeke pa tokoo leneme enetekoapa i agopa dikane ago tadeko wa takoa enoa akatoane wa-

muku. Noanumeke papete edikakenepa Keraisu einagopa pa agono wene pikou. Nitikouyake opi eni wene wiane wakene eya wane uku. ¹⁷Panago Keraisu-pala lipuaneya mekopa nipa one namolo wene wia wawa weneya ago latitapeko. Nipa one namolole tewitikoia wawa wenele toma yako. ¹⁸Ali atoa toto weneya yene latikilepa Akolali onemekama tokoya. Papete toto peyame one-pala poi teia mekoloka poi wiane pitikouno, e yeneke tuano pa wa Keraisu moa wetekaneya. Nitaneyake ete ali atoaka one-pala wene odene pia lipunomotoa tokome tone eni takakanakamo kime oa aua pupitikakapoati wa toto moa kakaka. ¹⁹Einakamopa Keraisu nome tuaneleke Akolaliyo ali atoa ta piko peyake one-pala wene odene pia lipunomotoa tokome kini poanele toma pokoi ke po letu mekakana kea wakenemo kekutu. Nipa einakamo oa aua pupitikakapoatino poe wa toto takoa moa kakaka.

²⁰Nitikano, tone Keraisuno agale patu kautakoa kama yako. Nitima yaketepa Akolaliyo kiwi kowitou toa kowitikete one-pala poi teigoa watoe-ye wa kiwi kowitiko. Enipa Keraisunole takakete ni oko-ye. ²¹Keraisu einagopa poanele padeleka toamene agoke Akolaliyo tone toko poanele kabe koukoa moa oneke awitikaneya. Nipa toto luku poanele tane ago tetepo takaneya. Akolaliyo edikakomepa kipa one yagono yene latitapeneya memotoane tukuno, Keraisu-pala lipua meamene wa totopa poanele toamene yene tetepo takaneya.

6 Akolalingle takakilepa one-pala odeneke tekete toko. Nitikete tekete kipala eya wa kowitoa oko-ye. Akolaliyo kiwi pewe witikome toa motikilepa pata pale takayano, one eni tanemo wedoa yakoa moamene-ye. ²Akolaliyo one eni toatekamo papete oa plane toane ukuno yakamene.

Kiwi pewe wiatekou-petepa kini kow-itikoimo yakoane tou. Kiwi toane moatekou-petepa auapeane tou wa Akolaliyo akeneya.

Eina oa plane toa taatekoa toateko-petepa opino nepio wane uku-ye.

Poloyo Tete Mokala Tanemo

³Padele poanele tokouke-kiti ete-kitame Keraisunomo yakoa moamokaya tokale Akolalinele wedoane takama yaku. ⁴Nipa no i agopa Akolalinele takama yaku ago tadeko wa ete-kitame wene tomotoane tekene eya toma yaku. Ke enekakolo mekeneka tete mokoane kakeneka wene keda taneya mekeneka onekele ele kule poti takoane togakala tuku. ⁵Padepete-kiti pade-kitame no layo toua wia ni po yapuka moa pitikoa ni no i ago wiato wa ali atoa oa kamotokoa enika enile tokala tiki. Nitikala tomotoaneke onekele pa takama yakene padepete-kiti ko meamoane ni atu pamele toameneya meane ni noateku nee toamokolo pa pima yaku. ⁶Nitima yakeneka poane wene piamoane ni Keraisunomo wene tootapeane ni utanele-kama toane ni epene wene-kama plane tuku. Ni Epetane Yomini nome awinaneya meane ni ali atoake wene mekoane tagatapeane tuku. ⁷Nitoanepa niminimo-kama toaweane oane Akolaline tele patu kautakoane kawane tuku. Ni Akolaliyo no poanele toamene ago tetepo takakome olaukanele eni tikilepa nimini yoname lama pikoane kawane ewa yoname kotokoto pikoane kawane tou toane tuku. ⁸Nitoane kaku agopa pade-kitame no kei pia wa pade-kitame no paya tetepo takoa wakala tiki. Ni padeka-kitame no i agopa poanele toko ago wa akoa agale oa wa pade-kitame no i agopa epetane ago wa oa tiki. Nopa niminimo-kama

oane auane yaku agoke pade-kitame no kapene ago tetepo takoa wakala tiki. ⁹Nopa ibini akene ago menake anu toma yakumo ta piko peyake oa pupitikaneya. Pade-kitame no i agopa tuateku ago tadeko wa wakiyake no tuameneya mekene uku. Ni pade-kitame no i ago wiato wa layo toua witikiyake oyake wia tukamele toamokolo wakala tiki. ¹⁰Wene keda taneya mekeneke wedianeya-kama meku. Nipa ponopene ago mekeneke ali atoa peya mati kamo takou toanepa Akolaline peku naku toa kiwika noatino toe wane lawetekala tuku. No padeya deyaka toamokolo mekeneke Akolalineya-kama moateku ago i mekene uku-ye.

¹¹Ae, wini Korine take meki-kiti kipala ina ukupa anu tepene meaneya-kama eni yawane ootapeku. Kiwike wene mekoane mekene ni uku. ¹²Noanu kiwike wene mekoane memotoake anu oya-lawe kiwi pade nooke wene mekoa meamekete tiki. ¹³Kipala eya wane ikilepa anu mati-kiti tetepo takakene ni uku. Noanu kiwike wene mekoane meku toa topo takoa nooke wedoa wene mekoa meamene.

Poloyo Pubu Akenemo

¹⁴Akolalinemo yakoa moameneya meki-kiti-pala lipua meameamene. Wene kiyo akeneya meki-kiti poanele-kama tiki-kiti-pala edoa lipua memotoa-pe. Pa-pala yomiyomuta edoa odeneka matutukamotoa-pe. ¹⁵Keraisu-pala Setanuta edoa odene wene pianeya memotoa-pe. Yesunomo yakoa motane ago-pala onekemo yakoa moamademe wakene agota edoa odene wene pianeya memotoa-pe. ¹⁶Akolaline wikakane yapu kenekepa iponole edoa tomotoa-pe. Enipa totopa mea kama poko ago Akolaline wikakane yapuno, iponole edoa tato-pe. Nikepa Akolaliyo eya wa akeneyano, yakamene.

Anu wane takoane motokouna yatenepa anu yapu tetepo takoane kiwi pakeke none menou. Nika noanupa kini Akolali wane oane kipa anu yatene wane oane tou wa Akolaliyo akeneya.

¹⁷Nitaneyake Ali Munu Akolaliyo eya waka akeneya.

Ete-kitame poanele-kama toma yakile tewitiko wa wamene. Dikane ali atoame poanele tikina toa toameamene. Eya kuya poaneya peya titi toa wamene. Nitikolipa kiwi makutikoane mou.

¹⁸Nipa noanupa kiniketai wane oane kipa anu mana kono-mikiti wane oane tou wa ali atoa peya telekole-kama toa talo toko ago Ali Munoyo akeneya.

7 Anu kolotini yene Akolaliyo kiwi auapekene dikou wa oa pianeya tokolo tekete tone tigrini weneta moa koiga koiga tokoya-kiti takoa watoane uku. Nitoapa oneke nate wene pianeya mekete wene kiyi akeneya meateko kotuke kakoa wili toa meato.

Poloyo Wedia Mekome Akenemo

²Nopa kini tepene moa mekou toa nooke wene mekoa meamene-ye. Noanumepa kiwi odene ago-palaka toane potokakouna mena. Ni odene agono wene moane koigoane odene agoneya yotokoane moane toamokou.

³Kipala ina ukupa kiwi kikoane akakuna mena. Kipala namolo okouna toane wa lokoane uku. Nopa kiwike wedoane wene mekoane mekuno, itonoke pa meamedekolupa nipa kipala odeneka meou wane meou. Tuamedekolupa nipa kipala odeneka tuou wane tuadene meou. ⁴Kiwike wene mataneya mekene kiwi ko mate ou toane okala tuku. Nipa ele kule ke enekakolo mekeneka tepe kolotini kilikoa pimotoane wedianeya-kama meku.

⁵Masedonia take pone mepokeneka tepe mataketikoa meamele toameneya meku pekene toane eya kuya keda enamutukala tokou. Nipa pade-kitame nopala neno oa kakoli ae, Yesunomo olaukakouna yename Yesunole takoake wakaya wanepa tepe we tokale mekou.

⁶Nitoane mekouyake wene keda taneya meki-kiti mama moa auapeko ago Akolaliyo no mama moa auapekome no mekouta Taitasi moa wetekaneya.

⁷Nitikale nokale enekene wene epetaneya meane ni kiwi ko okamo yatekene wediane kawane tokou. Taitasi einago eni nokomepa kime one wene epetekakoinakamo i i wa oa eya ko-pala oa toka. Kime no enadiya wa wene pianeya mea ni no-pala poanele tokoinake elame tuaneya mea ni no mama moa tokoi ko oka. Nimo okale yatekene anu namolo wedikoane mekouna toane moane patukoane wedoane wediane kakou.

⁸Papete anu pipiame kini wene keda takaneya tadekale wiane wetekamikinakeya wane wene pikounake opi pade eni wene piamuku.

⁹Nopa opi wediane mekene uku. Anu pipiame kini wene keda takaneyake ukuna mena. Kini wene keda takaneya mekete tekete kini namolo poane wene tewitikoa wakete tokoinake uku. Kini wene keda takakilepa Akolaline wene plane toa taneyano, anu eina pipiame kipala toa potokaneya mena.

¹⁰Akolaliyo ali atoa wene keda taneya memotoa tikilepa nipa kiwi toane mou wa tone poane wene wia wamotoa tokome toko. Nitikono, one eni tokole kote motuku wa edoa wene piato-pe. Itono peku noai tiki-kiti wene keda taneya meketepa nipa kini poane wene tewitikoa wawamekete tua atua pokala tiki. ¹¹Kime anu eina pipia moa oi mootokoapa Akolaline wene motekete wene keda taneya mekete eya tokoi.

Onekele wedoa takama yawa ni kiwi pakeke ya tanele tokagome toka toa kime pade nitamokoo wa pinali kini wa kei pia ni poane agome tokake Akolaliyo kiwika kibu moamedeko wa pitime tuaneyaya mea tokoi. Nitoapa no Polo kiwi mekita nomotadiya wa wene pianeya mea ni onepa edoa meko patu wa no mama motaneyaya mea ni eina ya tanele tokago kibu moato wa one kibu moatekoi oi pedoa pia tokoi. Widikakilepa kime poanele tadiki wane akoane oatekouleka toamokoi. ¹²Kini eina pipia wiane wetekakilepa nipa eina ya tanele tane agoka oneme ya takane agoka auapeou wane wene plane tokouna mena. Kime widikanele tikilepa no Poloke wedoa wene mekakete tadeko wa kime wene tomotoane tekene ni tokouna. Akolaline wene motekete tadeko wa tomotoane tokouna. ¹³Kini wini tekete tikimo yatekouya tekene wene epetaneya mekene uku.

Nika Taitasi einago no mekouta wedianeya noka matiyame anu wene epetekatapeneya mekene uku. Kiwi peyame one wedoa auapekete one tepe kolotini kilikoa pikakete tadiki. ¹⁴Papete Taitase-pala kiwi kei pikene mate agale ou toane i i wane okouna toa kotuke kakoa epeteko wini tekete tadikino, einapa pamo wamekene tadeku. Kipala niminimo-kama oane mekala tokouna. Taitasi-pala i i wane kiwi kei pikilepa einakamoka nimini eina ekene tokou. ¹⁵Taitasi einago wida nokale one wene pokaya piti motokakete one okamo yakoa tato wa kime wedoa makutukoa motokoi. Nitikoina wene kibusukoa mekomepa kiwike wene mekoa tagatapeko. ¹⁶Ni tamele tadeko wane wedianeya-kama mekene uku.

Kinikiya Moke Tamene Wa Poloyo

Korine Ali Atoa Mane Mane Oa Olaukanemo

8Anu oya-lawe, Akolaliyo one yene Masedonia take meki-kiti pewe-kala witikome tokomo ukuno yakamene. ²Eni yene ele kule ke enekakale meketeka wedoa wedikete eya tokoi. Etene ponopene ali atoameke kinikiya moke toa meato wa ete yene tatia metekilepa keda takoa mekala tokoi. ³Nipa kini pikoya-kiti dedeya pimotoa ako-kama metekilepa kini weneme tokoi. ⁴Nitikete Akolaline yene Yudea take meki-kitipa kime auapeoono ta wa no wedoa yakoa kowitoai tokoi. ⁵Eni yename kuedo meoo wa ekete okoino wene pikouyake eya toatekoilekeka akedekoi. Kue eyaka meadeteke namolo takoa Akolali nekele takoo wa pinali-kiti kiwika kini Akolalike metekete metekoi. Nititikoapa Akolaline wene motekete no Polo neka auapeoo wa oa tokoi. ⁶Nitikalipa eya tokou. Taitasi einagome papete ponopene Yu yene auapeademe anu Korine yene kinike kue eya wida koukoa moa togameneyake pake teigoa poka. Opa kime titikete epeteko metekoinakale wipitimotoane tekene Taitasi nepa Korine take papete titipikanakale peya takatapeano pa wane kowitikou. ⁷Kime ele kule tikilepa wedoa-kama tekete tiki. Nipa Keraisuke wene tugoa mea one agale muno pewe kakoa oa onekemo yakoa moa onekele takoa nooke wene mekoa mea enika enile wedoa-kama tekete tiki. Nitima pikina toapa ponopene Yu ali atoa mama motekete meatikiya keda takoa memotoane uku-ye.

⁸Ina ukulepa kime toe wane tika tika toamuku. Masedonia yename kinikiya moke toa epeteko metekimo kipala

oane metekenepa eni yename tikina toapa Korine yene kini weneme toamiki patu, kini weneme tiki patu wane wene plane mekene ni uku. ⁹Tone Ali Muno Yesu Keraisuyo ali atoa pewe witikome tanemo ukuno, yakamene. One uu kamo agomeke kiwi auapeademe ponopene ago latia nekeneya. Ponopene ago latia nome mekome kiwika kamo takou toa etenane peku lawetaneya. Enipa kini wene tikimo uku.

¹⁰Yena malike ponopene Yu yene auapeato wa kime titikete tadekoinakaleke eya wane ukuno, yakamene. Yu yene auapekilepa ete yename naniko auapemotoa Korine yene kime namolo takoa auapeato wa wene pia titia tadekoinano, ¹¹opi toa pegetetapeamene. Papete eni toatekoileke wene piitikaneya meadekoinano, opi eina papete wene piadekoina toa wedoa toa pegetetapeamene. Kini kue eya meatiki kotuke kakoa keda takoa meamene-ye.

¹²Panagome-kiti onekeya-kiti pade moke toane meou wa wedia mekome one meatekoya pa dedeya pikale tokome tubeya meamokalepa Akolaliyopa einagoneya tubeya toamoko wa wene tokome wene keaneya meoo.

¹³Kiwika ponopeneya meatino, kinikiya ete yene meetapeamene wane wamuku. Kiwika ete yeneka odene kotu kakoa meati wane ekene uku. ¹⁴Opipa Yu yene pa mekili tekete kinikiya moke toa meamele toko. Wa nanikopa kiwi padeya-kiti toameneya wida pa mekolipa nipa eni Yu yenamepa kinikiya oyake pikale tekete ete wa meamele too. ¹⁵Edikanelekepa Akolaline bokuke agale dikoa pianeyano, yakamene.

One noateka nee tubeya motoka agomepa one eni motokapa pupitini kawameneya meka. Wa

panagome-kiti pa dedeya motoka agopa kobu toamokale meka wa panagome wia mekaneya.

Taitasi One Oyagotame Tanemo

¹⁶Kiwi mama motekene auapeou wane wene plane-kama meku. Akolaliyopa Taitasi no-pala wene odene kotu kakamotoa tokolo onemeka kiwi auapeada wa wene pia mekono, Akolali-pala ke wane uku. ¹⁷Kiwi wida mekita Taitasi ne poo-pe wane yatekolu nitouno ta wa oka. Nipa kiwi enadiya wa wene tokoa kakeneya tokome one weneme wida noo. ¹⁸Taitasi wida moane wetekakilepa tone oyago pade one-pala opia nomotoane moane wetekaku. Einagome Keraisuno ali atoa koukoai tikika onekemo oa aua yakome tokoleke peyame one kei piai tiki. ¹⁹Nika einagopa Keraisuno eni ali atoame moa kakakete ekete no Poloyo ponopene Yu yene kue tatia meademe Yerusaleme take aua potokakale i agoka pomotono tatoe wa einago nooke oto wetekakoi. Eni kue totome moa aua potokakilepa nipa ponopeneya meki-kiti mama motekete ni aua potokaki wa peyame Ali Muno kei pimotoa tekete ni toko.

²⁰Keraisuno ali atoame keda takoa metekoiyapa kime tatia potokakoi wa pade-kitame toto akoa agale akaya tokale egele moke toameneya tatikatapeoo. ²¹Nipa Akolaliyo enekono, kiyoke-kama tato wa ali atoane lene yoto kakete too.

²²Taitasi-pala tone oyagota Korine take wida moane wetekakenepa panagoka kita-pala opia pomotoane moane wetekaku. Einagome Akolalilinele ele kule takakilepa wedoa-kama tadeko. Ni ago kiwike wene mataneya mekome tokome oneka wida nou wa wedia meko. ²³Taitasi einagopa no-pala oya patu pikagome kiwi pakeke Akolalilinele

takoa mekanakagoke uku. One-pala wida opia niki alitapa Keraisuno ali atoa kini koukoai tikika mekete takoa moa kakane alita. Einagotame tikilekapa ete-kitame Keraisu kei pikala tiki. ²⁴Einago-mene wida nokoli wedoa makutukoa moamene. Nipa kimeneke wene mekoa mekete ni tadiki wa einago-mename wene tomotono nitamene. Nitikolipa Keraisuno ali atoame e ku take mekete yatekete ekete ee nimini Korine yene ete yeneke etene wene mekoa meadiki wa oa ni Korine yene kiwi kei pikoumopa nimini akedeko wa oa toi.

Keraisuno Ali Atoa Auapea Toatekomo

9 Akolaline yene Yudea take ponopeneya meki-kiti auapea kue eya koukoa toatikile kiwi olaukateku toa mena. ²Kime enile toadete niko niko toa kakoino wene tokouya tekene Masedonia yene-pala eya wane okou. Tone Geriki take meki oya-lawe kime eni toatekoile yena malike titikete tokoi wane mate agale ou toane kiwi kei pikou. Nimo yatekete tekete Masedonia yene peya matiyame kimeka tou wa tokoi. ³Nipa wini Geriki take meki-kiti kime ponopene Yu yenane kue koukoa pikadete tiki wane kiwi kei pikoumopa pata pamo neme akedeko wa padame nopala akaya tokolo eya tuku. Geriki yename kue koukoa pikamotono poe wane tone eni oyali-mene wida moane wetekaku. ⁴Kiwi wini mekita Masedonia yene no-pala opia nekete enekoli Geriki yene kime eni kue wete koukoa pikameadokolipa nipa Geriki yene kiwi kei pata pamo akedeku wane yaame tuou. Korine yene kiwika yaame tui. ⁵Nitikaya tokolo anu i oyali-mene kiwike wini moane wetekaku. Nipa Geriki yene kinikiya keda takoa koukoa pikapioo wa papete oa lutukoina toa toa

pegetetapemotono, kiwi namolo takoa poe wane wini moane wetekaku-ye. Nipa kue memotoane tika tika tukuya mena. Pa kini weneme keda takoa memotoane tekene ni tuku.

⁶Eya wene taneya meamene. Ipe pinagome-kiti one ipe ludu nee lene natetekoa matakopa nipa wipitikome one ipe kakoya nee natetekoa noa meoo. Wa panagome-kiti one ipe ludu nee lene wedoa matakopa nipa wipitikome one ipe kakoya nee tubeya noa meoo. ⁷Nipa kinikiyapa iya meou wa kini wene toopikala tokoina toa metekilepa eya tamene. Panagome tika tika tokolo tuku wa meamoa ni koteme tukuyake tuku wa meamoa tamene. Wedia mekete tamene. Wedia meteko agopa Akolaline kolotini ago eni. ⁸Akolaliyo kiwi pewe witikome eya kuya ako-kama meamele toko. Nita-mele tokono, ta pataka abuna kini mamina nee enika eniya ako-kama motekete tekete padeya-kiti moke toa ponopene yene auapea meamele toko. ⁹Enikepa Akolaline bokuke eya wa wia mekaneya pikono, yakamene.

Onekeya-kiti moke toa ponopene yene keda takoa mekala toko. One kiyo akenele pa pia kawademe toko wa panagome wia mekaneya.

¹⁰Akolaliyo ipe pinago nee lene matatekoya mea ni tone noateko nee mea tokome eyaka too. Ku tuou toa kinikiya ako-kama moke toa epeteko mema pomotoa tokome kini metekoina luku pupitini kakoa mekala too. ¹¹Nipa kinikiya eya kuya moke toa keda takoa mekala tomotoa tokome kamo takou toa one eni toatekoi peku lawetekala too. Nitikalepa toto Aposelo ali-kitame kinikiya moa ponopene ali atoa mekoika aua potokoa metekolo tekete kainya matiyame Akolali-pala ke wa oi. ¹²Kinikiya edikoa moke toa meteketepa nipa Akolaline ali atoa padeya-kiti toameneya pa mekoli auapekala

toi. Nika ali atoa peya matiyame Akolali-pala ke wa omotoa toi. ¹³Edikakolipa kime auapekoi-kitame eya wa oa toi. Kime Keraisunomo yakoane motokou wa ikilepa nimini akedik. Onekeleka wedoa takama yakino, kinikiya keda takoa moke toa metekilepa kiwi Yerusaleme take ponopeneya meko-kiti ete yeneka mama motekete ni tadiki wa Akolali kei pikala toi. ¹⁴Eya waka oa toi. Akolaliyo kiwi pewe wia tagatapeneya mekete ni tadiki wa kiwike-kama wene piitikaneya mekete kini kowitikama poi. ¹⁵Akolaliyo toto auapekome Keraisu moa wetekaneyano, totome ke wa ikilepa edemo wamoo.

Polo Pinali One Wa Kei Pianemo

10 No Poloyo kime eya tamene wane kowitikilepa Keraisuyo poti ko akene wene pianeya mekome ou toane mekene uku. Nipa kiwi kakakoane pa taba ago mekene ukuyake wa padeka pone mekene kiwike pademo pademo wiane wetekakilepa telekago tetepo takoane tuku wa iki agome uku. ²Pa itono peku noai tuku wa no paya tetepo takakete iki-kiti mekita wida none mekene wedoane kikoane akou. Kipalaka edikoane kikoane akamouno, wini yename no paya tetepo takakete waki toa toameamene wane kiwi kowitoane uku-ye. ³Polo nopa itonoke meku agomeke pa itono peku noai tiki-kitame poi tekete tiki toane toamuku. ⁴Itono peku noai tiki-kitame poyo tue eya pikoa kawa poi topikiyake anume pade nitamekene Akolaline tele patu kautakoane kaku. Nitoanepa Setanuyo yopia meko taapa pawe kago keaweane tadekakatapeku. ⁵Nitikenepa eni yename ali atoa Akolaline peku noamomotono tato wa kini wene kikutua iki agaleme ka ketekakili kilikatapeku. Nipa ali atoame

Keraisunole takama yakete oneke-kama wene piitikaneya memotoane tuku. ⁶Panagome Keraisunole odeneleka kote moa katekoa takameadekalepa kibu mou. Nitadeneke anu oya-lawe kime Keraisunole takatiki kotuke kakoa takamotoane nepiane meku.

⁷Kiwi padeka-kitame no paya tetepo takakilepa anu tepene meaneya tetoa enameketeki tiki. E yename kipa Keraisuno yene kako wa wene piketepa nipa no Poloka one yatene ago kaku waka wene piamediki. ⁸Ali Munoyopa one yapu wikakou toane kiwi auapemotoa tokome no moa kakaka. Nipa poane yapu keaweane mitikoane wawou toane kiwi kibu momotoa taneya mena. Nopa dikane ago wane mate agale ou toane okala tekeneka nimini uku. Nimo wanepa edekolo amene ya momotoa-pe. ⁹Kini pipia-mene wiane wetekakilepa no einagome kiwi piti takademe ni toko wa wene pimotoane tokala toamuku. ¹⁰Kiwi padeka-kitame nooke eya wa iki. No einagome kini pipia witikilepa agale kou takoa telekomo-kama oa tokoyake kiwi mekota nome mekome pa taba agome keneya pamo okala toko wa iki. ¹¹Nimo iki-kiti kipa nipa eya wene toatino, yakamene. No padeka mekene dikou dikou wane ukuna toanepa kiwi mekoita wini nekeneka odenemo-kama ouno, nepio.

¹²Kiwi padeka-kiti kini wa kei pia mekino, no pa keku ago anume tuku toa e yene kimeka toati wane kini yagono ago tetepo takoane mate agale amene ya motaneya mekene uku. Kini tokoole ele kule teyo adekoa toko patu wa adeka-nali yotuku pekete toapa pale tekete tiki. ¹³Noanume pade nitamuku. Akolaliyo no toatekoule i i wa yametikilepa Korine yene auapeamene wa eni pupu kikilikoa yameteka. Pinali anu wa kei pianepiane ikilepa Akolaliyo

yameteka toane tukuleke odene anu wa kei piamele toko. ¹⁴Akolaliyo eni oyameteka toanepa ete ali-kiti naniko nomotoane kiwi wini mekoita no namolo takoane Keraisunomo oane auane nokouna. Nitikouna tekene enilekepa mate agale ekene ile tokouna wane amele tokolo uku. ¹⁵⁻¹⁶Nipa pade ali-kiti namolo takoa pekete tanele anume titiane tane tetepo takoane mate agale wamuku. Mate agale wamekene eya wane uku. Kime Keraisunole namolo takama yakete tokoinakale moa patukoa wedoa takama yakolipa Akolaliyo padeka eko-mene yametekale onekemo eida-kitika oane auane pou. Nipa panagome Keraisunomo wete opane take pekene onekele takakene dikakou dikakou wane mate agale wamou. ¹⁷*Mate agale ikilepa nipa Akolaliyo tokoleke-kama mate agale amene* wa Akolaline bokuke wia mekaneya piko. Eni wia mekaneya toa tatoane uku-ye. ¹⁸Panagome ile tuku wa pinali one wa kei pia okopa nipa Akolaliyo einagopa ibini akene ago tetepo takakoya mena. Ali Munoyo kei piko agopa ibini akene ago eni.

Kapene Aposelo Ali-kitike Pubu Akenemo

11 Opi leau akene agome keneya kipala eya-mene oatekumo poti yakakoa meamene wane uku. O'o, kimepa ae no Polo dikane agoke mama moa yakato wa kini weneme yakoino, yakamene wane wamuku. ²Akolali kiwike wene mekoa mea mama motokome toko toane tekene eya wane uku. Etename-kiti one kono ali odene agoke poateko wene toopikome pade ali-palaka koua piamea wa yopia meko toane kiwi Keraisu odeneke poatino pade alike eko poameo wane kipa anu kono tetepo takoane yopiane mekene uku. ³Papete namolo atoa Ipiyopa

kayame oa yotokakale yatekome tane toa kimeka nitikaya tokolo uku. Nipa Keraisuke-kama wene piitikaneya mea onekele wedoa takama yakiyake panago nome poane peku lawetekolo noa etepea pokaya tokolo ni uku. ⁴Ae, dikane ali-kiti kiwi wida mekika nekete Yesunomo i i wa olaukakilepa noanume olaukakouna toa olaukamikiyake wete yakoa mokala tekete tiki. Ni Epetane Yomininemo ni Akolaliyo kiwi toa motokome tanemo i i wa olaukakilepa kiwi olaukakouna toa olaukamikiyake ee nimini iki wa wete yakoa mokala tekete tiki. Nipa monekemo eni yakoa moa ni mone Yomini kiwike awitaneya mea tekete tiki. ⁵Ekee, enika enimo olaukaki ali-kitipa ibini akene Aposelo ali-kiti tetepo takoa olaukakiyake no moa patukamele toamokono wene pikene uku. ⁶Nopa agale muno pewe kakoane amele toamokoyake Yesunomo wene tootapeneya mekene uku. Onekemopa emo kumota keleyo olaukakala tokouna.

⁷Yesunomo Akolaliyo kiwi toa motokome tanemo kiwi oane metekilepa kue oiane moamekene pa tokouna. Nipa kipa ibini akene yene memo-toane tekene noanupa paya ago latiane mekene tokouna. Enilepa poanele tokotu patu. ⁸Kiwi pakeke Yesunomo oane mema yakouka Yesuno yatene ete ta-kitike mekete anu kue moa wetekakala tokoi. Kiwi auapeadene eni yananeke kue motokolupa pade-kitame eni kue kode motokouyano wene pikoi. ⁹Ni pade kiwi pakeke mekene anu kue eya toamokaleka kinikiya manoe wane oikouna mena. Nitamokounake anu moatekouya peya Masedonia take yename aua notokakala tokoi. Nipa Korine yene kime no Polo kue eya edoa moa meteko patu wa wene keda taneya mekaya tokolo opika nanikoka kinike padeyaka oiane moa-

muku. ¹⁰ Keraisuno nimini peku naku agome ukuno yakamene. Geriki ta ludu pima yakene eya wane mate agale oma yaku-ye. Yesunomo Korine yene kipala oane metekeneka kinike kue dedeyaka moametekakala tokou wane oma yaku-ye. Padameka enimo wamea wa amele toamoko. ¹¹ Nimo ikilepa kiwike wene mekameneya mekene ni ukutu-pe. E'e mena. Kiwike wene mekoane mekuno Akolaliyo wene toko.

¹² Yesunomo oane metekilepa kue eya oiane moameneya pa oane meteku toane pa enakale tou. Nipa ibini akene wa tetepo takoa iki Aposelo ali-kitamepa Yesunomo oa metekete kue-pala oia moma pikiyake noanume tuku toa kimeka toko wa mate agale wamomo-toane tou. ¹³ Edikaki ali-kitipa kapene Aposelo ali-kiti. Keraisuno Aposelo ali-kiti nekete oko wa ikilepa kiwi oa yotokaketeke iki. ¹⁴⁻¹⁵ Wini yene kini lukoa meki ago Setanuyo tokona toa tekete tiki. Enipa tamele tadiki. Setanu einagopa pa tootapeane edelo ago tetepo takoa meamele toko. Eina toa wini yename Setanunole takakilepa Akolalinele takane tetepo takoa tekete tiki. Eni namipa kini wia enatikiyano.

Poloyo Tete Moko Kakenemo

¹⁶ Eya wane lokoane uku. No Polo leau akeneya mekene ni uku wa wene piameamene. Nopa leau akene ago wado wene piketepa nipa kipala i mate agale oatekumo deya pa yakakoa meamene. ¹⁷ Kipala i mate agale ou toane oatekumopa Ali Munoyo amene wa oka toane wamuku. Pa leau akene ago tetepo takoane mekene imopa amelepa tokono oada wane uku. ¹⁸ Kiwi pakeke meki ali kainya mati kini itonole toma yakike kini wa kei pikala tikino, noka mate agale oada. ¹⁹ Kipa wene meane yene meko wa wene piketeke wene meamene yename ikimo yakamene kote tokolo

waku wa wamekete pa yakakala tekete tiki. ²⁰ Widikoa mekili padali-kitame kinikile-kama takoe wa tika tika toa ni kinikiya tolopi toa moa ni kiwi paya tetepo takoa ni kini kabunu kugutukoa wia tikilika pa poitali-kiti mekete kini ikimo yakoa mokala tekete tiki. ²¹ Ae, no pa taba ago tekene kipala enika enile tamene ya moane mekene toamokouna.

Nitamokounake wini yene dika dika wa kini wa kei pia mate agale okolipa pinali anu wa kei plane mate agale ikilepa odenemo-kama ou. Nipa wene meamene agome keneya eya wane ou. ²²⁻²³ Kipa Iberu ali-kiti wa oa kipa Iserere yatene pitiko wa oa Eberameke tama noko wa oa tiki. Noanupa Iberu ago meku. Noanupa Iserere yatene ago pitiku. Noanupa Eberameke tagene ago. Kipa Keraisunole takama yako waka ikiyake leau akene agome eya wane uku. Onekelepa kimepa natele takama pomotoane noanume wedoane takama yaku. Nipa wini yene moane patukoane eya tete moma yakou. Po yapu moa pitikaneya pa pikala toane po wapime wia teigala taneya yawane ni lugutukoane tuadene pikala tokou. ²⁴ Ko kakoa-peta Yu yename no moa po wapime wia teigala tokoi. Nipa eina-pete-kama padeka tuku melepu (39) kakoa-peta wiai tokoi. ²⁵ Tebolo-peta layome wikala taneya pikala tokou. Wa padepete padeka yename no ne wiou wa kue katekamo pitikakala tokoi. Ni tebolo-peta kusa ue ludu ue dipike meane pokolu ue dipi paka puku pokome toa ueme nakakake petoane pokala tokou. Wa padepete edikane-pete ta lia patoa toamotoane kusa ue ludu yonoto plane kawane tukouyake petoane pokou. ²⁶ Nipa ele kule ke enekakale pima yakolu yotane ueme dekoa aua pome ni kode ali poi pia mekoika patukoane pone ni no yatene Yu ali-kitameka pa

yatene ali-kitameka no ne wiouno nepia wa padele padele toa potokakala tokoi. Enipa ali atoame ta latia pitikika tayo lonoka kusa ue mukeka ni oya patu piato wa no oa yotokakoi yene pakekeka tuatekoule tonokaka-kama pima yakou. ²⁷ Padele padele toatekoule nami kakale ko meameneya pima yakou. Padepete-kiti atu piamele toamokale noatekou nee ueka toamokale pa pima yakou. Padepete-kiti nee noameneya pupu toane kawane ni kawatekou maminaka platekoutaka toamokale nitime tuaneya pima yakou. ²⁸ Nika Yesuno ali atoa ta piko peyake mekika edoa meki patu wa ta pataka abuna kiwike wene pitikaneya mekene tepe kolotini kilikoa piameneya pima yaku. ²⁹ Panago-kiti tele meameneya pa taba ago mekopa nipa dikakago mama motekene noka taba ago tetepo takoane meku. Wa panagome-kiti panagopa etepea pomotoa likoa enekopa nipa einago likoa eneko ago-pala wene poaneya meku.

³⁰ Anu wa kei plane mate agaledo ikilepa eya wane ou. Nopa taba agono, ele kule ke enekakolo mekilepa Keraisuno tele patu-kama kautakoane meku. ³¹ Ali Muno Yesu Keraisuno etene ali atoame kei-kama piatiki Akolaliyopa noanume nimo ikilepa kapene agale wamukuno wene toko. ³² Nipa taba ago mekolu tanemo i ukuno, yakamene. Damasikase take mekolu ako tobou ago Aretasi oneke loko ta yopiko agome no dekoa moademe eya taneya. One poyo ali pade-mene takoa moa eni ta ketepo noke no einago ponoono, nepia kaponoe wa moa wetekaneya. ³³ Nitadekale yatekete anu oya-laweme no ne noo wa eni ta unukatapeane pawe kago tobou waneke ate lewia aua ponote kakete no tube ka keneke uutukoa po kakoa keti akolono poti tukaketikakoli itonoke yaatekoane pitoane ponokou.

Poloyo Pulete Enanemo

12 Ae, kipala mate agale ou toane pinali anu wa kei plane ikilepa pamo akene tetepo takakene ukuyake Ali Munoyo no pulete pitikouta yametekala tokamo eya wane amedekuno, yakamene. ² Akolaliyo Yesu-pala lipuane meku ago no moa keku tibu tiginita takuta patukatapea tebolo takaka tibuke one mekota dekoa moa aua pome eida kamotokapoka. Enipa pa pulete pitikouta enekou patu, nimini moa kamotokapoka patu. Akolaliyo wene tokoyake no pade wene toamuku. Nititikaneyake mali ali leme (14) kakoa ponaneyake opi einakamo toaweane uku. ³⁻⁴ Enimopa wa lokoane uku. No einagopa Akolaliyo eina Paradise wa ibini akene tibuke dekoa moa aua poka. Enipa pulete pitikouta enekou patu. A tibuke pone kapokou patu. Akolaliyo wene tokoyake no pade wene toamuku. Einata emo kumota yakakoane mekouyake pa alime keamatekomo tokolo tekene anu lukoane yamedeku. ⁵ Nopala eni tokamoke mate agale ou toane amelepa tokoyake pinali anu wa kei piamou. Nitamatekuyake no taba ago ke enekakolo mekene tukuleke mate agale oada. ⁶ Mate agaledo ekene pa niminimo ekene tekene leau akene agome keneya ekene toamouno, ete-kitame no kei ako pikaya tokolo tekene mate agale wamadene waku. Ete-kitame no kei pikilepa nipa anume tukule leneme enoa anume ukumo kaleme yakoa tokoinakaleke odene no kei pimotoane uku.

⁷ Akolaliyopa ako tibuke ele kule tubele-kama yametekale tekene pinali anu wa kei wedoane pikaya tokale eya toka. Setanuno edelo ago pade no einagono tigini toa potokaneya mem-otono, tete metekapa wa yametaneya.

⁸Nitaneyake ae, einakeya takoa wamotoane uku wane tebolo-peta Akolali kowitikala tokouyake ⁹eya wa oka. Onekele takateko kotuke kakoa takamotoanepa ne taba ago takoane tele lukoane pewe wima puku wa oka. Nimo okano, Keraisuno tele noke awinomo-toane tekene nipa nopa taba agomeke nekele edikoane takou wane mate agale ou toane wediane mekene uku. ¹⁰Nipa Keraisunole takama yakulu tekete etekitame no ya takoa tete mea tiki. Ke enekakolo meane piti tanele enoane tukuyake kilikoane mekene uku. Nipa no taba agomeke Keraisuno tele patu kautakoane kakene tekene telekago tetepo taneya mekene uku.

Poloyo Korine Yene Mama Motokome Akenemo

¹¹Inapa pinali anu wa kei plane ikilepa leau akene agome keneya tokou. Kimeka no kei piamele taneyake toameadekili tekene ni tokou. No pa agomeke kiwi pakeke kapene wakoa meki ali-kiti etene moane patukamele tokolo mekene uku. Kime wini yenepa ibini akene Aposelo ali-kiti tetepo takakiyake uku. ¹²Kiwi pakeke wida mekenepa no i agopa Akolaliyo moa wetekaneya tadeko wa ka oa wene tomotoane tekene etene Aposelo ali-kitame tikina toane tubele-kama toma yakouna. ¹³Kiwi pakeke edikoane mekenepa edele katekoane toamokotu-pe. Eya odene katekoane toamokouna. Yesuno ali atoa ete ta-kitike mekoika kinike padeya-kiti oiane motokouyake Korine yene kinike padeyaka oiane moamokouna. Beita einapa kipa paya tetepo takakene tadekuno, ela toko wane edoane omotoa-pe.

¹⁴Opi wida tebolo takoane ugu noadene meku. Wida none mekene kini kue nee eya oikilepa toamou. Kini kue

eyake wene piitikaneya meamekene kiwike wene piitikaneya mekene ni uku. Mati deyame etene nineta kue nee eya moke toa meamoko. Etene nine-tame kini mati deya-kiti nee eya moke toa meamediki. ¹⁵Ae, kiwi auapeadene anukuya peya tatiane meetapeou. Kiwike toane tuamedekolupa nipa tuou. Kiwike dikoane wene wedoane mekoane tomotoake nooke wene nateya mekoa meki patu.

¹⁶Nipa no Polo kiwi pakeke Keraisunole takama yakene kinike kue eya keleyo oiane motane tetepo toameneyake kinikiya tolopi toane motekene tokou wa nopala wene pianeya mekete no akoa iki patu. ¹⁷Kiwi tewitikoane padeka pone mepokenepa kinikiya-kiti motokapomotoane tekene panago kiwike wini moane wetekakou wa kime no akoa iki patu. ¹⁸Taitasi einago Korine take wida poano pa wane kowitoane wetekakilepa padenakago one-pala opia nokagoka moane wetekoane tokouno, einago Taitasi wida nokome kinikiya tolopi toa motoka patu. E'e mena. Einago tota odene weneta piitiko mekete odenele-kama toma yako. Enipa nimini ukutu-pe.

¹⁹Kime koiso yakoa memotoane kakene ou toane pinali anu wa kei pikene ni uku wa koto wene pianeya meki patu. No pade nitamekene Akolaline leneke kakene ikilepa Keraisu-pala lipuane kakene uku. Enipa anu kolotini yene kime Keraisunole wedoa takamotoane tekene auapeou wane mama motekene uku. ²⁰Wida nekene enekolu kiwi mekete toatekoi toa mekete toameadekoli enekaya wane ni uku. Kipala wene poaneya noatekouke no nomotoa wedianeya nepia mekete tadeko wa kime akaya tokolo tekene ni uku. Kini kini ete oto wa neno oa wene poaneya mea bu wa

kotimi taneya mea pili pili toa akoa agale oa kotu kotu toa kawa ete yene paya tetepo takoa agale oa kamotokoa enika enile toonali yotokayano wene pikene uku. ²¹Wida wa none mekolu kini tokoileke kiwi kakakoa Akolaliyo no ya takakayano wene piku. Kiwi padeka-kitame kini namolole toma yakoina tekete eko atoa moa ni motane atoa eko alike pote ni pamoka mea enika eni poanele pa toma yakete tiki. Ae, enika eni poane wene wia wawameadekole enekene tumai keneya meou.

Wipitikome Pubu Oa Lionate Oa Tanemo

13 Wida wa ugu nikilepa tebolo takoa-peta tou. Akolaline bokuke wia mekapiane toapa *ali takuta tebolome-kiti panagome poanele tokale enekoinakamo i i wa odenemo-kama akoa okolipa oyake yakoa moamele too*. ²Papete wida taku takoane ugu nekenepa kiwi padeka-kitame poanele tokoi-kiti ni kiwi peya kikilikoane pubu okounano, opi ta padeka mekene eya wane lokoane ukuno yakamene. Wida wa nekene poanele tokoi peya kibu mouno, nepio wane uku. ³No Polo Keraisuno agale patu kautakoa kakome oko patuno, one nokome tokale enato wa nepia mekili tekene eya waneka uku. Keraisu einagome kiwi pakeke taba tokole toamokome telekole-kama witakamotoa toko. ⁴Ete yename one yomo lekaneyake wia dekakoli pa taba ago keneya eni tuaneyake opi Akolaline tele patu kautakoa-kala kako. Noanuka one keneya taba ago meku. One-pala lipuane ago pa taba agomeke kinikile takadene one-pala opiane Akolaline tele patu kautakoane kawane meou.

⁵Kime Keraisunole takama yako patu wa kini tepene piko wene tetoa enekala tamene. Einago Keraisu

Yesu kipala lipua meko wa wene toamiki-pe. Lipuane mekome-li. Enido wene toameadekalepa nipa onekele pata pale takama yakete tokoi. ⁶Wida nekene tokoule eneketepa no i agome Keraisunole pata pale takamokono, kipa kibu moamele toko wa oino wene piku-ye. ⁷Ni pade Akolali kini kowitikakilepa poanele odeneleka toamomoto no ta wane tuku. Nitikuno, telekole toane kibu moatekoule toamekete kiyo akenele toma pekedekolipa epetoo. No i ago Keraisuno agale patu kautakoa kakono, poanele tiki-kiti kibu moamele toko wa kimeddo wene toamekete no paya tetepo takoake epetanele tadekolipa nipa epetoo. ⁸Akolaliyo nimini peku lawetekale noa toma pekedekolipa nipa enile toma poameo wane ka edoane ketekamotoa-pe. Ka ina ina waneka yamema pamedeku. ⁹Kime Keraisunole wedoa takama pikilipa nipa telekole toane kibu moateku toa mena. Enipa wene epetaneya mekene uku. Kime Keraisunole takama poatiki kotuke kakoa takama pomotono ta wane kini kowitikakene uku-ye. ¹⁰Akolaliyo one yapu wikakou toane kiwi auapemotoa tokome no moa kakaka. Nipa poane yapu keaweane mitikoane wawou toane kiwi kibu momotoa taneya mena. No dikane agome kini poanele tokoileke kibu moamou wanepa nipa papete i take mekene pubu oane i pipia wiane wini wetekaku-ye.

¹¹Anu oya-lawe, i pipia wiane peya takakenepa eya wane uku. Keraisunole takama poatiki kotuke kakoa toadete wili toma pamene. Kipala i kowitoane ukumo yakoa tamene. Odene wene-kama pianeya meamene. Tepe kolotini kawia pianeya meamene. Edikoa mekolipa Akolali totoke wene mekoa mea tone tepe kolotini kilikoa pikoa toko ago kipala opia mea kawoo.

¹²Yesunomo yakoa motane-kiti enekoita yono mano wa kini yono mokala tamene.

¹³I take Akolaliyo one wa takoa motane yene peyame kiwi wete kamene wa kiwi lionate iki.

¹⁴Kiwi peyane eya wane kowitikakene uku-ye. Ali Muno Yesu Keraisuyo pewe-

kama wia ni Akolali kiwike wene mekoa mea ni Epetane Yomini kiwike awinome mekome odene wene pikoa tomotoane uku.

Opa anu agale eni.

GALESIA

Poloyo Galesia Yeneke Wia Wetekane Pipia

1¹⁻²No Poloyoka nopala odeneka meki oya-lawemeka Keraisuno ali atoa wini Galesia ta ludu meki-kiti ki-wike i pipia wini wia wetekako-ye. I agale oane wetekakilepa pa ali-kitane agale patu kautakoane kakene ukuna mena. No Aposelo ago takoa moa kakakilepa pade ali-kitane taneya mena. Eya agotame Yesu Keraisu ni one tuaneya pikale moa kamotokane ago Akolalitame tokoi.

³Toneketai Akolali-pala Ali Muno Yesu Keraisutame kiwi pewe wia tepe kolotini kilikoa pikoa tomoane kini kowitikakene uku-ye.

⁴Keraisu einagomepa ipete poanele toomoa piki-kiti etepea pomotoa wakome anu oya-lawe toto toa moademe tone poanele tokooke nome tuaneya. Nipa toneketai Akolaliyo wene toopiane toa taatekoa taneya. ⁵Nitaneyano, Akolali kei pia-kala katoane uku-ye. Ee nimini.

⁶Ae, Yesunomopa wida pene yakoa mootokoake pade olaukanemo etepea yakoa litikete tiki. Nipa Akolaliyo kiwi eni yene pewe wia oto toa motakapoano pa wa Keraisu moa wetekaneyake onekemo tewitikoak wakete tiki. Nitikili tekene wene kainya mati pianeya mekene uku. ⁷Pade olaukanemo wane ukumopa Keraisunomo mena. Pade-kitame kini wene moa bebo akakete tiki. Nipa onekemo moa koigoapa pademo pamo olaukadete wili toa kakete tiki. ⁸Yesunomo kipala namolo olaukakounakamopa panagome moa koigoa olaukakalepa nipa Akolaliyo einago wakome wamotoane uku. Noanumea a tibu

kawa noko edelo alimeka onekemo moa koigoa olaukadekolopa Akolaliyo wakome wamotoane uku. ⁹Kipala ina namolo okouna toane wa lokoane uku. Keraisunomo kime namolo yakoa motokoinakamopa panagome moa koigoa olaukakalepa Akolaliyo einago wakome wamotoane uku-ye. ¹⁰No Poloyo eni ukupa nipa Akolaliyoka ali atoameka no kei pimotoane tekene ni uku wa wene piki-pe. Ali atoamedo no kei pimotoane enoane tekene tou tokapa nipa Keraisunole kapene wakoane takou toka.

Polo Aposelo Ago Takoa Moa Kakanemo

¹¹Anu oya-lawe kipala i ukumo yakamene. Yesunomo oane auane yakumopa alime wene kibututukoa mea t̄awea akenemo mena. ¹²Nika panagome oa metekale yakoane motokoumo mena. Panagome-kiti imo yakoa moa ta wa no olaukakoya mena. Kipala i ukumopa edikanemo menake Yesu Keraisuyo i i wa no-pala t̄awea oka.

¹³Ete Yu yename Akolalinele takama piki toane noanumea wedoane takama pokoumo kime yatekoimo wa wene takadene ukuno, yakamene. Papete einakale tekene Yesunomo yakoa motane ali atoa ela moameneya kiwi wiouno nepio wane wiane atukadene wili toane kakou. ¹⁴Ni toto Yu yatenanele takakenepa anu yagono-mikiti peya mati moane patukoane anu kaua-mikitane peku-kama nootokoane wedoane toomoane pokou.

¹⁵No nitatekou ago agauayo pene opiameneyake Akolaliyo one wa takoa mootokoa no pewe witikome kayo oa motokagome eya wa oa toka. ¹⁶One managono peku noa tamene wa no kayo oa moa kakaka. Nipa

onekemo mone pa yatene pitiki toane mo wima-kala pomotoa tokome ni toka. Nitikalepa Yesunomo wete yakoa motane ago mekata-kiti poamoane ¹⁷ni Akolaliyo namolo takoa moa kakane Aposelo ali-kiti Yerusaleme take koukou mekoitaka poamoane tokou. Nitameneya Arebia take wete pone mepokou. Eidapa Yesuyo onekemo i i wa no olaukatapeka. Wa naniko Arebia ta tewitikoane Damasikase take wakapeane pone mepokou. ¹⁸Nitoanepa tebolo takaka malike Pita mekota ugu pone mepou wane wene pikou toane Yerusaleme take pone Made takutake one-pala eida opiane mekou. ¹⁹Einata einapete eya ago Yesuno wamene ago Yameka enekouyake ete Aposelo ali-kiti enamokou.

²⁰Kipala i oane wiane mekakene ukumopa niminimo-kama uku. Akolaliyo yakakoa kamotoane kapene wakamuku wane uku-ye.

²¹Yerusaleme take meemotekene Siria Silisia tata ludu pima yakou. ²²Eina-petepa Yesuno ali atoa Yudea take pitikoi-kiti anu lene timini wete enam-eneya meketepa ²³ete-kitame no ko okoimo odene yakakala taneya. Nipa no einagome Yesuno ali atoa kiwi tete meemoa yakoyake opi Yesunomo oa aua yako wa ete-kitame no ko okoimo yakakala taneya. ²⁴Nitoa yakatekoapa anu eni tokouleke Akolali kei pia kakanya.

Ete Aposelo Ali-kitame

Polo Makutukoa Motanemo

2 Wa mali ali leme (14) kakoa ponetekaneyake Banabasi-pala opiane Yerusaleme take wa wakapeane pone mepokou. Taitasi einagoka pato wane moane auane pokou. ²Nipa Akolaliyo no wene takakale tekene

eya toadene pokou. Yesuno yatene ibini akene ali-kitame yakamotoane Yesunomo mone pa yatene-kiti mekika oane auane yakene ukumo toaweane oadene pokou. Nitoanepa Yesunole wete takakouleka enipete takakouleka pata pale takaya tokale eni ali-kiti-pala paka witimoane pone mekene i i wane toaweane ootapekou. ³Nitikolu ekete nipa nemepa Keraiunole wedoa takama yake tadekono, i ago Taitasi mone Geriki agoke Mosesene totono piko toa kepena teigateko toa mena wa one makutukoa motokoi. ⁴Nipa Yu yatenane totono litia tokoi ali pade-kitame Yesunomo yakoa motane tetepo takoa eya tokolika makutukoa motokoi. O yename Taitasine kepena teigamotoa toa enadete toto pakeke lede note menokoi. Ni pade Yesuno ali-kiti totome kini totono tewitikoala Yesunole atiki toa takakete tokoole enadete tokoi. Nipa kini tanele-kama litia tomotoa kini totonoke moa labakadete tokoi. ⁵Nitikolipa Yesunomo Galesia yene kiwi olaukakounakamo moa koigakaya tokale o Yu yename okoimo pademoka yakamokou.

⁶Nitikene ibini akene tetepo tane Aposelo ali-kiti pakeke mekeneke pa atiki toane mekou. Toto takoa enateko agopa Akolali odene tokale tekene atiki toane mekou. Nitoanepa kiwi pa yatene ali atoa Yesunomo oane metekouna toane e yene-pala i i wane toaweane okolu yatekete no neme onekemo pademo katekoa wameadeko wa wameneya eya wa okoi. ⁷Akolaliyopa toto Yu yatene pitiko toa Keraiunomo oa aua yamotoa takoa Pita moa kakaka. Einakale tokome Polo neme onekemo e ku pa yatene pitikoi toa oa aua yamotoa takoa moa kakaneya tadeko wa okoi. ⁸Keraiunomopa Pita neme Yu yatene pitiki toa oa aua yawano ta wa takoa moa tele lukaka ago Akolaliyo no Polo

neme e ku pa yatene pitiki toa oa aua yawano ta wa no takoa moa tele lukaka tokale ni okoi. ⁹Nitikete Yame Pitata Yone toa tobou meane tetepo tane ali-mename ekete ee nimini okono, Polo neme winile tomotoa pewe witikilepa Akolaliyo tadeko wa ootokoa kakete eya tokoi. Banabasi tota kini yagono agota latikete tone yono motekete ekete nipa ete Aposelo ali-kiti kime Yu yatene pitiki toa Yesunole takama poono, Banabasi kitame e ku pa yatene pitiki toa onekele takama poatino poe wa okoi. ¹⁰Nimo ootokoa kakete ekete eya odene wene kayapeameneya toatino toe. I take ponopeneya meki-kiti mama moa auapema pamene wa okoi. Einapa tou wane wene pianeya-kama mekouyake okoi.

Poloyo Adioke Take Pita Kikoa Akanemo

¹¹⁻¹²Wa naniko Pita toto mekoota Adioke take nome mekome eya toka. Yameyo moa wetekane Yu yene wete noameneyake mone pa yatene ali atoane yapu pome nee nopokala toka. Wa naniko eni Yu yene note mekoli einapete titimoa pa yatene ali atoa mekoika pamene kote tokale waka. Eni Yu yename eya wa okoiya. Pa yatene alime Yesunomo yakoa mootokoa kini wa kepeno teigamotoa toamokolipa titi toa wamene wa okoiya. Pitayo kini eina paya wene litiane tetepo takakome kepeno teigamene ali-kiti-pala mekome nee namene piti tokale waka. Nitikalepa one ponoke kakene ekene widikoapa toa potokako wane kikoane akakou. ¹³One eni paya wene pia toka toapa one Yu yatene oyali-kitame eni pene nokoi Yu yene piti motekete tekete kini okoile litikala tokoi. Nitikoli enekome Banabaseyoka etepea litia toka. ¹⁴Nittoa Yesunomo one niminimo pine piko toa litia toameadekoli enekene e yenane

lene yoto kakene Pita-pala eya wane okou. Pita nepa Yu agomeke o Yu yene wete noameneyake pa yatene ago tetepo takoa mekanano, pa yatene alikitame toto Yu yenane totono edoa litia tomotoa-pe. Litia toatiki toa mena wane okou.

Yu yeneka Pa Yeneka Yesuke Wene Tugakilekepa

Akolaliyo Toa Motokomo

¹⁵Nimo ootokoane Pita-pala eya waneka okou. I ago Pita totapa Iserеле yatene agota. Mone pa yatene agota mena. ¹⁶Nitane agotame eya wa wene toko. Akolaliyo one ali atoapa poanele toamene yene tetepo takoa wene keaneyamekilepa Mosesene totono litia tootapekileke tokoya mena. Enipa pa Yesuke wene tugakileke toko. Totameka Yu yatenane totono litia tootapeamele toamokoyake Keraisu Yesuke wene tugoameko. Akolaliyo totapa poanele toamene agota tetepo takamotoa tekete ni toko. Ni edoa-mo. Mosesene totono litiki yene Akolaline leneke poanele toameneya meane tetepo taneya meamele toamoko. ¹⁷Akolaliyo totopa poanele toamene yene tetepo takoa wene keaneyamemootoa toa enekete Yesuke wene tugoameketeka e ku pa yatename poanele tikina toa totomeka poanele tadekolopa nipa totome poanele pa tomotoa Keraisuyo enoa wako-pe. Enoa wawamoo-li. ¹⁸Namolo yapu keaweane waou toane tekene no Yu yatenane totono ete pimotoane wakou. Nitikouyake enimene wa moane awitikakoane wiou toane tekene eni totonodo wa litiane tootapeane enekenepa nipa ae nopa Akolaline totono tetekaku ago tadeko wane ou. ¹⁹Yu yatenane totono litiane tuku pekene toanepa ae tootapeamele toamokono, nopa tuateku ago tadeko

wane litiane toaneke wakou. Nipa Akolali patu kautakoane mema pou wane nitikou. Opi Keraisu-pala yomo lekaneyake odeneke wia dekane tetepo taneya meku. ²⁰Nitikuno, itonoke pa mekuyake Keraisu nopala lipua meko. Nipa itonoke pa mekeneka nooke wene mekoa mekome tuademe nekene agoke wene tugoane meku. ²¹Edikakenepa Akolaliyo no pewe wia talo toko ka tewitikoane wakuya mena. Panagome-kiti Akolaliyo one poanele toamene ago tetepo takamotoa tokome Mosesene totono litia tootapeamele too tokapa nipa Keraisu totoke tukilepa pata pale too toka.

Mosesene Totonome Moa Lauaney Meamekete

Keraisu Wene Tugoa Meatekomo

3Ae, wini Galesia take wene meameneya meki-kiti kini wene teyo moa bebo akaneya-pe. Yesu totoke yomo lekaneyake tuanemo wedoane toaweane okolu yatekilepa one eni tukale kini leneme enoa mou toa yakoa motokoinake opi yakane tetepo toameneya mekete tiki. ²Nitikete tikino, eyado yakouno amene. Akolaliyo one Epetane Yomini kiwike moa wetekakilepa Mosesene totono litia tootapekoinake taneya-pe. Yesunomo kipala toaweane okounakamo yakoa motokoinake taneya-pe. ³Yesu einagonole titia takakilepa Epetane Yomini patu kautakoa kakete tokoinano, opi onekele takoa togadetepa kini weneme touno wene pia tikiti-pe. ⁴Ae, ele kuleme ke enekakale meketeka Yesunole poti takama yakilepa pa pata pale tokoti-pe. ⁵Akolaliyo one Epetane Yomini kiwike wetekatekoa kiwi pakeke padele padele tubele witakakala tikilepa nipa Mosesene totono litia tootapekoinake

toko-pe. E'e mena. Yesunomo kipala toaweane okounakamo yakoa motokoinake ni toko.

⁶Nipa Akolaliyo Eberame-pala-kiti tanemo wene kikutua meamene. *Akolaliyo ne auapekene ile tou wa okalepa nimini taatekoa toademe oko wa Eberame oneke wene tugo meaneya. Nitikale tokome Akolaliyo Eberame poanele toamene ago tetepo takaneya.*

⁷Nitaneyano, eya wene toa wane uku. Akolaliyopa one oka toa-kama taatekoa too wa oneke wene tugoa meki-kiti Yu yeneka pa yeneka Eberamene mana kono-mikiti tetepo takoa meko. ⁸Akolaliyopa e ku pa yatene oneke wene tugo mekoike poanele toamene yene tetepo takoa pewe wiatekamo i i wa Eberame-pala papete oa pikome okome e ku yatene ta piko peyake pitikoi toane pewe wiane kawou. *Nipa ne nooke wene tugoa mekoleke nitou wa Eberame-pala akeneya. One bokuke papete wia mekapienemo eni uku-ye.* ⁹One oka toa-kama nimini taatekoa too wa Eberame Akolalike wene tugoa meane toa meki-kitipa Akolaliyo Eberame-pala kikilikoa pewe witikome poanele toamene yene tetepo takoa meko.

¹⁰Akolaline wene kekadene Mosesene totono litiane tootapeou wa wene pianeya meki-kitipa Akolaliyo wawa kibu moademe tokolo uku. One bokuke eya wa wia mekanemoke ni uku. *Panagome-kiti Mosesene totono litia tokomeke odeneleka katekoa toamokolopa Akolaliyo wawa kibu moademe toko wa panagome wia mekaneya.* ¹¹Mosesene totonome moa lauane ago odeneke Akolaline leneke poanele toamene tetepo taneya kamele toamokolo uku. Akolaline bokuke eya wa wia mekanemoke ni uku. *Akolaliyo poanele toamene tetepo takaneya meki-kiti oneke wene tugoa mekete tekete ni mea kama*

piki. ¹²Mosesene totonomede moa lauaneya kaketepa nipa Keraisuke wene tugoā meatiki toa mena wane uku. *Moseseyo tamene wa akenele-kama litia tokagopa one eni totono patu mea kamedeko* wa Akolaline bokuke wia mekaneya pikolo tekene ni uku.

¹³Totome eni totono litia tootapeamokolo tokome Akolaliyo kipa poane yene wa wao tokake Keraisuyo oto toa motaneya. Nipa etename oneka poane ago tetepo takakome wamotoa tokome toto luku tuaneyā. Eni tuatekalekepa Akolaline bokuke eya wa wia mekaneya piko. *Yomo lekaneyake tuko agopa Akolaliyo poanele tane tetepo takoa wakene ago eni wa wia mekaneya piko.* ¹⁴Keraisu Yesu edikoa tukilepa Akolaliyo Eberame nepala titiane tokouna toane tekene pa yatene ali atoaka ta piko peyake pitikoika pewe wiou wa okana toa taatekamotoa tokome tuaneyā. Nipa oneke wene tugoā mekolo tokome etename Epetane Yomini totoke wetekateka wene toopikana toa taatekamotoa ni taneya.

Mosesene Totonokeka Ni Akolaliyo Eberame

Yatene Auapeou Wa Oa Pianemokeka Akenemo

¹⁵Anu oya-lawe kipala ina ukuna pine piko toane wene takadene eya adeka pikene ukuno yakamene. Ali takutamekiti dikoa auapenali yato wa oa togotokoimo wia mekakolipa padekagome pademoka katekamele toamoa wa eni pake pademoka lukoa wia mekamele toamoa toko. ¹⁶⁻¹⁷Eya wane ekene uku. Akolaliyo Eberame-pala ne yatene auapekene dikou wa oa plane toa adini moameneya pa pia kako. Nitikono, ege kadukaka mali pogi kakoapeta (430) ponaneyake Moseseyo yametane tonome eina oa plane agale pademoka

katekoa wamele toamoko. Akolaliyopa dikou dikou wa one yono timinike pitikou toa oa pikome Eberamepalaka oneke tawatekago-palaka akeneya. Nipa Eberameke tawateka ago wa panagome Akolaline bokuke wia mekakilepa Eberameke tawatekoi yene peyake wamokome odene ago Keraisuke akeneya. ¹⁸Akolaliyo toto toa motikilepa Mosesene totono litia tootapekooleke too tokapa nipa Eberame-pala dikou wa papete oa pikana toa taatekoa tokome ni toa motoko wa totome oatekoole piamoo toka. Nitoo tokake Akolaliyo toto one mana kono-mikiti latikoa toa motikilepa Eberame pa pewe witikome dikou wa one-pala papete oa pikana toa taatekakome ni toka.

¹⁹Moseseyo one totono yametekilepa edekale taneya-pe. Papete poanele-kitipa i i wa Iserere yename wene tomotoa tokome ni yametaneyā. Ni pade Akolaliyo mone pa yeneka toane motikilepa neeke tawatekago kitake tou wa Eberame-pala kikilikoa akene ago Keraisu nokaleka papete pa tekei litia tomotoa yametaneyā. Eina totonopa Moseseyo one yatenane pikoa katekamotono, one kakata akapoatino poe wa Akolaliyo one edelo ali-kiti moa wetekaneya. ²⁰Papete Akolaliyo Eberame-pala i i wa e ku pa yatene ali atoaka toa moateka totono yametekomepa panago neme yametekeano pa wa takoa moa wetekaneya mena. Nitameneya Akolali oneme pome yamepaneya.

Papete Ali Atoa Etepea Pokaya Tokale

Mosesene Totonome Moa Kolago Tanemo

²¹Moseseyo naniko yametane tonome Eberame-pala papete akene agale moa kautako wane ekene ukutu-pe. E'e mena. Akolaliyopa ali

atoame totono pade litia tootapekoike meemoa pamene wa poanele toamene yene tetepo takoa toa moamele too tokapa nipa eni totono litia tane yene takoa toa moo toka. ²²Nitoo tokake itonoke meki peya poaneleme moa labaneya meki wa panagome Akolaline bokuke wia mekakomepa eya wa okome akeneya. Meemoa pikilepa odene agoka one weneme tamele toamoko. Tamele toamokoyake Akolaliyo Eberame-pala papete oa plane toa tekete ali atoa Yesu Keraisuke wene tugoa meketepa meemoa pamele toko.

²³Papete tone wene tugoa meateko ago wete taatekoa noameneyake Akolaliyo toto etepea pokaya tokale eya taneya. Mosesene totonome moa kolago taneya memotoa yopimoa nekeneya. Keraisuke wene tugoa meatekoi ka nani yameou wa taneya. ²⁴Nipa padane matikiti moa egetekane agome tou toa tokome papete Mosesene totonome i i wa toto Keraisuke poatekoo ka yamema nekeneya. Nipa Keraisu nokalepa oneke wene tugakolo Akolaliyo totopa poanele toamene yene tetepo takamotoa tokome nitaneya. ²⁵Opi Yesuke wene tugoa meateko oipa nekedekono, Mosesene totonome Keraisuke poateko ka i wa yameateko toa mena.

²⁶Nipa kiwi peya Keraisu Yesuke wene tugoa mekili tokome Akolaliyo one mana kono-mikiti latikako. ²⁷Keraisu-pala lipua mea ue motokoi-kiti kiwi peya weneya mamina moa kawou toa Keraisu keneya meki. ²⁸Nitaneya meki-kiti kiwi peyapa Akolaliyo midi pikoa mekome Yu yeneka Geriki yeneka ta pine yeneka ta pine yename moa egetane yeneka ali yateneka atoa yateneka takoa enamokome odene yatene tetepo takoa yopiko. Keraisu-pala lipua mekili tokome ni toko. ²⁹Nipa Keraisuno yatene ali atoa mekili tokome Akolaliyo kiwi peyapa Eberameke tagene yene

tetepo takoa meko. Nitoapa onekeya-kiti ne meou wa Eberame-pala papete oa pikana toa taatekoa tokome kiwika meademe toko.

Papete Egetiniya Meake

Opi Akolaline Mati-kiti Mekomo

4 Eya wane ekene okou. Etename-kiti onekeya peya mana agome mootapemotoane uku wa kadimo oa mea tukoyake papete matikepa wetini yename egetinago tetepo takoa yopiki. ²Nipa etename i ago wetinago kakale one moatekoya peya meetapeamene wa metane oi wete noameneyakepa papete wetini yename eni matika one moatekoyaka etename okana toa tekete yopikoa kaki. ³Eina toa totoka papete Keraisu wete noameneyake mati keneya mekete itono peku noa tokoi yeneke lukoa mekoo. ⁴Wa naniko one metane oi noka-pete Akolaliyo mana Keraisu atoane tepene mea nomotoa moa wetekaneya. Poano pa wa moa wetekakale nome mekome Yu yenane totonoke lukoa meaneya. ⁵Nipa totoka papete Yu yenane totonome moa lauaneya meko-kiti oto toa moademe tuaneya. Akolaline mana kono-mikiti latikademe ni taneya.

⁶Kiwika one mana kono-mikiti meko wa wene tomoapa Akolaliyo manane Yomini kini tepene lobutuano pa wa totoke moa wetekaneya. Nipa Atai Atai wa kayo okala toko Yomini eni wetekaneya. ⁷Nitaneyano, kipa one mana kono-mikiti meki. Pa egetini mati-kiti keneya meamiki. Nipa Akolaliyo kipa one mana kono-mikiti moa latikakilepa onekeya-kiti kiwi meou wa toko.

Poloyo Galesia Yene Mama Motokome Akenemo

⁸Papete kime Akolali wene toameneya mekete paya gode-kitipa

Akolali tetepo takoa eniya-kitike egetiniya keneya lukoa mekoi. ⁹Opi pade nitameneya Akolali wene taneya meki. O'o, Akolaliyo kiwi wene taneya meko wane ikinakeya. Ae, nitaneya meki yename kini namolole tewitikoa wakoinake opi wa tekete tiki. Eni paya-kitike egetini mati keneya wa lukoa meadete iki patu. ¹⁰Nitoo kini namolo losu tanele tekete i ta pataka-pete ile tato, i tokeneke ile tato, i malike ile tato wa toge kia lodo yoa enika enile etepea tuku pekete tiki. ¹¹Ae, kiwi pakeke Yesunole takama yakounake ipe yolo enadene keneya einapa pata pale tekene tadeku wane wene pikene uku.

¹²Anu oya-lawe kime Yesunomo yakoa momotoane tekene Yu yatenane totonoke lukooane meaneke waatekoane kiwi pa yene mekoina toane mekounano, opi anu tukule-mene tamene. Kime no-pala padele poanele tokoina mena. ¹³Namolona wida none mekene Yesunomo toaweane ikilepa no yene tokale tekene pade-mene meane toaweane okouna. Enipa nimini ukutu-pe. ¹⁴No yene taneya mekolu eneketepa ae ni edato patu wa no kote moa paya tetepo takamokoi. Nitamekete eyaka tokoi. Akolaline edelo ago nekene tetepo takoa makutukoa motikilepa no Keraisu Yesu tetepo takoa tokoi. ¹⁵Ae, kiwi namolo kolotine mekoinake opi edikoa meamekete tikino, edekolo tikiti-pe. Namolona anu wene epetekadetepa kini lene toa moa meamele too tokapa kini leneka no meoi tokake opipa pade wene pianeya mekete tiki. ¹⁶Niminimo oane metekulu tekete nopa kipala poi teiane ago tetepo takoa waki-pe.

¹⁷Einapa no oa ketekakoina yename kiwi oya kakoa enekilepa pale toatiki wene pianeya meketeke tekete tiki. Nipa no ete pilia wawa kinikile wedoa

takama pomotoa tekete ni tiki. ¹⁸Wini yename kiwi oya kakoapa kipala epetanele toatiki wene pia tikipa nipa toa epetekaki. Kiwi pakeke mekoluka padeka mekoluka enabuna wini yename edikoa toa epetekamotoane uku. ¹⁹Anu mati deya niname-kiti mati opiademe welea kawou toane kiwi Keraisuno yagono-mikiti wa latikou wane wene keda taneya meku. ²⁰Ta padeka mekene i pipia wiane wetekakilepa kiwi kakakoane ko oadiya wane wene pikene tuku. Nipa kime tokoileke wene kainya mati pianeya mekene kipala edemo uku patu wane tuku.

Eeka Seratame Ali Mati Opikala Tanemo

²¹⁻²²Kiwi padeka-kiti Mosesene totonoke wa lukooane meou wa wene piki-kiti kipala eya wane yateku. Mosesene totono wia mekaneya pakeke Eberameyo opiane ali matita takutake akenemo wene tiki patu. Pade matipa one kueme topo toa moa egetekale pupu takane atoa Eekayo opikaneya. Padena matipa ta pine atoa Serayo opikaneya. ²³One pupu takane atoa Eekayo Eberamene mati opikakilepa atoa yatename mati opikina toa epene atoa mekome opikaneya. Nitaneyake padena atoa ta pinatoa Serayo one mati opikakilepa Akolaliyo papete oa pikana toa taatekoa taneya. ²⁴Eina atoatame mati opikala tanepa eya adeka pikene uku. Akolaliyo ali atoa auapeane talo touno dikamene dikamene wa oa togotane totono takuta adeka pikene uku. Eeka wane ibini uku atoapa Mosesene Sainai tonu waneke kakome motane totono adeka pikene uku. Oneke tagene tetepo takaku yenepa egetini yatename ta pine yenane pupu-kama takou toa Mosesene totonoke lukoa meemoa niki. ²⁵Eeka einatoaka oneke tagene tetepo takaku

yeneka egetiniya meou toa Mosesene totonoke lukoa meki. Dikane yeneke ikilepa Arebia take kakene Sainai tono wane adeka pikene uku. Sainai wane ukupa Yu yenane Yerusaleme ta wane koniyo wene pikakene uku. ²⁶A tibuke piko Yerusaleme ta wane ikilepa ta pine ago Akolaline peku mati tagene ta wane adeka pikene uku. Eni taapa tone nine tetepo takoane uku. ²⁷A Yerusaleme wane adeka plane uku atoakepa Aisaiyo Akolaline bokuke eya wa wia mekaneya.

Tiobo atoa nepa wedia meano ta. Mati mukiti nakolo welea opiamekeke Akolali-pala ke wa kayo oa kolotine meano ta. Tiobo atoameke mati opikala tikilepa ete atoa-kiti moa patukoa too tokolo ni uku wa wia mekaneya.

²⁸Akolaliyo papete oa plane toa taatekoa peku mati Aisake opiane toa anu oya-lawe kiwi mone pa yeneke one peku mati-kiti latikaneya meki. ²⁹Atoa yatename mati opikina toa opiane ago Eekane mana agomepa eya taneya. Niname Epetane Yominine tele patu kautakoa mekome opiane ago Aisake tete meai taneya. Eina toa opika Mosesene totonoke lukoa meki-kitamepa Epetane Yominiyo Akolaline peku mati latikane yene tete meai tiki. ³⁰Nikepa Akolaline bokuke agale dikoa piko.

Kueme topo toa moa egetane atoa-pala one matita paka lono moa pitikamotoane uku. Etename kadimo oa meatekoya-kitipa ta pine atoane mana agome mootapemotoane tekene ni uku. Padena atoane mana agome padeyaka moamoo wa Akolaliyo akene toa panagome wia mekaneya.

³¹Nipa ina adeka pikene ikilepa eya wane ekene uku. Anu oya-lawe totopa eina egetane atoake tama noko

yene mena. Totopa ta pine atoake tama nokoya.

Kolago Tokale Mekoinata Wakapea Poameo

5 Totopa kueme topo toa moa egetaneya meou toa Yu yenane totonome kolago taneya keneke mekoo. Nitaneya mekolo Keraisuyo oto toa motaneya. Eni kolago taneya keneke mekoinata panagome wa moa kakakayano, poapeneya kamene-ye.

²Nikepa no Poloyo eya wane uku. Yu yename kini ali yatene kepene teigamene wa okoile teketepa Keraisuke edeya weike wene tugo meki-pe.

³Enipa wa lokoane uku. Kiwi pa yatene ali-kiti kepene teigamedeko wa teketepa nipa Yu yenane totonome tamene wa akene toa-kama litia tootapeamediki.

⁴Ae, Akolaliyo kipa poanele toamene yene tetepo takamotoa enoa tekete Mosesene totonoke lukoa meketepa nipa Keraisu ete pilia wakete tiki. Nika Akolaliyo kiwi pewe witikome talo tokota tewitikoa wakete tiki. ⁵Totome pade nitamekete eya toko. Akolaliyo totopa poanele toamene yene tetepo takamotoa one Epetane Yomini patu kautakoa kakete nepia meko. Nipa oneke wene tugo mekete wedia mea nepia meko. ⁶Totopa Keraisu Yesu-pala lipua mekolo Akolaliyo poanele toamene yene tetepo takakilepa kepene teigane agoka kepene teigamene agoka midi pikoa toko. Nipa Keraisuke wene tugo mekete ete oto wa wene mekanali yotokoke ni toko.

⁷Ae, papetepa Yesunole wedoa takama pokoinano, opa eina nimini okouna toa litia toake wamotoa teyo toka-pe. ⁸Kiwi oneke noe wa kayo oa motokago Akolaliyo tokoya mena. ⁹Edikakilekepa Yu yename eya wa pedoa agale ikina. Yisi kugu dedeyaka palawe keneke pitikakiyake

pupitikoā kotuke kaatapeko. ¹⁰Ali Muno patu kautakoane kakene mane oane motukumo kime yakoa toino wene tekene uku. Kini wene moa bebo akakagopa ibini akene ago tadekaleka pa ago tadekaleka Akolaliyo kibu moo.

¹¹Anu oya-lawe, Akolaline wene kekadetepa ali yatene kepene teigamene wane wamuku. Nimo wane ekene ou tokapa Yu yename no tete meemoa poamoi toka. Ni Yesu yomo lekaneyake totoke tuanemopa ya tanemo wini oko wa nopala wamoi toka. ¹²Kiwi pa yene ali yatene kepene teigamene wa kini wene bebo akoa tika tika tiki Yu ali-kiti kini wa eya tomoane uku. Pine yene kini kepene wa teigilepa kini mu-kitika wa teia mitikamotoane uku.

Epetane Yominiyo Wene Takako Toa Teketepa

Mosesene Totonoke Lukoa Meateko Toa Mena

¹³Anu oya-lawe Akolaliyo kipa one wa kayo oa motikilepa eina kolago taneya keneke mekoinata tewitikoā pomotoa tokome taneya. Nitaneyano, opa eina namolo totonome laukameneya atiki toa meamele toko. Atiki toa meamele tokoyake ele kule poanele tou wa wene ponoka toa litia toameamene. Nitameneya ete oto wa wene mekoa mea auapenali yoma pamene. ¹⁴Eina totonome tamene wa akenemo peyapa agale tigini odeneme kabe koukaloganeya piko. *Pinali neeke wa wene mekoa meko toa eko ali atoakeka wene mekoa meamene* wa akenemo kekutu. ¹⁵Nitamekete tue yatename-kiti ete oto wa tani-nali yoa tiki toa toma peketepa nipa kini kini wia atutakatapeoi.

¹⁶Eya wane ekene uku. Epetane Yominiyo tamene wa okale-kama toma peketepa nipa ele kule poanele toada wa wene ponoka toa litia toamoi. ¹⁷Kini

poane wene witakole Epetane Yominiyo tamene wa okole eni takutale ete oto wa poi tootakutukakolo tokome padele epetanele tou wa wene pia toa teko tokolo wakala tiki. ¹⁸Epetane Yominiyo tamene wa oka toa litia toma peketepa nipa Mosesene totonoke lukoa meatiki toa mena.

¹⁹Poane wene witako toa litia teketepa nipa ele kule poanele toma piki. Nipa moamene atoa-palaka pamoko atoa-palaka koua pia abele toa potokoa eya kuya ya tanele toa ²⁰ni kini yoname latikoinakeya Akolali tetepo takoa kowitōa ni nakeneya tomo eya moa ali wia tukoa ni ete yene-pala kotimi yoa ni agale oa takakete pili pili toa ni panagoneya mou wa one-pala wene poaneyā mea ni lene pia bu oa ni ako ago kawou wa kinikile-kama toa ni neno oa ni ete oto wa puutakutukoa pilitapea ²¹ni panagoneya tepi moa ni leau ue eya nokoa kawa ni eniya ue nootokoa agale telo oa edikanele toma piki. Enika enileke papete pubu okouna toane wa lokoane uku. Dikama yaki yenepa Akolaliyo one talo tuku taapa kinino noe wa yameamoo.

²²Epetane Yominiyo tamene wa oko toa litia toko agome eya toma poko. Ete ali atoake wene mekoa mea ni kolotina mea ni tepe kolotini kilikoa pimotōa mea ni padame one-pala poanele tokaleka poti wene pianeya mea ni epetekoā mea ni ne auapekene dikou wa oa piko toa-kama taatekoā toa ²³ni poti ko akene wene pia ni utanele-kama toa poti yawa toko. Nile toma poko agopa winile toamea wa one eni tokolekiti teyo enoa kekanele latikamotoape. ²⁴Yesuke lukoa meko-kiti totomepa tone poane wene witika toa ele kule poanele toadiya wa wene pikoonakale peya yomo lekaneyake wia dekou toa tewitikatapekoo.

²⁵Epetane Yomini patu kautakoa kakete meemoa peketepa nipa oneme tamene wa okole-kama toomoa pato wane uku. ²⁶Nipa anume tuku toa kimeka tamene wa tone wa kei pia mate agale oa ni i ago meko toane noka meada wa one-pala wene poaneya mea edikoa ete oto wa wene potokanali yoamato.

Ali Atoa Pea Auapeatekomo

6 Anu oya-lawe kiwi panagome padele poanele tadekalepa nipa Epetane Yomini patu wedoa kautakoa meki-kiti dikane ago mane oa moamene wane uku. Nipa Setanuyo kiwika likoa enekayano poti mama moa tamene. ²Nitikaya wa ke enekakale mekete kini kini auapenali yoma pamene. Nitiketepa Keraisuno totono litia toatekoi toa tekete toi. ³Panagopa pa agomeke ibini akene ago meku wa wene pikomewa pinali one wa eni oa yotokakome toko. ⁴Kini toma yakilepa kini wa takoa enekala tamene. Nitiketepa ipa epetanele tadeku wa wene piketepa kini wa kei piamele tokoyake anume tuku toa kimeka tamene wa mate agale wameamene. ⁵Kini wene moa keda takanele eya witakoyapa keda tane kopapu tetepo takoa kini kini wia apua pamene.

⁶Keraisunomo olaukane agomepa one kamoya eya one tikisa ago tatia meamedeko.

⁷Ele kule tikilepa eya wa wene taneya mea tamene. Padameka Akolali oa yotokamele toamoko. Ipe pinagome-kiti eya kuya matakoya wakoa moa nou toa panagome epetaneleka poaneleka tikilepa nami wia enatekoyano. ⁸Panagome-kiti one poane wene witako toane ele kule poanele toada wa wene pia tokopa nipa pinali one wa wia atukademe toko. Wa panagome-kiti Epetane Yomininele takama yakolopa Epetane Yominiyo

topo takoa mea kama pomotoa toko. ⁹Nitikono, ete pia oto pia yete pade ali atoa auapekala tamene. Koome tukene waku wa tewitikoa wawamokolipa nipa Akolaliyo nami wiataka oi ponokale tone moatekoya meoo. ¹⁰Nitatekoyano, eko ali atoa-pala padele epetanele tamele toka-pete-kama peya-pala epetanele tato wane uku. Nipa Keraisuke wene tugoa meki ali atoa takoa padele padele epetanele wedoa tato wane uku-ye.

Poloyo Pubu Oa Lionate Oa Tanemo

¹¹I pipiapa i i wane oane mema mema tuku toa panagome wia mekakoyake opi wipitikene noanu yoname wiane mekaku. Ee nimini, uoya eni wia mekaneyano, Poloyo wia mekaneya tadeko wa wene tomotoane tekene tukuno, enamene.

¹²Kiwi pa yene kini ali yatene kepene teigamotono tamene wa tika tika tikilepa wini Yu yenamepa lede eko Yu ali-kitame kiwi kei pimotoa tekete tiki. Nika eko Yu yename Keraisu yomo lekaneyake tuanele ya tanele tetepo takoa mekete kiwi tete metekaya wa piti motekete tiki. ¹³Wini Yu yenepa kini kepene teiganeya mekete Mosesene totono litia tootapeamikiyake pa yene kini ali yatene kepene teigamotono tamene wa tika tika tekete tiki. Mone pa yename Yu yatenane totono litia tiki wa mate agale oadete ni tekete tiki. ¹⁴Noanume anu tukuleke mate agale wamekene Ali Muno Keraisu Yesu yomo lekaneyake tuaneleke-kama ou. Yomo lekaneyake eni tukilepa nipa itono-pala noota yomo lekaneyake one-pala odeneka dekoa witane tetepo takoa tuaneya. Nitaneyano, ele kule itonoleme no wa moa koigamele toamoko. ¹⁵Opi Akolaliyo totopa poanele toamene yene tetepo takakilepa tokoo kepene teiganeyaka teigameneyaka takoa

enamokome toko. Totopa weneya yene latitapeneya tokome ni toko. ¹⁶Kipala ina okounakale litia tiki-kitipa Akolali neme ela moa tepe kolotini kilikoa pikoa tamene wane kini kowitikakilepa Akolaline ali atoa peyane kikilikoane kowitikoane uku-ye.

¹⁷Opi eya wane wipitikene uku. Pade-kitame no wikala taneyake anu tiginu ipu

taneya mekuno, Yesuno adeka pia tetane tetepo taneya mekuno, padameka no wa tete memotoane wamuku. ¹⁸Anu oyalawe Galesia take meki-kitipa Ali Muno Yesu Keraisu kipala opia yakome kini yomini pewe wia kamotoane kowitikakene uku-ye.

Ee nimini.

Opa anu agale eni.

EPESASE

Poloyo Epesase Yeneke Wia Wetekane Pipia

1 Polo nopa Akolaliyo one wene litikome Keraisu Yesunomo oane auane yamotoa takoa kakaka Aposelo ago i mekene uku.

Epesase take Keraisu Yesu-pala lipua mekete onekele-kama takama yaki-kitike i agale wini oane wetekaku-ye. ²Eya alita toneketai Akolali-pala Ali Muno Yesu Keraisutame kiwi pewe wia tepe kolotini kilikoa pikamotoane kowitikoane uku-ye.

Keraisu-pala Lipua Meki-kitipa

Akolaliyo Pewe Wia Yopikomo

³Akolali tone Ali Muno Yesu Keraisuno etene one kei piato wane uku-ye. Totopa Keraisu-pala lipua mekolo one tibuke meou toa meamene wa pewe witikome one peku lawetekala tokolo ni uku-ye. ⁴Nitikagome itono wete latia piameneyake Keraisu-pala lipua memotoa tokome toto takoa moateka wene toopianeya. Nipa one leneke epetanele-kama toa ni ete-kitame akoo oatekoile toamoa tomotoa taneya. ⁵Nitoapa Yesu Keraisuyo toatekaleke kipa one mana kono-mikiti latikou wa wene toopikilepa papete dikou wa one epene wene litikome taneya. ⁶One kolotini ago Keraisu-pala lipua mekolo tokome toto nami kakameneya pewe-kama wia kako. Nipa totome one peku noa toma yakole enekete ete-kitame onepa dikane ago tadeko wa one kei pimotoa tokome toko.

⁷Manane kamate ponaneya tokome totopa one wa oto toa motokome tone poanele tokooke po letu mekakana keemu toa wako. Nipa kamo takou

toa pewe-kama witikome toko. ⁸Nitikomepa padele padeleta wene toa toa pademo pademota wene toa oa toko toa kabe koukoa eni toko. ⁹One eni toatekamo papete kaukoa mema nekeneyake opi i i wa toto wene takakomepa one epene wene toopikana toa tokome mana Keraisuyo taatekoa toatekamo eni wene takako. ¹⁰One eni wene toopikana toa taatekoa toateka oi ponokalepa a tibukeka itonokeka pia kawa tokoya peya Keraisu einagoke-kama lukoa memotoo.

¹¹Totopa Keraisu einago-pala lipua mekolo Akolaliyo one wa takoa motikilepa dikou dikou wa wene toopikana toa-kama taatekoa tokagome papete wene toopikanakale eni taatekoa toka. ¹²Nipa Keraisu wete noameneyake one noatekoya pegetoa nepia meatekoo-kiti tone toma yakooleke ete-kitame one kei piai tomotono wene pia toka.

¹³Kiwi toa moatekamo eina niminimo kini wene epetekanemo pa yatene kimeka yakoo mootokoa Keraisuke wene tugakoi. Nitikolipa Akolaliyo kiwika one yene wa oa kini tiginike one adeka pia tetou toa one Epetane Yomini kiwike moa wetekaneya. Nipa dikou wa papete oa pikana toa taatekoa taneya. ¹⁴Nipa kipa one yene wa kiwi oto toa moateka adeka eni pikilepa a tibuke one peku lawetatekale nami yame-tekome taneya. Ali atoame one pa teleta tootapeneya mekome tokaleke kei piai tomotoa tokome taneya.

Poloyo One Oya-lawene Kowitikanemo

¹⁵Nikepa kini Ali Muno Yesuke wene tugo me ni Akolaline yene peyake wene mekoa mea tekete tikimo titiane yatekou-pete laigoane ¹⁶Akolali-pala ke wane okala tuku. Nitoane kiwi wene taneya mekene eya wane kowitikaku. ¹⁷Tone Ali Muno Yesu Keraisuno Ako-

lali pā teleta tootapeneya meko Atai wa kei piateko ago neke kakole wene takatapemotono, neke Yomini Epesase yeneke moa wetekamene. Nipa wene muno mekamotono ta wane kini kowititikakala tuku.¹⁸ Akolaliyo kiwi pewekama wiademe tokome noatino noe wa kiwi kayo oa motaneya. Ni one takoa motokana yene kamo takou toa one pā tootapeneya mekome toko peku kiwi lawetou wa one mana kono-mikiti latikaneya. One eni tanele kini leneme keleyo enemotoa tou toa tokome one Yominiyo i i wa kiwi wene taka taka tomo-toane tekene kini kowitikoane uku-ye.¹⁹ Ni oneke wene tugoa meko-kiti toto yopia kakome telekole mati tokole wene takamotoane kowitikoane uku.²⁰ One eni telekolepa Keraisu tuaneyake a tibuke one nimini yono lono kounoke wa moa kakakome tokana telekole kekutu.²¹ Keraisu einago aida opi pa kakomeka naniko wa wakapea nokomeka ako odene mekome e ku tobou yene ibini akene yene edelo yene peya talo toa-kala mema poko.²² Nipa kiwi peya Keraisu einagoke-kama lukoa meamene wa Akolaliyo one etene ako tobu meatekago latia kakakilepa onekemo yakoa motane yene peya one losu yatene auapeou wa taneya.²³ One eni yenepa Keraisuno tigrini tetepo tootapeneya meki. Eni yene eya kuya peya einago lobutua tagatapeko.

Keraisu Patu Kautakoa Kakete

Meemoa Poatekomo

2 Kipa papete Akolaline totono tetekoa poanele toma yakete tekete tuane ali atoa tetepo tokale meaneya.² Papete nitima yaketepa pa itonole-kama toma yakoi. Nipa tibu tiginalo mea potokaki yene yopikoa kako agome toe wa okale-kama litia tokoi. Akolaline totono tagoa toamiki

yene peku laweteko ago Setanu kekutu.³ Papete toto peya eni yene-pala opia mea odenele toa mekete tone poane wene ponoka toa litiapa ele kule poanele toadiyano wene pia toma yakoo. Nipa ete yename etepea tuku pekete tokoi toa tone weneme-kama Akolaliyo kibu moatekale toa yakoo.

⁴ Nitikoyake kaku metekaya wa ela mati moa meko ago Akolali totoke wene mekoa meko matiyame eya toka.⁵ One totono tetekama pokooke tone yomini takoa pome atupane tetepo tokale meaneyake mea kama pamene wa toto Keraisu-pala moa lipukoa kamotokaka. Nipa pa pewe witikome toto toa motoka.⁶ Keraisu-pala eni moa lipukoa kamotokakomewa one-pala odeneka a tibuke mea kawatekota i wa yamepika.

⁷ Enipa Keraisu Yesu-pala lipua mekolo toto edikoa mama moa pewekama wia tokamopa mali ponoka abuna peyame yakamoata pomotoa tokome ni toka.⁸ Akolaliyo kiwi toa motikilepa kini Keraisuke wene tugakoileke ni pewe witikome taneya. Kini padele epetanele tokoike nami tukukome taneya mena. One weneme pa pewe witikome taneya.⁹ Padele epetanele tokouke ni toka wa kime mate agale akaya tokale ni taneya.¹⁰ Nitika agome one latikanakeya totopa Keraisu Yesu-pala moa lipukakilepa ele kule epetanele toma pomotoa tokome toka. Nipa tone padele padele epetanele toatekoole papete i i wa wene toopikana toa toma pomotoa toka.

Akolaliyo Yu Yeneka Pa Yeneka

Keraisu-pala Lipukoa Yopikome Tokomo

¹¹ Nipa eya wa wene taneya meamene. Papete kiwi mone yatene-kiti etepea pa mekoi. Nitimotoa Yu yene kini wa kei piketepa kepene teiganeya

meko yene wa oapa kiwi mone yene pa kepepe teigamene yene wa paya tetepo takoa wakoi. Yu yename kepepe teigilepa kini kaua-mikitame toma nekenele litikete kini tiginike tokoo pa yoname adeka pia teiganeya. ¹²Eya waka wene taneya meamene. Papete Keraisu-pala lipuameneya meketepa lsererele yene-pala pilia mekoi. Nipa Akolaliyo Yu yene auapekene yopiou wa papete oa pikana toa taatekoa tokomepa kiwi mone yatene-kiti wakome auapeameneya. Nitaneyake oneme auapemotoa nepia meamele toamokale kiwi pa yename Akolali meamene tetepo takoa mekoi. ¹³Papete kipa ta tetemada meou toa Akolali-pala lipuameneya mekoiyake opi Keraisu Yesuno kamateme oto toa motaneya mekili uku.

¹⁴Papete kiwi pa yename Yu yene-pala poi teia mekoiyake poi teigoa wawe wa Keraisuyo odene wene moa pikaneya. Nitane agomewa odene yagono yateneta meati wapa toto ete oto wa pilia memotoa olege tane mamina iyakatapeneya. ¹⁵Nipa Yu yename litia toatekoi totonopa Keraisuyo eni katekakilepa one tigini lekane yomoke dekaneya kakale taneya. Nipa poi teigoa wamotoane tuku wa ali takutake odene ago latiou toa toto yateneta pinali one-pala moa lipukademe ni taneya. ¹⁶Nipa yomo lekaneyake eni tukomepa eni yatenetame Akolali nepala poi teigoa wamotoane tukuno, odene yatene tetepo takoa moamene wa Akolali yametane. ¹⁷Keraisu einago itonoke eni nokome toto yateneta mone pa yatene-pala Yu yateneta poi teigoa wawe wa mo wima yakeneya. Nipa kiwi pa yatene ta tetemada meou toa Akolali-pala lipuameneya meki-kitika ni one take meki Yu yeneka odene wene moa pikaneya. ¹⁸Ni ago Keraisuyo

taneleke Akolaline Yomini toto yatenetake awinome mekomewa Atai Akolali mekota poatiki ka i wa toto yametekala toko.

¹⁹Nikepa Akolaliyo kipa pa yene wa wamoa one Yu yene pakeke pa tekei meatiki yene tetepo takamoa toko. Nitamokome one takoa motokana yene-pala kikilikoa yapulu yene wa yopia meko. ²⁰Nika kipa yapuya wa moapa eya toko. One agale papete toawe akane ali-kitika one Aposelo ali-kitika motene wa oa Keraisu Yesupa pigi wa oa tokome kiwi pa yene eni yene patu kautakoa meamene wa yapu wiko. ²¹Nipa Akolaliyo toto peya Keraisu-pala moa lipukoai tikilepa Ali Munagono to-bou losu yapu wikakama pou toa eni toko. ²²Ni kiwi pa yatene ali atoaka einago-pala moa lipukoai tikilepa Akolaliyo one Yomini nome meateko yapu wikakakome toko.

Polo Einagopa Pa Yatene Meane Toa Mekome

Keraisunomo Pine Toawe Oma Yakene Ago

3 Kipala ina ukulekepa no Polo Akolali kakakoane neuwe tukuane kowitoane meku. Nipa Keraisu Yesunole takou wane einakamo kiwi pa yatene ali atoa oane metekouke po yapu pitikaneya mekeneke kini kowitikakoane meku-ye. ²Akolaliyo kiwi pa yatene pewe witikome tokomo oane memotoa no takoa motokamopa kime yatekete tokoi. ³Akolaliyo one eni toateka wene toopikanakamopa papete one kaukoa mema nekeneyake no-pala i i wa toawe oka. Kipala einamo tigini deya wete wiane wetekakounakamo kekutu. ⁴Nimopa i i wane pipiake wiane wetekakolu wida nokale moa oi moteketepa nipa Keraisu nokome toatekamo eina papete kaukoa mema

nekenemo no einagome wenepa i tadeko wa oi. ⁵Eina toatekamopa papete tone kaua-mikiti-pala kaukoa mema nekeneyake one Epetane Yominyopa one takoa motane Aposelo ali-kitika one agale toaweana akane ali-kitika eya wa wene takakala taneya. ⁶One kaukoa mema nekenemo pine toaweane ukuno, yakamene. Kipa pa yateneke Akolaliyo one peku mati wa oa one Yu yene-pala dekoa odene yatene tetepo takoa toko. Ni one Yu yene auapekene dikou dikou wa papete oa pikana toa taatekakome kiwika kikilikoa toa mokala toko. Nipa Keraisu Yesunomo yakoa mootokoa oneke wene tugoa mekili tokome toko.

⁷Keraisuunomo pa yatene-kiti pitikoika oane auane yamotoa Akolaliyo no takoa moa pewe witikilepa eni toatekou tele lukoa toka. ⁸One takoa motane yene peya ako kamotoane no etene keku agoke toka. Nipa pa yatene ali atoa kini weneme tuku toa moamatekoi kamo takou toane Keraisuunomo oane auane yamotoa tokome toka. ⁹One eni kaukoa mema nokana toa taatekakome toatekale i i wane ali atoa peya pine toaweane omotoaka tele lukaka. Padeya padeya peya latiane ago Akolaliyo nitika. ¹⁰Nittoa wipitikomema eya toka. One ali atoa pa yatene-kitameka Yu yatenameka Keraisuunole odeneka takakete takakoile enekete a tibuke tobou meane yenameka ibini akene yenameka Akolaliyo ele kule tikilepa wene muno kakenele-kama tadeko wa wene tomotoa toka. ¹¹Itono tibuta wete latiameneya mekome nitimotou wa wene toopiane toapa tone Ali Muno Keraisu Yesu taatekoa nokome taneya. ¹²Keraisu einagoke wene tugoane meku wa one-pala lipukete tekete Akolali mekota tugoa pamele toko wa piti moameneya atiki toa meko. ¹³No ke

enekakolo mekumo yateketeka onekele takoa wawameamene. Nipa no Polo po yapu ina pitikaneya mekilepa totoke toa pitikaneya mekome toko wa wene tele taneya meamene.

Poloyo Kowitikome Akenemo

¹⁴Kipala ina ukulekepa Atai Akolaline leneke wadini tukuane meku. ¹⁵Onekepa a tibukeka itonokeka e ti ku ti wa iki yatene peya odene ibini oologoapa Akolali ti wa oko. Ni agopala eya wane kini kowitikoane uku-ye. ¹⁶Akolali eya kuya peku wedoa laweteko ago eni yene kiwi kamo takou toa teke neke peku lawetamene. Kini yomini weye akaneya mema pomotono, neke Epetane Yomini awia mepa wa moa wetekamene wane kowitikoane uku-ye. ¹⁷Keraisuunomo oneke wene tugakoike kini tepene lobutua memotoane uku. Nipa yomo-kiti teke itono kekulu ete oto wa wetekou toa Akolali patu kautakoa poapeneya kakete ete oto wa wene mekanali yoma pomotoane tekene kini kowitikoane uku-ye. ¹⁸Ina kowitikakene ukuna toa teketepa nipa Keraisu kiwike wene mekoa mekome kinikile ele kule takakole i i wa wene toi. Nipa Akolaliyo takoa motane yene peya-pala kikilikoa wene toi. ¹⁹Keraisu einago kiwike wene mekoa mekome tokolepa i i wa kini weneme oyake wene toamatikiyake Akolali neme wene takamene wane kini kowitikoane uku. Nipa one peku-kama lawetekale noa tagatapemotoane tekene ni kowitikoane uku-ye.

²⁰One peku noa tomotoa laweteko agomema one eni telekole tokome tone kowitikomo yakoa tikilepa akole-kama toko. One eni toatekolepa adekake kakoa tomotoa edoa kowitiko patu wa toto agopa tokolo mekoyake one weneme toko. ²¹Nitikono, one peku laweteko toapa one yatene totome noa tokolekeka ni Keraisu Yesuunomo noa

tokolekeka peyame Akolali onepa dikane ago tadeko wa mali ponoka toa-kama one kei pia-kala mema pomotoane uku.

Odene Wene Pianeya Meamene

4 Kipala ina ukulekepa eya tamene wane wedoane kowitoane uku-ye. Nipa Ali Muno agonole takama yakouke po yapu moa pitikaneya meku agome uku. Akolaliyo onekele takakete toatekoile i i wa kiwi kayo oa moa yametekana toa wedoa takama pamene. ²Nipa oneke nate wene pia ua mootokoa poitali atoa mema pamene. Nitoa poanele ete topo takamekete ete oto wa wene mekoa auapenali yoma pamene. ³Epetane Yominiyo kiwi odene wene moa pikoa yametekana toa edikoa pa mema pote enato wa poi teigoa wawou toa odene wene pianeya mema pamene. ⁴Enipa Akolaliyo kiwi peya kokotukoapa odene tigrini tetepo takoa meko. Ni one Epetane Yomini odene ago kiwi peyake awinome meko. Ni Akolaliyo noe wa kiwi kayo oa motikilepa nipa padele toatekale odeneleka tobou kakoa nepia memotoa tokome toka. ⁵Ni tone Ali Muno wa oko agopa odene ago Yesu Keraisu kako. Ni oneke wene tugoa mekilepa toto peya odene wene pia toko. Ni ue motikilepa toto peyame odenele toa motoko. ⁶Ni Akolali ali atoa toto peyame atai wa oateko agopa odene ago kako. Ni agopa oneke-kama toto peya lukoa meateko ago toto peya-pala lipua mekilepa one patu kautakoa kama pomotoa toko.

⁷Toto peya edikoa odene yagono-mikiti mekoloka Keraisuyo one peku lawetekilepa one peku odeneya peku-kama lawetekoya mena. Nitamokome one peku lawetemo lawetemo toateka wene toopikana toa tokome panago padeya peku lawettoa wa pade ago padeya peku lawettoa toka. ⁸One eni

toatekalekepa Akolaline bokuke agale dikoa oa pianeyano, yakamene.

I toaweane uku agopa a tibuke atepea pokomepa po yapu pitane yene peya mati noe wa moa pekeneya. Ali atoa eya kuya peku-pala lawetekala taneya wa enile wete tane tetepo takoa papete wia mekapianey.

⁹Atepea pekeneya wapa edekale akeneya-pe. Enipa einago namolo takoa tibu mea itonoke ketipea noo tokale okome akeneya. ¹⁰Eina ketipea nekene ago wane ikilepa itono tibutake meetapeademe tokome tibu patukatapea ate wakapea pekene agoke uku. ¹¹Ni agome ali atoa eya kuya peku lawetekilepa padeka-kiti takoa Aposelo ali-kiti latia kakoa ni padeka-kiti one agale toaweana akamotoa takoa moa ni padeka-kiti onekemoma yamotoa takoa moa ni padeka-kiti ali atoa yopia olaukoa tamene wa takoa moa kakoa taneya. ¹²Nipa Akolaline ali atoame Keraisu einagonole ele kule takaketepa one tigrini pewe kakeneya kamotoa tokome eni yene takoa peku lawetekala taneya. ¹³One eni peku noa toma pote togaketepa nipa oneke-kama wene tugoa mea ni Akolaline mana one mekole i i wa wene taneya meoo. Wene odene pianeya mekete nitoa meoo. Nipa wetini ali atoa meatiki toa mekilepa Keraisu meko toa kotu kakoa meoo.

¹⁴Nitikete nana mati mekete tokoona toa wawa toamokolopa pa agale wene kibututukoa okoi-kitame toto tolopi toa oa yotokamele toamoo. Nipa uemekiti ue tagi nidikoa aua poko toa ni pupulegeme-kiti do popokoa aua poko toa toto ete oto wa liku pekete tamele toamoo. ¹⁵Edikoa meamekete yete pade ali atoake wene mekoa mea niminimokama oma pato. Nitoapa Keraisu tone tobou wane tou toa ako meko ago one adeka plane toa-kama litikete one-pala lipua-kala mema pato. ¹⁶Ni ago

Keraisu yo toto kipa one lene timini yono kawa eya wa tetepo takoa yopia mekome one-pala lipua plateko toa moa pia kibutukakala toko. Nipa tone tone ete oto wa auapea wene mekanali yoma pekete one tigrini laama pomotoa toko.

Keraisu Patu Kautakoa Kakete

Wenele Toma Yakomo

¹⁷Nikepa Ali Munono ibini wedekoane eya tamene wane ukuno, yakamene. Mone pa yatene ali atoame paya wene kibututukoa tiki toa wawa toameamene. ¹⁸Dikane yenepa kini wene yomiyomume moa agopa takatapeneya meki. Kini wene logonipa keteaneya tokome Akolalinemo yakoa moameneya pa meki. Nipa one patu kautakoa kawamekete pata paka etepea yaki. ¹⁹Nitiki yename ya tanele tamene ya moameneya mekete abele toada wa ele kule poaneleke-kama wene piitikaneya mea tokala tiki.

²⁰Kime pade Keraisunole takakete toatekoimo yatekilepa enika eni poanele litia toatekoimo yatekoina mena. ²¹Onekemopa one nimini peku noa tanele i i wa totome olaukakolo yatekoina. ²²Ele kule poanele toada wa papete wene pia tokoinakaleme kini wene moa koiganeyano, kiwi olaukane toa tekete eni poane wene wia wawe. ²³Kini namolo tepene pikoi wene wawa wenele litia tamene. ²⁴Nipa Akolali kako toa adekake kakoa weneya ali atoa latitapeneya mekete kiyo akenele-pala epetaneleta toomoa pamene.

²⁵Toto peyapa odene ago Keraisuno tigrini tetepo tootapeneya mekono, kapene wakoa agale wawa ete oto wa niminimo-kama oma pamene. ²⁶Yete pade ali atoa-pala kotimi yoteketeka Akolaline totono tetekoa poanele toameamene. Lou wete pipameneyake eni kotimi yotokoina teigamene. ²⁷Se-

tanu kiwi pakeke lukoa menokayano, one ka pikatekole pade toameamene. ²⁸Kode ago nepa kodeya motikilepa wa toameamene. Nitameneya ponopene ali atoa auapeou wa neke yoname nimini pupu tokoa kawa auapekala tamene. ²⁹Kini kabunumepa pademo poanemo kailapagale eya awa ikileka toameamene. Nitameneya yete pade ali atoa auapekete oatikimo amele tokalepa mane mane oa auapeamene. ³⁰Akolaliyo papete kipa one wa oto toa moateka adeka kini tigrinike pia tetou toa Epetane Yomini kiwike moa wetekaneyano, one Yominine wene potokameamene. ³¹Nika yete pade ali atoa-pala wene poaneya meamo a ete oto wa kotimi yoonali yoamo a timini yoamo a bu neno wamo a akoa agale wamo a tamene. Enika enile peya tewitikoa wamene. ³²Nitoapa kini kini ete oto wa oya kako a mama moa tamene. Nipa Keraisu taneleke Akolaliyo kini tokoi poaneleke po letu mekakana keemu tane toapa kini kini ete oto wa poanele tokoike po letu mekatatutukakoina keetapea wamene.

Pa Keneke Mekete Toatekomo

5 Nipa Akolaliyo kipa one kolotini yene wa yopia mekono, one meko toane meadiya wa wili toa meamene. ²Keraisu totoke wene mekoa mekome tukilepa Akolaline takakome kalono takoa one wa lodo yotane tetepo takoa tuaneyano, one meadeko toa kini kini wene mekanali yoomoa pamene.

³Pamoko mea abeyale toa eya kuya ako-kama mou wa wene pia enika eni poanele tikimopa Akolaline yate-name kotukamo a ko wamatikimono, enika enile toameamene. ⁴Nika agale ko oa kaketepa ali atoa ya takatikimo emo kumo pamo ikimo kailapagale enika eni wamatikimopa wamo a Akolali kei pikala tamene. ⁵Nimini ukuno,

yakamene. Pamoko mea abeyale toa eya kuya ako-kama mou wa wene pia tiki yenepa Akolali Keraisutame kini talo toko take mea kawatino noe wa oto toa moamoi. Eya kuya ako-kama mou wa wene pikilepa nipa Akolali keku kakoa pa itonoya-kiti tobou kakoa mea tiki.

⁶Pade-kitame kiwi oa yotokaketepa enika enilepa poanele mena wa pamo oa yotokakayano, yakameamene. Enika eni poanele tokoike Akolaliyo one agale edikoa tagoa toamiki yene-pala kotimi yoa mekome etene kibu mokala too.

⁷Nitooon, dikane yene-pala oya patu pia yawameneya kini tokoile titi toma yamene.

⁸Papetepa kipa yomiyomu keneke yawa pitikoiyake opa Ali Munono-pala moa lipukaneya tokome pa takatapeneya mekete tikino, pa pinagono yatene yawa pitikete toatiki toa yawa piamene.

⁹(Pake yaketepa nipa ku epetaneya tuou toa ele kule epetanele toa wene kiyo akeneya mea niminimo-kama oa tikiya.) ¹⁰Ele kule teketepa Ali Munono wene edoane motuku patu wa one wene pikole tetoa enamene.

¹¹Yomiyomu keneke yawa pitiki yename pale tiki toa toamoatino, titi toma yamene. Kini tikilepa poanele eni tadeku wa wene tomotono, mea epetekamene.

¹²Eni yename paigakoa tikilepa etene ya tanele-kama tikino, kini eni tanele i i wa ko ikilepa toamatoane uku.

¹³Eni yenedo pa takatapeneya meketepa nipa kini tanele poanele eni tadeku wa wene tekete pa pine agono peku noa toi.

¹⁴Pa tokoyamepa padeya padeya peya keleyo witakakala toko. Nikepa Akolaline bokuke agale dikoa oa pianeyano, yakamene.

Atu pia meko agopa kamokoa kamene. Ne tuaneya pikota kamoia pamene. Keraiyuo ne pa takalogoono, nitamene wa panagome papete wia mekapianeya.

¹⁵Nipa kiwika etepea pokayano, kinikile wedetekoa toma pamene. Paya peku noamoano, nimini peku-kama noa tamene.

¹⁶Opi-menepa poanele-kala witako-peteno, loyo pa meamoano, padele epetanele toa ali atoa auapeatikita pikalepa auapeamene.

¹⁷Nipa paya wene piameneya Ali Munagono wene moada wa one wene pikole tetoa enamene.

¹⁸Kini wene moa bebo akakayano, leau akateko po ku ue eya nokoa kawameamene. Nitameneya Epetane Yomini kiwike awia mea tagatapemotono,

¹⁹oboa mekete-kama losu lo oa Samo lo oa Akolali kei pikiya lo oa tamene. Nipa Akolaliyo yakamotono, lo oa moyo eya wia tikilepa kini tepene meaneya yawa one kei pia tamene.

Etene wedoa oa tamene. ²⁰Nipa kipala padele padele tokaleke Ali Munono Yesu Keraiyuo ibini wedekoa enabuna Atai Akolali-pala ke wa amene.

Adona Mekete Toatikimo

²¹Keraiyuke poti wene pianeya mekete tekete kini oya-laweke oyake lukoa meamele toko wa keku ali atoa tetepo takoa meamene.

²²Atoa yatene Ali Munono agoke poti wene pianeya lukoa meatiki toa kinikaneke poti wene pianeya lukoa meamene.

²³⁻²⁴Ni edoa-mo. Keraiyuo Akolaline ali atoa toto kokotukoapa one tugini wa tetepo takoa toa monaneya. Nitane agopa tone tobou wane tetepo takoa oneke-kama lukoa meamedeko.

Nitamedeko toa atoa yatene kinikaneke lukoa meamene wane uku.

²⁵Ali yatene kinikatuke wene mekoa mea mama moamene. Keraiyuo einago Akolaline ali atoa totoke wene mekoa mekome tuane toa nitamene.

Einagome eya wa wene pia tuaneya. ²⁶Akolaline ali atoame poanele tanele peya kogatapekilepa eni yene Akolaline takoane

motokadene touno, one agale yakoa mootokoa ue momotou wa wene pikome taneya. ²⁷Nipa Akolaline ali atoapa one tuupiane atoa tetepo takoane mou wa wene pia tukilepa ipu pia tebo toa enika eni tokoya takatapeane etene koni atoa latiane mou wa taneya. Nipa padameka akoa oatekoile toameneya kiyo akenele-kama toa memotou wa taneya. ²⁸Edikoapa ali yatene kini natonoke wene mekoa mekilepa kini tigrini wa mama motekete tiki toa tamene. Panago one natonoke wene mekoa mama motikilepa pinali one wa wene mekoa mama motokome toko. ²⁹One tigrini wa kote motikilepa odene agomeka tokoya mena. Peyame kini kepene mama moapa nee moa naki. Enipa Keraisyuo Akolaline ali atoa mama motokome talo toko toa tiki. Ni edoa-mo. ³⁰Keraisyuo Akolaline ali atoa mama motokome talo tikilepa eni yenepa one lene timini yono kawa eya wa tetepo takoa mekome ni toko. ³¹Ina ukulekepa Akolaline bokuke agale pade wia mekapiane toa tokome *panagomekiti one atoa mootokoapa one etene nineta mekoita tewitikoia pome one atoa-pala lipua meoo. Papete letetakutukoa meake enipete odene tigrini latitapeneya kawou toa liputakutukoa meoi.* ³²Enipa pine i i wa tone weneme oyake toaweamele toamoko. Akolaline ali atoa toto-pala Keraisu liputakutukoa mekomo uku. ³³Nipa eya wane ekene uku. Ali yatene kini wa wene mekoa mea kepene mama moa tiki toa kini natonoke wene mekoa mama moamene. Atoa yatene kiwika kinikaneke poti lukoa meamene wane uku.

Mati-kitikeka Etene Ninetakeka Akenemo

6 Mati yatene kipala eya wane ukuno, yakamene. Kini etene ninetame agale okoli yateketepa Ali

Muno agono wene pikole tou toane yakoaane tamedeku wa litia tamene. ²Nipa Akolaline bokuke wia mekane toa *kini etene nineta kei pia poti lukoa meamene.* (Akolaliyo yonota tua agale oa metekilepa einagaleme titikome ali atoa mea epetekakete toatekoimo-pala lua akeneya.) ³Eya wa akeneya. *Meane epetekou wa wene pia ni itonoke ludu pitikoane meou wa wene pia meketepa nipa etene nineta kei pia poti lukoa meamene.*

⁴Etene yatene kini mati-kiti timini natekatikile toameamene. Nitameneya Ali Muno agonole takakete toatikile olaukoa mane mane oa tamene.

Egitini Yene Ta Pine Yenetake Akenemo

⁵Kueme topo toa moa egetane yene kini pupu pine yename tamene wa okoi toa litia tamene. Nipa Keraisyuo tamene wa akene tetepo takoa kinikile wedoa takamene. Nipa kiwi kikoa akakaya wa piti motekete pine yeneke nate wene pianeya meamene. Kinikile edikoa takakilepa odene wene pianeya mea tamene. ⁶Pupu pine ago kakakoane kei pimotoane tekene onekele wedoane takatekuyake opi kote aumoane tuku wa paya wene pia toameamene. Kipa Keraisyuo moa egetane yeneno, Akolaline wene pikole toa e yenanele wedoa takama pamene. ⁷Nipa panagono pupu takakilepa ipa Ali Muno agono takou toane tuku wa epene wene pia tamene. ⁸Eya waka wene taneya meamene. Ta pine yenameka kini kueme topo toa moa egetane yenameka ele kule epetanele tiki toa Akolaliyo kei pia epetanele topo takakala toademe toko.

⁹Edikako toapa ta pine ago neke moa egetane yene kaku wia tika tika toameneya eya wa wene taneya mea talo toa epetekamene. Kueme topo toa moa egetane yeneka ta pine yeneka kiwi peya

lukoa meki ago a tibuke mekome kiwi peya odene yagono-mikiti tetepo takoa tala toa meko.

¹⁰Eya wane wipitiane uku-ye. Ali Muno ago-pala lipua mea one tele patu kautakoa kamene. ¹¹Setanuyo kiwi tolopi toateka wene kibututukoa mea ele kule tokale ete pedekadepa eya tamene. Poi tikilepa iya-kiti moa kawa poi tamene wa Akolaliyo yametekanakeya peya moa tamene.

¹²Totome eni poi tikilepa pa tono melepu kakene yene-pala poi toamekete eya yene-pala toko. Setanuke lokoa ta padeka padeka tatite toa yopia ni padele padele telekole toa ni ele kule poanele witakoa meki tobou yene-pala poi toa kako. Nipa a tibuke Setanuno peku noa tiki ipono yatene-pala totome poi toa-kala kako.

¹³Nipa enika eniya-pala poi wedoa tomotoa Akolaliyo yametekanakeya peyapa wete moa kamene wane uku. Setanuno yatename kipala poi tonokoli poapeneya kakete ete pedekamu toa kamene wane ni uku.

¹⁴Nitooa poi toadete kawou toa eya tamene. Matio wedoa moa kamene. Enipa Akolaline nimini peku noa tamene wane ekene uku. Ni palanu kautatiki kapa petene moa kamene. Enipa wene kiyo akeneya meamene wane ekene uku. ¹⁵Ni kawa yene moa mekamene. Enipa Akolaliyo ali atoa-pala poi teigoa wakomo kini wene epetekakomo oada wa toaweama oma pamene wane ekene uku. ¹⁶Ni poane ago Setanuyo itipono okoa kakene wata yodokale kotokoto moa ua ete pedekapeamene. Enipa Keraisukeya wene tugoa meamene wane ekene uku. ¹⁷Ni tobou kautatiki kapa nunagu moa wateamene. Enipa Keraisukeya kiwi toa motaneleke wene piitikaneya meamene

wane ekene uku. Ni Epetane Yominiyo yametane kepete tue moa pikoa kamene. Enipa Akolaline agale yakoa mootapeamene wane ekene uku. ¹⁸Nipa Epetane Yominiyo wene takako toa ete pia oto pia emo kumo yakoa kowitikala tamene. Auapeano ta wa Akolaline ali atoa peyane wedoa kowitikama pamene. ¹⁹Anuka kowitikamene-ye. Nipa Akolaliyo papete kaukoa mema nekenemo Keraisu taatekoa nokome tanemo oane meatekouta Akolaliyo amene wa oka toane piti moameneya toaweane ouno, no einago auapea ta wa Akolali kowitikamene-ye. ²⁰Onekemo oane auane yakouke po yapu pitikaneya mekene uku. No nitaneya meku agome Keraisunomo piti moameneya wedoane akateku toane akamotono ta wa anu kowitikakala tamene.

Poloyo Wipitikome Akenemo

²¹I take mekene tukoumo ni i take mekolu nopala tanemo eya ago Tikikasi kiwi mekita wida nokome oo. Einagopa anu kolotini agome Ali Muno agonole takama yawateko toa wedoa takama yako. ²²Ni ago kiwi mekita poano pa wane wetekakilepa totome tokomo oa kini wene-pala weye akooa tomotone tekene ni tuku.

²³Anu oya-lawe kiwi peyane eya wane kowitikakene uku. Kini tepe kolotini kilikoa pianeya mea wene mekanali yoa tomotono, kinikile-kama takama potomoto toe wane Atai Akolali tone Ali Muno Yesu Keraisukeya kowitikoane uku. ²⁴Tone Ali Muno Yesu Keraisukeya wene mekoane meane tuou wa one tewitikoane wawamiki yenepa neme pewe wia yopia kamene wane Akolali kowitikoane uku-ye.

Opa anu agale eni.

PILIPAI

Poloyo Pilipai Yeneke Wia Wetekane Pipia

1 I pipiapa no Polo Timosita Keraisu Yesunole takama yako agotame wia wetekako-ye.

Nipa Keraisu Yesu-pala lipua memotoa Akolaliyo one wa takoa motane yene Pilipai take meki-kiti kiwi peyake wini wia wetekakilepa losu talo tiki ali-kitikeka losu pupu tiki ali-kitikeka peyake wia wetekako-ye.

Poloyo One Pipia Oi Moatekoi Yenane

Kowitikanemo

²Toneketai Akolali-pala Ali Muno Yesu Keraisutame kiwi pewe wia tepe kolotini kilikoa pikoa toe wane kini kowitikaku-ye.

³Kiwi wene tekene-kama agetai Akolali-pala ke wane okala tuku. ⁴Nitoane kini kowitikakilepa wedianeya-kama meane kowitikakala tuku. ⁵Keraisu Yesunomo kipala titikene oane metekouna-peteka opika yakoa moa no auapema nikike ni tuku. ⁶Akolaliyo kiwi pewe witikene dikou dikou wa titikome taatekoa tokana toapa Yesu Keraisu oto wakapea nokaleka pa toa-kala kawa peya takoono wene pikene uku. ⁷Kiwi mama motukumo tepene meaneya eni yawane ekenepa kiwi wene taneya-kama mekene tokome tamele toko. Ni edoa-mo. Ali atoane lene yoto kakene Keraisunomo i i wane one kei plane kakoluka opi kapa po kakaneya po yapu pitikuluka Akolaliyo no pewe witikome kiwika dekoa pewe witikome witikolo tokome kime no mape mokala tiki. ⁸Kipala i ukumopa nimini uku wa Akolaliyo wene toko.

Kiwike-kama wene piitikaneya mekene wene mekoane tikilepa Keraisu Yesuyo toko toane tuku.

⁹Kini kowitikakilepa eya wane kowitikoane uku-ye. Wene mekanali yotikilepa akole-kama toma pomotono ta wane Akolali kowitikakala tuku. Nipa nekemo emo kumo peya wene tomotono, ina ina wa pine piko toakama wene takoano ta wane kini kowitikoane uku-ye. Ni edoa-mo. ¹⁰Padele padele takoa enekilepa epetanele-mati toatekole i i wa kime takoa enemotoane ni uku. Nipa Keraisu wakapea noatekoya nepia mekete toatiki toapa edikoa poane wene piamoa ni ete-kitame akoa agale oatikile toamoa toamotoane uku. ¹¹Yomo pade ku wedoa tumotoa lati lati tou toa Yesu Keraisuyo auapea yopikale ele kule kiyo akenele-kama toamotoane uku. Nitikoli enekete ete-kitamepa Akolaline peku noa tadeki wa one kei piati toamotoane ni uku-ye.

Polo Keraisu Patu Kautakoa Kakome Tanemo

¹²Anu oya-lawe kiwi eya waneka wene takakene ukuno yakamene. Nopa poo yapu pitikaneya mekulu tokome Keraisunomo oa pupitikatapeneya. ¹³Nipa i ta yopiko agono poyo ali-kitameka ete yene peyameka no Keraisunole takama pokouke po yapu pitikaneya meku wa wene taneya meki. ¹⁴Nika po kakaneya poo yapu pitikuke tone oya-mikiti kainya matiyame ekete Poloyo piti moamokona toa kimeka Akolaline agale oadete piti moameneya meato wa Ali Muno patu kautakoa kakete onekemo atiki toa oa aua yakete tiki.

¹⁵Keraisunomo oa aua yakilepa padekitame no Polo einagome toko toanepa moane patukada wa no-pala tepene poane wene pimotoake tekete tiki. Nitikilika pade-kitame epene wene pi-

aneya mekete tekete oa aua yakete tiki. ¹⁶O yename onekemo oa aua yakilepa noanume Keraisunomo i i wane one kei plane omotoa tokome Akolaliyo po yapu moa kakaneya tadeko wa nooke wene mekoa mekete tiki. ¹⁷E yename nitamekete Keraisunomo paya wene pia oa aua yakilepa no po yapu pitikene ke enekakolo wene keda taneya memotoa tekete tiki. Nipa kiwi ako ali meou wa wene pia tekete tiki. ¹⁸Eni yename nitoa kamotoane uku. Ni edoamo. Keraisunomo paya wene pia oa aua yaketeka epene wene pia oa aua yaketeka onekemo ta piko peyake oa pupitikama yakete tiki wane wediane mekene uku.

Eni uku toane pa wediane mema pou. ¹⁹No po yapu pitikuyake anu oya-lawe kime anu kowitikakete tiki. Yesu Keraisuno Epetane Yominyoka no weye akoa yopia meko. Nipa ke enekakolo mekuluka Akolaliyo kini kowitikakimo yatekome no oto toa moademe toko wane wene tuku. ²⁰Eya toadiya wane wediane meane nepiane meku-ye. Papete tokounakale opika onekele pata pale takamekene onekemo akamene piti moamekene atiki toane oane auane yawou. Nipa tuadekoluka tuameadekoluka Keraisu-pala lipuane mekene tokouleke ete-kitame one kei pimotoadiyano wene plane tou. ²¹Itonoke mekenepa Keraisu patu-kama kautakoane meku. Tuadekolupa nipa Akolaliyo no pewe wia kakilepa akole-kama too wane tuou. ²²No tigini kakeneya itonoke pa meamedekolupa nipa yomo pade ku tukome toko toane one pupu wedoane-kama takamoane pou. Ae, one mekota tuane puku patu, onekele pa takamoane puku patu. Agopa tokolo meku-ye. ²³Itono ete pimotoane Keraisu-pala mekene meadene tuane poadiyano wene pitikuyake ²⁴kinikile takadene itonoke

pa meamedeku. ²⁵Nitamedekuno, kime Keraisunole wedianeya mea takama yamotoane tekene kipala pa opiane meouno wene tekene uku-ye. ²⁶Eni uku toane kiwi mekoita wida wa wakapeane none mekolu tekete Keraisu Yesu-pala ke wa one kei pia wedia tagatapeneya meoi.

²⁷Keraisuno ali atoa mekete toatekoi toa i i wa olaukanele toma pamene. Nitikolipa wida none mekeneka padeka pone mekeneka eya odenemo-kama yakou. Anu oya-lawe kime Keraisunole takakilepa poyo ali-kitame poi wedoa toa kawou toa poapeneya kakete odene wene pianeya mea tiki wa okoimo yakou. ²⁸Nipa kipala poi teia meki-kiti piti moameneya atiki toa tamene. Nitima pokoile enekete eya wa wene toi. Akolaliyo toa moo tokolo ni piti moamiki. Ae Akolaliyo kiwika wia atukatekolo toko wa oi. ²⁹Akolali nitikagome kiwi takoa motikilepa Keraisuke wene tugoa mekete oneke toa tete momotoa tokome ni toko. ³⁰Kiwi pakeke mekene poime keneya tete motokouna toane i takeka pa mokoane kaku. Enipa kime yatekete tiki. Enika eni tetepa kimeka Keraisunole takama pekete mokala tekete tikili ni uku-ye.

Keraisu Poti Wene Pianeya Mekome Tanemo

2 Kipa Keraisu patu kautakoa kakete tekete wene weye akaneya mekete tiki. Ni Keraisu kiwike wene mekoa mekolo tokome mama motaneya mekete tiki. Ni Epetane Yomini-pala odene wene pianeya meki. Ni ete oto wa ela moa auapenali yotokete tiki. ²Nipa anu wene epeteko mekatiki kotuke kakoa eya-pala toma pamene. Yete pade ali atoake wene mekoa mea padele padele tou wa wene pia tikilepa odene wene-kama pia tamene wane uku. ³Padele padele tikilepa i ago ku ago moane patukoane ako

ago kawou wa wene pia toamoa mate agaleka wamoa tamene. Nitameneya yete pade ali atoa ako kakene tetepo takoa pinali nepa keku kakene tetepo takoa meamene. ⁴ Kinikileke-kama wene piitikamoa yete pade ali atoa-kitanele takamedeku wa wene pia tamene.

⁵ Keraisu Yesu itonoke epene wene pi-anya mekome tane toa mema pamene.

⁶ Keraisu einago Akolaline yagono ago meaneyake Akolali-pala midi pi-anya meou wa wene piamokome eya taneya. ⁷ A tibuke mekome tane toa tewitiko wakomema one wename takoa wakeneya. Nitoapa yete pade ali atoa-kitanele takateka ago latiapa lene timini tononolepe eya kakeneya nekeneya. ⁸ Nipa toto ali yatenane yagono ago latitapeneya nokomema pa keku ago tetepo takoa eya taneya. One etename tamene wa okana toa litia tootapekomema yomo lekaneyake tuou wa tuaney.

⁹ Nitikale tokome Akolaliyo eya wa oa taneya. Ali atoa padeya padeya peya i ago neeke-kama lukoa memo-toane tuku wa ako odene ibini akene ago latia kakaneya. ¹⁰ Nitaneyano, a tibukeka itonokeka itono kekuluka mekoi peya oneke wadini tukua mekete eya wa oa toi. ¹¹ Yesu Keraisu i ago nepa Ali Munago kakoya tadeko wa Atai Akolali kei piyai toi.

Tagoi Keneya Pa Tokoa Kamene

¹² Anu kolotini yene kiwi mekoita wida namolo mekene okouna toa kime litia tokoinano, opi kipala opiane meamuku-peteka etene wedoa toma pamene. Nipa Akolaliyo kiwi toa moa togamotoapa onekele takama pato wa pitime tuaney meou toa oneke nate wene pianeya mea toomoa pamene. Ni edoa-mo. ¹³ Akolali einagomema kime one wene pikole too wa wene pia

tomotoa tikilepa kini tepene piko wene yopia mea toko.

¹⁴ Nitikono, padele padele tikilepa ko wamoa ete oto wa neno wamoa tamene. ¹⁵⁻¹⁶ Nitameneya poane peku noa etepea toma piki-kiti pakeke mekiyake e yenamepa kime poanele tiki wa kiwi kikoa akamomotono, Akolaline mana kono-mikitame toatiki toa kiyo akenele-kama tamene. Nitoapa e yene kini mea kawatiki peku i lawetekuno noa tamene wa lawetekilepa tagoi-kiti yomiyomu keneke kawou toa kakete pa takoa tamene. Yesu Keraisu wakapea nokalepa kime tamene wane okounakale edikoa litia tadekolipa nipa Keraisu nekelepa pata pale takameadeku wane anu wa kei piou.

¹⁷ Pine yene kini tigini Akolalike mea lodo you toa tekete ke enekakolo meketeka Keraisunole takama yakete tiki. Kini tigini wa lodo you toa tekete tiki toane noanuka anu kamatepa gerepi po ku ue keneya pekamotou toane eya tuku. Pade-kitame no witikilika oyake wimotou wane kipala odene wene pianeya meane wediane meku. ¹⁸ Nitikuno, ke wa wedikete wediatoane uku-ye.

Timosi Epaperodaisitake Akenemo

¹⁹ Ali Muno Yesuyo anu wene motokome ka yametekalepa nipa eya ago Timosi kiwike wete moane wetekou. Nipa einago no mekuta oto wakapea nokome kiwi wida mekete tiki ko onokome anu wene weye akanoono wene pikene tou. ²⁰ Timosi einagome kiwi wida edoa meki-pe wa mama moa meko. One keneya ago pade ita mekoya mena. ²¹ Ete yene peyame Yesu Keraisunolepa wedoa takama yawamekete kinikileke-kama wene piitikaneya mea tiki. ²² Timosi einagome Keraisunomo oa aua yakilepa no Polono mana ago tou toa nopala

odenekata oa aua yakono, onepa dikane ago tadeko wa kime wene tekete tiki. ²³I poo yapu yopikagome nopala wipitikome toatekale wene tekenepa Timosi ne poano pa wane kiwike wini moane wetekou. ²⁴Ali Muno agoke wene tugoane mekene noka kiwi mekita wida wete nouno wene pikene uku-ye.

²⁵Anu oya ago Epaperodaisi kiwike wida wakapea pa wane wetekamedeku. Einago Keraisuno poyo ago keneya tokome onekemo nopala odenekata oa aua yako. Kiwi lukupepa no auapemotoa oto wetekakoli nokanakagoke uku.

²⁶Einago kiwike wene piitikaneya meko. Nika one yene taneya mekomopa kime yatekoiya tekete wene keda taneya mekete tiki wa kiwi mama moa meko. ²⁷Einago tuademe pianeyake Akolaliyo ela motokome latekaka. Noka ela motokome ni toka. No wene keda mati takaya tokale nika toka.

²⁸Nikepa einago kiwike wini wete moane wetekada wane wene plane meku-ye. One wida nokale enekete ke wa wedia memotoane tuku. Nika noanu ela teigoane meadene tuku.

²⁹Einago wida nokale eneketepa tone oyago Ali Muno agono yatene ago i noko wa makutukoa moamene-ye. Dikane ali-kitipa ibini akene ali tetepo takoa nitikala tamene. ³⁰Einagome Keraisunole takama yakome oneke toane tuou wa tuademe toake lataka.

Nipa kime no auapenemele toamokale tokome oneme auapenou wa tuamene piti moamokome kiwi luku nome auapenoka.

Poloyo One Namolo Tokanakale

Tewitioa Wakenemo

3 Anu oya-lawe kipala eya wane wipitikene uku. Ali Muno agoke wedia mema pamene. Kipala pegetoane okounakamo wa amene kote

moamekene uku. Kiwi etepea pokaya tokolo ni ukuno, yakamene. ²Yo tane tue wane paya tetepo takoane uku yene titi toma yamene. Eni yename poanele tekete eya wa olaukakete tiki. Mone pa yene Akolaline mana-mikiti latiadetepa kini kepene teigamotoa tamene wa pata pale tekete toatikimo olaukakete tiki. ³Nitimotoake Akolaliyo eni yene wakome totopa one wa kepene teigane yene tetepo takoa meko. Ni edoa-mo. Totome Akolalinele takoa one kowittoa tikilepa one Epetane Yomini awinome wene takako toa toko. Nipa ali yatene kepene teigilepa edeya weike toamoono, tokamota wa Keraisu-pala lipua mekete ke wa wedia meko. ⁴Panagome-kiti Akolaline mati latiadene dikaku dikaku wa pinali one wa kei pikalepa einagome toko toane moane patukakene eya wane ukuno yakamene. ⁵Nopa Iserелеle tawane nuku ago. Iserelene mana Bedamineyo tagaane yatene Bedamine ti pitiku. Nitane ago nopa etene Iberu ago meku. No opitikaneyake ta pataka ketepo kakoa (8) ponokale agetaiyo anu kepene teigamotoka. Nitaneyake wetini ago kakene Yu yenane totono litikilepa Parisi yatene lono pekene tokou. ⁶Nitikenepa no Yu yatenane totono wedoane toma yakilepa Yesuno yatene ali atoa tete mema yakene tokou. Ni Moseseyo tamene wa akenele litikilepa odeneleka katekamoane tokou. ⁷Anu papete mekene tokounakalepa kamole tane tetepo takoane mekounake opi Keraisuke lukoane mekenepa einakale pata pale tane tetepo takoane waku. ⁸Nipa anu eina tokounakaleke Akolaliyo no kei pioono wene pikounake opi anu Ali Muno Keraisu Yesu wene tootapeane meadene enika enile peyapa pale tane tetepo takoane waku. Nitoanepa Keraisu-pala lipuane meou wane enika enile tokouya peya

doo kogopene tetepo takoane wakene waku. ⁹Akolaliyo no Keraisu-pala moa lipukamotoane ni tuku. Nitikuno, Mosesene totono patu kautakoane kawamekene Keraisuke-kama wene tugoane mekulu tokome no poanele toamene ago tetepo takoa moa lipukako. Nipa Keraisuke wene tugo meki peyapa poanele toamene yene tetepo takoa meko toa eni toko. ¹⁰Keraisu einago wene tootapeane meadene uku. Ni one tuaneyya pikata kama pokome tane tele patu kautakoane meadene uku. Ni one tete moko kakene toanepa one-pala odenekata tuou toane tekene one-pala odene wene plane mekene tete noma poadene uku. ¹¹Nipa no tukoluka Akolaliyo moa kamotokoo tokolo nepikene oneke nate wene plane meku.

Pote Wipitia Meatekota

Teyapea Pitimoa Poatekomo

¹²Ina ukuna toane epetekoane meateku kotuke kakoane wete meane togamukuyake Keraisuyo nopa one wa takoa motokome tamene wa yametekale toane togatepeou wane pa toma yaku-ye. ¹³Anu oya-lawe eni epetekoane meane togateku toane wete meane togamukuno wene pikuyake eya tuku. Ali-kiti teyapea moa patukanali yotokete teyapea-kama pote mukiti lono pekoa enamou toane tekene Akolalinele pegetoane takakoule-kitike wene piitikameneya meane one naniko takatekule timini muno plane kutupeane wedoane takama puku. ¹⁴Nipa Akolaliyo Keraisu Yesuke tokome no kei pia yameatekoya monoano noo wa kayo okolo a tibuke mopadenepa pone wipitiatekuta lene wikaneya teyapema-kama puku.

¹⁵Keraisu-nole wedoa wene toa takaki-kiti kime ina uku toa litikilepa nopala

odene wene pianeya mea tomotoane uku. Nitamekete pade wene pianeya meadekolipa Akolaliyo i i wa mane oa moa wene taka taka too. ¹⁶Nitatekoyake enile toateko totono namolo litia toma nokoona toa pa litia toomoa pato. Pegene kakoa tewitiko wawamato.

¹⁷Anu oya-lawe Akolalinele takama poatekoi adeka plane toma yakounakale litia toomoa pamene. Totome toma yakoona toa litia tiki-kiti kini tikileka litia tamene. ¹⁸Kipala lugutukoane okounakamo opi komo oane mekene wa lokoane ukuno, yakamene. Ali kainya matiyame Keraisu yomo lekaneyake tu-anemo pamo tetepo takoa waki. Nipa onepala poi teia mekete tiki. ¹⁹Akolaliyo e yene wia atukoo. Kini lene tepe eyame tamene wa oka toa-kama litia tootapekilepa Akolalike wene piitikameneya mea tiki. Eko ali atoa ya takanele eni toake kini wa kei pia kaki. Nipa pa itonoleke-kama wene piitikaneya mea tiki. ²⁰Totome pade nitamoko. Totopa a tibuke pote meateko yeneno, nitamato wa ali atoa toa motoko ago Ali Muno Keraisu Yesu aida kawa wakapea nomotoa nepia wedia meko. ²¹Einago wakapea nokomepa tone pa tigini moa weneya tigini latikakala too. Nipa one pa tootapeneya kako toa eni moa kakakilepa padeya padeya peya oneke-kama lukoa memotoa toko teleme too.

4 Nitoono, anu oya-lawe kipala ina ukuna toa Ali Muno patu poapeneya kautakoa kamene. Kipa anu kolotini yene enadiya wane kiwike kolotine yakene uku. Nipa Akolaliyo no kei pikome sile meou toa i yene neke wa kiwi no meteka tokolo uku.

Poloyo Wipitikome Mane Mane Akenemo

²Anu oya atoata Yuodiya Sidikita Ali Muno-pala lipua mekete odene weneta

piitakutukoa meamene wane kita kowitoane uku. ³Anu oya nepa no-pala tauta toa yakona teke wini atoata auapeamene. Kitame eya tokoileke nitamene. Eya ago Kelemene ete oya ali-kiti totome Yesunomo oa aua yakooka einatoatame toto-pala opia yawa auapekala tokoi. Ete oya ali-kiti wane ukupa Akolaliyo mea kawatiki yene i i wa one bokuke wia mekakilepa kini ibinika wia mekapiane ali-kitike uku.

⁴Ali Munoke wedianeya-kama meamene. Enipa wa lokoane uku. Wedianeya-kama meamene. ⁵Ali atoa peyame enemotono, poti uutukoa yamene. Ali Muno wakapea noateko tigotokolo ni uku. ⁶Tepene mama moameamene. Nipa ke enekakale mea ni kinikiya pade toamokalepa Akolali yakoa kowitamene. Ke wa yakoa kowitamene. ⁷Nitikalipa kini kowitikoimo yakoa tokome tepe kolotini kilikoa pikoo. Nipa Keraisu Yesu-pala lipua mekete tepe kolotini kilikoa pianeya memotoa yopimoa poo. Akolaliyo edikakolepa i wa totome wene toa amele tokoya mena.

⁸Anu oya-lawe kipala i wipitiane ukule-kitike wene piitikaneya meamene. Pademo pademo niminimo ni padele padele kei piatikile ni padele padele kiyi akenele ni padele padele wene moa koigamenele ni padele padele koniyole ni padele padele wene epetekanele enika enileke wene piitikaneya meamene. Nipa ele kule epetanele ni ele kule kei piatikile-kama wene taneya meamene. ⁹Kiwi i i wane mane mane oane olaukakouna toa toomoa pamene. Nipa pademo pademo okoumo yakoa moa padele padele tokoule enoa moa tokoina toa pa litia toma pamene. Nitikalipa tepe kolotini kilikoa pikako ago Akolali kipala odeneka meoo.

Pilipai Yename Kinikiya Pade Takoa Moa

Poloke Wetekakala Tanemo

¹⁰Kime no namolo mama motekete tokoinakale opi wa tikike Ali Muno-pala ke wane kolotone meku. Papete no mama motekete auapeou wa wene pikoinake auapeamele toamokale wakoinake opi wa tiki. ¹¹Kipala eni ukupa no pa yawane pitiku wane wamuku. Padele padele witakoloka no wene togoitapeane yawane pitiku. ¹²Nipa padepete-kiti ponopene ago meane wa padepete-kiti kamo ago meane tuku. Nitane ago tekene noateku nee adekoa piko-peteka pa pitiku-peteka ke wane oane ni anukuya tubeya piko-peteka padeya deya toamokoloka ke wane tepe matakaketikoane yawane pitiku. ¹³Padele padele witakoloka no weye akoa tele takako ago Keraisu patu kautakoane kakene ele kule peya adekoane tamele toko.

¹⁴Nimo ukuyake ke enekakale mekou-pete kime no auapekoinake ke wane uku-ye. ¹⁵Nipa Yesunomo titiane oma yakene kini wini Masedonia ta meemotekene ete ta-kitikeka oane auane pokouka kini losuke oboai tiki-kiti kime odene no auapea kue moa wetekakala tokoina. Ete take yename mena. Enipa nimini ukutu-pe. ¹⁶Tesalonaika take pekene pa mekoluka nitikete kue eya moa wetekakala tokoina. ¹⁷Nimo ukupa eya kuya memotoane oikene mena. Nitamekene auapea no mekala tokoinakeya Akolaliyo kiwi kei pia nami witakakono wene pikene ni uku. ¹⁸Eina kue eyapa Epaperodaisi neme no Polono aua potokamene wa kime keda takoa moa wetekakilepa anu wene moa tagatapea tokoina. Akolaliyo eniyapa oneke lodo yoa kalono takoa

metane tetepo takoa wene epetaneya meko. ¹⁹Anu Akolaliyo kini weneka moa tagakomepa ke enekakale mea ni padeya-kiti toameneya pa mea tokolipa kini moatekoya mekala too. Keraisu Yesu-pala lipua mekoli tokome nitoo. ²⁰Toneketai Akolali onepa nitane agono, one kei-kama pima patoane uku. Ee nimini.

²¹Anu i wetekaku pipia moa oi mootokoapa Keraisu Yesu-pala lipua

meki peya wete meamene wa akamene-ye. Nopala odeneka meki-kitameka anu oya-lawe kiwi wete meamene-ye wa iki. ²²I Lome take Keraisu-pala lipua meki peyame wete meamene-ye wa kabunu koukoa iki. Ako odene tobou ago Sisa one pupu takoa meki yenameka anu oya-lawe kiwi wete meamene wa iki.

²³Tone Ali Muno Yesu Keraisuyo kini yomini pewe wia yopimotoane uku-ye. Opa anu agale eni.

KOLOSI

Poloyo Kolosi Yeneke Wia Wetekane Pipia

1 Polo nopa Akolaliyo one wene toopikale tokome Keraisu Yesuno agale oane auane yamotoa moa kakaka Aposelo ago i mekene uku. ²Tone oya ago Timosi totamepa Kolosi take Akolaline ali atoa Keraisuke wene tugoa meki-kiti tone oya-lawe kiwike i pipia wini wia wetekako-ye.

Toneketai Akolaliyo kiwi pewe wia tepe kolotini kilikoa pikoa tomotoane kini kowitikoane uku.

Poloyo Akolali-pala Ke Wa Kowitanemo

³Kini kowitikakete-kama tone Ali Muno agono etene Atai Akolali-pala ke wa okala toko. ⁴Keraisu Yesuke wene tugoa mea Akolaline yatene meki peyake wene mekoa tekete tikimo yatekooya tekete ni oko. ⁵Widikakilepa kini mea kakete moatekoya-kitipa Akolaliyo a tibuke pikoa katekako wa kolotini nepia mekete ni tiki. One eni tokomo titia yatekilepa Akolaline niminimopa Keraisunomo yatekoi-pete einapete titia yatekoi. ⁶Keraisunomo kiwi wini mekoika oa aua nekeneya yatekoimopa ta piko peyakaka pupitikama poko. Nitikolo yatekete eni take meki-kitame kinikinakale tewitikoala epetekoala mema yakete tiki. Nipa anu oya-lawe kime einakamo titia yatekoi-pete laigoapa ipa Akolaliyo ali atoa pewe witikome tokomo tadeko wa kinikinakale tewitikoala epetekoala mema yakete tiki toa tiki. ⁷Einakamopa tone kolotini ago Epaperasiyo i i wa kiwi olaukaneya. Keraisunole toto-pala odene wene pia takama yako agoke uku. Tou wa okole-kama tokala toko.

Einagopa toto luku wida nome mekome Keraisunomo olaukaneya. ⁸Einago oto nokome kiwi ko eya wa oka. Epetane Yomini kiwike awinaneya tokome yete pade ali atoake wene mekoa mekete tiki wa oka.

⁹Nikepa kiwi mekete tokoimo titikene yatekou-pete laigoane kini kowitikoane-kala meku. Eya wane oane kowitikakala tuku. Akolali neke wene pikole adekake kakoa wene tootapemotoapa Epetane Yomini e yene kiwike awia tagat-apekome i i wa wene takamoto no ta wane kini kowitikaku-ye. ¹⁰Nipa Ali Munagono wene moteketepa one wene epetekatiki toa ele kule epetanele-kama toomoa pomotoane ni uku. Epetane ku tuou toa ele kule epetanele-kama toa ni Akolali mekome tokole i i wa ate toa wene tomotoane tekene Akolali-pala eya wane kowitikaku. ¹¹E yene kiwi neke tele patu kautakoa kamotono, a tibuke pa tootapeneya meke telekole toko peku lawetoano ta. Ele kuleme ke enekakale meake nekele poti wene pia takoa togakete wedia memotono, nitamene wane kini kowitikoane uku. ¹²Kiniketai Akolali-pala ke wa omotoane uku. One wa takoa motane yename one a tibuke pa takalogakota moatikiyapa kimeka moamele toko wa one mana konomikiti moa latikakano, ke wa amene wane uku-ye. ¹³Totopa Setanuke lukoa mekete yomiyomu keneke yakooka toa mootokoapa one kolotini ago Keraisuyo talo toko take moa kakaka. ¹⁴Keraisu einagome tokake toto eni toa motikilepa tone poanele tokooke po letu mekakana keemu tokome toka.

Akolaline Yagono Ago Keraisuke Akenemo

¹⁵Akolali einagopa tone leneme enamele toamokoyake one yagono ago Keraisu Yesu ali latia toto mekota nekeneya. Akolaliyopa one

latikanakeya-kiti peya i agoke-kama lukoa memotoane tuku wa Keraisu einagopa one namolo opiane mana tetepo takoa ako odene tobou meateka ago latia kakaneya. ¹⁶Akolaliyo eya kuya peya latiou wa wene kibutukapikana toa Keraisu-palapa kelepitikoa latianeya. Nipa tibukeka itonokeka tone leneme enamokoya-kiti ni tone leneme enekoya-kiti ni tibu talo toa meki edelo ali-kiti ni kiwike loko toa tobou meki-kiti enika eni peyame onekele takamotoa Keraisuyo-kama latikala taneya. ¹⁷Eya kuya peya wete latiameneyake onepa pa mea kama nekeneya. Eniya peya pia kawa toateko toa pia kawa tomotoa oneme yopimoo noko. ¹⁸Akolaline ali atoa totopa one tigrini. Onepa tone tobou wane. Mea kama pikilepa one patu-kama kautakoa kakete toko. Akolaliyo tuane yene moa kamotokakilepa einago namolo takoa moa kamotokaneya. Ako odene tobou meateka ago memotoa nitaneya. ¹⁹Ni agopa Akolaliyo one kotuke-kama memotada wa one peku lawetetapeneya. ²⁰Nitoapa a tibukeka itonokeka meki peya one-pala odene wene pianeya memotoa eya taneya. Mana Keraisu lekane yomoke tuaneya kakata kamate ponokale tokome poi piato wa teigoa wakeneya.

²¹Papete kipa poanele toma yakoiya tekete Akolali-pala wene poaneya mekete ete pilia wakeneya. ²²Opa mana Keraisu yomo lekaneyake wia dekololi tukale tokome Akolaliyo kiwi oya kakoa meko. Nipa kime eya toa memotoa tokome taneya. Onekele-kama takoo wa one leneke poane wene takoa koikatapeneya mekete padeya namike akoo agale oatekale toamomotoa tokome taneya. ²³Edikoo meadetepa Keraisuke wedoa wene tugo meo one patu kautakoa kakete poapeneya kamene. Nipa onekemo oa metane

toa taatekoa toatekale nepia mekoina toa nepia mema pamene. Onekemo wane ukupa ta piko peyake oa pupitikanemoke uku. Einakamo oa aua yamene wa Akolaliyo Polo noka takoa moa kakaka tokolo uku.

Akolaliyo Polo Takoa Moa Kakanemo

²⁴Opi tete mokoane kakilepa kiwike toane motukuno, ke wane wediane meku. Nipa Keraisuyo one yatene ali atoa totopa one tigrini wa tetepo takakome kiwike tuku wa tete pegetoa moma yakene toane moma pone togou wane tete moma yaku. ²⁵One yatene meki-kiti kiwi auapemotoa tokome Akolaliyo noka takoa moa kakaka. Nipa onekemo pine ina ina wa toaweane akatapemotoa ni toka. ²⁶Papete mali ponoka toa-kama itonoke pitikoi peya-pala one eni taatekoa toatekamopa kaukoa mema nekeneyake opa one wa takoa motane yene peetapea oko. ²⁷Keraisu kini tepene nome mekomo kamo takou toa eni peetapea ikilepa e ku pa yatene-kitika one take pa tootapeneya mea kamotoa taatekoa tokomo eni okome toko. ²⁸Nitikonono, Keraisu einago ko-kama totome oma yako. Nipa Akolaliyo wene takako toa ali atoa peya mane mane oa olaukoa tikilepa Keraisu patu kautakoa kakete epeteko meatiki kotuke kakoa meemoa pomotoa tokome toko. ²⁹Nitimotou wane pupuke-kama pebetekaneya wili toane kakilepa Keraisuno tele patu kautakoane kakene tuku.

2 Kipala imo ikilepa kiwika Leo-disia take meki-kitika anu lene timini enameneya meki-kitika mama mati motekene tekene kiwi peyanele wedoane takaku pekene tukumo wene toamotoane uku. ²Kini wene weye akaneya mea odene wene pianeya meato wa wene mekanali yoa tomatadiyano wene pikene ni uku. Edikoo mekolipa Akolaliyo kiwi kamo takatapeou toa eya too.

One papete wene toopianemo kaukoa mema nekene toa taatekoa tane agopa Keraisu tadeko wa kime wene tootape-motoa too. ³Etenane peku nootapeane agoke uku. Akolali wene muno meaneya mea pademo pademota wene taneya mea toko toa i i wa oneme-kama toaweaa okoya. Nipa potipiane kamoya-kiti yawa meou toa tokolo uku. ⁴Panagome agale muno pewe kakoa i i wa kiwi oa yotokakaya tokolo ni uku. ⁵Ta padeka mati mekeneke kiwi pakeke none menou toane mekene enekulu kipa odene wene pianeya mea Keraisuke wedoa wene tugo- mea tikile enoane tekene wediane meku.

Keraisu Patu Kautakoa Kama Pamene

⁶Keraisu Yesupa kini Ali Muno wa pegetoa lukoa mekete tokoina toa one patu kautakoa kama pamene. ⁷Yomo pade pema itonoke epeteko witakome teke yukuka yekeikata wetekou toa eya toma pamene. Kiwi olaukanele tekete Keraisu patu poapeneya kautakoa kakete onekele wedoa takama yamene. Akolali-pala ke wa-kala oa nitamene.

⁸Pade ali-kitamepa kini kau- mikitame emo kumo pamo olaukama nekenele litia tato wa pa itono peku lawetoa kiwi oa yotokakayano, wedoa meamene. Dikane yene Keraisuno agale patu kautakoa kawameneya nitoino, yakameamene. ⁹Keraisu einago tononolepepu kakeneya nikilepa etenane peku-kama nakene ago eni nekeneya. ¹⁰A tibukeka itonokeka mea telekole toa yopiki peya oneke-kama lukoa meki. Keraisu einago-pala anu oya-lawe kiwi lipua mekili tokome Akolaliyo one eni nakene peku lawetoa tagatapeko. ¹¹Nika kiwi mone pa yeneke Akolaliyo kepene teigane yene tetepo takoa one wa takoa motikilepa Keraisu einago-pala lipua mekike toko. Kini tepene witako poanele Keraisuyo

moa kogamu taneyake ni toko. Nipa pa alime pa tokoo kepene teigoo adeka pianeyake tokoya mena. ¹²One yene kime ue motikilepa Keraisu-pala odeneka dekoa oloyo tane tetepo taneya mea tokoi. Nika Keraisu-pala odeneka dekoa moa kamotokane tetepo taneya mea tokoi. Nipa Akolaliyo telekole toa moa kamotokamele toko wa oneke wene tugoa mekete nitikoi. Keraisu tuaneyaa pikale moa kamotokane agoke uku. ¹³Papete kepene teigamene pa yene kini namolo poane wene litikete Akolaline totono tetekaku pekete tokoli Akolaliyo tuane yene tetepo takoa wakeneya. Nitaneyake opa mea kama poati wa Keraisu-pala lipukoa mekaneya. Nipa tone tokoo poaneleke po letu mekakana keemu tokome taneya. ¹⁴Nipa Moseseyo yametane totono tetekaku pekete tokooke po letu pima nokana toa kibu moo tokake Akolaliyo eni letu keemu taneya. Eni totonopa yomo lekaneyake wia dekou toa katekoa wakome taneya. ¹⁵Nitoapa a tibuke Setanuno peku noa telekole toa meki-yene-pala eya taneya. Poi tobou agome-kiti ali atoane lene yoto kakome po kakoa lia aua pou toa eni yene moa kawikatapeneya. Keraisu yomo lekaneyake tukale tokome taneya.

¹⁶Nitaneyano, pade ali-kitame ue nee eya padeya kekaneya latikoa ni malikeka tokene kabepo kaka-peteka ko mea pupu toamoko-peteka kini losule toko toa mone pa yene kime litia toamiki wa kikoa akokolipa yakoa toameamene. ¹⁷Enika eni losule tikilepa Akolaliyo nani taatekoa toatekale pa tekei toa adeka pima nekene toa tiki. Keraisu wete nome taatekoa taneyake tiki. ¹⁸Dikaki yene kini wa lede keku meane alikiti tetepo takakete edelo yenanele takama yato wa kiwi oa yotokakayano, yakameamene. Nipa pulete ele kule enekou agome ukuno, yakoa tamene

wa mate agale ou toa ikilepa pa itono peku noa tekete iki. ¹⁹Nilepa tone tobou kakago Keraisu-pala moa lipukaneyake wawa etepea yakete tiki. One tigini kakaku wa Akolaliyo toto katea pitakaya wa Keraisu oneke-kama dekamoa lipukoai toko ago eni pilia wakete tiki.

²⁰Kipa Keraisu-pala odeneka yomo lekaneyake wia dekaneya kawa tuou toa pegetoa nakoina itono pekupa wakoinake edoa wa naki-pe. ²¹Nipa iya piko kawamoa eya noamoa padeya mitikamoa tamene wa papete olaukanelepa edoa wa litia toadete-pe. ²²Enika eni pia kawamatekoya-kiti kekoa wakilepa ali-kitame kini weneme wene kibututukoa olaukanele litia tiki. Enika eni ue nee eya nootokoapa wa pade oyake moa namele toamokoyano, enika eniyamepa kini wene edoa moa koigoo-pe. ²³E yenamepa kini losule wedoa toa ni nate wene pianeya mea ni kini tigini wa tete meou toa eya kuya wawa noamoa tiki. Nipa wene muno meane yename olaukanele tuku wa tekete tiki. Padele poanele-kiti kini weneke wa witakoa kibutua toamoo wa wene pia tikiyake pata pale tekete tiki.

Keraisu-pala Lipua Mekete Toatekomo

3 Kipa Keraisu-pala odeneka moa kamotokane tetepo taneya meki. A tibukepa Akolaline nimini yono kounoke Keraisu tobou ago mea kakono, aida meane kawateku peku noada wa wene pianeya meamene. ²A tibuke mea kakete toatikileke-kama wene piitikaneya meamene. Pa itonoleke wene piitikaneya meameamene. ³Kipa Keraisu-pala odeneka tuane tetepo taneya meki. Tuane alime-kiti itonolepa edoa wa tomotoa-pe. Opi Keraisu Akolali mekota mekome one yono tatonoke meati wa kiwi potipia

yopikoa kako. ⁴Kiwi mea kakako ago Keraisu wakapea nokale kipa onepala odeneka kakete one kaka toa pa teleta takatapeneya kawei.

Namolole Tewitikoa Wenele Toma Pamene

⁵Kipa Keraisu meko toa meoino, pa itonole eya toadiya wa wene pikile tewitikoa wamene. Atoa liou abele tou enika eni poanele ele kule toane potokou ni eya kuya ako-kama mou wa wene pia toameamene. Eya kuya ako-kama mou wa itonoya-kiti tobou kakakilepa Akolali odene tobou kakamele tokoyake tiki. ⁶Ali atoame enika enile toma yakili enekome Akolaliyo kibu mou wa kotimi yoa meko. ⁷Papete kimeka enika enile toadiya wa wene pia mea etepea tuku pekete tokoi.

⁸Opi pade kinikinakale tewitikoa waketepa eya-kiti toameamene. Kotimi yoa ali atoa-pala bu oa lene pia eko pade ali atoa-pala akoo agale oa tiyo moa toameamene. ⁹⁻¹⁰Ete oto wa kapene agale wameamene wane uku. Kini namolole poanele toma yakoinakalepa namolo mamina takoo wawa eina luku weneya mamina moa kawou toa poane wene wawa epetane wene pianeya yakili tekene ni uku. Widikoa memotoa toko ago Akolali kotu kakoo meadete poti toma peketepa one wene tootapeneya meoi. ¹¹Nitoino, Akolaliyo pa yatene agoka Yu yatene agoka takoo enamoa ni kepene teigamene yateneka kepene teigane yateneka takoo enamoa toko. E ku pa yateneka kueme topo toa moa egetane yeneka ta pine yeneka takoo enamoko. Ako odene kako Keraisu toto peyake awinaneya mekono, Akolaliyo toto peya odene yatene tetepo takoapa Keraisuno yatene wa oko.

¹²Akolaliyo onekele takamotoa kipa one kolotine yene wa takoo

motaneyano, eya toma pamene. Yete pade ali atoa mama moa auapeamene. Ni nate wene pianeya mea uutukoa poti yawa tamene. ¹³Nipa kiwi padamedo poanele tokalepa poanele ete topo takamekete eina poanele tokake po letu mekakoina keetapea wawa ete oto wa mama moamene. Nipa Ali Munoyo kini poanele-kala tokoike po letu pima nokana kemu toa wakene toa tamene. ¹⁴Nitoapa eya tobou kakoa tamene. Ete oto wa wene mekanali yoma pamene. Nile teketepa epetekoa meatiki toa odene wene-kama pianeya meoi. ¹⁵Keraisuyo one peku lawetekome yametekana toa wene odene pianeya mea tepe kolotini kilikoa pimotoa meamene. Akolaliyo kipa one wa takoa kayo oa motikilepa edikoa meemoa pomotoa tokome taneya. Nipa odene ago Keraisu-pala-kama moa lipukoa odene tigini tetepo takoa taneyano, ke wa okala tamene. ¹⁶Kamoya-kiti mou toa Keraisunomo-kama yakoa moamene. Akolaliyo wene takako toa ete oto wa olaukoa mane mane oa tamene. Nitoa eya kuya lo agaleka Same agaleka ikilepa kini tepene meaneya yawa Akolali-pala ke wa oa tamene. ¹⁷Ele kule toa emo kumo oa tikikaka Ali Muno Yesuno ibini-kama wedekoa one patu kautakoa kakete tamene. Nitiketepa Atai Akolali-pala ke wa okala tamene.

Keraisu Ali Atoa Mekete Toatikimo

¹⁸Atoa yatene kinikaneke poti lukoa meamene. Ali Munoke wene tugoa meketepa edikoa meamedikili ni uku. ¹⁹Ali yatene kinikatuke wene mekoa mema pamene. Tete eya meameamene. ²⁰Mati-kiti kiniketai kinikaquatame okoi toa-kama litia tamene. Nile tadekolipa Ali Munagono wene epetekatekoile tekete toi. ²¹Etene yatene kini mana kono-mikiti timini natekatikile

toameamene. Kini wene keda taneya mea etepea pokaya tokolo ni uku. ²²Kueme topo toa moa egetane ali atoa kini pine yename okoi toa-kama tamene. Pinago kakakoane no wa kei pimotoane tekene onekele wedoane takatekuyake opi kote aumoane tuku wa pale toameamene. Nitameneya Ali Munagoke poti wene piitikaneya mea kinikile wedoa takamene. ²³Nipa pupu pinagonole takaketeka ipa Ali Munagonole takou toane tuku wa wedoa takakala tamene. ²⁴Nipa kime edikakolopa Ali Munagome topo takakome one mana kono-mikiti latikakome kini moatekoya kotuke kakoa meoo wa wene taneya mea tamene. Ali Muno Keraisunole takama yakiya. ²⁵Poanele tiki yene-pala Akolaliyo topo takoa kibu moademe toko. Nipa eni yene peya midi pikoapa kini tane toa nami wia kibu mokala too.

4 Ta pine yene kini kueme topo toa moa egetane yene talo tekete toatiki toa epetekoa talo tamene. Nipa kiwi talo toko agopa a tibuke meko wa wene tekete tamene.

Poloyo Wipitikome Mane Mane Akenemo

²Akolali-pala kowitikala tamene. Nipa kote au moameneya kowitiketepa one-pala ke wa oa kowitamene. ³Toneka kowitikamene-ye. Akolaliyo ile tou wa papete wene toopia kaukoa mema nekenele Keraisuyo taatekoa taneya. One eni tanemo totome i i wa oma yakookepa po yapu po kakaneya pitikuno, onekemo toawe akateko ka yamea ta wa tone kowitikamene. ⁴Nipa no einagome einakamo keleyo toawe akateka toa omotono ta wa anu kowitikamene-ye.

⁵Keraisuromo yakoa moamene yene pakeke meketepa wene muno meaneya meamene. Keraisuromo oatikika-kama

onekemo i i wa toawe a okala tamene. ⁶Dikane yene-pala ko ikilepa kini wene kakoa epenemo-kama oa tamene. Nitiketepa e yene-pala agale topo takoa auapeatiki toa wene kibututukoa mea okala tamene.

Poloyo Wipitikome Akenemo

⁷Eya ago Tikikasi wida nokome anu toma yaku ko peya akanoo. Einago tone nimini oya agome Ali Muno agonole toto-pala odeneka takama yakomepa wedoa-kama takako. ⁸Nitane ago kiwi mekita wida wetekakilepa toto mea tokomo wene takoa ni kini wene weye akoa tomotoane tekene tuku. ⁹Einago Tikisasi-pala eya ago Onisimasi neka opia pamene wane wetekaku-ye. Einagopa kiwi Kolosi yatene ago toto oya kakoa wene mekoa meko ago oneme tou wa okole-kama toko. Einagota kiwi mekita wida nekete i Lome take tanemo-kama akatapeoi.

¹⁰Eya agota no-pala odeneka po yapu pitiko ago Arisakasi ni Banabasine pewenago Make einagotamepa kiwi epetekoa meamene wa iki-ye. Make einago wida nokalepa makutukoa moamene. Onepala tamene wane papete oane wetekakounakamo kime wete yatekete tokoi. ¹¹Ni Yesu one pade ibini Yasasi einagomeka kiwi epetekoa meamene wa oko-ye. Akolaliyo ali atoa talo toa mekomo i Lome take mekene oane meku-mene eni Yu alimename odene no mape moa meki. Nitao auapekete anu wene weye akoa meki. Ete Yu yename Yesuno agale yakoa moake no auapeamiki.

¹²Kiwi Kolosi yatene ago pade Epaperasiyoka kiwi epetekoa meamene wa oko-ye. Einago Keraisu Yesunole takama yako agome ete pia oto pia eya wa kini kowitikako. Akolali neke wene pikole toa meatiki toa toa togamotono ne patu kautakoa poapeneya kakete nitimotono ta wa kini kowitikakala toko-ye. ¹³Nitao kiwi Kolosi yene auapeou wa wedoa kowitiko kakilepa eya tatake Leodisia Irapolise tatake meki-kitaneka kowitikako-ye. Enipa etene nimini uku. ¹⁴Eya agota tone kolotini ago dokosa ago Luke Dimasita kitameka kiwi epetekoa meamene wa iki-ye.

¹⁵Tone oya-lawe Leodisia take meki-kiti-pala epetekoa meamene wa akamene. Eya atoa Nimepa one-palaka one yapu keneke losu toa koukoai tiki ali atoa-palaka epetekoa meamene wa akamene-ye. ¹⁶I wiane wetekaku pipiapa Yesuno ali atoame yakamotono, oi motokamene-ye. Nitao oi mootokoapa Leodisia take meki-kitameka yakamotono, eni take moa wetekamene. Ni Leodisia take wetekaku pipiapa Kolosi yene kime oia moa oi moamene. ¹⁷Eya ago Akipaisi-pala eya wa akamene-ye. Nepa Ali Muno agome oyametekana toa onekele takoa togamene wa akamene.

¹⁸No Poloyopa kiwi wete meamene wane wipitiane ukumopa noanu yoname i witiku-ye. No po kakaneya po yapu pitiku wa wene taneya meamene. Akolaliyo kiwi pewe wia kamotoane kowitikoane uku-ye.

Opa anu agale eni.

1 TESALONAIKA

Poloyo Tesalonaika Yeneke

Namolo Takoa Wia Wetekane Pipia

1 Polo nopa i mekene uku. Sailasi tota Timosi toa i pipia wia mekakilepa Tesalonaika take Atai Akolali Ali Muno Keraisu Yesuta-pala lipua meki-kiti kini pipia wia mekako-ye.

Akolaliyo kiwi pewe wia tepe kolotini kilikoa pikoa tomoatane kini kowitikoane uku-ye.

Tesalonaika Yene Yesuke Wene Tuganemo

²Kiwi peyake Akolali-pala ke wa oa kini ibinika i ali i atoa wa oa kini kowitikakala toko. ³Nika tone Atai Akolaline leneke meketepa kini eya tekete tikile wene kibusua meko. Keraisuke wene tugo mekete onekele wedoa takama yawa ni yete pade ali atoake wene mekoa mekete mama moa auapea ni tone Ali Muno Yesu Keraisuyo wipitikome toatekole nepia meato wa ke enekakolo meketeke wedianeya nepiakala mekete tiki.

⁴Anu oya-lawe Akolaliyo kiwike wene mekoa mekome kipa one kolotini yene wa takoa motaneyano wene tekete oko. ⁵Kerai sunomo kiwi mekoika wida oa aua neketepa tone wene kibusua oko agale wamokoona. Epetane Yominine tele patu kautakoa kakete ikilepa totome niminimo-kama oko wa wene tekete oa metekoona. Kiwi pakeke nitoo mekete kiwi auapea tokoonakale kime wene taneya mekete tiki. ⁶Kiwi pakeke toma yakoole enekete kimeka litia tato wa Ali Muno ago tone tokoole kotukoa tokoina. Nitoapa ke-kala enekakale meketeke Kerai sunomo yakoa motokoina. Nipa

Epetane Yominio wedikakale ke wa yakoa motokoina. ⁷Nitikolipa Kerai suno yatene Masedonia Geriki tata ludu pitikoi peyame kini wini Tesalonaika tokoinakale adeka moa tokala tokoi. ⁸Ali Muno agonomo wida mo wia kakoimopa talia koume ta kautameou toa Masedonia Geriki tata ludu oa pupitikatapeneya. Kini Akolalike wene tugo mekete tikimoka ta piko peyake oa pupitikatapeneya. Nitaneyano, kinikimopa totome oateko toa mena. Ta piko peya pitiki yatene ali atoame wete yakatapekete tekete i i wa kiwi Tesalonaika yename tokoi ko okala tekete tiki. ⁹Nipa toto makutukoa motekete tokoi ko ikilepa eya wa ikiya. Tesalonaika yename nimini mea kama poko ago Akolali onekele takama pato wa kini yoname latia kowitikoinakeya-kiti wakete onekele-kama takama yakete tiki. ¹⁰Ni one mana Yesu a tibu mea wakapea nomotoa nepia mekete tiki wa ta piko peya pitiki yatene ali atoame kiwi ko okala tekete tiki. Kini nepikoa meki ago Yesu einagopa tuaneyaya pikale Akolaliyo moa kamotokaneyaya. Wa naniko Akolaliyo poanele tokoi ali atoa kibu motokalepa toto toa moo.

Polo Tesalonaika Take Mekome Tanemo

2 Anu oya-lawepa toto kini Tesalonaika take wida ugu note meketepa Akolalinele pata pale takamokoona. Enipa nimini ukutu-pe. ²Nipa Pilipai take pote mekolo eni yename toto paya tetepo takoa wakete tete metekoiyake tone Akolaline tele patu kautakoa kakete onekemo Tesalonaika takeka wida toawe opato wa atiki toa onokoona. Padeka-kitame yakamoto wa toto oa ketekakoiyake wida note toawe onokoona. ³Opika onekemo yakoa moamene wa totome olaukakilepa pademo koiganemo

olaukakoya mena. Nipa atoa lia enile toa enato, i yene oa yotokoa enato wa tolopi toamoko. ⁴Nitamekete eya toko. I yene totome onekemo oiake akamele toko wa Akolaliyo takoa moa kakaka tokolo i i wa toaweaa oko-ye. Nipa ali atoa wedikadete tekete nitato wa totome tokona mena. Tone tepene piko wene tetao enoai toko ago Akolali wedikadete ni toko. ⁵Kiwi pakeke mekete taba po pitikoa wamokoona. Enipa nimini ukutu-pe. Akolaline leneke kakene eya wane uku. Kinikiya lede moadete onekemo olaukato wa olaukakoona mena. ⁶Ni yete pade ali atoameka anu oya-lawe kimeka toto kei pimotoa toa enamokoo. ⁷Totopa Keraisuno Aposelo ali-mene tekete kinikiya keda takoa meati wa amelepa tokoyake nimo wamokoona. Kiwi pakeke wida meketepa niname-kiti one mati-kiti mama moa poti pikoa mekome toko toa tokoona. ⁸Kiwiwe wene mekoa mekoo matiyame Keraisunomo oa meato wa oa metekilepa kiwi auapea mea tuadekolopa oyake tuoo wa tokoona. Kiwiwe wene mekoa mekoo matiyame nitikoona. ⁹Kiwi pakeke wida mekete eya toa kagoonakale kime wene taneya mekete tiki. Akolalinemo oa meteketepa kini wene keda takaya tokale kue eya manoe wa oia moamokoona. Nitamekete tone moatekooya moadetepa ete pia oto pia tone yoname pupu toa mekoo.

¹⁰Nitoapa Keraisuke wene tugoa meane yene kiwi pakeke wida mekete poane wene takoa koikatapeneya kiyo akenele-kama tokoona. Nitoa mekete padeya namike ete-kitame toto koiso akatekoile toamokoo. Enipa Akolaliyoka kimeka enekakoa toma yakoonamo uku. ¹¹⁻¹²Etename-kiti one mati-kiti mama motokome toko toa totome eyaka tokoona. Kini kini mekoi toa kini wene weye akoo eya wa mane

oa moa toma yakoono. Akolaliyo one talo tuku take pa teleta tootapeneya mea kawatiki peku lawetou wa kiwi kayo oa motokono, one yatene meatiki toa meamene wa totome kiwi mama moa tokoona. Enipa nimini ukutu-pe.

¹³Ni kime eya tokoinakaleke Akolali-pala ke wa-kama oko-ye. Akolaline agale totome oa metekolo yakatekoapa pa aline agale tetepo takamo ipa Akolaline agale tadeko wa moa lukakoina. One eni agalepa oneke wene tugoa meki-kiti kime yakoa toma pamene wa laweteka pekuke uku. ¹⁴Yudea take Akolaline ali atoame Keraisu Yesu patu kautakoa kakete toma yakete tiki toa Tesalonaika yene kime kotukoa tekete tiki. Nipa ete Yu yename o Yu yene tete-kala metekiyake Yesunole pa takama yaki toapa wini takeka ete yename kiwika tete-kala metekiyake onekele wida pa takama yakete tiki. ¹⁵Dikane Yu yenamepa Akolaline agale toaweaa akane ali-kiti papete wia tukoa Ali Muno Yesuka wia tukoa taneya. Totoka poe wa litia wetekakoi. Enipa Akolali timini natekoo ete yene peya-pala poi teja mea tiki. ¹⁶Nipa Akolaliyo mone pa yatene ali atoa toa motokaya tokolo Yesunomo toaweaa akateko ka keteka keteka toa kaki. Kini poanele nitoa toma-kala pote wipitikete poanele pinepa mete eya kapetekou toa eni tiki. Nitikili tokome Akolaliyo kiwi kibu mouno nepio wa yopikoa kako.

Poloyo Tesalonaika Yene Mekoika Wa

Ugu Poadiya Wa

Wene Pianeya Meanemo

¹⁷Anu oya-lawe kiwi wida memotoa tewitikoa i take pa tekei note mekolopa tone wenepa wida nekeneyake ikapa kepene pa mekoo. Nipa kini lene timini enadiya wa wene pianeya mekete wida noadete wili tokoa kakoo-ye.

¹⁸Wida nou wa wene pianeya mekete ni tokoo. No Polo kiwi meki ta wakapeane noadene wili tokala tokouyake Setanu einagome toto keteka keteka toa kaka.

¹⁹Kini lene timini enadiya wa toto wedia mekilepa edoa tokoto-pe. Tone Ali Muno Yesu wakapea nokalepa Tesalonaika yene kini wini epeteko tokoinakale i i wa totome Yesu-pala mate agale ou toa toawe okolo yatekome toto kei pioo wa wedia meko. ²⁰Ee nimini, kini wini tokoinakaleke Akolaliyo toto kei pioo tokolo wene yapekolo meko-ye.

3 Totome kiwi mama motokoo matiyame eya toatekoo oi pedoa pia tokoo. Sailasi tota Atena take kidenalita meoono, ²ne pa wa tone oyago Timosi wida moa wetekakoo. Timosi einagome Akolalinele takama yakome Keraisuke oa epetekane agale oa aua yako. Einago wini wetekakilepa kini wene weye akoo Yesuke wedoa wene tugoa mema pomotono, mane mane akapoano pa wa wetekakoo. ³Wini take ete yename kipala poi teja mekoli kiwi odene agoka etepea pokaya tokale ni tokoo. Toto peya ke-kala enekakolo meamedeko wa kime wene tekete tiki.

⁴Papete kiwi pakeke wida meketepa toto peyame tete moko kamedeko wa ete yename toto-pala poi teiatekoimo oa pikoonakale wida wete taatekoa tokome toko. Enipa nimini ukutu-pe.

⁵Nikepa kiwi mama motokou matiyame Timosi-pala eya wane okou. Eni yene kipa kiwi likoa eneko ago Setanuyo likoa enekale etepea pokoi patu. Kiwi pakeke Akolalinele takakilepa ipe yolo enadene keneya pata pale tokou patuno, kini Yesuke wene tugoa mekete tikile enekapa wane Timosi wini moane wetekakou-ye.

Timosiyo Tesalonaika Yene Ko Okome

Polono Wene Weye Akoo Tanemo

⁶Opa Timosi kiwi mekoita wida tewitiko o to wakapea nokome tone wene epetekakome eya wa oka. Eni yene kiwi Yesuke wedoa wene tugoa mea kini kini wene mekanali yoa ni toto wene taneya mea ke wa wedia mekete tiki wa oka. Eya waka oka. Totome kini lene timini enadiya wa wene taneya meko toa kimeka tone lene timini enadiya wa wene taneya mekete tiki wa Timosiyo oka. ⁷Kini Keraisuke wene tugoa mekete tikimo totome eni yateketepa ke-kala enekakolo mea tete moko kawa teketeka ke wa kini wini mekete tikileke wene yapekolo meko. ⁸Kipa Ali Muno patu kautakoo poapeneya kakete tiki wa tone wene latai akeneya meko. ⁹Widikoo mekoi ko yakatekoa tone Akolaline leneke wedoa wedia kakono, one-pala ke wa-kama oko-ye. ¹⁰Nitoo ete pia oto pia Akolali kowitoo meketepa kini lene timini wa enoo wa oa ni onekemo pademo wene toamikimoka ni onekele padele katekoa takamikileka i i wa kiwi ooyamekutu toma poo wa totome kowitikala toko-ye.

¹¹Opa eyagota toneketai Akolali-pala tone Ali Muno Yesu Keraisuta Tesalonaika take pote meateko ka kitame yamea toe wa totome yakoo kowitiko. ¹²Ni kiwike wene wedoa meko meko toko toapa kini kini wedoa wene mekanali yoa yete pade ali atoakeka wene meko mema pomotono ta wane Ali Muno ago kowitikaku-ye. ¹³Ni kini wene weye akoano ta wane kini kowitikakilepa eya tomotono nitamene wane kowitikaku. Neke wene kiyo akaneya meki yene-pala opia wakapea noka-peteka anu Tesalonaika yene Atai Akolaline leneke atiki

toa kamotono ta. Papete padele poanele toameneya epetekoa-kama tomotono ta wane kini kowitikaku-ye.

Akolaline Wene Epetekakete Toatekole

4 Anu oya-lawe kipala eya wa wipitikete oko-ye. Akolaline wene epetekakete toatekoile totome i i wa kiwi mane mane okoona. Eina mane mane okoona toa kime litia tekete tiki. Opi Ali Muno Yesuno ibini wedekaketepa eya tamene wa kiwi kowitua oko-ye. Widikoa meki toa wedoa toomoa pamene. ²Ile tamene ile tamene wa Ali Muno Yesuno agale patu kautakoa kakete okoonakale kime wene tekete tiki. ³Akolaliyopa kiwi wene kiyo akeneya mea epetekoa toma pomotono wene pia mekono, mone koua piamatiki atoa-kiti-pala koua piameamene. ⁴Nitameneya kini atoa-pala koua mekilepa Akolaline lenekaka ete ali atoane lenekaka wene kiyo akeneya mea tamene. ⁵Nipa Akolali wene toameneya meki ali-kitame atoa-kiti poi motekete toa potokakete tiki toa toameamene. ⁶Neke oyago yotokoa one natono-pala koua pikile pade toameamene. Enile poanele tiki ali-kitipa Akolaliyo kibu moo. Kipala papete pubu okoona toa nitoono, toameamene. Ni edoa-mo. ⁷Akolaliyo totopa one wa kayo oa takoa motikilepa eni poanele tomotua tokoya mena. Onekele epetanele-kama takamotua ni toka. ⁸Panagome-kiti kipala i ukule wawa toamokomewa nipa aline agalepa kote tokolo wakoya mena. Akolaline agalepa kote tokolo wakoya. Nipa one Epetane Yomini kiwike awia mepoano pa wa moa wetekakago Akolaline agale eni wakoya.

⁹Keraiuno ali atoake wene mekoa mekete toatikile i i wane wiane mekatekule toamoko. Kini kini wene

mekanali yoma poatekoile Akolaliyo wete olaukatapeneyano, enileke pademoka wiane mekamuku-ye. ¹⁰Ee nimini, wini Masedonia take Yesunomo yakoa motokoi yene peyake wene mekoa mekete tiki. Widikoa moa patukoa kini oya-laweke wedoa wene mekoa meemoa pamene wa totome kiwi kowitua oko-ye. ¹¹Utanele-kama toane poti yawou wa wene pianeya yamene. Ni panagome onekele toa mekale eneketepa dikoa ta dikoa ta wa teiga teiga toameamene. Ni totome mane mane okoona toapa nee eya moadete kini yoname pupu toa mokala tamene. ¹²Yete pade ali atoame kiwi kei pimotono nitamene. Edikoa meketepa nipa ete ali-kitaneya oia moatiki toa mena.

Ali Muno Wakapea Noatekamo

¹³Anu oya-lawe kipala i ukule agopa taneya meamedikili eya wane uku-ye. Yesuke wene tugoa mea tua pekene ali atoake wene keda taneya meameamene. Nipa tuane ali atoa wa kamao poamoi wa wene pianeya meki-kiti tumai mekete tiki toa toameamene. Ni edoa-mo. ¹⁴Yesu tuake wa kamao pekenemo einapa nimini akenemo wa totome wene toko. Tuake kamao pekeneyano, Yesu-pala lipua mea tukoi peyapa Akolaliyo mana-pala odeneka wakapea nekete noati wa koua noo waka totome wene toko.

¹⁵Ali Muno agome olaukanemopa totome i okono yakamene. One wakapea noka-pete toto pa meadekolopa nipa onekele wene tugoa mea tukoi yene naniko nomotua toto namolo takoa Yesu kotua pikilepa toamoo. ¹⁶Nitamekete eya too. Titikilepa Akolaline bera ta pa piitakutukoa kakaka one ako edelo agome kayo telo ootapeoo. Nitikale Ali Muno agome kotua noe wa kayo oa ketipea noademe nokale Keraiuno wene

tugoa mea tukoi ali atoa ate kamao poi. ¹⁷Nititikaneyake toto tuameneya pa meko-kitipa one a tibuke kotua pikilepa eni yene-pala wedo pakeke moa obokaneya pekete poo. Nipa enipete titi-moa Ali Muno ago-pala pa mea kama kawoo. ¹⁸Kipala i ukumomepa kini kini wene weye akanali yoma pamene-ye.

Ali Muno Wakapea Nomotoa Nepia Meamene

5 Anu oya-lawe ina ukulepa dikoa taatekoa too, ipete taatekoa too wa totome kiwike pipia wia wetekateko toa mena. ²Ali Muno ago wakapea nikilepa kode ago keneya yomiyomu keneke kotikatapea noko toa noono kime wene tekete tiki. ³Ali atoamepa ipetepa kipala padele toameneya kilikoa meateko-peteno, atiki toa meato wa paya nou toa mekoli eya too. Mati kakene atoa kotikatapea mati mukiti nou toa kiwi mekoita poime keneya tulikatapeoo. Nitikale petoa poatekoika agopa taneya meoi. ⁴Ete yene nitoa meatikiyake anu oya-lawe kipa yomiyomu keneke meamiki. Ali Muno ago wakapea nikilepa anu oya-lawe kiwi lene kilikoa piameneya mekoika noo. ⁵Kiwi peyapa lou pa keneke yaki ali atoa. Anu oya-lawe totopa yomiyomu keneke yawamoko. ⁶Ete ali atoa atu pia meou toa atiki toa mekino, edikoa meamato. Atu piameneya mea wedetekoia yatoane uku. ⁷Ali atoa atu pitikilepa likonu tiki. Bia ue eya nokoa kawa leau akeneya yakileka likonu tiki. ⁸Toto pade nitamekete lou kako-pete yawa mekono, wedetekoia yakete eya tato. Poyo ago-kiti pinali one wa kaumotokome palanuke kapa petene moa awitikou toa tekete Akolalike wene tugoa mea yete pade ali atoake wene mekoa mea tato. Ni poyo ago poiike poademe kakome kapa nunagu moa wateou toa teketepa Akolaliyo

toto toa moonoo, ke wa nepia meato. Ni edoa-mo. ⁹Akolaliyo toto kibu moateka wene toopiamokome eya tou wa wene toopianeya. Tone Ali Muno Yesu Keraisuyo toatekaleke kiwi toane mou wa wene toopianeya. ¹⁰Keraisu taatekoa nokome totoke tokilepa eya tomotoa tokome taneya. One wakapea noka-pete toto wete tua pekedekoloka pa meadekoloka one-pala lipua meemoa pomotoa tokome taneya. ¹¹Nitaneyano, Akolaline yapu wikakou toa kini kini mama moa auapenali yoma piki toa pa edikama pamene.

Poloyo Wipitikome Akenemo

¹²Anu oya-lawe kiwi pakeke Akolalinele wedoa takama yaki-kitipa paya tetepo takameamene. Ali Muno agome i yene kiwi talo toa mane oa moa tamene wa moa kakane yeneke uku. ¹³Wini yename tikileke ke wa kiwi wedoa kei pia wene mekoa mea tamene. Kini kini odene wene piitakutukoa meamene. Tepe kolotini-pala kilikoa pimotoa meamene.

¹⁴Anu oya-lawe eya tamene wa kiwi kowitoo oko-ye. Kalabo wameneya yawa meki yene pupu wedoa tamene wa mane oa ni piti motaneya meki yene wene yapetekoia ni Akolalinele wedoa takama yawamiki yene auapea tamene. Ete yene peya mama moa uutukoa poti yopiamene. ¹⁵Ete-kitame kipala poanele tokolipa nipa poaneleme ete topo takameamene wa mane mane amene. Yesuke wene tugoa meki yene-palaka ete ali atoa-palaka epetanelekama toa enekala tamene. ¹⁶Ete pia oto pia wedia meamene. ¹⁷Ta pataka abuna Akolali kowitikala toa ¹⁸ele kuleme ke enekakale meketeka Akolali-pala ke wa oa tamene. Edikaketepa Akolaline wene motekete toi. Nipa Keraisu Yesu patu kautakoa kakete nitimotou wa Akolaliyo wene pikale eni tekete toi. ¹⁹Ni toe tu-

goa mou toa tekete Epetane Yominiyo ta wa okale tagoa toamokayano, one okale wedoa yakoa tamene. ²⁰Akolaliyo one agale toawe akaki ali-kiti imo akamene wa wene takakomopa pamo tetepo takoa wawameamene. ²¹Pademo pademo yateketepa nimini iki patu wa wene kikututukoa meapa kapenemo takoa wawa niminimo yakoa moa tamene. ²²Ele kule poanele tikile peya titi toma yamene.

²³Tone tepe kolotini kilikoa pikako ago Akolali-pala totome eya wa kini kowitikoa oko-ye. Neke wa takoa motokana yename nekele kiyo akenele takatiki kotu kakoa tomotono ta. Tone Ali Muno Yesu Keraisu wakapea nokaleka kini yomini kini tepene piko

wene kini tigini moa koigameneya meketepa ete-kitame padeya namike akoa agale oatikile toamomotono ta wa totome kini kowitikako-ye. ²⁴Kipa one wa kayo oa motoko agome tou wa oka toa-kama taatekoa tokala tokono, tone ina kowitikakomo yakoa too. ²⁵Anu oya-lawe toneka kowitikamene-ye.

²⁶Tone wini take meki oya-mikiti-pala ke wa kini yono motokamotoane uku-ye. ²⁷Ali Muno agono ibini wedekoane eya tamene waneka uku-ye. I wiane wetekaku pipia wida nokale Keraisuno ali atoa peyame yakamotono, oi motokamene. ²⁸Tone Ali Muno Yesu Keraisuyo kiwi peya pewe wia yopimotoane kini kowitikoane uku-ye.

Opa anu agale eni.

2 TESALONAIKA

Poloyo Tesalonaika Yeneke

Taku Takoa Wia Wetekane Pipia

1 I pipiapa no Polo Sailasita Timosi toa wia wetekako-ye. Nipa toneketai Akolali Ali Muno Yesu Keraisuta kita patu kautakoa kaki-kiti kini Tesalonaika take mekika wini wetekako-ye.

²Toneketai Akolali Ali Muno Yesu Keraisutame kiwi pewe wia tepe kolotini kilikoa pikoa toe wa kini kowitikako-ye.

³Tone oya-lawe kiwike Akolali-pala ke wa-kama amedeko. Yesunole takama pote kini kini wene mekanali yoa tikilepa kini namolo tokoinakale moa patukoa wedoa toomoa pikete tikili tekete ni oko-ye. ⁴Widikakilekepa Akolalinaline ali atoa koukoa meki toa totome eya wa mate agale ou toa oma yako. Ete yename kipala poi teja eni ke enekakolo mea tete-pala moma yaketeke Akolalike wedoa wene tugoa mea onekele takoa togoa tiki wa totome kiwi kei pia oma yako-ye.

Akolaliyo Ali Atoa Takoa Enekilepa

Kiyoke-kama Tokomo

⁵Kiwi widikoa mekino, Akolaliyo ali atoa kiyoke-kama takoa enoo tadekolo uku. One talo tuku take noatiki yene takoane eneku wa wini ke enekakolo mekete tikile Akolaliyo enekakolo ni uku. ⁶Akolaliyo edikoa kiyoke-kama tikilepa kiwi toa potokaki yene kibu moa too. ⁷Nitoapa tete mokoa kaki-kiti kiwi ko meamene wa toto-pala ko mekoo. Ali Muno Yesu a tibu kawa nokapete nitoo. One nikilepa one telekole toma yaki edelo ali-kiti-pala opia noo. ⁸Nitoa toe itipono-pala oa kakeneya nokome eya too. Akolali kote tokale

wene toameneya mekoi-kiti ni tone Ali Muno Yesunomo litia toamadete wakoi-kiti kini eni tokoike nami wia kibu mootapeoo. ⁹Nitoa kibu motokale moa atukatapeneya mea kawei. Nipa Ali Munono lene timini enameneya mea one telekole tokome pa tootapeneya mekata ketekaneya pa mea kawei. ¹⁰Enipete Ali Muno wakapea nikilepa one ali atoame one kei pia ni oneke wene tugoa mekoi peyame ke wa ka oa kawa tomotoo too. Kimeka Yesunomo wini oa metekoonakamo yakoa motokoina tekete nitoo.

¹¹Eni wene taneya mekete tone Akolali-pala eya wa kini kowitikakala toko-ye. Neke kayo oa motokana yene mea epetekatiki toa Tesalonaika yeneka mea epetekamotono ta wa kini kowitikako-ye. Nipa padele padele epetanele tou wa kime wene pia ni Yesuke wene tugoa mekete ile tou wa wene piki toa-kama toa togamotono, neke tele lukoa auapekala tamene wa kini kowitikako-ye. ¹²Eni kowitiko toa mea epetekakete kini Ali Muno Yesuno peku noa tokoile enekete ete yename Yesu dikane ago tadeko wa one kei pia kawei. Nipa toneketai Akolali-pala Ali Muno Yesu Keraisutame kiwi pewe-kama witikoile enekete ke wa kiwika kei pikala toi.

Akolali-pala Pine Wia Poi Teigo Ago

2 Anu oya-lawe tone Ali Muno Yesu Keraisu oto wakapea nokome toto moa koukatekamo olaukaketepa kipala eya wa oko-ye. ²Ali Munoyo ali atoa takoa enateko ta wete patadeko wa emo kumo okoimo kugu yateketepa eina eina wene bebo oa ka oa piti moameamene. Nipa panagome Akolaliyo akamene wa oka toane uku wa eni kugu yakoaka ni padame mo wia kakamo kugu yakoaka ni panagome no Polo-laweme pipia wia wetekakome oka toane uku wa eni kugu yakoaka ee nimini wa

yakoa moameamene. ³Pade-kitame enika enimo oa yotokakayano, eya wa wene taneya meamene. Eni ta wete patameneyake ali atoa peya matiyame Akolaline totono tagama yawei. Eya agoka Setanuno peku pine wia nootapea poanele-kama toko agoka keleyo witanoo. Akolaliyo moa atukateka agoke uku. ⁴Einago nokome eya too. Ali atoame iya godeke eya godeke lodo yato wa lodo yotokoia yode-kiti-pala poi teja paya tetepo takoa waoo. Ni ali atoame iya kowitato wa kowitikoiya peya paya tetepo takoa poi teima poo. Nitoa wipitikome onepa Akolali kaku wa Akolaline tobou losu yapu pome mepoo.

⁵Inapa kipala wida mekene okounakamo ukuno, nimini ukutu-pe. ⁶Einago noateka oi ponokale taatekoa noatekoyake papete panagome ka ketekako. One keleyo noateka ka ketekako agopa kime wene tekete tiki. ⁷Akolaline totono kautoa enoai tikilepa opi paigakoa mea toko. One noateko ka ketekoa kako agopa wete tewitikoa poameneyake nitoa meko. ⁸Wa naniko tewitikoa pokale eni poanele-kama tokago keleyo kawoo. Nitoa kakaka Ali Muno Yesu wakapea nokome moa atukoo. Nipa one oka poomeme wia tukoa one pa teleta tootapeneya nokame moa kautoa too. ⁹Nitategoyake papetepa eni poanele-kama tokago Setanu patu kautakoa kakome ele kule kapene telekole toka matiyame ali atoane wene kainya pikakala too. ¹⁰Nipa padele padele poanele tokome tua atua poatekoi yene tolopi tokala too. Eni yename Yesuke nimini akenemopa yateketeke ke wa wene mekamekete kiwi toa moatekale kote moa wakete tekete tua atua poi. ¹¹Nikepa eni yename kapene agale yakoa momotoa tokome Akolaliyo kini wene moa bebo akatapeoo. ¹²Eina

niminimo yakoa moamadete wakete poanele tato wa wedia mea tokoi peya kibu moademe nitoo.

Poapeneya Kamene

¹³Tone oya-lawe Ali Munono kolotini yene kiwikepa Akolali-pala ke wakama amedeko. Totome ke wa ikilepa Akolaliyo eya tanele-kitike toko. Tibu itonota wete latiameneyake kiwi toane mou wa takoa motaneya. Nipa one Epetane Yominiyo wene takaka toa itonole wawa onekele takama pote ni one niminimo yakoa moa tokoli toane mou wa takoa motaneya. ¹⁴Nitoo wa eni wene toopikana toa taatekakome eya toka. Keraisunomo totome oa aua yakomo yakoa momotoa tokome kiwi kayo oa motoka. Nipa tone Ali Muno Yesu Keraisu pa teleta tootapeneya meko peku kime noati wa kayo oa motoka. ¹⁵Nitikanano, anu oya-lawe kipala eina okoonakamopa kabunume oa mea pipia wia wetekakete oa tokoonakamo wedoa pikoa kato wa poapeneya kamene wa totome oko-ye.

¹⁶⁻¹⁷Akolali totoke wene mekoa mekome tokome eya toko. Tone wene weye-kama akoo ni kiwi auapekene dikouno, nepia meamene wa pewe wia kako. Nitikono, tone Ali Muno Yesu Keraisu toneketai Akolalita-pala eya wa kini kowitikako. Padele padele epetanele toa pademo pademo epetanemo oa totono, wene weye akoo auapeamene wa kini kowitikako-ye.

Poloyo One Kowitikamene Wa Akenemo

3 Tone oya-lawe kipala eya wa wipitia oko-ye. Tone kowitikakilepa Akolali-pala eya wa kowitikamene. Ali Muno agonomo wete oa pupitkamotono ta. Onekemo kime yakoa motekete ke wa kei pia tokoonakale ete

take pitiki yenameka yakoa tomotono ta wa kowitikamene-ye. ²Ali atoa peyame Keraisunomo yakoa moamikiyano, eya waka kowitikamene. Poanele toa etepea yaki-kitame toto-pala padele poanele tokoli toa moamene wa tone kowitikamene-ye.

³Ali Muno agome tou wa okale-kama toko. Nitane ago tokome kiwi poapeneya kamotoa yopia mekome poane ago Setanu ete pedeka pedeka too. ⁴One patu kautakoa kakete eya wa oko-ye. Tamene wa totome kipala okoona toa-kama kime yakoa litikete tiki. Ni padeleka tamene wa okoo toa-kama litikala toino wene to-tome toko-ye.

⁵Ali Muno Keraisu-pala eya wa kini kowitikoa oko-ye. Akolali kiwike wene mekoa mekole ni onekele neme poti takoa togakole i i wa yame yame tamene wa kini kowitikako-ye.

Loyo-kala Meamea Wa Mane Mane Akenemo

⁶Anu oya-lawe eya tamene wa Ali Muno Yesu Keraisu patu kautakoa kakete oko-ye. Kini oya-lawe padeka-kitame tone olaukakoona toa litia toamoa loyo-kala mekete tikino, dikane yenepa titi toma yamene. ⁷Totome tokoonakale kime litia tamedeko wa kime wene tekete tiki. Kiwi pakeke wida meketepa loyoka meamokoona. ⁸Nipa kini yapu note menoketepa kini nee eya pa moa nakoona mena. Nitameneya kinikiya pa oia moamato wa kinikiya pade mouketepa ete pia oto pia pupu tokoa kakoo. ⁹Nipa kinikiyapa pa oia moamele tokoyake oia moamokoona. Nipa kini Keraisunole takakete toatekoi adeka pia teketepa onekemo pa oma

yakoona. ¹⁰Kiwi pakeke mekete eya wa olaukakoona. Pupu toamou wa wene pikagopa nipa nepa nee noameneya pa meamene wa olaukakoona. Ni edoa-mo.

¹¹Opi i take mekete yatekolo kiwi padeka-kiti loyo-kala meketeke ete yene pupu tikika pekete ile ta ile ta wa pale toa kaki wa akedikili yateko. ¹²Ali Muno Yesu Keraisuno agale patu kautakoa kaketepa eya tamene wa totome edikaki yene mane oa moa pubu oa toko-ye. Kini noatiki nee eya moadetepa poti kilikoa mea pupu tokala tamene.

¹³Anu oya-lawe kime yete pade ali atoa auapekala tikilepa koome tukene waku wa wawameneya pa toa togamene. ¹⁴I pipia wini wia wetekakete tamene wa okoomo panagome litia toamokolopa nipa onepa dikane ago tadeko wa titi toma yamene. Poanele eni tekene tadeku wa ya momotoa tekete ni oko-ye. ¹⁵Dikane agopa kipala poi teiane ago tetepo takamekete kini oyago tetepo takoa mane oa moamene-ye.

Poloyo Wipitikome Akenemo

¹⁶Kini tepe kolotini kilikoa pikako ago Ali Munagome enabuna ele kule tokome kini tepe kolotini kilikoa pikamotoa kini kowitikako-ye. Ali Muno ago kiwi peyapala opia memotoa waka kowitikoa oko-ye.

¹⁷I wipitiane lionate ukumopa noanu yoname witiku-ye. Noanu pipia witikene-kama ipa Poloyo witaneya tadeko wa ali atoame oi motekete wene tomotoane tekene nitikala tuku. ¹⁸Ali Muno ago Yesu Keraisuyo kiwi peya pewe wia yopimotoane uku-ye.

Opa anu agale eni.

1 TIMOSI

Timosike Namolo Takoa Wia Wetekane Pipia

1 Polo nopa Keraisu Yesuno Aposelo ago i mekene uku. Eya agotame toto toa motoko ago Akolali ni Yesu Keraisu one noatekoya tokolo totome nepia meko agotame no moa kakakoia tokolo ni uku-ye.

²Timosi neke i pipia wiane wini wetekakilepa nepa anu manago tetepo taneya mea nopala odene wene pitikoa Keraisunole takama yawa toko ago tokolo tuku. Toneketai Akolali tone Ali Muno Yesu Keraisuta kitame einago nepa pewe wia ela moa tepe kolotini kilikoa pikoa toe wane neke kowitikakene uku-ye.

Pamo Olaukane Ali-kitike Pubu Akenemo

³Masedonia take poadene pekene tamene wane okouna wa lokoane uku. Epesase take pa wida mea kamene. Wini take padeka-kitame Akolaline agale pilia wakete kini wene kibututukoa okoimo pamo olaukakete tikino, nitamoati wa mane oa moamene. ⁴Wini yenamepa la agale Akolaline agale tetepo takoa oa ni kini kaua-mikitane ibini i i wa ete oto wa mate agale oa tokala tiki. Enile toa wipitiketepa pa agale-kala oa takoa pili pili toa kawei. Ali atoame Akolaline wene toopianele toadete oneke wene tugoa memotoa olaukatikiyake nile-kala toa kaki. ⁵I totono neeke wini wiane wetekakilepa ali atoa kini kini wene mekanali yoma pamene wa neme olaukamotoane tuku. Edikama yawadepa poane wene takoa koikatapeneya mea ni tepeme ta wa oa epetekakalekama toa ni Akolalinele odene wene piitikoa takoa tamene wa olaukamo-

toane uku-ye. ⁶Pade-kitame i totono litia toake wawa pata paka pekete pa agale ete oto wa topo takoa eketeki. ⁷Nipa Akolaline totono olaukou wa wene pia tikilepa eni totono pine piko toa wene toameketeke tiki. Nitoa i i wa olaukakimoka kini wene toamenemo olaukakete tiki.

⁸Totome eya wa wene toko. Akolaline totono ali atoame litia toatiki toa litia tikilipa epetikilepa toko. ⁹Akolaliyo one totono yametekilepa wene epetaneya meki yene takoa pubu oa tokoya mena. Eya tiki yene takoa pubu oko. Kini totono tetekoa ni kini tobou ali-kitane agale tagoa toamoa ni Akolali mukiti yamea wawa ni ele kule poanele toa ni Akolalinele takamoa kinikile itonolekama toa ni etene nine wia tukoa ni ete-kitika wia tukoa tiki yene takoa pubu oko. ¹⁰Ni mone koua piamatiki atoa-pala koua pia ni alime ali yagono kini natono latikoa koua pia ni kini pupu-kama takamotoa ali kode moa egetoa ni kapene yokoa ni nimini agale uku wa eketeki oa yotokoa tiki-kiti takoa pubu oko. Nipa mea epetekakete toatikile olaukanemo yakamekete ele kule poanele tiki-kiti takoa pubu oko. ¹¹Wedianeya-kama meko Akolali one pa tootapeneya mea epetekakome tokomopa e yene olaukoano ta wa no moa kakaka. Nitikagome one meko toa kotu kakoa meamiki yene takoa one totono yamea pubu okoya.

¹²Tone Ali Muno Yesu Keraisuyo no i agomepa onekele takamele tokono, one tele patu kautakoa kake tamene wa no moa kakaka tokolo onepala ke wane uku. ¹³Papete one ibini paya tetepo takoane one agale yakoa motane yene tete meane toane lene plane ago yakou. Nitikouyake Akolaliyo no ela motokome kibu moamoka. One agale pine piko toane agopa moane Keraisu wene toamoane tokolu tokome ni kibu

moamoka. ¹⁴Kibu moamou wa tone Ali Muno agome no pewe wia tagatapeka. Nipa Yesu Keraisu-pala lipuane mekene oneke wene tugoane meane yete pade ali atoake wene mekoane meane tomo-toa tokome toka.

¹⁵Etene nimini okala tane agalepa ukuno, ali atoa peyame yakoa mootapeamediki. Yesu Keraisyuo poanele tokoi yene toa moademe itonoke nekeneya. Ete ali atoame tokoi poanele moane patukoane poanele pine wiane tokou ago no i mekene uku.

¹⁶Nopa poanele pine wiane tokou agoke Keraisu Yesuyo poti ko akene wene-kama pia ela motokome no toa motoka. Nipa mea kama poadete oneke wene tugatekoi yene peya ela motokome toateka adeka pia toka.

¹⁷Nitikano, ali atoa eya kuya peya talo toa-kala kama pokago Akolali kei pia-kala kama patoane uku. One tuameneya pa mea kama poko. Tone leneme enamele toamoko. Tone Akolali wa oateko agopa one odene meko. Onepa nitane agono, one ibini kamotoka kamotoka toa-kala kama patoane uku. Ee nimini.

¹⁸Anu mana Timosi eya tamene wane ikilepa neeke papete oa plane toane litikene uku. Eni oa plane agale wene taneya meke poyo agome-kiti tou toa

¹⁹Kerai sunole wedoa takoa togamene. Ni neke tepeme ta wa oa epetekakale-kama litia tamene. Pade-kitame nitamekete ue dipi pata paka pome kaua atuou toa etepea pote atutapeneya.

²⁰Dikane agota Aimeniasi Alekesadata einagotake Setanu awinome tete memotoane wakou. Nipa einagotame Akolaliline ibini paya tetepo takoake wamotoane tekene tokou.

Losule Wedeteko Tekete Toatekomo

2 Eya tobou kakoa tamene wane uku-ye. Ali atoa peyane kowitikakilepa

i ago i atoa auapeano ta, ke wa kowitikakala tamene. ²Tone ako tobou alikitaneke ni kiwike lokoa ta yopia meki peyaneka kowitikatoane uku. Nipa Akolalilinele takoa tonekele uutukoa toa tikilepa tepe kolotini kilikoa pimotou poti mea toadete tobou yenane kowitikato wane uku-ye. ³Edikoa kowitiketepa epetanele tekete toko. Nitikolo yatekome toto toa motoko ago Akolaliyo epetanele eni tiki wa wene epetaneya meko. ⁴Nipa ali atoa peyame one nimini agale yakoa momotoane ukuno, toane mou wa wene epetaneya meko. ⁵⁻⁶Tone Akolali wa oateko agopa odene ago meko. Ni ali atoame Akolaliline yono moa lipumotou ka patu kakago odene ago meko. Einago Keraisu Yesuyo toto peya oto toa moademe ali latia nome tuaneya. Akolaliyo papete wene toopiane toa eni taatekoka tikilepa eni toateka oi ponokapete nitaneya. ⁷One eni tanemo mo wiane toaweane omotou Akolaliyo nopa one Aposelo ago takoa moa kakaka. Enipa nimini uku. Kapene wakamuku. Nipa e ku pa yatene Yesuke wene tugoane memotono, kini pitikika onekemo nimirimo olaukama yamene wa no moa kakaka.

⁸Ta piko peya pitiki yene nate wene pianeya mea yono ate pitikoa kowitikilepa kotimi luane wene wawa neno wamoa toa kowitimotouane uku.

⁹Atoa yatene pa kini mamina kakilepa kaloa wedoa tukoa kawamoa poti wene pia tamene. Kini pine puputua pitikoa padeya padeya pine munoke tukoa kini kabeke padeya-kiti kaloa pia enika eniyake wene piitikaneya meameamene. ¹⁰Nipa Akolalike wene tugoane meku wa iki atoame toatiki toa yete pade ali atoa mama moa epetanele tamene. ¹¹Panagome-kiti pademo olaukoka kakaka agale waame-tekoa poti witimou yakakoa meamene. ¹²Nipa kini losu yapu oboa mekoika

atoa yatename ali yatene Akolalinemo olaukoa talo toa tomotoane wamuku. Agale waametekoa poti memotoane uku. Ni edoa-mo. ¹³Akolaliyo namolo takoa ali pade Adam wa ibini oa latia mekoa wa naniko atoa pade Ipi latia mekoa taneya. ¹⁴Nitaneyake Setanuyo ali Adam oa yotokamoa atoa Ipi oa yotokaneya. Nitikale einatoame Akolaline totono tetekakome poanele eni taneya. ¹⁵Nitaneyake atoa yatename mati opikoli-kama Akolaliyo mama moa auapekala too. Nipa onekele takama yawa yete pade ali atoake wene mekoa mea epetanele toa poti utanele toa tokolipa nitoo.

Akolaline Yene

Yopiki-kitame Toatikimo

3 Nimini okala tanemo ukuno yakamene. Panagome-kiti Yesuno ali atoa yopiane meou wa wene pikomepa epetanele toateko wene eni pikome toko. ²Yesuno ali atoa yopiko agomepa ete-kitame padeya namike koiso akatikile toamoa ni atoa odene moa koua mea ni utanele-kama toa poti yawa ni epetekoa mea ni yete pade ali atoa one yapu noe wa makutukoa moa ni pademo pademo wene toa olaukoa too. ³Ni gerepi po ku ue nokoa kawamoa lene piamoa poti ko akene wene pia ete yene-pala neno wamoa kuele wene pitikaneya meamoa too. ⁴Ni one mati atoa talo toa epetekakilepa one mati-kitame one oka agale yakoa toa one kei-pala pia tomotoa too. ⁵Yopikagome nitameneya one mati atoa talo tokome toatekale agopa tokale mekompepa Yesuno ali atoa edoa talo tomotoa-pe. ⁶Yesuke tepe kolotini pene pekoa pika agopa takoa moa kakameamene. Onepa tube ago kaku wa yopia potokakayano, takoa moa kakameamene. Setanu onepa etene ako ago kaku wa wene pikake Akolaliyo

wakene toa einagoka wakaya tokolo ni uku. ⁷Losu yapu poamiki-kitameke kei piki alipa takoa moa kakamene. Ete-kitame kei piamiki agopa Setanuyo likoa enekome labakakolo oneke ya takaya tokolo ni uku.

Yesuno Ali Atoa

Yopiko Alike Lokoa Mea

Losule Talo Tiki Ali-kitame Toatikimo

⁸Eina toa Yesuno ali atoa yopiko alike lokoa mea losule toatiki ali-kiti takoa moa kakakilepa ete-kitame kei piki ali-kiti takoa moa kakamene. Dikane pupu toatiki ali-kitipa dikoa meoi. Keke takuta kawamoa gerepi po ku ue nokoa kawamoa kue eya moadiya wa yotokoa moamoa tamediki. ⁹Ni Akolaliyo ali atoa-pala papete kaukoa mema nekenemo Keraisu nokome tanemo wedoa yakoa motikilepa kini tepeme ta wa oa epetekaka toa-kama toa tamediki. ¹⁰Eni ali-kiti wete moa kakameneyake kini toatikile oyake tiki patu wa kini losule tekete tikile leneme wia pikala tamene. Ni epetaneledo tokoli eneketepa moa kakamene. ¹¹Eni ali-kitane natonokitameka eya toa meoi. Ete-kitame kei piatikile toa yete pade ali atoa-pala akoa agale wamoa utanele-kama toa tou wa ikile-kama toa tamediki. ¹²Eni alikitame atoa odene moa koua mea kini mati atoa kini yapu meki peya talo toa epetekoa tamedeki. ¹³Yopiko agoke lokoa mea losule edikoa wedoa teketepa nipa Yesuno ali atoame kei piatikile eni tekete tiki. Nipa Keraisu Yesu patu wedoa kautakoa kakete onekemo akamene piti moameneya atiki toa meki.

Akolaliyo Papete

Kaukoa Memu Nekenemo

¹⁴Timosi neke i pipia wiane mekakilepa ne mekota wini tigotokoane nouno

wene plane tuku. ¹⁵Wete noamead-ekolupa nipa i pipia moa oi mootokoapa Akolaline yatene toto mekete toatekole wene toa too. Akolaline yatene wane ukupa mea kama poko Akolaline losu yateneke uku. One nimini akene agale wedoa pikoa kamotoa tokome yapu pigi takoa moa wiuu toa eni yatene one wa takoa moa kakaneya. ¹⁶Akolaliyo ali atoa-pala papete kaukoa mema nekene toa Keraisyuo taatekoa tanelepa tubele mati eni tadekono, padameka enilepa pale tane tetepo takamele toamoko. Enilekepa eya wa wia mekaneya piko.

Keraisu taatekoa nikilepa tono melepu kakeneya nekeneya. Epetane Yominiyopa einagopa kiyo akenele-kama toko ago wa wene takaneya. Edelo ali-kitamepa einago enaneya. Onekemopa e ku yatene pitikoi toa oa pupitikatapeneya. Itonoke mekoi-kitipa oneke wene tugoa meaneya. Akolaliyopa einago one pa taneya mekanata a tibuke moa kakaneya wa panagome wia mekaneya.

Kapene Tikisa

Ali-kitike Pubu Akenemo

4 Epetane Yominiyo eya wa keleyo wene takakome oko. Naniko pade-kitame Akolalinele takoake wakala toi. Nitiketepa keke takuta kakene ipono-kitame oa yotoKANemoka Setanuno poane yatename olaukanemoka yakoa toi. ²Kini eni yakoa tokoimopa ali pade-kiti kini tepe kolotini toe kabunume keneya kelianeya meou toa mekete poaneleka epetaneleka takoa enamoala olaukoi. Niminimo akene tetepo takoa oake kapene agale oatekoi yene keku. ³Nitoo olaukakilepa ali yatene tiobali kawa atoa moamato wa oa padeya padeya nee kekaneya latikoa wawa noamato

wa olaukoi. Yesunomo yakoa moa pine toa wene tokoi-kitame onepala ke wa ootokoa moa nomotoa-kama Akolaliyo latia pikaneyake nitoo. ⁴One latia pikaneya peya epetaneya-kama latianeyano, odeneka kekaneya latikakile toameamene. Eniya peya onepala ke wa ootokoa namele toko. Ni edoa-mo. ⁵Akolaline agale piko toa ke wa kowitiketepa nipa eya kuya nee peya moa namele toko.

Keraisyunole Wedoa Takako Ago

⁶I agale i i wane oane neeke wetekaku toado Yesuno ali atoa olaukakepa nipa Keraisu Yesunole wedoa takake too. Oneke wene tugoa meke toatekamo onekemo olaukakounakamota eni epetane peku lawetekolu noa tokana toa pa toomoa poke olaukakepa nipa toa epetekake too. ⁷Pade-kitame Akolali ko wamekete la agale oa pamo oa tikino, titi takoa yakameamene. Nitameneya Akolalinele takateko kotu kakoa enekala tamene. Ni edoa-mo. ⁸Tone tigini kamotoa olaukanele teketepa tone wa auapeatekole eni toko. Akolalinele takaketepa nipa tone wa wedoa auapeatekole eni toko. Nipa itonoke pa mekokaka a tibuke pote mea kakokaka mea epetekama poo. ⁹Niminimo okala tanemo ukuno, peyame yakoa mootapeamene. ¹⁰Onekele takateko kotu kakoa toa enoai toa kakilepa mea kama poko Akolaliyo wipitikome toatekole nepia-kala mekete tekete ni toko. Einagome ali atoa peya toane moadiya wa yopikoa mekome oneke wene tugoa meki peya toa mokala toko.

¹¹Wini oane wetekaku toa toe toe wa neke oya-mikiti olaukoa tamene. ¹²Panagome-kiti i ago nepa pa tuali kake toko wa paya tetepo takakayano, pademo pademo oa ele kule toa tikilepa Yesunomo yakoa motane yene mekete toatikile adeka pia tamene. Nipa yete

pade ali atoake wene mekoa mea ni Keraisunole wedoa takama poke ni poane wene takoa koikatapeneya mea tamene. ¹³Nopa wida wete noameneyake wini ali atoa kakakoa Akolaline agale oi motokoa ni onekemo i i wa mo wia kawa pine toa olaukoa tamene-ye. ¹⁴Yesuno ali atoa yopikoi ali-kitame kini yono neke mataike pikoli Akolaliyo onekele takateka tele lukakana. One eina tele lukakana wene kayapeamo a onekele wedoa takama yamene. ¹⁵Ina okouna wene kibutukoa mea tokala tamene. Wene kibutukoa mea tikilepa nipa neke namolo toma yakanakale moa patukoa wedoa toomoa yamene. Peyame enemotono, nitamene. ¹⁶Nepa mea potokoa pata pamo olaukoa takayano, wedetekoa mea olaukoa tamene. Mea epetekoa olaukakilepa nipa Akolaliyo neeka neke agale yakoa motokoi yeneka toa momotoa teke too.

Yesuno Ali Atoa Yopikete Toatekomo

5 Ada agome-kiti poanele tokalepa kikoa akameamene. Nekatai tetepo takoa poti mane oa moamene. Tualika epene alika neke wamene-mikiti tetepo takoa yopiamene. ²Atue deyaka epene atoaka neke nine tetepo takoa yopia ni tuatoa yatene neke laine-mikiti tetepo takoa mea leneme kode noamo poane wene takoa koikatapeneya mea yopiamene.

³Yawale yapu nepo atoa-kiti paya tetepo takamo a wedoa mama moa yopiamene. ⁴Nepo meko atoa-kiti one mana kono-mikitika one kaua-mikitika meadekolipa one eni kako yename Akolalinele takakete toatiki toa eya tomotamene. Kini etene ninetame opia egetekoinake nami wia kini nepo atoa mama moa egetemotamene. Akolaline wene epetekatikile enino, nitimotamene. ⁵Pade kawameneya

yawale yapu egetiniya meko nepo atoapa kidene mekome tokome Akolalike wene mataneya mea ta ete likoa oto likoa one auapeano ta wa kowitikala toko. ⁶Nepo atoa padame nitameneya one kola utukole-kama tou wa etepea toma pokolopa Akolaliyo einatoapa tuane atoa tetepo takoa wako. ⁷Nepala i ukumopa nepo atoa-kitame yakamotono, i i wa mane oa moamene. Ete-kitame kiwi kikoa akatikile toamomotono, nitamene.

⁸One kako ali atoaka one etene nineta one mati atoaka mama moamoko agopa Yesunole takoa wakene ago eni. Yesunomo yakamadete waki-kitame ele kule poanele tiki toa einagome moa patukoa poanele tubele eni toko.

⁹Yopiki ali-kitame losu bokuke ibini wia mekoa egetatiki nepo atoa-kitipa dikoa epetanele tiki atoa-kiti. Ana tuutukaneyake pade alike poamo a ni ege odepeta kadukoa wa tuku melepu kakoa (60) penane mali moa patukoa mea ¹⁰ni ete-kitame kei piatikile toa ni kini matikiti wedoa talo toa tubetekoa ni eko ali atoa kini yapu noe wa makutukoa moa nee takoa lawetoa ni Yesuno ali atoa kini yapu nomotoa kawake kakene kege ueme kogo a ni ke enekakolo meki-kiti mama moa auapea ni ele kule epetanele toa tiki. Dikoa meki nepo atoa-kiti takoa moa egetamene.

¹¹⁻¹²Nepo atoa padekapa tuatoaka epene atoaka takoa wawa kini ibini bokuke wia mekoa egetameamene. Dikane nepo atoa-kitame Keraisunolekama takou wa oa togotoake ali padeke wene kakoa etepea piki. Dikou wa ikile tagoa toamekete pade alike pikilipa ete-kitame akoa agale amele toko. ¹³Dikane nepo atoa-kiti loyo mea yapu yapu yaki. Nitou eni poanele moa patukoapa agale ete kotuka oto kotuka toa ni ete yename namene wameneyake kini okoimo yakadete pokala toa ni

pademo pademo wamatikimo oa enika enile tokala tiki. ¹⁴Enilepa Yesuno yatene atoa-kitameke tiki wa toto-pala poi teia meki-kitame poanemo akaya tokolo tuatoaka epene atoaka ana tukolopa eya tomotoane uku. Ali padeke pome mea mati opikoa ana matita mama moa pupu wedoa tomotoane uku. ¹⁵Nepo atoa padeka-kitame Yesunole takoake wawa Setanunole takama yak-ili tekene ni uku. ¹⁶Nepo atoa-kitane oboa pikane kue adamokolo edoane egeteku patu wa yopiki ali-kiti wene keda taneya mekayano eya tamene. Yesuno agale yakoa motane atoame-kiti one-pala po plane nepo atoa moa egete-motamene. Nitikolopa yopiki ali-kitame pade kawameneya yawale yapu egetiniya meki nepo atoa-kiti takoa kue eya adekoa tatia meetapeamele toko.

¹⁷Yesuno ali atoa yopia epetekaki ali-kiti-pala ke wa oa kinikiya tatia keda takoa meamene. Nitoa metekilepa Keraisunomo mane mane oa olaukoa tiki ali-kiti takoa kinikiya etene wedoa keda takoa mekala tamene. ¹⁸Enilekapa Akolaline bokuke eya wa wia mekaneya piko. *Witi ku tatianeya pikoka yaku takoa pootapemotoa pitimekawe kai kawame kauta kauta toa pokome witi ku-pala noma yamotono, timini po toameamene. Ni panagome-kiti neke pupu takakolopa one eni pupuke kue meateko kotu kakoa meamene* wa padame wia mekaneya. ¹⁹I yopiko agome padele poanele tokale enekou wa odene agome-kiti akanokalepa one eni okamo yakameamene. Ali tebolo takutame akanokolipa nipa yakamene. ²⁰Yopiko ali-kitame padele poanele tadekolipa nipa ali atoane lene yoto moa kakoa kiko akamene. Ete-kitame poanele tamene piti motaneya memotono, nitamene.

²¹Akolali Keraisu Yesutaka Akolaline takoa motane edelo ali-kitika kakakoane nepala ina oane metekule-kiti yakoa tamene wane uku. Nipa ali atoa peya edikoa talo tikilepa kamo yene ponopene yene takoa enamo kiyoke-kama tamene. ²²Yesuno ali atoa yopiateko ago takoa moa kakakilepa mekamoteke pitake toameamene. Einagome padele poanele tadekalepa one toka poanele neeke weamutukayano, nitameamene. Ele kule poanele titi takoa toameamene. ²³Timosi nepa yene mokoa kake tokono, neke eni yeneka neke tepene witakala toko yeneka teigadepa weneya ue-kama noameamene. Gerepi po ku ue deya-pala nokala tamene.

²⁴Pade-kitame kini poanelepa keleyo-kama tiki. Kini koiso wete akameneyake kini poanele tikimo ta peyake oa pupitikamotoa tiki. Pade-kitame nitamekete kini poanelepa naniko keleyo witamotoa kaukoa tokala tiki. ²⁵Eina toa panagome-kiti ele kule epetanele tokolopa peyame keleyo enamele toko. One epetanelepa kaukoa tokoloka kauaneya pia kawamademe toko.

6 Kueme topo toa moa egetane yene kime pine ali-kiti kei pia pupu-pala wedoa takamene. Kipa Yesuno ali atoameke pupu takoa potokaki wa Akolaline ibini paya tetepo takoa tone olaukakomoka pamo tetepo takoa wakaya tokolo ni uku.

²Pinago pade Yesuno agale yakoa motane ago tadekalepa nipa i agopa ame wa amele toko wa taba ago tetepo takamoano, one pupu wedoa takama pamene. Nipa pinagopa Yesunomo yakoa motane agono, Akolali oneke wene mekoa mekome toko wa one pupu wedoa takamene.

Kueke-kama Wene Piitikaneya Meameamene

Timosi nepala i ukule-kitika wini yename tamene wa mane mane oa olaukamene. ³Akolalinele takakete toatikile i i wa tone Ali Muno Yesu Keraisunomo toaweaa akaki ali-kitame nimini olaukakimo ete pimotoa panagome-kiti pade olaukikomewa nipa eya tokome toko. ⁴Pademo pademota wenepa tuku wa pinali one wa kei pikomeke nateya weneka toameneya meko. Dikane agopa ete yene-pala mokota oa neno oa toatekole piamokolopa wene poaneya meko. One oko agale yateki-kiti ete oto wa wene poaneya mea ni mokota oa ni poanemo oa ni ete yenepa kipala poi teiane yene tetepo takoa tiki. ⁵Nipa wene moa koiganeya mea niminimo agopa takatapeneya mea tekete ete oto wa agale toonali yoma piki. Akolalinele takakenepa nipa kamo toma pou wa paya wene pia tiki ali-kitike uku.

⁶Panagome-kiti Akolalinele takama yakilepa onekeya oyake piko wa tepe kolotini kilikoa pimotoa mea takakomewa nipa kamo ago meou toa wedoa meamele toko. ⁷Tonekaʻuane tepene mea nokoo-pete padeya deyaka aua noamokoo. Wa naniko itono tewitikoa tua peketepa tonekeya etene padeya deyaka aua pamele toamoo. ⁸Tone noateko nee-pala tone kawateko maminata pikolopa nipa tonekeya adekoa piko wa epene wene pianeya meatoane uku. Ni edoa-mo. ⁹Kamo tou wa wene pia meki yenepa Setanuyo likoa enekome one wakoke labakoa mokala toko. Eni yene paya nou toa mea padeya padeya tepi motuku pekete toapa tua atutapekala toi. ¹⁰Ali atoa kueke-kama wene piitikaneya mekilipa kini tepene padele padele poanele witoa tagatapekala toko. Ali atoa padeka-kiti

kueke-kama wene piitikaneya meketepa Akolalinele takoaake waku pekete toa tepe we taneya meki.

Poloyo Timosi Mane Mane Akenemo

¹¹Timosi nepa Akolaliyo one wa takoa moa kakako agome enika eni poanele titi takoa pitoa pamene. Nitoapa eya toatekoleke-kama wene piitikaneya mea tamene. Kiyo akenele toa ni Akolalinele wedoa takoa ni Keraisuke wene tugoa mea ni eko ali atoake wene mekoa mea ni ke enekaka-peteka Akolalinele pa takama yawa ni poti ko akene wene pia tamene. ¹²Eko ali-kiti-pala teyapea moa patukanali you toa keneya Akolalinele wedoa takamoa pamene. Ali atoa peya matiyame enekoa kakoika Yesuke wene tugoaane mekene tuku wa ue motoka-pete Akolaliyo nepa mea kama pomotoa tokome one wa kayo oa motaneyano, meane kama poatekule dekoane mou wa onekele wedoa takamoa pamene. ¹³Eya alita, padeya padeya peya wene takoa yomini mekoa toko ago Akolali ni Podiase Pailase kakakoa niminimo toaweaa akene ago Keraisu Yesu einagotane leneke kakene eya tamene wane nepala uku. ¹⁴Yesuno totono pademoka moa koigamoa padeleka katekoa wawamoa wedoa pikoa kamene. Ali Muno Yesu Keraisu wakapea nokaleka nitima pamene. ¹⁵One eni noateka oi ponokalepa Akolaliyo pa wa oto wetekoo. Akolali eya toko agome nitoo. Onepa wedianeya-kama meko. One odene ako odene tobou ago meko. Ali Muno peya tobou meki peya oneke-kama lukoa meki. ¹⁶One odene tuameneya mea kama poko. One pa taneya mekota odene agoka pome kamele toamoko. Padameka one enekile toameneya. Padameka one enamele toamoko. Onepa dikane agono, toto

peya telekole toa yopia kama pamene wa one kei pia-kala kama patoane uku. Ee nimini.

¹⁷Kamo yene eya wa mane mane oa olaukamene. Mate agale wamoa kini kamoya eyake wene piitikaneya meamoa tamene. Kini kamoya pa pia kawamoono, toto wedia memotoa pewe witikome padeya padeyata meteko ago Akolali oneke-kama wene piitikaneya meamene wa olaukamene. Nipa ele kule epetanele tikile kamole tetepo takoa tamene wa olaukamene.

¹⁸Eyaka tamene wa olaukamene. Ele kule epetanele toa ni yete pade ali atoa auapea ni kinikiya kamu toameneya wedoa moke toa tamene. ¹⁹Edikaketepa a tibu meemoa pekete moatiki kamoya

nodokoa piou toa tekete toi. Nitiketepa nimini mea kama poatekoile pikoa kawei wa kamo ali atoa olaukamene.

²⁰Ae, Timosi Akolaliyo ne yametakana toa-kama wedoa pikoa kamene-ye. Pade-kitame onekemo wawa pamo-kala ikilepa imopa niminimo-kama uku wa oake ete oto wa neno oa kapene wakoa iki. Enika enimo titi toa yakameamene. ²¹Pade-kitame enika enimo yakoa motekete tekete Akolalinele takoake wawa pata paka etepea pokoi.

Ne mekota wida meki-kiti kiwi peyapa Akolaliyo pewe wia yopimotoane uku-ye.

Opa anu agale eni.

2 TIMOSI

Timosike Taku Takoa Wia Wetekane Pipia

1 Polo nopa Keraisu Yesuno Aposelo agome Timosi nepala uku. Nipa Akolaliyo ali atoa toto Keraisu Yesu-pala lipua mekete mea kama poatekoo wene toopiane toane taatekoane akama yak-ene uku.

²Anu kolotini ago Timosi nepa anu mana tetepo takoane eya wane neke kowitikaku-ye. Atai Akolali tone Ali Muno Keraisu Yesutame einago Timosi pewe wia mama moa tepe kolotini kilikoa pikoa toe wane neke kowitikaku-ye.

Poloyo Timosi Mane Mane Akenemo

³Noanume Akolalinele takakilepa anu kaa-mikitame tane toane kiyo akene wene pianeya mekene tuku. Nipa ete pia oto pia kowitikilepa ne wene taneya mekene ke wane Akolali kowitikala tuku. ⁴Ne tewitikoane pokouna-pete ne komo yoa kakana wene taneya meku. Ae, no wediane tagatapeneya meadene ne enadiya wane wene tokoane meku. ⁵Ni neke Keraisuke wene tugo mekana wene taneya meku. Papete eya atoata neke kaa Yunisi nekāua Loisita Yesuke wene tugo mekoina toa neka oneke wene tugo mekono wene tekene uku. ⁶Nitoa mekono, eya tamene wane uku. Anu yono neeke pikolu Akolaliyo ne yametekanakale toe pukoa natekou toa pupu lene kakoa litia tamene. Ni edoamo. ⁷Akolaliyo one Epetane Yomini toto metekilepa ete yene piti moa memotoa taneya mena. Ele kule telekole toa eko ali atoake wene mekoa poti utanele toa memotoa tokome ni taneya.

⁸Nitaneyano, Ali Muno agonomo toawe amene ya tokale meameamene.

Ni no onekele takama yakouke po yapu pitikaneya meku ago-pala ya moameamene. Nitameneya Keraisunomo toawe okooke tete oyake moato wa Akolaline tele patu kautakoa kakete oma patoane uku. ⁹Akolali einagome toto toa moa ni onekele kiyo akenele takamotoa tokome one wa kayo oa motikilepa tone padele epeteko tokoonakaleke taneya mena. One papete wene toopikounakale taatekoane tou wa one weneme toto pewe witikome taneya. Nipa tibu itonota wete latiameneyake enilepa Keraisu Yesuke tou wa wene toopikana toa taatekoo taneya. ¹⁰Einapa papete kaukoa mema nekeneyake toto toa motane ago Keraisu Yesu taatekoo nokome toawe akaneya. Einago nokomepa ali atoa tua atua pomotoa tokoya moa agopa takatapeneya. Ni ali atoane wene epetekakome toatekamo oa metekilepa toto mea kama poateko toa i i wa keleyo oa metaneya.

¹¹Enimo Yesunomopa Akolaliyo no i ago neme mo wia olaukoa tamene wa one Aposelo ago takoa moa kakaka. ¹²One okana toane tokoukepa no po yapu i pitikaneya mekene tete motukuyake ya taneya meamuku. Nitameneya Akolalike-kama wene tugoane meku. Akolaliyo ile tamene wa yametekanakale toane togamotoa tokome no auapekala too. Onepa nitamele toko agono wene tuku. Ali atoa takoa enademe noka-peteka nitoa-kala kawoono, edekolo ya taneya memotoa-pe. ¹³Ne kiyo ootokoa meke toatekale olaukakouna toa wene taneya mea tamene-ye. Nipa Keraisu Yesu-pala lipua meke Akolalike wene tugo mea neke oya ali atoake wene mekoa mea tamene. ¹⁴Nika Akolaliyo Timosi ne yametekanakeyapa one nimini agale wedoa pikoa kamene. Totoke

awinome meko Epetane Yominiyo ne auapeademe tokono, nitamene.

¹⁵Eya wa wene teke toko. Esia ta piko peyake Yesunomo yakoa motane yene peyame no tewitikoia wakoi. Eya agotameka Piselasi Emosenisitameka nitikoi. ¹⁶Nitikoiyake eyayo Onesiporasiyo no wene weye akakala tokano, Akolali neme einagono mati atoa mama moa talo toa kamene wane kowitikaku. No po yapu pitikaneya mekoluka einagome no-pala ya moamokome eya toka. ¹⁷Lome take nome mekome eina eina no Polo manika meko patu wa tuku tokoa kawa enamutuka. ¹⁸Nitikano, Ali Muno ne wakapea nekepa Onesiporasi einago ela moamene wane Ali Muno ago kowitikoane uku. Epesase take pone mekolu einagome ele kule toa no auapekala tokana. Enipa Timosi ne wene tokomo uku.

One Poyo Ago Tou Toa

Kerai sunole Wedoa Takamene

2 Anu mati Timosi nepa Keraisu Yesuyo pewe witikome tele lukoa kakono, one tele patu kautakoa kama pamene. ²Ali atoa peya mati kakakoane olaukakounakamopa eko ali atoa olaukakala tamene. Nipa tou wa iki toa-kama tiki-kiti takoa moa olaukakilepa yete pade ali atoaka wene toa olaukatiki yene takoa moa olaukamene.

³Poi wedoa tokoa kawou toa teke ke enekakale mekeka Kerai sunole wedoa takama pamene. ⁴Poyo agome-kiti poi tikilepa ipe yapu eyake wene piitikaneya kakome tokoya mena. Nitamokome one poi tobou agono wene epetekademe tokome poi tokome toatekoleke-kama wene piitikaneya kako. ⁵Pade yene-pala teyapea pome moa patukanali yotoko agome-kiti yopikagome tamene wa oka

toa-kama litia toamokomepa nipa ete ali peyado moa patukakomeka sili oyake moamele toamoko. ⁶Ni ipe wedoa tokoa kakene agome-kiti ipe kakoya nee wakoa moa nakilepa ete yene naniko moa nomotoa pinago oneme namolo takoa moa namedeko. ⁷Nepala ina pe-doane ukumopa wene kikutukoa mema yamene. Ali Munagome pine ina ina wa wene taka taka toono, nitamene.

⁸Kerai sunomo eya wane oane auane yakumo wene taneya meamene. Yesu Keraisu tuaney a pikata Akolaliyo moa kamotokaneya. Ni agopa Depidi-loeke tageneya. ⁹Nimo oane auane yakouke pade-kitame kini totono tetekoane akene tetepo takoa mea no tete meapa po kakoa po yapu pitikakoi. Nitiketeki Akolaline agale oyake moa lutua ketekamele toamoko. ¹⁰Nipa Akolaliyo one wa takoa motane ali atoa auapekene eni tete moane mekilepa eni yeneka Keraisu Yesuyo toa moa togakale one a tibuke pa tootapeneya mea kama pomotoane tekene tuku.

¹¹Etene nimini okala tanemo ukuno yakamene. One-pala odeneka tukete tuou toa tonekele wawa toameketepa nipa onepala odeneka mea kama poadete toko. ¹²Ni tete moko kaketeka onekele pa takama peketepa nipa one-pala odeneka tobou ali atoa mea talo toa kawadete toko. Nitameneya one kote tokolo wakolopa totoka kote moa wawademe toko. ¹³Onekele takoake wawa toamokoloka Keraisu einagome tonekele pa takoa meko. Toto auapeateko wene wia wamele toamokolo tokome ni toko.

¹⁴Wini ali atoa olaukakepa nepala ina okouna wene takoa eya wa pubu oa tamene. Pamo agale ikimoke agale tʻonali yoameamene. Edikaketepa nipa enika eni agale yatekoi ali atoa auapeamekete toa potokoino, wamene-ye

wa Akolaline leneke kake pubu amene. ¹⁵Akolaliyo ne kei pimotoa toa enoa kawa one wene moa epetanele toma pamene. Nipa onekele takoane potokakene tadeku wa one leneke ya tokale kakayano, one niminimo pine toa oa mekala tamene. ¹⁶Emo kumo pamo iki yene titi toa wamene. Edikaki yename etepea poanele toma poi tokolo ni uku. ¹⁷Nika kedime noa natipu takama pou toa kini eni okoi agale ta piko peya moa makatapeoo. Eya agota Aimeniasi Pailitastameka nitoa kaki. ¹⁸Nipa niminimo ete pimotoa wawa eya wa iki. Akolaliyo tuane ali atoa moa kamotokoa peya takaneya wa iki. Nimo ikili yatekete pade-kitame ekete Yesuke edeya weike wene tugoa meko patuno, tokamoto-tato wa wene bebo akatapeneya meki. ¹⁹Nitikiyake Akolaliyo yapu wiatekota kue petene-kiti moa tatilogou toa one yatene poapeneya memotoa tokome yopia meko. Nilekepa eya wa wia mekaneya piko. *Ali Muno agome one yatene ali atoa i i wa wene taneya meko. Ni Ali Muno agono ibini wedekoa iki peyame kini poanele tewitiko wa wamediki wa wia mekaneya piko.*

²⁰Kamo agono yapu piko okolo eyapa golo silepa enika eniyame-kama latianeya mena. Nitameneya padekapa mete yomo eyame latianeya pia ni padekapa kamo itonome latianeya pia toko. Ni padekapa etene epetaneya-kiti pia ni padekapa pa paya wane-kiti pia tokolo uku. ²¹Panagome-kiti ele kule poanele tewitiko wa wene kiyo akeneya mekompe nipa okolo epetane mati tetepo taneya meko. Nitoa padele padele epetanele toateko toa nodokaneya pikolo pinagome enekompe iyame padele toatekuyano, moadi wa moademe toko. ²²Nitademe tokono, tuali yatene kini paya wene witako toa mekamotokete pitakete litia toameamene. Nitameneya wene kiyo

akeneya mea ni Akolalike wedoa wene tugoa mea ni yete pade ali atoake wene mekoa mea ni tepe kolotini kilikoa pimotoa mea tamene. Nipa epene wene pianeya mekete Ali Muno auapea ta wa one kayo oa kowitoai tiki yene-pala lipua mea nitamene. ²³Emo kumo pamo ete oto wa topo takoa iki-kiti titi toma yamene. Wipitikete neno oa pili pili toino wene teke tokono, titi toma yamene. ²⁴Ali Muno agonole takama yako agome dikoa meamedeko. Neno wamokome ali atoa peya mama moa auapeamedeko. Nitoa mane mane oa olaukakilepa potile-kama toa tamedeko. ²⁵Nitoapa one agale oa ketekaki yene mane oa motikilepa potimo-kama oa tamedeko. Nipa Akolaliyopa kini namolo wene wia wakete one niminimo yakoa momotoa toko patu wa mane oa moamedeko. ²⁶Ni Setanuyo one wene pikole litia tomotoa moa labakaneya mekita mekete poane wene wia wawa petoa piki patu wa Ali Munagonole takama yakagome dikane yene poti mane oa mokala tamedeko.

Wipitia Ta Pene Patameneyake

Tepe Witanele-kama Witatekamo

3 Eya waka wene taneya meamene. Wipitia ta patateka tigtoka-peteke tepe witanele-kala too. ²Nipetepa ali atoame eya toma yawei. Eya kuya oboane moadiya wa kinikiya kamu toa mea ni ete yene paya tetepo takoa mate agale-kala oa ni tea agale oa ni kini etene ninetame okoi agale tagoa toamoa ni panagonoke padeya motikilepa ke wa wameneya moa ni Akolaliline takamoa toi. ³Ni ete ali atoake wene mekamoa ela moamoa ni akoo agale oa ni uutukoa poti yawamoa ni lene pianele toa ni ele kule epetanele kote tokale wawa ⁴ni pade-kiti-pala poanele toadeteke lede oya patu pia ni kabe teleme

wia pia tuku pekete toa ni ako ago meku wa ete yene paya tetepo takoa ni kola utukole-kama tato wa Akolalike wene piitikameneya mea toi. ⁵Nitima yaki-kitame Akolalinele takama yakene tetepo takoake one tele patu kautamadete wawa pa lede takoa mekino, dikane yene titi toma yamene. ⁶Dikane ali padeka-kiti eko ali-kitane yapu pote mekete kini iki agaleme paya wene pi-aneya meki atoapa moa labakakala tiki. Dikane atoa kini poaneleme kini wene moa kautakolo mekete kini wene witako toa litiku pekete toa poanele etepea toma yaki. ⁷Nitoapa pademo pademo yakadiya wa yatekala teketeke Akolaline nimirimo pine piko toa wene toamiki. ⁸Eya agotame Yanisi Yabisitame papete Mosesene agale kote moa one-pala neno oa tane toapa dikane atoa moa labakaki ali-kitame Akolaline nimini agale kote tokale tagoa toamiki. Nitoapa wene moa koiganeya mea Yesunole kapene wakoa takakili tokome Akolaliyo kote moa wako. ⁹Eni yename nitima yaketeke edikoa toa togamele toamoko. Ni edoamo. Naniko kini tokoile keleyo witakale enekete peyame ee inapa Yanisi Yabisitame papete tane toa pale tekete tadiki wa kini okoimo yakamoi.

Poloyo Timosi Wipitikome Mane Mane Akenemo

¹⁰No Poloyo edikoane meamokou. Anu toma yakounakale ne wene taneya meko. Nipa pademo pademo olaukoane ni padele padele toatekou wene toopikouna toane taatekoane toane ni Keraisuke wene tugoane meane ni poti ko akene wene pianeya meane ni ali atoake wene mekoane meane ni ke enekaka-peteka Keraisunole pa takoane togoane ¹¹ni ete-kitame nopala poi teigoli meane ni tete moane meane tokouna ne wene taneya meko. Eya ta-mene Adioke Aikoniameta Lisera

toa eni ta ludu yawane pitikene tete motokouna mati ne wene toko. Nitiku pekene tokouka Ali Muno agome no toa mokala toka. ¹²Keraisu Yesu-pala lipua meketepa Akolalinele takama pou wa wene pia tiki peyame eni tete-kala moma yawei. ¹³Ni poanele toa kapene wakoa olaukaki-kitame poanele tubele ate toma yawei. Nitoa mea eko ali atoa oa yotokakoli Setanuyo kiwika oa yotokoo.

¹⁴Totome olaukakoona einapa nimini akedikiki wa neme wedoa litia teke toko. Ne olaukakoona ali atoa toto i i wa neme wene tokono, einaka einamo neme yakoa motokana pa litia toomoa pamene. ¹⁵Ne dee mati deyake laigoa Akolaline bokuke kiyo akene agale yakoa moma noka. One eni agaleme neka ete ali atoaka wene muno mekamele toko. Nipa Keraisu Yesuke wene tugakilipa Akolaliyo kiwi toa moateko ka i wa wene takamele toko. ¹⁶Akolaline bokuke wia mekane agalepa Akolaliyo-kama wene takane toa wia mekane agaleno, toto auapeatekomo eni. One agaleme toto eni auapekilepa pademo wene toamokokolopa i i wa wene takoa ni padele poanele tokolopa mena mena wa mane oa moa ni wene kiyo akeneya mekete toatekole i i wa yamea toko. ¹⁷Nipa Akolalike lukoa mekete onekele takateko toa ele kule epetanele-kama wene toa tomotoa tokome ni toko.

4 Keraisu einagome padeya padeya peya yopia-kala kawademe oto wakapea noo tokolo tekene eya tamene wane uku. Nipa eya agotame ali atoa peya tua pokoi-kitika tuameneya pa mekoi-kitika takoa enatekago Keraisu Yesu-pala etene Akolalitame yakakoane eya tamene wane uku. ²Yesunomo mo wima pamene. Nipa ali atoame yakoa moamoi tadekaleka yakoa moi tadekaleka oada wa

toaweā okala tamene. Akolaline agale pine piko toa litia toameadekolipa mane oa moa ni poanele tadekolipa kikoā akoa ni wene keda taneya meadekolipa wene weye akoa tamene. Nitoa mama moa olaukakilepa poti ko akene wene pia nitamene. ³Ali atoame eya toatiki tigotoma nokolo tekene ni uku. Akolaline nimini agale yakamadete wawei. Nipa kini wene motekete emo kumo taba po pitikakete okoi ali-kiti yakato wa edikakoi ali-kiti moa koukoa yakakala toi. ⁴Nipa niminimo pa pimotoa tewitikoā wakete la agale eyake wene piitikaneya mea yakakala toi. ⁵Neme pade edikameamene. Padele padele tikilepa wedetekoā tokala tamene. Ke enekale meka-peteka kō wameneya poti meamene. Nitoa Keraisunomo oa aua yawa ni Akolalinele takake toateko toa-kama toa togamene-ye.

⁶Akolalike sipi sipi kai eya meane lodo you toane anu kamate ponane tetepo taneya mekene uku. Nipa no tuane poateku tigotoko wane ekene uku. ⁷Akolalinele takakilepa poyo alime-kiti poi tewitikoā poamou toane tokou. Ni ali-kiti teyapea moa patukanali you toane tekene pegene kakamoane poatekouta pitimoane teyapeane pone tugapokou. Nipa Akolaliyo tamene wa yametekanakale toane togakou. ⁸Nitikouya tokolo ali atoā kiyoke-kama takoa enekago Ali Munoyo no wene kiyo akene ago tetepo takoa mekome eya toko. Wipitia ta pataka-pete no Polo kei pikene sili meou wa wene toopia mekome anu sili pikoa metekako. One wakapea noka-pete one eni pikoa metekakoya ina wa no meoo. Nipa one wakapea nokale enadiya wa nepia mekoi peya ke wa kei pia sili mekala too.

Poloyo Pade Ali-kitike Akenemo

⁹No i mekuta oto wete noke enamene wane ne kowitoane uku-ye. ¹⁰Eya ago Dimasiyo itonole tobou kakoa mekome tokome no tewitikoā wawa Tesalonaika take pome mepoka tokolo ni uku. Eya ago Keresene Galesia take pome mepoka. Ni Taitasi einago Dalesesia take pome mepoka. ¹¹Luke odene no-pala opia meko. Make einago enemopoke oto no mekuta aua namene. Akolalinele takamotoa no auapeamele tokono, enemotokapamene. ¹²Eya ago Tikikasi Epesase take poano pa wane moane wetekakou-ye. ¹³Timosi ne nekepa anu tokoo kawatekou mamina petene moa aua notokamene. Teroase take eya ago Kapasi neme pikoa metekamene wane meane pokouna maminake uku. Anu boku-kitika aua notokamene. Meme kai kepeneme latiane boku-menepa wene kayapekileka toamoa oto aua notokamene-ye.

¹⁴Kapa wene toa latia toko ago Alekesadayo nopala poanele tubele mati toka. One eni poanele tokake Ali Munu agome kibu motokademe toko. ¹⁵Einagome nepalaka poanele takayano, lene kia we-doa meamene-ye. Einagomepa tone oa aua yako agale kotimi luaneya meka matiyame teiga teiga toka tokolo ni uku.

¹⁶Anu koiso Lome take pegetoa akakoi-pete pinali anu wa kei plane kakolu odene agoka no lono nikile toamoka. Peyame no tewitikoā wakoi. Kini eni tokoi ke po letu mekameamene wane Ali Munu ago kowitikoane uku. ¹⁷Peyame no tewitoa wakoiyake Ali Munu ago no lono nome kakome mape moa tele lukoa toka. Nipa onekemopa mone yatene ali atoā peyame yakamoto, toaweā akoa togamene wa toka. Nitoapa layone kai kimeme tianianeya toa mou toa no toa

motoka. ¹⁸Nitikano, ele kule poanele witakaleka Ali Munagome edikoa no wa toa mokala too. Nitoa nopala padele toamomotoa tokome yopia mea wipitikomepa a tibuke one talo toko take moa kakoono, one kei pia kama patoane uku. Ee nimini.

¹⁹Eya adona Perisila Akuwilata enekepa wete meamene wa akamene-ye. Ni eya ago Onesiporasine mati atoa-pala wete meamene wa akamene-ye. ²⁰Eya ago Erasetasi Korine take pa mekome toko. Ni eya ago Teropimasi ne yeneme tukono,

Mailitase take wida mea latoa kamene wane tewitikoane pokou. ²¹Niti tane tokene-mene wete witameneyake no mekuta oto wete noke enamene-ye.

Eya yename Yubulasi ni Peyudenesi ni Lainasi ni Kelodia ni neke ete oyali-kiti peyameka Timosi ne wete meamene wa okala tiki.

²²Ali Munago neke yomini-pala opia memotoane neke kowitikoane uku-ye.

Nepala wida meki-kiti kiwi peya pewe wia yopimotoaneka kowitikoane uku-ye.

Opa anu agale eni.

TAITASI

Poloyo Taitasike Wia Wetekane Pipia

1 Polo nopa Akolaline pupu takama yawane Yesu Keraisunomo oane auane yawane tuku agome uku.

Akolaliyopa one takoa motane ali atoame onekele wedoa takama pomotono ta wa no moa kakaka. Ni oneke nate wene pianeya lukoa memotono, one niminimo pine tōa olaukamene wa moa kakaka. ²One niminimo pine tōane olaukakilepa ali atoa auapekene eya wane olaukakuya. Akolaliyo itono tibuta wete latiameneyake one ali atoa mea kama poatekoi wene toopianeya. Akolaliyo kapene agale wakamokagome nitoa wa oa pikana toa taatekoa too. One taatekoa tokale nepia mekilepa wedia mea nepi meamene wane olaukakuya. ³One eni taatekoa toateka oi nokale toto toa motokago Akolaliyo one eina papete wene toopikana i i wa mo wima pamene wa no wene takoa moa kakaka.

⁴Taitasi nepa no-pala kibutua Akolalinele takama yakolo tekene anu mana tetepo takoane mekene i pipia wiane wini wetekaku-ye.

Atai Akolali-pala tota toa motokago Keraisu Yesutame ne Taitasi pewe wia tepe kolotini kilikoa pikoa toe wane neke kowitikoane uku-ye.

Taitasi Keriti Take Mekome Toatekamo

⁵Keriti take mekene titiane tokounakale neme toa togoano ta wane ne wida tewitikoane pokouna. Nipa wini ta ludu ali atoame ta latia pitikika Yesuno yene talo toatiki ali-kiti takoa moa kakakala tamene wane pokouna. ⁶Nitikounano, nepala okouna toa teke dikane ali-kiti takoa moamene.

Ete-kitame akoa agale oatikile toamoa ni atoa odeneka moa koua mea tiki ali-kiti takoa moamene. Ni kini mana kono-mikitipa Yesuke wene tugoa mea kini okoi agale tagamoa ele kule pale toamoa tadekolipa oyake takoa moamene. Eya wa wene toa nitamene. ⁷Akolaline ali atoa talo takago agomepa nipa ete-kitame padeya namike akoa agale oatikileka toamoo. Ni bu wamoa ete yene paya tetepo takamoa ni bia ue eya nokoa kawamoa ni lene piamoa ni eya kuya ako-kama mou wa wene piamoa too. ⁸Nitamokome talo agome eya too. One yapu ne noo wa ali atoa makutukoa moa nee takoa lawetoo ni ele kule epetaneleke wene piitikaneya mea ni utanele toa ni wene kiyo akenele toa ni Akolalinele takakilepa odene wene pianeya mea toa ni poti wene pia yawa too. ⁹One olaukanemopa ipa niminimono, yakoane moamedeku wa wedoa pikoa kawoo. Nitoapa one olaukane toa pine ina ina wa ete yene mane mane oo. Wa pade-kitame yakamadete wakoli mane oa mokala too. Enile-kala wedoa tiki ali-kiti takoa moa kakakala tamene wane uku. Ni edoa-mo.

¹⁰Talo tiki ali-kitame tamene wa iki toa tagoa toamiki ali kainya matiyame pademo pademo pamo oa ete yene oa yotokoa tiki. Kini losule tekete ali mati yatene kepene teigaki Yu yename edikakilepa ete yene moa patukoa tiki. ¹¹Dikaki yene ete ali-kitane yapu pekete pademo pademo wamatikimo olaukaketepa kini mati atoane wene bebo akakala tiki. Lede kue moadete ni tiki. Nitikala tikino, kini agale wawe wa moa kawikamene. ¹²Wini Keriti take yatene ago pade wene muno meane agome one yatene ko ikilepa eya wa akeneya. Keriti ali-kitame kapene agale oa ni yoko keneya mea ni loyo mekete nee eya nokoa kawa

tiki wa akeneya. ¹³Einapa nimini akedekono, wini yename Akolalinele kiyoke-kama takama pomotono, eya wa wedoa kikoa akamene. ¹⁴Yu yename la agale keneya pamo ikimo yakoa moamoa ni Akolaline agale ete pimotaa waki-kitame tamene wa ikile litia toamoa tamene wa kikoa akamene.

¹⁵Poane wene takoa koikatapeneya meko agomewa nipa padeyaka kitau okoya wa wamokome eya kuya peya epetane tetepo takoa meko. Wene moa koiganeya Keraisuke wene tugo meamiki-kitamepa epetaneyaka poaneyaka takoa enamekete eya kuya peya poane tetepo takoa meki. Kini wene-pala tepeta moa koiganeya mekete ni tiki. ¹⁶Nitoapa Akolali wene tuku wa ikiyake padele padele tikilepa Akolali meamene tetepo takoa tiki. Dikane yenepa Akolaliyo kote tokolo wako. Padele epetaneleka tamele toamokolo ele kule koiganele toma yaki.

Ada Atue Mane Mane Akenemo

2 Keraisuno ali atoa mea epetekakete toatekoile olaukanemo pine toa i i wa neme mane mane oa olaukoa tamene. ²Ada yatene-pala eya wa mane mane amene. Gerepi po ku ue eya nokoa kawamoa ni ete-kitame kei piatikile toa ni uutukoa poti yawa ni Akolalinele wedoa takama yawa ni ete ali atoake wene mekoa mea ni ke enekakolo meketeka ko wameneya Akolalinele takoa togamene wa mane mane amene.

³Eina toa atue yatene-palaka eya wa mane mane amene. Akolaliyo takoa motane atoa-kiti mea epetekatiki toa mea ni akoa agale wamoa ni gerepi po ku ue nokoa kawamoa ni ete atoa-kiti mea epetekatiki toa i i wa olaukoa tamene wa mane mane amene. ⁴Atue yatename tuatoa yatene i i wa ana mati-kitike wene mekoa mekete toatik-

ile olaukoa eya waka olaukoa tamene wa mane mane amene. ⁵Uutukoa poti yawa ni eko ali-kiti leneme kode noamoa ni yapu pupu epetekoa toa ni poti ko akene wene pia ni aname tamene wa oka toa litia tamene wa wini atue yatename tuatoa yatene olaukamotono ta. Ete-kitame Akolalinemopa pamo tetepo takakayano, nitimotono ta wane uku.

Tuali Yatene Mane Mane Akenemo

⁶Eina toa tuali yatene uutukoa poti yamene wa mane mane amene-ye. ⁷Taitasi neke yake tokale tuali yatename litia tomotono, padele padele tikilepa epetanele-kama tamene. Pademo pademo olaukakilepa pademo koiganemo ikileka toamoano, poti wene kikututukoa oa tamene. ⁸Nepala poi teja meki-kitamepa nepala akoa agale wamomotono, kiyoy akenemo-kama amene. Nipa totome natemo omotadiya wa kakoike kini wa ya momotono, nitamene.

Kueme Topo Toa Moa Egetane Yene

Mane Mane Akenemo

⁹Kueme topo toa moa egetane yene-pala eya wa olaukamene. Pine yename okoi toa-kama litia tamene. Nipa neno wameneya wedoa tamene. Padele padele tikilepa pine yenane wene epetekatikile toa enekala tamene. ¹⁰Kinikiya kode moameamene. Nitameneya kinikiya pikoa metekamele toko wa pine yename wene tomotono, kinikile wedoa takama pamene. Pupu pine yename toto toa motoko ago Akolalinekemo kei pimotaa tekete nitamene wa pupu yene mane mane amene wane uku.

¹¹Nimo ikilepa Akolaliyo ali atoa peya pewe witikene toane mou wa papete wene toopikanakale taatekoa taneyake ni uku. ¹²Einagome eya

tamene wa toto wene takako. Papete one agale tagoa toamoa itonole ele kule toada wa wene pia tokoinakale tewitikoa wamene. Ni itonoke mekilepa uutukoa poti yawa ni kiyo akenele toa ni oneke nate wene pianeya lukoa mea tamene wa toto wene taka taka toko. ¹³Nitikono, tone Akolali ako odene mekago toto toa motokago Yesu Keraisu einago pa teleta tootapeneya wakapea nomotoa totome nepia meko. Nipa nokome toto pewe wia kawoono, ke wa wedianeya nepia meko. ¹⁴Einago Keraisu totoke tukilepa ele kule poanele tokooleme toto moa labakaneya mekoota toa moademe taneya. Nitoapa oneke-kama lukoa meamene wa toto takoa motikilepa poane wene koikatapeneya memotoa tokome taneya. Nipa epetanele-kama tou wa wene pia tomotoa taneya.

¹⁵Wini ali atoa i i wa olaukoa ni mena mena wa mane oa moa tikilepa nipa nepala ina ukuna toapa Akolali patu kautakoa kake tamene. Padameka ne paya tetepo takamomotonu, wedoa meamene-ye.

Keraisu Ali Atoa Mea Epetekatikimo

3 Wini ali atoa eya tamene waka wene taka taka tamene. Ta yopiki yene Kanosolo yene meba yene enika eni yeneke poti lukoa meamene. Kini okoi agaleka yakoa toa ni ele kule epetanele toadete nodokoa meamene. ²Ni odenago-palaka akoa agale wamoa potimo-kama oa tamene. Yete pade ali atoa peya mama motikilepa poti ko akene wene pia tamene wa wini ali atoa wene taka taka tamene.

³Totomeka papete padele padele pale toa ni tone totono litia toamoa ni Setanuyo oa yotokakale etepea pote ni kola utukole-kama tou wa ele kule pale tikilepa enika enileme tone wene

moa labakaneya mekete tokoo. Nitaneya mekete ete-kiti-pala wene poaneya mea ni eko panagoneya tepi moa tokoo. Nipa ete oto wa topo takoapa tone tone timini luunali yoma yakoo. ⁴Nitima yakooka toto toa motoko ago Akolali ali atoake wene mekoa mekome auapeateka oi nokale ⁵toto toa motikilepa tone kiyo akenele tokoole-kitike tokoya mena. One weneme toto ela motokome toka. Nitoapa kini namolo poane wene wia wawano, ue moamene wa one Epetane Yomini totoke moa wetekakilepa one mea kawatiki mana konomikiti latikademe toka. ⁶One Yomini eni moa wetekakilepa toto toa motoko ago Yesu Keraisu yoto pitia awinome mea tagatapemotoa toka. ⁷Totopa poanele toamene yene tetepo takademe pewe eni witikome eya toka. One a tibuke mea kama poateko peku lawetatekale nepia memotoa one peku mati moa latikaka. ⁸Taitasi nepala ina okouna etene nimini okala tanemo ukuno, i i wa wedoa olaukama pamene. Akolalike wene tugoa meki-kiti padele padele epetaneleke wene piitikaneya mea toma pomotoane ukuno, nitamene wane uku. Ina ukupa epenemo uku. Ali atoa peya auapeatekomo eni uku. ⁹Pade-kitamepa pademo pademo pamo oa pili pili toa ni kini kaua-mikiti tama nekenemoke agale toonali yoa ni padele padeleke neno oa ni Mosesene totonoke pamo oa mokota oa tiki. Ali atoa auapeamekete pata pamo eni okala tikino, enika enimo oa kakoika titi toma yamene. ¹⁰One agaleme ali atoa pili pili toa kamotoa toko ago-pala mena wa mane oa motokale yakameadekalepa wa mane oa moamene. Nitikale wa yakameadekalepa einago titi toa wake wamene. ¹¹Dikane ali-kitipa wene moa koiganeya mekete poanele-kala tiki. Poanele eni tadeku wa wene teketeke tiki wa neme wene teke toko.

¹²Panago Atemasi patu Tikikasi patu pa wane neeke wini moane wetekakolu nokalepa nipa Nikopolise take noateka pake piadekalepa wete kotuatono namene. Niti tane tokene-menekepa Nikopolise take pone mepou wane wene pikene ni uku. ¹³Eya agota koiso totono pine wene toa toa oko ago Sinasi-pala Apolosita kini poatikika pomotono, wedoa auapeamene. Padeya-kiti toamokolopa kini moatikiya moa meamene. ¹⁴Padeya-kiti toamokolo pa ponopeneya meki-kiti auapeato wa

tone wini oya ali atoame eya tamediki. Padele padele epetaneleke wene piitikaneya mea toomoa pamediki. Nipa nego noma yawameneya ta pataka abuna pupu wedoa toomoa pamediki.

¹⁵Nopala opia meki peyame ne Taitasi wete meamene wa iki. Wini take Keraisunole takama yakete totoke wene mekoa meki-kiti wete meamene wa akamene-ye.

Akolaliyo kiwi peya pewe wia yopia memotoane kowitikoane uku-ye.

Opa anu agale eni.

PAILIMONE

Poloyo Pailimoneke Wia Wetekane Pipia

1 Polo nopa Keraisu Yesunole takama yakouke po yapu pitikagome uku.

Tone oyago Timosi totame tone oyago Pailimone neeke i agale wini oane wetekako-ye. ²Neke yapu losule toa oboai tiki yene ni tonu oyatoa Apia ni tota-pala poi kibutua tou toa Yesunole takama yako ago Akipasi kiwi peayake i agale wini oa wetekako-ye.

³Toneketai Akolali-pala Ali Muno Yesu Keraisutame kiwi peya pewe wia tepe koltoini kilikoa pikoa tomotoane kowitikoane uku-ye.

Pailimone Ete Ali Atoake Wene Mekoa

Yesuke Wene Tugoa Mea Tanemo

⁴Neke kowitikakene-kama Akolali-pala ke wane okala tuku. ⁵Nipa Akolaline ali atoa peyake wene mekoa mea ni Ali Muno Yesuke wedoa wene tugoa mea toko wa neeke akedikimoke ke wane ni uku. ⁶Neke Keraisuke wene tugoa meke tokomopa yete pade ali atoa eneke i i wa oa memotoane kowitikakala tuku. Toto Yesu-pala lipua mekolo Akolaliyo kiwi pewe-kama witikene tukule i i wa ne wene takatapemotoane tekene ni kowitikoane uku. ⁷Ete-kitike wene mekoa meke tokomo yatekouya tekene wene weye akeneya meane ke wane wediane mekene uku. Akolaline ali atoa weye akake tokano, ke wane uku-ye.

Onisimasi Neke Yapu Wa Moa Mekamene Wa

Poloyo Pailimone Kowitanemo

⁸Keraisu patu kautakoane kakene neke padele toatekole wete ta wane tika tika toane tamele tokoyake edikoane wamadene waku. ⁹Neeke wene mekoane mekene tekene ko akatekoane uku. Nipa no Polo ada toanemeku ago Keraisu Yesunole takakouke po yapu pitikene anu oyago Pailimone eya tamene wane ne kowitoane uku-ye. ¹⁰Onisimasiyo nepala poanele tokake po letu mekakana ke wamene. Anu mana tetepo takoane meku agoke uku. No po yapu yonoke po kakaneya pitikene Yesunomo oane metekolu einagome yakoa motoka tokolo ni uku. ¹¹Papete einagome nekele takakilepa pale tokala taneya. Opi pade nitamokome nekele wedoane takou wa wene pikome anukule-kitika wedoa takoa meko.

¹²Nitikago ne Pailimone mekota wakapea pa wane wetekakilepa anu kolotini ago eni wetekaku-ye. ¹³Nipa Keraisunole takama yakouke po yapu pitikenepa einago ne luku kakome no auapea memotoadiya wane pikeneke tuku. ¹⁴Nopla opia pa memotadiya wane wene pikene ne yakameneya meamedekolo waku. Neke weneme no auapeadekalepa epetoo. Nitameke no Poloyo ta wa tika tika tokolo tuku waneke weneme toameadekalepa epetamoo.

¹⁵Onisimasi einagomepa Pailimone ne nateyame tewitikoala pikilepa ne mekota wakapea pome mekome meademeke taneya patu. ¹⁶Ne mekota wini wakapea nome menokalepa neke skueme topo toa moa eegetane ago tetepo takamoano, neke kolotini agoka tetepo takoa meamene. Einagopa anu

kolotini agono, einagoke wene mekoane meku toa moa patukoa wedoa wene mekoa mea makutukoa moamene. Nekele wedoa takoa ni nepala kikutua Keraisunole takama yawa toono, ame wa oa makutukoa moamene.

¹⁷Neme nopala odene wene piitikoa mea Keraisunole takadekalepa nipa nopa neke oyago wa makutukoa mou toa einagoke wedoa makutukoa moamene wane uku-ye. ¹⁸Einagome nepala padele toa potoko ni nekeke padeya nami kakoa motokanakeya wete ee meamokalepa noanume nami witikadene tuku, amene. ¹⁹Inapa no Polo anu yoname witiku-ye. Noanume nami witikadene tuku-kutu. Nimo ukuyake eya waneka ne wene takakene ku. Ne mea kama poateka ka no Poloyo yametekouna. ²⁰Nitikounano, Ali Munagonole takake anu wene moano, ipa Keraisuno takaku wa anu wene weye akoano, einago makutukoa moamene.

²¹Ina ukule neme yakoa tikilepa moa patukoa akole toono wene taneya mekene uku. ²²No none piatekuta nodokakapiamene waneka uku. Akolaliyo kini kowitikimo yakoa tokome no ne pa wa wini noaeku ka yameteko patu wane wediane nepiane mekene ni uku-ye.

Poloyo Wipitikome Akenemo

²³Eya ago Epaperasi Keraisu Yesunole takaneleke nopala odeneka po yapu yapu pitikagome ne Pailimone wete meamene wa oko. Eya ali-mene nopala odeneka Keraisunole takoa meki ali-mene Make Arisakasi Dimasi Luke kimeka ne wete meamene wa iki.

²⁴Tone Ali Muno Keraisu Yesuyo kiwi peya pewe yopia memotoane kow-itikoane uku-ye.

Opa anu agale eni.

IBERU

Iberu Yeneke Wia Wetekane Pipia

Akolaline Mana Etenane Peku Noa Tanemo

1 Namolo papete Akolaliyo tone kua-mikitame one agale yakamotoapa one agale toawe akane ali-kiti i i wa akamene wa ele kule toa wene takama-kala nekeneya. ²Nitaneyake wipitikome manago i i wa akapoano pa wa wetekakale itonoke nokome etenanemo-kama i i wa toto yatene-pala toawe akaneya. Etenane peku nootokoa tibu itonota latia plane agome nitane. Tibu itonota ludu pia kawa tokoya peyapa nekeno, yopikoa-kala kamene wa etename moa kakane ago kekutu. ³Einagome Akolali pa tootapeneya mekome lawetane peku noa tagatapeneya. Nitane ago tokome Akolali kako toa kotuke-kama kako. Tibu itonota ludu padeya padeya peya pia kawa tomotoapa one tele tane agaleme-kama yopia meko. Nitiko agopa ali atoa tone poanele tokooke tuumotokome a tibuke wa ate wakapea pome ako odene meko ago Akolaline nimini yono lono wipititoa meaneya.

Mana Agome Edelo Ali Peya Moa Patukako

⁴Akolaliyo one edelo ali peya keku kakoa einagopa ako ago kakoa taneya. Nipa einagopa one mana wa ibini oapa one agale aua yaki yatene keku ibini oa edelo yatene wa ibini oa taneya. ⁵Nitikome okome *i ago nepa anu manago. Opi nopa neketai i kakene uku wa akeneya.* Nimopa edelo ago odene-palaka wamokomeke mana Keraisu-pala

akeneya. Ni Akolaliyo one edelo ago odenekeka eya wa wameneya.

Nopa i agono etene kawadene tuku. I agopa anu manago kawademe toko.

Nimopa edelo ali-kitike wa wamokomeke Yesuke akeneya. ⁶Nika one mana namolo ago itonoke moa wetekademe kakome eya wa akeneya.

No Akolali anu edelo ali peya i agoke lukoa mea neuwe tukua meoi wa akeneya.

⁷Wa Akolaliyo one edelo ali-kitike ikilepa eya wa akeneya.

No Akolaliyo anu edelo ali-kitipa anu agale oa aua yamotoane tekene pupulege keneya latiane ni anukule takama yamotoane tekene toe itipono keneya latiane tuku wa one pupu yene moa kakaneya.

⁸Nitaneyake one manago moa kakakomepa eya wa akeneya.

I ago nepa Akolali. Tibu itonota ludu pia kawa tokoya peyapa neme talo toa-kala kama poko. Nitoa talo toa mekilepa kiyoke-kama talo toa meko.

⁹Nitoa epetaneleke-kama wene pitikaneya meapa poanele-kiti peya kote tokolo kotimi yoa meko. Nitoa mekokepa no neketai Akolaliyo ne takoane motekene eya tokouna. Neke oya yene keku kamotoane ne ako moane kakakilepa ne wedoane wedikoane tokouna wa akeneya.

¹⁰Eya waka akeneya.

Namolo namolo tittikake ne Ali Munoyo itono latia pia neke yoname tibu latia tokana. ¹¹Tibu itonota takoa pootapekaleka nepa pa mea kama poo. Tibu itonotapa mamina kego noma pou toa keneya wetini toma pokaleka neme eya too. ¹²Tokoo kakene mamina kotokoa tukua piitikoa weneya mamina moa kawou toa tibu itonota wawa weneya latia pioo. Nitatekoyake nepa papete mekana toa pa mea kama pekepa wetini toma poamoo wa Akolaliyo mana Yesu-pala akeneya.

¹³Akolaliyo mana-pala eya waka akeneya.

Nepala poi teia meki-kiti kawikama pone neke kawane moane pitikoai tou. Nitouno, anu nimini yono lono noke nepia menamene wa Akolaliyo Yesu-pala akeneya.

Nitaneyake one edelo ali odene-palaka edikoa akeneya mena.

¹⁴Nipa edelo yatene pa edane yatene patu. Eni yatename Akolalingle takama piki. Enipa Akolaliyo one toa moateko-kiti toto auapeatino poe wa wetekakolo auapenokala tiki. Nipa tone leneme enamoko yenameke tibu mea note auapenokala tiki.

Akolaliyo Toto Toa Motikilepa

Padele Tubele Tokome Tanemo

2 Keraisu einagopa edikane agono, eya tato wane uku. Toto etepea pokaya tokolo tone yakoa motokoonakale wedoa toa pikoa meato.

²Papetepa edelo ali-kitane agale tetekane yene peya Akolaliyo kibu mokala taneya. Nipa einagale litia tootapeamedikiyake padele katekoa toameadiki wa kibu mokala taneya.

³Opa mana agome tubele tokome ali atoa toa motanemodo totome yakamadete wakolopa Akolaliyo wedoa kibu moo. Kibu moamomotoa tekete manika petoa pomotoa-pe. Ali atoa toa moatekamopa Ali Muno ago oneme titia toawe akeneya. One eni okale yakane yenamepa einapa nimini eni akedeko wa toto-pala oa mekala tokoi.

⁴Onekemo eni oa aua yakoika Akolaliyo ali atoane wene kainya pikanele ele kule tubele witakakala toka. Nipa ekee, Akolaline tele patu kautakoa kakete ikino, nimini eni akediki wa totome yakoa momotoa toka. Nitimotou wa Akolaliyo eyaka toka. Ele kule toatekoo peku tutu tutu wa lawetekamotoa one

Epetane Yomini totoke moa wetekaka. Nipa one wene litikome toka.

Toto Toa Motane Agoke Akenemo

⁵Akolaliyo weneya itono latiateka wene toopia mekomepa edelo ali-kiti kime yopiamene wa yamepianeya mena. Ali atoame yopiatekoi wene toopianeya.

⁶Nikepa Depidiyo Akolali-pala eya wa akeneya.

Ae, toto pa keku mekono, edeyake neme wene taneya meko-pe. Totopa pa ali atoano, dekolo mama moa meko-pe. ⁷Neme ali yatene latikilepa pa nateyame edelo ali yatene ako kakoapa ali yatene keku keneya kakoa toka. Nitoake pa teleta tootapeneya meku toa meamene wa ali yatene kei wedoa pika. ⁸Nitoapa padeya padeya peya yopia kamene wa neme ali yatene yamepika wa Depidiyo Akolali-pala akeneya.

Padeya padeya peya yopia kamene wa yamepianeyake ikilepa odeneyaka katekameneya peya kikilikoa yamepianeya wa okome akeneya. Peya yamepianeyake opa ali yatename padeya padeya peya wete yopikoa kawameadiki. ⁹Ali yatename padeya padeya peya wete yopiamikiyake Yesu taatekoa nome yopia-kala kako. Pa nateyame edelo ali-kiti ako kamotoa Yesu einago ali latia itonoke nekeneya. Enipa Akolaliyo ali atoa pewe wiateka wene toopiane toa taatekoa tokome ali atoa toto peyake tuaney. Nitikale tokome Akolaliyopa one a tibuke pa teleta tootapeneya meku toa ne meamene wa one kei pia kakeneya.

¹⁰Padeya padeya peya latitikoa yopia-kala meko ago Akolaliyo one mana kono-mikiti peya mati one pa tootapeneya mekuta nomotou wa eya taneya. Nitou wa oa pikana toa taatekakomepa mana Yesuyo tete moa kamotoa itonoke moa wetekamedekale

moa wetekaneya. Nipa toto toa moateka ka patekane agome poanele padeleka toameneya mekome onekele takoa togateka kotu kakoa tomotoa nitaneya.

¹¹I ali atoapa Akolaline takoane motekene tuku wa tone poanele kogatapea tuane agoka eni ali atoa to-toka Akolaliyo odene yatene ali atoa tetepo takoa meko. Nitikono, Yesuyo to-topa onekameyo wa amene ya motokoya mena. Ni edoa-mo. ¹²Yesu einagome etene Akolali-pala eya wa akeneya.

Atai Akolali ne ko ikilepa anukameyo-pala ou. Ne kowitadete koukoa mekoi peyane lene yoto kakene ne kei plane kawou wa akeneya.

¹³Eya waka akeneya. *Akolalike-kama wene tugoane meou wa akeneya.* Nimo ootokoa kakome okome *Akolaliyo no yametekana mati-kiti-pala i opiane kakene uku* wa Yesuyo akeneya.

¹⁴Akolaline mati-kiti wa akene yene totopa tone kua-mikitike tama noko toa Yesu einagoka tonu melepu kakeneya nikilepa ali atoa tukina toane oneka tuou wa nekeneya. Nipa ali atoa tu-atiki peku laweteko ago Setanu moa kawikademe eni nome tuaney. ¹⁵Nipa ali atoa toto tukaya wa piti motaneyakama meko take eni nikilepa piti takoa wawano, atiki toa poe wa toa moademe nekeneya. ¹⁶Nitane agome edelo alikiti auapekoya mena. Eberameke tagene ali atoa toto auapekoya. ¹⁷Nitadene kei ali-kitane yagono ago latitapeneya meamedeku wa tonu melepu kakeneya nikilepa eya toademe nekeneya. Ali latitapeneya mekomepa ako odene mekome lodo yotokako ago tou toa ali atoa ela mati motokome Akolalingle wedoa takademe nekeneya. Nipa Akolaliyo ali atoa tone tokoo poaneleke po letu mekakana keemu toa wene keaney memotoa tokome totoke tudeme nekeneya. ¹⁸Itonoke eni nome mekale Setanuyo likoa enoai tokale

ke enekakale meaneya. Nitaneyake Setanuyo likoa eneko-kitipa oneme wene toa auapeko.

Yesuyo Ali Atoa Toa Motikilepa

Moseseyo Tane Toa Moa Patukakome Tanemo

3 Nikepa anu oya-lawe no tukuna toa Kerai sunole takama yaki-kiti kipala eya wane uku. Akolaliyo kipa one tibuke noatino noe wa kayo akene-kiti Yesuke-kama wene piitikaneya meamene. Ako odene mekome lodo yotokako agome tou toa one wene kekamotoa teke onekemo akapoano pa wa Akolaliyo moa wetekane agoke uku. ²Yesu einagomepa one moa kakakanakagome tamene wa okana toa-kama tokala taneya. Nipa papete Moseseyo Akolaline yapu yopikou toa Iserere yatene yopikome toateka toa toa togatapeane toa taneya. ³Nitaneyake Akolaliyo einagota kei pikilepa Mosese keku ago tetepo takoa Yesu etene ako ago tetepo takoa toko. Nipa yapu-kiti epetaneya kakale eneketepa i yapupa epetaneya wa totome kei piketeke yapu wiko ago kei wedoa piko toa toko. ⁴Yapu pade wianeya kakale eneketepa panago i agome wianeya wa oko. Eya kuya pia kawa tokoya peyapa Akolaliyo-kama latianeya. ⁵Moseseyo Iserere yenepa Akolaline yapu tetepo takoa mekome pa pupu agome tou toa one eni yapulu yenanele wedoa takoa meaneya. Nipa Akolaliyo naniko oatekamo Mosese einagome i i wa papete toaweakaneya. ⁶Kerai sunole taatekoko nokome Akolaline yene talo toa meaneya. Nipa yapu pinagono mana tokome etename okana toa-kama tootapeneya. Nitane agome wipitikome pewe witikale nepia meato wa onekele atiki toa takoa togaketepa one yapulu yene too.

Ko Memotoa Yametane Take Poatekomo

⁷Kipala ina ukulekepa Epetane Yominiyo papete oa plane toa litia tamene. Eya wa oa pianeya.

Opi Akolaline agale yateketepa ⁸*kolotini lupi tootokaneya meameamene. Papete kini kaua-mikiti ali piamene ta ludu yaketepa no Akolaliyo tokale enato wa anu agale yakamene kote tokale wakala tokoi, kime pade nitameamene.* ⁹*Kini kaua-mikitame edikoa no toa enekala tikilepa mali padeka noi kakoa (40) ponoka toane ele kule telekole tokoule eneketeke tokoi.* ¹⁰*Nitikoli eina yene-pala wene poaneya mekene ekene i yenepa kini wene piki toa litia etepea-kama yaki. Nipa anu wene pikule litia toamiki wane okou.* ¹¹*Nitoane kotimi yotekene ekene kiwi ko meamene wane yametekouna take nomotoane wamuku wane okou wa Epetane Yominyopa Akolaliyo okamo yakoa akeneya.*

¹²Anu oya-lawe kini tepene Akolaline agale yakamatiki poane wene witakomepa meemoa poko Akolali tewitikoa etepea pokayano, wedoa meamene-ye. ¹³Nipa ele kule poanele tekete kini wa oa yotokoa kolotini lupi takakaya tokale ta pataka abuna ete oto wa auapea mane oa moma pamene. Naniko mena. Akolaliyo ipete wa metane oi taatekako-mene nitamene. ¹⁴Keraisuke pegetoa wene tugoa mekoona toa wedoa wene tugoa mea togaketepa nipa Keraisuno yapulu yene too. ¹⁵Akolaliyo akene toane ina wiane mekakumopa lokoane ukuno, yakamene.

Opi no Akolali anu agale yateketepa kolotini lupi tootokaneya meameamene. Papete kini kaua-mikiti ali piamene ta ludu yaketepa no

Akolaliyo tokale enato wa anu agale yakamene kote tokale wakala tokoi. Kime pade nitameamene.

¹⁶Akolaline agale yakatekoapa litia tamene kote tokale wakilepa mani yename taneya-pe. Moseseyo Idipi ta tewitikoa pato wa aua pekene yene peyame nitaneya. ¹⁷Akolaliyopa mali padeka noi kakoa (40) ponoka toa kotimi yoa mekilepa mani yatene-pala kotimi yoa meaneya-pe. Ali piamene ta ludu ele kule poanele toma yakene yene-pala kotimi yoa meaneya. Eni yenepa eni ta ludu yawa tukolokaneya. ¹⁸Ni Akolaliyo i yenepa kiwi ko meamene wane yametekouna take nomotoane wamuku wa yono timini mukitinike pitikou toa ikilepa mani yeneke akeneya-pe. One agale tagoa toamene yeneke ak-eneya. ¹⁹Nimo akeneyake totome eya wa wene toko. Eina Iserere yename Akolaline agale yakamadete wakete tekete eina yametekana ta lobutua pamele toameneya.

Akolaline Ali Atoa Ko Meatikimo

4 Akolaliyopa kini ko mepatiki taapa i wa yamepianeya. Kiwi ko meatiki wene wia wawamokono, kiwi pade pata paka pokaya wa piti motaneya meamene. ²Eina epetane ko totome yatekilepa tone kaua-mikitame papete yakanemo eni yatekoo. Eina yename yateketeke Akolalike wene tugamekete tekete pata pale toa yakaneya. ³Nitaneyake Akolalinemo yakatekoa oneke wene tugakoo-kiti totopa one ko mekota oyake lobutua pamele toko. Nitamele tokoyake oneke wene tugamene-kitike Akolaliyo eya wa oa ka ketekaneya.

Yono timini mukitinike pitikou toane eya wane kotimi yoane meane tukakou. I yene kipa no ko mekouta etene lobutua nikileka toamoi wa akeneya.

Tibu itonota latia mea peya takane-pete laigoa one ko meemoa nokomeke

akeneya. ⁴Akolaliyo tatono (7) takoa ta patakale tanemoke one bokuke panagome eya wa wia mekaneya. *Tatono (7) takoa ta pataka-pete Akolaliyo one pupu toa peya takatekoa ko meaneya wa wia mekaneya.* ⁵Akolaliyo tone kaua-mikitike akene toa eya waka wia mekaneya piko. *No ko-kama mekouta nikileka toamoi wa wia mekaneya.*

⁶Ali atoa padeka-kiti eida pote mepatekoiyake onekemo namolo yakane-kitame yakamadete wakete tekete pote mepameneya. ⁷Nitaneyake nani mati Akolaliyo ali atoa padeka-kiti eida ko mepatekoi oipa ipete wa pade oi metekome akeneya. Nipa Depidi-pala okome okome *ipeteka no Akolaline agale yateketepa kini kolotini lupi tootokaneya meameamene* wa akeneya.

⁸Namolo namolo eya ago Yosuyo Iserele yene ko meatekoi take aua poo tokapa nipa Akolaliyo Iserele yene kini ko meatekoi-petepa ipete wa oi pade naniko meamoo toka. ⁹Eina oi taatekoa noka-pete one yene toto Akolali-pala ko meamele too. Nipa Akolali tatono (7) takoa ta pataka-pete laigoa ko meemoa nekene toa nitamele too. ¹⁰Akolali ko mekata poka agomepa nipa one pupu tewitiko wawa poo. Nipa Akolaliyo papete one pupu toa peya takatekoa ko mea-kala kako toa nitoo. ¹¹Tone kaua-mikitame Akolaline agale yakamadete wakete etepea pekene toa toto padeka-kiti pata paka etepea pokayano, eida ko meemoa pouketepa wili-kama tokoa ka-toane uku.

¹²Akolaline agalemepa yomini meaneya tou toa ele kule telekole tokala toko. Nipa eka okata olo kakene tueme-kiti tonono puou toa aline wene yominita oyake moa leteamele toko. Ele kule toada wa tone wene pikole-pala tetoa enetapeamele toko. Nipa peyane tepene piko wene i i wa keleyo yameamele toko.

¹³Akolaliyo latikanakeya odeneyaka oneme enekaya kekoa potipiamele toamokolo uku. Einago tone koiso pitia yakateko agomepa padeya padeya peya keleyo-kama enetapeko.

Keraisyuyopa Ako Odene Mekome

Akolaline Wene Kekakanemo

¹⁴Ako odene mekome Akolalike lodo yotokako ago tou toa ibini akene ago Akolaline mana Yesuyo tone kowitikademe a tibu patukatapea etene mekota pome mepaneyano, Yesu einagoke wene tugoane meku wa pegetoa toaweaa oa wene tugoa mekoona toa oneke wedoa wene tugoa meemoa patoane uku. ¹⁵Ako odene mekome Akolalike lodo yotokou toa kowitikako agomepa i ali atoapa taba ali atoano, waye wa Akolaliyo yakakoa tone kowitikakala toko. Nipa Setanuyo ali atoa toto likoa eneko toa oneka likoa enaneya tokome toto mama moa kowitikakala toko. Nipa likoa enoai tokaleka poanele padeleka toamene agome toko. ¹⁶Nitikono, ali atoa pewe-kama witikago Akolali one mekoya liti pote kapamele toko wa one leneke atiki toa kakete kowitatoane uku. Ke enekakale mekoo-pete-kama toto ela motokome auapeono, nitatoane uku.

5 Ako odene mekome Akolalike lodo yotokamotoa takoa motane ali-kitike uku. Dikako ago tukale one luku panago moa kakakilepa Akolaliyo ete ali-kiti takoa wawa odene ago takoa moa kakako. One yatene ali atoame tokoi poaneleke padeya-kiti mea lodo yoa kowitikamotoa ni toko. ²Einagomepa wene toamene ali atoa etepea pote poanele tokoi ke lodo yotokakilepa ae kime tiki toane onemeka poanele tuku wa eni yene mama moa toko. ³Nipa Akolalike lodo

eni yotokakilepa oneka poane ago tokome pinali one poanele tokake lodo yokala too. ⁴Nipa one weneme ako ago mekene tou wa tokoya mena. Akolaliyo takoa moa kakane ago tokome ni toko. Nipa papete Akolaliyo eya ago Erone takoa moa kakakale mekome tane toa toko.

⁵Keraisyuyoka ako odene mekene enakale tou wa taneya mena. Nitaneyake Akolaliyo one-pala eya wa akeneya.

I ago nepa anu manago. Opi nopa neketai latiane meku wa Akolaliyo mana-pala akene toa panagome one bokuke wia mekaneya.

⁶One boku padeke Akolaliyo mana-pala eya waka akene toa padame wia mekaneya.

Anu wene kekakadepa lodo you toa teke ali atoane kowitikama poo. Eya ago Melekisedekeyo papete tokana toa nemeka too wa Akolaliyo akeneya.

⁷Yesu tono melepu eya kakeneya itonoke nome mekome Akolali kowitikilepa komo kata oa kakome taneya. Nipa one tukale moa kamotokatekago kowitaneya. Nitoa yoti mitikatekoa mekome kowitikale tokome Akolaliyo yakoa taneya. ⁸Keraisu einagopa Akolaline mana kakilepa taneyake etename oka toa-kama wene toa litia tootapeademepa ele kuleme ke enekakale mekome poti utanele-kama toomoa pekeneya.

⁹Nitoapa etenane wene pika toa kotuke kakoa tootapeneya tokome one agale yakoa tiki peyapa one patu kautakoa kakete mea kama pamele toko wa toa motoko. ¹⁰Nitikago-pala Akolaliyo okome one wene kekadepa lodo you toa ako odene meke ali atoane kowitikama poo. Melekisedekeyo papete tokana toa nemeka too wa Akolaliyo mana-pala akeneya.

Yesunole Takama Peketepa

Pegene Kakoa Tewitiko Wawameamene

¹¹Kipala ina ukuna i i wane oane togatekuyake kini yakatiki toane pine ina ina wane amele toamokolo waku. Kipa tugi ootapeneya mekili tekene ni uku. ¹²Kipa Yesuke wene tugakilepa wete mati titia tokoina. Nitikoina tekete eko ali atoa oyake olaukamedikiyake Akolalinemo pegetoa olaukanemo wene kayapeaneya mekino, panagome kiwi wa olaukamedeko. Ae, nana matiyame keneya ipe kakoya nee eya noameneya adu-kama nou toa Akolaline agale wedoa yakameneya meki. ¹³Panagome-kiti adu-kamado nakomepa nipa nana matiyame tokole eni toko. Einagome ali atoa wene kiyo akeneya mekete toatekoile olaukanemo wene toamoko. ¹⁴Wa panagome-kiti Keraisunomo yakoa motokomepa nipa ipe kakoya nee nako agome tokole eni toko. Nipa Akolaline agale pine piko toa pitia enekala tokoya tokome epetaneleka poaneleka wene toa tetao eneko.

6 Keraisunomo nana mati olaukou toa pegetoa olaukanemo-kiti totome adekoa yatekoo. Eya wa olaukanemoke uku. Tone namolo pale tokoonakale tewitiko wawa Akolalike wene tuga meatekoomo ²ni ue moatekoomo ni tobou waneke yono pia kowitatekoomo ni Akolaliyo tuane ali atoa moa kamotokatekamo ni poanele toma pokoi yene poane take mea kama poe wa Akolaliyo koiso akatekamo enika animopa totome adekoa yatekoono, ³Akolaliyo ka yametekalepa Keraisunomo emo kumo peya yakoa moateko toa yakoa moato.

⁴Keraisunomo yakoa mootokoa onekele takoake wakoi yenepa kini poane wene wia wawe wa panagome

edoa wa mane mane omotoa-pe. Pegetoapa eni yene pa takalogou toa Akolaliyo pewe witikome one peku noa toatino toe wa lawetekale Epetane Yomini awia nome menaneya.

⁵Nitane yename meke tane nee nou toa Akolaline epetane agale yakoa ni one weneya tibu itonota talo tokome telekole toatekale nami enoa taneya.

⁶Nitaneyake kote tokolo wawa etepea peketepa nipa Akolaline manapa yomo lekaneyake wa lokoia wia dekou toa tekete tiki. Nipa ali atoane leneke wa tegene matou toa tekete tiki. Padameka eni yenane poane wene wia wawatiki ka i wa lokoia yameamele toamoko.

⁷Itono pikoka-kiti ta pitakala tokolo ko akaneya pikolo tokome pinagono noa meateko nee wedoa witako. Nitikoka Akolaliyo pewe wia yopiko. Enipa Akolaline ali atoa totoke uku. ⁸Wa pade itono pikoka tonipo paya ke eya wita kopa nipa tonipo pitaneya tokome Akolaliyo pewe wiamokome poanemo oa wako. Nitoa wipitikome toeme nomotoa wawademe toko.

⁹Anu kolotini yene kiwi edikoane pubu oane pedoane agale ukuyake kipa tonipo pitane itono keneya wane wamuku. Akolaliyo kiwi pewe wia togakomepa toa moademe tokono wene tekene ni uku. ¹⁰Akolaliyo kini tikile pitia enekilepa kiyoke-kama toko. Nitikono, kini wini epetekoia toma yakile oneme wene kayapeamoo. Oneke wene mekoa mekete tekete one wa takoa motane yene auapekoina toa wida pa auapekete tikino, Akolaliyo wene kayapeamoo. ¹¹Kini papete epetekoia toma yakoinakale kiwi peyame wedoa toa togamene wane uku. Nipa Akolaliyo kiwi pewe witikome auapeoo wa one eni tokale kime nepia mea enemotoane ni uku. ¹²Onekele kote au keneya moa takameamene wane uku. Kiwi yatene auapekene dikou wa Akolaliyo papete

oa togotokana toa taatekoa tokale nepia mea enemotoane ni uku. Nipa one wipitikome meatekoya-kiti moato wa oneke wene tugoa mekete poti nepia mea togaki-kitame tikile kotukoa toma pamene.

Akolaliyo Oa Pianele Etene Taatekoa Too

¹³Akolaliyo ne auapekene ile tou wa Eberame-pala oa pikilepa one eni agale tele takakome pinali one ibini wedekakome akeneya. One moa patukoa ako kako agoka kawamokale tokome pinali one ibini wedekakome nitaneya. ¹⁴Nipa *ne pewe wiane kakilepa neeke ali atoa peya mati tama pomotoane tekene tou* wa oa togotaneya.

¹⁵Nitikale Eberameyo ee nimini oko wa poti nepia mea kakakoa Akolaliyo tou wa one-pala okana toa taatekoa taneya. ¹⁶Panagome-kiti ile tou wa one agale tele takakome ikilepa one moa patukoa ako meko agono ibini wedekoa okala toko. Koisoke-kiti kakome i i wa ako ago padane ibini wedekakome okalepa ete-kitame ee nimini oko wa one okomo yakoa motiki.

¹⁷Akolaliyoka kiwi auapekene ile tou wa one yatene-pala ikilepa one ibini wedekakome akeneya. Nipa one eni toateka wene wia wawamoo wa wene tomotoa nitaneya. ¹⁸One eni toatekale toto poome toameneya nepia memotoa tokome Akolaliyo takutale eni taneya. Ile tou wa one kabunume oa pia ni pinali one ibini wedekoa oa taneya. Nileta tanelepa kapene wakamele toamokolo tokome one wene wia wawamademe toko wa oneke poti lukoa meadete toa pokoo-kiti totome amele toko. ¹⁹Nitoa Akolaliyo wipitikome toatekale wedianeya nepia mekilepa ue dipi-kiti mabo kakeneya waname uele lauaneya piou toa poapeneya nepia meko. Nipa tone yomini meaneya etepea poamomotoa

tokome Keraisuyo eya taneya. Tobou losu yapu keneke Akolali meko lono wa ibini akene yapu luku olege tane mamina patettoa pome kawou toa a tibuke pome meko. ²⁰Nitoapa toto naniko nomotoa Yesu eni namolo takoa pome mekome tone kowitikako. Nipa ako odene mekome Akolalike lodo yotokoai tane ago Melekisedeke einagome papete tane toa tone kowitiko-kala kama poko.

Akolalike Lodo Yotane Ago Melekisedeke

7 Melekisedeke einagopa namolo namolo Saleme ta tobou ago mekome ako odene meko Akolalike lodo yotokoai taneya. Nitane agome eya taneya. Eberameyo one-pala poi teiane tobou ali-kiti litimoo pome wia atukamotokome wakapea nokale kotupokome Akolaliyo ne mea epetekamotoane uku wa makutukooa motaneya. ²Nitikale Eberameyo eni tobou ali-kitaneke wia motokanakeya-kiti moke tikilepa lu takutake odeneme pakitiko-kala (9) one pikome odene ipa neke wa Melekisedekene pikakala taneya. Tone agalekepa tobou ago Melekisedeke wapa kiyoke-kama yopia epetekako ago wa ekete oa ni Saleme tobou ago wapa ali atoane tepe kolotini kilikooa pikooa yopiko ago wa ekete oa too. ³Einagopa one etene ninetapa i ago i atoa wa padameka wene toamooa ni one kaua-mikiti i i wa wene toamooa tiki. Ni one opiane-petepa ipete wa padameka wene toamooa ni one tukilepa ipete taneya wa wene toamooa tiki. Ni agopa Akolaline mana keneya mekomepa ali atoame Akolaline totono tetekaneleke oneke lodo yoa wene kekakooa-kala kama poko.

⁴Melekisedeke einagopa nitane ago-yo. Toto Yu yatene tagaane ago Eberameyoka poi keneke tobou

ali-kitaneke wia motokanakeya-kiti moke toapa lu takutake odeneme pakitiko-kala (9) one pikome odene ipa neke wa Melekisedekene pikakala taneya. Nipa einagopa etene ibini akene ago tetepo takoa nitaneya. ⁵Nititikaneyake Moseseyo one totono yametekome tamene wa akene toa tekete Akolalike lodo yotokamooa moa kakane Lipai yatene ali-kitame eya tiki. Malikeka ete Yu yatene-kitame kini kamooa eya moke toapa lu takutake odeneme pakitiko-kala (9) kini wa pikete odene katekamooa Lipai ti kinino moati wa pikakala tomotoa tiki. Ete yatene-kitika odene ago Eberameke tama nekeneyake tiki. ⁶Papete Melekisedeke einagopa Lipaike tagene ago menake Eberameyo einakeya-kiti lu takutake odeneme pakitiko-kala (9) one pikome odene katekamooa Melekisedekene pikakala taneya. Akolaliyo ne auapekene dikou wa oa togotokale yakane ago Eberameneke Melekisedekeyo einakeya motaneya. Nitane agomepa Akolaliyo ne pewe wimotoane uku wa Eberame makutukooa motaneya. ⁷Akolaliyo ne pewe wimotoane uku wa panagome-kiti ikilepa nipa ako agome keku ago-pala okoya. Nipa Melekisedeke einagopa etene ibini akene ago wane ekene uku. ⁸Opika Lipai time ete Yu yatene-kitaneke kinikiya-kiti pade edikooa motikilepa nipa tuatiki ali-kitame tiki. Papete Melekisedekeyo Eberameneke padeya-kiti motikilepa nipa Akolaline bokuke wia mekane toapa tuamateka agome tou toa taneya. ⁹Nitaneyano, totome eya wa amele toko. Lipai time ete Yu yatene-kitaneke kinikiya-kiti pade edikooa moatekoiyake papete Eberameyo onekeya-kiti pade Melekisedeke ipa neke wa kei pikome metekilepa oneke tawateka ago Lipai-pala odeneka dekoa kei pikome

meou toa metaneya. ¹⁰Lipai einago one kaua ago Eberamene tepene meane tetepo taneya mekako Melekisedekeyo Eberame kotupaneyake ni uku.

¹¹Akolaliyo one totonopa Lipai timekama pikoa kamotou wa Lipaine mana Erone namolo takoa moa kakaneya. Eni totono litia toatekoi adekake kakoa litia tomotoa Lipai timedo ete Iserele yatene oyake olaukamele too tokapa nipa Akolaliyo Eroneke tama nekene ali-kiti luku weneya ago Melekisedekene yagono ago moa kakamele toamoo toka. ¹²Nitamele toamoo tokake Akolaliyo eni totono pikoa kakene yatene wawou wa weneya ali moa kakakomepa kini pikoa kakene totonoka wakome weneya totono yameamele taneya. ¹³⁻¹⁴Weneya alipa Yesu Keraisuke uku. Ni ago tagilepa Lipaike taneya mena. Onepa Yekobene mana pade Yudake tageneya. Papete Yuda-loeke tagene ali-kiti padameka Yu yename poanele tokoike Akolalike lodo yotokameneya. Moseseyoka Akolalike lodo yotokateka yatene i wa takoa ikilepa Yuda yatene wameneya. Yuda yatene takoa wameneyake Yuda-loeke tagene ago Yesu Lipai time tanele toademe nekeneya.

Melekeseideke Keneya Ago Keraisuyo

Akolaline Wene Kekakakome Tanemo

¹⁵Kipala ina okouna pine toaweane ouno, yakamene. Akolalike lodo yotokou toa one wene kekakane ago pade Melekisedekene yagono ago taatekoa nekeneya tadeko. ¹⁶Lipai yatene ali-kitame Akolalike lodo yoa one wene kekakakilepa nipa kaua ago Lipaike tageneya tekete tiki. Kiwi luku Akolaliyo pade ago moa kakakilepa einago etene telekole toa mea kama poko ago tokale ni taneya. ¹⁷Nitatakalekepa Akolaliyo akene toa panagome wia mekakome

okome lodo yotokago tou toa anu wene kekakakilepa pa mea kama peke too. *Nipa Melekisedekeyo toka toa nemeka too wa wia mekapianeya.* ¹⁸Namolo totono Akolaliyo edikoa katekoa wakilepa ali atoa toto auapeamele toamene totono tokale ni taneya. ¹⁹Eni totonomepa odene agono weneka oyake moa kiyo akatapeamele toameneya. Nitamele toameneyake Akolaliyo one mekuta noatiki ka pade epetane ka ino, noatino noe wa toto yametane. Nitaneyake Yesu pitia poadete wedia meko.

²⁰⁻²¹Lodo yotokakago tou toa one wene kekakoa ka patekoa yopimotou moa kakakilepa Akolaliyo Yesu-pala eya wa oa lutua moa kakaneya.

No Ali Muno agomepa neke toateko wene toopikumo luutukoane ukuno, yakamene. I ago nepa lodo yotokakago tou toa teke anu wene kekakoa ka patekoa yopia kama poo. Neke nitateko wenepa wiane wawamou wa Akolaliyo oa togotaneya.

One namolo totono pikoa kamotoa Lipai yatene takoa moa kakoaka enimopa eni yatene-pala wameneyake Yesu-pala akeneya. ²²Nimo oa togotokaneya tokome totome eya wa wene toko. Yesu einagome i wa eni ka patekoa yameteko yopiko totonopa etene epetane mati totono tadeko.

²³Lipai yatene ali-kitame namolo totono pikoa kakilepa peya matiyame taneya. Eni totono pikoa kawa mea tuma-kala nekeneya tokolo ni uku. ²⁴Keraisu einago tuameneya mekome weneya ka yopia-kala kama poko. ²⁵Nitiko ago tokome Akolali mekota poadete one yoto pitia piki peyapa oneme-kama toa mokala toko. Nipa i yene kini poanele tokoike po letu mekakana kemu toa wamene-ye wa Keraisuyo kini kowitikama-kala poko.

²⁶Akolalike lodo you toa tone kowitike ti toko agopa Yesu tadekolo

uku. Onepa kiyo akenele-kama toa ni ete-kitame akoa agale oatikileka toamoa ni wene moa koigameneya mea tokolo uku. Nitikagopa Akolaliyo tone poanele toa mekota pilia moa etene ako tibuke ne ako ago mea wa moa mekaneya. ²⁷ Ako odene mekete Akolalike lodo yotokoai tane tobou ali-kitame Akolaline wene kekakakilepa ta patako abuna sipi sipi kai wia lodo yokala tiki. Nipa pinali-kiti kini poanele tokoike nami wia lodo yotokoapa ete-kitame poanele tokoike nami wia lodo yotokakala tiki. Yesuyo pade nitameneya. Poanele toamene ago tokome sipi sipi kai tetepo tootokoa pinali one wa lodo you toa tukomewa Akolaline wene kekakatapeneya. Wa pade tuamoo. ²⁸ Mosesene totono pi-ane toa ako odene mekete Akolalike lodo yotokamotoa moa kakane tobou ali-kitamepa ete yene peyame tiki toa poanele tokala tiki. Eina totono yame-tekane yake naniko Akolaliyo ile tou wa oa togotokanakale taatekoa tokome mana ago moa kakaneya. Nipa mea epetekateka kotuke kakoa mekatapeane ago ne mea kamene wa moa kakaneya.

Ako Odene Mekome Lodo Yotokako Ago

Tou Toa Yesuyo Akolaline Wene Kekakako

8 Ina ukunapa eya wane ekene uku. Ako odene mekome lodo yotokako tobou ago tou toa tokome Akolaline wene kekoa tone kowitikako agopa Yesu tadeko. Einakagopa a tibuke ako odene mekome talo toa meko ago Akolali meko walai nimini yono lono pome mepaneya. Opika eida pa meko. ² Eida mekome Akolaline yapu eteneya keneke onekele-kama takoa meko. Yapu eteneya wane ukupa alime wiane yapuke ukuya mena. Ali Muno mekotake uku.

³ Ako odene mekome lodo yotokako tobou ago moa kakakilepa Yu yene peyane eya takamotoa tiki. Kini kow-itikakome Akolalike padeya-kiti mea sipi sipi kai wia lodo yomotoa tiki. Lodo yotokou toa tone kowitikako agomeka Akolalike padeya meamele taneya. ⁴ Ni agopa itonokedo pa mekome too tokapa Akolalike padeya mea lodo yoamoo toka. Lipai ali-kitame Mosesene totono litiapa enile tokala tikino, oneme pade nitamoo toka. ⁵ Lipai ali-kitame edikakilepa one a tibuke tokole adeka pia tokala tiki. Nipa pa tekei tokala tiki wane uku. Moseseyo Akolaline mamina yapu wikakademe kakale Akolaliyo eya wa akenemoke ni uku. *Ne Kati Sainaike kake enekale a tibuke no Akolalinea adeka plane yametekounano, anu mamina losu yapu wikakakilepa eina yametekouna adeka pia wikakamene wa akeneya.*

⁶ Keraiyuyo toto auapekome toatekale i i wa Akolaliyo lutua yametekilepa Lipai yename tekei toatekoile yametekanakale moa patukoa akole toatekale eni yametane ya. Edikane toapa Akolaliyo ali atoa weneya totono lutua yamemotoa Keraiyuyo tikilepa eina namolo totono Mosesepala lutua yametanele moa patukoa epetane totono yamemotoa taneya wane uku. Ni edoa-mo. Akolaliyo eni weneya totono tele takakome i i wa ikilepa Mosesepala agale oa epetekakana toa moa patukoa Keraiyupala agale wedoa oa epetane ya.

⁷ Eina namolo totonopa ali atoame kiyoke-kama litia toatekoi totono yameoo tokapa nipa eina totono luku weneya totono yameatekale pade piamoo toka. ⁸ Nitatekale pade piamoo tokake Akolaliyopa one Iserere yename eina namolo totono tetekakala taneke eya wa kikoa akaneya.

*No Ali Muno agome ukuno, yakamene.
Iserere yatene Yuda yateneta kini*

weneya totono i i wane lutuane yameadene tuku. Eni toateku tigotoma noko. ⁹Eni totonopa namolo namolo kini kaua-mikiti Idipi ta tewitiko poe wane liane auane pekene yametekou totono keneya mena. Eina yename namolo totono litia toake wakoli kote tokale wakou. ¹⁰Nitikouyake no Ali Muno agome eya waneka ukuno, yakamene. Weneya totono Iserere yatene yameatekou oi ponokalepa i i wane wene takoane kini tepene-pala lukoane tou. Nipetepa nopa kini Akolali mekene yopiou. Kipa anu yatene ali atoa nooke lukoa meoi. ¹¹Nitoo mekete panagome-kiti no Ali Muno ago ko i i wa one oya-mikiti-pala amele toamoo. Ali atoa peya ponopene ali atoameka ibini akene ali atoameka kini weneme no Ali Muno agopa dikane ago tadeko wa wene tootapeoi. ¹²Nipetepa kini poanele tokoike po letu mekakouna keane wawane wene kayapetapeou wa Ali Muno agome weneya totono yameademe okome akeneya.

¹³Weneya totono wa ikilepa Mosesene totonopa namoleya tetepo takoane waku wa okome akeneya. Nitaneyano, padeya namoleya kego noma pou toa eina namolo totono takoa poademe toko.

Meme Kai Tabeme Wikakane Yapu Keneke

Akolalike Lodo Yoa Kowitanemo

9 Akolaliyopa one Iserere yene kiwi yopiouno, dikamene wa one namolo totono lutua yametekilepa oneke lodo yoa kowitikete toatekoile yamea ni itonoke one kowitatekoi yapu wikakakete toatekoile yamea taneya. ²Eina yametane toa meme kai tabe moa yapu wikakakilepa luku takuta motokoa wikakaneya. Yapu luku padekapa Akolaline yapu luku

wa motokoa wikakoapa eya-mene tebolo moa pianeya. Labo ni Akolaline yotokane palawe piai tane walai ni eniya palawe moa pianeya. ³Eni yapu luku kago keteponokepa maminame olege taneya kakeneya. Ni padena yapu luku ali atoa kutu ponamomotoa maminame olege tikilepa Akolali meko lono wa motokakete wikakoa taneya. ⁴Eni yapu luku Akolalike padeya kalono taneya lodo yoai tane walai moa pianeya. Eni walaipa golo kueme latianeya. Ni yomome latitiko golo kue paatapeane bokosi pianeya. Akolaliyo lutua yametane totono adeka pia latiane bokosike uku. Eni bokosi keneke eya-mene moa lobutaneya. Golo kueme latiane mete deya moa lobutaneya. Maana nee moa kapetekane mete deyake uku. Ni eya ago Erone one iti weneya tata pitikane iti moa lobutaneya. Ni Akolaliyo yonota tua agale wia mekane kue petenetaka moa lobutaneya. ⁵Eni bokosi patupa malikeka sipi sipi kai kamate tadekaneya. Akolaliyo ali atoame tane poanele kogamotoa taneya. Eni bokosi patupa kerubime wa ibini akene edelo alita yomini latia kakaneya. Nipa kini pawenata petene takoa liputakutukakete todo takamotoa latia kakaneya. Enika eniyake ikilepa oyake ukuno, pademo pade opi wamuku.

⁶Akolaliyo tamene wa akene toa enika eniya nodokatekoa Lipai yatene ali-kiti ako yapu lukuke-kama pote lodo yoa enile topokala taneya. ⁷Eko lukukepa ako odene mekome lodo yotokane tobou ago odene pekeneya. Einago pikilepa malikeka odepeta pokala taneya. Paapa poameneya. Sipi sipi kai wia kamate okolo kagonoke mekoa aua pekeneya. Nipa pinali one tane poaneleka ali atoa kini wene toamekete tane poaneleka takoa kogamotoa nitipaneya. ⁸Enilekepa

Epetane Yominiyo eya wa wene takako. Meme kai eya tabeme wikakane losu yapu ako luku keneke Lipai yatename lodo yoa enile pa toomoa pikilipa nipa eka luku Akolali meko lono wa ibini akene luku pa ali atoa wete ponamele toamoko wa wene takako. ⁹Eni meme kai eya tabeme wikakane yapupa toto ipete meko ali atoame toatekoole adeka pianeya. Eni losu yapu keneke Akolalike eya kuya mea sipi sipi kai wia lodo yokala taneya. Nitiketeke kini tepene plane wene oyake moa kiyo akatapeamele toameneya. ¹⁰Opika enika enile tikilepa padeya nee ue eya kekaneya latikoa wawa noamo padeya moa noa ni tigrini eya abe koa tokala tiki. Nipa Akolaliyo eina namolole katekoa wawa wenele yametekaleka papete enika enile pa tekei tokala tiki.

¹¹Keraisu taatekoa nokomepa Akolaliyo ali atoa pewe-kama witikome tokole i i wa ka pateteko yameademe one wene kekakaneya. Nipa ako odene mekome lodo yotokako tobou ago tou toa eni taneya. Nitou wa ali-kitame meme kai tabeme wikakane yapu tuapea ponokome taneya mena. A tibuke yapu eteneya tuapea ponokome taneya. Eniyapa itono patu latia pianeya wane mena. ¹²Nipa Akolali meko lono eni pinikilepa odepeta tuapea penaneya. Enile wa loko toponamoko. Nitoapa meme kai pitimekawe kai tine wia kamate okolo kagonoke mekoa aua ponameneya. Pinali one penane kamate moa aua ponokomepa ali atoa a tibuke mea kamotoa tokome oto toa motaneya. ¹³Papete panagome tuane agono tigrini-kiti mitikoa enile losu kekanele tokalepa nipa Akolaliyo einagopa kekanele toamene ago tetepo takamotoa tokome oneke lodo yotane agome eya taneya. Meme kaika ali kai pitimekaweka wia kamate moa ni atoa kai pitimekawe wia lodo yoa kuku

moa einagono tigrinike tadekaneya. ¹⁴Keraisu einagopa pa mea kako Yomini patu kautakoa kakome pinali one kamate ponomotoa tikilepa one tigrini Akolalike mea lodo you toa tukome taneya. One poanele padeleka toamokomeke taneya. Nitaneyano, one kamateme tone tepene pale toateko wene takoa koikakilepa eina papete losu toma nekenele moa patukoa padele akole eni toko. Nipa totome pa mea kama poko ago Akolalilinele takama pomotoa tokome ni toko.

Tone Wenele Toateko Totonu Yametanemo

¹⁵Keraisu tukilepa Akolaliyo ali atoa weneya totono lutua yamemotoa taneya. Nipa Akolaliyo one wa kayo oa motokana yenepa one mana kono-mikiti latikoane pewe wiane-kala kawou wa papete oa pikana toa taatekoa tomo-toa taneya. Eina namolo totonoke lukoa mekete tokoi poaneleme pine yene kiwi moa labakaneyake Keraisu einago tukome oto toa motokome nitaneyano.

¹⁶Panagome kadimo oka toa moatekoi ali-kitame einagoneya papete moamatekoiyake einago tuadekalepa oyake moamele too. ¹⁷Panagome-kiti kadimo ootokoa tuameneya pa mekomepa nipa onekeya-kama pa pikoa kawoo. Wa einago tukalepa one kadimo oka toa moatekoi ali-kitame onekeya tatia mokala toi. ¹⁸Edikoapa Akolaliyo Iserere yene kiwi auapekene ile touno dikamene wa one namolo totono yametekome akene toa taatekamotoa tikilepa kini witane sipi sipi kai kamateme taneya. ¹⁹Akolaliyo eni totono yametekome tamene wa okana toa-kama Moseseyo i i wa toaweaa ootokoa kakome eya taneya. Pitimekawe tine moa wia eniya kamate okolo kagonoke mekoa ue-pala eletekaneya. Nititikoapa kikome kiane

sipi sipi kai pine-pala yomo isope yenene deyata moa okolo kagonoke tadaneya. Nitoapa eni totono wia mekane bokukeka eida kakene ali atoakeka tadekatapeneya. ²⁰Nitikome okome *i kamate kiwike tadekakilepa Akolaliyo lutukoa yametekana totono tele takakene tuku* wa Moseseyo akeneya. ²¹Einakale toa Moseseyopa meme kai eya tabeme wikakane yapuke kamate tadekoa ni eni yapu keneke Akolalilinele takadete latia pikaneya peyakaka tadekoa taneya. ²²Opika Iserele yename eni namolo totono litiketepa enika eniya pa nateteko katekoa eteya peya abe kawamene tetepo taneya pimotoa tekete kamate moa tadekaki. Einakale toa Akolaliyo ali atoame poanele tokoike po letu mekakana kea wamotoa tikilepa kamateme-kama tiki.

²³Enika eniyapa Akolalinya a tibuke pia kawa tokoya adeka pia latitikoapa abe kawamene tetepo taneya pimotoa tokome Moseseyo kamate moa tadekamele taneya. Nitamele taneyake a tibuke pikoya-kiti abe kawameneya pimotoa tokome eina papete kamate tadekane toa moa patukamedekale Keraisyuo eya taneya. ²⁴Toto auapekome kowitikademepa Iserele yename wikakane losu yapu pome kapaneya mena. Eteneya adeka pia pa tekei wikakane yapu poamokome a tibuke etene Akolali mekota pinele pome kapaneya. ²⁵Nitou wa oomotokome pikilepa ako odene mekome lodo yotokako tobou agome toko toa taneya mena. Einagome malikeka sipi sipi kai kamate okolo kagonoke mekamotokome Akolali meko lono wa ibini akene yapu luku aua pokala toko. Keraisyuo pade nitameneya pinali one kamate Akolali mekata lugutukoa aua poameneya. ²⁶Ako odene mekome lodo yotokako agome tokala toko toa tamele too

tokapa nipa itono latia plane-pete titimoapa lugutukoa tete moa tukala tamele too toka. Nitamele too tokake eya taneya. Itono takoa poateko tigotoma noko wa ali atoame tokoi poanele moa kogatapeademe taatekoa nekeneya. Nipa pinali one tigrini Akolalike mea lodo you toa tuademe nekeneya. Enakale toademe wapa nikileka toamoo. ²⁷Akolaliyo wene toopiane toa ali atoa toto odepeta tukala too. Tuutukaneyake Akolaliyo takoa enekala too. ²⁸Keraisyu einagoka odepeta tukilepa taneya. Nipa ali atoa peya matiyame tokoi poanele kogademe tukilepa pinali one tigrini Akolalike mea lodo you toa tuaneya. Wa loka nikilepa poaneleke tuademe noamoo. One wakapea nomotoa wedianeya nepia mekoi-kiti toa moademe ni noo.

Papete Akolalike Lodo Yoma Neketeke

One Wene Kekatapeamele Toamenemo

10 Moseseyo eina namolo totono yametekilepa Akolaliyo padele padele epetanele naniko taatekoa toatekale adeka pia yametaneya. Eni toatekale keleyo yameameneya. Ue mine takane yomini keneya yametaneya. Nitane totono plane toa Yu yename malikeka Akolalike lodo yoa kowitima neketekete pine yene kini wene oyake moa kiyo akatapeamele toameneya. ²Lodo yoa enile tokoilemedo edikoa kowitiki-kitane wene moa kiyo akatapeeo tokapa nipa lodo wa yoamoi toka. Nipa kini poanele moa kogatapeadeko wa Akolalike lodo wa yoamoi tokake ³ae, poanele pa toma yakete ni toko wa malikeka lodo yotuku pekete tikili uku. ⁴Ali kai pitimekawe kamatemeka meme kai

kamatemeka kini tokoi poanele oyake moa kogatapeamele toamokolo ni uku.

⁵Nikepa Keraisu itonoke noademe mekome Akolali-pala eya wa akeneya.

Atai, kei ali-kitame neke wene kekadetepa sipi sipi kai eya wia ipe nee eya moa mea tikilika neme kote tokolo wake eya toko. Kei yeneke tuano pa wa no kawateku tigini latia nodokakapiko.
⁶*Kei yename sipi sipi kai eya lodo yoa kini poaneleke padeya padeya mea tikili enoake neme ke wa wedia moamoko.*
⁷*Eni wene tekene nepala eya wane okouna. Akolali neke leneke no i kakene uku. Neke wene pikole toadene nekene ni uku. Nipa neke bokuke nooke papete wia mekapiane toane taatekoane tuku wa Keraisuyo etene-pala akeneya.*

⁸Nipa enimo titikome ikilepa eya wa akeneya. *Kei yename sipi sipi kai eya wia lodo yoa eya kuya mea tikile neme kote moa wako. Padeya lodo yoa ni kini poaneleke padeya mea tikilika neme ke wa wedia moamoko wa akeneya. Nipa Moseseyo eina namolo totono yametekilepa enile tamene wa yametaneyake akeneya.*
⁹Enimo ootokoa eya waka akeneya. *Akolali neke leneke i kakene uku. Neke wene pikole toadene nekene ni uku wa akeneya. Nipa Akolaliyopa sipi sipi kai eya witikoile kote tokale wakome eni luku Keraisu pinali one tigrini lodo you toa tumotoa toka wa Keraisuyo okome akeneya.*
¹⁰Akolaline wene pikale eni litia tokomepa ali atoa toto Akolaline takoa motokome tone tokoo poanele moa kogatapeneya. Nipa pinali one tigrini Akolalike mea lodo you toa tukome taneya. Edikoapa wa pade tuamoo.

¹¹Akolalike padeya mea lodo yotiki ali peyame kini losule eni teketepa ta patako abuna odenele-kama toa sipi sipi kai eya wia lodo yokala tiki. Ali atoame tokoi poanele edikoa moa kogamele toamokoyake tiki.
¹²Keraisuyo pade ni-

tameneya. Ali atoame tokoi poaneleke odepeta one tigrini lodo you toa tukome moa kogatapeneya. Ali atoa peyake eni tukomepa wa pade tuamoo. Nitoa tumotokome Akolali mekata nimini yono lono pome mepaneya.
¹³Opika eida pa meko. Nipa Akolaliyo ne-pala poi teiane yene neeke lukoa memotou wa onepala oa pikana toa taatekoa tomotoa nepia meko.
¹⁴Keraisu pinali one tigrini lodo you toa odepeta eni tukomepa Akolaline takoa motane yene wene kiyi akaneya meatekoi toa meemoa pomotoa toa peya takaneya.

¹⁵Enilekepa pine ina ina wa Epetane Yominiyo toto wene takakilepa Akolaline bokuke wia mekane toa eya wa titikome akeneya.

¹⁶*Ali Muno agome ukunu, yakamene. I meteku oi noka-petepa Iserere yatene nooke lukoa mekete toatikile i i wane lutuane yameou. Nipa anu eni weneya totonopa kini tepene lukoane kiwi wene takoane tou wa Epetane Yominiyo Ali Muno agome okamo wene takakome oko.*

¹⁷Nimo ootokoa Ali Muno agome eya wa okomoka oko.
Anu totono tetekoa ele kule poanele toa tokoike po letu mekakounapa keane wakene wene kayapetapeou wa oka wa Epetane Yominiyo oko.

¹⁸Ali atoa kini poanele edikoa moa kogatapeneya meketepa nipa kini poanele tokoike padeya-kiti wa lokoa mea lodo yoatiki toa mena.

Akolalike Tegetekoa Meatekomo

¹⁹Nikepa anu oya-lawe kipala eya wane ukuno, yakamene. Akolali meko lono wa ibini akene yapu lukuke pou toa one mekota Yesuno kamate yoto ludu toto atiki toa pitia pamele tokolo
²⁰mea kama pato wa weneya ka ludu poadete poko. Nipa Akolali meko lono wa ibini akene yapu luku olege taneya tuane

mamina Yesu einagome patettoa Akolali mekata pekene toa toto pitia poko. Pate-toa pekene mamina wane ukupa one lagotane tiginike uku. ²¹Nika Yesu ako odene mekome Akolalike lodo yotokakago tou toa Akolaline yapulu yene toto talo takoa kakono, ²²Akolali kowitadete eya tatoane uku. Odene wene-kama pia ni oneke wedoa wene tugoa mea ni tone tepene poane wene takoa pomotoa ue tadatapeneya meou toa mea ni tone tiginika ue epetaneyame abe kootapeneya mea Akolalike tegetekoa mepatoane uku. ²³Akolaliyo tou wa oa planele i i wa taatekoa tomotoa we-dianeya nepia meketepa etepea poamato wane uku. Kiwi auapekene dikou wa oa piko agomewa nitou wa oka toakama taatekoa tootapeoona, poapeneya meato. ²⁴Ete oto wa wene mekanali yoa ele kule epetanele toa tatoe wa tone tone oa kamotokateko wene kibutukoa meatoane uku. ²⁵Akolaline losu yatene obokala toatiki toa pade-kitame toake wakino, totome pade nitamato wane uku. Wene weye akanali yatoe wa losu yapu oboai tamene. Ali Muno ago waka-pea noateko oi tigtoma nokono, nitato wane kiwi kowitoane uku-ye.

²⁶Keraisu totoke tuanemopa eina ninimimo yakoa mootokoake tone namolo poanele tokoonakale pa toomoa pato wado wene pia tokolopa nipa tone tokoo poanele wa kogademepa te tuoo tokolope. ²⁷Nipa abe meaneya tukolo Akolaliyo kipa one-pala poi teiane yeneno, kibu mou wa toe mine moa pitikoa atukoo wa totome piti motaneya meoo. ²⁸Panagome-kiti Mosesene totono mukiti yamea wakale enekete ali takuta tebolo-wame i i wa one eni tanemo toawe okolipa nipa koiso yopiane agome einago ela moamokome wia tukamotoa wakeneya. ²⁹Panagome-kiti Akolaline manado paya tetepo takoa wakomewa nipa Mosesene totono wak-

ene agome tete motane toa moa patukoa dika dika toamene tete moo. Weneya totono plane toa ali atoake Keraisuno kamate penaneyake paya tetepo takakale tokome Akolaliyo kibu moapa dika dika toamene tete meoo. Nipa Keraisuno kamateme einagono wene moa kiyo akaneyake paya tetepo takoa wawa ni pewe-kama witiko Epetane Yomini tegene matoa tea tokale tokome dika dika toamene tete meoo. ³⁰Eya wa akene agopa Akolali tadeko wa totome wene toko. *Panagome nepala poanele tokalepa noanume nami wiane kibu motokouno, neme kibu moameamene* wa akeneya. One bokuke eya wa akenemoka wia mekaneya piko. *Ali Muno agomewa one yatene ali atoa takoa enoa akakala too* wa wia mekaneya piko. ³¹Ae, tuameneya meemoa poko ago Akolaliyo ali atoa dekoa moa kibu motikilepa piti tanele toa toono, enile takaya wa piti motaneya meamene.

Poapeneya Kamene

³²Kiwi pa takaloganemo Akolalinemo papete yakoa mootokoa mekete ele kuleme ke enekakale meake pa poapeneya mekoina wene kibutukoa meamene. ³³Nipa padepete-kiti pade-kitame kipa ali atoane lene yoto moa kakakete tegene matoa tete mea tokoi. Ni padepete-kiti dikane tete motokoi-kiti wene weye akato wa eni yene-pala kibutua kakoi. ³⁴Ni po yapu moa pitikane-kitipa ela moa auapekala tokoi. Ni pade-kitame kinikiya odomoa pokolika a tibuke kinikiya odoa moa poamatikiya etene epetaneya pa pia kakale enoona, tokamota wa wene epetaneya mekoi. ³⁵Keraisunolepa widikoa atiki toa takama yakoinano, onekele takoa wawameamene. Ataine take nami wia epetaneya-kama meoo tokolo ni uku. ³⁶Ele kuleme ke enekakale meketeka one wene

pikale-kama toa togamene. Nitikolipa Akolaliyo one yene auapekene dikou wa oa pikana toa taatekoa tokome pewe-kama wia kawoo. ³⁷Nikepa Akolaline bokuke Akolaliyo akene toa eya wa wia mekaneya pikono, yakamene.

Eya taateko tigotoma noko. Eina noo wa papete oa plane ago noademe toko. Nokomepa pepe meameneya wete noademe toko. ³⁸*Wene kiyo akeneya meko agopa nipa nooke wene tuganeya meemoa poo. Nitateko agomeke piti motokome pegene kakoa no tewitiko wakalepa makutukoane moamou wa wia mekaneya piko.*

³⁹Anu oya-mikiti totopa pegene kakoa Akolali tewitiko wawa atuateko yene mena. Akolalike wene tugoa meato wa toa motaneya meko.

Namololo Ibini Akene Ali Atoa

Akolalike Wene Tugoa Meanemo

11 Akolalike wene tugoa mekilapa nipa Akolaliyo papete oa pikana toa taatekoa tokale enou wa totome wedianeya nepia mea toko. Nipa one yameatekoya-kiti opi leneme enamukuyake nani enou wa wene tugoa meko. ²Namololo namololo papete tone kaua-mikiti oneke edikoa wene tugoa mekoikepa Akolaliyo kei pia kakeneya.

³Oneke edikoa wene tugoa meketepa eya wa wene toko. Itono tibuta ludu pia kawa tokoya peyapa Akolaline agaleme-kama witakakala taneya. Nipa enika eniya peya tone leneme enekoya-kiti eni latikilepa tone leneme enamokoya moa latia pianeya wa wene toko.

Ebele Inoketa Noa Toa Akolalike

Wene Tugoa Meanemo

⁴Ebele Akolalike wene tugoa mekome tokome oneke padeya mea lodo yotik-

ilepa wamene ago Keine moa patukoa lodo yoa epetekaneya. Oneke wene tugakome eni tokale enekome Akolaliyo one kei pikilepa poanele toamene ago tetepo takoa taneya. Ebele einagopa namolo papete wia tukaneyake tone Akolalike wene tugoa mekete toatekoole eni yamepianeya.

⁵Eya ago Inoke Akolalike wene tugoa mekome tokake i ago tumotoane wamuku wa Akolaliyo a tibuke moa pekeneya. Einago edoa pokato patu wa ete yename tuku toa kawa teko tokale wakeneya. Akolaliyo moa pekeneya tokome enamuaneneya. Enilekepa Akolaline bokuke eya wa wia mekaneya piko. Inoke einagopa a tibuke wete poameneyake Akolali wedikaneya.

⁶Akolalike wene tugoa meamoko agomepa Akolali wedikakile tamele toamoko. Akolalike tegetekoane mepou wa wene piko agomepa eya wa wene toko. Akolali wa iki agopa nimini meko. Ni agomepa one tuku toa meki-kiti pewe wia kako wa wene toko.

⁷Eya ago Noa Akolalike wene tugoa mekome eya taneya. Akolaliyo papete pubu oopiane toa wete taatekameneyake one yapulu yene toa moademe ue dipi wane latipianeya. Edikakilepa ete ali atoa kini poanele toa mekoile Noayo pitigamu taneya. Nitaneyake einagopa nooke wene tugoa mekono, anu mati moane latikou wa Akolaliyo poanele toamene ago tetepo takoa yopianeya.

Eberame Akolalike Wene Tugoa Meanemo

⁸Eberame einago Akolalike wene tugoa mekome eya taneya. Akolaliyo ta pade nee yameouno, wini ta toa poano pa wa kayo okalepa nitouno ta wa pegetoa poamene take toa pekeneya. ⁹Ni-toapa Akolalike wene tugoa mekome eyaka taneya. One eni yametane takepa

mone take mepou toa monekago tetepo taneya pome mepaneya. Nipa meme kai eya tabeme tekei yapu wia yawa pitikilepa mana Aisake kaua mati Yekobeta-pala opia yawa pitaneya. Akolaliyo eina ta Eberame yametekilepa einakagota kikilikoa kini wa yamepianeyake edikoa odeneka yawa pitaneya. ¹⁰Eberame nitima yakilepa Akolaliyo wene kibutukoa mea latiane take wipitikene pone mepou wa taneya. A tibuke piakala kawateko taake uku.

¹¹Ni Akolalike wene tugoa mekome Eberameyo mana Aisake opianeya. One ada toa mea natono Sera tiobo atue deya mea tekete mati opiamele toameneyake kitame mati opimotou wa Akolaliyo oa pikana toa etene taatekoa too wa wene tugoa mekome mati opianeya. ¹²Einago ada toa tuateka ago oneke-kama Iserele ali atoa ege egeta wa-kala kadukoa tama nekeneya. Nitaneyake a tibuke kako tagoi ni kusa ue matanu piko ue kibi pia toko toa tama nekene matiyame wa oi moamele toameneya.

¹³Eina namolo ali atoapa Akolaliyo kiwi auapekene dikou wa oa pikana toa nimini taatekoa too wa oneke wene tugoa mea tuma-kala nekeneya. Nipa keleyo taatekoa tokale enameketeke padeka mati kakete nami enou toa keneya ke wa enoa moa tukala taneya. Nipa kipa itonoke pa tekei meateko yene wa monekali atoa tetepo taneya mea tukala taneya. ¹⁴Opi enika enimo iki yenamepa itonopa kini pine ta mena wa ekete iki. Nipa kini pine ta pa tuku tokoa kako wa ekete iki. ¹⁵Nitane yene kini wenepa kini mea togane take pimotou note kepene pa meoi tokapa nipa eni take wakapea pamele tokale poi toka. ¹⁶Nitoui tokake kini eina take wene piitikaneneya mekete a tibuke latiane ta epetaneyake wene piitikaneneya meaneya. Nitaneyake Akolaliyopa eni yename onepa kini Akolali wa kei pia

okoli yatekaya wa ya motokoya mena. Kini mea kama poatekoi taapa oneme latia pikaneyake tokome ya motokoya mena.

¹⁷⁻¹⁸Eberame Akolalike wene tugoa mekome eyaka taneya. Akolaliyopa mana Aisake moa oneke lodo yamene wa Eberame-pala ikilepa papete Aisake *einagoke neke ti ali atoa ege egeta kadukoa tama poi* wa oa pianeyake akeneya. Oneke wene tugoa mekome tokale tetoa enademe ni okale Eberameyo nitouno ta wa mana Aisake moa lodo yoademe taneya. One peku mati odene agoke taneya. ¹⁹Nipa Akolaliyo tuane alika oyake moa kamotokamele toko wa wene kibutukoa mea yoademe taneya. Nitademe tokale enekome Akolaliyo oyakeno wa wa ketekakome tuane ago moa kamotokou toa mana Aisake Eberame ete wa metekome metaneya.

Aisake Yekobeta Yosepe Toa

Akolalike Wene Tugoa Meanemo

²⁰Aisake einago Akolalike wene tugoa mekome eya taneya. Manata Yekobe Isota kini mea epetekatikile i i wa kinita wedoa meatekoi agale oa pianeya. ²¹Ni Akolalike wene tugoa mekome eyaka taneya. One tuateka tigotoka-pete Yosepene manata takuta wedoa memotoa tokome agale oa epetekeneya. Nitoapa iti tigine kakome Akolalike nate wene pia kowitaneya. ²²Ni einago Yosepe one tuateka tigotokale mekomepa Iserele yene Idipi ta toa poatekoimo i i wa oa pianeya. Nipetepa one tonopala aua pamene wa oa pikilepa Akolalike wene tugoa mekome akeneya.

Mosese Akolalike Wene Tugoa Meanemo

²³Mosesene etene nineta Akolalike wene tugoa mekete eya taneya. Idipi ako odene meane tobou agomepa Is-

erele yene kini pene opiane ali mati peya wia tukamotoa akeneyake eina adoname one akenemo piti moameneya meaneya. Nipa mati opia pikete enekoli koniyo mati tadeko wa eneketepa tokene teboloke potipianeya.

²⁴ Mosese Akolalike wene tugoa mekome eya taneya. Wetiniya kakomepa Idipi ako odene meane ago Perouno kono kamo atoane mana wa ibini amene kote tokale wakeneya. ²⁵ Nipa Idipi yene kini kolotini natekaneleke wene piitikaneya mea etepea poanele toma pokoile pa tekeika litia toamademe wakeneya. Nitoapa Akolaline yatename tete motiki toane onemeka mou wa kipala kibunua tete motaneya. ²⁶ Ete-kitame one tegene matoa poanemo okolika naniko taatekoa noatekago Keraisuke toa eni tete motaneya. Nipa Akolaliyo one kamo takou toa pewe wimotoa nepia mekome Idipi yenane kamoya paya tetepo takoa wakeneya.

²⁷ Nitoapa Akolalike wene tugoa mekome eyaka taneya. Idipi ako tobou ago Perouyo tete metekaya piti moamokome Idipi ta toa pekeneya. Nipa leneme enamateka ago Akolali one-pala opia pokale enane tetepo takoa pekeneya. ²⁸ Ni Akolalike wene tugoa mekomepa edelo ago patukane wa ibini akene toge yopikome Iserere yene-pala eya wa pubu akeneya. Akolaliyo Idipi take moa wetekateko edelo ago kini kini meki yapu patukatapea pomotono, sipi sipi kai kamate kagoke tadekamene. Kini namolo takoa opiane ali mati yatene wia tukakayano, nitamene wa pubu akeneya.

²⁹ Ni one Iserere yene Akolalike wene tugoa mekete Kiane Kusa Ue ketakilepa itono matanu ludu pou toa ketoa pekeneya. Nitikoli Idipi poyo yene kiwika ketoa poo wa muke litimoa pokoli ueme atukatapeneya.

Ete Yene Akolalike Wene Tugoa Mekete Tanemo

³⁰ Ni Iserere yene Akolalike wene tugoa mekete eya taneya. Kue pawe kago unukatapeane Yeriko ta pitikaline taapa ta pataka tatonu (7) kakoapeta kawa pitikoa yawa unukakala taneya. Nitaneyake eina pawe kago bu wa kilikatapeneya. ³¹ Nipetepa pamoko atoa Reabe Akolalike wene tugoa mekomepa ete Yeriko yene Akolaline agale tagoa toamene yene-pala dekoa tuaneya mena. Papete Iserere ali takuta poi katapa teja Yeriko take nokoli enekome one yapu noe wa makutukoa moa potipikanake Iserere yename one wateaneya.

³² Ina ukuna toane pa okoane pianep. Eya ali-kiti Gidione ni Barake ni Samesone ni Yepesa ni Depidi ni Samuele ni Akolaline agale papete toawe akane ali-kiti enika eni ali peya mati Akolalike wene tugoa mekete tokala tanemo oateku pake piamoko. ³³ Nipa Akolalike wene tugoa meketepa eya toma-kala nekeneya. Pitikali-pala poi toa moa kawikoa ni kini yene talo toa epetekoa ni Akolaliyo papete kiwi auapekene dikou wa oa pikana toa taatekoa tokale enoa ni laione kai moa kawikoa atiki toa mea ³⁴ ni tube toe mineke moa pitikaneya kakete toe tugoa moa ni tueme kagoiyake petoa pote ni taba taneya meake popeyo nokale telekole toa ni pitikalime poi toma nokolika poi lene kianeya kakete ete pedekoa lititapea taneya. ³⁵ Ni pade atoa-kiti Akolalike wedoa wene tugoa mekoli kini mati tukala taneyake moa kamotokaneya.

Ni Akolaline totono litia toamene yename pade-kiti po yapu moa pitikakete ekete Akolalinele takoa wakolipa kini yapu wetekoo-koli ekete tuake kamomotekete a tibuke mea kama poono, nitamoo wa tete

mokoa kawa tukala taneya. ³⁶Ete yenamepa pade-kiti tegene matoa ni po wapime wia ni pade-kiti po yapu pitikou wa kapa po kakoa ³⁷ni pade-kiti kue pitikoa wia k̄aua ni pade-kiti soome teitakutukoa ni pade-kiti tueme k̄awa tukoa taneya. Ni pade-kitipa pa ponopene ali atoa sipi sipi kai meme kai eya tabeme latiane mamina kakeneya yawa pitaneya. Nipa ele kuleme ke enekakale mea tete moa yawa pitaneya. ³⁸Enika eni yene ali piamene ta luduka tonono kakene ta luduka kota kene pikokaka koa kene pikokaka yawa pitaneya. Eni yename kiyo akenele toma yakete tekete ete ali atoa-pala opia meamele toameneya.

³⁹Dikane yene peya Akolalike wene tugoa mekete taneleke kei pianemo one bokuke wia mekaneyake kiwi yatene auapekene dikou wa papete oa pikana toa taatekoa tokale enameneya pa mea tuma-kala nekeneya. ⁴⁰Ni edoa-mo. Akolaliyo eni yene auapeateka wene toopia mekomepa ipete meko-kiti toto peya odene kikilikoa auapekene auapeou wa wene toopianeya. Nipa toto peya mea epetekateko kotu kakoa memotoa tokome one namolo wene toopikanakale moa patukoa padele akole toateka wene toopianeya.

Toneketai Akolaliyo Toto Mane Oa Motoko

12 Ali atoa peya mati Akolalike edikoa wene tugoa mema-kala nekeneya. Nitoapa opi toto ipete meko-kitipa edoa meki patu wa wedo pia unukatapeou toa kakete enekete tiki. Nitikete tikino, eni yene meane toa meato wa teyapea moa patukanali you toa eya tato. Ele kuleme ka ketekakoya peya tewitikoa wato. Nipa tone poanele tokoleme toto lakabele takakoya-kiti wawa tone poatekota pitimoa pato. ²Nitato wa Yesu enekoa patoane uku.

Yesu einago Akolalike wene tugoa mea tagatapeneyano, one pitia patoane uku. Yesu einagome wipitikenepa kolotine meou wa wene toopianeya tokome eya taneya. Yomo lekaneyake wia dekaneya kakomepa ete yename tedu mea ya motokoa tomotoake k̄o wameneya tuaneya. Nitoa tuumotokomepa Akolali meko walai waneke nimini yono lono pome mepaneya.

³Ae, poanele tane ali-kitame one kote motekete ele kule toa tete memotoake k̄o wameneya poti mekome tanele wene taneya meamene. Kipa tepe we taneleke pitime tuku wa Akolalilinele takoake wakaya tokolo ni uku. ⁴Akolalike wene tugoa mekete ele kule poanele ete pedekama nokoli kiwi padeka wete wia tukameneyano, onekele edoa takoa wawadete-pe. ⁵Akolaliyo kipa one mana kono-mikiti latikoa mama motokome oa pianemo one bokuke wia mekaneyake wene kayapetapea meki-pe. Eya wa akeneya.

Anu mana nepala ukumo yakamene. No Ali Muno agome ne kibu motekene mane oane motokoumo pamo tetepo takameamene. Ni ne kikoane akokolupa no i agonole edeya weike takaku patu wa wene keda taneya meameamene. ⁶Anu kolotini yene kikoane akoane ni anu mana kono-mikiti latikoane yopiku-kiti kibu moane tuku wa Akolaliyo akeneya.

⁷Nitaneyano, ke enekakale mekoi-petekama inapa Akolaliyo nopa one mana tetepo takoa mane oa moa tadeko wa k̄o wameneya meamene. Etename-kiti one matiyame poanele tokolopa kibu moa mane oa moa toamoko patu. ⁸One mana-mikiti talo toapa peya kibu moa mane oa mokala too-li. Akolaliyo kiwido mane oa moamokomepa nipa one manamikiti tetepo takamokome pakele matikiti tetepo takakome too. ⁹Itonokepa toneketai-laweme toto peya kibu moa

mane oa mokala tokoi. Nitikoli kote tokolo yakoane moamuku wa wamekete kiwi kei pia kakoo. Nitikoono, toneketai a tibuke mekome toto mea kama pomotoa mane oa motokolopa yakoa moamoko patu. Etene yakoa moo-li.¹⁰ Toneketai-laweme kibu moa mane oa motikilepa pa tekei tokoi. Nipa toto auapeatekoi wene kibutukoa mea tokoi. Akolaliyo toto mama motokome kibu moa mane oa motikilepa one wene kiyo akeneya meko toa memotoa tokome toko.¹¹ Edikoa kibu motokoloka inapa tone wene keda takanele witako wa wedia meamoko. Wa naniko kibu moa mane oa moa togakale yakoa motokoi yenepa witi ku tumia witakome ku wedoa tuou toa itonoke tepe kolotini kilikoa pimotoa wene kiyo akaneya meoi.

Mane Mane Oa Pubu Oa Tanemo

¹²Nitaneya meoino, yono kawa weye wameneya meou toa Akolalinele wedoa takama poamiki yenepa kini yono kawa weye akaneya mea onekele wedoa takama pamene.¹³ Kawa okeaneya yawou toa Akolalinele wedoa takama yawamiki yene paka pokaya tokolo kini poatiki ka kiyo akooa nodokakapiamene. Kini kawa epetekou toa tekete Akolalinele takatikile i i wa yameamene.

¹⁴Yete pade ali atoa-pala odene wene pia enekala tamene. Ni wene kiyo akeneya mea epetanele toadete wili toma pamene. Edikoa meamoko agomewa Akolali enekile toamoko.¹⁵ Kiwi padeka-kitamewa Akolaliyo ali atoa pewe wia talo tokota petekatapekayano, wedoa yamene. Ni kiwi ete oto wa wene poaneya memotoa tokoyapa kiwi pakeke witakome peya matike weamutukayano, wedoa meamene.¹⁶ Ni pamoko mea enile poanele takayano, wedoa yamene. Ni itono peku-kama nakene ago Isoyo tane toa toameamene. Iso einago

namolo ago tokome etenaneya pine wia moatekoyake kobu tokale meane-pete etene luku kakome moatekaya-kiti paya tetepo takoa eya taneya. Wamene ago Yekobene nee moa noademepa one eni moatekaya-kiti topo toopia wakeneya.¹⁷ Wa naniko Akolaliyo one pine wia pewe wimotono, kowitikamene wa Isoyo etene Aisake kowitaneya. Komo oa kowitooa kawake one eina namolo tokanakale oyake moa koikamele toameneya. Enipa nimini uku-pe.

¹⁸Opi kimepa Akolali kakakoa kowitikilepa tone kaua-mikiti kini Kati Sainai kakoya liti kakete tane toa tikiya mena. Einapete Kati Sainaike toe itipono okoa kakene matiyameke yomiyomume agopa takoa pupulege mati popokoa tokale tepene piti wia lukaneya yakoa kakeneya.¹⁹ Nitooa yatekoli bera pia agale ludu oa tokale yatekete ekete agale oyake yatekoono, wa-ye wa tone kaua-mikitame kowitooa kakeneya.²⁰ Nipa agale ludu nokome okome *kiwika kini pitimekawe kaika i tono kakoya liti nokolipa kue pitikoa tukamotoane ukuno, noameo* wa Akolaliyo okale pitime tuaneya kakete kowitaneya.²¹ Moseseyoka *piti tanele enekene kolu kolu motuku* wa piti mea taganeya kakeneya.

²²Anu oya-lawe kime Akolali kowitikilepa Kati Sainai kakoya liti kakene tetepo takoa tikiya mena. Opa Kati Saione note kakene tetepo takoa meki. Nipa Akolaline edelo ali ege egeta wakala kadukoa koukooa wedia mekika nekene tetepo taneya meki. Kati Saione wane ukupa tuameneya meemoa poko Akolaliyo a tibuke latiane Yerusaleme take uku.²³ Nipa one namolo mana kono-mikiti kini ibinipa one a tibuke piko bokuke wia mekane-kiti koukooa mekika pote mepane tetepo taneya meki. Ni ali atoa takoa eneko ago Akolali mekota ni wene moa kiyo akane yene

a tibuke mea epetekatekoi kotu kakoa mea epetekaneya mekika pote mepane tetepo taneya meki. ²⁴Ni Akolaliyo tone weneya totono yamemotoa tokome tuane ago Yesu one mekota meane tetepo taneya meki. Nipa one kamate kiwike tadekaneya meki. Yesu einagono kamate ponokomepa eya ago Ebelene kamate ponokome tane toa moa patukoa etenane wene kekakaneya.

²⁵Kiwi mane oa motoko ago Akolaliyo okamo yakoa moamokayano, wedoa yakamene. Papete itonoke Kati Sainaike agale ludu nokome okale kini kaua-mikitame yakoa moamokoli Akolaliyo yono lukoa meamokome kibu motaneyano, opi a tibuke mekome i i wa toto pubu okale yakoa moameketepa nipa edoa petoa pato-pe. ²⁶Papete Akolaliyo agale ikilepa itono muku takoa akeneyake opi eya wa pubu oko. *Wa padepete itono moane muku takakenepa tibuka odeneka moane muku takouno, nepio wa oko.* ²⁷Padepete wa ikilepa one moa muku takatekoya eya kuya oneme latia pianeya-kiti takoa pomotou wa okome oko. Muku takamatekoya-kiti pa pia kamotoa tokome nitoo.

²⁸Muku takamatekoya-kiti wa ikilepa Akolaliyo toto oneke lukoa memotoa talo toa-kala kawateko ta eni yameademe okome okono, ke wa one kowitua meateko toa oneke nate wene pia piti-pala moa kowituaone uku. ²⁹Tone Akolaliyo poanele tiki ali atoa kibu motikilepa toeme nootapeou toa kibu moa atukoo tokolo ni uku.

Akolaline Wene Epetekakete Toatekomo

13 Anu oya-lawe kini kini ame wa wene mekanali yotekete tiki toa wedoa toomoa pamene-ye. ²Monekali atoado kiwi mekoika nokolipa nee noatino noe wa makutukoa moamene. Namolo namolo pade ali-kitamepa

Akolaliyo moa wetekane edelo ali-kiti makutukoa motikilepa i agopa edelo ago tadeko wa wene toameketeke tokala taneya. ³Ni po yapu pitiki yene wene kayapeameamene. Kiwika po yapu odeneka pitane tetepo takoa mekete eni yene ugu pote kiti wene weye akapokala tamene. Ni tete mokoa kaki-kitika wene kayapeameamene. Kimeka tete mokoa meane tetepo takoa mekete ela moa auapekala tamene.

⁴Ali atoata adona mekilepa Akolaline leneke kiyo ootokoa-kama meamene. Nipa mone pade ali atoa koua piameamene. Koua piamatiki ali atoa koua pikolipa Akolaliyo kibu moonoo, toameamene.

⁵Ni kukeke-kama wene piitikaneya meameamene. Kinikiyapa oyake piko wa tepe keaneyameamene wane uku. Akolaliyo kiwi *tewitikoane wakilepa toamou* wa akeneyake ni uku. ⁶Akolaliyo nimo akeneyano, totome eya wa amele toko.

Akolali einagopa no auapeko agono, etekitame nopala poanele tokoilekeka piti moameneya meou wa toto atiki toa mekete amele toko.

⁷Eya ali-kiti kiwi papete talo toa mekete Akolalinemo olaukane ali-kiti wene taneya meamene. Kini Akolalinele takama pote tuanemoka wene taneya meamene. Nitoapa kini Keraisu-kama wene tugo mekete tanele kotukoa mea epetekamene. ⁸Yesu Keraisu epene wene-kama piko agopa one eni wene wia wakilepa toamoo. Namolo namolo opi opi naniko naniko epene wene-kama pianeya meko. ⁹Pade-kitame emokumo monekemo titia okoli kime yakoa etepea pokayano, yakameamene. Toto pewe witikome wene weye akakago Akolaline tele patu kautakoa kama pato. Pade-kitame nitameneya padeya nee kekaneya latikoa wawa ni padeya takoa

noa tikilepa pata pale tikino, enile toamato.

¹⁰Keraisu pinali one tigrini lodo you toa yomo lekaneyake tukilepa toto toa moademe taneya. Meme kai tabeme wikakane yapu keneke kakene tetepo taneya kakete Akolalike lodo yotokaki ali-kitame sipi sipi kai wia lodo yoteketeka toto-pala oyake lipua meamele toamoko. ¹¹Ako odene mekome lodo yotokako ago Akolali meko lono wa ibini akene yapu luku pikilepa ali atoa peyame tiki poaneleke sipi sipi kai eya wia kamate okolo kagonoke mekoa aua poko. Nitoapa eni sipi sipi kai tigrini moa ta ketepono patukoa pome akolono yopoko. ¹²Enile tou toa Keraisu tukilepa ali atoa pitikoika eko pimotoa ta ketepono patukoa pome akolono tupaneya. Nipa ali atoame tokoi poanele kogatapedemepa one kamate ponomotoa tuaneyaya. ¹³Nitaneyano, ta ketepono patukoa akolono one ya takoa wia dekaneta pote kapou toa one-pala dekoa ya tokale meato. ¹⁴Itonokepa tone meemoa poateko ta piamokoyake weneya take pia kawateko take meemoa poadete toko wa nepia meko. ¹⁵Nipa Akolaline wene kekadetepa oneke padeya mea lodo you toa tekete Yesu patu kautakoa kakete Akolali kei pia-kala katoane uku. One ibini wedekoa nitikala tato. ¹⁶Nitoe epenele-kama toa kinikiya-pala tatia mekala tamene. Nitikolipa Akolaliyo enipa oneke padeya mea lodo yotane tetepo takoa wedia meoo.

¹⁷Kiwi talo toa meki-kitame tamene wa okoi toa litia tikilepa kiwike poti lukoa mea tamene. Kipala padele takaya tokale talo tikilepa eya wa wene taneya mea tiki. Akolaliyo ali atoa takoa enekomepa eni yene kime talo toa epetekakoi-pe wa pitia yakoo wa wene taneya mea tiki. Kini kolotini

toaneyaya mea talo tomatono, tamene wa okoi toa litia tamene. Kini wene keda takaneyaya meketepa kiwi edoa talo toa auapemotoa-pe.

¹⁸Totome ele kule tikilepa ete-kitame padeya namike akoa oatikileka toamoko. Tone tepeme tamene wa oa epetekako toa-kama toko. ¹⁹Kiwi mekita wida wete wakapeane nomotoa tekete Akolali wedoa kowitikakala tamene.

²⁰Ali atoa tone tepe kolotini kilikoa pikoya ago Akolaliyo tone Ali Muno Yesu tuaneyaya pikale moa kamotokaneyaya. Nipa ali atoa toa moateka oi pedoa plane totono pa pia kako totono tele takakome one kamate ponomotoa tuaneyake moa kamotokaneyaya. Nitaneyano, kipa one sipi sipi kai wa ako odene mekome toto talo toa-kala meko. ²¹Nitikono, Akolali-pala eya wane kini kowitikoane uku. Eni yename neke wene pikolekama tomatono, ele kule toa epetekatiki peku lawetetapeamene. Nipa neke kolotini nakeneya memotoapa Yesu Keraisu patu kautakoa kakete epetanele-kama tomatono ta wane Akolali kowitoane uku. Keraisu einago kei pia-kala kama patoane uku-ye. Ee nimini.

Wipitikome Akenemo

²²Anu oya-lawe kiwi mama motekene mane mane ikilepa pa tigrini wane wiane mekakene ukuno, panagome moa oi motokakalepa poti yakakoa meamene-ye. ²³Tone oyago Timosi po yapu pitaneyake yopiko agome ne pa wa po kotokoa wetekaneyaya. Einago no i mekuta wete nokalepa nipa kiwi mekita pata wane one-pala wida opiane nou.

²⁴Kiwi talo tiki yene peya ni Akolaline ali atoa peya poti meamene wa akamene wane uku. Kini oya-lawe i Itali take pitiki-kitameka kiwi peya wete meamene wa iki-ye.

²⁵ Akolaliyo kiwi peya pewe wia yopi-
motoane kowitikoane uku-ye.
Opa anu agale eni.

YAME

Yameyo Yu Yateneke Wia Wetekane Pipia

1 Yame nopa Akolali Ali Muno Yesu Keraisutanele takama yaku agome uku. Iserele yene tuku kakoa (12) yatene ali atoa padeka-kiti kini pine ta toa eka kuka mone take pote mepane-kiti kiwike i agale wini oane wetekakenepa mea petekamene wane uku-ye.

Ke Enekakale Mekete Toatekomo

²Anu oya-lawe ele kuleme ke enekakolo meketepa nipa kolotini noatekole tetepo takoa eya wa wene taneya wedia meamene-ye. ³Yesunole poti takoa togakete toatikile wene toa tomotoapa Akolaliyo ele kule ke enekakole witakakala tokono, ke wa wedia meamene. ⁴Yesunole edikoa takatiki kotu kakoa toma pamene. Nitou wa one eni takatiki peku nateya deyaka katekameneya noa tagatapeamene.

Padele Toatekale Agopa Tokale Mekepa

Akolaliyo Wene Takamotono Kowitamene

⁵Anu oya-lawe panago neke toatekale agopa tokale mekepa Akolaliyo wene takamotono, kowitamene. Ali atoa peya onekeya keda takoa mekala toko ago tokome nepa wene toamene ago kake kowitiko wa kikoa akamokome neke kowitikale-kiti yakoa tokala too. ⁶Nitoono, yakoa too tadeko wa oneke wene mataneya meke poome toameneya kowitamene. Poome taneya mekome kowitiko agopa nipa kusa ue-kiti pupulegeme popokakolo ete pato oto pato toa pewikou toa einago wene wili walai akeneya meko. ⁷Dikoa

kowitiko agopa Ali Muno agome onekeya pade edoa yakoa memotoa-pe. Padeya dedeyaka meamoo-li. ⁸Wene takuta pianeya meko agome ele kule tikilepa pata pale-kama toko.

Ponopene Yene Kamo Yene Mekete Toatikimo

⁹Ponopene ago ame wane uku ago nepa Akolaliyo ako ago tetepo takakono, ke wa wediamene. ¹⁰Kamo ago ame wane uku ago nepa Akolaliyo keku kakoa ponopene ago tetepo takakono, ke wa wediamene. Ke tidiyo odepeta atua poko toa kamo ago neka atua poo tokolo tekene ni uku. ¹¹Lou witia nokome eni ke lunopa lou potome totokakale tidiyo-pala okoa pitoo. Namolopa kalaneya kawake wete enipete atutapeoo. Nitiko toa kamo agome one kamo toma pokome one kamoya-pala dekamoa atua poo.

¹²Ele kuleme ke enekakoa kakaleka Yesunole takama poka agopa etene wedia meoo. One eni tokale enekomepa Ali Munagoyo i ago onekele takoa togateko ago tadeko wa kei pia mea kama pomotoo. Nipa oneke wene mekakoi-kiti mea kama pomotou wa papete oa pikana toa taatekakome nitoo. ¹³Nitoono, ele kuleme ke enekakoa kakale meketepa inapa Akolaliyo no likoa enekome toko wa wameamene. Ni edoa-mo. Padameka one likoa enamele toamoko. Ni pade Akolaliyo ali atoa likoa enekileka toamoko. ¹⁴Akolaliyo pade nitamokoyake pine yene tone tepene piko wene kamokakome toto wa likoa enekala toko. Lede pa totome poanele tomotoa ni toko. ¹⁵Eni poane wenepa atoa one mati kakeneya meou toa tone tepene mati keneya kakeneya mekoname toko. Wa naniko atoame mati opiou toa tone weneke poanele witako. Eni poanele tubetema pome wipitikomepa pine ago wia tukakako.

¹⁶Anu kolotini yene kipala i ukumopa wene kayapekayano, wedoa yakamene. ¹⁷Tone epetaneya motokoya peyapa Akolaliyo-kama latia pikoa ni tone mea epetekateko pekupa oneme-kama lawettoa toko. Pa tokoya-kiti a tibuke latia kakane agoke uku. One eni pa tokoya-kiti wedome agopa takakolo pa toamokoyake one pade nitamoko. Pa tokoa-kala kawou toa one wene wia wawamokome epetaneya-kama takoa mekala toko. ¹⁸Ni agome one wenemekama totopa i i wa one mana konomikiti moa latikakilepa one nimini peku lawetekome toka. Yete pade ali atoa naniko moademeke namolo takoa totopa one mana kono-mikiti moa latikaka.

¹⁹Nitikano, anu kolotini yene agale yakadetepa kale pimotou meamene. Agale oa metekilepa poti wene kibututukoa amene. Tepene kotimi wene ponokalepa wete yaatapea wameamene. ²⁰Timini luaneya kaketepa Akolaline kiyo akene wene pikole tamele toamoko. ²¹Nitamele toamokono, kini poane wene-kitika ele kule poanele toma pokoileka wakete wamene. Nititikoapa Akolaliyo kiwi toa moateko peku kini tepene moa lukakana yakoa moamene. Oneke nate wene pianeya mea nitamene. ²²Toamadeteke paya nou toa yateketepa kini wa oa yotokoino, wedoa yakoa tamene. ²³⁻²⁴Panagome-kiti toamademeke one agale paya nou toa yatekilepa eya tou toa toko. Ali pade pinali one lene timini kakole wene kayapeademeke yomini pokoke eneteko pou toa toko. ²⁵Akolaline totono kabe koukoa plane boku panagome-kiti lewea enoai toa wene kayapeameneya litia toma pokomewa etene kolotini meoo. Akolaline totono wane ukupa ali atoa kini tokoi poaneleme kiwi moa kautaloganeya mekita bulukoa toa moateko totonoke uku.

²⁶Panagome-kiti Akolalinele takama yaku wa wene pikomeke one keke wedoa talo toamokomewa pinali one wa oa yotokako. Dikako agome Akolalinele takakilepa pata pale toko. ²⁷Pade alime nitameneya Akolalinele takakomewa eya toko. Etene nineta tuaneyake egetiniya meki mati-kitika ke enekakolo wene keda taneya meki nepo atoa-kitika mama moa kiwi mekika ugu pome auapekala toko. Ni itono peku noa tikitame tikile oneke weamuoo kekoa titi toma yako. Atai Akolaliyo dikako ago kei pikome okome i agome onekele takakilepa poane wene takoa koikatapeneya mekome kiyoke toko wa oko.

Ponopene Ali Atoa

Paya Tetepo Takameamene

2 Anu oya-lawe tone Ali Muno Yesu Keraisu pa telea tootapeane ago Akolaline peku nakene ago einagonole takama peketepa kamo yeneka ponopene yeneka takoa enameneya midi pikoa makutukoa moamene. ²⁻³Kiwi oboa mekita-kiti kamo ago ponopene agota nikilipa edeki patu. Yonoke kamo kue wane mekoa mamina epetaneya kawa noko ago makutukakete ekete kamo koni ali i epetaneya waneke noke menamene wa iki patu. Nitiketete padena ago pilia tadane mamina kawa noko ago-pala ekete kuka pa kaponamene wa-kiti oa anu kawane itonoke pa menamene wa-kiti iki patu. ⁴Edikakipa nipa einagota midi plane tetepo takamekete poane wene pianeya meapa takoa enoa potokakete tiki.

⁵Anu kolotini yene kipala i ukumo yakamene. Ete-kitame ponopeneya tetepo takoa wakene yenepa Akolaliyo kamo takou toane anukule takatiki peku lawetou wa takoa motoko. Nipa oneke wene mekoa meki-kiti one ta yameou

wa wene toopikana toa taatekakome eni ponopene yene one mana kono-mikiti latikako. ⁶Anu oya-lawe kime pade nitameneya ponopene ali atoa paya tetepo takoa wakete kamo yene kei pikala tiki. Kamo yename kipa tete mea koisoke lia aua pokala tikiyake nitiki. ⁷Anu oya-lawe kipa Keraisuno ibini pianeyake e kamo yename one ibini paya tetepo takoa taumada tiki. Enipa nimini ukutu-pe.

⁸Akolaline bokukepa one tobou kakoa oa metane totono dikaneya piko. *Pine yene kini wa mama motekete tiki toa yete pade ali atoa mama moma pamene* wa akeneya. Eni akene toa yakoa tootapeketepa nipa epetanele eni tekete toi. ⁹Nitameneya kamo yeneka ponopene yeneka midi plane tetepo takameketepa poanele eni tekete toi. Nipa one eni akene agale wene kibusukoa meketepa ae Akolaline totono tetekakene tadeku wa oi. ¹⁰Panagome-kiti eni totono litia toma pokomeka padele nateleka katekoa toamokolopa Akolaliyopa einagome one totono peya tetekatapeane tetepo takoa meko. ¹¹Akolaliyopa *mone padane atoa koua piameamene* wa oa ali atoa *wia tukameamene* waka oa taneya. Nitaneyano, anu oyago neme-kiti padane atoa koua piamekeka ali pade wia tukakepa nipa Akolaline totono peya neme eni tetekatapeko. ¹²Eya wa wene taneya meamene. Akolaliyo ali atoa takoa enekilepa kini tokoi poaneleme kiwi moa kautaloganeyya mekoita bulukoa toa moateka totono plane toa takoa enoo. Nitoono, epenemo-kama oa epetanele-kama toa tamene. ¹³Ete ali atoa ela moamokome kini poanele tokoi ke nami wia kibu motokagopa Akolaliyo oneka ela moamokome kibu moo. Wa pade ete yene ela motokome kibu moamoko

agomepa Akolaliyo kibu moamene piti moateko toa mena.

Yesuke Wene Tugoa Mekete

Epetanele Toatekomo

¹⁴Anu oya-lawe kipala eya waneka uku. Panagome-kiti Yesuke wene tugoane meku wa oake epetanele toma poamokomepa pata pamo eni okome too. Yesuke edikoa paya wene tugoa mekalepa nipa Akolaliyo einago edoa toa momotoa-pe. ¹⁵Kini oya ali atoa pade epetanele mamina kawamoa noateko nee-pala piamoa kobu taneya kakolo enekome ¹⁶panagome-kiti okome tepe mataketikoa pamene. Tigini poto takateko mamina kawa nee noa tagoa kitipu poti pamene wa-kiti oake one eni mamina pade meamoa one noateko nee-pala lawetamoa pa oa wetekakomepa nipa pata pamo eni okome toko. ¹⁷Nitiko toa panagome-kiti Yesuke wene tugoane meku wa oake ali atoa ela moamoa auapeamoa tokomepa nipa tukome tuane ago tetepo tokolo Yesuke wene tugakilepa pata pale toko.

¹⁸Panagome eya wa-kiti oko. Panagome Akolalinele takakilepa pa oneke wene tugoa mekome toko, wa padekagome onekele takakilepa ali atoa mama moa auapekome toko wa-kiti oko. Nimodo okalepa eya wane ou. Neme-kiti ali atoa auapekile toamekeke pa Akolalike wene tugoa mekolepa enouno, yamea ta. No i agopa Akolalinele takako ago tadeko wa neme wene tomotoanepa ali atoa mama moane auapekule yameou wane ou. ¹⁹Einago-pala eya waneka ou. Akolali wa oateko agopa odene ago kakono wene tuku wa neme oko. Ae, ipono-kitameka wini okana nimini oko wa wene tiki. Eni wenepa tekete pa kolu kolu luaneya meki. ²⁰Beita, paya wene pia oko ago ne-pala i ukumo yakamene.

Panagome-kiti ete yene auapeamoa pa Akolalike wene tugoa mekomepa nipa tukome tuane ago tetepo tokolo pata pale toko wa neme wene tomotoane tekene eya wane uku. ²¹ Akolaliyopa tone kaua ago Eberame einagopa poanele toamene ago tetepo takoa wene keaneyya mekilepa edekale taneya-pe. Eberameyo lodo yoademe kue moa latiane walaike mana Aisake moa pia oneke lodo yoademe tokale taneya. Enipa nimini uku-pe. ²² Akolaliyo enile tamene wa okale Eberameyo litia tokomepa Akolalike wene tugoa meateka kotu kakoa taneya. One nitane ago tadeko wa Akolaliyo Eberame einagopa poanele toamene ago tetepo takoa meaneya. ²³ Nipa one bokuke wia mekapiane toa taatekoa taneya. Enipa eya wa wia mekaneya. *Akolaliyopa Eberame poanele toamene ago tetepo takakilepa oneke wene tuganeleke taneya.* Nitaneyake Eberame ko ikilepa einagopa Akolaliyo oya patu plane ago wa akeneya. ²⁴ Nipa Akolaliyopa panago-kiti poanele toamene ago tetepo takakilepa pa oneke wene tugakoleke tokoya mena. Einagopa oneke wene tugoa mekome one wene pikole-pala toma pokolo tokome ni toko wa wene toa wane uku.

²⁵ Pamoko atoa Reabeyo enile keneya eya taneya. Tobou ago Yosua yo ali takuta yukuka Yeriko ta katepa teja enepoe wa wetekakale pokoli one yapu noe wa Reabeyo makutukoa motaneya. Nitikome one yename einagota poi pia mea wia tukakaya tokale kini nokoina lono koekoa padeka lono wakapea poe wa wetekaneya. Einatoapa nitane atoa tadeko wa Akolaliyo poanele toamene atoa tetepo takoa meaneya. Enipa nimini uku-pe. ²⁶ Ali pade one yomini takoa pokome pootapekomepa tukome tuoo. Edikoa panago-kiti Akolalike wene tugoa meake yete pade ali atoa aua-

peamokomepa nipa oneke wene tugakilepa pata pale toko. Nipa tuane agome keneya eni toko.

Kini Keke Wedoa Talo Tamene Wa

Mane Mane Oa Olaukanemo

3 Anu oya-lawe tikisa ago meou wa togo togo wameamene. Wipitia ta pataka-pete Akolaliyo tikisa ali-kiti toto pitia yatekome tone natemo okoomo natele tokoole peya pine toa akoo tokolo ni uku. Ete yene edikoa pitia yakamoo. ² Padele padele tikilepa toto peyame lugutukoa petekakete pale tokala toko. Panagome-kiti poanemo ikileka toamokomepa nipa one mea epetekateko kotu kakoa mekome pinali one yono kawa eya wedoa talo tamele toko. ³ Osi kai tone wene pikoka pomotoa one kimane kene kapa tigini deya tanikakoa eniya po kakoa lauaneyya talike mea poko. Dedeyameke yeka pome yukuka pome tomotoa eni po ete oto li li toa mea poko. ⁴ Ue dipi-kiti tube mati pikoyake pupulege-pala uu okoa kako matiyame popokoa aua poademe tokaleka yopikagome one wene litia pomotoa yomo tigini wane dedeya ue dipi tene lono uele tukaketikaneya kakome ete peke oto peke tokome aua poko. ⁵ Nitiko toa tone kekepa nateya deyameke ele kule tubele mati toane kamotokaku wa mate agale okala toko.

Yakoe, toe kagalia dedeyameke kau taneya pakeke pome pitakomepa itipono oa yomo kakoya eya odepeta napetapeko. ⁶ Kekemeka toeme eni toko toa poto tanele kamotoka kamotoka toko. Tone yono kawata tigini wago eya pake kako ago tone keke oneke padele padele poanele tagome tigini eya peyake weamutukakome toa potokakala toko. Tobou iponame one poane peku lawetekolo panago-kiti noa toma pokopa nipa toe witakome eya kuya

peya noawineya pou toa kekemepa pinali one wa toa potokama poko.

⁷Yoko tue ini kaya mou eya kuya peyapa alime oiake moa kawikamele tokolo padeka-kiti takoa moapa kini agale yakoa tomotoa egetekala tiki. ⁸Nitikiyake odene agoka pinali one keke wa kawikamele toamoko. Kekemepa eteleka otoleka koiga koiga tokome kayame ali tania tukou toa enile toko. ⁹Tone kekemepa padepete Ali Muno Atai Akolali kei pia wa padepete panago-pala poanemo oa toko. Akolaliyo one keneya kamotoa latiane ago-pala poanemo eni oko. ¹⁰Tone kekemepa kei pikomoka poanemoka okala toko. Anu oya-lawe totome edikoa meameamedeko. ¹¹Ue lene togilepa meke tane ue-pala poane ueta edoa odeneka lene toa yomotoa-pe. Nitamele toamoo-li. ¹²Yomo pikikepa yomo olipe ku oyake tuamele toko-pe. Nitamele toamoo-li. Gerepi po ludukepa yomo piki ku oyake tuamele toko-pe. E'e mena. Edikopa poane ue wa meke tane ue latia yoamoo.

Akolaline Peku Noa Toatekomo

¹³Anu oya-lawe kiwi pakeke wene muno meane ali-kitika pademo pademo wene toa iki ali-kitika meketepa nipa ete-kitame eno, kipa dikane ali-kiti tadeko wa wene tomotono, mea epetekamene. Nipa wene muno meane yene meatiki toa nate wene pianeya mekete padele padele epetanele toma yamene. ¹⁴Nitameneya ete yene-pala kotimi yoa wene poaneya mekete ako ago kawou wa ete oto pilinali yoma yaketepa kini wa kei piameamene. Akolaline nimini peku edikoa moa agopa takatapeoino, nitameamene. ¹⁵Dikane ago one nako pekupa Akolaliyo lawetane peku mena. Eni pekupa kini kaua-mikitame lawetane peku. Epetane Yominine weneke

titianeya mena. Tobou iponame titia lawetekoya. ¹⁶Ete oto wa wene poaneya mekete ako ago kawou wa wili toma peketepa nipa wene wili walai akeneya mekete ele kule poanele-kama toawineya pekete toi. ¹⁷Akolaline peku nako agome nitameneya eya toko. Titikomepa poane wene takoa koikaneya meko. Nitoa mekome poi teiane yene odene wene pikoa ni poti ko akene wene pia ni ete yename kowitikoile yakoa toa ni eko ali atoa ela moa tagatapea ni ele kule epetanele toa ni ponopene yeneka kamo yeneka takoa enamokome ali atoa peya midi plane tetepo takoa ni odene wene-kama pia meko. ¹⁸Poi wia pitikatiki peku laweteki yenamepa nipa nee lene ipele wedoa witou toa ali atoane tepene wene kiyo akenele-kama witakakala tiki.

Itonoleke-kama Wene Piitikaneya Meketepa

Akolali-pala Poi Teia Mekomo

4 Kako poi toa wa kini kini pili pili toa mokota ikilepa edoa titia witakala tokoto-pe. Ele kule poanele toada wa ete oto wa koiga koiga tikilepa tepene eida-kama titia toko. ²Panagoneya moadiya wa wene piapa moadete wili tokoa kawa teko tokolo pinago wia tukakete moato wa wene pianeya meki. Eya kuya mou wa moamele toamokolo kako poi toa mokota okala toa kaki. Nipa eniya-kiti moameneya pa mekilepa Akolali neme mano wa kowitamekete tekete pa meki. ³Wa pade-pete Akolali kowitiketete padeya dedeyaka moamele toamokolo pa mekilepa nipa Akolaline wene piko toa litia toamekete tekete pa meki. Nipa kinikile wedia tato wa paya wene pia kowitikete tekete ni moameneya pa meki. ⁴Beita, kipa pamoko keneya mekete eya wapa wene toamiki-pe. Pa itonole toma yaki yene-pala-kama oya

patu pia meketepa nipa Akolali-pala poi teia mekete tiki. Itono peku naki-kiti-pala oya patu piou wa wene piko agopa Akolali-pala poi teiane ago eni. ⁵Kime nitikala teketepa nipa Akolaline bokuke eya wa wia mekanemopa pamo akeneya wa wene pia tiki patu. *Akolaliyo totoke moa wetekane Yomini einagomepa one odene kiwike awiane meou wa toto kola ua meko wa wia mekaneya piko.* ⁶Totome toa potokakoloka Akolaliyo akole tokome pewe wedoa wima poko. Nikepa Akolaline bokuke eya wa wia mekaneya piko.

Anume tukule kimeka toati wa mate agale iki yenepa Akolaliyo ete pedekama pokomeke nate wene pianeya meki yenepa pewe-kama wia kako wa wia mekaneya piko.

⁷Nitikonono, Akolalike-kama nate wene pia lukoa meamene. Tobou ipono Setanupa ete pedekakolipa nipa kiwi wete tewitikoa pitoa poo. ⁸Akolalike note tegetekoa mekolipa nipa Akolali kiwike nome tegetekoa meoo. Ae, poanele toma yaki-kitame kini yonoke kakene kege ueme kōkitikou toa kini poanele tewitikoa wamene. Wene takuta pianeya meki-kiti kini poane wene wia wamene. ⁹Ke enekakolo tumai meou toa komo k̄ata pitikoa meamene. Yau toa meki-kiti yau teigoa wawa komo amene. Wedianeya meki-kiti wedikile teigoa wawa wene keda taneya meamene. ¹⁰Ali Munono lene yoto oneke nate wene pianeya mekolipa nipa kiwi kei pia ako moa kakoo.

¹¹Anu oya-lawe kini kini ete oto wa akoa agale wameamene. Panagome-kiti one oya ago kikoa akakilepa nipa Akolaline totono dekoa kikoa akakome toko. Nitoa akakilepa eni totono litia toatekole piamene tetepo takoa mekome litia toamoko. ¹²Totome litia toateko totono yameteko agopa Akolali odene. Einagome odene ali

atoa padeka-kiti toa moamele toa wa padeka-kiti wia atukamele toa tokono, einago luku kake anu oya neme eko aline tanele edoa pine toa akade-pe. Pine toa akakilepa Akolaliyo-kama toko. Padame pade mena.

Mate Agale Wameamene

¹³Topo lene kianeya meki-kiti kime eya wa-kiti iki. Pitikalime latia pitiki ta padeka pone mali odeneke eida mekene eya kuya topo toane kue moane kamo ago meouno, opi puku patu, podoliyo puku patu wa oi pedoa pikala tiki. ¹⁴Eni oi pedoa pia ikilepa podoliyo witatekolepa agopa tokolo meketeke iki. Wedo pikomepa pa tekei pia takoa poko toa kiwika itonoke pa tekei mea tukala tikino, ¹⁵eya wapa amediki. Akolaliyodo oyakeno enile-kiti toe wa okalepa nipa tuameneya meketepa ele kule tato wapa amediki. ¹⁶Nitamedikiyake mate agale oa kini wa kei pia tiki. Edikakilepa poanele-kama tiki.

¹⁷Nipa panagome-kiti one epetanele toateko wene tokomeke toamokolopa Akolaliyo einagopa poanele tane ago tetepo takoa meko.

Kamo Ali Atoa-pala Pubu Akenemo

5 Kamo ali atoa kipala i pubu ukumo yakamene. Dika dika toamene tete-kama mokoa kawatikiyano, komo k̄ata pitikoa kamene. ²Kini kamoya lomutapeneya pia kini mamina-pala t̄iome teia tadekatapeneya pia ³ni kini golo kue leneka silepa kue leneka lame yotokatapeneya pia toko. Eni kueba tatiamoa kamu tokoa mekoli tokome ni lame yotokatapeneya tadeko wa peyame enekete oi. Eni lamepa pine yene kiwike weamutukome toeme keneya noa teikolokoo. Kinikiya toeme napetapeateko tigotoma nokoyake kamo toma piki. ⁴Kini ipe pupu takaki yene yotokakete eni pupu takakoinake

nami wia kue meamikili tekete kini kueleke komo oa mekino, yakoe. Kini ipe kakoya nee motokane yename komo oa kakimo eya ago edelo ali-kiti lukoa meki ago Ali Munoyo yakakoa meko. ⁵Kamo ali atoa itonoke meketepa kini wene witika toa epetaneya-kama takoa moa obokete wedia meki. Nipa oinoke wiatiki kai paya nou toa lawa kawou toa kamo yene kiwika wipitia ta patakao kibu moateko oi paya nou toa kakete kamo toma piki. ⁶Nitiki yenamepa nami kawamene ali atoa wia tukatekoi oi pedoa pia pa wia tukakala tokoi. Nipa kiwi ete wa pedekamolika odene lono pa puputua wia tukakala tokoi.

Ali Muno Wakapea Nomotoa

Poti Wene Piitikoa Nepia Meatekomo

⁷Kamo yename nile-kala tikiyake anu oya-lawe kimepa Ali Muno wakapea nomotoa poti nepia meamene. Ipe toko agome-kiti nee lene matoa kadukata-peapa nodokoa kibutukoa kamotoa poti nepia meko. Nipa namolo takoa noka taame nee lene tumikoa wa naniko noka taame ku tumotoa poti nepia meko. ⁸Ali Muno wakapea noateko tigotoma nokono, one nomotoa nepia mekilepa edikoa poti nepia mea togamene.

⁹Anu oya-lawe kini kini ko oa akoo wameamene. Akolaliyo kime poanele tadiki wa kini nami witikaya tokolo ni uku. Koiso pitia yakateko ago yapu kago tuapea noademe dekama nokono, nita-meamene. ¹⁰Anu oya-lawe Ali Munono agale toawe akane ali-kitame one ibini patu kautakoa kakete tanele wene taneya meamene. Eni yename one agale akama yakete tete-pala moma neketeka onekele poti takama pote toganeyano, kimeka edikama pamene. ¹¹Ke enekakopeteka Akolalilele takama pote togakikitipa Akolaliyo wedikako yene wa to-

tome okoya. Eya ago Yobe one tanemo kime yatekoinakamo uku. Ke enekakale mekomeka ko wameneya poti meaneya. Ke enekakale memotoa wawake wipitikompepa Akolaliyo one papete wene toopikana toa taatekakome Yobe einago pewe wia kakeneya. Enipa kime wene tikimo uku. Akolali einagome ali atoa ela moa mama moa tagatapeko.

¹²Anu oya-lawe eya tobou kakoane ukumo yakamene. Ipa nimini uku waka oa ile tou waka eketepa nipa agetai tia tibu tia itono tia enika eniya tia wa wedekoa wameamene. Padele toadetepa ee tou wa oa tamene. Toamadetepa e'e toamou wa amene. Eni tia pia okoile toamokolipa Akolaliyo kibu moonoo, iya tia eya tia wa wameamene.

¹³Kiwi panago ne-kiti ke enekakale mekepa nipa Akolali kowitamene. Panago ne-kiti kolotine yakepa nipa Akolali kei pia lo oa tamene. ¹⁴Panago ne-kiti yene taneya pitikepa nipa Keraisuno ali atoa talo tiki ali-kitame neke kowitikanomotonoo, agale oa wetekamene. Nitikale nekete neke kowitikakete Ali Munono ibini wedekoa olipe yomo ku ue neeke pekoa yotokakoa kowitikoa toi. ¹⁵Akolaliyo yakoa too wa kowitikakolipa nipa yatekome yene tane ago latekoo. Latekakompepa einagome poanele tokake po letu mekakana keemu toa wao. ¹⁶Kiwi yene taneya pitiketepa Akolaliyo latekamotonoo, kini poanele tokoimo i i wa ete oto wa toawe oa ni kini kini ete oto kowitikoa tamene. Wene kiyo akeneya meko agome kowitikakolopa nipa one kowitikakamo taatekoo too. ¹⁷Ilaida toto keneya alimepa ta noamomotoa wedoa kowitikale Akolaliyo yakoa taneya. Nitikalepa mali tebolo ponome wa tokeneka ko melepu (6) kakoo ponomotoa ta pitakileka toameneya. ¹⁸Nitaneyake wa kowitikale ta lobo

pitakale itono patu padeya padeya eina yano kakoa wa witatapeneya.

¹⁹ Anu oya-lawe kiwi panago Akolaline nimini ka pimotoa etepea toma pokale eina tewitikoa wakanakale litia wa tomotoa aua nokagopa eya wa wene takamene. ²⁰ Panagome poanele toma

pokale one eni poane wene wia wamomotoa tekepa nipa one tua atua poamomotoa neme toa moteke too. Nipa einagome ele kule toka poanele peya mati Akolaliyo moa agopa takatapemotoa teke too wa wene takamene.

I PITA

Pitayo Namolo Takoa Wia Wetekane Pipia

1 No Pita Yesu Keraisuyo one agale oane auane yamotoa takoa moa kakaka Aposelo agome uku. I agale wiane wetekakilepa anu oya-lawe kiwi eya mone ta-meneke Podase Galesia Kapadosia Esia Bisinia ta-meneke toa pote mekika wetekaku-ye. ²Toneketai Akolaliyo papete wene toopikana toa taatekakome kipa one wa takoa motane yeneke uku. Nitane yene kiwike one Epetane Yomini awinome mekome kini wene moa kiyo akatapeneya. Nipa Yesu Keraisuyo okale-kama litia toa ni one kamateme kini namolo poane wene takoa koikatapeneya mea tomotoa taneya.

Akolaliyo Wipitia Toatekale Nepia Meato

³Akolali tone Ali Muno Yesu Keraisuno etene one kei piato wane uku-ye. Oneme eya taneleke ni uku. Mana Yesu Keraisu tuaneya pikale moa kamotokaneya tokome anu oya-lawe toto one mea kawateko mana kono-mikiti moa latikaneya. Ali atoa toto mama motoka matiyame taneya. Nitaneya tokolo toto one take mea kawoono, nepiato wa wedia-kama nepia meko. ⁴Nipa a tibuke mea kakete toateko pekupa one mana kono-mikiti kiwi lawetou wa oa pikana toa taatekoa toatekole nepia meko. One eni peku lawetekome meatekoya-kiti lomuaneneya pioo. Ni padeyameka toa potokameneya pia takoaka poamoa too. Eniya-kitipa kinikiya wa Akolaliyo a tibuke pikoa metekako. ⁵Nipa anu oya-lawe Yesuke wene tugoa mekili tokome Akolaliyo one tele patu kautakoa meati na pawe toa talo toko.

Nipa wipitia ta pataka-pete one papete wene toopikouna toane taatekakene kiwi toane mou wa papete pawe toa talo toko.

⁶Nitikono, Akolali-pala ke wa wedia kakete tiki. Opi-mene padele padeleme ke enekakolo wene keda taneya meketeke pa wedia mekete tiki. ⁷Nikepa eya wane uku. Kini kamoya golo wa akene kuepa toele wia yoa enekala tiki. Nitikili paya kuepa toeme takoa nootapekoyake kamo kuepa toeme noameneya tutu yeta pa piko. Eni kamo kuepa wipitia ta pataka-pete takoa poatekoyake tiki. Akolaliyo anu oya-lawe kipa one etene kamoya tetepo takoa mekome edikoa toa enekala toko. Nitoapa kini Yesuke wene tugoa mekile enekomewa Keraisu Yesu wakapea noka-pete kiwi kei pia kini ibini kamotokademe toko. ⁸Anu oya-lawe kimepa Yesuno lene timini enamoake oneke pa wene mekoa meki. Opiika one enameketeke oneke pa wene tugoa meki. Nitikete one-pala ke wa ikilepa edemo wamoo wa a tibuke wete pa tootapeneya meane tetepo takoa kolotine mekete iki. ⁹Nipa kini Yesuke wene tugoa mea togakolopa kini yominipa one wa toa moo wa kolotine meki. ¹⁰Akolaliyo one ali atoa kiwi edikoa pewe wiatekamopa one agale toawe akane ali-kitame papete i i wa toawe akama-kala nekeneya. Nitiketeka ali atoa toa motikilepa edoa toa moademe oko patu wa pitia yakatekakala toa mea tuma-kala nekeneya. ¹¹Nitima nekene toa Keraisuno Yomini kiwike-kala awinokome eya wa wene takaneya. Keraisuyo tete-kala mokoa kawa tuake wa kamomotokome a tibuke pa teleta tootapeneya pome mepoo wa wene takapikala taneya. Nitaneyake eni wene takakolepa manipete taatekoa toatekoleke oko patu, edoa taatekoa

toademe oko patu wa pine tuku toa kawa tuma-kala nekeneya.

¹²Nitane ali-kiti Akolaliyo eya wa wene takapikala taneya. Enika enilepa kiwi meki-pete taatekoa toamoko. Nani mati mekoi ali atoa kakoi-pete taatekoa too wa wene takaneya. Nani mati mekoi ali atoa wapa anu oya-lawe ki-wike okome akeneya. Eina papete wene takapianele opi taatekoa toko. Enilekepa Keraisunomo kipala toawe a okoina alikitame i i wa pine toa okoina. Nipa Akolaliyo one Epetane Yomini a tibu meaneya moa wetekakale awinokome wene takakana toa toawe okoina. Eina okoinapa a tibuke meki edelo alikitameka pine pitiane yakadiya wa wene pianeya meki.

Kiyo Akenele-kama Toatekomo

¹³Nikepa eya tamene wane uku. Kini wene moa labakanele tewitioa wawa utanele-kama toma yamene. Ni Yesu Keraisu wakapea noka-pete Akolaliyo pewe witikome toatekaleke wene pitikaneya meamene-ye. ¹⁴Akolaline nimini agale wete yakameneya mekete ele kule poanele toada wa namolo tokoina toa wa pade toameamene. Oneme ta wa okale-kama toomoa pamene. ¹⁵Padele padele tikilepa kipa one wa kayo oa motoko ago Akolaliyo epenele-kama toma poko toa tamene. ¹⁶Akolaline bokuke agale pade eya wa wia mekane toane ni uku. *Akolali nopa epenele-kama tukuyano, kimeka epenele-kama toma yamene wa akeneya.* ¹⁷Ali atoame tanele-kama takoa enoa akako ago Atai Akolaliyo kiwi peya midi piitapeane tetepo takoa mekome kini tanelepa epetaneleka poaneleka takoa enoa akakala toko. Nitiko agopalapa kime kowitikala tikino, itonoke pa tekei meatiki yene tetepo takoa meato wa oneke nate wene pianeya lukoa meamene. ¹⁸Itonoke mekoi ali atoa kini kaua-mikitame paya peku

lawetanele noa toma nokoika Akolaliyo kiwi oto toa motaneya. Nipa golo silepa enika eni pia kawamateko kamoyakitame oto toa motaneya mena. ¹⁹Nitameneya one etene kamoyamepa oto toa motaneya. One etene kamoyapa mana Keraisuno kamate. Keraisu einagopa ipu kodo dedeyaka piame ne sipi sipi kai tine keneya tukale kamate ponoka. ²⁰Akolaliyo one mana kiwike tumotono wene toopikilepa itono tibuta wete latiameneyake taneya. Nitaneyake wipitikome kiwike tuou wa taatekoa nome tuka. ²¹Akolaliyopa mana Keraisu eni tukale moa kamotokakomepa one ibini kamotokaneya. Nitaneyano, totoka moa kamotokoo wa eni toatekale wedianeya nepia meketepa oneke wene tugoa meko.

²²Nipa Akolaline nimini peku nootokoapa kini namolo poane wene wia wawa eya tekete tiki. Wene takuta piameteko Keraisuno ali atoake wene mekoa mekete tiki. Nitikete tikino, odene wene piitioa kini kini ete oto wa wedoa wene mekanali yoma pamene. ²³Akolaliyo mati opiou toa kipa one mana kono-mikiti moa latikaneya tokolo ni uku. One mati-kiti eni moa latikakilepa pa tua poatekagome mati opikome toko toa mena. Kini mea kawatiki peku lawetekome taneya. One eni laweteko pekupa Akolaline pia kawateko agaleke uku. ²⁴Nikepa Akolaline bokuke eya agale wia mekane toane ukuno, yakamene.

Ali atoa peya itonoke mekilepa ke witoa kako ke tetepo taneya meki. Nipa ibini akene yenedo tetepo taneya meketepa ke tidiyo kalaneya witoa kawa okoa pitako toa pa tekei koniyali atoa meki. Ke totoa tuutapea tidiyo okoa pitoa tokoyake ²⁵Akolaline peku pa pia kama poko wa panagome wia mekaneya.

One eni peku wane ukupa Keraisunomo kini wene epetaneya memotoa toawe akenemoke uku.

Akolaliyo Takoa Motane Yapu Pigi

2 Kipa Akolaline peku mati-kitino, padele padele poanele tikile peya tewitikoa wamene. Kapene agale wamoa ni Akolalinele takakilepa wene takuta pianeya mea toamoa ni eko pade alikiti moane patukoane ako meadiya wa eni yene-pala wene poamoa ni akoa agale wamoa tamene. ² Akolaliyo one peku lawetekilepa paya peku eletekakileka toamoko. I yene kiwi one mana kono-mikiti latikakene toane mou wa one peku lawetoono, nana matiyamekiti adu nodo tokolo noa kako toa one peku noa piamene. ³ *Ali Muno agome one ina pekupa epetaneya-kama lawetekoya tadeko wa kime wene tekete ni naki.* ⁴ Ali Muno wane uku agopa mea kama poko ago. Nitiko agoke ali atoamepa ipa poadeko wa yapu wiatekoi yomo enoa wawou toa wakeneya. Nitaneyake Akolaliyo i agopa one kolotini ago wa takoa motaneyano, one-pala lipua meamene. ⁵ Akolaliyo kipa mea kawatiki yomo one losu yapu wiateko yomo tetepo takoa mea Keraisu-pala moa lipukoai toko. Oneke padeya mea lodo you toa kinikile wawa toamekete Keraisu patu kautakoa kawa onekele takama pomotoa tokome ni toko. ⁶ Ina ukunapa Akolaline bokuke agale tigini pade papete eya wa wia mekane toane uku.

Anume tukule enoe. Saione takepa tobou kakaku yomo yapu pigi takoane moane wiou toane anu kolotini ago moane kakaku. Einagoke wene tugo mekoi-kitame oneke ya motikileka toamoi wa Akolaliyo akene toa panagome papete wia mekaneya.

⁷ Oneke wene tugo meki-kiti kime eni yapu pigi wane uku agopa tobouya latikakete tiki. Nitikiyake pade-kitame

oneke wene tugo meamiki. Eni yeneke Akolaline bokuke eya wa wia mekaneya piko.

I yomopa poadeko wa yapu wiane yename paya tetepo takoa wakeneyake panagome i yomopa yapu pigi wa moa wianeya wa panagome wia mekaneya.

⁸ Wa enikepa eya waka wia mekaneya piko.

I yapu pigi wane ukuya pikata ali atoa ogo witikale kaiapitoi. Nipa puku pekete toa kamedekamotekete pitoi wa panagome wia mekaneya.

Eina wia mekapiane toa taatekoapa eni yene one agale yakoa moamekete tekete pata paka puku pekete tiki. Nipa Akolaliyo papete wene toopianele eni tiki.

⁹ Anu oya-lawe kime pade enile toamiki. Akolaliyo kipa one yatene wa takoa motoka tokolo oneke lukoa meki. Ali Muno agoke lodo you toa onekele takakilepa tobou yene tetepo tokolo tiki. Akolaliyo kipa one yatene wa talo toa meko. Onekele-kama takoa memotoa ni toko. Kiwi yomiyomu keneke mekoika one pa takaloganeya meku ta noatino noe wa kayo oa motoka ago Akolaliyo kiwi takoa motikilepa one padele padele tubele tanemo i i wa one kei pimotoa tokome ni toka. ¹⁰ Namolopa kipa mone ali atoa tetepo taneya mekoinake opa Akolaliyo takoa motane ali atoa wini mekina. Namolopa Akolaliyo ali atoa ela motokome tokole wene toameneya mekoinake opa wene taneya wini mekina.

Akolaline Ali Atoa Mekete Toatikimo

¹¹ Anu oya-lawe kipa itonoke pa tekei meatiki yene mone yene tetepo taneya mekino, eya tamene. Kini tepene ele kule poanele toadiya wa wene piki toa witakome kini yomini-pala poi teigala tokono, eni poane

wene tewitikoā wamene. ¹²Nipa mone take Akolaline agale yakamene ali atoa pake pake dekaōa mekete epetanele-kama tamene. E yenamepa i yene kime poanele toma yaki wa akōa agale okolika nitamene. Akolaliyo ali atoa takōa enenoka-pete kini epetanele-kama tokoli enekoinakaleke e yename Akolali kei pitikiyano, nitamene. ¹³Ali Munoke tou wa eya toma pamene. Ta talo tiki yene peyake poti lukōa meamene. Nipa ako odene tobou meko agome ta piko peya pitiki ali atoa talo tokome tamene wa oka toa litia tamene. ¹⁴Ako odene meko agoke lukōa meki tobou ali-kitikeka poti lukōa meamene. Poanele tokoi ali atoa kibu moa ni epetanele tokoi ali atoa kei pia topoatino poe wa ako agome moa kakōa wetekaneya tokolo ni uku. ¹⁵Paya peku noa tiki yename emo kumo pamo okoimo teigoa wamotono, epetanele toma pamene. Akolaline wene piko toane eni uku. ¹⁶Ta pine agono mana kono-mikiti kini take atiki toa meki toa anu oya-lawe kiwi Keraisuke atiki toa lukōa meamene. Nitoa meketepa ele kule tamele tokono, poaneleka tato wa wene pia toameamene. Kipa Akolaline pupu takatiki yeneno, onekele takakete toatiki toa toma yamene. ¹⁷Ali atoa peyapa paya tetepo takamoā kei pikala tamene. Keraisuke wene tugoā meki-kitike wene mekoā meamene. Akolali piti motaneya mea ni ako odene meko tobou agoke poti lukōa mea one kei piai tamene.

Keraisu Yoto Pitia Tete Moma Poatekomo

¹⁸Kueme topo toa moa egetaneya meki yene kipala eya wane uku. Ta pine yename tamene wa talo tekete okoli yoti mitikatekōa mea yakōa tamene. Poti ko akene wene pia talo toa epetekako agome ta wa oka toa tamene. Ni talo toa potokako agome tamene wa tete-

pala pa puputua metekome okaleka tamene wane uku-ye. ¹⁹Akolalike wene piitikaneya mekete eni tete poti ko akene wene pia motokolipa nipa Akolaliyo i yene kime toa epetekaki wa pewe wioo tokolo ni uku. ²⁰Kime padele poanele tokoike talo agome layo toua witikaledo kō akene wene pia tete motokolipa kiwi teyo kei pimotoa-pe. Padameka kei piamoi-li. Wa pine agonole we-doa takakoike pa puputua layo toua witikaleka kime ko akene wene pia tete motokolipa Akolaliyo kiwi kei pia kawoo. ²¹Akolaliyo kipa one yene wa kayo oa motikilepa kime tete edikōa momotoa tokome ni taneya. Keraisu kiwike tete moa kawa tukilepa kini itonoke mekete toatekoile adeka pia taneyano, Keraisu yoto pitia tete moma pamene. ²²Keraisu einagome poanele nateleka toamoā kapene wakōa agaleka wamoā taneyake tete mokōa kawa tuka. ²³Ete ali-kitame one tea kakolika ete poanemo topo takōa wamoka. Ni tete metekoli kiwika wiou wa wamoka. Eni yename nitikolika oneme pade koiso akamoka. Nitameneya kiyoke-kama takōa eneko ago Akolaliyo one koiso yakoo wa oneke wene tugoā meka. ²⁴Ni tone namolo poanele tokoole tewitikoā wawa kiyo akenele toma pomotoa tokome Keraisuyo eya toka. Tone eni tokoo poanele one tiginike awitikaneya pome yomo lekaneyake tuka. Einago layo toua wikala tanelemepa anu oya-lawe kiwi latekatapeneya meki. ²⁵Papetepa sipi sipi kai-kiti etepea pou toa paka pote atupokoiyake opa kiwi talo toa kini yomini pikōa kawa toko ago mekota wakapea pote meki.

Adona Mekete Toatikimo

3¹⁻²Enakale toa atoa yatename kinikaneyo tamene wa okoi toa yakōa tamene. Enipa atoa pade nekaneyo Akolaline agale yakōa

moameneya mekalepa Keraisuke wene tugamoto, nitamene. Nitikalepa nekaneyo ae anu natoname anu agale yakoa motokono, Keraisuke wene tugoa mekome ni toko wa oneka Keraisuke wene tugoo. Neke pademoka wameneya kiyi akenele toa ni yoti mitikatekoa mea tokale enekomema nitoo. ³Kini tigiini kalakilepa tou wa enileke wene piitikoa meameamene. Nipa pine puputua pitikamo ni golo kue wane kabeke piamoa ni kamo mamina kawamoa tamene. ⁴Nitameneya kini yomini koniyo takou toa tekete poti ko akene wene pianeya meamene. Eni koniyoyapa takoa poameneya pa kela pia kawoo. Akolaliyo ei kiwi edikoa memotadiya wa wene pianeya meko. ⁵Namololo papete Akolaliyo takoa motane atoa-kiti oneke wene piitikoa meketepa edikoa kalaneya meou toa kinikaneke poti lukoa meaneya. ⁶Ibini akene atoa Serayoka edikakome onekane Eberamepa Ali Muno wa oa oneke poti lukoa mea taneya. Anu oya atoa-lawe kime kiyi akenele-kama toa padelekeka piti moameneya mea teketepa Serane kono-mikiti tetepo taneya meoi.

⁷Enakale toa ali yatene eya tamene wane uku. Kini natono koua meketepa nipa i atoa anu tele kotu kawameneya taba taneya meko wa mama moa kei pia tamene. Akolaliyo kini natono-kiti kiwi midi plane tetepo takoa pewe witikilepa meata kama pomotoa tokome toko. Nitikonono, kini kowitoka okoimo Akolaliyo yakamokayano, ina ukule tetekameneya litia tamene.

Padele Epetanele Tokoike Tete Motanemo

⁸Eya wane wipitikene ukuno, yakamene. Ete oto wa odene wene-kama pia ela moa tamene. Nipa ete oto wa wene mekoa mama

moa yoti mitikatekoa mea tamene. ⁹Poanele toko ago-pala poaneleme ete topo takamo ni tea agale oko ago-pala poanemo topo takoa wamo tamene. Nitameneya Akolaliyo ne pewe wimotoane uku wa topo takoa amene. Akolaliyo anu oya-lawe kipa one wa kayo oa motikilepa kiwi pewe wiou wa tokano, nitamene. ¹⁰Akolaline bokuke panagome eya wa wia mekaneya.

Panagome-kiti itonoke wedianeya yawane piou wa wene pia ni ta pataka abuna meane epetekou waka wene pia tokomepa poane agale wamo ete yene oa yotokamo tamedeko.

¹¹*Ni padele padele poanele tewitikoa wawa epetanele tamedeko. Ni ete yene-pala odene wene pianeya meou wa oya kakademe wili toa kamedekolo uku. Akolaliyo eya tokolo tekene ni uku.* ¹²*Akolaliyopa kiyi akenele toma yaki-kiti leneme wia mea ni kini kowitikete ikimo-pala kale piyakoa mekoyake poanele toma yaki-kiti mukiti yamea wako wa Akolaline bokuke wia mekaneya piko.*

¹³Epetanele-kama tou wa wene pianeya yako ago-palapa teyo poaneleme topo takoo-pe. Padameka poaneleme topo takamoi. ¹⁴Anu oya-lawe kime epetanele toma pokoike pade-kitame tete metekolika wedia meamene. Akolaliyo pewe wia yopioono, pa ali-kitame tete metekaya wa piti moamoa kepeneka mama moamoa tamene. ¹⁵Nitoapa Keraisu einagopa kini Ali Muno wa oneke nate wene pianeya meamene. Keraisu einago wakapea nomotoa nepia mekete wedia mekino, dekolo tiki-pe wa pade-kitame kiwi pitia yakoino, eni yene-pala topo takoa oatikimo wene kibusua meamene. ¹⁶Nitoapa i i wa toawe ikilepa yoti mitikatekoa mea potimo-kama amene. Enipa Keraisu patu kautakete mea epetekakoileke

ete-kitame kipala akoo agale okolipa nipa ae kapene agale inapa ekete tadeko wa eni yene ya motokamoto, kini tepeme ta wa epetekoa okale-kama litia epetanele toma yamene. ¹⁷ Kini toa epetekakoileke ete yename tete meoi. Akolaliyodo one wene litikome eni tete memotoa tokalepa epetoo wa poti eni tetepa moma pamene. Kini padele poanele tokoilekedo tete motokolipa nipa poo tokolo uku. ¹⁸ Keraisu kiyo akenele-kama toko agomepa ali atoame poanele tokoike nami wiane tuou wa tuka tokolo ni uku. Etene Akolalike kiwi koua pome wetekapademe ni nome tuka. Nitoa nome tukake wa pade tukileka toamoo. One tiginipa wia tukaneyake one yominipa takoo mea-kama poka. ¹⁹ One Yomini takoo pokomepa Akolaliyo po yapu moa mekane yomini-kiti meane take pomepa ali atoa toa motanemo i i wa mo wia kakeneya. ²⁰ Eya ali atoane yominike uku. Akolaliyo pubu okana toa Noayo tube ue dipi pade latia-kala kakeneya. Nitikakoo Akolaliyo one eni pubu akene agale yakoo moamene ali atoame kini poane wene wia wamotoa poti ko akene wene pianeya mekome nepia meaneya. Nitikaleka e ali atoame yakamokoli o Noa ti natetekoa ketepo kakoo (8) einakeya keneke petoa pote mepokoli Akolaliyo e poanele toa yakamene ali atoa peya ue nakoo tumotoa wakeneya. E yene tumotoa wakeneyake Noa ti toa motaneya. ²¹ Akolaliyo Noa ti edikoo toa motikilepa nipa anu oya-lawe kime ue motokoli toa moateka adeka pia taneya. Kime ue motikilepa kini tiginike kakene kege koadete tokoiya mena. Nitamekete Akolaliyo kini tepene poane wene takoo koikakamotoa tekete Akolali nekele-kama takou wa kime ue motaneya. Nitimotoa tokome mana Yesu Keraisu nome mea tuake kamao poka. ²² A tibuke Akolaline nimini yono

kouno lono pome kapoko ago Keraisuke uku. Nitiko agoke-kama edelo ali yateneka eya kuya peya yopia meki yateneka lukoo meki.

Namolo Wene Wia Wakete Wenele Toatekomo

4 Keraisu tono melepu kakeneya nome mea tete mokoo kakano, one tete motokome toka toa kiwika kepene mama moameneya tete oyake mou wa wene pianeya meamene. Tete mokoo kako agome-kiti one poanele namolo toma pokanakale tewitiko wako.

² Dikako agomepa one namolole tewitikaneya mekomepa papete ele kule poanele toada wa wene pikana toa litia toamokome Akolaliyo wene piko toane litiane tamedeku wa kiyo ootokoo meko. ³ Namolopa Akolaline agale yakamene yename ele kule toada wa etepea toma pokaile kimeka toma pokoi. Nipa oyakeno, wa pade toameamene. Papete eya ya tanele toma pokoi. Pamoko mea ni koua piamatekoi atoa koua pia ni bia ue eya nokoo pia ni ali atoame poanele toa oboa mekoika paya ulu toa ni toge kia mekoika gerepi po ku ue nokoo kawa ni Akolaliyo kote motokole tekete paya gode-kiti kowitoo tokoi. ⁴ Opa Akolaline agale yakamene yenamepa kini poanele-kala toa etepea pikika kime koua poamikili enekete wene kainya pianeya mea kipala poane agale okala tiki. ⁵ Nilepa kime dekale tokoi-pe wa Akolaliyo kini koiso akoo. Wete tua pekene yeneka tuameneya pa meki yeneka takoo enoa akateka agome nitou wa enile toademe nodokakoo meko. ⁶ Nitatekoya tokome tua pekene ali atoa-palaka Yesunomo oa metaneya. Nipa Akolali one yomini-pala mea kama poka toa kini yominika mea kama pomotoa ni taneya. Ali atoa peya itonoke mea tukala toi wa Akolaliyo kiwi kibu moateka wene toopiane toa

tukala taneyake tua pekene yene-palaka Yesunomo oa metaneyaya.

⁷Itono tibuta takoa poateko tigotokono, Akolali wedoa kowitadepa utanele-kama toa poti yawa piamene. ⁸Eyaka tamene wane tobou kakoane uku-ye. Kini kini wedoa wene mekanali yamene. Tone tone wene mekanali yoteketepa nipa toto-pala tane poanelepa ete oto wa topo takamekete edikoa kaukoa mekete too. ⁹Kini oya-lawe kini yapu nee noatino, noe wa makutukoa moamene. Nipa ko wameneya wedia mea tamene. ¹⁰Akolaliyo kiwi peya pewe witikome one peku eya kuya tutu tutu wa lawetekanano, one eni peku noa teketepa ele kule toa yete pade ali atoa auapeamene. ¹¹Nittoa Akolaline agale toawe akaketepa nipa Akolaliyo akamene wa oka toa-kama akamene. Yete pade ali atoa auapeketepa nipa Akolaline tele patu kautakoa kakete tamene. Kini eni toma pokoi-le-kama enekete ete-kitame inapa Yesu Keraisuyo etenanele takakome yametanele tiki wa Akolali kei pimotono, nitamene. Akolaliyo eya kuya peya yopia-kala kama pokono, ke wa one kei piatoane uku. Ee nimini.

Tone Keraisuke Toa Tete Moatekomo

¹²Anu kolotini yene kipala i ukumo yakamene. Padeleme ke enekakolo mekete dika dika toamene tete mokoa wini kakino, edekolo ipa tokoa kakoto patu wa wene kainya pianeya meameamene. ¹³Ipa Keraisu nome mea tete motane toa kimeka mokala toko wa poti moma pamene. Nipa Keraisu einago pa teleta tootapeneya wakapea nokale ke wa kolotine meadetepa pa widikoa meamene. ¹⁴Anu oya-lawe kime Keraisunole takama yakoike pade-kitame tedu mea ya motokolipala kolotine meamene. Eni yename

edikokolipala Akolaline Yomini kiwi pa teleta takateko Yomini kiwike awinome meadeko wa wene toino, kolotine meamene. ¹⁵Kiwi padameka ali wia tukamoa ni panagoneya kode moamoa ni ta talo toko agono agale tagamoa ni kotu kabunu kawamoa tamene. Edikakoikedo tete moteketepa nipa pata paya moino, toameamene. ¹⁶Nitameneya Keraisu litikoikedo ete-kitame tete metekolipala nipa ya moameneya inapa Keraisuno yatene ago mekulu ni tikino, ke wa Akolali kei piamene.

¹⁷Akolaliyo ali atoa takoa enoa akateko oipa opi. One eni toatekole taatekoka tikilepa namolo takoa one yatene ali atoa totome eni tete momotoa toko. Wa naniko onekemo yakoa moamokoi ali atoa takoa enoa akakomepa dika dika toamene tete meo. ¹⁸Enikepa Akolaline bokuke eya wa wia mekaneya piko.

Akolaliyo kiyu akenele toma yaki yene toa motikilepa wili tokoa kawa toko. Enile tamene poto toko. Ae, onekele takameneya poanele toma yaki yene edoa toa momotoa-pe wa panagome wia mekaneya.

¹⁹Nipa Akolaliyo wene pika toa tete moteketepa oneke poti lukoa mekete epetanele toma pamene. Kiwi latia mekane ago Akolaliyo oneme tou wa oka toa-kama tokome kiwi tewitikamoono, nitamene.

Yesuno Ali Atoa Talo Yene-pala Akenemo

5 Yesuno ali atoa talo takoa meki ali-kiti kipala i ukuno, yakamene. Nopa eya ago mekene uku. Kini yagono ago noka Keraisuno ali atoa talo takakuya. Keraisuyo tete moa mekale anu leneme enekou. No nitikou agopa Keraisu einago pa teleta tootapeneya

keleyo wakapea nokale one-pala opiane meou.

²No nitateku ago tekene eya tamene wane uku. Akolaliyo one ali atoa talo takamene wa tatia yametekana ali atoapa sipi sipi kai-kiti tetepo takoa wedoa talo takamene. Nitiketepa talo takamene kote tokolo mekeneke tuku wa edikoa wene piameamene. Ipa Akolaliyo wene piko toane tuku wa wedia mea tamene. Kue mou wa kuke-kama wene piitikoa mea toameamene. Kini weneme wedoa talo tamene. ³Akolaliyo tatia yametekana ali atoa talo takakomempa toe toe wa tika tika toameamene. Nitameneya kini wini ali atoa mea epetekatiki kotu pia meamene. ⁴Wa naniko ako odene mekome talo toko ago Keraisu taatekoa wakapea nokalepa Akolaliyo kiwi kei pikome pa teleta tootapeneya mea kawatekoi peku lawetoo.

⁵Tuali yatene kipala eya wane uku-ye. Wetini yename tamene wa okoi toa litia tamene. Mamina epetaneya moa kawou toa ete oto wa auapenali yoma pato wa yoti mitikatekoa meamene. Enikepa Akolaline bokuke eya wa wia mekaneya piko. *Akolaliyopa ete yene paya tetepo takoa meki-kiti kote tokolo wakoyake yoti mitikatekoa meki-kiti pewe wia kako wa panagome wia mekaneya.* ⁶Nitaneyano, telekole-kama toko ago Akolalike poti lukoa mekete yoti mitikatekoa meamene. Nitikolipa Akolaliyo kini ibini kamotokoa kei pioo. Eni kei plateka-petepa nitoono, oneke poti lukoa meamene. ⁷Akolaliyo kiwi mama moa yopikono, kini wene moa keda takanele peya oneme takoa moa katekamotamene.

⁸Uutukoa poti yawa lene kilikoa piameneya wedoa meamene wane

uku. Laione kaime ali kamate abetema yakome kou oko toa kipala poi tejane ago Setanuyo kiwi wiou wa tuku toma yakolo ni uku. ⁹Kini oya-lawe ta piko peya pitikika odenele tane tete mokala tekete tiki wa wene taneya mekete Setanu ete pedeka pedeka tamene. Nipa poapeneya kakete Akolalinele wedoa takama pote nitamene. ¹⁰Eni tete opi-mene mootokaneyake Akolaliyo kiwi mea epetekatekoi kotu kakoa mekoa mape wia tele takoa too. Pewe-kama wia kako ago Akolaliyo kiwi mea kawatiki peku lawetou wa kiwi kayo oa moa Keraisu-pala lipukoa taneyano, nitoo. ¹¹One telekole-kama tokana toa pa toa-kala kama pokono, ke wa one kei piatoane uku. Ee nimini.

Pitayo Wipitikome Lionate Akenemo

¹²I agale tigini deya i i wane oane wini wetekakupa nipa Akolaliyo one ali atoa toto pewe eteneya wima pokomo toaweane uku. One pewe wia yopikota poapeneya kamene wane kiwi mama motekene uku. Nitikenepa anu oy-ago Sailasi Akolalinele wedoa takama pokoke kei piku ago i agale neme wia mekakoano ta wane uku toa yakoa wia mekakako-ye.

¹³Babilone wa aue paigoa akene Lome take pitiki ali atoame wete meamene wa iki. Nipa Akolaliyo kipala odeneka dekoa takoa motane yename iki. Anu mana latikakounakago Makeyoka kiwi wete meamene wa oko. ¹⁴Kiwi koukoka mekete-kama i ali i atoa neeke wene mekoane mekuno, ke wa yono ete oto wa mokala tamene.

Keraisu-pala lipua meki-kiti kiwi peya poti kilikaketikoa memotoane kini kow-itikoane uku-ye.

Opa enina-ye.

2 PITA

Pitayo Taku Takoa Wia Wetekane Pipia

1 No Saimone Pita Yesu Keraisu onekele-kama takoane onekemo oane auane yawane tuku Aposelo agome uku.

Toto peya midi plane tetepo takoa kiyo ootokoa yopiko ago Akolaliyo kiwika oneke wene tugo meamele toko wa ka yametane-kiti kipala uku. Akolali wane ukupa toto toa motoko ago Yesu Keraisuke uku.

² Akolali tone Ali Muno Yesutame kiwi pewe wia tepe kolotini kilikoa pikoa toa tagamotoane kini kowitikoane uku-ye. Einagota wene tootapeada wa kini peku noma pokolipa kini i kowitikakumo yakoa toi.

Keraisyuo Kipa One Yene Wa

Kayo Oa Takoa Motanemo

³ Onekele wedoa mea takamotoapa Keraisu einagopa Akolaline tele patu kautakoa kakome one peku toto lawetetapeka. One wene taneya mekete to-motoa ni toka. One pa tootapeneya mea epetekakole eni yametekometa to-topa one wa kayo oa motoka. ⁴ One pewe wia tagakome toatekale i i wa eni yamepikilepa Akolali patu kautakoane meku toa kiwika kautakoa meamele too wa toto kamo takou toa toka. Nipa papete ali atoame itonoke ele kule poanele toada wa wene pia tokoileme kiwika moa koigakaya kekatekoa petoa pomotoa tokome ni toka. ⁵ Keraisyuo nitikano, onekele takama yaketepa meane epetekateku toane meada wa wili toa meamene. Nitoapa eni toateku peku noada wa noa tamene. ⁶ Eni peku noa tikilepa nipa uutukoane poti yawane

piou wa wene pia tamene. Ni uutukoa poti yawa pitikilepa ke enekakolo mekeneka toatekule pa toane togou wa wene pia tamene. Nitoapa Akolalinele-kama takou wa oneke nate wene pia tamene. ⁷ Nitoapa Keraisuno ali atoapa kini wamene laine-mikiti tetepo takoa meamene. Nitou wa ali atoa peyake wene mekoa meamene. ⁸ Enika eni toatiki peku noa tagaketepa nipa tone Ali Muno Yesu Keraisu wene tootapeneya mekete onekele takama yakilepa pata pale takameneya wedoa toi. ⁹ Enika eni toateko peku noamoko agopa leneta lianeya meou toa pa mekolo uku. Akolaliyo one namolo tane poanele moa kogatapekaleka wene kayapeaneya mekolo ni uku.

¹⁰ Nikepa anu oya-lawe kipala eya wane uku. Akolaliyo one papete wene toopikanakale taatekoa tokome kiwi kayo oa takoa motaneyano, kipa one wa pikoa memotono, wedoa meamene-ye. Nitiketepa oneketa poadete pekete etepea paka pikile toamoi. ¹¹ Nitoa mea togakolipa toto toa motoko ago Ali Muno Yesu Keraisyuo one talo toanekala kama puku take noatino, noe wa kiwi pupu poi mou toa makutukoa moo.

¹² Nitoo tokolo tekene einaka einamopa i i wane kiwi wene taka taka tou. Kimepa enika eni niminimo wete yakoa moa lauane lauane toa mekiyake nitou. ¹³ Nipa no tuameneya pa mekenepa kipala ina ukule tamene wane tika tika tamele tokolo tekene eina niminimo wene taka taka tou. ¹⁴ No tuateku tigotokonono wene tekene nitou. Tone Ali Muno Yesu Keraisyuo no tuatekou wene takaka tokolo ni uku. ¹⁵ Nipa no tuutukaneyake kipala i uku toa-kama agopa moameneya memotoane tekene papete pine i i wane keleyo wiane mekada wane wili toane meou.

Keraisu Pa Tootapeneya Kakale Enanemo

¹⁶Tone Ali Muno Yesu Keraisuyo telekole toma yakamo-pala one wakapea noatekamota totome kipala toawe a ikilepa tone kaua-mikitame wene kibututukoa akene la agale wamokoona. Nitamekete toto Aposelo ali-kitame enekoomo-kama okoona. One pa teleta tootapeneya kakale totome enekoona, yakamene. ¹⁷Einapetepa eya toka. A tibuke pa patu mekoyame agale ludu witakome okome winagopa anu kolotini ago anu managono, one tokoleke kolotine meku wa oka. Nipa Atai Akolaliyo one kei eni pikomepa pa takalogaka. ¹⁸A tibuke agale ludu witakome okale totome yatekilepa Akolaliyo mana-pala ko oateku tono wane i wa takoa motane tono tobou waneke Keraisu-pala odeneka kakete yatekoo.

¹⁹Nipa ipa Akolaline agale toawe a akane ali-kitame Keraisuke papete oa plane toa taatekoa tokono, nimini agale akedeki wa totome yakoa wene tokoo. Koobu tagoi kini tepene wini witia nou toa kini toawe a akane agalemepa labo toleme keneya yomiyomu keneke poatiki ka i i wa pa takoa ta patakanoona, Keraisu einago wete wakapea noameneyake nitoona, kini agale yakoa litiamene. ²⁰Eya waneka tobou kakoane ukuno, yakamene. Akolaline bokuke wia mekapiane agale pade padameka one weneme pine ina ina wa amele toamoko wa wene taneya meamene wane uku. ²¹One agale toawe a akane ali-kitame einaka einamo oa pikilepa kini weneme toameneyake ni uku. Akolaline agale toawe a akakilepa Epetane Yominiyo wene takane toa-kama toawe a akaneya.

Kapene Tikisa Ali-kitike Pubu Akenemo

2 Papetepa Iserele yatene ali pade-kitame Akolaline agale toaweane akaku wa oake kapene wakoa okala taneya. Opika kiwi pakeke dikane kapene tikisa ali-kiti paigakoa keneya note menoi. Nitoapa Keraisunomo moa koigoa i i wa olaukakilepa ali atoa Keraisuke wene tugoa meake wamotoa toi. Kiwi oto toa motane Ali Muno agoka kote tokale waoi. Nitoa kakoika Akolaliyo kotikatapea kibu moo. ²Nitatekoyake ali atoa kainya matiyame ee nimini iki wa eni yename ya tanele tokoile etepea litia toi. Nitikoli enekete ete-kitamepa Keraisuno yatenameke tiki wa Keraisu yoto pitia nimini peku noa tikimopa pamo tetepo takoa wakala toi. ³Lede kime kue eya memotoa eni kapene tikisa-kitame kini titia okoi agale i i wa kiwi oa yotokakala toi. Akolaliyo eni ali-kiti kibu mou wa atu piameneya mea tigotokoa layo pitikatekoyake nitoi.

⁴Akolaliyopa one poanele tane edelo ali-kiti wipitia ta pataka-pete kiwi kibu mouno, nepiamene wa eya taneya. Poane take moa wetekakomepa yomiyomu ti mati kakene koa-kiti keneke moa pitikaneya. Nipa one edelo yatene ali-kitike Akolaliyo ela moamokome taneya. ⁵Ni pade namolo namolo one peku noamadete wakene yename waye wa okolika ueme nidikoa moa-kala pomotoa wakeneya. Nitoapa eya ago Noa ali atoame kiyo akenele toatekoile i i wa mo wia kakene ago ni one yatene ali atoa tatono (7) kakoa-pala kiwi meati wa eni yene odene toa motaneya. ⁶Ni papete Sodome Gomora tata toeme napemotoa wakilepa one peku noamadete wakoi yene peya kiwi kibu mou wa eni wipitikome toateka adeka pikome taneya. ⁷⁻⁸Wene kiyo akene ago Lote einago

Sodome take mekome enekale eni take meane yename pamoko atoa koua pia ni ali yatene wa atoa latikoa koua pia enika eni poanele tokoli enekome wene poaneya meaneya. Nipa eni yene pakeke mekilepa ta pataka abuna poanele toa poanemo oa toa kakoli enoa yakoa tokome Lote einago tepe we tokale meaneya. Nitane agoka Akolaliyo toa motaneya. ⁹Nitaneyano, opika onekele takoa meki yene ke enekakolo mekika toa moa ni poanele toa meki-kiti kipa wipitia ta pataka-pete kibu mouno nepi-amene wa pikoa kawa tamele tadeko. ¹⁰Kibu eni motokomewa kuni poane wene witako toa toada wa ele kule poanele toa ni ta talo tiki yene paya tetepo takoa wawa tiki ali-kiti takoa dika dika toamene tete meademe toko.

Eni kapene tikisa ali-kiti kabe teleme wia piki toa tekete a tibuke meki edelo ali-kitika taumada tamene piti moameneya meki. ¹¹Edelo ali-kitame ele kule telekole tekete eni kapene tikisa ali-kiti oyake moa patukamele tokoyake ete taumada toamiki. Nipa kuni poanele tikimo i i wa edelo ali-kitame kapene tikisa ali-kiti koiso akakilepa Ali Muno kakakoa potimo oa tiki. ¹²Eni kapene tikisa ali-kiti yoko keneya yawa pitiki. Yoko eyapa alime wako yukoa labakoa moa tukadete tikilika paya nou toa kuni wene witako toa-kama litia tiki. Edikaki toa eni kapene tikisa ali-kitame emo kumo wene toamikimopa pamo tetepo takoa tea oa tikilepa Akolaliyo kibu moa atukademe tokoloka paya nou toa tiki. ¹³Eni yename yete pade ali atoa tete mema yakike tete oto wa moadete tiki. Loyo mekete bia ue nee eya nokoa kakilepa kuni wa wene epetekatekole enino tatoe wa tiki. Dikaki yename anu oya-lawe kupalaka mekete nee nato wa koukoua mea potokakete kiwi ya takakala tiki. ¹⁴Nipa atoake lene kaki ali-kiti tokome poanele toa-kala kawa kilikoa

meamele toamokolo yaki. Ni Keraisu patu wedoa kautakoa kawamiki ali atoa likoa enekala tiki. Ni kamoya eya tepikama moa kakete eya kuya motekete toatikile wene toa mokala tiki. Akolaliyo kiwi kote tokolo waku wa wia atukateko ali-kiti eni. ¹⁵Nitima yakilepa Akolaliyo yametane ka kiyo akene ka pa pimotota etepea puku pekete toa tiki. Nipa eyago Belame Biono mana agome kue moadene poanele oyake tuku wa wene pia tane toa tiki. ¹⁶Belame einagome poanele eni tokale enekome one mea pekene dogi kaimepa alime agale oko toa mena wa kikoa akaneya. Nipa Akolaliyo agale toawe akane ago Belameyo leau akeneya mekome tanele one dogi kaime ketekakome akeneya.

¹⁷Eni kapene tikisa ali-kiti eya tou toa tiki. Toa yoa teigane ue lene keneya ni pupulegemewa popokoa aua pekene wedo keneya ele kule tikilepa pale-kama tiki. Dikane yenewa Akolaliyo yomiyomu ti matike mea kamotou wa wene toopianeya. ¹⁸Dikane yename agale muno pewe kakoa akene tetepo takoa ikilepa pamo-kama iki. Nipa poanele toma yaki yene pene tewitikoa wakene ali atoa likoa enekete ekete mone koua piamatiki yene oyake koua piamele toko wa eni poane peku lawetekala tiki. ¹⁹Nipa kuni wene witako toa-kama atiki toa tamele tokono, tamene wa olaukoa ikilepa kuni wene moa koiganeleme moa labakaneya meketeke iki. Panago one tokoleme pinali one wene moa labakakolopa nipa enile toko patu kolago taneya meko. ²⁰Ae, panagome-kiti Ali Muno toto toa motoko ago Yesu Keraisunomo yakoa mootokoa itonole ele kule poanele tewitikoa petoa pokoyake wa enika eni poaneleme einago wa moa kautakolopa eya toko. One namolo poanele patu mekome tete motokana toa moa patukoa dika dika toamene tete motoko. ²¹Ae, einagome Keraisu

yoto pitia kiyō akenele toma poateko ka ludu pegene kakoa wakome one totono tewitikoā puku pokome toapa dika dika toamene tete eni moatekoyano, nitikaya tokale eni ka ludu poamoo tokapa epetoo toka. ²² Dikakilekepa eya wa pedoa ikimo uku. *Tueme-kiti one nee kapelogoā pomepa wa naniko einata wa wakapea pome nopoko. Ni kai-kiti yapu pimitokome one peke pia kakota wakapea pome waka peke pipokala toko.*

Ali Muno Ago Wakapeane Nou Wa Oa Pianemo

3 Anu kolutini yene i pipia kiwike wini wiane wetekakilepa taku takoane wiane wetekaku-ye. Nipa odene wene pianeya memotoane tekene kini yakoa motokoinakamo wa wene takoane uku. ² Nipa papete Akolaliyo one wa takoa motane ali-kitame one agale toaweā akanemo ni toto toa motoko ago tone Ali Muno agome tamene wa okana toa kini Aposelo ali-kitame i i wa oa metekoinakamoka wene takakene uku-ye.

³ Titikenepa eya wene taneya meamene wane uku. Wipitia ta patateka tigotokale pade ali-kitame kini weneke e ku poanele witaka toa litia tokala toi. Nitoapa kiwi mekika wida nekete eya wa tegene matoa oi. ⁴ Einagopa wakapeane nou wa oa pikana toa taatekoa noko patu. E'e, noamoo. One nomotoa toneketai-laweme nepia mea wete tukala taneya. Ni itono patu pia kawa toko peyapa Akolaliyo tititikakome latia pia kakoa tane toa eko adini moameneya pa pia kawa tokono, weneya latiademe Keraisu edoa nomotoa-pe wa pade-kitame oi. ⁵ Dikane yename nimo ikilepa Akolaliyo eya tanele wene teketeke toamene tetepo takoa oi. Namolo namolo Akolali one oka agaleme a tibu latia pianeya. Ni itono latikilepa ue moa latia pianeya.

Nitoa ue meeloganeta ate witakoa muke koukoa pianeya. ⁶ Wa naniko eya ago Noa meane-pete eina uemepa itono kautawia atukatapeneya. ⁷ Opi tibu itonota-pala padele toameneya pa pimotoa one eina agaleme pa yopia mekilepa eya toateko wene toopikome toko. Wipitia ta patakale ali atoa takoa eneka-pete onekele takamene yene wawane atukoanepa tibu itonota toeme napetapemotou wa wene toopia yopia meko. Nitikonono, Akolaliyo one oka toa-kama taatekoa toamoko wa pade-kitame ikilepa kapene agale eni iki.

⁸ Anu kolutini yene kime eya wa agopa moameneya meamene. Ali Muno agome ta pataka odenepa ege wakala kadukoa penane (1,000) mali tetepo takoa ni ege wakala kadukoa penane (1,000) malipa ta pataka odene tetepo takoa meko. ⁹ Nitikoyake pade-kitame eni wene toamekete eya wa iki. Ali Muno agome tou wa papete oa pikana toa wete taatekoa tokoya mena wa iki. Etene taatekoa toatekoyake kiwi odene agoka tua atukaya tokolo ali atoa peya kini poane wene wia wamotoa nepia mekilepa tigotokoa layo wete pitikamokome poti nepia-kala meko.

¹⁰ Ali Muno agopa nitane agono, wakapea noo-li. Kode ago likonu yomiyomu keneke kotikatapea noko toa noo. Nitika-pete a tibu bu wa kiliwia takoa poo. Ni tibu ludu pia kawa toko peyapa toeme noa kakale takoa pootapeoo. Itono ni itono patu pia kawa toko peya-pala toeme napetapeoo. ¹¹ Enika eniya peyapa toeme napetapekale takoa poono, Akolalilinele-kama takama pato wa kiyō akenele toma pamene. ¹² One noateko ta wete pata pata wa edikoa nepia-kala meamene. One eni noka-pete a tibu toeme nootapeoo. Ni tibu ludu pia kawa toko peya ue latia takoa pootapeoo. ¹³ Nitatekoyake Akolaliyo

tou wa oa pikana toa taatekoa tokale weneya tibu itonota witoo. Nitoono, eidapa kiyo akenele toatekoi peku-kama nakoi yene mea kawaino, ke wa totome nepia-kala meko.

¹⁴Anu kolotini yene kimepa enile tokale nepia mekete tikino, Akolaline leneke kakete kini wene moa koiganele toamoa ni ete yename padeya namike akoa agale oatikile toamoa tato wa one-pala odene wene piitikoa meamene. ¹⁵Ali Muno agome tigotokoa layo pitikamokomepa nipa kini poane wene wia wakoli toane mou wa wene pikome ni toko wa wene taneya meamene wane uku. Tone oyago Polo einagomepa Akolaliyo wene takane toa kiwike odenemo wini wia wetekanemo uku. ¹⁶Polo einagome pipia wia mekakome-kama enika enimo oa mekala toko. Enika enimo oa metekilepa keleyo pitiganeya

piamokomoka oa meteko. Poloyo eni keleyo pitiganeya piamokomo oa metanemopa wene toamene yene ni wene takuta pia tiki-kitame moa koigoa olaukaki. Nipa Akolaline agale padekapa moa koigoa olaukaku pekete tiki toa Poloyo oa metanemoka moa koigoa olaukaki. Nitoa mea tua atuadete tiki.

¹⁷Ae, anu kolotini yene kipala i ukumopa kime wete yatekoinano, kiwi poapeneya kakita Akolaline totono tetekoa poanele tiki-kitame kapene agale oa kiwi etepea lia aua pokayano, wedoa meamene-ye. ¹⁸Nitoapa tone Ali Muno Yesu Keraisu toto toa motoko agome pewe witikome peku laweteko toa noa toma pamene. Opika naniko nanikoka one kei pia-kala katoane uku-ye. Ee nimini.

Opa anu agale eni.

1 YONE

Yoneyo Namolo Takoa Wia Wetekane Pipia

Ali Atoa Meemoa Poatiki Peku

1 I pipia wia mekoa meketepa Akolaline agale wa ibini akene ago Yesu ko oko. Nipa ali atoa mea kama pomotoko ago ko oko. Tibu itonota wete latia piameneyake einagopa pa mea kama nekeneya. Einagopa one oka agale tone kaleme yakoa one toma yakale tone leneme enoa tokoo. Tone leneme-pala nepikoa pia tone yoname mitikoa tokoo. ²Toto mea kama pomotoko ago taatekoa nokale tone leneme enekoo. Tone leneme enekoole i wa kipala toawe a oko. Einago pa mea kama nikilepa Atai Akolali-pala odenekata-kama opia meemoa nekeneya. Ni agopa toto mekoota taatekoa noka. ³Eni nokapa tone enoa yakoa tokooya i i wa kipala oa meteko-ye. Nipa toto Aposelo ali-kiti-pala odene wene pianeya meatoa ni oko-ye. Nipa toto Aposelo ali-kiti Atai Akolali mana Yesu Keraisuta-pala odene wene piitikoa meko toa nitatoa oko-ye. ⁴Kipala i i wa wia mekoa wetekakilepa toto wedia meateko kotu kakoa meadete toko-ye.

Akolali Onepa Pa Pine Ago

⁵Kipala i oa metekomopa einago nokome toto-pala okana i i wa kiwike oa wetekakona-ye. Eya wa oka. Akolali one pa pine ago tokome yomiyomu dedeyaka toameneya meko. ⁶Akolali one-pala odene wene pianeya meku wa oake wa yomiyomu kenekedo yawa meketepa nipa kapene agale eni oa niminileka toamoa toko. ⁷Nitameketepa Akolali pake-kama yako toa totoka yawa

meketepa nipa odene weneta piitakutukoa meko. Nika mana Yesu Keraisuno kamateme tone tokoo poanele peya moa koikatapeko.

⁸Poanele tikileka toamuku wa eketepa tone wa oa yotokakete toko. Nitiketepa Akolaline agale one nimini peku tone tepene luameneya pa meko. ⁹Nitameneya tone toko poanele Akolali-pala i i wa toawe a okolopa nipa kiyo akenele-kama toko ago tokome eya toko. Tou wa okale-kama tokome tone toko poanele oi moa po letu mekakana keetapea wawa ni tone eni poanele peya kogatapekala toko. ¹⁰Poanele padeleka toamuku wado eketepa nipa Akolali kapene ago tetepo takoa one oka agaleka tone tepene moa luameneya pa meko.

Toto Auapeko Ago Keraisu Akenemo

2 Anu mati deya-kiti i agale wiane wini wetekakilepa kime padele poanele takaya tokolo ni tuku. Panagome-kiti poanele tokolopa toto kei piko ago Yesu Keraisu kiyo akenele-kama toko agome tone kowitikako. Nipa toneketai Akolaliyo yakakoa kowitikako.

²Keraisu einagome Akolaline wene kekakademepa tone toko poaneleke tuaney a. Nipa one tigni Akolalike mea lodo you toa tuaney a. Nitoa tone toko poaneleke odene tuaney a mena. Ta piko peya pitikoi-kitame tokoi poaneleke tuaney a. ³Akolaliyo tamene wa akene toa totome litia toma peketepa nipa ee nimini Akolali wene taneya meku wa amele toko. ⁴Panagome-kiti Akolali wene taneya meku wa oake oneme tamene wa akene toa tetekoa litia toamokopa nipa kapene ago eni. Akolaline peku noamokoya tokome ni toko. ⁵Panagome-kiti Akolaliyo tamene wa akene toa litia toma pokomepa Akolalike wene mekoa togateko kotu

kakoa eni toko. One agale-kama yakoa teketepa nipa ee nimini Akolali patu kautakoane kama puku wa totome wene toko. ⁶Panagome-kiti Akolali patu kautakoane kama puku wa okomepa nipa Yesu Keraisu itonoke mekana toa oneka meamedeko.

Yoneyo Weneya Totonu Yametanemo

⁷Anu kolotini yene kini toatikimo kiwike wini wiane wetekakupa weneya totono titiane yameamuku. Kini Yesunole titia takakete yatekoina totono i lokoane uku-ye. Eina namolo totonopa kime namolo takoa yatekoinakamo uku. ⁸Enipa namolo yatekoina totono wane ukuyake weneya totono keneya yameteku. Yesu itonoke nome mekome titia toka toa kiwika pa dikoa tomoa pekete tikimoke uku. Nipa yomiyomupa ete toa toma pokome kamotoa eni nimini pa wete toa kakolo ni uku.

⁹Panagome-kiti eni pake weneya totono litiane tuku wa oake one oya ago-pala kotimi yoa mekomepa opika yomiyomu keneke pa yawa meko. ¹⁰Panago-kiti one oya agoke wene mekoa mekomepa pake eni yawa meko. Dikako ago one tepene poane wene piameneya tokome ogo witikolo kaiapitakaya wa piti moamoko. ¹¹One oya agopa-pala kotimi yoa meko agopa yomiyomu keneke yawa meko. Nitoa pameneka agopa tootokaneya yakilepa eni yomiyomume leneta likatapeneya tokome one poatekoka tatanu po yatekakolo yawa meko.

¹²Anu de mati-kiti i agale tigini kiwike wini wiane wetekakilepa Akolaliyo kini tokoi poanele oi moa po letu mekakana keetapea wakilepa Keraisu ibinike tokolo ni wiane wetekaku. ¹³Etene-mikiti kimepa itono tibuta wete latia piameneyake pa mea kama nekene ago wene taneya mekili tekene i agale ni oane wetekaku. Tuali-kiti kime poane

peku pine ago wete moa kawikaneya tokolo i agale oane wetekaku. Mati yatene i agale kiwike wini wiane wetekakilepa Atai Akolali wete wene taneya mekili ni tuku.

¹⁴Etene-mikiti kiwike i agale wini oane wetekakilepa padeya padeya wete latiameneyake pa meemoa nekene agopa kime wene taneya mekili ni tuku. Tuali-kiti kiwike i agale wini oane wetekakilepa kini eya tikileke ni tuku. Kiwi tele tootapeneya mea ni Akolaline peku noa toa ni poane ago Setanu moa kawikaneya mea tikili ni tuku.

¹⁵Itonokeka ni itono patu pia kawa tokaya-kitikeka wene piitikaneya meameamene. Enika eniyakedo wene piitikaneya meketepa nipa Akolali wene toamiki. ¹⁶Poane yename ele kule poanele toadiya wa wene pia mea ni leneme eya kuya moadiya wa tepi moa ni eya kuya kamoya i motuku toa kimeka moati wa mate agale oa ni ele kule itonole toa tikilepa Atai Akolaline peku noameneya itono peku-kama nakete ni tiki. ¹⁷Itonopa takoa poatekoyake tiki. Nika ali atoa itonoke mekete eya kuya moadiya wa wene pia motikiya-kitika takoa pootapeoo. Nitatekoyake Akolaline wene pikole litia toko agopa pa mea kama poademe toko.

Keraisu-pala Pine Wia Poi Teigo Ago

¹⁸Anu mati-kiti wipitia ta patateko tigotoma noko. Keraisu-pala poi teja meko ago noademe toko wa oa pianemo kime yatekoina. Eina oa plane toa Keraisu-pala poi teigi yene kainya mati wete taatekoa nokala taneya. Nitaneyano, wipitia ta patateko tigotoma nekedeko wa totome wene toko. ¹⁹Eni yene toto pakeke meake tewitikoa wakilepa toto yatene toameneya tokome ni tokoi. Nitane yenepa toto yatene too tokapa nipa toto-pala odeneya pa

mea kawei tokake e yenepa toto yatene toameadeko wa wene tomotoa tekete ni wawa pokoi.

²⁰Anu oya-lawe kime pade edikoa meamiki. Epetane Yomini kiwike awia tagatapemotoa wetekaneya tokome kiwi peyame Akolaline nimini peku wene toa naki. ²¹I agale wiane wetekakilepa kime one nimini peku wene toameneya meki wane wetekakuya mena. Kime wene taneya mekino, i agale oyake yakoa moi wane wene tekene wetekaku. Kapene agalepa nimini pekuke titia noamoko waka wene taneya meki.

²²Kapene wakako ago te-pe. Yesu onepa Akolaliyo kakapiane ago Keraisu mena wa oko agopa kapene ago eni. Dikane agopa Keraisu-pala poi teia meko ago. Atai Akolali-pala mana Keraisuta einagome wakome wako. ²³Mana Keraisu wako agomepa etene Akolali-pala dekoa wakome wako. Keraisu onepa Akolaline mana wa oko agopa Atai Akolaline yatene ago eni.

²⁴Yesunole titia takama pekete yatekoina agalepa kini tepene pa luaneya meamene. Nitiketepa mana Keraisu Atai Akolalita-pala lipua mekete toi. ²⁵Keraisyuo kiwi auapekene dikou wa oa pikilepa toto mea kama poatekomo eni oa pika.

²⁶Kipala i agale ikilepa kiwi oa yotokoa enoai tiki yeneke uku. ²⁷Keraisyuo Epetane Yomini kiwike awia tagamotoa moa wetekaneya. Opika kiwike pa awia mekolokakono, padameka ipa poanele ipa epetanele wa kiwi wene takatiki toa mena. One Epetane Yominiyo-kama pademo pademo wene taka taka tokolo ni uku. Wene taka taka tikilepa niminimo-kama wene takakoya. Kapene agaleka wene takamoko. Keraisu-pala pa lipua meato wa one eni wene takaka toa litia toma pamene.

²⁸Opi anu mati deya-kiti kipala eya waneka ukuno, yakamene. One-pala lipua-kala meamene-ye. Nitoa meketepa one wakapea noka-pete one kakaya liti pamene ya toameneya atiki toa meoi. ²⁹Akolali onepa kiyo akenele-kama toko ago wa wene teketepa nipa kiyo akenele toma yaki peyapa one mana kono-mikiti waka wene toi.

Akolaline Mana Kono-mikiti

3 Atai Akolaliyo totopa one peku matikiti wa moa latikakano, totoke etene wedoa wene mekoa mea tadeko-loo. Ee nimini, totopa one mana kono-mikiti. Itonole toma yaki-kitame totopa dikane ali atoa tadeko wa agopa tokolo pa meki. Nipa Akolali wene toamekete tekete toto-kitika wene toamiki. ²Anu kolotini yene totopa Akolaline peku matikiti wa wene tokoyake naniko mekete toatekole i wa agopa tokolo meko. Eni agopa tokoloka one wakapea nokalepa one keneya latitapeneya meoo wa totome wene toko. Tone lene pogakoa enekete tekete nitaneya meoo. ³Keraisu nokale edikaneya meouno, ke wa nepia meki peya poane wene takoa koikatapeneya meada wa Keraisu meko toa wene kiyo akeneya meki.

⁴Poanele toko agomepa nipa Akolaline totono tetekoa toamoko. Padele padele tokoi poanele peyapa Akolaline totono tetekanele. ⁵Keraisu taatekoka nikilepa tone tokoo poanele kogatapeademe ni nekeneya. Nitane agome poanele padeleka toameneya wa kime wene tiki. ⁶One patu kautakoa mekitame poanele tekete-kala meamikiya. Poanele pa tou wa wene pia toma yako agomepa nipa Keraisu enamo a onepa Akolaline mana wa wene toamo a toko.

⁷Anu mati deya-kiti pade-kitame kiwi oa yotokakayano, eya wa wene taneya meamene. Kiyo akenele toma poko agopa wene kiyo akene ago eni.

Keraisuyo kiyo akenele toma poko toa onemeka toko. ⁸Poanele pa toma yako agopa Setanuno yatene ago eni. Setanu einagome namolo namolo titimoa poanele-kama toma nekeneya. Akolaline mana taatekoa nikilepa nipa Setanuyo poanele-kala tanele wia agopa takatapeademe ni nekeneya.

⁹Akolaline mati-kitame poanele pa toma yawamikiya. Akolaline peku nakeneya tokome poanele totono litia tamele toamoko. Akolaline peku mati-kiti tokome poanele toma yamele toamoko. ¹⁰Akolaline peku mati i, Setanuno peku mati i wa totome takoa enekilepa eya wa wene taneya mekete toko. Kiyo akenele toma yawamoa one oya-laweke wene mekamoa toko agopa Akolaline peku mati mena.

Ete Oto Wa Wene Mekanali Yoma Pamene

¹¹Tone tone wene mekanali yoma poatekomopa i i wa Yesunomo tititikakete olaukane toa kime yatekoinano, nitatoane uku. ¹²Eya ago Adamene mana Keineyo tane toa toamato. Keine einago poane agono peku nakene ago tokome wamene ago Ebele wia tukaneya. Dekale wia tukaneya-pe. Poanele toma yakome tokome epetanele toma yakene ago wamene ago Ebele-pala wene poaneya mekome ni taneya.

¹³Nitane toa itonole toma yaki-kitame kipala kotimi yoa mekolipa wene kainya piameamene. ¹⁴Totopa tuatekoo peku lawetekagoke lukoa mekoota tewitikoapa meemoa poateko peku lawetekagoke lukoa menadeko wa totome wene toko. Tone oya-laweke wene mekoa mekete tamele toko wa wene toko. One oya-laweke wene mekamoko agopa one tuateko peku lawetekagoke pa lukoa meko. ¹⁵One oya ago-pala kotimi wene luko agopa

ali wia tukaka ago tetepo taneya meko. Ali wia tukakagomepa meemoa poateko peku noamoko.

¹⁶Yesu Keraisu totoke tuaney. Nipa ete ali atoake wene mekakete toateko adeka pia tuaneyano, tone oya ali atoa wateaney kamotoa totoka edikoa tuamedeko. ¹⁷Kamo agome-kiti one oya ago ponopene ago padeya-kiti toamokolo enekomeke ela moamoa padeyaka meamokomepa nipa Akolalike wene mekoane meateku peku naku wa edoa omotoa-pe. ¹⁸Anu kolotini mati-kiti pa kabunume i ago i atoa neeke wene mekoane meku wa wamato. Neeke wene mekoane meku wa yete pade ali atoa mama moa auapeato.

Akolaline Leneke Atiki Toa Meatekomo

¹⁹Edikama yaketepa nipa nimini peku laweteko agono mati mekene ni tuku wa totome amele toko. Nika Akolaline leneke tepe kolotini kilikoa pimotoa meamele toko. ²⁰Nipa tone tepeme toto kikoa akakoloka Akolaline leneke atiki toa meamele toko. Tone tepeme tone tokole kiyoke-kama takoa enoa akakile toamokoyake Akolaliyo kiyoke-kama takoa enekala toko. Padele padele peyapa oneme wene tootapekome tokome toto pa puputua akamoo. ²¹Anu kolotini yene tone tepeme toto kikoa akamokolopa Akolaline leneke atiki toa meamele toko. ²²Nittoa mea i i wa one kowitikolo oneme yakoa tootapekala toko. Oneme tamene wa oko toa litia toa ni one wedikatekole toa tokolo tokome tone kowitikole yakoa toko. ²³Eya tamene wa oneme oko. Mana Yesu Keraisu ibini wedekoa oneke wene tugoa mea ni Keraisuoka toa ete oto wa wene mekanali yoma pamene wa oko. ²⁴Akolaliyo tamene wa oko toa litia toko agopa Akolali-

pala lipua meko. Akolalika einago-pala lipua meko. Akolali toto-pala lipua meko wa totome wene tokopa one Epetane Yomini wetekakale awinome mekome wene taka taka tokolo ni wene toko.

Epetane Yominike Akenemo

4 Anu kolotini yene kipala eya wane pubu uku. Ali kainya matiyamepa Epetane Yominiyo wene takaka toane uku wa eketeke kapene agale oa pupitkama yaki. Nipa Epetane Yomini awitaneya mekene uku wa iki-kitipa ee nimini iki wa mekamotekete pitakete wameamene. Kiwike awitane yominipa Epetane Yomini patu, pa yomini patu wa takoa enekala tamene. ²Yesu Keraisu itonoke nikilepa ali latitapea nekeneya wa oko agopa Akolaline Epetane Yomini oneke awinome mekale tokome ni oko wa totome wene toko. ³Yesu Keraisu ali latitapeneya nekeneya wa wamademe wako agopa einagoke kapene yomini awinome mekale ni wakome toko wa totome wene toko. Eni kapene yominipa Keraisu-pala pine wia poi teja meko agonono yomini. Einago noono, nepiamene wa pubu akenemo yatekoina toa eni taatekoa nekedeko.

⁴Anu mati deya-kiti kipa Akolaline peku mati-kiti tekete Akolalinemo koigoa kapene yokoa okoi yene wete moa kautakoi. Nipa itonole tiki yeneke awitane yomini moa patukako Epetane Yomini kiwike awinome mekale ni tokoi. ⁵E kapene yokoa iki yename itono peku noai tekete itonomo-kama okala tiki. Nimo-kama ikili tekete itonole tiki yenamepa yakato wa yakoa motiki. ⁶Totopa Akolaline peku mati-kiti. Akolali wene tiki yename tone okomo yakoa motiki. Akolaline peku noamiki yename tone okomo yakoa moamiki. Tone okomo yateki yenepa nimini peku lawetekagono Yomini kiwike awinome mekale ni yateki wa totome wene toko.

Yakamiki yenepa kapene peku laweteko agono yomini kiwike awinome mekale ni yakamiki wa totome wene toko.

Akolaliyo Wene Mekanele-kama Tokomo

⁷Anu kolotini yene tone tone wene mekanali yoma patoane uku-ye. Panago one oya-laweke wene mekoa mekilepa nipa Akolaliyo titia tanele eni toko. Nitoo meko agopa Akolaline mati. Einagomepa Akolali wene toko. ⁸Akolali one tanele tokome ali atoake wene mekoa-kama mekono, one oya-laweke wene mekoa meamoko agomepa Akolali wene toamoko. ⁹Akolaliyo toto meemoa pomotoa tokome mana odene ago itonoke moa wetekaneyano, totoke wene wedoa mekaka matiyame tadeko-lo. ¹⁰Nilepa ali atoa toto oneke wene mekakole mena. Totoke wene wedoa mekoa mekome eya taneya. Tone toko poanele takoa mitikademe pinali one tigini lodo you toa tumotoa one mana moa wetekaneya. ¹¹Anu kolotini yene Akolali totoke wene wedoa mekoa mekome enile taneyano, ke wa tone tone wene mekanali yoma pamedeko. ¹²Padameka Akolaline lene timini enkilepa toameneya. Padameka enamikilika tone tone wene mekanali yoma pokolopa Akolali toto-pala lipua meko. Lipua mekomepa totoke wene mekoa meateko kotu kakoa wene mekoa meko.

¹³Akolaliyo one Epetane Yomini totoke moa wetekaneya tokolo eya wa wene toko. Totopa one-pala lipua meko. Onepa toto-pala lipua meko. ¹⁴Nika tone leneme enekoona eya wa toaweaa oko. Atai Akolaliyopa itonoke meki yene toa motokoano pa wa mana Keraisu itonoke moa wetekaka. ¹⁵Yesu onepa Akolaline mana wa toaweaa oko ago einago-pala Akolali lipua meko. Einago Akolali-pala lipua meko. ¹⁶Akolali totoke edikoa wene wedoa mekoa mead-

eko wa wene tekete one patu kautakoa kako.

Akolali one tanele tokome ali atoake wene mekoa-kama meko. Eko ali atoake wene mekoa meki yenepa Akolalipala lipua meki. Nitiki yene-pala Akolali lipua meko. ¹⁷ Akolaliyo tone tone wene mekanali yoa tagateko wene toopikana toa eni tomotokopa nipa ali atoa takoa enoa akateka ta patakapepete kibu moamene piti moameneya atiki toa memotoa ni toko. Totopa itonoke Keraisu keneya mekono, kibu motokaya wa piti moateko toa mena. ¹⁸ Eko ali atoake wene mekoa meketepa nipa kibu motokaya wa piti moateko toa mena. Eko ali atoake wene mekateko kotu kakoa wene mekaketepa nipa piti takaketikoa wawa kilikoa meko. Panagome-kiti piti moa mekilepa nipa one poanele tokake kibu motokaya wa piti moa meko. Piti moa meko agopa nipa eko ali atoake wene mekateko kotu kakoa wene mekamoko.

¹⁹ Akolali totoke wene mekoa mekilepa one weneme titia taneya. Nitaneya tokome toto oneke ete wene mekoa meko. ²⁰ Panagome-kiti Akolalike wene mekoane meku wa oake one oya agopala kotimi wene luaneya mekopa nipa kapene ago eni. One leneme eneko agopala kotimi wene luaneya mekomepa nipa one leneme enamoko ago Akolalike etene oyake wene mekamele toamoko. ²¹ Keraisuyo tone litia toateko totono yametekome eya wa oka. Akolalike wene mekoa meki yenepa kini oyalawekeka wene mekoa meamediki wa oka.

Yesuke Wene Tugoa Meketepa Itono Peku

Naki-kiti Moa Kautamele Tokomo

5 Yesu onepa eina Keraisu wa papete ibini oa plane ago tadeko

wa wene tiki yenepa Akolaline mana kono-mikiti eni. Nika eteneke wene mekoa meki yenepa one manakeka wene mekoa meki. ² Akolalike wene mekoa mea ni oneme tamene wa oka toa litia teketepa nipa Akolaline matikitikeka wene mekoa meadeko wa totome wene toko. ³ Akolaliyo tamene wa oka toa litia tikilepa nipa oneke wene mekoa mekete tekete ni toko. Oneme tamene wa okalemepa tone wene moa keda takamoko. ⁴ Ni edoa-mo. Itonoke ele kuleme ali atoa likoa enekakolekiti Akolaline mana kono-mikiti peyame ete pedekamele toko. Nipa tone Akolalike wene tugoa mekete tekete nitamelele toko. ⁵ Itonoke ele kuleme ali atoa likoa enekakolekiti teyo ete pedekamelele toko. Yesu einagopa Akolaline mana wa wene toko agome odene ete pedekamelele toko.

⁶ Yesu Keraisu itonoke nome mekomepa ue moa ni kamate pomotoa tuka. Einagome ue odene motoka mena. Ue moa ni yomo lekaneyake wia dekakoli kamate ponomotoa tuka. Enile tokagopa Akolaline mana wa Epetane Yominiyo toto wene takako. Epetane Yominiyo niminimo-kama oko ago tokome ni toko. ⁷ Yesu onepa Keraisu wa papete ibini oa plane ago tadeko wa totome wene tomotoapa eya tebolome tiki. ⁸ One Epetane Yomini one motoka ueta one penane kamate toa eniya-menane odenele tane tetepo tokolo onepa Akolaline mana wa toto wene takakala tiki. ⁹ Ete yename-kiti kini leneme enekoimo i i wa toaweake ikimopa totome yakoa motoko. Nitikono, Akolaliyo akenemopa totome etene tobou kakoa yakoa moamedeko. Einago Akolaliyo Yesu einagopa one mana wa akeneya. ¹⁰ Akolaline manake wene tugoa meko agomepa Akolaliyo mana Yesuke akenemo nimini akedeko wa onekemo pikoa kako. Akolaline

agale yakoa moamoko agomepa Akolali kapene wakako ago tetepo takoa meko. Akolaliyo manake akenemo yakoa moamokome tokome ni toko. ¹¹ Akolaliyo toto-pala mana ko ikilepa kiwi mea kama pomotoane tuku wa okome taneya. Eni akene toa mana Yesu patu kautakoa kaketepa mea kama poko. ¹² Mana Yesu makutukoa motokagopa mea kama poko. Mana makutukoa moamokagopa mea kama pikilepa toamoko.

Toto Mea Kama Poatekomo

¹³ Kipala i i wane wiane wetekakilepa mana Yesuno ibini wedekoa oneke wene tugo meki yene kipa etene mea kama poko wa wene tomotoane tekene ni tuku. ¹⁴ Akolali kakakoa kowitikilepa atiki toa mekete kowitiko. Nipa one wene pikole litia kowitikolopa tone kowitikole-kama yakoa too wa atiki toa mekete kowitiko. ¹⁵ Tone kowitikoyakama Akolaliyo yakoa too wa totome wene teketepa nipa eni kowitikoyapa Akolaliyo papete wete yakoa toopianeya waka wene toko. ¹⁶ Kini oyagome-kiti padele poanele one yomini moa atukamatekole tokolo eneketepa einagono kowitikamene. One mea kama pomotono, nitamene. Pinali one yomini moa atukamateko poanele toko

agoke uku. Wa padele poanele tokoleme pinali one yomini moa atukatekoyano, eni poanele toko agono kowitikamene wane wamuku. ¹⁷ Ali atoame ele kule poanele tikilepa Akolaline totono-kama tetekakete tikili uku. Nimo ukuyake ali atoame tiki poanele-kiti padekame kini yomini moa atukamokoya.

¹⁸ Akolaline mana kono-mikitame poanele toma yawamiki wa totome wene toko. Akolaline mana Yesuyo eni yene pawe toa talo toko. Nitikono, poane peku laweteko ago Setanuyo Akolaline eni yene mitikoa ete moamele toamoko.

¹⁹ Toto peyapa Akolaline mana kono-mikiti wa totome wene tokoyake eya waka wene toko. Ete yene ta piko peyake poane ago Setanuke-kama lukoa meki.

²⁰ Totome eya waka wene toko. Akolaline mana taatekoma nome mekome pademo pademo i i wa toto wene taka taka tikilepa nimini Gode Akolali wene tomotoa toka. Totopa nimini Gode Akolali-pala lipua mekilepa mana Yesu Keraisu-pala lipua mekete tekete ni toko. Yesu einagopa oneka nimini Akolali. One patu kautakoa kakete mea kama poko.

²¹ Anu mati-kiti kapene gode-kiti titi toma yamene-ye.

Opa anu agale eni.

2 YONE

Yoneyo Taku Takoa Wia Wetekane Pipia

1 Yone nopa Keraisu ali atoa yopiku agome uku.

Kamo koni atoa Akolaliyo takoa motane atoa neeke ni neke mati-kitikeka i pipia wini wiane wetekakilepa nimini peku noane tekene kiwike wene mekoane mekene tuku. Kiwike wene mekoa mekilepa noanu odene mena. Nimini peku naki peya kiwike wene mekoa meki. ²Kiwike wene mekoa mekilepa nimini peku nakoya tekete ni toko. Eni pekupa takoa poameneya tone tepene pa pia kawoo.

³Atai Akolali mana Yesu Keraisutame toto pewe wia ela moa tepe kilikoa pikoa toi. Nipa nimini peku noa wene mekanali yotokolopa nitoi.

⁴Neke mati padeka-kitame nimini peku noa tokoile enekouna tekene wedoane wediane meku. Atai Akolaliyo tamene wa toto-pala okana toa eni tokoi.

⁵Opi kamo koni atoa toto peya wene mekanali yoomoa pato wane ne kowitoane uku-ye. Nipa weneya totono litia tato wane ekene wamuku. Yesunole titia takakete yatekoona toa litia toomoa pato wane ekene uku. ⁶Ete oto wa wene mekanali yoma pamene wane ikilepa nipa Akolaliyo tamene wa oka toa litia tamene wane ekene uku. Eni totono kime titia yatekilepa Akolaliyo ete oto

wa wene mekanali yoma pamene wa okana totono eni yatekoi.

⁷Ali atoa oa yotokaki ali kainya matiame ta piko peyake eya wa oa pupitikama yaki. Yesu Keraisu itonoke nikilepa nimini ali latia nekeneya mena wa iki. Dikane yename Keraisu-pala pine wia poi tagoa ali atoa oa yotokoa tiki. ⁸Nitikino, Keraisunole takama yakilepa pata pale takayano, wedoa yamene wane uku. Akolaliyo tone toma yakoole topo takakome pupu poi wedoa mou toa pewe wia tagatapemotoane tekene ni uku-ye.

⁹Keraisyuo i i wa olaukane totono panagome-kiti litia toamokome pademo pademo pamo yakoa etepea pokomepa nipa Akolali-pala lipua mekoya mena. Keraisyuo olaukane totono litia toko agopa Atai Akolali mana Keraisuta-pala lipua meko. ¹⁰Panago-kiti kiwi mekoita wida nokome Keraisyuo olaukane toa olaukamokalepa kini yapu noo wa makutukoa moameamene. Ke wa yonoka moameamene. ¹¹Dikane agodo kime makutukoa moteketepa nipa one-pala kibutua poanele tekete toino, makutukoa moameamene.

¹²Kipala pademo pademotaka oadiyano wene pikounake i pipiake wiane mekamuku. Nitikuno, toto peya wedikete wedia tagatapeatoanepa kiwi mekita wida nekene kiwi kakakoane ou.

¹³Neke wamene atoa Akolaliyo takoa motane atoa one mati-kitamepa kiwi peya wete meamene wa iki-ye.

Opa anu agale eni.

3 YONE

Yoneyo Tebolo Takoa Wia Mekane Pipia

1 Yone nopa Keraisuno ali atoa yopiku agome uku.

I pipia i i wane wiane mekakenepa anu kolotini ago Gaiasi nepala uku-ye. ²Anu kolotini ago nepa wene epetaneyakama mekono wene tuku. Nitikuno, ne tigini kakale wedoa memotoane tekene neke kowitikaku-ye. ³Tone oya ali padekiti wida kawa nekete eya wa okoi. Ne einago Gaiasiyo Akolaline nimini peku noa tokome toko. Akolaline niminimo namolo yakoa tokana toa pa tokome toko wa onokoli yatekene wediane kakou. ⁴Anu mati-kitame Akolaline nimini peku noa tiki ko yatekene-kama ke wane wediane tagatapeku.

Yoneyo Gaiasi Kei Pikome Akenemo

⁵Keraiuno ali-kiti mone padeka ta lono kawa niki yeneka ke wa neme makutukoa moa auapekala teke toko. Widikakilepa neke toateko toa wedoa teke toko. ⁶Eni ali-kiti oto neketepa kiwike wene mekoa meke toka ko i i wa i losu yapuke oboai tiki yene-pala toaweaka okoi. Eni ali-kiti ne mekota wida wakapea note meemotekete padeka poadete kakolipa nipa poatino poe wa auapeamene. Akolaline wene moano, nitamene. ⁷Eni ali-kitame Keraiunomo oma pato wa kini ta tewitikaketepa Keraiusuke wene tugamene yenaneke padeya deyaka oia moameneya pa pekeneyano, auapeamene. ⁸Dikane alikiti tone yapu noatino noe wa makutukoa moamedeko. Akolaline niminimo oa aua pomotono, eni yene-pala kibutua auapeatoane uku-ye.

⁹Wini losu yapuke oboai tiki yeneke pipia pade wiane wetekakouyake eya ago Daioterepisiyo anu wiane mekakene okoumo yakamademe wakome toko. Onepa ako odene mekene kiwi yopiou wa wene pikome toko. ¹⁰No wida nekenepa winagome nooke poanemokama i i wa kapene wakoa akedekomo toaweane ootapeou. Einagome eni tokana poanele moa patukakome eyaka tokome toko. Tone oya ali-kitika makutukoa moamademe wakome toko. Ni wini ali atoa padekame kini yapu noe wa tone oya-lawe makutukoa moadete tikilipa einagome one losu yapuke wa noamoatino poe wa litikala tokome toko.

¹¹Anu kolotini yene dikanele ele kule tiki poanele kotukoa toamoano, epetanele tiki yename tikile kotukoa tamene. Epetanele toma yaki yenepa Akolaline mana kono-mikiti eni. Poanele toma yaki yename Akolali enekileka toameneya. ¹²Eya ago Demiteriasi one ko peyame ikilepa epenemo-kama iki. Nipa Akolaline nimini totono litia tokole enekete one kei pikala tiki. Totomeka one kei piko. Enipa totome nimini akedikwa kime wene tekete tiki.

Yoneyo Wipitikome Lionate Akenemo

¹³Nepala pademo pademotaka oadiyano wene pikounake i pipiake wiane mekamuku. ¹⁴Ne kakakoane ou. Nipa neke lene timini enoukene wida wete nou.

¹⁵Akolaliyo ne tepe kolotini kilikoa pikamotoane neke kowitikaku-ye. Neke oya-lawe i take meki-kitame ne meamene wa iki-ye. Tone wini oya-lawe odene odene wa ibini oa yono motokakala tamene.

Opa anu agale eni.

YUDE

Yudeyo Wia Wetekane Pipia

1 Yude nopa Yesu Keraisunole takama yaku agome i pipia i i wane wiane mekakenepa Atai Akolaliyo wene mekoa one wa kayo oa motane yene-pala uku. Nipa Yesu Keraisuyo pawe toa talo toko yene-pala uku.

² Akolali kiwike wene mekoa mea ela moa tepe kolotini kilikoa pikoa tomo-toane kini kowitikaku-ye.

Yudeyo Kapene Wakakoi
Yeneke Akenemo

³ Anu kolotini yene toto peya Akolaliyo toa motanemo pine toaweane oadiyano wene pikounake eni wene wiane wakene eya waneka uku-ye. Akolaliyo one wa takoa motane yene i i wa onekele takakete toatekoi totono pademoka katekameneya yametapeane toa wedoa litia tamene. Nitoa poi wedoa tou toa tekete one agale wakene yene-pala agale toonali yamene wane uku. ⁴ Pade ali-kiti kiwi pakeke paigakoa keneya lua meaneya tokolo tekene ni uku. Eni yenepa Akolaliyo wia atukoa wawoo wa papete wia mekapi-anya. Nitane yename eya wa kapene yokakete iki. Akolaliyo kiwi pewe-kama witiko. Nitane ago tokome kiwi kibu moamoono, ele kule poaneleka atiki toa mekete tamele toko wa etepea poanele toma yakete tiki. Nipa ali atoa toto peya lukoa meateko Ali Muno Yesu Keraisu kote tokolo wakete tiki.

⁵ I oatekumopa kime wete yakatapeneayake eya wane wene takoane uku-ye. Toto yatene Idipi take labakaneya mekoli Akolaliyo toa motaneyake wa naniko padeka-kiti oneke wene tugo meamokoli enekome kiwi wiou wa wia tukatapeneya.

⁶ Eya waka wene taneya meamene. Akolaliyo one edelo ali-kiti eka kuka ta talo takamene wa tatimo tatimo toa yametekana toa padeka-kitame toa wakete etepea pekeneyake yomiyomu toologaneta moa pitikaketikaneya. Nipa wipitia ta patakale ali atoa takoane enoane akakou-pete kiwi wiouno nepiamene wa kapa po kakoa nitaneya. ⁷ Eina edelo ali-kitame tane toa eya tata Sodome Gomora tatake pitane yene ni eniya liti plane ta-kitike pitane yene ali yatene wa atoa latikoa koua pia ele kule toamatekoile toa meaneya. Nitaneyake Akolaliyo kibu motokome toe mineke mea kama poati wa moa pitikakilepa kiwika kibu mouno, edikameamene wa ete yene peya pubu okome taneya.

⁸ Opika kiwi wini oa yotokaki ali-kitamepa eina yename tuku pekete tanele tekete tiki. Nipa pulete enekoule tuku wa kini tigini wa toa potokoa Akolaliyo agale tagoa toamoa ni one peku noa tiki edelo ali-kitika taumada toa tiki. ⁹ Ako meane tobou edelo ago Maikelayo Mosesene tigini mou wa one tigini litiyo Setanu-pala agale toonali yoa kakilepa Setanu taumada tamene kote tokale eya wa akeneya. Ali Munoyo ne kikoa akamotoane uku wa akeneya. ¹⁰ Kiwi wini oa yotokaki ali-kitame nitamekete kini wene toamikile-kiti pale tane tetepo takoa taumada tekete tiki. Nitoa meapa yokome one weneme-kama ele kule lene planele wene toa toko toa wini poane yename tekete tiki. Nitiku pekete toa kini wa moa atukakete tiki. ¹¹ Ae, wini yename dika dika toamene tete moadetee eya ali-mename papete pale tane toa tekete tiki. Keine wamene ago Abele-pala wene poaneya mekome wia tukoa ni Belameyo kue moademe Iserere yatene etepea lia aua pome ni eyago Kora Moseseke lukoa meamademe wawa tane toa tekete tiki. Wini yename kiwi edikoa oa yotokakilepa tua atua poade-

teke tiki. ¹² Ae, anu oya-lawe kini losule tekete odene wene pia toge kia mekoika wini yename nee noa tagatapea kitipu meato wa paya nou toa note mekete kini wa lawetekilepa kini toge toa potokakete tiki. Nipa ali atoa ko akamoko kalepeta nou toa note kiwi toa potokakete tiki. Ni yomo pade kũ tuatekapeteka kũ tuamokale pinagome toa mitikakale ala tootapeneya piou toa wini yename pale toa meki. ¹³ Ni kusa ue leau oa pewikanokome matanu ludu lako au-moa mitikou toa ele kule ya tanele tekete tiki. Ni tagoi-kitika likonu pa yawakala meou toa pã toamokota yomiyomu keneke-kama mea kama poati wa Akolaliyo kiwi oa yotokaki yene wete moa kakapianeya.

¹⁴ Wini yename toatekoilekepa eya ago Inoke namolo ago Adameke titimoo opia kakama nekene toa tatono takoa (naba 7) opiane ago einagome eya wa papete pubu oa pianeya. Ali Munoyo one wa takoa motane edelo ali ege egeta wa-kala kadukoa moa aua noo. ¹⁵ Ni-toa nokomewa ali atoa peya takoane enoane akou wa eya too. Akolaline peku noamene-kitame onekele takamene kote motuku wa ele kule poanele etepea toma pote ni oneke poanemo oa tokoike nami wia kibu mootapeoo. Nitoono, nepiamene wa Inokeyo pubu oa pianeya. ¹⁶ Dikane yenamepa kō-kama oa akoa agale oa ele kule poanele tou wa wene piki toa etepea litikete eya kuya mate agale oa kawa ni ete yename kini wene pikile tomotoa lede taba po pitikoa oa yotokoa tiki.

Yudeyo Pubu Oa Mane Mane Oa Tanemo

¹⁷ Anu kolotini yene Ali Muno Yesu Keraisuno Aposelo ali-kitame papete kipala eya wa pubu oa pikoina wene taneya meamene. ¹⁸ Wipitia ta patateka tigotoka-pete kiwi taumada tokoi yene

taatekoa nekete taumada toa ni ele kule poanele tou wa wene pikoi toa etepea litia toma poi wa pubu oa pikoina. ¹⁹ Nitatekoi yename kiwi ete oto wa puutakutukamotoi. Pa itono peku noai tekete nitoi. Epetane Yominiyo takoa wakene yeneke uku.

²⁰ Anu kolotini yene Keraisunomo oneke kiyoke-kama olaukanemo kime titia yakoa motokoina toa pa yakoa moa togamene. Ni Epetane Yomini awinaneya mekete kowitikala tamene. ²¹ Akolali kiwike wene mekoa mekome pawe toa talo tokota pa eida-kama meamene. Tone Ali Muno Yesu Keraisuyo kiwi ela motokome pa mea kama pamene wa ka yameademe tokono, nepia meamene-ye.

²² Keraisunomo pomeme tuaneya mekete yakoa motiki yene ela moa auapeamene. ²³ Ni ali atoa toe mineke meane tetepo taneya meki yene odoa toa moamene. Ni pade-kiti ela moa auapekilepa eni yene kini poanele pine yene kini maminake weamutane tetepo takoa auapeamene. Nipa eni yenane maminaka mitikamene kote moapa auapeamene.

²⁴ Akolali-pala eya wa oa kei pia-kala katoane uku. Toto pata paka poamomotoapa neme-kama yopia kako. Nitoapa totopa poanele toamene yene tetepo takoa meke ne pã teleta tootapeneya mekota kolotini natekoa aua pake kakamele toko. ²⁵ Tone Akolali wa oateko agopa ne odene meko. Toto toa motikilepa neme toko. Nepa pã patu-kama mea etene ako odene tobou ago mea ele kule telekole-kama toa ta piko peya talo toa toko. Nilepa itono tibuta wete latiameneyake laigoa neme toma nekeneyano, opika nanikoka widikakoa-kala kama pamene.

Ee nimini.

Opa anu agale eni.

YAMEPIANELE

Akolaliyo Toatekale Papete Yamepianemo

1 I boku wiane mekakilepa one pupu takaki yename yakamoto, toawe akamene wa Akolaliyo Yesu Keraisupala oa plane toane wiane mekaku. Nipa one papete wene toopikana toa pene taatekoa toatekomopa no Yone one pupu takako ago akapoano pa wa Keraisuyo one edelo ago pade moa wetekakale nokome okana toane uku. ²No Yoneyo enekoumo peya i i wane wiane mekakumopa ipa Akolaline agale Yesu Keraisuyo toawe akakamo uku. Ee nimini. ³Akolaliyo okana toa taatekoa toatekomo i i wane wiane mekaku toa oi motokagopa kolotine meo. Ni i bokupa einagome oi motokale yakoa motokoi yeneka kolotine meoi. Kipala i ukule taatekoa toateko tigotokolo ni uku.

Losu Yatene Tatono Kakoake Akenemo

⁴No Yoneyopa Esia ta pikoka losu yatene tatono kakoake (7) i pipia wiane wetekaku-ye.

Akolaliyo kiwi pewe wia tepe kolotini kilikoa pikoa toamotoane kowitikoane uku. Nipa eya ago papete meemoa nome opika pa mea kawa naniko taatekoa nome toko ago Akolali eni kowitikakilepa one Epetane Yomini-palaka odenemo oane kowitikoane tuku. Eya Yomini Akolali meko walai liti one leneke kako Yominike uku. ⁵Ni Yesu Keraisupalaka odenemo kowitikaku. Akolaliyo oka toa-kama toawe akoa ni tuane ali atoa naniko kamo pomotoa one namolo takoa kamo poka agoke uku. Onekekama ako odene meki tobou ali peya lukoa meki.

Einago totoke wene mekakomepa tone toko poaneleme toto moa labaneya kakoota one kamateme toa motaneya. ⁶Nipa totome ete ali atoane kowitiko ni oneketai Akolalinele takoa tomo-toa tokome taneya. Nitimotou wa totopa one yapulu yene moa latikaneyano, Keraisu einago ako odene mekome telekole-kama tomoa poo wa one kei piatoane uku-ye. Ee nimini.

⁷Yakoe. Keraisu einago wedo patu mea noademe toko. Nitoa nokale peyame enekilepa one tugini lagotane yenameka enoi. Eni noka-petepa ta piko peyake pitikoi-kiti einagoke tumai meou toa keneya wene keda taneya meoi. Ee nimini.

⁸Ako odene mekome telekole-kama toko Ali Muno Akolaliyo eya wa oko. Padele padele peya titianeka wipitianeka tuku wa oko. Nipa opi opi mea namolo namolo meemoa nome naniko naniko taatekoa noateko agome oko.

⁹Nopa kini oyago Yone Yesu-pala lipuane mekilepa kiwi mekina toane meku. Nipa ke enekakolo meake onekele takoa togato wa oneke poti lukoa mekina toane meku. Akolaline agale Yesunomota toaweane okouke po yapu pitikene tekene ni uku. Kusa ue muke plane Patemose take i mekene uku-ye. ¹⁰Ko mea pupu toamene-pete pade Epetane Yomini awia tagatapeneya mekene yatekolu mukiti lono bera telo pitapeou toa agale ludu nokome okale yatekou. ¹¹Agale ludu nokome okome neme wida meke eneko toa bokuke wia mekamene. Wia mekatekoapa Yesuno ali atoa ta tatono kakoa (7) mekika wetekakala tamene. Nipa Epesase Semena Pegamame Taiataira Sadise Piladelepia Leodisia eni ta-kitike pipia wia wetekakala tamene wa okale yatekou.

¹²Yatekene teyo oko patu wane peketapeane enekolu labo tatono kakoa

(7) pianeya enekou. Nipa golo kueme latiane labo-kiti pianeya enekou. ¹³Eni labo-kiti pakeke Ali Yatenane yagono ago kakale enekou. Einagopa kawane witi tapea tukane mamina kawa one palanu-pala golo kueme latiane po togotaneya kawa taneya enekou. ¹⁴One lene timini one wago pineka ake tootapeneya kakale enekou. One pinepa sipi sipi kai pine kilue kale eya ake toko toa ake tootapeneya. One lenetapa toe itipono keneya oa kakeneya. ¹⁵One kawatapa berasi wa akene kapa keneya yadi yadi tootapeneya. Toe mineke yoa natekane berasike uku. One agale ikilepa tube ue-kiti uu wa yotokome oko toa oka. ¹⁶Einago one nimini yonamepa tagoi tatono kakoa (7) pikoa kaka. One kabunukepa eka okata olo kakene tue witaka. One lene timinipa lou pa toko toa pa tootapeneya. ¹⁷Einago dikaneya kakale enekenepa one kawane kene tuane tetepo taneya auane pitalogakou. Nitikolu one nimini yono nooke pikome okome piti moamea. Padele padele peya titianeka wipitianeka tuku ago i kakuno, piti moamea. ¹⁸Noanupa anu weneme meemoane nuku ago. Tukene tukouyake kamoane pekene meane-kala kama puku. Nitiku agome ali atoa tua pote mepokoi ta talo toane eni ta ketepono kago peateku ki pikoane kawane tuku. ¹⁹Nitikuno, neke enekoa kakoya bokuke wia mekamene. Nipa opi taatekoa tokole-pala nani taatekoa toatekoleta i i wa bokuke wia mekoano ta wa nopala oka. ²⁰Nimo ootokoa kakome okome i tagoi tatono kakoa (7) pikoane kaku tagoi ni labo piatikiya tatono kakoa (7) neme enekopa eya adeka pikoya. I tagoi-kitipa edelo ali tatono kakoa (7) adeka pikoya. Losu yatene meki toa tatite toa yopiki edelo ali-kitike uku. Ni labo piatikiya tatono kakoa (7) kiwi losu yatene tatono kakoa (7) adeka pikoya.

Epesase Yeneke Pipia Wia Mekoa Wetekanemo

2 Nimo ootokoa kakome okome anu losu yatene Epesase take mekika yopiko edelo agoke eya wa wia mekoa wetekakamene.

No eya tuku agome uku. Nimini yoname tagoi tatono kakoane (7) pikoane kawane ni golo kueme latiane labo piatikiya tatono kakoa (7) pakeke yawane tuku agome uku. ²Wini toma yakile wene taneya meku. Kini pupupa kilikoa meamekete wedoa tiki. Ni ko wameneya poti toa togaki. Ni poanele toma yaki yene kote tokolo waki. Ni pade alikitame Aposelo ago nuku wa kapene wakoa okoli pitia yakatekoapa kapene wakadeki wa waki. ³Ni kini pupupa ko wameneya poti toa togakilepa ke enekakolo meketeka no i agoke toa tete oyake moato wa toa togaki.

⁴Widikoapa toa epetekaki wane wene tukuyake eya wane mane oane motukuno, yakamene. Nooke namolo wene mekoa mekoina toa opi wene wedoa mekoa meamiki. ⁵Nooke namolo wene mekoa mekoinakale wene taneya meamene-ye. Nitikete ae opi etepeane yakedeku wa wini wene wia waatekoa kini namolo toa epetekakoinakale wa toma pamene. Wini wene wia wawameadekolipa nipa kini labo piatikiya wane eko pata moane piadene nou. ⁶Nimo ukuyake kini eya tikileke kiwi ke piamedeku. Eya ago Nikolasine totono litia tiki yene kime kotimi yoa meki. Nipa noanume kotimi yoane meku toa tiki.

⁷Yakou wa kale piyakoa kaketepa nipa Epetane Yominiyo anu losu yatene-kiti -pala oko toane toaweane ukumo yakamene.

Poi moa patukakete anukule takoa togakoi yene meemoa pomotoane tekene Akolaline ipeke witako yomo ku ko-

tia namene wane yameou wa einagome oka.

Semena Yeneke Pipia Wia Mekoa Wetekanemo

⁸Einagome nopala eya waka oka. Anu losu yatene Semena take mekika yopiko edelo agoke eya wa wia mekoa wetekakamene.

No eya agome padele padele peya titianeka wipitianeka tuku agome uku. Tukene tuaneke wa kamoane meemoane puku. ⁹No nitiku agomepa wida ke enekakolo ponopene yene mekino wene tuku. Kipa ponopene yene wane oaneke kamo yene tetepo takoane uku. Ni Yu yene padeka-kitame kiwi tegene matakete ikimoka wene tuku. Eni Yu yename kipa Akolaline Yu yene meko wa ikiyake Yu yene tetepo takamekene Setanuno yene tetepo takoane waku. ¹⁰Kini tete moatikilekeka piti moameamene. Setanuyo kipa no Keraisuke edoa wene tugo meki patu wa pene nome likoa enenokala too. Nitikale Setanuno peku naki-kitame kiwi padeka-kiti po yapu moa pitikakolipa ta noi kakoa (10) pataka toa tete moko kawe. Tuadekolupa tuou wa nooke wene tugo mekolipa nipa moa patukane alike sili meou toane tekene mea kama pamene wane kiwi kei piou.

¹¹Yakou wa kale piyakoa kaketepa nipa Epetane Yominiyo Akolaline losu yatene-kiti-pala oko toane i toaweane ukumo yakamene.

Poi moa patukakete anukule takoa togakoi yene tukilepa toake ali atoa taku takoa tuatekoi ta enamoi. Nipa poane take poamoi wa einagome nopala oka.

Pegamame Yeneke Pipia Wia Mekoa Wetekanemo

¹²Einagome no-pala eya waka oka. Akolaline yatene Pegamame take

mekika yopiko edelo agoke eya wa wia mekoa wetekakamene.

Imo ikilepa eka okata olo kakene tue pikoane kaku agome uku. ¹³Kini wini meki ta wene tuku. Wini takepa ete yene Setanuke lukoa meki. Kiwi pade nitameneya anu ibini wedekoa nooke wene tugo meki. Wida Setanuyo yopiko take eya ago Adipasi anukumo-kama toawe akakago wia tukane-peteka nooke wene tugo mea no wawamokoina. ¹⁴Nooke widikoa wene tugo mekilika eya wane mane oane motukuno, yakamene. Kiwi padeka-kitamepa eya ago Belameyo namolo papete pale tanele tiki. Einagome eya taneya. Iserele yene etepea poanele toma pomotoa likoa enekome toatekale mone pitikaline tobou ago Belake yametanya. Eina yametekana toa tokome Iserele yene likoa enekale iponoke lodo yotane nee moa noa ni koua piamatekoi atoa koua pikala taneya. ¹⁵Ni kiwi padeka-kitame eya ago Nikolasine totono litia tiki. ¹⁶Kini wini poane wene wia wamene. Wini wene wia wawameadekolipa nipa kiwi mekika poanele tiki yene-pala poi wete tonou. Nipa anu kabunuke kiwi wiatekou tue witaneya kakene nitou. ¹⁷Yakou wa kale piyakoa kaketepa nipa Epetane Yominiyo anu losu yatene-kiti-pala oko toane ukumo yakamene.

Poi moa patukoa anukule takoa togakoi yene eya moane meou. Akolaliyo papete kaukoa lawetane maana nee lawetoane ni ake tane kue wane meane tou. Eni kue wanekepa kini weneya ibini wia mekaneya pioo. Nipa ete-kitame wene toameneyake pinagome odene weneya ibini i wa wene too wa einagome nopala oka.

Taiataira Yeneke Pipia Wia Mekoa Wetekanemo

¹⁸Einagome nopala eya waka oka. Akolaline losu yatene Taiataira take mekika yopiko edelo agoke eya wa wia mekoa wetekakamene.

Imo ikilepa eya agome uku. No Akolaline Mana anu leneta toe itipono akene tetepo taneya kawane ni anu kawatapa berasi wa akene kapa keneya yadi yadi tootapeneya kaku agome uku.

¹⁹Kini wini take mekete tikile wene taneya meku. Yete pade ali atoake wene mekoa ni nooke wene tugoana ni eko ali atoa auapea ni ke enekako-peteka enika enile toa wawamoana poti toma yaki. Nipa kini titikete toma yakoinakale moa patukoa wedoana toomoa yaki. ²⁰Widikoa mekiyake eya wane mane oane motukuno, yakamene. Wini atoa Yesebeleyo Akolaline agale toaweane akaku wa oake eyaka toko. Anukule takama yaki ali atoa etepea pomotoa likoa enekala toko. Nipa pamoko mea ni iponoke lodo yotane nee moa noa tamele toko wa wini atoame kiwi olaukakono, dekolo pa wa wetekamiki-pe. ²¹Einatoa one eni poane wene wia wako patu wane yono lukoane mekene kibu moamokounake one eni wene wia wawamoko. ²²One wene wia wawamokono, walaike yeneme tuaneya pimotoa. One koua pikala tokoi yenameka dika dika toamene tete momotoane wawou. Eina atoame olaukanele tewitikoana wawameadokolipani. ²³Einatoane peku mati-kitikiana wiane tukou. Nitikolu enekete anu losu yatene ali atoa peyame eya wa wene toi. No einagome ali atoane tepene piko wene tetoa enekono, kini tokoo toa nami wikala toademe toko wa wene toi.

²⁴Ete Taiataira yene etepea pikiyake kime eni poane peku noa toamiki. Nipa Setanuyo kaukoa olaukane toa i atoame oa metekono, yakoa toamato wa

kime litiana toamiki. Nitikino, kini wene keda takakayana tokolo eya odene tamene wane uku. ²⁵Wida wakapeane nomotoa nepiana mekilepa kini namolo yakoa motokoinakamo wedoana pikoa kawa nepiana meamene. ²⁶⁻²⁷Poi moa patukakete anu wene pikoule toa togakoi yene-palana eya wane oane tou. Pitikali ta piko peyana pitiki toa talo toa meamene wane yameou. Nipa agetaiyo no yamete-kanetaka toane kiwiana yameou. Nitikolu kodou agome-kiti mete pade kamo itonome latianeyana poadekale enekome kapa wapime wia kugutukou toa eku pitikali wedoana yopiana kaketepa moa kawikoi. ²⁸Nitamene wane koobu tagoikitikiana kini wane oane yameou.

²⁹Yakou wa kale piiyakoa kaketepa nipa Epetane Yominiyo anu losu yatene peyana-palana oko toane toaweane ukumona yakamene.

Sadise Yeneke Pipia Wia Mekoa Wetekanemo

3Einagome nopala eya waka oka. Anu yatene Sadise take mekika yopiko edelo agoke eya wa wia mekoa wetekakamene.

Imopa no eya agome uku. Akolaline Yomini tatono kakoane (7) ni tagoi tatono kakoane (7) pikoane kaku agome uku. Kini wida mekete tikile wene taneya meku. Kiwi mea epetekaki wa ete-kitame kiwi kei pia ikiyake noanume kipa tuane yene tetepo takoane meku. ²Ali pade tuateko tigotokolo meou toa keneyana anukule takoake waki. Anu Akolaline leneke mea epetekatikiana kotu kakoana meamikino, atu kamou toa anukule wa wedoana takama pamene. ³Kiwi namolo olaukanemo yakoa motokoinakamo wene taneyana meamene. Nipa einakamo wa litiane tou wa kini poane wene wia wamene. Atu kamoamokolipana kode ago keneyana kotikatapeane nouno,

nitamene. ⁴Wini Sadise take ali atoa natetekoame kini mamina kege kakaya kekatekoa meou toa mea epetekaki. Ni yenepa ake tane mamina kakeneya no-pala opia yawei. Nipa kipa nitatiki yeneno, noe wane kipala odeneka yawou. ⁵Poi moa patukakete anukule toa togakoi yene ake taneya dikane mamina kakeneya kawei. Dikane yene kini ibinipa mea kama poatiki yene i i wa wia mekapiane bokuke pimotoane kogileka toamou. Ni Agetaika one edelo ali-kitika kakakoane i ago i atoa wane kini ibini oane kiwi kei pikala tou. ⁶Yakou wa kale piiyakakoa kaketepa nipa Epetane Yominiyo anu losu yatene peya-pala oko toane toaweane ukumo yakamene wa einagome nopala oka.

Piladelepia Yeneke Pipia Wia Mekoa Wetekanemo

⁷Einagome nopala eya waka oka. Anu yatene Piladelepia take mekika yopiko edelo agoke eya wa wia mekoa wetekakamene.

Epetanele-kama toane niminimo-kama oane tuku agome uku. No dikane agomepa Depidiyo yopia kako kago ketepono ki pikoane katekaku. Eni kago pekolupa padameka wa ketekile toamoi. Ni ketekolupa padameka wa pekile toamoi. ⁸Kiwi wida mekete tikile wene taneya meku. Kipa tele tubeya toameneya meake anu agale litia toa anu ibini paya tetepo takamo tiki. Nitiki yene kini mea kawadete tuapea poatiki kago keteponopa noanume pekapiouno, padameka wa ketekile toamoi. ⁹I ukumo yakamene. Wini take kiwi pakeke mekete Setanuno peku noa tiki Yu yename kipa etene Yu yene meko wa oake kapene wakoa iki. Wini Yu yene moane kini kawane kene neuwe tukua memotou. Nipa no einago kiwike wene mekoa mekome ni tadeko wa wini yename wene

tomotoane tekene nitou. ¹⁰Anukule ko wameneya poti takama yamene wane okouna toa kime pa tiki. Nitima yakino, eya tou. Itonoke meki peyane tepene piko wene keleyo witakamotoa ele kuleme ke enekaka-petepa kiwi toane mou. ¹¹No wakapeane noateku tigotokono, kiwi kei pikene meatekuya wane padame odomoa pokayano, kipala okouna wedoa pikoa kamene. ¹²Poi moa patukakete anukule takoa togakoi yenepa anu Akolaline tobou losu yapu pigi tetepo takoane one yapu moane mekou. Nipa Akolali mekota tewitikamo eida-kama memotoane nitou. Dikakoi yenane tiginike eya ibini-mene wiane mekakala tou. Anu Akolaline ibini wiane ni weneya Yerusaleme wa akene ta ibini wiane mekoane tou. Weneya Yerusaleme wanepa Akolali a tibu meko take pia ketipea noateko take ekene uku. Anu weneya ibinika dikakoi yenane tiginike wiane mekou.

¹³Yakou wa kale piiyakakoa kaketepa nipa Epetane Yominiyo anu losu yatene peya-pala oko toane toaweane ukumo yakamene wa einagome nopala oka.

Leodisia Yeneke Pipia Wia Mekoa Wetekanemo

¹⁴Einagome nopala eya waka oka. Anu losu yatene Leodisia take mekika yopiko edelo agoke eya wa wia mekoa wetekakamene.

Imopa no ee nimini wa ibini iki agome uku. Nipa nimini peku lawe-toane Akolaline agale toaweane akoane tuku agome uku. Ni Akolaliyo latiano ta wa oka toane-kama titiane latikou agome uku. ¹⁵Kini wida mekete tikile wene taneya meku. Anukule takakilepa poto toamoa kakaale toamoa tane ue tetepo taneya mekete wedoa toamiki. Beita, poto taneyaka kakaale taneyaka memotadiya. ¹⁶Nipa kipa poto toamoa

kakaale tomoa taneya mekili tekene noane kapeou toane kiwi wawadene tuku. ¹⁷Kipa uu kamo yene mekono, padameka auapeatiki toa mena wa kini wa kei piki. Nitikiyake Akolaliyopa kipa ponopeneya mea leneta litapeneya mea mamina kawameneya mea tikino, elame tuku wa kinikiya padeya deyaka toamene tetepo takoa meko. Enipa kime wene toamiki. ¹⁸Nipa eya tamene wane mane oane motuku. Kamo toadetepa nipa noanuke golo kue moamene. Doo eya takoa nomotoa toe mine pitikoa yotane golo kuke uku. Mamina kawameneya wini mekino, eni ya teigadetepa ake tane mamina topo toa moa kamene. Ni leneta kikatapemotoa lene yotokatiki yobotono topo toa moa yotokamene. ¹⁹Anu kolotini yene peya mane oane mokala tukuno, odene wene piitikoa mea kini poane wene wia wamene. ²⁰Yapu kago keteponoke none kakene wi wi toane kaku. Nitikulu panagome yakatekoa kago pekakolopa nipa tuapeane nekene one-pala opiane mekene nee noadene tuku. Oneka no-pala opia mekome nee noademe toko. ²¹Poi moa patukakete anukule takoa togakoi yene kipa ali atoa talo toane mekuya waneke meatono noe wane ou. Nipa ele kule poanele moane kawikamotekene Agetaiyo ali atoa talo toa mekoya waneke pekene lewititakutukoa meko toa meatono noe wane ou.

²²Yakou wa kale piiyakakoa kaketepa nipa Epetane Yominiyo anu losu yatene peya-pala oko toane toaweane ukumo yakamene wa einagome nopala oka.

A Tibuke Akolalinele Takakete Toatekomo

4 Einagome nimo ootokaneyake pulete keneya enekolu a tibuke kago peaneya pikale enekou. Nitoane yatekolu eina agale ludu namolo bera piou toa keneya nopala okana agale

ludu lokakome okome nani toatekole yameouno, oto noo wa okale yatekou. ²Nitikolu eina eina Epetane Yomini nooke awinokale enekolu ako odene meko tobou ago ta talo toa meka walai pianeya enoane ni eni walaike pade ago meaneya enoane tokou. ³Eniya waneke meane agono lene timini enekolu kikome kiane koniliane kue wane ni yasepa kue wane pa tane toa one lene timini pa tootapeneya enekou. Ni one meka walai kokati wia unukakilepa kanu pagene emerale kue keneya wia unukatapeneya. ⁴One eni meka walai muke pimotoa ako odene meane tobou ali-kiti mekoi walai pagini kakoa (24) pia unukatapeneya. Eni walai-kiti plane toa tobou ali pagini kakoa (24) tutu tutu wa mea unukaneya. Nipa ake tane mamina kakeneya mea ni golo kueme latiane nunagu wateaneya mea tokoi. ⁵Muke plane wanekepa katiapale toa tono wia toa kaka. Ni einago meka walai eko keneya pimotoa labo tatono kakoa (7) pianeya. Nipa toele udukaloganeya noa kakeneya. Eni labo-kitipa Akolaline Yomini adeka pianeya. ⁶Ni einago walaike mekome lene timini takoa meka lono padeya kusa ue keneya meeloganeya. Nipa gilasi keneya meeloganeya.

Ni muke eni meka walai namike eka kukata aka keikataka lene kak-eneya tuyonoya-mene kawa unukaneya. Nipa lene kakeneya kakilepa lene timini lonoka mukiti lonoka lene-kama kaatapeneya kakeneya. ⁷Namolo takoa kak-eneyapa laione keneya kakeneya. Taku takoa kakeneyapa ali pitimekawe kai keneya kakeneya. Tebolo takoa kak-eneyapa ali lene timini motaneya. Tuyono takoa kakeneyapa pukaneya yako tegu keneya. ⁸Eni lene kakeneya tuyonoya pawena ko melepu kakoa (6) kakeneya kawa ni ekoloka tokooka lene kaatapeneya kawa taneya. Nitaneya

kakete ete pia oto pia eya wa lo oa-kala kaki.

Akolaliyo epetanele-kama toko, epetanele-kama toko. Telekole akole-kama toko ago Akolaliyo epetanele-kama toko. Ni agopa namolo namolo meemoa nome opi opi pa mea kawa naniko taatekoa noademe tokono, ke wa eni lo oa-kala kaki.

⁹Eni lene kakeneya tuyonoyamepa ako tobou agono walaike meko ago kei piato wa eni tuameneya meemoa poko ago kei pia kaki. ¹⁰Nitoa kei piki toa-kama eni tobou ali pagini kakoa (24) eya tokala tiki. Eni walaike mea talo toko ago Akolali lene timini takakoa meko lono aua pitalogakala tiki. Ni-toapa ke wa eni tuameneya meemoa poko ago kei pia kaki. Akolaliyo inoe wa kiwi kei pikome metekana nunagukitika lokamoa one lene timini takakoa meko lono pitikakete ekete

¹¹tone Ali Muno Akolali padeya padeya peyapa neme-kama latianeya. Ni neke wene pika toa teke eniya peya witakoa pome mekoa wene takoa taneyano, ne telekole akole-kama toko ago wa totome ne kei pia kamedeko wa eni tobou ali-kitame one kei pia kaki.

Ewetane Pipia Sipi Sipi Tinetake Akenemo

5 Eni yakatekoane enekolu ako tobou ago meateka walaike meko ago Akolaliyo one nimini yoname ewetane pipia pikoa kakale enekou. Eni pipiake eka okata agale wia mekatapeneya. Padame kekaya tokale poome togotikilepa poo tigrini tatono kakoa (7) moa togotokala taneya. ²Eyaka enoane yakoane tokou. Tele tootapeane edelo ago eida kakome agale telo ootapekome okome i ewetane pipiapa kekamomotoa poome togotaneyaya pikono, eni poo tigrinipa teyo

pilia keamele toko-pe wa okale ³a tibukeka itonokeka itono kekuluka pipia keateka ago tuku toa kawa teko tokale nitateka ago odeneka kawameadeka. ⁴Eni ewetane pipia keateka ago odeneka kawamokale tekene komo k̄ata nina toane pitikoane kawamokou. ⁵Nitikolu eni tobou ali-kiti padame nopala okome okome komo wamea. Eya agome Yuda yatene ago laione wa ibini akene ago Depidi-loeke tagene ago einagome Setanu moa kawikaneya. Nitane agome eni poo tigrini-kiti oyake pilia keamele tokono, ena wa oka.

⁶Nimo okale yakatekoane enekolu Sipi Sipi Kai Tine kakale enekou. Wia tukane tetepo taneya kakeneya. One wagokepa kime tatono kakoa (7) kawa ni lene tatono kakoa (7) kawa taneya. Eni lenepa Akolaliyo ta piko peyake moa wetekane Yomini adeka pianeya. Einago muke edikaneya kamotoa eya pia kawa unukaneya. Ako tobou ago meateka walai pia ni lene kaatapeane tuyonoya-mene kawa ni tobou ali pagini kakoa (24) kawa unukaneya. ⁷Eni sipi sipi kai tine ako tobou ago meateka walaike meka agoke pokome one nimini yoname pikoa kakene pipia eni mopoka. ⁸Nitikale enekete lene kaatapeane tuyonoya-mene ni tobou ali pagini kakoa (24) Sipi Sipi Kai Tine kawane aua pitoa kei pia kakoi. Nipa peyame padeya-kiti wapijala keneya pikoa kawa ni padeya k̄alono taneya okolo kagonoke mekaneya pikoa kawa tokoi. K̄alono taneya pikoa kakilepa Akolaline yename kowitikete okoimo adeka pia taneya. ⁹Nitoapa weneya lo eya wa oa kei pia kakoi.

I ago neme wini ewetane pipia oyake moamele toko. Padame wini pipia kekaya tokale poome togotaneyake neme eni poo tigrini-kiti pilia keamele toko. Neme eya tokake nitamele toko. Ne wia tukaneyake

neke kamateme ali atoa Akolaline oto toa motokaka. Nipa e ku yatene e ku agale yako iki yene ni pitikali eka kukaka pitiki toa ali atoa padeka-kiti neme takoa oto toa motokaka. ¹⁰Nitoapa eni yene tone Akolaline yapulu yene neme moa latikakilepa oneke lodo you toa one pupu-kama takamotoa toka. Nitikale tokome eni yename itono talo toa-kala meoi wa eni Sipi Sipi Kai Tine kei pia kakoi.

¹¹Nitikoli enoane yatekolu edelo ali ege egeta wa-kala kadukoa (1,000,000 tadiya) kabunu kokotukoa one kei pia lo oa kakoli yatekou. Nitoa lo oa kakete ako tobou ago meateka walai ni lene kaatapeane tuyonoya-mene ni tobou alikiti kawa unukatapea one kei pia eya wa telo oa kakoli yatekou.

¹²Wia tukane Sipi Sipi Kai Tinepa e ku yatene yopiateko peku noa ni eya kuya kamo toateko peku noa ni wene muno meaneya oateko peku noa ni ele kule telekole toateko peku noa tamele toko. One ibini kamotokoa one kei pia one-pala ke wa oa tato wa lo oa kakoli yatekou.

¹³Eyaka yatekou. A tibukeka itonokeka itono kekuluka kusa ueleka enika eniya ludu mekoi peyame one kei pikete ekete eya agota tobou ago meateko walaike meko ago Akolali Sipi Sipi Kai Tineta-pala ke wa oa kita kei pia kini ibini kamotokoa kini tetekole tikile i i wa toawe-kala oma pato wa peyame lo oa kakoi.

¹⁴Nitikoli lene kaatapeane tuyonoyame ee nimini wa oa ni tobou alikiti one kawane aua pitoa one kei pia tokoi.

Ewetane Pipia Togotane Poo-kiti

Odene Odene Wa Pilikala Tanemo

6 Nitikoli enekolu Sipi Sipi Kai Tineyo eya tokale enekou. Eina ewetane

pipia togotane poo tatono kakoa (7) togotane po-kiti pade pilika. Nitikale enoane yatekolu lene kaatapeane tuyonoya-mene padame tono wiou toa keneya agale telo okome okome wete noo wa okale yakoane enekolu ²ake tane osi kai witoa nokale enekou. Eni osi kai patu mekagome poyo pikoa kakeneya mekale enekou. Ni ako odene meko tobou agome watekoya nunagu padame watekakale wateaneya pokome yeteka yukukata pitiki yatene-kiti moane kawikou wa poi toma poka.

³Nitikale Sipi Sipi Kai Tineyo eina ewetane pipia togotane po taku takane (naba 2) togotane po pilikale enoane yatekolu taku takane (naba 2) lene kaatapeneyame wete noo wa okale yakoane enekolu ⁴pade osi kai kikome kiane osi kai witoa nokale enekou. One patu mekagopa ali atoa kilikoa mekoika poi tagama poateka tele lukakome iyapa nekeno moa wa Akolaliyo eka okata olo kakene tue uoya moa meteka.

⁵Nitikale Sipi Sipi Kai Tineyopa pade po tebolo takane (naba 3) togotane po pilikale enoane yatekolu tebolo takoa (naba 3) lene kaatapeneyame wete noo wa okale yakoane enekolu likome liane osi kai witoa nokale enekou. One patu mekagomepa eya kuya keda enatekoya wane (sikale) pikoa kakale enekou. ⁶Enoane yatekolu lene kaatapeane tuyonoya-mene kakoi pakeke agale ludu nekene tetepo tokale yatekou. Eya wa oka. Witi kupa kueme topo toa motikilepa nipa ta pataka odeneke pupu tootokoa motane kue meapa odene de mete deya kapetekoa moamele too. Bali kupa nipa de mete deya tebolo kapetekoa moamele too. Olipe yomo kuka gerepi po kuka toa potokameamene wa oka.

⁷Nitikale Tipi Tipi Kai Tineyo pade po tuyono takoa (naba 4) togotane po pilikale enoane yatekolu tuyono takane

(naba 4) lene kaatapeneyame wetē noo wa okale yakoane enekolu ⁸kaa yotane osi kai witoa nokale enekou. One patu mekagopa tukilepa tokoya wa ibini akeneya. Ni ago nokaka tuane yene pote mekoi ta litia noka. Nitoata nokoli ali atoa mekoi toa tuyono tuyono wa oto piitikoapa tebolo tebolo wa katekoa wia tukamekete odene odene wa wia tukama poati wa Akolaliyo eni toatekoi tele lukaka. Nitikale wia-ta tukama yakoli ali atoa poime tua kobume tua yeneme tua yo tane kai eyame wia tanikoli tua taneya.

⁹Nitikoli Sipi Sipi Kai Tineyopa eina ewetane pipia togotane po ko takoa (naba 5) togotane po pilikale enekou. Enekolu Akolalike padeya padeya mea lodo yoai tane walai keneke eya yenane yomini Akolaline agale toawe akoa ni onekemo kei pia tokoi ke wia tukane yene kini yomini eida walai keneke koukoa mekoli enekou. ¹⁰Eida koukoa mekete kayo telo ekete ekete ako odene meko tobou Ali Muno ne epetanele-kama toa niminimo-kama oa toko. Kamate ponomotono, wia tukato wa itonoke meki-kitame toto wia tukakoinake nami neme manipete wia kibu motokoo-pe wa okoli ¹¹kini kini mekoi toa panagome ake tane mamina petene-kiti moa eya wa tatia mekala toka. Kipala poi teiane yename papete kipala tokoina toapa Keraisunole takakete meki yene pa wia tukama yaki. Kini oya-lawe wia tukama yawa togatekoi oi ponokaleka poti wida nepia meamene wa einagome oka.

¹²Nitikale Sipi Sipi Kai Tineyopa eina ewetane pipia togotane po ko melepu takoa (naba 6) togotane po pilikale enekou. Enekolu momani tube mati toa ni lou tiginipa yomamu paatapeane kaa keneya likome lianeya kawa ni tokenepa kamate paatapeneya keneya kikome kitapeneya kawa ¹³ni pupulege mati

popokoa muku muku takoa kakale yomo piki ku kotia pitou toa keneya a tibuke tagoi-kitika kotimotekete pitoa ¹⁴ni pipia wane moa ewetou toa keneya tibu tiginini takoa pome ni kusa ue muke piko ta peya ni tonono wane wane peya modono takoa tokale enekou. ¹⁵Nipetepa ta piko peyake ako odene mekoi tobou ali-kiti ni kiwike lokoa ta talo tokoi-kiti ni poyo yatene yopikoi ali-kiti ni uu kamo yene ni telekole toa mekoi yene ni kueme topo toa moa egetane yene ni ta pine yene enika eni yene peya kota pikakaka tonono wane wane kakene kue pakekeka petoa pote loapipokala tokoi. ¹⁶Nitoapa tonopalaka kakene kue-palaka kayo telo ootapekete ekete toto wia kauameneye. Tobou ago memotoa takane walaike mekagome enamomotono, Sipi Sipi Kai Tineyo kotimi yotaneya kibu moamomotono, toto wia kauamene-ye wa kayo okala tokoi. ¹⁷Nipa Akolaliyo ali atoa-pala kotimi yotaneya kibu moateko oi taatekoa eni nokono, teyo edoa ete pedekamotoa-pe.

Akolaliyo 144,000 Ali Atoa

One Wa Takoa Moa Adeka Piipianeya

7 Wa enekolu edelo ali tuyono itono kolodo piko toa kotuke yopia kaate tokoli enekou. Nipa eni kolodoke titia noko pupulege itono luduka ue talikeka yomo kakokaka popokamomotoa pikoa kaate tokoli enekou. ²Nitikoli enekolu pade edelo agopa meemoa poko ago Akolaline adeka pikoa kakeneya lou witia noko lono witoa nokome eya toka. Akolaliyo itonoka kusa ueka toa potokatekoi tele lukane edelo ali tuyonopala kayo telo okome okome ³Akolalilinele takaki yenane ponoke one adeka pikakala toadete tokono, nepiamene-ye. Toa peya takakolo itonoka kusa ueka kako yomoka oyake toa potokoi wa edelo agome kayo oa kaka.

⁴Edelo agome kayo oka toa ponoke adeka piatekoi ali atoa i i wa oi motokoli yatekolu Iserelē yatene kini kini pitikoi toa ege egeta wa-kala kadukoa (144,000) ali atoa oi motokoli yatekou.

⁵Ali atoa Akolaline takoa moa ponoke adeka pikilepa

Yuda yateneke tuku kakoa tawisini (12,000) takoa moa

ni Lubene yateneke tuku kakoa tawisini (12,000) takoa moa

ni Gade yateneke tuku kakoa tawisini (12,000) takoa moa

⁶ni Ase yateneke tuku kakoa tawisini (12,000) takoa moa

ni Napesali yateneke tuku kakoa tawisini (12,000) takoa moa

ni Manasa yateneke tuku kakoa tawisini (12,000) takoa moa

⁷ni Simione yateneke tuku kakoa tawisini (12,000) takoa moa

ni Lipai yateneke tuku kakoa tawisini (12,000) takoa moa

ni Isaka yateneke tuku kakoa tawisini (12,000) takoa moa

⁸ni Sebulane yateneke tuku kakoa tawisini (12,000) takoa moa

ni Yosepe yateneke tuku kakoa tawisini (12,000) takoa moa

ni Bedamine yateneke tuku kakoa tawisini (12,000) ali atoa takoa moa adeka pikala tokoi.

Ali Atoa Kainya Mati Ake Tane Mamina

Kakeneya Koukoa Kakoimo

⁹Wa enekolu ali atoa kainya mati koukoa kakoli enekou. Nipa tube takeka de takeka pitikoi yatene ni liane yatene ni kiane yatene ni e ku akene agale patu mekoi yene enika eni yatene ali atoa padeka-kiti eida koukoa kakoli enekou. Kini kakoi toa padameka oi motikile toameneya. Eida koukoa kakoi yene tobou ago meateka walai-pala Sipi Sipi

Kai Tineta lene timini takoa kakoi. Nitoa ake tane mamina kakeneya kawa yo tali pikoa kakete ¹⁰kayo telo ekete ekete toto toa motikilepa eya agotame ako tobou ago meateka walaike meko ago tone Akolali-pala Sipi Sipi Kai Tineta tiki wa kayo oa kakoi.

¹¹Nitikoiaka edelo yatene pa tobou ago meateka walai ni ada ali-kiti ni lene kaatapeane tuyonoya-mene muke kamotoa unukoa kaatapekoi. Nitoapa ako tobou ago meateka walai lono lene timini takakoa aua pitakete Akolali kei pikete ekete

¹²Ee nimini, tone Akolali kei piatōe.

One ibini kamotokatōe. Onepa wene muno kakeneya meko. Oneke-kama e ku yatene peya lukoa meki. Ele kule telekole toa mekono, ke wa okala kama pato wa okala tokoi.

¹³Nitikoli eni ada ali-kiti padame no yatekome okome i ake tane mamina kakeneya kaki-kiti kini kawa nokoiya ne wene toko-pe wa okale ekene ¹⁴agopa toko. Noanu agopa tokoyake ne pade wene toko-kolu okome i yenepa dika dika toamene tete witaka-pete tete moa meemotekete nokoi. Kini kakene mamina ake takatapekilepa Sipi Sipi Tine kamateke tadoa abe kogete tokoi. ¹⁵Nitikoiya tekete Akolali walaike mekome lene timini takoa meko lono kakete one tobou losu yapu keneke onekele ete pia oto pia takoa kaki. Nitikili tokome ako tobou ago meateko walaike mekome itakama meamene wa one mamina yapu wiitiko moa mekoa yopiko. ¹⁶Nitoa yopikolo tokome e yene wa kobume tuamoā ue nodome tuamoā lou eya potome tuamoā toi. ¹⁷Nipa Sipi Sipi Tinepa ako tobou ago meko walai muke kakome e yenepa one sipi sipi kai tetepo takoa talo toa-kala kawoo. Nitoa mekome mea kama pomotoa toko ue lene togoka aua pokala too. Kini komo-pala teigakome teigoo.

Ewetane Pipia Togotane Po Tatono Takoa

Togotane Po Pilikale Tanemo

8 Sipi Sipi Kai Tineyopa ewetane pipia togotane po pade tatono takoa (naba 7) togotane po pilikale a tibu keneke emo kumo toa agopa tootapeka. Nipa lou pini odene teitakutukoa (30 miniti tadiya) ponoka toa nitoa kaka. ²Wa enekolu Akolaline leneke-kama kaki edelo ali tatono kakoa (7) kakete kini pukapeatekoi bera odene odene wa motokoli enekou.

³Pade edelo agome kalono taneya lobuateka mete golo kue paatapeane mete katekamo nokome Akolalike lodo yoai tane kue walai pikata kanoka. Nitikale panagome padeya kalono taneya keda takoa metekome okome ipa wini golo kue paatapeane walaike yoano ta wa meteka. Ako tobou ago one walaike mekome lene timini takakoa meko lono piko walaike uku. Nipa Akolaliyo one takoa motane ali atoame kowitikoimo odeneka dekoa yatekome yakamoto no ta wa einagome eni kalono taneya metekale ⁴moa lodo yotoka. Nitikale edelo agono yono tatonoke lodo witoa kawapa ali atoame kowitikoimo dekoa Akolaline leneke ate witoa kawa toka. ⁵Nitikale edelo agome kalono taneya lobutane mete pikoa kakome Akolalike lodo yoai tane kue walaike toe moa mete keneke lobutuka. Nititikoia eni toe lobutane mete itonoke pitikaketikaka. Nitikale tonu wia kaliapale toa momani toa toka.

Tatono Kakoa Bera

⁶Momani eya tokale edelo ali tatono kakoame (7) bera tatono kakoa (7) pikoa kaate tekete pukapeadete nodokoa kakoi. ⁷Nitoa kakete namolo edelo agome bera pukapekale tadali palene

toeta lobia pitaka. Kamate-pala eletekoa lobia pitaka. Nitikale ta piko peyake kaka yomo peya takuta takuta wa toe katekoa noamokome tebolo takane yomo-kama napekala toka. Ke wita koya peyaka toeme napetapeka.

⁸Nitaneyake taku takane edelo agome one bera pukapekale padeya tonu keneya uo mati itipono okoa kakeneya kusa ue muke pitikaketikaka. Nitaneyake kusa ue mekokaka takuta takuta wa katekoa padele toameneyake tebolo takoa-kama kamate latitapeneya meelogaka. ⁹Nitikale kusa uele yakene mou eya takuta takuta wa katea pa mea tebolo takoa-kama tukala taneya. Ue dipi-kitika takuta takuta wa katekoa padele toameneyake tebolo takoa-kama ue nakakala taneya.

¹⁰Nitaneyake tebolo takane edelo agome bera pukapekale tube tagoi a tibu kotikatapea itipono oa kakeneya kawa pitaka. Nipa yotane ue-kiti takuta takuta wa katekoa pitamokome tebolo takane uele-kama pitakala toka. ¹¹Eina tagoipa kou tokoya wa ibini iki. Yotane ue-kiti tebolo takane-kama kou takaneya tokome ali atoa peya matiyame noomoa nakete tukala tokoi.

¹²Nitaneyake tuyono takane edelo agome bera pukapekale lou tiginu tokene tiginu kakoya oto piitikoia takuta lono pa taneya kamotoa odene lono yomiyomu tootapekala taneya. Tagoi-kiti-palaka einakale taneya. Nipa loyoka likonuka lou pini oto piitikoapa takuta takuta wa pa taneya kamotoa tebolo takane lou pini-kama yomiyomu tootapekala taneya.

¹³Nitikale enoane yatekolu tegu a tibuke aka mati pukaneya yakome eya wa telo oma yakale yatekou. Ae ae ae itonoke meki peya ke enekakale-kama meoi. Edelo ali tebolo bera wete puka-peamene edelo ali-menane kini bera

pene pukapeoi tokolo ni uku wa tegume okale yatekou.

Ko Takane Edelo Agome Bera Pukanemo

9 Ko takane (naba 5) edelo agome bera pukapekale tagoi pade a tibu kotikatapea itono patu pitane tagoi enekou. Eni tagoi wa akene ago geyo nine plane koa peateko ki ina wa panagome metekale ²moa pekale toe mine lodo k̄aua witako toa lodo k̄aua witatapeka. K̄aua witatapekome louka tibuka agopa takatapeka. ³Nitikale eni lodo keneke apio iti itita kawa itono patu pitakolokaneya. Nitaneyake panagome k̄alame keneya ali wia taniateka tele lukakome okome ⁴ke luno yomo eya witakoya wia atukoa noameneya Akolaliyo ponoke adeka piipiamene ali atoa takoa poi topamene wa wetekaka. ⁵Eni wetekakilepa e yene wia tukameneya tokene ko kakoa (5) ponoka toa pa tete meai tamene wa wetekaneya. Eni tetepa k̄alame tanikolo motiki tete keneya. ⁶Tokene ko kakoa (5) ponoka toa mea eni tete motokoi yenamepa i tete teigouno, tukene tuadiya wa wili tokoa kawa teko tokale wawa oyake tuamele toamoo.

⁷Eni apio iti itita pitakilepa poike pomotoa nodokane osi kai tetepo taneya pitaneya. Kini wagokepa tobou agome watekoya nunagu golo kueme latianeya lobutukaketikaneya. Kini lene timinipa ali lene timini keneya motaneya. ⁸Kini pinepa atoa pine keneya ludukiya. Kini kimepa laione kai kime keneya etene uo mati kakeneya. ⁹Kini palanu pawe toa momotoapa padeya kapa petene keneya ewetemetaneya. Ni kini pawena lagatika lagatika toa kakilepa osi kai kainya matiyame poi dipi poike uu wa teyapea liimoo aua pekete akene tetepo takoa tokoi. ¹⁰Ni adapini munokepa kimeta tue k̄ala eya kimeta keneya kak-

eneya. Nipa tue k̄ala eyame ali tanikome tete meteko toapa tokene ko kakoa (5) ponokale-kama ali atoa wia taniamele taneya. ¹¹Eni apio wane uku yatene peya odene edelo agoke-kama lukoa mekoi. Eni geyo nine plane koa yopiko edelo agoke uku. One ibinipa Iberu agaleke Abadone wa oa Geriki agaleke Apolione wa oa tiki. (Apolione wapa nipa ali wia atukako ago wa oo.)

¹²Ali atoa wene keda takanelepa namolole toa peya takaneyake takutale pa piko.

¹³Ni ko melepu (naba 6) takane edelo agome bera pukapekale yatekolu Akolaline leneke plane walai lodo yoai tane walai golo kueme latiane walai muke agale ludu nokale yatekou. Nipa eni walai kolodo adeka pia latia kakane kime pakeke agale ludu nokome okome ¹⁴wini tube ue Yuperetise wa ibini akene ue kekulu edelo ali tuyono togotaneya pikino, poatino poe wa po kotokoa wetekamene wa oka. Ko melepu takoa (naba 6) bera pikoa kaka edelo ago-pala nimo okale ¹⁵yakamotokome nitipoka. Nipa i mali i tokene i dei i lou pini wa metane oi ponomotoa nepia meati wa ue kekulu moa togotane edelo ali-mene poe wa po kotokoa wetekakilepa eya tomotoa toka. Ali atoa ta piko peyake pitikoi toa oto pitikoa takuta takuta wa katekoa wia tukameneya tebolo takoa-kama wia tukamotoa toka. ¹⁶Eni edelo ali-mene timine kawa osi kai patu mea poi topokoi yene kakoi toa oi motikilepa ege egeta wa-kala kadukoa (200 milione) meadekoi.

¹⁷Pule pitikene enekolu osi kai ni osi kai patu mea pokoi yene dikaneya enekou. Kini palanu ewetemetane peteneya-kiti teke teke taneya enekou. Nipa toe keneya kikome kianeya ni tubo ni salepa kugu kanu pageneya keneya teke teke taneya enekou. Ni osi kai tobou wanepa laione tobou

wane keneya. Kini kabunukepa toe witoa lodo witoa salepa kugu itipono okoa kakeneya witoa toka. ¹⁸Toe lodo itipono okoa kakene salepa kugu eni witakilepa ali atoa oto pitikoa takuta takuta wa katekoa yoa tukameneya tebolo takoa-kama yoa tukakala toka. ¹⁹Eni osi kai tele pinepa kuni kabunu adapinita. Kini adapinipa kaya keneya. Nipa ali atoa wia tanikilepa adapini munoko kakene kimeme tokoi.

²⁰Nitaneyake enika eniyame katekoa wia tukameneya mekoi peyame kini yoname latikoinakeya-kiti tewitikoa wawamokoi. Nipa ipono kowitato wa golo kue ni silepa kue ni kanu pagene kapa ni pa kue ni yomo enika eniya moa latikoinakeya-kiti pa etepea kowitima pokoi. Enika eni paya gode-kitame leneme enamoa kaleme yakamoa ka ludu poamoa tamele toameneyake tokoi. ²¹Nitoapa ete ali atoa wia tukoa ni ulo eya toa ni koua piamatekoi atoa-pala koua pia ni mone panagoneya kode moa enika enile toatekoi weneka tewitikoa wawamokoi.

Edelo Agome Ewetane Pipia Deya

Pikoa Kakome Tanemo

10 Nitaneyake pade edelo ago etene telekago a tibu kawa itonoke noademe nokale enekou. Einago wedome ewetemetaneya eni noka. One tobou wanekepa kokati pia unukaneya. One lene timinipa lou pa keneya pa toologaneya. One kawatapa itipono okoa kakene yapu pigi keneya. ²Nitane agome pipia deya one yono tatonoke keaneya pikoa kaka. One kawata pogakilepa nimini yono lonopa kusa ue tali pogakoa kawa ewa yono lonopa itono patu pogakoa kawa toka. ³Nitao kakome kayo ikilepa laione kou okome ta wia piou toa keneya oka. Nitikale

tono witiki yatene tatono kakoame (7) ete wa topo takoa okoi. ⁴Eni tonu witiki yatene tatono kakoame (7) topo takoa okoimo pipiake wiane mekadene tokounake a tibu agale ludu nokome okome eni tonu witiki yatene tatono kakoame (7) okoina pa neke luaneya meano, wia mekameamene wa oka.

⁵Nitikale eya edelo ago kusa ue tali-pala itono patuta kawa pogakoa kakale enekouna edelo ago one ewa yono ate tibuke pitikakoa kaka. ⁶Nittoa kakomewa eya ago tuameneya pa meemoa pokome tibu-pala itonota kusa ue toa ni eniya-meneke pia kawa tokoya peya latiane ago ibini wedekakome eya wa oka. Akolaliyo papete wene toopi-anele wete taatekoa too. ⁷Nipa tatono takane (naba 7) edelo agome bera puka-pea kakaka one wene kibusupia kaukoa mema nekenele taatekoa too. One agale toawe akane ali-kiti papete wene taka tane toa nitoo wa edelo agome oka.

⁸A tibu agale ludu nokome okale yatekouyame nopala wa lokakome okome kusa ue tali-pala itono patuta kawa pogakoa kako edelo agono yono tatonoke pipia deya keaneya pikono, wete mopoano pa wa okale ⁹edelo ago kakata pekene mano wane oikolu okome nipa moa na. Moa nokotikakale tepene ponokome kou toatekoyake neke kimane keneke pikome koyapo ego ue meke tokoya keneya too wa okale ¹⁰one yono tatonoke plane pipia deya motokou. Moane nakilepa anu kimane keneke koyapo ego ue meke toko keneya nakouyake tepene ponokome kou tootapeka. ¹¹Nitikalepa panagome okome eya yene e ku yatene ta piko peyake pitiki yene eya kuya agale yakoa iki yene ako tobou meki ali-kiti enika eni yene kainya mati-pala Akolaliyo toatekomo i i wa neme toawe akamene wa nopala oka.

Akolaline Agale Akane Agotame Akenemo

11 Nitaneyake yapu eya adeka moatekou yobaleya panagome ina wa no metekome okome Akolaline wikakane tobou losu yapuka oneke lodo yoai tiki kue walaika adeka mopoano pa. Eida-kama Akolali kowitikala tiki yene kaki toa oi moano ta. ²Nitoo adeka moma pekepa tobou losu yapu unukoa kolago taneta katekoa adeka moameamene. Eni kolago tanetapa Akolaliyo kinino noe wa e ku pa yatene-kiti yametanya tokolo ni uku. Eni pa yenamepa anu wane takoane moane talo tuku Yerusaleme ta wia kautoi. Tokene padeka ketepo kakoa (42) ponokale-kama nitoo meoi. ³Nipetepa anu agale toaweaa akatekoi alita takuta moane wetekakolu kuku patapeane mamina kakeneya neketepa ege egeta wa-kala kadukoa (1260) ta pataka toa-kama anukumo toaweaa akama yawei.

⁴Einagotapa ta piko peya yopiko ago Ali Munono leneke kakeneya-mene olipe yomota takuta ni labo piatikiy-ata takuta adeka pianeya kaki. ⁵Pade-kitame einagota tete mea enekolipa einagotane kabunuke toe witakome kita-pala poi teigoi yene yoa tukakala too. Kita-pala poanele tokoi yene edikoa tukala toi. ⁶Einagotame Akolaline agale akama yakoika one tele patu kautakoa kakete ta pitamomotoa a tibu ketekamele too. Ni yotane ueka mine ueka kamate latiameme too. Itonokeka ali atoa eya kuya yene momotoa tamele too. Enilepa einagotame ipete kupete kini wene witika toa nitamele too.

⁷Einagotame Akolaline agale toaweaa akoo togakolipa yo tane kai keneya agome einagota-pala poi tonokome moa atukoa tukoo. Eina geyo nine koa keneke mea nokome nitoo. ⁸Nitikalepa

einagotane tigini eida ibini akene take Sodome Idipi wa pedoa akene take bateteke pa piei. Eida pitikali pitikoi taapa kini Ali Munoo wia dekane take uku. ⁹Eida ta tebolo-peta lia patoa wa tuyono takoo toka pakeka eya yename e ku yatene eya kuya tigini kakene yene eya kuya agale patu mekoi yene ta piko peyake mekoi yene enika eni yene padeka-kitame einagotane tigini enoai toa kawake oloyo tamene kote tokale wawei. ¹⁰Einagotame papete itono peku noai tane yene dika dika toamene tete meou toa wene keda takakala toi. Wa naniko yo tane kai keneya agome einagota wia tukakale eni yename ke wa wedia mekete eya kuya epetaneya ete oto wa topo toa mekala toi. ¹¹Nitikolika ta tuyono takaa pakeka Akolaliyo einagotane timinita nipukakoo pome pukapekale kamokoata kakoi. Nitikoli enekoi peya piti mea tagatapeneya kakoi. ¹²Nitaneya kakakoo einagotame yatekoi a tibu agale ludu nokome okome i agota oto noe wa okale yakamotekete wedo patu mea a tibuke atepea pokoi. Nipa kita-pala poi teia mekoi yename enekoo kamotoa pokoi. ¹³Nitikoli eina eina momani toka matiyame eni ta muku muku tootapekale yapu kaka toa-kama pogi kakoo-kala (9) katekoa kiliameneya odene-kala takoo kilikala taneya. Ali atoaka ege egeta wa-kala kadukoo (7,000) tuutapeneya. Nitaneyake katea tuamokoi yene piti mea taganeya mekete a tibu meko Akolali kei pia kakoi.

¹⁴Ae, enipa taku takoo ke enekakoleno, tebolo takoo ke enekatekolepa tigotoma noko.

Tatono Takaka Bera Ka Okale Toatekamo

¹⁵Tatono takane (naba 7) edelo agome one bera pukapekale a tibu

agale ludu-kiti telo nekete ekete itono talo tikilepa tone Ali Muno Akolali one Keraisutame-kama tiki. Keraisu einagome talo toa-kala kama poo wa okoi. ¹⁶Nimo okoli eya ali-kiti Akolaline leneke kini walai-kitike mekoi ada yatene pagini kakoa (24) aua pitalogoa Akolali kei pia kakeneya.

Nitikete ekete

¹⁷telekole-kama toko Ali Muno Akolali namolo namolo mea opi opi meemoa poko ago ne-pala ke wa oko-ye. Neke telekole toatekole opi taatekoa tokome ta piko peya titia talo tokolo ni oko. ¹⁸Neke agale wakene yene kotimi yoa kakeneya. Opi kini tanele topo takoa neme kotimi yoa kibu moade toko. Tuname ali atoa takoa enoa akateko-petepa opino ta. Ni nekele takoa neke agale toawe akoa tane alikiti ni neke takoa motane-kiti ni neeke nate wene pianeya mea kowitiki yene peya ponopeneyaka ibini akene yeneka eni yene peya-pala ke wa neme pewe wia kawatekole taatekoa toateko-petepa opino ta. Ni ta piko peyake pitiki ali atoa toa potokaki yene kini tikile neme topo takoa moa atukateko-petepa opino ta wa a tibu agale ludu-kiti nekete okoi.

¹⁹Nitikoli a tibuke Akolaline tobou losu yapu kago pekale bokosi wane keleyo pikale enaneya. Akolaliyo kiwi talo toane auapeouno, dikamene dikamene wa one yene-pala oa togotane agale lobutane bokosi wane enaneyake katiapale toa tonono wia momani toa tadali palene-pala loboa pitikoa toka.

Atoa Pade Pukupukutame Tanemo

12 Nititikaneyake enekolu a tibu eya adeka witakale enekou. Atoa padame mamina moa kawou toa lou moa kakeneya kakale enekou.

Tokene patu nitaneya kaka. One tobou wanekepa tagoi tuku kakoa (12) payapono pia unukaneya. ²Einatoame mati pene opiademepa mukiti nakale ka oa kaka.

³Nitikale eya adeka a tibu kikome kiane pukupuku uoya witakale enekou. One wagopa tatono kakoa (7) kawa one kimepa noi kakoa (10) kawa taneya. One wago kaka peyakepa ako tobou meane ago watekoya nunagu noi kakoa (10) watekolokaneya. ⁴Nitaneya kakome adapini kogakomepa a tibu tagoi tebolo tebolo wa kaka toakama takuta-kala katekoa pa kamotoa odene-kala takoa kotia itonoke wia pitikakala toka. Mati opiateka atoane leneke kakome pukupukume nitoa kaka. Nipa one mati opikaka dekoane moane nou wa wene pianeya kakome toka. ⁵Nitikaka einatoame mati opikilepa pitikali ta piko peyake pitikoi toa yopiateka mati eni opika. Kapa wapi pikoa kakome yopiateka mati eni opika. Opikale eina eina padame mati dekoa moa Akolali ako tobou ago meateka walaike mekata aua poka. ⁶Nitikalepa einatoa ali piamene take Akolaliyo one nodokapiane take pitoa poka. Pitoa pome mekalepa ta pataka ege egeta wakala kadukoa (1260) ta pataka toa padekitame einatoa eida pikoa mekoi.

⁷Ni pade a tibu poi tageneya. Nipa ako tobou edelo ago Maikaleyo one edelo yatene poi kamotokoa pukupuku-pala poi topokale pukupukume one edelo yatene-pala poi tato wa ete poi toa kaka. ⁸Poi tokoa kawa teko tokale wawa aida a tibu pa meamele toameneya tokome ⁹one edelo yatene-pala dekoa moa itonoke wia pitikaketikaneya. Pukupuku wane uku agopa kaya wa koto akene agoke uku. Kaya wanepa tobou ipono Setanu ali atoa peya likoa enekala toko agoke uku.

¹⁰Wa yatekolu a tibu agale ludu telo nokome okome Akolaliyo ali atoa toa moa telekole toa pawe toa talo toa toatekole opi taatekoa toko. One moa kakapiane ago Keraisyuo one patu kautakoa kakome enile taatekoa tokolo uku. Akolaline leneke kakome tone oya-lawe ete pia oto pia akakago Setanu wete moa wia pitikaneya tokolo ni toko. ¹¹Tone oya-laweme einago Setanu-pala poi toa kawa moa kautakilepa Sipi Sipi Kai Tine kamate patu kautakoa kawa onekemopala akama yawa tekete tokoi. Nipa kini kepene mama moameketepa kipala poi teiane yename wia tukakolipa oyake tuou wa atiki toa tokoi. ¹²Nitikala tokoino, a tibu meki peyame ke wa wedia kamene-ye. Nitamene wane ukuyake itono patu ni kusa uele meki peya tumai meamene-ye. Setanu einago kiwi mekita wida noka tokolo ni uku. One takoa poateko tigotokono wene taneya tokome kotimi mati yotaneya wina noka.

¹³Eina pukupukumepa ae itono patu wia pitikaneya meadeku wa wene tokome eina ali mati opikana atoa wiuu wa litimoa poka. ¹⁴Nitikalepa einatoa ali piamene take pukaneya petoa pomotoa tokome Akolaliyo tube tegu pawenata moa kakaka. Pukupukume tuku toa enamuamateka take pukaneya pome paigakoa memotoa ni toka. Mali tebolo ponomo wa tuyono takaka pakeka ponomotoa poti paigakoa memotoa latiane take uku. ¹⁵Einatoa eida petoa pome mepokaleka ueme dekoa moa aua pomotou wa pukupukume ue kapea wetekaka. ¹⁶Nitikaleka itonome i atoa toane mou wa itono lobokome pukupukume kapea wetekane ue einaka lobutupaneya. ¹⁷⁻¹⁸Nitikale enekome pukupukume eina atoane ete mati-kiti-pala poi topouno, nepio wa poi topoka. Einatoane ete mali-kitipa Akolaliyo tamene wa akenele litia toa

ni Yesunomo toaweaa akoo tiki yene. Pukupuku kusa ue matanuke kaka.

Yo Tane Kai Keneya Agotame Tanemo

13 Wa enekolu padeya yo tane kai keneya uoya kusa uele mea atepea witalake enekou. Nipa kime noi kakoo (10) kawa ni wago tatono kakoo (7) kawa taneya witoa noka. One kime kaka toa-kama tobou alime watekoya nunagu watekolokaneya. One pono-kitikeka Akolali paya tetepo takoo akene ibini wia mekakolokaneya. ²Anu eni enekouyapa eya-mene keneya. One tiginipa lepade wa ibini akene pusi keneya. One kawapa bea kawa keneya. One kabunupa laione kabunu keneya. Nitaneya witalake pukupukume one tele patu kautakoo kake ta piko peya yopikoo kamene wa one memotoa takane walai yameteka. ³Eni yo tane kai keneya ago one wago-kiti pade paa kakene tetepo taneyake lataneya. Lataneya kakale enekete itono peku noai tane yene peyame ae wa wene kainya pianeya one litima yakoi. ⁴Nitoapa neuwe tukua mekete pukupuku-pala ke wa ootokoo one kei pia kakoi. Nipa eni yo tane kai keneya ago one patu kautakoo mekome ta talo toa memotoa tokale tokome ni kei pia kakoi. Nitikete yo tane kai keneya agooka kei pikete ekete neke yagono ago pade kakileka toamoko. Ne-pala teyo edoa poi tomotoa-pe wa kei pia kakoi.

⁵Eni yo tane kai keneya agome mate agale oa pademo pademo poanemo oa tomotoa ka yametane toa pukupuku patu kautakoo kakome nitoa meka. Nipa tokene padeka ketepo kakoo (42) ponoka toa-kama nitoa meka. ⁶Nitoa mekome Akolalika one ibinika one mekatoka a tibu mekoi-kitika eni peya paya tetepo takoo poanemo oa kaka. ⁷Eni yo tane kai keneya agome Akolaliyo takoo motane yene-pala poi toa moa kawikamotoa ka yametane toa

pukupuku patu kautakoa kakome de take tube takeka pitikoi yatene ni eya kuya agale yakoa okoi yatene ni liane yene kiane yene talo toa memotoa ka yametane toa talo toa meka. ⁸Ta piko peya pitikoi yename one kei pia kowitoai toi. Nipa wia tukane Sipi Sipi Kai Tineyo pikoa kakene bokuke ibini katekoa wia mekapiamene yename nitoi. Akolaliyo itono wete latia pi-ameneya kakome mea kama poatekoi yene i i wa kini ibini wia mekapianeyake eni yene katekoa ibini wia mekameneya.

⁹Yakou wa kale piiyakakoa kaketepa nipa kipala eya ukumo wedoa yakamene. ¹⁰Akolaliyopa mone take po kakaneya toa pote mepatekoi yene i i wa wene toopiane toa taatekoapa mone take toa pote mepoi. Ni tueme kageneya tuatekoi yene i i wa wene toopiane toa taatekoapa tueme kageneya tui. Nitoino, Akolaliyo takoa motane yene ke enekakale meketeka onekele wedoa takoa togamediki.

¹¹Wa enekolu pade yo tane kai keneya ago itono kekulu mea witoa nokale enekou. One wagokepa de kime dey-ata sipi sipi kai tine kime keneya kak-eneya. Agale ikilepa pukupuku tobo to-bome oka toa keneya oka. ¹²Nitika agome namolo yo tane kai keneya ago one wago-kiti pade poa kakeneyake la-tane ago patu kautakoa kakome eya toka. Ta piko peyake pitikoi yename namolo kai keneya ago kei pia kowita-motoa tika tika toa kaka. ¹³Nitoapa ali atoa wene kainya pikanele ele kule telekole tokome eyaka toka. Ali atoame enekakoa a tibu toe witoa itonoke pitamotoa toka. ¹⁴Ka yametane toa namolo kai keneya agonole telekole eni takama yakome tokome ta piko peyake pitikoi yene oa yotokakala toka. Nitoa yotokakome okome tueme kageneyake lataneya kako kai keneya ago kei pi-amene. One yomini kueme latia kakoa

nitamene wa tika tika toa kaka. ¹⁵Ni-tikale yomini latia kakakolipa namolo kai keneya agono tele patu kautakoa kakome eni yomini timini nipukakoa pome pukapekale eni yominime agale oa kaka. Nitoapa one kei pia kowitamadete wakoi yene wia tukamotoa amele toka.

¹⁶Nitoo mekomepa ta piko peya pitikoi yene ibini wamene yene ibini akene yene kamo yene ponopene yene kueme topo toa moa egetane yene ta pine yene kiwi peya nimini yonokeka ponokeka one adeka pikamotoa tika tika toka.

¹⁷Nitaneyake one adeka moamene kote motane yene kiwi pa meati wa kini nee mamina eya topo toa moatekoi ka ketekakale padeya deyaka topo toamele toameneya pa mekoi. One eni adeka pikamotoa ikilepa one ibinika one ibini aue paia akene nabaka ali atoane yonokeka ponokeka pikamotoa oka.

¹⁸Kipala ina ukulekepa wene muno kakoa meamene. Wene muno kakene agomepa yo tane kai keneya ago aue paia akene naba i wa wene too. One naba wane ukupa aline ibinike uku. One nabapa eya 666.

Keraisuyo Toa Motane Yename Lo Okoimo

14 Wa enekolu Sipi Sipi Kai Tine Kati Saione tobou waneke aida kakale enekou. Ali atoa ege egeta wa-kala kadukoa (144,000) one-pala aida opia kakilepa kini ponoke one ibini-pala oneketaine ibinita wia mekaneya kakoi. ²Nitaneya kakoli enoane yatekolu a tibukepa ue uu wa yoa kawa tono bu wa wia tane tetepo tootapekale yatekou. Nipa ali peya matiyame gita wia kakene tetepo tokale yatekou. ³Gita eni witikilepa ako tobou ago meateka walai lene timini takoa kakete tokoi. Nipa lene kaatapeane tuyonoya-mene ni ada ali-kiti kini leneke kakete weneya lo oa witikoi. Eni loopa eya yename

ege egeta wa-kala kadukoa (144,000) itonoke Setanuke lukoa meaneya oto toa motane yename odene wene toa okoi. Ete-kitame wene toa okoiya mena. ⁴Atoa-pala koua piameneya tiobalika kama meou toa poanele toamene yeneke uku. Ni yenepa Sipi Sipi Kai Tine pokaka litima piki. Eni yenepa papete itonoke ete yene-pala dekoa Setanuke lukoa meaneyake Akolaliyo one wa oto toa motaneya. Nipa ipe pine agome ipe kakoya nee pegetoa moa Akolaline pikou toa keneya tokome eni yenepa Akolali Sipi Sipi Kai Tine-tane pegetoa takoa motaneya. ⁵Eni yenepa kapene agaleka wamoa poanele padeleka toamoa taneya mekoi.

Edelo Ali Tebolo-mene

⁶Wa enekolu a tibu tugini pade edelo ago pukaneya yakale enekou. Ni agome Yesunomo pa pia kawateko agale ali atoa pitikoi toa i i wa akama yakilepa tube takeka de takeka pitikoi yene ni eya kuya agale yakoa okoi yene ni liane yene kiane yene pitikoi toa pukaneya yakome oma yaka. ⁷Nitoapa telo okome okome Akolali piti motaneya meo. One kei pia kawe. Akolaliyo ali atoa takoa enoa akateko oipa opino nitoatino toe. Eya ago tibuka itonoka kusa ueka ue lene togoyaka latia pia mekoa tane ago kei pia kowitoe wa pukaneya yakome oma yaka.

⁸Namolo edelo ago noka toa edelo ago taku takoa litimoa noka. Nokome okome ae Babilone ta kilitapeneya piko. Ibini akene Babilone take pitikali pamoko atoa tetepo takoa mekete ta piko peya pitikoi yene one peku i lawetekuno, noa tamene wa waine ue lawetou toa toa potokaneya wa pukaneya yakome oma yaka.

⁹Eni edelo agota nokoi toa edelo ago tebolo takoa litimoa noka. Nokome telo okome okome yo tane kai keneya ago-

pala one yominita kei pia kowitoe ni one adeka kini yonokeka kini ponokeka pikamotoa tane yenepa ¹⁰Akolaliyo gerepi po uepa tugini ko akateko ue-pala eletekameneya mete keneke mekoa lawetademe toko. Enipa eni yene-pala kotimi yoa tete meatekolo toko. Eni yo tane kai keneya ago kei piki yene tete eni metekilepa onekele-kama takaki edelo ali-kiti Sipi Sipi Kai Tine-pala kakakoa salepa wa akene kue noa kakota toe mine moa pitikademe toko. ¹¹Eni toe mine mekete tete moatikita lodo kawakala kama poademe toko. Eni yo tane kai keneya ago kei pia kowitoe mea ni one ibini adeka pianeya mea tiki yename ete pia oto pia tete mokoa-kala kama poadete tiki.

¹²Kipala ina ukulekepa Akolaline ali atoa oneme tamene wa akenele litia toa Yesuke-kama wene tugoa mea tiki yenepa ke enekakolo meketeka onekele poti takoa togamediki.

¹³Wa yatekolu a tibu agale ludu nokome okome eya wa wia mekamene. Opi titimoa Ali Muno agonole takama pote tukoi yene kolotine meoi wa okale yatekou.

Nitikale Epetane Yominiyo okome enipa nimini oko. Kini pupu tokoa kawa kilikoa meamokoiyake ko meakala kama poi. Tukilepa toake kini epetanele tokoile-pala kama aua poi wa oka.

Itonoke Mekoiya Wakoa Moatekamo

¹⁴Wa enekolu a tibu ake tane wedo wane pikale enekou. Eni wedo patu ali yatenane mana keneya ago eni mekona. One wagokepa ako tobou agome watekoya nunagu golo kueme latiane wane wateaneya. One yonamepa olo kakene kepete tue pikoa meaneya. ¹⁵Nitaneya mekaka pade edelo ago tobou losu yapu keneke mea noka. Nokome wedo patu meka ago-pala kayo telo

okome okome itonoke mekiya wakoa momotoa nodokaneya mekino, eniya wakoa moateko oipa opino, neke kepete tueme wakoa moamene-ye wa kayo okale ¹⁶wedo patu meka agome one kepete tue ta piko peyake tapia wakakilepa eniya peya wakoa mootapeka.

¹⁷Wa enokolu pade edelo ago a tibuke kakene tobou losu yapu keneke mea nokale enekou. Einagomeka olo kakene kepete tue pikoa kakeneya noka.

¹⁸Pade edelo ago tobou losu yapuke toe yomotoa yopika edelo ago lodo yoai tane walai kawa noka. Nokome olo kakene kepete tue pikoa kaka ago-pala kayo telo okome okome itonoke gerepi po ipe ludu kũ apa apata putaneya tua kikutua kakono, neke kepete tue moa pono teimoa mootapeamene wa okale ¹⁹one kepete tue ta piko peyake tapia wakakomepa kũ tuka wakoa mootapeka. Wakoa mootokoapa kawame kautoa tija lobutatiki kagono uoya waneke moa pitikoai toka. Enipa Akolaliyo one wakene ali atoa kotimi yoa kibu moateka adeka pikome toka. ²⁰Kagono waneke kawame kautoa tigilepa ali atoa pitikoi ta ete pimotoa ta kago ketepono patukoa akolono taneya. Nitaneyake gerepi po kũ ue you toa kamate mea kapea yokoa kaka. Nipa ege kadukaka ko melepu kakoa kadukoa (300) kilomita tadiya yotikilepa osi kai kabunu kotuke keneya mea motaneya yokoa kaka.

Edelo Ali Tatono Kakoame Ke Enekatekoya

Tatono Kakoa-pala Aua Nokala Tanemo

15 Wa enekolu a tibu padele tubele wene kainya pikanele witakale enekou. Enipa edelo ali tatono (7) kakoamepa wipitia toateka ke enekatekoya tatono kakoa-pala aua nokala tokoi. Nipa Akolaliyo ali atoa

kotimi yoa mea peya takatekale aua nokoi.

²Wa enekolu gilasime latiane kusa ue toe-pala eletekane tetepo taneya meelogakale enekou. Wa enekolu e ue mekoya liti eina yo tane kai keneya ago-pala poi toa moa patukane yene kakoli enekou. Einagono yomini kei pia kowitamoa ni kini yonokeka ponokeka one ibini aue paia akene naba wia mekamene kote tokale wawa tane yeneke uku. Ni yenamepa Akolaliyo metane gita keneya pikoa kakala tokoi. ³Nitoapa eya agotane lo Akolaline pupu takane ago Mosese ni Sipi Sipi Kai Tinetane lo eya wa oa kakoi.

Akolali nepa ako odene meke telekole toko Ali Muno ago. Padele padele tikilepa telekole-kama toa ali atoane wene kainya pikanele-kama toa toko. Ele kule tikilepa kiyo akenele-pala niminileta-kama toko. E ku yatene peya neeke-kama lukoa meki. ⁴Ali Muno ne piti moamoko ago odeneka kawamoko. Neke ibini wedekoa ne kei pia toamoko ago odeneka kawamoko. Poanele tikileka toamene ago ne odene meko. Ta piko peyake pitiki yene ne mekota-kama nekete ne kei pia kowitoi. Neke kiyo akenele-kiti keleyo witatapeneya tokome nitoi wa kabunu koukotukoa oa kakoi.

⁵Nititikaneyake enekolu a tibu Akolaline yapu kago peaneya pikale enekou. Nipa Akolali odene memotoa takane yapu luku keleyo enekou. ⁶Eni yapu keneke edelo ali tatono kakoa (7) witoa nokoi. Witoa nekete ke enekatekoya tatono kakoa-pala aua nokoi. Abe kootapeane mamina kakeneya nokoi. Eni maminapa ake tootapea yadi yadi taneya. Golo kueme latiane po-pala moa palanu lutaneya nokoi. ⁷Nitaneya nokoli lene kaatapeane tuyonoya-mene

padamepa golo kueme latiane mete tatono kakoa (7) inoe wa e edelo ali tatono kakoa (7) tatikamu toka. Mete wane ukupa tuameneya meemoa poko Akolaliyo kotimi yoa kibu moateka adeka pia kapetekane meteke uku. ⁸Mete tatikamu tokale tobou losu yapu keneke Akolaline pa teleta witatapekale lodo yoa tagaka. Lodo yoa tageneya tokome odene agoka eida lobutua pamele toameneya. Nipa edelo ali tatono kakoame (7) ke enekatekoya tatono kakoa-pala aua nokoi toa wete toa togameneyake eida lobutua pamele toameneya.

Akolaliyo Kibu Moateka Adeka Pia

Kapetekane Mete Tatono Kakoake Akenemo

16 Nititikaneyake tobou losu yapu keneke agale ludu eya wa nokome okale yatekou. Akolaliyo kotimi yoa kibu moateko adeka pia kapetekane mete tatono kakoa (7) itonoke pekoa pipokala tamene wa tatono kakoa edelo ali-kiti-pala telo okale yatekou.

²Nimo okale namolo edelo ago pome one metepa itonoke pekapoka. Nitikale eina yo tane kai keneya agono adeka wia mekaneya mekete one kei pia kowitiki yene kini tiginikepa tete tane tonu tumitapeka.

³Nitikale taku takane edelo ago pome one metepa kusa ue talike pekapoka. Pekapokale eina kusa uepa tuane agono kamate latitapeane tetepo taneya meelogakale ue mekoiya peya tuutapekoi.

⁴Nitikale tebolo takane edelo ago pome one metepa ue yotokaka ue lene togoka peyakeka pekatapekale kamate latitapeneya. ⁵Nitikale yatekolu e ku ue yopiko edelo agome eya wa okale yatekou. Nepa namolo namoloka opi opika poanele tikileka toameneya

meemoa noko. Ne nitiko agomepa ali atoame tikile kiyoke-kama takoa enoa akakala toko. Opika i ke enekakoya witakakilepa kiyoke topo takake toko. ⁶E yenamepa neke takoa motane yene ni neke agale toawe akane ali-kitika kini kamate ponomotatoe wa wia tukakala taneya. Kini eni tanele opi topo takake i kamate latitapeane uepa noati wa neme yametekana. Moke eina wa edelo agome okale yatekou. ⁷Akolalike lodo yoai tane walaike agale ludu eya wa nokome okale yatekou. Telekole-kama toko Ali Muno Akolali ali atoame tikile neme takoa enoa akakilepa niminile toa kiyoke-kama toa toko wa oka.

⁸Nitikale tuyono takane edelo ago pome one metepa lou patu pekapoka. Lou potome ali atoa yoa tukamotoa tokome ni toka. ⁹Lou potome yoa tukakale eni yename Akolaline ibini paya tetepo takoa oa kakoi. I ke enekakole memotoapa neme toko wa poanemo oa kawapa kini namolo poane wene wia wawamoa one kei piamoa tokoi.

¹⁰Nitikoli ko takane (naba 5) edelo ago pome one metepa eina yo tane kai keneya ago memotoa takane walaike pekapoka. Nitikale one yopika taapa yomiyomume agopa takatapekale ali atoame dika dika toamene tete moa kakete tekete kini keke noa teigala tokoi.

¹¹Nitoapa tonu tumitapea tete metekopa Akolaliyo neme toko wa poanemo oa kawapa kini tokoi poanele tewitiko wa wawamokoi.

¹²Wa ko melepu takane (naba 6) edelo ago pome one metepa ibini akene Yuperetise uele pekapokale wete tokotapeka. Lou witia noko lono mekoi tobou ali-kiti patukoa noatekoi ka eni nodokaneya pimotoa tokome ni toka. ¹³Nitikale wa enekolu poane iponu tebolo tege tetepo taneya witoa nokoli enekou. Nipa eya-menane kimane

keneke pukupuku ni yo tane kai keneya ago ni nani toatekale kapene yokoa yameteka ago kini kimane keneke witoa nokoi. ¹⁴Ta piko peyake tobou meki ali-kiti mekika Akolali-pala poi topato wa padele padele tubele toma yawatiki ipono-meneke uku. Nipa telekole-kama toko Akolaliyo ipete wa oi meteka toa poi kamotokama yawadete tiki.

¹⁵Ipa Yesuyo okamo ukuno yakamene. Kode ago keneya kotikatapeane nouno, mamina kawameneya ya tokale mekayano, wedoa nepia meamene. Atu piameneya mekome mamina kakeneya kako agopa kolotine meamele toono, wedoa nepia meamene.

¹⁶Eni ipono-mename tobou ali-kiti poi kamotokakilepa eya take Iberu agaleke Amagedono wa ibini iki take oa kamotokoa obokakoi.

¹⁷Nitikoli tatono takane (naba 7) edelo agome one metepa a tibuke pekatapeka. Nitikale tobou losu yapu keneke ako tobou ago meateka walaike agale ludu nokome telo okome okome eina toatekale taatekoa tootapeka wa okale ¹⁸katiapale toa tonono bu wa wia kawa momani mati toa toka. Momani mati eni tikilepa Akolaliyo ali atoa latia mekane-pete laigoa momani toma nekene toa moa patukakome namolo toamokanakale eni toka. ¹⁹Nitikale eni ibini akene taapa ete oto wa puutapeneya. Ta piko peyake pitikali yapu wia mekoi toa bu wa kilitapekala taneya. Nipete Akolaliyopa ibini akene Babilone take yename poanele-kama toma nekenele wene taneya mekome kotimi yoa kakome gerepi po ku ue lawetou toa keneya dika dika toamene tete mea kaka. ²⁰Eyaka toka. Kusa ue muke piko ta peya takoa pootapea tubeya kako tonono-kitika takoa pootapea toka. ²¹A tibukeka tadali palene keda taneyakama pitakome ali atoa wia kautapeka.

Eina pitaka palene wane pade moa keda oi motokoli padeka noi kakoa (40) kilo tadeka. I ke enekakole memotoapa Akolali neme toka wa eni tete mati metekake ali atoame poanemo oa kakoi.

Ibini Akene Pamoko Atoake Akenemo

17 Mete tatono kakoa (7) pikoa kaate tokoi edelo ali-kiti padame no kakouta nokome okome ibini akene pamoko atoa kibu moatekale yameouno, noo. ²Itonoke tobou mekoi ali-kiti onepala koua pikala tokoi. Ni ta piko peya pitikoi yename one eni peku noa tato wa waine ue nokoa kawou toa keneya leau akeneya etepea toma pokoi. Pamoko atoa wanepa tube ue-kiti yotokoya liti latianeya ibini akene take uku wa edelo agome oka.

³Nimo okale Epetane Yomini nooke awinokale edelo agome pata wa ali piamene take no moa aua pome mekapoka. Eida atoa pade kikome kiane yo tane kai patu mekale enekou. Eni kaipa wago tatono kakoa (7) kawa ni kime noi kakoa (10) kawa taneya. One tiginikepa Akolali paya tetepo takoa wia mekane ibini wia mekakolokaneya. ⁴Einatoapa kudulu ue pagene mamina kikome kiane maminaka kawa ni padeya padeya golo kueme latianeya kabe pia yonoke mekoa ni eya kuya yadi yadi tane kamo kue wane deya ni kamo pilu poke apetoe kabe pia kaloa kaka. One yonamepa golo kueme latiane mete pikoa kakilepa ele kule ya tanele one pamoko atoa mekome toa potokaneleka mete kagonoke mekoa kabe koukoua pikoa kaka. ⁵One ponoakepa aue paia eya ibini wia mekaneya. Ipa ibini akene Babilone ta. I take-kama pamoko atoa aloa ele kule ya tanele titia toa ta piko peyake weamutukala toko wa wia mekaneya. ⁶Wa enekolu einatoame waine ue nokoa kawou toa ali kamate

abetema yaka. Nipa Akolaline ali atoa ni Yesunomo oa aua yakene yene wia tukama yaka.

Einatoa enekene wene kainya mati pianeya mekou. ⁷Nitikolu edelo agome no yatekome okome wene kainya pianeya mekilepa edekolo toko-pe. Eni kai patu meko atoa eni kaita neme enekopa eya toatekolo toko. Wago tatono (7) kakoa kime noi (10) kakoa taneya kakale enekana kaipa ⁸papete meaneyake opi meamene tetepo taneya mea wa wipitikome geyo nine plane koa pikoka mea witoa noo. Tua atuademeke nitoo. Witoa nokale eneketepa Akolaliyo takoa wakene yene wene kainya pianeya kawei. Akolaliyo itono latia pikomepa meemoa poatekoi yene i i wa ibini wia mekane bokuke ibini katekoa wia mekamene yeneke uku. Eina kaipa papete meaneyake opi meamene tetepo taneya mea wa wipitikome witoa noo wa eni yene wene kainya pianeya mea ka oa kawei.

⁹Ina ukulekepa wene muno kawa wedoa tetoa enamene. Kai wago tatono (7)kakoapa tono tobou tatono kakoa (7) adeka pianeya kako. Pamoko atoa mekotake uku. Kai wago-kitipa tobou ali tatono kakoa (7) adeka pianeya kako. ¹⁰Tobou ali tatono (7) kakoa meki-kiti ko kakoa (5) mea tua atuaneyake odene ago opi pa meko. Ni pade ago nani taatekoa noo. Taatekoa noateka ago nokomepa pa tekei nome meoo. ¹¹Eya kai papete meaneyake opi meamene tetepo taneya meko kaipa ketepo takoa (naba 8) nome meateko tobou ago adeka pianeya kako. O tobou agopa e tatono kakoa (7) tobou ali-kitane yagono ago. Oneka tua atuademe toko.

¹²Kai tobouke kime noi kakoa (10) kakeneya neme enekapa tobou ali noi kakoa (10) taatekoa noatikili toko. Eni tobou ali-kitipa kini yopiatekoi ta wete yameameneyake wa naniko ali atoa

pitiki toa tatite toa odene lou pinike eni kai-pala pa tekei yopikala toadete tiki. ¹³Eni tobou ali noi kakoa (10) odene wene pianeya meketepa e kaipa kini tele patu kautakoa kakome e ku yatene yopimotono tato wa oi pedoa pia toi. ¹⁴Ni-toapa Sipi Sipi Kai Tine-pala poi topato wa poi topokolika Sipi Sipi Kai Tineyo moa patukatapeoo. Onepa ako odene Ali Muno mea ako odene tobou ago mea tokome eni tobou ali noi (10) kakoa-pala ete wa poi toa kawa moa patukatapeoo. Nipa one takoa moa kayo oa motokale onekele wedoa takama yakoi yene-pala poi kibutua moa patukatapeoo wa edelo agome nopala oka.

¹⁵Nimo ootokoa kakome okome neme enekana ue-kiti pamoko atoa kautakoa meko ue-kitipa eya adeka pianeya yotoko. Tube takeka de takeka pitiki yene e ku yatene eya kuya tigini kakene yene eya kuya agale yakoa iki yene kabe koukoa adeka pianeya yotoko. ¹⁶Eni kaimeka one tobouke noi kakoa (10) kakene kimemeka pamoko atoa-pala kotimi yoa meoi. Nitoa kotimi yotokete onekeya wia tadekatapekilepa one mamina kawameneya kakene tetepo taneya memotoa toi. One melepuka teia nootokoapa natipu moa toele yoi. ¹⁷Nile tikilepa Akolaliyo kini tepene lukakana toa toi. Nipa e noi kakoa (10) tobou ali-kitamepa o kai kini tele patu kautakoa kakome ta piko peya yopiateka oi pedoa pikilepa Akolaliyo papete wene toopiane toa toi. Akolaliyo one papete oa mepiane agale taatekoa toa togakaleka nitoa meoi.

¹⁸Neme enekana pamoko atoapa eina ibini akene ta adeka pianeya kako. Oneke-kama ta piko peyake ako tobou meki ali-kiti lukoa meetapeki.

Babilone Ta Wia Kilikanemo

18 Wa enekolu pade edelo ago a tibu koa nokale enekou. Ele kule

telekole tamele tane ago pa tane mati nokayame itono pa toologaka. ²Nitoa nokome kayo telo okome okome ibini akene Babilone ta kiliadeko. Etene kilipapeneya tokako. Opi eni tumu tokaneya piko ta ludu Setanuno yagono-mikiti poane ipono eya yawa meki. Kekaneya latikoa wakene ini yatene poane ini yateneka eida koukoa meki. ³Ta piko peyake pitikoi-kitame i atoane peku noa tato wa waine ue nokoa kawou toa keneya leau akeneya etepea toma pokoi. Itonoke tobou meane ali-kitame one-pala koua pikala tokoi. Topo lene kiane yename einatoa-pala padeya padeyata topo toai tekete kamo tootapeneya mekoi wa oka.

⁴Nimo okale wa yatekolu a tibu pade agale ludu nokome okome anu yene wini ta toa noatino, noe. One poanele tokole kimeka toa one ke enekakolo mea tete moatekole kimeka moa takayano, noe. ⁵One toko poanele pala auma mati a tibuke pome motoko. One eni toko poanele i i wa Akolaliyo wene taneya meko. ⁶Ete yene-pala poanele toka kotuke-kama kakoa topo takoa kibu moamene. One eni toka poanele topo takakilepa takupeta topo takakala tamene. Einatoame poane peku lawetekana toa topo takakilepa iyapa na wa one mete kagonoke padeya kou toko mati pekoa lawetamene. ⁷Einatoa one wa ibini kamotokoa eya kuya kamoya moologaka toa kotuke kakoa tete mea tumai mekoa tamene. One tepene eya wa mate agale oa meko. No i atoapa ako odene tobou atoa meku. Nepo atoa meamuku. Tumai edoane memotoa-pe wa oko. ⁸Nitikonono, ele kuleme ke enekakale meatekale-kama kotikatapea witoo. Nipa odepeta tua tumai enoa kobume tua too. Nipetepa toeme napetapeoo. One tokole takoa enoa kibu motoko agopa Ali Muno Akolali. Ni agome telekole-kama tokome

enika enile taatekoa too wa a tibu agale ludu nokome okale yatekou.

⁹Einatoapa toeme nokoa kakata lodo kakale enekete eya yene one-pala koua pia mekete eya kuya kamoya motane tobou ali-kiti tumai mekete komo kata nina toa pitikoa kawamoi. ¹⁰Nitoapa kiwika kikilikoa dikane tete motokaya wa piti motekete padeka mati kakete ekete ae ae etene ibini akene Babilone ta pitikaline ta kibu motikilepa kotikatapea tadeko wa oi.

¹¹Ta piko peyake topo lene kiane yenamepa Babilone makesike kopapu wa topo toa kue moamele toamoo wa tumai mekete komo kata pitikoa kawei. ¹²Nipa kini eya kamoyapa golo ni silepa ni yadi yadi tane kue wane deya ni kamo pilu kabe pikiya ni ake tane mamina ni kudulu pagene mamina ni kikome kiane mamina ni selika mamina ni kalono tane yomo eida wa yoamoi. Ni eyame latianeyaka elepade kimemeka kamo yomomeka berasi kapameka pa kapameka teke tane kume enika eniyame latianeya wane-kiti eida wa yotikile toamoi. ¹³Ni noatiki nee meke takoa pitikakiyaka lodo kalono takoa yotokiyaka tigini kalono takoa yotokaki yomo pageka gerepi po ku ueka olipe yomo ku ueka palawe kukuka witi kuka pitimekawe kaika sipi sipi kaika osi kaika osi kaime limoa aua pikiya waneka eida wa yoamoi. Ni ta pine yenane pupu-kama takamotoa kode motane ali atoaka Babilone take eida wa yoamoi.

¹⁴Eni topo lene kiane yename Babilone take mekoi yene-pala eya wa oi. Eya kuya meke tokoya noadiya wa wene piitikaneya mekiyake piamokolo wida pa meki. Kini kamoya kini mamina epetaneya enika eniya peya toa pootapeneya tokome wa moamoi wa oi. ¹⁵Eni take enika eniya topo toa kamo tokoi yene kiwika kikilikoa tete mo-

tokaya wa piti motekete tekete padeka mati kakete tumai keneya mea komo k̄ata pitikoa kawei. ¹⁶Nitōa eya wa kayo oa kawei. Ae ae etene ibini akene ta neke yename eya mamina ake tane mamina kudulu ue pagene mamina kikome kiane mamina moa kawa ni eya kue golo kue yati yati tane kue wane deya kamo pilu eya kabe pia yonoke mekoa tokoi. ¹⁷Nitōa mekoiyake enika eniya peya odene lou pinike takoa pootapeadeko wa oi.

Ue dipi yopia aua pokoi ali-kitika ue dipi-kitike mea pokoi yeneka ue dipike pupu tokoi yeneka kini kopapu ue dipike pia wetekoa tokoi yeneka kiwi peya padeka mati kakete enekoa kawei. ¹⁸Nitōa enekoli toeme napetapekale lodo kakale enekete k̄a oa ekete ae papetepa dikane ibini akene ta pade latikilepa taneya mena wa ¹⁹wene keda taneya kakete itono kugu moa wa kini tobouke pitikoa kawei. Nitoapa tumai meou toa komo oa kayo telo ekete ekete ae ku ibini akene ta-pala taneleke tumai meato. Ue dipi pine yene peya eida pote piai tekete kamo tootapekala tokoi. Nitikoiyake lou pini odeneke one eni kamoya peya takoa pootapeneya wa oi.

²⁰Nitoino, a tibu meki peyamepa kei ta tumu tokaneya pikono, ke wa kolotine meamene. Akolaliyo one takoa motane yeneka Aposelo yeneka one agale t̄awea akane yeneka kiwi peya wedia meamene. Eni take pitikoi yename kiwi toa potokakala tokoinake Akolaliyo kibu motokaka tokolo ni uku wa edelo agome oka.

²¹Nitikale pade edelo ago telekole-kama toka edelo agome kue wane uoya witi k̄u kugutukakiya kue makai wane keneya katekamo kusa uele telo pitikakome okome i tukulepa Akolaliyo ibini akene Babilone ta wia tadekateko adeka plane tuku. Eni toateko adeka plane tukule taatekoa tokalepa padameka eni ta wa enekile

toamoi. ²²Widapa moyo wia tulutu pukapea beta pia tokoimopa padameka wa yatekile toamoi. Emo kumo agopa tootapeneya pioo. Ele kule kodou oa toko ago odenemeka one eni pupu wida wa tikile toamoo. Ni kue makai wane wekotoa witi k̄u kugutukama pokome okamo padameka wa yatekile toamoi. ²³Widapa padameka labo toele wa udukakile toamoi. Widapa padane atoa motokakoi-pete ali poka atoa ni atoa motoka ali kinita wedikete okoimo padameka wa yatekile toamoi. Widapa topo lene kianeya mekoi yename eya kuya topo toa kakilepa ete yene peya moa patukoa tokoi. Ete take pitikoi peya neke peku lawetekilepa nakeneya tomo ulo enika eni poanele toa etepea pomotoa oa yotokoa toka.

²⁴Akolaliyo Babilone ta kibu motokakilepa eni take onekemo t̄awea akane yeneka one takoa motane yeneka kini kamate ponomotoa wia tukakoinake toka. Nipa ta piko peya wia tukane yene wia tukakala tokoinake kibu motokaka.

Ali Atoa Peya Mati A Tibuke

Kakete Wedikete Akenemo

19 Nititikaneyake yatekolu a tibu ali atoata kakoi matiyame agale k̄aua akene tetepo tokale yatekou. Eya wa kabunu koukakete okoi. Ali atoa toa motikilepa Akolali oneme-kama toko. Pa tikilepa oneke-kama titia toko. Onepa telekole-kama toko. Onepa dikane agono, one kei piatōe. ²Akolaliyo ali atoa kini koiso yatekakomepa niminimo-kama oa kiyoke-kama takoa enoa akakala toko. Nitoapa ibini akene pamoko atoame one peku noa toati wa ta piko peya pitikoi yene etepea pomotoa lawetekake nami wia kibu motokaka. Akolalinele takama yakoi yene wia tukakala tokakeka kibu

motokaka wa okoi. ³Eya waka kayo telo oa kakoi. Einatoa toeme nokoa kakata lodo k̄aua-kala kama pokono, Akolali kei piato wa okoi. ⁴Nimo okoli eina ada ali-kiti pagini kakoa (24) ni lene kaatapeane tuyonoya-mene kime eya tokoi. Akolali ako tobou ago meateka walaika mekata aua pitakete one kei pikete ekete ʻe nimini, Akolali kei piato wa okoi.

Sipi Sipi Tineyo Atoa Moatekake Akenemo

⁵Nimo okoli ako tobou ago meateka walai agale ludu nokome okome tone Akolaline pupu-kama takoa oneke nate wene pianeya mea tiki-kiti ibini akene yeneka ibini wamene yeneka kiwi peyame one kei piamene wa oka. ⁶Nitikale yatekolu ali atoata kakoi matiyame agale ikilepa ue ʻuu wa k̄augome oa tono bu wa wia tou toa eya wa telo oa kakoli yatekou. Tone Ali Muno Akolali telekole-kama toko agome talo toa-kala kama pokono, one kei pia ⁷ke wa kolotine meato. Sipi Sipi Kai Tineyo one atoa moateko oi ponokolo tokome one atoa oneke poademe kaloa nodokakoa kako. ⁸I atoa i mamina neme moa kamene wa padame ake tootapeneya yati yati tane mamina abe kawameneya moa meteka. (Ake tootapeane maminapa Akolaline ali atoame kiyo akenele toma yakile adeka pikoya.) ⁹Nitikale edelo agome eya wa no-pala oka. Imopa wia mekamene. Akolaliyo Sipi Sipi Kai Tinane atoa motokaka-pete kini toge kikakakuno, noe wa kayo oa motoka yene kolotine meoi wa oka. Nittoa lokakome okome ipa Akolaliyo nimini oka agale uku wa oka.

¹⁰Nimo okale kei piadene one kawane auane pitakolu okome nopa neke yagono agono, toamea. Neke oya-lawe Yesunomo yakoa motiki yene kiwi-pala kibutuane Yesunole

takama yaku agome uku. No pade kei pia kowitamano, Akolali-kama kei pia kowitamene. Yesunomo toaweake akakilepa nipa papete Epetane Yominiyo Akolaline agale toaweake akane ali-kiti wene taka taka tokana toa toaweake akako.

Ake Tane Osi Kai Patu Mekagoke Akenemo

¹¹Wa enekolu a tibu kago ketepono peaneya pikale enekou. Kago ludu ake tane osi kai pade witia noka. One patu mea noka agopa one ibinita takuta eya wa akeneya. Dikou wa oka toa-kama toko ago wa ibini oa niminile-kama toko ago waka ibini oa taneya. Ni agome ali atoa takoa enoa akakilepa kiyoke-kama toko. Poi kamotokakilepa nika kiyoke-kama toko. ¹²Ni ago one lenetapa toe itipono keneya akeneya. One wagokepa ako tobou agome watekoya nunagu-kiti watekolokaneya. One kepenekepa ibini pade wia mekaneya. Ete-kitame one ibinipa i wa wene tikiya mena. Pinali one odene wene toko. ¹³One tokoo kakene maminapa kamate pageneya. One ibinipa Akolaline Agale. ¹⁴Einago osi kai patu mea pokaka tibu poyo yatene-kiti ake tane osi kai patu mea litima pokoi. Nipa ake taneya yati yati tane mamina abe kawamene mamina kakeneya litima pokoi. ¹⁵Einagono kimane keneke eka okata olo kakene tue witoa noka. E ku yatene wia tukateka tue eni witoa noka. Eni tueme e ku yatene-pala poi toa kawa moa kawikatekoa kapa iti moa tapia talo toa-kala kawoo. Nipa telekole-kama toko ago Akolaliyo kiwi kotimi yotokome toatekale enoe wa eni yenepa gerepi po k̄u kagono waneke kautoa t̄iou toa keneya moa kautoo. ¹⁶Einagono tokoo kakene maminakeka one manakeka eya ibinita takuta ako odene tobou ago ako odene Ali Muno wa wia mekaneya piko.

¹⁷Eyaka enekou. Pade edelo ago lou patu kakome a tibu tiginike pukaneya yakoi ini yatene peya-pala kayo telo okome okome Akolaliyo toge mati kikakakono, koukoa noe. ¹⁸Ali atoa lukoa meki tobou ali-kitika poyo yatene ako tobou ali-kitika telekole toma yaki ali-kitika osi kai-kitika eni osi kai patu mea piki-kitika ali atoa peya ta pine yeneka kueme topo toa moa ege-tane yeneka ibini akene yeneka ibini wamene yeneka enika eni yene witaney-ata kolokono, kini melepu noatino noe wa kayo oa kaka.

¹⁹Nimo okale yatekene enekolu eina yo tane kai keneya agoka ta piko peya ako tobou meane ali-kitika kini poyo yatene-kitika poi kibutua nokoli enekou. Osi kai patu mea poka ago-pala one poyo yatene-palaka poi toadete ni kibutua nokoi. ²⁰Nitoo kibutua poi tokoli o yename ete wa poi toa kawa moa patukakete yo tane kai keneya ago-pala one kapene agale toaweaa akanagota dekoa motokoi. Eni kapene agopa papete yo tane kai keneya ago patu kautakoa kakome ele kule telekole toma yakeneya. Nitikompepa yo tane kai keneya agono adeka tiginike wia mekoa one yomini kowitoo tokoi yene oa yotokakala taneya. Einagota yo tane kai keneya ago-pala kapene yokakagota o yename dekoa mootokoa toe mine salepa kue itipono oa kakeneta moa pitikakoi. ²¹Einagotake lukoa mea poi tokoi yeneka osi kai patu mea pokagome wia tukatapeka. Nipa eka okata olo kakeneya one kimane keneke witoa nekene tueme wia tukatapeka. Eina witaneyata kolokoita ini yatene pitoa note kini melepu noa makapea tagakoi.

Setanu 1,000 Mali Ponoka Toa

Koa Keneke Moa Pitikaneya Meatekamo

20 Wa enekolu edelo ago pade a tibu kawa nokale enekou. Nipa eina geyo nine plane koa kago ketepono kii-pala tele tane kapa poota pikoa kakeneya nokale enekou. ²Nokompepa eina pukupuku dekoa motoka. Koto mati kaya wa akene pukupukuke uku. One ibinitapa tobou ipono wa oa Setanu wa oa taneya. Ni ago dekoa motokompepa mali ege kadukaka kapidime kakoa (1,000) ponoka toa wida meakala kamene wa togototokoa ³geyo nine plane koa keneke pitikoa loko pitikaka. Mali ege kadukaka kapidime kakoa (1,000) ponoka toa ali atoa wa oa yotokamomotoa nitika. One eida mea togateka oi ponokalepa pa tekei ya ya toano pa wa padame po kotokoa wetekoo.

⁴Wa enekolu ako tobou ali-kiti meatekoi walai-kiti enoane ni Akolali patu kautakoa kakete ali atoa takoa enemotoa moa kakane yene eni walai-kitike witipitoo mekoli enoane tokou. Yesunomo oa aua yawa Akolaline agale toaweaa akooa tokoike kabe teigane yenane yomini-kitika enekou. Eina yo tane kai keneya agono yomini latia kakaneya wane kei pia kowitamoaa kini pono yonokeka one adeka wia mekamene kote tokale wakoi yenane yomini-kitike uku. E yene kamomotekete potepa mali ege kadukaka kapidime kakoa (1,000) ponoka toa Keraisupala itono talo toa-kala kakoi. ⁵Akolaliyo ete yenepa mali ege kadukaka kapidime kadukoa (1,000) ponokale moa kamotokatekoyake o yene namolo takooa moa kamotokaka. ⁶Tuaneyake namolo kamoaa poatekoi yenepa Akolaliyo pewe

wedoa witikale kolotine meoi. Ali atoa taku takoa tuatekoi-pete o yene-pala padele toameneya Akolali Keraisu-take lodo you toa kinikile takama poi. Nipa mali ege kadukaka kapidime kadukoa (1,000) ponoka toa Keraisu-pala itono talo toa-kala kawei.

Akolaliyo Setanu Moa Kawikatekamo

⁷Mali ege kadukaka kapidime kadukoa (1,000) ponokalepa Setanu koa keneke moa pitikaneya mekata tewitiko po. Padame po kotokoa wetekakale po. ⁸Nitoa ta piko peya pitikoi yene oa yotokademe pokome Akolali-pala poi tatoe wa poi kamotokama yawoo. Nipa Goko Megoketa wa ibini akene pitikali poi kamotokakale kusa ue kibi keneya ege egeta wa-kala kadukoa one-pala kikutua poi topoi. ⁹Nitoa itono ludu kawa pitikoa pupitikama peketepa Akolaline ali atoa poi pawe kago oboa mekoita one kolotini ta unukoa meetapeoi. Nitoa unukoa mekoika a tibu toe pitakome yoa tukatapeo. ¹⁰Nitikalepa kiwi oa yotokaka ago Setanu Akolaliyo dekoa moa salepa kue itipono okoa kakene mineke pitikoo. Eina yo tane keneya ago-pala one kapene agale toawe akane agota moa pitikaneya mekoita eni pitikakale kimename eida-kama tete ete pia oto pia moa-kala kawei.

Akolaliyo Ali Atoa Takoa Enatekamo

¹¹Wa enekolu ako tobou ago meateka walai uoya ake tootapeane walai enoane ni eni walaike meka agoka enoane tokou. One mekakoa tibu itonota takoa pootapekale padameka wa enekile toamokoi. ¹²Wa enekolu tuane ali atoapa ibini akene yene ponopene yeneka one mekata lene timini takoa kakoli enekou. Nitoa kakoli boku pade-kiti moa leweaneya.

Boku pade meemoa poatiki yene i i wa wia mekapiane bokuka moa leweaneya. Nitaneyake tuane ali atoa itonoke mekete tanemo i i wa eina bokuke wia mekane toa takoa enekala taneya. ¹³Nipetepa kusa ue nakoa tuane yeneka oloyo tane yeneka tuane ali atoa pote mekoi take mekoi yeneka kamomotekete Akolali mekata pote kaatapeko. Nitikoli Akolaliyopa kini itonoke mekete tokoina toa takoa enoa akakala toka. ¹⁴Nitaneyake ali atoa tumotoa tokoyaka ali atoa tua pote mekoi taaka moa toe mine pitikaneya. Eni toe minepa ali atoa taku takoa tuadete poatiki ta wa ibini ikiya. ¹⁵Meemoa poatiki-kiti i i wa wia mekapiane bokuke ibini katekoa wia mekamene yene peya eni toe mine moa pitikaneya.

Weneya Tibu Itonotake Oa Pianemo

21 Wa enekolu weneya tibu itonota latianeya pikale enekou. Eina namolo tibu itonota takoa pootapeadeka. Namolo kusa ue mekoyaka meameadeka. ²Eyaka enekou. Akolaliyo one wa weneya latiane Yerusaleme taapa Akolali mekata a tibu pia ketipea noademe nokale enekou. Nipa ali poateka atoa kalotokou toa kalaneya tukaketikakale enekou. ³Nitoane yatekolu ako tobou ago meateka walaike agale ludu eya wa telo okale yatekou. Akolali meko yapu wida kakono, Akolali ali atoa kipala wida odeneka mekono, enoe. Kipa one yatene wa kipala opia mekilepa onepa kini Akolali wa oa meoo. ⁴Nitoa mekomepa kini komo kogatapeoo. Nipete kipa wa tuamo tumai meamo komo wamo tete moamo toi. Eina namolole peya takoa pootapeneya tokolo wa edikoa meamoi wa oka.

⁵Nimo okale ako tobou ago meateka walaike meka agome okome

okome opi padeya padeya peya weneya-kama latikala tuku wa oka. Eya waka oka. Nepala i ukumopa etene niminimo-kama ukuno, bokuke wia mekoano ta wa oka. ⁶Nimo ootokoa okome wipitiane toatekule opi taatekoane tuku. Padeya padeya peyapa anume-kama titiane toane anume-kama wipitiane toane tuku. Ue nodome tuki-kiti meemoa pomotoa ue lene togotapa ue nomoane meou. Nipa nami kakamekene pa nomoane mekala tou. ⁷Poi toa kawa moa patukaki yene edikoane epetanele yameou. Dikagopa one Akolali mekene talo toane meou. Onepa anu manago meoo. ⁸Nimo ukuyake eya yene kini kepene mama moa piti taneya mea ni nooke wene tugoa meake wawa ni ele kule poanele toa ni ali atoa wia tukoa ni mone koua piamatiki atoa-pala koua pia ni nakeneya moa wia ni ulo toa wia ni kini yoname latikoinakeya-kiti kowitua ni kapene yokoa tiki peyapa salepa kue itipono okoa kakene toe mineke moa pitikaneya meoi. Eni tukilepa taku takoa toi.

Weneya Yerusaleme Taake Oa Pianemo

⁹Eya edelo ago tatono kakoa (7) wipitia ke enekatekoya-kiti kapetekane mete tatono kakoa (7) tatite toa pikoa kakoi edelo ali-kiti padame no mekouta nokome okome ali poka atoa Sipi Sipi Kai Tinane natono yameouno, noo wa oka. ¹⁰Nitoapa Epetane Yomini nooke awinome aua pome tono kakene matike kakapokome Akolaliyo one wa latiane Yerusaleme taapa one mekata a tibu pia ketipea noademe nokale yameteka. ¹¹Akolaline pa takaloganeya ketipea nikilepa nipa kamo kue diyasipa wa akene kue wane tou toa keneya pa pa tootapeneya ketipea noka. ¹²Kue pawe kago uo mati kawa

unukatapeneya. Kago-kitika tuku kakoa (12) pikoa unukaneya. Kago pikane toa edelo ali tuku kakoa (12) kaate taneya. Eni kago-kitikepa Iserere yatene tuku kakoa (12) ibini tatimo tatimo toa wia mekaneya. ¹³Eni kago-kitipa lou witia noka lonoka lou pipoko lonoka eka lonoka kuka lonoka lonoka tebolo tebolo wa pikakala taneya. ¹⁴Kue pawe kago kagilepa kue yaupea petene mati tuku kakoa (12) moa tatia Sipi Sipi Kai Tinane Aposelo ali tuku kakoa (12) ibini tatimo tatimo toa wia mekoa taneya.

¹⁵Nopala agale eni oa kaka edelo agome golo kueme latiane iti pikoa kaka. Nipa weneya Yerusaleme ta ni eni ta kawa unukatapeane pawe ni kago-kiti adeka moma poateka iti eni pikoa kaka. ¹⁶Eni ta latikilepa kolodo tuyono pikoa latianeya. Nipa lou witia noka lono lou pipoko lono eka lono kuka lonoka odene kotu kakoa-kama latianeya. Yerusaleme taapa edikoa latia yapu wima pekene toa itime adeka moma pokomema kolodota pake-kama kilomita ege kadukaka padeka tatigime kadukoa (2,400) tadeka. Ate wima pekene toa adeka moma pokomema ludukiyaka kilomita 2,400 tadeka. ¹⁷Kue pawe kago kagete atepea kibutawineya pekene toa itime ate toa adeka moma pokomema ludukiya 144 mita tadeka. Padeya padeya pia kawa tokoya adeka moma pikilepa kini tanele tekete eniya itime-kama adeka moma pikiya.

¹⁸Kue pawe kago atepea wia kibutuma pikilepa diyasipa, wa akene kamo kueme-kama wianeya. Yapu wikilepa nipa doo eya takoa pomotoa toele yotane golo kueme-kama wianeya. Golo kueme wianeyake pa pa tootapeane gilasi keneya. ¹⁹Kue pawe kago kagilepa kue yaupea petene mati moa tatilogo eniya patu atepea kibutua kama pakeneya. Kue yaupea petene

eni moapa eya kuya kamo kue moa kalotokaneya. Eni kamo kuepa eya. Namolopa diyasipa, taku takoapa sapaia tubo keneya. Tebolo takoapa agesi, ake tootapeneya. Tuyono takoapa emerale, ke tata tigrini keneya. ²⁰Ko kakoapa sadonikisi, ake tane kiane teke teke tane kue. Ko melepu takoapa konil-iame, kiane kue. Tatono kakoapa keriso-laisi, kakai pagene kue. Ketepo kakoapa berili, tai yabunu pagene keneya kue. Pogi kakoapa topasi, padeya kakai pa-gene kue. Noi kakoapa kerisoperesi, kakai pagene kanu pagene teke teke tane kue. Tuku melepu kakoapa aiasine, padeya tubo keneya kue. Tuku kakoapa ametisi, kudulu pagene keneya. Kue pawe kagilepa enika eni kue moa tatil-ogoa eniya patu atepa kibutua kama pekeneya. ²¹Kago tuku (12) kakoapa yadi yadi tootapeane kamo pilume-kama latianeya. Eniya wane odene odene-wame kago latikala taneya. Ka-kitika doo eya takoa pomotoa toele yotane golo kueme latianeya. Golo kueme latianeyake pa pa tootapeane gilasi keneya.

²²Weneya Yerusalemene ta keneke to-bou losu yapu kawameadeka. Eni ta keneke eya agota Ali Muno telekole-kama toko ago Akolali-pala Sipi Sipi Kai Tineta eida-kama mekino, losu yapu wiatikile piamoko. ²³Eni taapa loumeka tokenemeka pa takateko toa mena. Akolali one pame-kama pa takaloga-koya. Sipi Sipi Kai Tineta labo tetepo takatekoa meko. ²⁴Eni taake witaka pa kenekepa ta piko peya pitikoi yene yamele too. Kini ako tobou mekoi-kitame kini kamoya aua pato wa eni take aua pokala toi. ²⁵Ete pia oto pia eni ta kago-kiti peaneya-kama pioo. Eida ta likileka toamokale tokome kago ketekileka toamoi. ²⁶Eni taake-kama ta piko peya pitikoi yatene-kitame kini

kamoya eya kuya epetaneya aua pokala toi. ²⁷Padeya poaneyaka eida lobutukile toamoo. Ya tanele toa oa yotokoa toka agoka lobutua pamele toamoo. Meemoa poatiki yene i i wa Sipi Sipi Kai Tinane bokuke ibini wia mekapiane yene odene eida lobutua pamele too.

Ali Atoa Meemoa Pomotoa Toko Ue

22 Eina edelo agome iyapa ena wa ali atoa meemoa pomotoa toko ue yameteka. Eni uepa eteki eteki tane kue keneya yoa kakilepa Akolali Sipi Sipi Kai Tineta talo toata mekoi walai keneke ue lene toa ²eni tube ta keneke piko polo ka ludu yoa kako. Eka oka matanu ludu ali atoa meemoa pomotoa toko yomo kaatapeko. Eni yomo malike-kama ku tukilepa tuku (12) kakoa-peta tukala toko. Nipa tokeneke-kama ku tukala toko. Eni yomo tatamepa e ku yatene yene toameneya memotoa toko. ³Ipa poaneyaka wa Akolaliyo kekaneya latikoa wakeneya odeneyaka eida pi-amoko. Eni ta keneke Akolali Sipi Sipi Kai Tineta talo toata mekoi walaipa pa pia-kala kawoo. Eidapa one pupu yename one kei pia kowitai. ⁴One lene timinika enoa toi. Akolaline ibini kini ponoke wia mekaneya meoi. ⁵Eidapa ta wa likile toamoo. Kini Ali Muno Akolaliyo-kama kiwi mekoita pa takaloga-kale tokome labo udukoa lou pa witoa toatekale piamoo. Eidapa ako tobou yene mekete eya kuya peya talo toa-kala kama poi.

⁶Edelo agome no-pala eya waka oka. Wini bokuke wia mekakamopa etene ni-minimo. Eni peya taatekoa tootapeoo. Ali Muno Akolaliyo one edelo ago pa wa wetekakilepa ele kule pene toatekole i i wa one pupu yene wene takamotoa toka. One agale papete toaweaka akane alikiti wene takaka ago Akolaliyo nitika wa edelo agome oka.

Yesu Wakapea Noatekole

⁷Kipala i ukumo yakoe wa Yesuyo oko. No wakapeane noateku tigotoko. I bokuke i i wa papete wia mekapianemo yakoa motiki yene kolotine meoi.

⁸Yone nopa i mekene uku. I bokuke wia mekapiane toane-kama anu kaleme yakoane leneme enoane tokou. Nititikoanepa i i wa enika enile yameteka edelo ago kei plane kowitadene one kawane keneke pitalogakou. ⁹Nitikolu okome noka Akolalinele takaku agono, toamea. Onekele takakilepa nipa neke oya-lawe Akolalinele agale toaweake akaki yene ni i bokuke wia mekanemo yakoa motiki yene kiwi peya-pala kibutuane onekele takakuno, no kei pia kowitamano, Akolali-kama kei pia kowitamene.

¹⁰Nimo ootokoa kakome okome wini boku i i wa wia mekapikana boku poome togotameamene. Wini wia mekapikana toa taatekoa toateko tigotokolo tekene ni uku. ¹¹Poanele tiki yene kini poanele pa toma poati. Ele kule ya tanele tiki yene kini ya tanele pa toma poati. Kiyoye akenele tiki yene kiyoye akenele toma poati. Akolalinele-kama takaki yene onekele-kama takama poati wane uku.

¹²Kipala i ukumo yakoe. No wakapeane noateku tigotoko. Kini kini toma yakoina toane topo takoane meatekuya-pala auane nouno, nepiamene-ye. ¹³Padele padele peya anume-kama titiane toane anume-kama wipitiane toane tuku. Padele padele titikileka padele padele wipitikileka no patu-kama toko.

¹⁴Kini mamina abe kootapekoi yene kolotine meoi. Mamina abe kootapeketepa nipa meemoa poatiki yomo ku oyake kotia namele too. Nika kago pikoka patukoa weneya Yerusaleme ta keneke lobutua pamele

too. ¹⁵Kago pikoka patukoa pikilepa nipa eya yene akolono pa memotoa poi. Ya tanele toa tomo lawetoo ulu toa nakeneya moa wia pamoko atoa koua pia ali wia tukoa kini yoname latikoinakeya kowitoo ete yene-pala kapene wakoa oa yotokoa tiki yene akolono pa memotoa patukoa poi.

¹⁶No Yesuyo anu edelo ago kiwiki moane wetekakilepa anu losu yatene tatono kakoa (7) meki toa i i wa toaweake akatekomo akoano pa wane wetekakou. Nopa Depidi-loeke tagene agome uku. Nopa pa wedoa toko tagoi kobu tagoi wa ibini ikiya.

¹⁷Epetane Yominiyoka Yesuke poateko atoameka namene wa iki. Ina ukumo yatekoi peyameka namene wa amediki. Ue nodome tuaneya meki yenameka namene wa amediki. Meemoane poateku ue nomoane nou wa wene piki yename ue pa nomoa nomotoane ukuno, nami tukuamatiki ue nomoa namene.

¹⁸I bokuke wiane mekapikumo yakoa motiki yene-pala no Yoneyo eya wane pubu ukuno, yakamene. Panagome-kiti i wiane mekapikumo pakeke one wene kibutua oka agale lukakalepa Akolaliyo one-pala eya topo takoa too. I bokuke wia mekapiane toa taatekoa ke enekakole-kiti einagome enemotoa too.

¹⁹Nika panagome-kiti i bokuke wiane mekapikumo pademo katekoa wakalepa Akolaliyo eya topo takoa too. I bokuke wiane mekapikule taatekoa tokalepa meemoa poateko yomo ku i ago ne namele toamoko wa ka ketekoo. Nitikale Akolaliyo one wa latiane take lobutua pamele toamokale einago etepea poo.

²⁰Kipala i toaweake akako agomepa ipa nimini taatekoa toatekomo uku wa ikilepa eya waka oko. One wakapeane noateku tigotoko wa oko.

Ee nimini. Ali Muno Yesu nitoano ta. Wete namene-ye.

²¹ Ali Muno Yesuyo kiwi peya pewe
wia yopimotoane uku-ye. Ee nimini.